


Diidz ne rdeed
guielmban



New Testament in Zapotec, Mixtepec (MX:zpm:Zapotec,
Mixtepec)

Diidz ne rdeed guielmban

New Testament in Zapotec, Mixtepec (MX:zpm:Zapotec, Mixtepec)

copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mixtepec

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 18 Apr 2025 from source files dated 29 Jan 2022
5317ca58-7555-5e4c-a420-e1e9210e2df2

Contents

MATEO	1
MARCOS	62
LUCAS	100
JUAN	164
HECHOS	211
ROMANOS	267
1 CORINTIOS	292
2 CORINTIOS	317
GALATAS	333
EFESIOS	343
FILIPENSES	352
COLOSENSES	359
1 TESALONICENSES	365
2 TESALONICENSES	370
1 TIMOTEO	373
2 TIMOTEO	381
TITO	387
FILEMON	391
HEBREOS	393
SANTIAGO	411
1 PEDRO	418
2 PEDRO	425
1 JUAN	429
2 JUAN	436
3 JUAN	437
JUDAS	438
APOCALIPSIS	440

XTIIDZ NDZON DIOS MIÑE PQUIAA MATEW

¹ Jesús meñ ne pxeel Dios ga, lo xtií Abraham, lo xtií David, ga brieequia me. Lëë grë xmenğoldoo me nu:

² Abraham goc pxoz Isaac,
Isaac goc pxoz Jacob,

Jacob goc pxoz Judá (bio zla xpëed Jacob),

³ Judá goc pxoz Far ni Zar (Tamar brieelë tsiel Judá),

Far goc pxoz Srom,
Srom goc pxoz Aram.

⁴ Aram goc pxoz Minadab,
Minadab goc pxoz Naasón,
Naasón goc pxoz Salmon.

⁵ Salmóngoc pxoz Booz (Rahab brieelë tsiel Salmon),
Booz goc pxoz Obed (Rut brieelë tsiel Booz),
Obed goc pxoz Isai.

⁶ Isai goc pxoz rey David,
David goc pxoz Salomón (lëë Salomón ga gop tsiel Urí wnaa ne bionie David).

⁷ Salomón goc pxoz Roboam,
Roboam goc pxoz Abí,
Abí goc pxoz Asá,

⁸ Asá goc pxoz Josafat,
Josafat goc pxoz Joram,
Joram goc pxoz Uzí.

⁹ Uzí goc pxoz Jotam,
Jotam goc pxoz Acaz,
Acaz goc pxoz Ezequí.

¹⁰ Ezequí goc pxoz Manasés,
Manasés goc pxoz Amón,
Amón goc pxoz Josí,

¹¹ Josí goc pxoz Jeconí (bio zla xpëed Josí).

Leñ dze ne nac Jeconí mëed, leñ dze co güeybee zhoo zha Babiloin grë zha Israel, beynie zho zho Babiloin.

¹² Babiloin, ga gol tib xpëed Jeconí brieelë Salatiel,
Salatiel goc pxoz Zorobabel.

¹³ Zorobabel goc pxoz Abiud,
Abiud goc pxoz Liaquim,
Liaquim goc pxoz Azor.

¹⁴ Azor goc pxoz Sadoc,
Sadoc goc pxoz Aquim,
Aquim goc pxoz Liud.

¹⁵ Liud goc pxoz Leazar,
Leazar goc pxoz Matán,
Matán goc pxoz Jacob.

¹⁶ Jacob co nagon goc pxoz José, meñ ne ptsieelnia Marí.
Marí goc xníaa Jesús, Meñ ne nacle diidz ga cxeel Dios guíaad lo guidzliu.

¹⁷ Zig choopchop bdziñ lo dii co, dzigoraa brieequia Jesús. Tsiida zho wban desde Abraham haxta David; stsiida zho wban desde Salomón haxta len̄ dze ne bey zho Babiloin; stsiida zho wban desde len̄ dze co haxta bdziñ dze ne goc me mëed.

*Gol Jesús
(Lc. 2:1-7)*

¹⁸ Znu bzhaac Marí grop José len̄ dze ne ziaadyob gal Jesús. Gard ctsieelnia Marí loxaque xtiidz me no ne laa me ycaa José, zeene bnabey Espiritu Sant pquialo tib mëed zdo me.

¹⁹ Zeene bien̄ Joséw, miñe been̄ me gocladz me mazd nsaan me Marí; sac sca rnabey ley ni zienalpaa me miñe rnabey ley; per laa me gocladz zhliaanse nzozit me, sacne racladz me nriee xquiel̄to Marí.

²⁰ Zhgab co no me, tibaque blulo tib xanj̄l Dios lo me lo mcaal̄.

—José (xiag David) —rëb anj̄l co—, peet tsienied guic luu, pcaania Marí gag me tsieel luu; sac gon̄ mëdyeen̄ ne zoney me ga, Espiritu Sant bnabey pquialo win zdo me.

²¹ Zeene gal dze ne laa win gal, JESUS cueelē luu win, sca grieele win sac win csilaa grē men̄ladz win lo dol̄.

²² Ga brieequia miñe bnee Dios padzeela, zeene bzeet zha ne biadnee xtiidz mew, rëb zho:

²³ Bii zan̄ to gan̄le zeene laa tib mëedbgui yquiaalo zdo tib wnaayeen̄ ne gard gnee mgui lo.

Zeene laa win gal, Emanuel grieele win.

(Emanuel nac zig nacne rnee ne: Dioszhal ziaad lo ne.)

²⁴ Zeene bna José laa guic me goc tibli; bin me xtiidz anj̄l co laa me ptsieelnia Marí.

²⁵ Laa me wban tipse grop me per ib bgaald me Marí, haxta bded dze ne laa mëdyeen̄ co gol. Bdziñ dzew, laa win gol, dzigo bleelē José win JESUS.

2

Güeygan̄ bla zha rac Jesús

¹ Tib guiedz win ne ndxie xtan Judé lē Belén, ga gol Jesús. Lëetse len̄ dze co zob men̄ ne lē Herod nac me rey ne rnabey dan co.

Goc palal dzew, laa bla zha ne run̄bey lo mel ziaad nēz ne rlan ngbidz bdziñ Jerusalén,

² bnabdiidz zho rëb zho:

—¿Pa lo dien̄ no mëed ne gac men̄ ne gnabey ladz to nu, mëed ne griin̄ gol ga? Bdziñ no tib mel nēz ne no no, mel co blu lo no laa win gol-le, miñ co ne ziaad no nu ziaaddziañ no win.

³⁻⁴ Grē menguiidz Jerusalén, zeene bin zhow bzee zdo zho. Laa Herod, rien̄draa me zha gun̄ me, bnabey me pcaalsa grē zha ne nac pxoz non, grē zha ne rseed miech ley, bnabdiidz me lo zho dien̄ pa lo nac diidz gal Men̄ ne nole diidz cxeel̄ Dios guiaad lo guidzliu ga.

⁵ Dzigo rëbchaa zho lo me:

—Belén, guiedz ne ngab Judé ga none gal men̄ co, sac scale zhobnee lo guits ne pquiaa zha ne pxeel̄ Dios padzeela biadteed xtiidz me, zeene psiaab me guic zho znu bnee zho:

⁶ Tel̄ Belén,

niicle ne winraaw lo grē guiedz ne ngab Judé, per nroob nona;

sac gon̄ ga grieequia tib men̄ ne gnabey,

men̄ ne so yquiaanap grē men̄ Israel, ne nac zho zha ne ngab lo naa.

⁷ Nacne zhliaanse bnabey Herod gocredz gza zha rac co, bnabdiidz me lo zho dien blapaa dze rac psilo gon zho blan mel co.

⁸ Blozhse ga, dzigo pxeel me zho Belén, rëb me lo zho:

—Ga goltse goltseguib mëed co. Zigne gdziel to win, goltëniegagh diidz lo naa nu, zeena ye naa ga gagan naa win.

⁹ Blozhse sca pso me diidz lo zho, laa zho bio nëz stib laa zho zie. Laa mel ne gon zho brieequia nëz ne ziaad zho ga, laa ma neraque lo zho; haxta bdzin ma ngali guic yu ne no mëdyeen co, gataa laa ma blëz.

¹⁰⁻¹¹ Zeene gon zho laa mel co blëz ga, per nli rley zho. Bzëeb zho len yu co, gon zho laa mëdyeen co no ga grop xniala win, dzigo pquitsgzhib zho lo win, bnee zho tib xtiidz zho lo win. Blozh ga blee zho ncuane zienie zho lo win, blee zho or, blee zho tiblo yaalnex, ni tiblo nceit nex rnee zho mirr, bgad zho lo win.

¹² Zeene laa gza zha rac co wbi Belén, laa ne nieted zho Jerusalén, stible nëz bzhen zho zey zho; sac bnee Dios lo zho lo mcaal, rëb me tsienied zho diidz lo Herod.

¹³ Laa gza zha rac co zey, zeene güeylulo tib xanjl Dios lo José lëetse nixguies me, rëb anjl co lo me:

—José, na zeena guche i pcaanie mëdyeen qui nëz grop xniala win, goltse nëz Egipt, sac laa Herod yquiaguib win gut me win. Egipt, ga cuëznie to win, na naaque guialnie diidz lo to zeene laa to gbi ga.

¹⁴ Guieel cogagh guche José, pcaanie me mëdyeen co nëz grop xniala win, laa zho ziese nëz Egipt;

¹⁵ ga blëz me haxta bdzin dze ne laa Herod gut. Ga brieequia mine bnee zha ne biadteed xtiidz Dios padzeela, zeene znu bnee zho: “Nëz Egipt no xpëed naa, zeene bredz naa me.”

Bnabey Herod gut grë mëedlas

¹⁶ Laa zeene gon Herod wbiredraa gza men rac co nienie zho diidz lo me, per nli blëe me. Ntseeb rac me, pxeel me zha ne güey Belén ni grëraa guiedz ne ndxie gax ga, güeygut zho grëse mëedbgui yeen ne no grë guiedz co, desde win ne golvëz, haxta win ne rap chop iz. Tibaque nan me sca ngaa mëdyeen ne nac Jesús ga niet win, sac blee me cuent zhile gac chop iz psilo gon gza zha rac co blan mel co.

¹⁷ Guieinëdox ne bio grë miech co, ga brieequia mine bzeet Jeremí men ne biadteed xtiidz Dios padzeela, zeene znu rëb me:

¹⁸ Tib redz nroob ne zëeb len guiedz Ramá.

Grë wnaa Judá, zha ne ziaad lo xtii Raquel, mbanse rac zho, roon zho no zho xquieinë xpëed zho; zha rna zha ne cchoobladz zdoos zho, sac laa xpëed zho gut.

¹⁹ Goc palal dzew laa Herod gut, dzigo pxeel Dios tib xanjl me güeynee lo José lo mcaal zaatne no José nëz Egipt, rëb me lo José:

²⁰ —José, guche i, pcaanie mëdyeen qui nëz grop xniala win, goltbire nëz Israel stib; laa zha ne quiana win ga gutle.

²¹ Dzigo brieenie José mëdyeen co ga grop xniala win, bio me nëz laa me wbire zeynie win nëz Israel.

²² Per zeene bin José lëëque tib xpëed Herod men ne lë Arquelá, men co biana xlugar Herod zobnabey xtan Judé, bdzieb José ndzinie me mëdyeen co nëz co. Dzigo bneeque Dios lo me lo mcaal tsie me nëz Galilé.

²³ Goļ zho Galilé, bdzinaque zho guiedz Nazaret, ga wbannie zho mëdyeen co. Ga brieequia miņe bzeet grē zha ne biadteed xtiidz Dios padzeela, zeene rēb zho: meņ Nazaret guiab miech nac Jesús.

3

*Psilo Juan Bautist noseed me miech
(Mr. 1:1-8; Lc. 3:1-9, 15-17; Jn. 1:19-28)*

¹ Leņ dze ne psilo Juan Bautist noseed Juan miech xtan zha Judé, dan zit ne no me ga;

² rnee me lo zho:

—įGolsaan xquielntseeb to, goľnab lo Dios guņ me to perdon grētaa doļ ne ziyun to; sac goņ laa dze bdziņle laa me csilo gnabey!

³ Lēē Juan Bautist ga bzeet profet Isá, zeene znu pquiaa me:

Bii zon miech ganle zeene laa tib tsi meņ zēēb tib dan zit, rnee me:

“Goľzhixcuua nēz ne ted meņ ne rnabey, goľsaan grē guielntseeb ne ruņ to.”

⁴ Niapse guits lad camell niaa xab Juan, guļ nac ncuaane ndxie leņ me, ni niapse nguzhanch ni dzin dan row me.

⁵ Nzian grē meņguiedz Jerusalén, grē meņ Judé, grē meņ ne no gax ro guiubee Jordán, rriee zho riequiaadiag zho zhiwseed me.

⁶ Grē zha ne rxobodļ grēse xtoļ zho, dzigo rchoobnis me zho ro guiubee co.

⁷ Laa zeene raņ me grē zha farisé, zha saducé ne rdziņ lo me ga racladz zho ye zho chobnis, dzigo rnee me lo zho:

—įMiech ngoopdoļ, masaque nac to zig nac meel! Naņ to na lēē, loxaque chobnis to laa to laale lo grē guielnēdox ne ziaadyob.

⁸ Led scada goņ, none zaacse gban to zeena glu nli dib zdoo to psaan to grē xquielntseeb to.

⁹ Ni gacniatsde to guiab to loxaque por nace to xtii Abraham, laa Dios csilaale to; sac gneli naa lo to ganle telne gacladz Dios, haxta grē quie zac gnabey me tsaalow miech ne gac zha xtii Abraham.

¹⁰ Nanle to ganle, grē yag nex, zeene rquiad nex low led rruga, rlozh ga rliaala lo gui, ga reca. Scadaa nagon gdzieelo miech ne gband zigne racladz Dios, sac rrieequia laa me nzhēņle xquibyag me chug me yag ne sca nac.

¹¹ Nli tib wrobnisse nu rnedz naa lo to, nacsew zig tib seņ, sac lēē gdib rluw laa to psaan xquielntseeb to, laa to bzēēb xnēz Dios. Saņgue meņ ne no guiaad ga, mesi Espiritu Sant gdeed me lo zha ne gliladz me; ni scagaa zha ne gliladz me, sonēz me zho zaatne nitlo zho. Ne nligaa tib meņ non nac me, tel naa peet nond naa, per ni par tib nguņdziin ne glit lab me raguiald naa gac naa.

¹² Laa me guiaad zig tib zha ne rbeeguizh zhobxtil, sac zha co rlozhse ruņme zho zhob, rgotsow zhow, laa paj rielaal zho lo gui, ga reca. Per gui ne gzēēg grē paj ne guiadbee me ga, gdziņd dze guiuuw.

*Brobnis Jesús
(Mr. 1:9-11; Lc. 3:21-22)*

¹³ Leņ dze co brieē Jesús nēz Galilé zie me nēz ro guiubee Jordán, laa me zie par cchoobnis Juan me. Bdziņ me

¹⁴ nēd Juan cchoobnis Juan me, rēb Juan lo me:

—Lēda į goņ, naa none guial lo luu cchoobnis luu naa.

¹⁵ Dzigo rēb me lo Juan:

—Nli scaw, per mazd pchoobnis naa, sac goņ ib nonguiēla dziuun ne miņe rnabey Dios.

Dzigoraa pchoobnis Juan me.

¹⁶ Laa me zieriee lo nis zeene laa zhan gbaa bzhial, gonpaa me zig rlu tib palom rlu Espiritu Sant laa me ziad-zëeb bdziñ me guic me,

¹⁷ ni blu zëeb tib tsi men co nëz gbaa ree me:

—Xpëed naa gon nac men qui, rleynie naa me, men nziuu nac me lo naa.

4

Gocladz mendox niungüet ma Jesús

(Mr. 1:12-13; Lc. 4:1-13)

¹ Zeene blozh brobnis Jesús, dzigo güeynie Espiritu Sant me tib dan zit, zaatne guiend miech; ga gocladz mendox niungüet ma me niun me mine racladz ma.

² Zeene goc choo ngbidz choo guieel no me dan co ni tib lë peet rowd me, laa me pcaabedz

³ hor co bdziñ mendox zaatne no me ga, rëb ma:

—Telne nli Xpëed Dios nac luu, bnabey tsaalo grë quie rii ncuaane gow luu.

⁴ Dzigo pquiab me rëb me lo ma:

—Znu zhobnee lo Xtiidz Dios: “Niapse por xtiidz Dios mban miech, yquiamband zho loxaque guielwagwse.”

⁵ Blozh ga güeynie ma me Jerusalén, blep ma me glaa guic yadoo nroob ne zob lad guiedz co,

⁶ rëb ma lo me:

—Telne nli Xpëed Dios nac luu, bringaa nu, benque led znu zhobnee lo Xtiidz Dios: “Znabey Dios grë xanj me yquiaanap luu, zha queedz luu, zeena ni tib quie ycaand ni luu.”

⁷ Pquiab me rëb me lo ma:

—Psoladz ganle, noque stib zaatne znu ree lo Xtiidz Dios: “Bien, Dios nac men ne rnabey luu, nódne quitnie luu me gnab luu lo me ncuaane nod gun me.”

⁸ Blozh ga bii güeynie ma me glaa tib guic gui, ga blu ma grëse guiedz ne ndxie dib lo guidzliu lo me, ni blu ma grëse ncuaan ndaan ne rap tib tib guiedz co,

⁹ rëb ma lo me:

—Bui ganle, grëse ncuaan qui gon gnedz naa lo luu telne squiitsgzhib luu lo naa niina, gunnon luu naa.

¹⁰ Horco pquiab me rëb me lo ma:

—iBiche lo naa nu mendox! Znu gon zhobnee lo Xtiidz Dios: “Diosse nac men ne rnabey, mese none gunnon luu, lo me rieguial yquitsgzhib luu; ni mine rnabey me min co none gun luu.”

¹¹ Dzigoraa biche ma lo me, dzigo bdziñ bla anjl bdeed zho ncuaane dow me.

Psilo Jesús pseed me miech nëz Galilé

(Mr. 1:14-15; Lc. 4:14-15)

¹² Zeene bin Jesús laa Juan biab ladzguiib, dzigo brieë me ga güey me nëz Galilé, guiedz ne lë Nazaret.

¹³ Zhisaque goca, brieëque me ga güey me Capernaum tib guiedz ne ndxie gax ro Nisdoo Galilé, zaatne nac xtan zha xti Zabulon ni zha xti Neftalí.

¹⁴ Ga brieëquia mine bzeet Isá (men ne pxeel Dios padzeela biadnee xtiidz me), zeene psiaab Dios guic Isá rëb Isá:

¹⁵ Grëse menzit ne ndxie xtan Galilé,

něz dan ro guiubee Jordán, gax ro Nisdoo Galilé, zaatne goccheṅ Zabulón ni Neftalí;

¹⁶ miech ne no lo ncow nac zho, per niina tib biini nroob biab lo zho.

Ladzniale guielgut no zho,

per laa biini co biab lo zho par grieve zho ga.

¹⁷ Ga psilo Jesús pseed me miech, rnee me lo zho csaan zho xquieṅntseeb zho, gbíg zho lo Dios, sac laa dze ne csilo gnabey Dios ziaadgaxle.

Bredz Jesús tap ngoozmel

(Mr. 1:16-20; Lc. 5:1-11)

¹⁸ Leṅ dze co, tib dze zieded Jesús gax ro Nisdoo Galilé goṅ me chop ngoozmel, tib zho lē Simón Pedr, stib zho lē Ndrés; grop bets zho lēetse laa zho noroṅ guieṅ ne rgaa mel lo nis.

¹⁹ Dzigo bredz me zho, rēb me lo zho:

—jGoltē goltēnaṅ zhits naa! jLaa naa cxel to tsie to stib gooz, tsietop to grē miech ne sēēb xnēz Dios!

²⁰ Horcogazh psan zho guieṅ ne rgaa mel ga, laa zho zienaṅ zhits me.

²¹ Zhisaque bzē me ro nis co, goṅ me laa Jacob ni Juan (lēē grop xingan meṅ ne lē Zebedé ga) no tib leṅ barcw gza pxoz zho, noquiaabdie zho guieṅ ne rgaa mel; dzigo bredz me zho.

²² Zigne bredz me zho biaanṅnieque pxoz zho barcw ga, laa zho zienaṅ zhits me.

Zēēb diidz grētaa milagr ne ruṅ Jesús

²³ Dipse xtan zha Galilé, guiedz ne rdziṅtaa Jesús rie me grē yadoo ne zob lad guiedz co rseed me miech Xtuidz Dios, rnee me lo zho zha racladz Dios gban zho, ni ruṅguiaṅ me grē meṅ rzacnē, tel pe guielguidztaa rzac zho.

²⁴ Tel pa lotaaw zēēb diidz scataa ruṅ me grē milagr, haxta nēz Siria bin miecha. Nzian grē meṅ co brieṅ ga bdziṅnie zho grē zhiṅguidz zho lo me: no grē meṅ rzacnē co noguitnie meṅdox, no zho rlan guielguidz gutye, no zho gutoo dipse xcuerp, no zho rlan grē pe stib guielguidz, nogaa zho rlan grē pe yooḅ; grēse zho beṅguiaṅ me zho.

²⁵ Zaatne zieetaa me, miech guizhiu ne naṅ zhits me, grē zha Galilé, grē zha Decápolis, grē zha Jerusalén, grē zha Judé, haxta grē zha ne no stib nēz ro guiubee Jordán.

5

Cho nac zha ne wen zie

(Lc. 6:20-23)

¹ Tib dzew, goṅ Jesús laa grē miech guizhiu co bdziṅ lo me, dzigo bzoquia me glaa tib guic gui win. Ga zob me, bdziṅ grē xpēēdsuel me lo me,

² dzigo psilo me pseed me zho, rēb me:

³ —jWen zie zha ne rien ib none gbíg zho lo Dios, sac ib zdziṅ zho zaatne rnabey me!

⁴ jWen zie zha ne mban rac roon niina, sac schoobladz Dios zdoo zho!

⁵ jWen zie zha ndooladz, zha ne zienie guic gban zigne rnabey Dios, sac scaania zho guidzliu ne gdeed me lo zho!

⁶ jWen zie zha ne racladz guṅ grē miṅe rnabey Dios, rzac zhow zigne rzac zha ne rcaabedz, zha ne rnabgaa zhis, sac ible zacnie Dios zho parne grieelo guṅ zhow!

7¹ Wen zie zha ne rquia zdoo miech, sac zigne rquia zdoo zho samiech zho scaque Dios squia zdoo me zho!

8¹ Wen zie zha ne mbele zdoo, zha ne biaanmbele lo xtol, sac zanlo zho Dios!

9¹ Wen zie zha ne noxco zaacse gban miech, til d zho, sac masaque mëed gac zho lo Dios!

10¹ Wen zie zha ne loxaque porne quiayun zho mine rnabey Dios, rquiana l miech zho, sac ible zdzi n zho zaatne rnabey me!

11¹ Zig nac to, zeene csilo grë miech yquiaago zho to, ctsidil zho to, yquadiidzguizh zho to loxaque ne riladz to naa, jwen zie to ga!

12¹ Nley golco zdoo to, nguieel golgac, sac gon tib guielnzaac nroob ne gneedz Dios lo to! Golsoladz ganle, scaque been zho grë zha ne pxeel me padzeela biadnee xtiidz me.

Nac to zig nac zed, zig nac biini

(Mr. 9:50; Lc. 14:34-35)

13¹ Masaque nac to lo guidzliu rii zig nac zed. Nanle to ganle pa lotaa rquiin zed, per telne nzhida, zpa dien rquiina? jLëë gdib rliaala lo guizh, zaatne rded rzë miech rzëeni zhow!

14¹ Nac to zig tib biini ne noziini lo guidzliu. Grieelod tsongueets to, sac tib guiedz ne ndxie glaa tib guic gui, grieelod tsongueetsa.

15¹ Golguien ganle nacd biini parne tsolana, sinque parne gziiniw lo grë miech ne no len yu.

16¹ Zaacse sca golgac, mine rquiin min co golgun, masaque lëew gac zig tib biini; zeena zeene gan miech biini co zien zho ganle pa lotaa men nroob nac Pxo z to men ne no gbaa.

17¹ Guiabde to togo bod laa naa zial zialtichee naa ley ne psan Moisés, o grëgaa mine bnee zha ne biadteed xtiidz Dios padzeela; sac led mincod zial naa, sinque laa naa zial gun naaw zigne no gaca.

18¹ Gneli naa lo to ganle: Laga niaa guidzliu rii, laga niaa gbaa, ib none gac mine zhubnee lo ley, mine bneegaa zha ne biadteed xtiidz Dios, ni tib lë paat gdzëda.

19¹ Gacxe waa zha ne quiits tib ley niicle mine mazdraa wina, ni cseed zho miecha zigne run zho ga, ib tedsod zha nac zha ne mazdraa win guiaan lo grë zha ne ygaa zaatne rnabey Dios. Sangue zha ne guna zigne rnabeya, ni cseed zho miech scaque tsienal zhow, zha cosi nroob gacnon zho lo grë zha ne gdzi n zaatne rnabey Dios.

20¹ Rso naa diidz lo to sca, zaacse golgac gunde to zigne run grë maistr ley, grë zha farisé; sac telne tsoxcode to gban to zigne racladz Dios, grieelod gdzi n to zaatne rnabey me.

Nodne gut miech

(Lc. 12:57-59)

21¹ Led nanle to ganle, no tib ley ne biaan lo xmengol to padzeela, rneew: "Gute luu samiech luu"; rnabeya zha ne gut samiech, ib none guetaque zho, quizhgazh zho dol co.

22¹ Sca rnee ley co, per zig nac zha ne gon në rac zdoo ran samiech, rrieequia beetle zho ga, ye zho rieguial quizh falt co. Zig nac zha ne gnee pe tib diidznë lo samiech, none gacredz zho lo wxtis zeena gunquizh zho zho dol co; zha ne quiegaa samiech, lëëque zha rguib guey zho gabil ga.

23¹ Gacxe waa tel ziesan to tib gon, per lo pcoogle zo to rsoladz to rdi nie to tib samiech to.

24¹ Gase golsan gon co, goltsie goltsienabgazh perdon lo zha ne rlëe to lo ga, gbireraa to dzigo gdeed to gon co.

²⁵ Zha ne sca rlëenie to, goltsoxco pront golguiaan wen; zeena tsiezod zho to lo wxtis, sac tel laa zho tsiezo to lo wxtis ib znabey wxtis tso to ladzguuib.

²⁶ Gneli naa lo to ganle grieede to ga, haxtaque lozh quizh to grè dimi ne gnab wxtis lo to.

Nodne tsonie miech zha ne led tsieeld zho

²⁷ Nanlaque to ganle zha rnee stib ley ne biaan lo xmengol to, rneew: “Zha ne nole tsieel, zigtaa nguiv zigtaa wnaaw, nodne tsonie zho zha ne led tsieeld zho.”

²⁸ Per zig nac zha ne gon, ran tib wnaa ni rsilo zho riogui zho tsonie zho wnaa co, laa zho bdiitsle ley co.

²⁹ Gacxe waa, bziaalo to mine rquiaqui runctal to xtol to, mazd golcueegazha; niicle tel bziaalo derech tow. Peet nacd nitlo tib lëque xcuerp to, lëdle dib nacsew tsietsoabe gabil.

³⁰ Laa tel niagaa tow, mine rquiaqui runctal to xtol to, niicle tel nia derech tow, golchuggazha. Peet nacd nitlo tib nia to, lëdle nitlo to len gabil dib nacse xcuerp to.

Nodne csëbtsieel miech

(Mt. 19:9; Mr. 10:11-12; Lc. 16:18)

³¹ No stib ley znu rnee: “Mgui ne racladz csaan tsieel, zac ctso zho; totsaque gdeed zho tib guits lo wnaa, zaatne raquiet ne laa zho psaan wnaa.”

³² Per gni naa lo to ganle: telne quiangobd tsieel zho stib mgui, ni rsëbtsieel zho, lëëque zha rguib ga yquianië tsieel zho stib mgui. Mgui ne ctsieelnia wnaa co, dol ga gun zho, sac gon nole tsieel wnaa co.

Nodne yquidie miech

³³ Ziyon to ganle zha nac stib ley ne biaan lo xmengol to rneew: “Zha ne gzeet lë Dios par glu zun zho mine bnee zho, yase zeene gdeed zho tib gona, gungaa zho pe tib dziina, ib none gun zhow.”

³⁴ Per gni naa lo to ganle: nodne sca gzeet to lë Dios, per ni gbaa nodne ne sca gzeet to, sac gon ga nac zaatne zob Dios;

³⁵ per ni guidzliu, sac lo guidzliu nac zaatne zo ni me; per ni Jerusalén, sac ga nac guiedz nroob ne rnabey me;

³⁶ guiaabгаа to gzeet to guic to. Gunscade to, sac gon zig nac guic to, per ni tib guitsguic to grielod csan nquits to, grielodgaa csan ngas tow.

³⁷ Gacxe waa ncuaañe rgobey to zrieelo gun to, golguiab: “zun naaw”, togo riengaa to grieloda, golguiab: “griyeloda”; tsode to dieen cho gzeet to, sac gon led Diosdraa rnabey min co.

Nodne ctsire miech guielñe

(Lc. 6:27-36)

³⁸ No stib ley znu rnee: “Tel cuee zho tib bziaalo luu, guiaan luu scase bleequ stib bziaalo zho, tel cueegaa zho tib lay luu, scaque been blee stib lay zho.”

³⁹ Sangue naa laa naa rso diidz lo to gon, gunscade to; zha ne gacntseeb lo to, gacndaande to lo zho. Tel cap zho lo to, tiblise golgac, ib gunde to glisague nia to.

⁴⁰ Zha ne tsiezo to lo wxtis, ni lozh ga haxta gla zho xibiaagw to, golsaan güey zhow haxta xabnal to goldeed lo zho.

⁴¹ Zeene grieequia zha ne gnabey to güey to xyo zho tib groļ hor, golgüeya, haxta tib hor goltseie güey tow.

⁴² Zha ne gnabtaa pe cos lo to, goldeeda; zig nac zha ne ziadtiñ, goldeed ncuaañe ziadtiñ zho, ctsirede to zho scase.

⁴³ 'Ziyonle to ganle no zha ne znu rnee: "Zha ne rdzieel xtiidz luu bleyne zho, scagaa zha ne rlëë lo luu, blëënie zho."

⁴⁴ Per led scada gon, ñnone zaacse gac to lo zha ne rlëë lo to! ;Zha ne rgodee to, golnab lo Dios gunlay me zho!

⁴⁵ Zeena sca glu nli xpëëd men ne zob gbaa nac to. Golgan ganle tel me rnabey me rziini ngbidz lo grëse miech, zigtaa lo zha wena, zigtagaa lo zha ntseeba; scaque nisguie me rsiaaba rquiin zho grëse zho, rbed me dien cho ngable lo me, chogaa ngabd lo me.

⁴⁶ ;Gase nasca golwi! Tel loxaque zha ne ndzieeldiidz to zha cose rleyne to, ;niacxe zgaa to guieInzaac ne gdeed Dios? Haxta zha ne mazdraa ntseeb run min co.

⁴⁷ Tel loxaque zha ne nacse menlidz to, lo zha cose zaacse rnee to, ;pe lëë guielwen ga na rlu to? Haxta zha ne runbeyd Dios run min co.

⁴⁸ Goltsoxco sca ndzinli golgac, zigne rleyne PxoZ to (men ne zob gbaa) grëse miech, scaque none gun to.

6

Zha ne run xyudar samiech

¹ 'Zeene gun to xyudar samiech to, ib gunde to zaatne ndxiepaa miech ga so to glu to xquielwen to, par gan zho mine run to. Telne sca gun to, ygaade to guieInzaac ne gdeed PxoZ to men ne zob gbaa.

² Gacxe waa, zeene gun to xyudar zha ne guiend pe yquiin, gooldide tow zigne run grë zha ne rquiaalo rquia zdoo samiech; sac zha co tel pe ncuaane rgad zho, rzo zho len yadoo, rzo zho ro nêz rlozhd yquiaabdzie zhow par gacnanpaa miecha, zeena zha ne gona guiab zho: ;zha wentaa zha qui! ;Gneli naa lo to ganle ne sca rianzuiuu zho lo miech, lëële gdib guieInzaac ne yгаа zho ga!

³ Golguien sca, zeene gun to xyudar zha ne no tib liaadz, choot lo gzodiidzde tow, per ni zha ne mazdraa ndzieeldiidz to nodne gacnaa.

⁴ Dzigo scagaa PxoZ to nroob guieInzaac ne gneedz me lo to, sac tel me grësew ran me.

Zha gzodiidznie miech Dios

(Lc. 11:2-4, 34-36; 12:22-31, 33-34; 16:13)

⁵ 'Scaque zeene gzodiidznie to me, gunde to zigne run grë zha ne rquiaalo miech wen nac zho. Sac tel zha co zeene rzodiidznie zho me, rzo zho zaatne ganpaa miech zho, zig nac len yadoo, zig nac len guiedz zaatne rded rzë miech. Gneli naa lo to ganle lëële guieInzaac ne yгаа zho ga.

⁶ Golguien zeene gzodiidznie to me, golsëëb len lidz to dziits golsioog ro yu, ga golzodiidznie me. Ible tedsod nroob guieInzaac gneedz me lo to, sac niicle ncuaane mazdraa ngeets zhliana, ran mew.

⁷ 'Ni zeene nozodiidznie to me, gunde to ncuaane nonee to lëëw rlozh, lëëw rsilo zigne run grë zha ne runbeyd me. Sac zha co rzac zho por nroob diidz gnee zho, por nzian vuelt gnee zhow dzigo squiaadiag mew.

⁸ Gunscade to, sac me ne nac me PxoZ to gardle gnee to xliaadz to lo me laa me nanle pe nac ncuaane rquiin to.

⁹ Gacxe waa zeene gzodiidznie to me, znu golnee: Dios, luu ne nac luu PxoZ no, zob luu gbaa; luuse nac men ne mazdraa ndzon.

¹⁰ Luu nac men ne gnabey no, mine gnabeytaa luu zigne raca gbaa, scaque none gaca lo guidzliu nu.

11 Been guielnzaac bneedz ncuuaane dioow no nadze.

12 Bzhiguieł been no perdon grëse doł ne ziodziuuñ no lo luu, zigne rdziuuñ no samiech no perdon grë falt ne ruñ zho lo no.

13 Gdeete luu diidz yquuil menđox no, been guielnzaac bla no lo ma.

Luu nac meñ ne rnabey, meñ ne rap poder, meñ ne mazdraa nroob. Miñe rnab no nu, ndionpaa no zuñ luuw.

14 'Sca nagon none gnee to. Ni golgona ganle, zha ne gon guñ samiech zho perdon tel pe nactaa falt ne been zho lo zho, scaque Pxoz to meñ ne zob gbaa, zun me zho perdon.

15 Zha ne guñd samiech zho perdon, niicle megaa guñd me perdon xtoł zho.

16 'Stiba, zeene nocuan to nozodiidznie to me, guñbande to lo to. Sac grë zha ne rquiaalo miech wen nac zho, sca ruñ zho; zeene nocuan zho xtsiinpaa ruñ zho ruñmban zho lo zho par gan miech laa zho nocuan. Gneli naa lo to ganle, zha ne sca ruñ lëele guielnzaac ne yгаа zho ga.

17-18 Guñscade to, nguieel golgac ine golzëë biegw guic to, golquib lo to, zeena ni tib choot guieñd laa to nocuan, loxaque Pxoz to gacnaa, sac grëse ncuuaane rac nguets ran mew. Grëse ncuuaane rac, me raña, me nac meñ ne gneedz tib guielnzaac nroob lo to.

19 'Tsienalde to loxaque dien zha gapchen to lo guidzliu rii, sac nac ncuuañ lo guidzliu rii rban ngbaana, rnitlo mxila, haxta noxtseeb guioochena.

20 Mazd goltsoxco yгаа to guielnzaac ndzon ne no gbaa, sac miñe no gbaa, led yed miñ co guioochen, led yed miñ co cuan ngbaan, led yedgaaw gnitlo mxil.

21 Golgona ganle, guielnzaac ne gon guñlo to, ga glu pa gdziñ xalm to, sac zaatne guñlo to guielnzaac co ga nac zaatne gdziñ xalm to.

22 'Rriequia nac bziaalo to zig nac tib biini. Telne niapse lo grë ncuuaane ndzinli rwi to, dzigo gdipse xcuerp to no lo guielbiini.

23 Laa telne loxaque lo grë ncuuaane nonguield rwi to, dzigo gdipse xcuerp to no lo guielcow ga. iZha rnazhe lo guielcow co, tel lëëque biini noyac guielcow!

24 'Golgona ganle, grielod gon gleynie to dimi, ni gleynieque to Dios. Ib none telne Dios rleynie to, me none gleynie to, togo dimigaaw, dimi golleynie.

25 'Gacxe waa, gni naa lo to ganle: Tsode to zhgab dien zha gban to lo guidzliu rii, pa griee pe gow to, pe guie to, pe gacwxabga to. Stiba, iñiacxe mazdraa non guielwagw lo xquielmban to? Xabga tow, iñiacxe mazdraa nona lo xcuerp to?

26 Golwi lo grë mguin ganle, led yed ma rquia gon, led yed ma rquia wlaap, led yed ma rgotsow pe guielgon, per row ma, sac Pxoz to meñ ne zob gbaa, meñ co rdeed ncuuaane row ma. iTel to gon, mazdraa non to lo grë mguin col!

27 Ni lalnu paat rquiinda tant tso to zhgab. Telne guiab to tso to zhgab dien zha gacnool xtse to spalal yeense, iñiacxe zrieelo to guñnool tow?

28 'Zig nac lar, ipe nacne tant tso to zhgab dien pe gacwxab to? Pe rwide to lo grë guiee ne ganle zëeb dan, zha rrooba, led yeda rio zhgab dien zha gacwxaba, per niow rnaw;

29 gni naa lo to ganle, per ni rey Salomón con grë xab niazh me, blud me scataa niow.

30 'Gase na ganle golwi, niicxe grë guiee dan co na, zna dze zob nguiaw, gzhe widz laaw bidzle, laaw tsecl, ni scataa niow rgacwxab Diosa, ipe tel to dzigo ygacwxabd me, niicle ne squi gard guieñ to dib zdoo to gnalo to me?

31 'Tsode to zhgab sca guiab to: "iBay pa griee pe dioow ne, pa griee pe dioe, pa griee pe dziaacwxab ne?"

³² Grë miech ne runbeyd Dios, tibaque zhgab co rio zho. Sangue to go_lsoladz gan_le, Pxo_z to me_n ne zob gbaa, nan_le me pe nac grë xliaadz to,

³³ me nac me_n ne gneedz ncuaa_ne yquiin to, per ib none glo tsoxco to gban to zigne rnabey me.

³⁴ Go_lguien sca tsode to zhgab dien zha ted to gzhe widz, sac gzhe widz co zhaalaeque xco ne ziaad. Tib tib dze zhaase zhaase zhgab ne ziaadniew.

7

Nodne gzee zdoo ne cho zha rac

(Lc. 6:37-38, 41-42)

¹ Blozh ga rëbchaa me lo zho:

—Go_lguien, ib gunde to në gac zdoo to zeene ran to ncuaa_n nonguiel_d ne run stib miech, sac to tozhal gunquizh zhow; zeena scagaa Dios, gunscad me to.

² Sac gon tel zha rzac to samiech to, scasaque sac Dios to.

³ jLëda ga gon tso to lozhd gzee zdoo to dien cho pe run, ni nenda mazdraa mine run to!

⁴ jPe ro to glisqui to mine run stib zho, ni tel mazdraa nac mine run to?

⁵ jGo_lguien sca glude to ncuaa_ne nacde to! Glo go_ltsoxco ndzinli gac to, dzigo lozh ga zac tsienee to lo stib zho zha gacndzinli zho.

⁶ Ndzon nac Xtiidz Dios, gdeete tow lo zha ne rlëeniew, sac gon rrieequia lo mëcw ga gdeed tow, ib zun zho mine run mëcw zactseeb zho lo to. Naca zig nac quie perl, gdeete tow lo zha ne rleynieda, sac gon rrieequia lo nguts ga gdeed tow, tel ngutsa niicle ncuaa_ne mazdraa non glaal zho lo ma, loxaque gzëeni maw.

Ncuaa_ne gnabtaa ne zgaa new

(Mr. 1:22; Lc. 6:31, 43-44, 47-49; 11:9-13; 13:24-27)

⁷ Ncuaa_ne rquiin to, go_lnaba lo Dios, scagaa me zneedz mew. Go_lguib tel pe racladz to, me nac me_n ne gacnie to gdziel tow. Go_lcuedzlë me, scagaa me scania me to.

⁸ Sac grëse zha ne rbig lo me rnab zho ncuaa_ne rquiin zho, rdeed mew. Zha ne rguib ncuaa_ne racladz, racnie me zho rdziel zhow. Zha ne rbedzlë me, rcaania me zho.

⁹ Go_lwi gan_le, zig nac to zeene rnab xpëed to quiet gow win, çniacxe ziazh to co to tib quie nia win?

¹⁰ Zeene rnabгаа win mel, çniacxe zdeed to tib meel lo win?

¹¹ Led rioxco to lëe niapse ncuaa_ne wen rdeed to lo xpëed to, niicle ne miech ntseeb nac to. Telne sca rioxco to xpëed to, pele_l Pxo_z to dzigo, me_n ne zob gbaa, tsoxcod me to. Ib tedsod grëse zha ne gnab lo me gdeed me ncuaa_ne rquiin zho, zdeed mew.

¹² Zha ne racladz ndzinli gac miech lo zho, none glo zho zaacse gac zho lo miech. Zigtaa ley ne psan Moisésa, zigtagaa mine bnee grë zha ne biadteed xtiidz Dios padzeelaw, sca rnabeya.

¹³⁻¹⁴ Go_ltsoxco sca tsienal to mine rnabey Dios, niicle ne nac guielmban co zig nac zeene rzë ne tib nëz nia. Zhis zha ne rzëeb nëz co, per nëz co zgaa miech guielmban ndzon ne rdeed Dios. Sac gon zha ne mban zigne notaa guic zho, rrieequia tib nëz nzhen ga zie zho; ndal miech ne zie nëz co, per nëz ne nitlo zho ga zie zho.

¹⁵ Nsin go_lso lo zha ne gacladz yquidie to gnë zho xtiidz Dios noteed zho, niicle ndooladz rlu zho pale cho grë mëcwxiil yeen, per zha ntseeba, masaque nac zho zig grë coyot blë.

¹⁶ Zigne runbey miech tib yag por nex ne rquia low, scaque wen wen gołwi zha nac ncuaa^{ne} run zho, dzigo ga gunbey to cho nac zho. Sac gon zig nac uv, rquiada lo yag guiets; niicle guigwgaaw rquiada lo grè lbè guiets.

¹⁷ Tib tib yag nex rdeedsew xnexa. Tib yag wen, nex wen rquia low; scagaa yag ncuana, nex ncuana rquia low.

¹⁸ Grieełod yquia nex ncuana tib lo yag ne rquia nex wen, ni grieełodгаа yquia nex wen tib lo yag ncuana.

¹⁹ Gacxe waa grè yag ne rquia nex ncuana, paat rquiinda, lèè gdib rruga, rlozh ga rzèèg zhow.

²⁰ Min co nagon rne naa lo to, zha ne sca guiaad, por ncuaa^{ne} run zho ga gunbey to cho nac zho.

²¹ 'Grè zha ne rnee noxco zho mine rnabey Dios, no zho lega rneesew. Nenda haxta rnee zho, naa nac men ne rnabey zho, per gdzind zho zaatne rnabey Pxo^z naa. Sac zha ne nlipaa run mine rnabey me, zha cose gdziⁿ ga.

²² Gal dze co, nzian zha ne grieequia gnè lo naa: "Conque rdziuuⁿbey no luu, blactaa name bio no bionee no Xtuidz luu lo miech, nzian milagr ne bdziuuⁿ no, haxta mendox bdziuuⁿcxooⁿ no zeene bzeet no lè luu."

²³ Niicle sca gnè zho, ib ycaania^d naa zho, sonèz naa zho; sac ni lalnu beend zho ncuaa^{ne} ndzinli.

²⁴ 'Zha ne rquiaadiag mine rne naa, ni rioxco zho rban zhow zigne naca, rrieequia nac zho ga zig tib zha ndzielguic ne bzaa lidz zaatne nac tib lo quie.

²⁵ Niicle riab guiedox per peet racd lidz zho, niicle rriee medox, nis naal ne raclo rded zaatne zoba ga, per rbixcheda.

²⁶ 'Laa grè zha ne rquiaadiag xtudz naa, ni rioxcod zho gban zhow zigne naca, ziaad gac zho ga zig tib zha nxen ne güeyzoob lidz zaatne nac tib lo yuzh.

²⁷ Znuse bnitlo lidz zho, sac zeene biab guiedox, lo medox ne brie^e, lo nis naal ne goclo bded zaatne zoba, znuse bixchew, ni stib lèw biand.

²⁸ Zeene blozh bnee Jesús, grè miech ne noquiaadiag ga, per nli rzee zdo^o zho gon zho zha rseed me,

²⁹ sac rlu men rnabey nac me, led yed me rseed miech zig rseed grè maistr ley.

8

Biac tib mgui ne rlan lepr

(Mr. 1:40-45; Lc. 5:12-16)

¹ Laa Jesús ziad-zèèb cho gui win co, miech guizhiu ne nał zhits me,

² tibaque brieequia tib mgui ne rlan guiedzdox ne lè lepr, wbig me pquiitsgzhìb me lo Jesús, rèb me:

—Tebaa siguieel luu gun^{gu}iac luu naa.

³ Dzigo pxobnia Jesús guic mgui, rèb Jesús:

—Zung^{gu}iac naa luu. ¡Niinagazh laa luu guiaaⁿmbe!

Horcogazha laa grè guiedz co bnitlo.

⁴ Dzigo rèbchaa Jesús lo me:

—Bina ganle, choot lo gzodiidzd luu gon zha biac luu; sinque güey lo pxoz güey^{san} gon ne rieguiał gdeed luu zigne rnabey ley ne psan Moisés, zeena gan zho ganle laa luu biacle.

Biac tib zha ne rquia dziin tib lo menguiib

(Lc. 7:1-10)

⁵ Loxaque bdziñ Jesús guiedz Capernaum, laa tib meñ ne rnabey lo xmenguiib zha Roma bdziñle lo me, rnab meñ co gunguiac Jesús tib zha ne quia xtsiñ me, rëb me:

⁶—Been tib guieñzaac beenguiac tib zha ne rquia xtsiñ naa, laa zho nix lidz naa ib gacd grial zho, mban rac zho yoobdox ne rquia zho.

⁷Dzigo rëbchaa Jesús:

—Peet nacda, na së naa guio ne gunguiac naa zho.

⁸—Coo —rëb menguiib co—, rieguald csodziin naa luu sëe luu haxta lidz naa. Nanpaa naa zrieelo luu nugazh gnabey luu guiac zho.

⁹Sac zig nac naa no zha ne rnabey lo naa, ni ron naa miñe rnabey zho; scagaa tel guiep naa tib lo zhaguiib ne rnabey naa: “Güey nu”, rie zho; rnegaa naa: “Dë nu”, riaad zho; zha ne runga dziin lo naaw, miñe rnabeytaa naa zho, run zhow. Scaque luu nagon nanpaa naa zrieelo sca gnabey luu guiac xmoz naa.

¹⁰Zeene gon Jesús sca rnee meñ co, rley me, rëb me lo grë zha ne zienal zhits me ga:

—Lo grë zha Israel, gard gon gan naa tib zha ne squitaa dib zdoo rnalos Dios.

¹¹Ni golquiaadiaga ganle, zdziñ dze grële zha zit ne squi gnalo Dios, zha co ygaa sobnie Abraham, sobnie Isaac ni Jacob zaatne rnabey Dios.

¹²Laa grë zha Israel, niicle nac zho zha ne nac diidz gdziñ ga, lel lo ncow nëz ley guiaan zho, ga tso zho goonnë zho, haxta gow lay zho lo guieñdëdox co.

¹³Blozh ga rëbchaa me lo menguiib co:

—Bzë nasca, gocnan ganle zigne bliladzse luu guiac xmoz luu, sca gaca. Horcogazha laa moz co biac.

Biac xniadzoop Pedr

(Mr. 1:29-34; Lc. 4:38-41)

¹⁴Laa zeene bdziñ Jesús lidz Pedr, gon me laa xniadzoop Pedr nix rlan xlëe.

¹⁵Dzigo bded me zaatne nix zhuz co, zigne bzheñ me nia zhuz laa xlëe co blëz. Horcogazh guche zhuz beenlo zhuz ncuaañe dow zho.

¹⁶Ziedzele dzew, laa ngbidz rzëëblew, zeene bdziñ grë miech co, nzian grë zha ne nosacsi mendox bdziñnie zho lo me. Grëse zho beenguiac me, goctox me lo grë mendox ne nosacsi zho ga, benxoon me ma; ni zha ne rlangaa pe stib guielguidz, grëse zho beenguiac me.

¹⁷Ga briequia miñe bzeet Isá, meñ ne biadteed xtiidz Dios lo miech padzeela, zeene rëb me: “Grëse xquieñe ne, grëse guielguidz ne rziac ne, me biw.”

Zha ne racladz sëeb xnëz Jesús

(Mr. 4:35-41; Lc. 8:22-25; 9:57-62)

¹⁸Zeene gon Jesús scataa ndal miech ne goclo lo me ga, dzigo bnabey me xpëëdsuel me gzhixcuuaa zho, sac laa zho no tedquia stib nëz ro nisdoo co.

¹⁹Dzigo wbig tib meñ ne nac maistr ley lo me, rëb maistr co:

—Zaatne tsietaa luu gon, sënal naa zhits luu.

²⁰Dzigo rëbchaa me:

—Gocnana ganle, naa ne nac naa Mgui ne pxeel Dios, peet rapd naa nu, mazd zig nac grë mëz, grë mguin, rap ma zhibliee ma, rap ma zhiptsieez ma; per naa per ni zaatne gagues naa quanian naa.

²¹Wbigaque stib zha ne rzënalë zhits me, rëb zho:

—Ye naa gon sënal naa zhits luu, per bzhiguiel bneedz diidzbey cuëz naa gangazh naa tsoliu pxoz naa.

²² Pquiab me rëb me:

—Dënal zhits naa. Psaan, nzian grë zha gut no, tsow tsiequeets zho samengut zho.

²³ Dzigo laa me bzëëbnie xpëëdsuel me tib leñ barcw, laa zho zie.

²⁴⁻²⁵ Laa zho zie lo nis co, tibaque zeene psilo brieë tib medox, masaque rlis me lo nis co, laaw psilo rzëëb leñ barcw. Dzigo lëëlëd güey zho güeycuaan zho me, sac lëëtaque nixgues me.

—Ligier ganle —rëb zho—, blee mcaal lo luu. ¡Bui ganle laa ne nitlo lo nis rii, csaand luu guet ne nu!

²⁶ Dzigo rëbchaa me lo zho:

—¿Pe nacne squitaa rdzieb to? ¡Gardaque dzigo lëë gliladz to cho nac naa!

Dzigo guche me, bnee me lo me co, bnee me lo nis co cuedzew. Horcogazha blëz me co, niicle nis cow laaw bredze.

²⁷ Zeene gon zhow, bzee zdoo zho.

—Bay chozhe waa nac men rii —rnee zho—. ¿Zha nac ne haxta me, haxta nis ron xtiidz me?

Men Gadar ne nosacsi mendox

(Mr. 5:1-20; Lc. 8:26-39)

²⁸ Laa zho bdziñdze stib nëz ro nisdoo co, zaatne nac xtan zha Gadar, zeene brieëquia chop mgui ne nosacsi mendox, bdziñ lo Jesús ga. Zha ntseeba, rdzieb miech zho, choot rdete nëz co. Leñ baa brieë grop mgui co bdziñ zho ga,

²⁹ nguiëdz roptsie zho rnee zho:

—¡Peet gund luu no Jesús, psaan no! Rdziuunbey no luu, Xpëëd Dios nac luu. Ne nligaa beëñ guieñzaac csacsid luu no niinaga.

³⁰⁻³¹ Zitlaaque ga ndxie tib dzoon nguts notop lag, dzigo bñab grë mendox co lo Jesús rëb ma:

—Telne cuee luu no nu, bzhiguiel bneedz diidz lose grë nguts qui gdziñ no.

³² —Niinaga sca gołtsie —rëb me.

Zigne psaan mendox co grop mgui co, güey ma bdziñ ma lo grë nguts co. Horco psilo grë nguts co, rquiaa ma corr güeypix ma tib ro yeedox ne quia ro nisdoo co, bliaal ma lo nis, grëse ma gut.

³³ Zha ne quianap grë nguts co, gzase zho bzhoon. Güey zho lad guiedz güeyzodiidz zho zha goc grë nguts co, ni bzodiidz zho zha biac grop mgui ne nosacsi mendox ga.

³⁴ Grëse miech co, brieë zho zieso zho. Zeene bdziñ zho gon zho laa Jesús zo ga, dzigo bñab zho lo me siguiel me gbi me xtan zho.

9

Biac tib men ne gutoo

(Mr. 2:1-12; Lc. 5:17-26)

¹ Dzigo wbiireque bzëëb zho leñ barcw, bdziñ zho guiedz Capernaum stib, sac ga nac zaatne rbëz Jesús leñ dze co.

² Zhisaque goc bdziñ me, laa zho bdziñniele tib men rzacne lo me, dipse men co gutoo, ib gacd së me. Lo yag zhoob me bdziñnie zho me ga.

Zeene gon Jesús dib zdoo grë zha co rnalo zho ne me gunguiac men rzacne co, rëbchaa me lo men rzacne co:

—¡Nley bloo zdoo luu xin! ¡Laa naa beñle perdon grëse xtoñ luu!

³ Ga zob blalaa maistr ley, zeene gon zho sca bnee me, bza zdoo zho rëb zho: “¡Quiaguitnie men qui Dios gon squi rzë xtiidz me!”

⁴ Bienga Jesús sca rza zdoo zho, dzigo rëbchaa me:

—Lëda i gon squi rza zdo to.

⁵Nli nganda guiab ne lo miech: “Laa naa benle perdon grëse xtol luu”; per grieelod lega guiab ne laa ne gunguac zho.

⁶Gacnan to sca ganle naa ne nac naa Mgui ne pxeel Dios, ible rap naa poder par gun naa miech perdon.

Dzigo rëbchaa me lo men rzacne co:

—iNiinagazh guche i, bi yag ne bzhoob luu i, zeen bzë!

⁷Zigne sca bnee me, laa mgui co bzoli, laa me zey.

⁸Grë miech guizhiu ne ndxie ga, zeene gon zho sca beenguiac me mgui co, bdzieb zho. Psilo zho rdeed zho xquizh lo Dios, scataa poder ne bdeed Dios lo me.

Bredz Jesús Matew

(Mr. 2:13-17; Lc. 5:27-32)

⁹Blozh ga laa Jesús briece ga. Ro nëz zieded me gon me tib men lë Matew, lëëtaque laa men co zob lo mezh zaatne razh dimi ne rey lo zha Roma; sac me rcaania dimi co. Dzigo bredz Jesús me tsienal me zhits Jesús. Ga guso me, laa me zienal.

¹⁰Bded ga güenie me Jesús tib wagw lidz me. Grë zha ne rcaania dimi ne razh lo zha Roma, grë zha ne zëëb diidz nac zha ntseeb, tipse brenie Jesús zho grë xpëëdscuel me.

¹¹Blalaa zha farisé, gon zho sca tipse zobnie me grë zha co, bded ga, rëbchaa zho lo xpëëdscuel me:

—iMod scataa na rownie xmaistr to grë zha ngoopdol, grë zha beed ne nac recaudador!

¹²Bin Jesús sca quianee zho, dzigo rëbchaa me lo zho:

—Nanle to ganle, zha ne run rmed, zaatne no zha rzacne ga rquuin zho, ñiacxe squiin zho zaatne no zha ne ndip ndaan?

¹³Golsoladz ganle znu rnee Dios: “Laa naa racladz gacndooladz miech, yquia zdo zho samiech zho, racladzdaxe naa waa guiaad zho dieen peraa guiaadlogon zho lo naa.” Mazd ganle goltsie, tsow golsob golguien dien zha nacne sca rnee me. Tel naa, zialguibd naa miech wen, sinque laa naa zialguib grë zha ngoopdol.

¿Pe nacne rcuand xpëëdscuel Jesús?

(Mr. 2:18-22; Lc. 5:33-39)

¹⁴Bdzinaque xpëëdscuel Juan Bautist, bnabdiidz zho lo Jesús, rëb zho:

—¿Pe nac waa ib rcuand xpëëdscuel luu? Ni no grë no zha farisé, zhiga zhiga laa no rcuanle.

¹⁵Pquiab me rëb me lo zho:

—Zaatne nadien noyac tib guieltsieel, ¿pe niacxe lega csilo grë zha ne ndxie lo lni tso zho guielnë, ycuan zho, ni ran zho laa mgui ne notsielniea zo lo zho? Per dzin dze zeene laa mgui co gbiche, ni zeene laa dze co gdzin, dzigosi nagon rieguial tso zho guielnë, rieguial ycuan zho.

¹⁶Ranle to ganle, zha ne rquiaabdie tib lë lar, yquiaad zho lar cub lad lar gox, sac zha ne sca gun paat yquiind wquiaabdie co. Zeene laa lar cub gbe, lëëque lëew gunnat zaatne nriez lar gox.

¹⁷Scaque tsod zha ne cotsow vin cub tib len guid ne padzeela noquiin, sac stsiez nziu cuba; dzigo niicle guid cow, niicle nziugaaw laaw nitlo ga. Gacxe, tel nziu cuba none len guid cubaque tsotsowa.

Brieaban tib mëdwnaa yeen

(Mr. 5:21-43; Lc. 8:40-56)

18 Lëëtaaque sca quianee Jesús lo xpëëdscuel Juan Bautist, zeene bdziñ tib mgui ne nac zha non yadoo. Zigne bdziñ me pquitsgzhib me lo Jesús, rëb me:

—Been tib guielnzaac sè luu guio ne lidz naa. Laa tib xpëdwanaa naa blozh niina, per nanpaa naa telne cxobnia luu guic win, zbeeban luu win.

19 Dzigo bio Jesús nëz zianał me zhits men co, gza xpëëdscuel me.

20 Lad grë miech ne zianał ga, lad co no tib men wnaa, gocle tsiipchop iz rlan me tib guielguidz, rzac me zigne rzac grë men wnaa gzob mëë, tibaque rlan mew ib rbëzda.

Ga zie me, zeene wbig me nëz zhits Jesús, bzhen me ro lar ne mbix Jesús,

21 sac tibaque güeynie guic me, ziac me totsaque ygaa xab Jesús nia me.

22 Dzigo wbiro lo Jesús, dze bui Jesús lo me.

—Xin —rëb Jesús—, peet tsienied guic luu. Laa luu biac sacne bliladz luu naa.

Gataa laa wnaa co biac lo guielguidz co.

23 Laa zeene bdziñ Jesús lidz men rnabey co, laa zha ne rool ndxiele, noquiaa zho grë di ne rac lo ngutoo, grëraa zha ne ndxie ga, nguietz zëëb tsi zho roon zho, tib ruid ne rac.

24 Dzigo rëbchaa me lo zho:

—Golree nëz ley, sac gon gute mëëd qui, nixguiesse win.

Zha ne rlëë, zha ne rzhidzniegaa me, laa zho brieë ley.

25 Dzigo laa me bzëëb len yu zaatne nix mëëd co, bzhen me nia win. jHorcogazha laa win guche!

26 Grëse guiedz ne ndxie dib gax ga, gocnan miech scataa milagr nroob ne been me, bleeban me mëëd co.

Biac chop zha ne rołd lo ni tib zha ngop

27 Zeene laa Jesús wbi ga, nëz zie me brieenał chop zha ne rołd lo zhits me, nguietz rbedz zho rnee zho:

—jJesús, xingan David, pquia zdoo no!

28 Bdziñ Jesús yu ne rbëz me, laa zho wbig lo me. Dzigo rëbchaa me lo zho:

—¿Dib zdoo to dzigo lëë riladz to zrieelo gunguiac naa to?

—Dib zdoo now —rëb zho.

29 Dzigo pquiaania me zhits bziaalo zho, ni rëb me:

—Miñe bliladz to i nasca, laaw gac niina zigne bliladz tow.

30 jHorcogazha laa lo grop zha co biac!

Dzigo pso Jesús diidz lo zho choot lo gzodiidzd zho zha biac zho,

31 ni zigne brieë zho ga, laa zho bzodiidzlew. Blozh ga, grëse guiedz ne ndxie dib gax ga, gocnan miech scataa nac milagr ne run me.

32 Loxaque wbi grop zha ne biac lo ga, laa bla zho bdziñlaque, bdziñnie zho tib men ne nosacsi menđox, psanngop ma men co.

33 Dzigo benxoon Jesús menđox co, zeene laa ma bzhoon laa men co psilo bnee. Grë miech guizhiu ne ndxie ga, per nli rzee zdoo zho, rnee zho:

—jWaltaa gard dzian ne tib men ne squitaa gun grë milagr qui!

34 Laa grë zha farisé rnee:

—Ma ne rnabey lo menđox nacie men qui, gane rrieelo runxoon me menđox.

35 Grëse guiedz ne ndxie gax ga, zigtaa guiedz nrooba, zigtagaa guiedz lasa rie Jesús rieseed me miech. Zaatne rdzintaa me, rie me xyadoo zho rnee me lo zho zha racladz Dios gban zho, ni runguiac me zho tel pe nactaa guielguidz ne rzac zho.

³⁶ Zeene ran me grë miech guizhiu ne rcaalsa lo me, rquia zdoo me zho, sac ran me mban rac zho guiend cho tib zha ne gacnie zho, rac zho zig grë mëcwxiiil yeen ne guiend xbaxtor.

³⁷⁻³⁸ Tib vuelt haxta rëb me lo xpëedscuel me:

—Golnab lo Dios cxeelraa me zha ne gun xtsiin me. Golwi ganle pe zhidaa grë miech qui, quiambëz zho dien cho gnee Xtiidz Dios lo zho. Masaque nac zho niina, zig tib guielgon ne golle gliiap.

10

Bzo Jesús zha ne tsienee xtiidz me (Mr. 3:13-19; Lc. 6:12-16)

¹ Blozhse sca bnee Jesús, dzigo bredz me gza tsiipchop zha ne nac xpëedscuel me ga, bzo me zho tsienee zho Xtiidz Dios lo miech, bdeed me poder lo zho guncxoon zho mendox zaatne nosacsi ma miech, ni gunguiac zho grë men rzacnë.

²⁻⁴ Znu lë gza tsiipchop zha co:

Simón (zha ne rneeque zho Pedr),

Ndrés (bets Simón),

Jacob ni Juan (zha co nac xingan Zebedé),

Lip,

Bartol,

Mazh,

Matew (zha ne ptop dimi ne razh lo zha Roma),

Jacob (xingan Alfé),

Lebeo (zha ne rneeque zho Tadé),

Simón (zha ne no lo partid ne racladz griece zha Roma Israel),

ni Judas Iscariot (zha ne güeyto Jesús).

Pxeel Jesús zha ne tsienee xtiidz me (Mr. 6:7-13; Lc. 9:1-6)

⁵ Blozhse ga, pso me diidz lo zho zha tsie zho, rëb me lo zho:

—Nanle to nagon, tsiede to zaatne no grë zha ne nacd zha Israel, niicle sëëbde to grë guiedz ne ndxie xtan zha Samar.

⁶ Zaatne no grë zha Israel, gase goltsie; lëë grë mëcwxiiil ne nonziaab ga.

⁷ 'Goltsie, goltsienee lo zho gacnan zho ganle laa dze ziaadgaxle zeene laa Dios csilo gnabey.

⁸ 'Grëse zha ne rzacnë, golgunguiac zho; zha ne rlan guiedz lepr, golsanmbe zho; zaatne nix zha ne gutle, golcueeban zho; grë zha ne nosacsi mendox, golguncxoon ma. Peet gnabde to lo miech, golguien ganle lega bnedz naa poder qui lo to, bzhiide tow.

⁹⁻¹⁰ 'Peet güeyde to, xab tow, lab tow, miñe nacwse to, miñe quiase ni to, miñcose goltsienie. Güeyde to dimi, per ni tib quiet güeyde to; sac zaatne tsiegun to dziin rii, ib ga none gneedz zho ncuañe gow to.

¹¹ 'Guiedz ne gdziñtaa to, golguib dien pa lo no tib zha ne ndzinli, dzigo lidz zha co goltsiebëz, haxta gza dze ne laa to gbi guiedz co.

¹² Zeene noguib to pa cuët zho, yu ne tsie to, zaacse golgac, golquiaabdiuzh zha ne no yu co,

¹³ golnab gunlay Dios zho. Telne wen gac zho lo to, zunlay me zho, togo guncasdgaa zho to, dzigo toque gunlay me.

14 Zha ne sca siguiel d ycaania to, gol rreegash lidz zho; guiedz ne siguiel d zho yquiaadiag zho mine nonee to, gol bigash guiedz co; gollit grē yudie co ni to, gollu lo zho ganle led xtoldraa to ga tel laa zho nitlo.

15 Gneli naa lo to ganle zeene gal dze ne laa Dios gun xquiel wxtis me, bii lēetaa gac guiel nē ne ygaa grē miech ne bio guiedz Sodom, guiedz Gomorr, lēdle guiel nē ro ne ygaa grē miech ne sca siguiel d ycaania to.

16 'Nsin gol so, gol guien ganle rreequia tib mēcwxii l yeense nac to, ni laa naa rxel to zaatne no grē coyot dox. Ndooladz gol gac, niowse gol gac lo miech zig rac grē palom, per scagaa con cuidad goltsie, gol gan ganle zha rzē meel.

17 Nligaa nsin gol so, sac gon ib ziezo miech to lo wxtis, ni lēēque len yadoo ga quin zho to,

18 haxta ziezo zho to lo grēraa zha nroob ne rnabey. Laa zho guna, loxaque ne nac to zha ne no xnēz naa, ni gagaa nagon gdeeda diidz gnee to xtudz naa lo grē zha co, ni lo grēragaa miech ne nacd zha Israel.

19 'Zeene sca tsiezo zho to lo grē zha rnabey co, tsode to zhgab dien pe gnee to, dien zhagaa gnee tow; sac zeene sca tsiegala, Dios gneedz diidz ne gnee to.

20 Led tod gnee, sinque, jzhiEspiritu Pxoz to men ne zob gbaa, men co gnee ga!

21 'Zlēēniedox miech zha ne no xnēz naa. Zio zha ne lēēque bets zho, zha ne lēēque pxoz zho, zha ne lēēque xpēed zho ctsidil zho, tsielo zho zho ladznia zha ne gut zho.

22 Tel to, guiets yag gan miech to, per tel ne dziits so to tel pe nactaa lo guiel nē ne ted to, ib zgaa to tib guiel mban ndzon ne gdzindraa dze lozh.

23 Guiedz ne no to, zeene laa miech csilo yquiaanal to, gol rree ga, goltsie stib guiedz. Gneli naa lo to ganle, niicle stib guiedz stib guiedz tsie to, gardaque lozh tsieted to grē guiedz ne ndxie Israel zeene gal dze ne laa Mgui ne pxeel Dios guiaad stib.

24 'Golwi ganle zha ne nac mēēdscuel, tsod zha ne ndziibraa non lo maistr, zha ne rquiagaa dziin, tsod zha ne nonraa lo zha ne rree zho.

25 Tel zha gun miech maistr, scaque gun zho mēēdscuel; tel pe cteed zho bizhuan dziin, mincoque cteed zho zha ne quia dziin. Gacxe waa peet tsienied guic to, tel pe nactaa ncuane gnee miech to, sac gon niicxe naa name ne nac naa Dad, men dox rree zho nac naa.

26 'Gdziebde to, zdzin dze ne glu ganle cho zienal mine nac diidzli, chogaa zienal guiel ntseeb, gal dze co grēsew xoobnen.

27 'Grēse mine rne naa lo to zeene nese rziodiidza, gol new lo miech, haxta glaa guic yu gol so, nguiedz gol new.

28 Gdziebde to miech, gol guien ganle no tib men nroobraa, lēē men co nac Dios. Tel miecha, loxaque cuerpse zrieelo zho csacsi zho, sangue Dios, zrieelo me gnitlo me miech dib xcuerp zho, dib xalm zho len gabil.

29 'Nligaa gdjebde to, csaand Dios lega pe gac to. Golwi ganle, zig nac grē mguin niicle ne rzac miech peet nond ma, haxta chop ma rdeed zho por tib gaay centav; per Pxoz to gon men ne zob gbaa rsaanladzd me ma, ni tib ma guete tel ne gdeete me diidz.

30 Pelel to dzigo csaan me, haxta guits guic tow, grēsew ngaba lo me.

31 Gdziebde to sca, gol guien ganle nonraa to tib dzoon mguin.

32 'Gneli naa lo to ganle, zha ne glu lo miech nacnie zho naa, scaque naa zeen gal dze co zlu naa lo Pxoz naa men ne zob gbaa, nacnie naa zho.

33 Sangue zha ne ctoladznie naa lo miech, scaque naa ziep naa lo me runbeyd naa zho.

³⁴ 'Guiabde to togo laa naa zial_l loxaque par cuin wense miech! Lēda gon, ye zial_l naa zial_lgunctil_l naa zho.

³⁵ Sac zha ne sēeb xnēz naa, zlēenie xpēed zho zho, tel_l mēedgaaw, zlēenie pxoz zho zho; scaque men_l wnaaw, zlēenie xinzhizh zho zho, zha ne nacгаа nguzhizha, zlēenie xnīaa tsieel zho zho.

³⁶ 'Lēēque menlidz miech gac zha ne glēē gan zho!

³⁷ 'Zha ne mazdraa rquia zdoos glēenie pxoz zho zho, glēenie xnīaa zho zho, glēeniegaa xpēed zho zho, porne gun zho minē rnabey naa, peet xtsiind zha co par ygab zho xnēz naa.

³⁸ Scaque zha ne yquia zdoos cueeladz zho zho guiaadnal_l zho zhits naa, grieeelod ygab zho lo naa.

³⁹ Sac grēse zha ne rquia zdoos guiel_lmban ne rap zho lo guidzliu rii, ygaad zho guiel_lmban ndzon ne gneedz Dios; sangue zha ne cueeladz xquiel_lmban, niicle tel_l csacsi miech zho loxaque ne no zho xnēz naa, ib zgaa zho guiel_lmban ndzon co.

⁴⁰ Niina gon ne squi tsie to, grēse zha ne zaacse ycaania to, zaacse gnee zho lo to, rrieequia naa ga sca ycaania zho; ni zha ne sca ycaania naa, rrieequia men ne pxeelle naa ga sca ycaania zho.

⁴¹ Zha ne cuēzlo tib men_l ne noteed xtiidz Dios lo miech, guiel_lnzaac ne gdeed Dios lo men_l co, ye zho yгаа guiel_lnzaac co. Zha ne cuēzlo tib miech ndzinli, guiel_lnzaac ne gdeed Dios lo zha co, ye zho yгааaw.

⁴² Ni zha ne gneedz maase tib zhigaque nis yag lo cho tib zha win ne nac to ne nac to xpēedscuel naa, ib tedsod zdeed Dios guiel_lnzaac ne tsieguial_l zho.

11

Zha ne pxeel Juan Bautist (Lc. 7:18-35)

¹ Zeene blozh pso Jesús diidz lo gza tsiipchop zha co, dzigo laa zho zie. Blozh ga laa me brieeque, güey me grē guiedz ne ndxie gax ga, güeyseed me grē miech co.

²⁻³ Len_l dze co no Juan Bautist ladzguiib, ga no Juan bin Juan zha nactaa grē milagr ne run_l Jesús, dzigo pxeel Juan bla xpēedscuel Juan güeynabdiidz zho lo me, dien_l pe lēele Men_l ne zēēble diidz cxeel Dios lo guidzliu ga nac me, te dzigoraa gdziñ men_l co ye.

⁴ Dzigo rēbchaa me lo zho:

—Grē ncuaañe bin to rne naa, grēgaa ncuaañe gon to run_l naa, goltsie golzodiidza lo Juan.

⁵ Ran_l to ganle grē zha ne rold lo, grē zha ne gacđ sē, grē zha ne rlan guiedz lepr, grē zha ne rcaaat, laa zho riac; haxta grē zha ne gutle, laa zho rrieeban. Xtiidz Diosa, laaw quiagaaz lo grēse zha ne rquiina. Grēsew, golzodiidza.

⁶ Ni golguiab lo me, dichos zha ne racchopd guic, sinque tiblīque rac zho riladz zho cho nac naa.

⁷⁻⁸ Zeene laa xpēedscuel Juan zey, dzigo psilo me bzeet me Juan lo miech guizhiu ne ndxie lo me ga, rēb me:

—Zeene güey to dan ngan co, güey to lo Juan, ¿zha dien_l güeynie guic to nian to me? ¿Pe rēb to rlu me zig tib goobgui ne nēzrii nēzrec rey me, te rēb to ye masaque grē lar niāzh ne racw zha non nacw me? Per nanle to ganle zha ne scataa racwaxb riod zho dan.

⁹ Nligaa cho dien_l güeynie guic to nac me, ¿te rēb to ye tib men_l ne noteed xtiidz Diosa? Gacnan to ganle tib men_l ne noteed xtiidz Dios gon_l nac me, ni me nac tib zha ne mazdraa nroob lo grē zha ne ziyun_l dziin co.

10 Me ga raquiet lo Xtiidz Dios zaatne znu rnee:
Sxel naa tib zha ne tednerga lo luu,
zha co gzhixcuuaa nêz ne ted luu.

11 Ne nligaa lo grêse mgui ne zieded lo guidzliu gard grieequia tib zha ne mazdraa non lo Juan Bautist; per zha ne gon winraa zaatne rnabey Dios, nonraa zha co lo me.

12 'Desde psilo Juan noseed me miech zhapaa racladz Dios gban zho, ni rchoobnis me zho, hor co psiloque brieequia zha ne rlêënie zhiwseed Dios, gaxe waa zha ne nlipaa rdziebd, zha cose rcaaniaw, rzëëb zho xnêz me.

13 Mazd glo tibaque raquiet ne laa men ne cxeel Dios ga guiaad, zigtaa lo leya, zigtagaa grê zha ne biadteed xtiidz Dios, bzeet zhow. Ni niina ne laa Juan biaad, laa men co blanso.

14 Juan gon biaad niina zig no diidz guiaad Lí; golgacnan sca ganle cho nac me.

15 Zha ne racladz guien zho zha nac grê mine none naa nu, ¡yquiaadiag zhow!

16-17 'Nac grê miech rii, riend zho pe racladz zho. ¿Cho ganle run zig run zho? Lêë zho run mine run mēēdlas ne rio wguir ro nêz, niicle rool xcompañer win di nguieel rieded win, niicle roolga zho di ngan, roond win.

18 Sac gon biaad Juan, ran zho rowd me tel pe ncuanea row zho, ried me ncuanea rie zho, dzigo laa zho rnee mendox nacie me.

19 Blozh ga ziaad Mgui ne pxeel Dios, ran zho row me, rie me, laa zho rneeque, lega rowcho me, lega riecho me, ib riend me cho rtsieelsa me, haxta grê zha ngoopdol, haxta grê zha yozh ne rtop dimi ne razh lo zha Roma rzênie me. Sca rnee zho, sangue zha ne rgaa guielbiini ne rdeed Dios, rien zho cho nac zha ne ziaadgun xtsiin me.

Miech ne bzhiguield ncaania xtiidz Jesús (Lc. 10:13-15, 21-22)

20 Blozhse ga, dzigo psilo Jesús bzeet me mine ygaa grê zha ne pcaaniad xtiidz me; sac nzian guiedz ne gûey me niicle gon zho grêtaa milagr ne been me, per ib psaand zho xquielntseeb zho, rëb me:

21 —¡Probsaxe grê men guiedz Corazín, grê men guiedz Betsaid! Sac gon gonpaa zho grê poder ne rap Dios, per ib psaand zho xquielntseeb zho. Tel niaca mine nian grê men guiedz Tiro, grê men guiedz Sidón, grê milagr ne gon zho ben naa, ib ndedsod mban niac grê zha co nio zho guielnê, zëëb nsaan zho xquielntseeb zho, mbig zho lo Dios.

22 Gacnan zha Corazín, gacnan zha Betsaid sca ganle, gal dze ne gon Dios guielwxtis, lëëtaa caxtigw ne ygaa zha Tiro ni zha Sidón, mazdraa mine ygaa zho.

23 Scaque zha Capernaum, masaque rzac zho niina zha nziuuraa lo Dios, per gacnan zho ganle haxta quiet lo ncowdoo ne guey mendox ga guey zho; sac gon tel niaca mine nian zha Sodom grê milagr ne ran zho noyun naa, ible nsaan zha co xquielntseeb zho, nitlod zho.

24 ¡Gacnan zha Capernaum ganle gal dze ne gon Dios guielwxtis, lëëtaa caxtigw ne ygaa zha Sodom, mazdraa mine ygaa zho!

25 Dzigo bzodiidznie Jesús Dios, rëb me:

—Dios luu ne nac luu Pxoz naa, luu rnabey gbaa luu rnabey guidzliu, rnedz naa xquizh lo luu sac grê mine noyun luu nu niina bdeete luu diidz niacnan grê zha raca, sinque laaw blu luu lo grê zha ne nac zig grê mēēdlas.

26 Sca quiayun luu, sac ib scale racladz luu gaca.

27 Blozh ga rëb me lo grê miech ne ndxie ga:

—Grëse ncuuane ran to quiayun naa, Dios men ne nac PxoZ naa, me bneedz poder rii lo naa; sac ib laa me bzo naa, naa guña. Xpëed me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gacladz naa gunbey me, zunbey zho me.

²⁸ Grëse to ne nac to zha ne në noded, rdib rdzag to quiaguib to dien zha guiaanwen zdoo to, gohtë lo naa, naa gneedz tib wdziiladz ndzon lo to.

²⁹ Nligaa goľbig lo naa, goľtënal zhiwseed naa, goľgac tib miech tibliladz, tib miech ndooladz zigne nac naa; zeeņa gap to descans co.

³⁰ Nacda ncuuane ngan, nacda ncuuane guiab to glëbde to gun tow.

12

Dze ne rdziiladz zha Israel lo dziin

(Mr. 2:23-28; Lc. 6:1-5)

¹ Len dze coquew, tib dze lëëtaque dze ne rdziiladz zha Israel lo dziina, bded Jesus zaatne zëeb zhobxtil grë xpëëdsuel me. Ga zie zho rcaabedz zho, dzigo psilo zho ptop zho mzion co dow zho zhobxtil co.

² Gon bla zha farisew, dzigo rëb zho:

—iLëda i gon noyun to, noguiits to ley i! Golguien ganle dze nda nac dze rii.

³ Pquiabchaa me rëb me lo zho:

—zPe gard glab to zaatne ziaad ganle zha been rey David, tib dze zeene pcaabedz me grë me zha ne ziegza me, ni zienied zho pe gow zho?

⁴ Rneew, bzëeb me len yadoo güeynab me guietxtil ne nac gon, downie me grë zha ne ziegza me ga, ni loxaque zha ne nacse pxoz row guietxtil co, zpe led bdiitsd me ley ga?

⁵ Lo xley Moisés name zhobnee ganle zha haxta dze ne rdziiladz to lo dziin run grë pxoz dziin len yadoo, ni rneeda dol ga sca run zho.

⁶ Golwi ganle zha rats ley par gac dziin len yadoo, ni yadoo ga, gacnan to ganle lo to nu zo men ne mazdraa non lo yadoo.

⁷ Rnee Dios lo Xtiidz me, quiambëzd me dien peraa gun miech, dien peraa cogon zho lo me, sinque mine racladz me guien zho yquia zdoo zho samiech zho. Tel niaca mine nli rien to min co, zien to gdziibdolde to zha ne rapd dol.

⁸ Gacnan to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

Biac tib mgui ne mband tib nia

(Mr. 3:1-6; Lc. 6:6-11)

⁹ Bded ga, goľ stib dze ne rdziiladz zho lo dziina, güey Jesús len yadoo win ne zob lad guiedz co.

¹⁰ Lad grë miech ne ndxie len yadoo co, no tib mgui ne mband tib nia; porque laa zha farisé bnabdiidzlaque lo me dien pe nonguiela gunguiac me miech dze ne rdziiladz zho lo dziin. Sca bnabdiidz zho, sac quiaguib zho dien pe yquiaaqui zho me tsiezo zho me lo wxtis.

¹¹ Dzigo pquiab me rëb me lo zho:

—Togase dien, zha run to zeene lëëtse dze rii rietsobe tib xpëcwxiil to tib len blë nroob, led zëeb lëë rie to riebee to ma?

¹² Tel sca rquia zdoo to mëcwxiil, jgolguien ganle mazdraa gon non miech lo tib mëcwxiil! Gacxe waa ible nonguiela gun ne xyudar samiech ne, niicle maase dze nda nac dze co.

¹³ Dzigo rëbchaa me lo mgui ne në nia ga:

—iBzigaa nia luu!

Zigne bzigaa mgui nia mgui, biacgazha, biaana zig nac stib mine ndaan-
taque ga.

14 Grë zha farisé co, zigne brieë zho ga laa zho psilo bnediidz dien zha gdeeda diidz gut zho Jesús.

15 Bien Jesús sca no guic zho, dzigo mazd brieë me ga. Mieh guizhiu ne zienal zhits me, grëse men rzacnë ne zienal ga, beenguiaç me zho;

16 per pso me diidz lo zho, choot lo gzodiidzd zhow.

17 Ga brieëquia mine pquiaa Isá, tib men ne biadteed xtiidz Dios padzeela, zeene rëb me:

18 Lëë men rii bzooblo naa guñ xtsin naa, rleynie naa me, rzac zdoo naa grë ncuaane run me.

Zded naa zhiEspíritu naa gacnie me, me nac men ne cxobnen xtidz naa lo grëse miech.

19 Tilnied me miech, sedzd yan me lo zho, sod me ro nëz goptsie me.

20 Grë zha ne gzhe gzhele rac, zig tib goobgui ne quiaxweele, zig tib lë guier ne noyüidiele,

csañd me zdoo zho;

zha ne mban rac lo xliaadz zho, csaand me zho.

Min co tsoxco me, haxta gan me grëse miech gacnan mine nac diidzli, ni tsienal zhow.

21 Haxta zeene gan me ye grë zha ne nacdraa zha Israel, laa zho gnalo me.

Rëb zho menðox nacnie Jesús

(Mr. 3:20-30; Lc. 6:43-45; 11:14-23; 12:10)

22 Dzigo güeynie zho tib mgui lo Jesús rold lo mgui ni gacdaque gnee mgui, sac nosacsí menðox mgui. Znuse beenguiaç me mgui, gagazh psilo gon mgui, psilo bnee mgui.

23 Grë miech ne ndxie lo me ga, per nli bzee zdoo zho, rnee zho:

—jBay pe lëë men qui naye nac Men ne zëëble diidz ga cxeel Dios!

24 Zeene gon zha farisé sca rnee grë miech co, rzachaa zdoo zho rnee zho: “Pe Dios nazho cxeel me, ma ne rnabey lo menðox ma co nacnie me, gane rrieelo runcxoon me menðox.”

25 Bien Jesús sca rza guic zho, dzigo rëbchaa me lo zho:

—jNcuaane gacd gon rnee to! Tel tib wxtis nadien lëëque zha ne nacnie zho csilo tilnie zho, çniacxe zac gnabey zho? Tib guiedza, tel lëëque zha guiedz co tilnie menladz zho, led znuse lozh guiedz co; tib diigaa miecha, tel lëëque zha tilnie menlidz zho, çniacxe nitlod dii co?

26 Scaque menðox nagon, telne lëëque lëë ma guñcxoon samenðox ma, jpe nale na bnitlo ma!

27 Nana ne squi rnee to Beelzebú nacnie naa gane rrieelo runcxoon naa menðox, çzha ne nacgrë to dzigo, cho nacnie zho ne ye zho runcxoon ma? Gase naganle rlu dollox i quiayun to, squi rnee to.

28 Sañgue tel naa zhiEspíritu Dios nacnie naa gane runcxoon naa menðox, ni ga rlu ganle laa Dios psilo quianabeyle nu.

29 jMasaque nac menðox zig tib zha ne no xfuers, zha ne gacladz cuee grë ncuaane no lidz zha co, none cxidoogazh zho zho!

30 Tel menðoxa rlëënie ma naa, ni nanle to ganle zha ne rlëë lo ne, gacnied zho ne.

31-32 Gacnan to ganle, grëse dol ne run miech, grë tel zha rguie zho, rdzibdee zho, niicle tel haxta gneenë zho naa, bii zun Dios zho perdon min co; sañgue zha ne gneenë zhiEspíritu me, ib gundraa me zho perdon.

³³ Nanle to ganle zig nac yag nex, miñe nac yag, miñ co nac nex ne rdeeda. Tel yag wena nex wen rquia low, togo yag ncuangaaw, nex ncuanaque rquia low.

³⁴ ¡Scaque to nagon zhin mendox! ¿Zha nan to nadien gac to miech wen, tel desde zdoo to ntseeb? Miech ntseeb to gane squi rzê xtiidz to, sac gon, igrêse diidz ne rree ro miech, zdoo zho rzaw!

³⁵ Gacxe waa, zha ne mbe zdoo, niapse diidz wen, diidz ndooladz nac xtiidz zho. Sangue zha ne ntseeb zdoo, niapse diidz ntseeb, niapse diidznê rrieche ro zho.

³⁶ Ni gal dze ne gon gun Dios guielwxtis, ib tedsod zunquizh me miech tib tib diidz ntseeb, tib tib diidznê ne sca rree ro zho.

³⁷ Sac gon zigne rzê xtiidz zho niina, miñ co cuequia zho gal dze co, o miñcogaa cteedquie zho.

Racladz zha farisé gan zho milagr
(Mr. 3:31-35; 8:12; Lc. 8:19-21; 11:24-26, 29-32)

³⁸ Tib dze wbig zla zha farisé lo Jesús gza zho zla maistr ley, rêb zho lo me: —Maestro, racladz no dzian no gun luu tib milagr, milagr ne glu nli Dios pxeel luu.

³⁹ Pquiab me rêb me lo zho:

—Nazdpaa ntseeb to, squitaa gocndip zdoo to nêz lo Dios, ¿zha nacraa milagr ne racladz to gan to?

⁴⁰ Stibaque milagr gon gan to, lëë miñ co gac zeen gal dze ne laa Mgui ne pxeel Dios, tso len liu tson dze, tson guieel zigne bio Jonás len mel nroob co tson dze ni tson guieel.

⁴¹ Ni gal dze ne gon gun Dios xquielwxtis me, ib steedquie zha Nínive miech ntseeb ne nac to i; sac gon zeene güeynee Jonás lo zho, grêse zho psaan xquielntseeb zho wbig zho nêz lo Dios, laa to nêde to gon to diidz niicle ne lo to nu zo tib men ne mazdraa non lo Jonás.

⁴² Scaque rein ne bzob nêz Sabá, steedquie me to gal dze co, sac tel rein co golwi ganle pa lo guidzliu ne brie me biaadgan me rey Salomón, biadquiaadiag me grê xtiidz Salomón. Ni to lo to nu zo men ne mazdraa non lo Salomón, ni ib ronde to xtiidz me.

⁴³ Telne csaande to xquielntseeb to i gon, low lozh to. Sac to zig bzhaac tib zha ne psacsi mendox. Zeene brie ma zdoo zho, güey ma güeyqianzê ma grê dan zit güeyguib ma dien pa cuêz ma. Gonse ma rdzield zaatne cuêz ma,

⁴⁴ rêb ma: “Mazd laa naa gbireque guia naa zaatne brie naa ga.” Zeene biire ma bdziñ ma zdoo zha co, gon ma nroob lugar no, pale tib yu dets,

⁴⁵ nacne güeyaque ma güeyxi ma zgadz samendox ma, ma ne mazdraa ntseeb blêznie ma zdoo zha co. ¡Dzigole mazdraa mban biaan zha co, lêdlegaa zigne goc zho glo! Scadaa nagon gdzieelo to.

⁴⁶ Laa me bii noneeque, zeene laa xniaa me ni zha bets me bdziñ, racladz zho gzodiidznie zho me. Per brieelod nzêeb zho haxta len yu, sac scataa miech guizhiu ne ndxie lo me ga.

⁴⁷ Dzigo rêb tib zho lo me:

—Laa xniaa luu gon ni zha bets luu quiambêz luu nêz ley, racladz zho gzodiidznie zho luu.

⁴⁸ Pquiab me rêb me:

—¿Xnia naa ye, bets naa ye?

⁴⁹ Blis nia me, blu me grê xpêédscuel me, dzigo rêbchaa me:

—Zha ne gon nac zig zha riñ, lëë xnia naa ga, lëë bets naa ga.

⁵⁰ ¡Sac grëse zha ne run mine rnabey Pxoꝝ naa meñ ne zob gbaa, grëse zha co nac bets naa, nac bzian naa, nac xnïa naa!

13

Nac Xtiidz Dios zig zhobxtil
(Mr. 4:1-20; Lc. 8:4-15)

¹ Blozh ga brieë Jesús güey me ro nisdoo. Ga zob me,
² zeene gon me nzian miech ne nocaalsa lo me ga, nacne bieꝝ me güeysob me tib len barcw zo gax ro nis co, psilo me pseed me zho.

³⁻⁴ Ndal grë ncuaañe pseed me zho, per niapse con cuent rnee mew lo zho. Lëë tib cuent ne bzodiidz me ga nu, rëb me:

—Tib zha name güey gon zhobxtil. Zeene laa zho quialaal zhob co, now bliaal gax ro nëz, now bliaal lad quie, now bliaal len yag guiets. Mine bliaal gax ro nëz ga, güey grë mguin znuse dow maw.

⁵ Mine bliaal zaatne nac lad quie, znuse znuse blana,
⁶ per zeene laa lo ngbidz brieë, znusaque bgoolä, bidzgaw; sac guiend nroob low.

⁷ Mine bliaal zaatne nac len yag guiets co, zeene laa yag guiets pxii, bnitlogaw.

⁸ Sangue mine bliaal zaatne nac lo liu naal, blana, brooba ni goca; lo tib tib zhob co no zhimziona brieë galptsii zhob, now brieë tsongalä, nogaaw brieë haxta tib gayoow.

⁹ Blozh ga, rëbcha me:
—Zha ne racladz guien mine rne naa nu, yquiaadiag zhow.
¹⁰ Zeene laa grë miech co zey, dzigo wbig xpëëdscuel me bnabdiidz zho lo me dien pe nac ne sca niapse con cuent rseed me grë miech.

¹¹ Pquia me rëb me:
—Tel to, Dioszhal rlu lo to zha rnabey me, niicle ncuaañe mazdraa ngueetsa; laa grëraa miech ne gard gbig lo me, grieelod guien zhow.

¹² Sac zha ne noxcole dien zha rnabey me, zdeedraa me guieibiini lo zho guien zhow, laa zha ne noxcoda, mine riense zho, stiche mew.

¹³ Sca rseed naa zho parne tsoguic zho zha rnabey Dios, per nac zho niicle nzhal lo zho rwi zho, per peet ran zho; niicle nzhal diag zho per peet rond zho; ib peet riend zho.

¹⁴ Lëë mine nac zho i bzeet Isá, zeene znu rëb me:
Nac miech qui, niicle peraa ron zho, per peet riend zho; niicle rwiraa zho, per peet ran zho.

¹⁵ Ne nlipaa miech nad, miech ndip zdoꝝ nac zho, rrieequia ntse zho diag zho, ntse zho lo zho; parne peet gond zho, peet gan zho.
Ib riend zho zha gbig zho lo naa, ygab zho xnëz naa, parne csilaa naa zho.

¹⁶ 'Sangue to —rëb Jesús lo zho—. ¡Dichos to porne riend to pe ran to, ni riengaa to mine ron to!

¹⁷ Blactaa zha ne biadteed xtiidz Dios padzeela, blactaa zha ne güeynal mine nac diidzli, bzoobladz zho nian zho grë ncuaañe ran to niina, per bgaad zho nian zhow; bzoobladz zho nquiaadiag zho grë ncuaañe noquiaadiag to, per bgaad zho nion zhow.

¹⁸ 'Golquiaadiag sca ganle zha nac xcuent zha ne güey gon ga.
¹⁹ Ro nëz ne sca bliaal zhob co, sca nac palal miech ne riepaa zha ne rienee Xtiidz Dios lo zho, per rioguicd zhow, rlozh ga rdzinaque mendox, rietiche ma tel palalse mine riend zho.

²⁰ Lad quie ne bliaal spalal zhob co, sca nac grë zha ne rley rcaania Xtiidz Dios;

²¹ per led dib zdood zho rcaania zhow, gane zeene laa miech rsilo rlëe lo zho, laa miech rtsidil zho porne riladz zhow, rsaanga zhow.

²² Nogaa zho nac zig nac len yag guiets co. Rquiaadiag zho Xtiidz Dios, per rsilo zho lel grë ncuane no lo guidzliu rii mazdraa rionie guic zho, rquidie grë dimi zho. Grë ncuane co rioxcora zho, laa ne tsonie Xtiidz Dios guic zho, min co rquiaqui ib rund zho mine rnabey me.

²³ Laa liu naal ne bliaal mine scataa goc ga, sca nac grë zha ne dib zdoo rquiaadiag Xtiidz Dios, rien zho zha naca, ni rban zhow zigne rnabeya. Rrieequia grë ncuane run zho, no zho nac zig mzion ne brieegalptsii zhob ga, no zho nac zig mine brieetsongala, nogaa zho nac zig mine brieetib gayoow ga.

Zha nac xquielrnabey Dios

(Mr. 4:30-34; Lc. 13:18-21)

²⁴ Biire pcaalsa miech lo me stib, dzigo psiloque me pseed me zho con stib cuent, rëb me:

—Ziaad gac xquielrnabey Dios lo guidzliu rii zig bzhaac tib men ne gon zhoxbtil. Niapse zhob wen, zhob nal gon me,

²⁵ per no tib zha ne rlëe lo me, gol tib pcow liu, horne grëse miech nixguies, güey zho güeylaal zho xmidz guizh ncuane zaatne gon me.

²⁶ Zeene laa zhobxtil co psilo blan mzion, hor coraa blu laa guizh ncuane co no lada.

²⁷ Grë zha ne quia xtsiin me, zeene gon zhow güey zho rëb zho lo me: “Tebaa gan luu ganle, dipse lad xoob luu zëeb guizh ncuane, ¿dieen pa brieew gochniw ga?”

²⁸ Dzigo rëb me: “Rien naa no cho tib zha ne rlëe lo naa, zha co been dziin co.”

‘Gocladz zho, hor cogazh nielaadz zhow per bzhiguiel me,

²⁹ rëb me lo zho: “Tsielaadzde tow, sac tel glaadz tow niina ye zhobxtil gliaadzniew.

³⁰ Golsaan sca zëeba ga, na zeene laa wlaap gac, hor co gnabey naa zha ne quiits zhob, ctogazh zhow gdziin zhow tib lad tseca; lozhraa ga quiits zho zhob, tsasa ga, glansow ro yu.”

³¹ Blozh ga bzeet me midz moxtaz, rëb me:

—Nac xquielrnabey Dios zig nac tib midz moxtaz ne ran miech dan rii. Nan to ganle midz moxtaz nac midz ne mazdraa win,

³² ni tel gacniw, rrooba ni lëew rroobraa lo grë guizh ne ran zho ro yu, raca lal tib yag nex, haxta rdzin grë mguin rzhixcuua ma zhiptsieez ma lo grë zhicwa.

³³ Rébaque me:

—Nac xquielrnabey Dios zig nac ncobi ne rquiaa men wnaa lad ncob ne riaa guietxtil. Niipaque ncobi riots tson lmud rin, ni dib nacse ncob co rzibe.

³⁴ Grëse mine pseed Jesús grë miech co, niapse con cuent bnee mew lo zho.

³⁵ Ga brieequia mine bzeet zha ne biadteed xtiidz Dios padzeela, zeene rëb zho: “Niapse con cuent cseed naa miech, sca gnee naa lo zho grëta ncuane gard gacnan miech wlal ne bre guidzliu.”

Zha nac xcuent guizh ncuane co

³⁶ Blozhse bnee Jesús lo grë miech co güey zho, yeque me laa me zey gza xpëedscuel me. Bdzin zho ro yu, ga bnab zho lo me siguiel me gnee me lo zho dieñ zha nac xcuent guizh ncuane ne bzeet me ga.

37 Dzigo rëbchaa me lo zho:

—Golgonā sca, znu gon nac cuent co. Rriequia gon naa ga nac men ne gon zhub co.

38 Liu ne bniaaw ga, nac lo guidzliu, zhubxtil co nac grë miech ne nole xnëz Dios, laa guizh ncuāan co nac grë zha ne no lадznia mendox.

39 Zha ne güeygan guizh ncuāan co, lëë mendox ga. Dze lo wlaap co, gac dze ne gon Dios xquielwxtis me, zha ne tsie wlaap ga, lëë anj ga.

40 Ni zigne sca cuee zho guizh ncuāan co lad zhubxtil, gzëëg zhow, scapaa nagon gal dze ne gac xquielwxtis Dios,

41 sxel naa grë xanj naa tsie zho tsiebee zho grë zha ntseeb, zha ne sca runctal xtol grëraa miech, lad zha ne no xnëz naa.

42 ĴGrëse zha ntseeb co, hor co laa zho guey lo guidox ne rieguial zho! Ga tso zho goonnë zho, haxta gow lay zho lo guielnëdōx co.

43 Laa grë zha ne güeynal mine nac diidzli, zha co gdziñ zaatne rnabey Pxož naa, masaque zig xbiini ngbidz glu zho ga. ĴZha ne racladz guieña yquiaadiag zhow!

44 'Ziaad gac xquielrnabey Dios zig tib ncuāan non ne noliu tib lo xcuaa miech. Zha ne gdziel tib ncuāane sca non, ib tedsod zie zho sto zho grëse ncuāane rap zho grieë dimi si zho liu co, parne guncheñ zho ncuāan non co.

45 'Zha ne rzëëb lo xquielrnabey Dios ziaad gac zho zig tib zha ne rzi quie perl mine mazdraa niazh.

46 Zeene ron zho pa no tib perl co, rto zho grëse ncuāane rap zho, rie zho rzi zhow.

47 'Nacaque xquielrnabey Dios, zig tib guieñ nroob ne rgaa mel niina, zeene rsëëb ngooz mela lo nis grë lose mel rto pa.

48 Rlozhse riodzëw, dzigo rbeequia zhow ro nis, garaa rzob zho rbe zho grë mel co; ma ne rquiin laa tib chicuid zole rio ma, laa ma ne rquiind rsëëb zho.

49 Scapaa nagon gac miech gal dze ne gon Dios xquielwxtis me, ziaad grë xanjl me cuee zho grë zha ntseeb lo zha ne no xnëz me,

50 tsieron zho zho lo guidox ne rieguial zho. Ga tso zho goonnë zho, haxta gow lay zho lo guielnëdōx co.

51 Blozhse ga, rëb me lo zho:

—ĴPe bien to na zha nac grë mine blozh bne naa lo to nu?

Grëse zho pquiab rëb zho:

—Bien now.

52 Dzigo rëbchaa me:

—Tib zha ne rienle zha nac grë ley ne psan Moisés, ni squi guieñ zho zha nac zhiwseed Dios mine zialnie naa niina, masaque nac zho zig tib zha gol ne quianie chop lo ncuāan non lidz zho, quianie zho grë min gol-le ni quianiequegaa zho min cub.

Güey Jesús ladz me

(Mr. 6:1-6; Lc. 4:16-30)

53 Blozhse sca bzodiidz me grë cuent co lo zho, laa me brieë ga zie me nëz ladz me.

54 Bdziñ me ga güey me yadoo, psilo me pseed me grë miech co. Per nli rzee zdoō zho ron zho grë mine rnee me, rnabdiidzlsa zho rnee zho:

—ĴPazhe waa squitaa pseed men qui? ĴZha nac guielbiini ne squitaa rap me i, ne rnee miech ndal grë milagr ne run me?

55 Tib zhinse ngurëyag name nac me. Led lëë xingan Marí i, bets me name nac Jacob, nac José, nac Simón ni Judas;

56 grë bzian mew, nu no zho grë zho. ĴPa dzigo güey me wseed qui?

⁵⁷ Ib beencasd zho me, haxta rlëë zho lo me. Zeene gon me sca rac zho, rëbchaa me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho ni menlidz zho ni menladz zho nëd gunbey zho.

⁵⁸ Beend me nzian milagr ga, sac sca ndip zdoo grë miech co ib nëd zho nilladz zho cho nac me.

14

Gut Juan Bautist

(Mr. 6:14-29; Lc. 9:7-9)

¹ Len dze co bin rey Herod (men ne rnabey Galilé) grë ncuane run Jesús, sac tel pa lotaaw zëëb xtiidz me;

² dzigo rëb Herod lo grë zha ne run dziin lo me:

—Rien naa lëë Juan Bautist ga quiayun grë min co, segur brieaban me.

³ Sca rnee Herod sac nanwen me zha been me Juan. Me bnabey bgaa Juan bzoob zho Juan caden bio Juan ladzguiib,

⁴ loxaque ne rnee Juan lo me nonguielda ga lëëque Herodí ptsieelnia me, sac tsieelpaa bets me Lip nac Herodí.

⁵ Gocladz Herod niut me Juan, per bdzieb me menguietz, sac rleynie zho Juan, rien zho xtiidz Dios ziadteed Juan lo miech.

⁶ Laa tibtaa dzew, lëëtaque noyac zhilni Herod dze ne bloozh me stib iz, bded tib xindzoo Herodí squi ndxie grë zha ne zobnie me psilo ndzoo biee ndzoo. Bdziladz me gon me zha biee ndzoo,

⁷ haxta brie ro me rëb me: “Ncuane gacladztaa luu gnab luu, znedz naaw.”

⁸ Per glole pquii Herodí ndzoo, nacre rëb ndzoo lo me: “Mine racladz naa, xoob guic Juan tib len bandej gneedz luuw lo naa niinagazh.”

⁹⁻¹⁰ Zeene bin Herod sca rëb ndzoo, mbanse rac me; per rdeetraaw diidz niab me grieeloda, sac grëse zha ne zobnie me ga, bin zho rëb me zdeed me ncuane gnabtaa ndzoo. Dzigo rase me pxeel me zha ne güeychug guic Juan len ladzguiib.

¹¹ Zeene wbiro zho, zhoobse guic Juan tib len bandej bdeed zhow lo ndzoo, dzigo güey ndzoo güeydeed ndzooa lo xniaa ndzoo.

¹² Zeene gocnan xpëëdscuel Juana, güey zho güeylis zho me ga güeyqueets zho me. Blozh ga güeyzodiidz zho lo Jesús zha bzhaac me.

Bguiaan Jesús gaay mil miech

(Mr. 6:30-44; Lc. 9:10-17; Jn. 6:1-14)

¹³ Zeene bin Jesús sca bzhaac Juan, dzigo brie me ga bzëëb me barcw zie me tib zaatne guiend miech. Per znuse bien diidza, nzian grë guiedz co zha ne gocnana, tib ro nis güey zho, glole zho bdziñ zaatne no gdziñ me ga.

¹⁴ Laa me noyet len barcw, zeene blis lo me gon me laa grë miech guizhiu co ndxiele ga; pquia zdoo me zho, beenguiac me grë mguidz ne zienie zho.

¹⁵ Laa dze ziedzelew, wbig xpëëdscuel me rëb zho lo me:

—Mazd gudz lo grë miech qui guey zho na, zeena guiob tsie zho grë guiedz win ne ndxie gax i tsiesi zho ncuane gow zho; sac gon laa dze bdzele.

¹⁶ Pquiab me rëb me lo zho:

—¿Pe nacre guey zho squise? To none gdeed ncuane gow zho.

¹⁷ Rëbchaa zho:

—¿Per pe dien yguiaan no zho? Pe rnase gaay quietxtil ni chop mel ne ziaadnie no nu, lo grëtaa miech qui.

¹⁸ Dzigo bnabey me zho güeynie zho quietxtil co, güeynie zho mel co lo me,

¹⁹ ni bnabey me grë miech co bzob zho lo grë guizh nguia ne zëëb ga. Horco bzheñ me gza guietxtil co ni grop meļ co, blis lo me nêz gbaa, bdeed me xquizh lo Dios. Blozhse bdeed me xquizh, beengrol me gza guietxtil co, meļ co ne, zigse rdeed mew lo xpëëdscuel me scase scase bdiiz zhow lo grë miech co.

²⁰⁻²¹ Grëse zho dow zho haxta zaatne bieltaa zdoo zho. Miech tafa, zha bguise rgaa zig gaay mil, nandragaa grë meñ wnaa, grë meëdas; ni zeene blozh dow zho, scase ncuaañe nroob biaan, biodzë tsiipchop chicuid bio grë guietxtil co, bio grë meļ co.

Rzë Jesús lo nisdoo

(Mr. 6:45-56; Jn. 6:16-21)

²² Zeene blozh ga, bnabey Jesús xpëëdscuel me bzëëb zho leñ barcw, zeena zienergä zho tedquia zho stib nêz ro nis co; laa me bii blêz ga, nozonêz me grë miech co.

²³ Blozhse bzonêz me zho, dzigo güey me tib guic gui zob gax ga, güeyzodiidznie me Dios, tipse me zo ga laa liu pcow.

²⁴ Horco laa barcw ne zie xpëëdscuel me ga no lo nis co, ib gacd csëëniob zhow, sac rriee me rtsire mew, nêzrii nêzrec raca lo nis.

²⁵ Merle guini liuw, tibaque zeene laa me bdziñ zaatne zie zho ga, tib lo nis co ziezë me.

²⁶ Zeene gon zho laa meñ co sca ziaad-zë lo nis co, bdzieb zho, broptsie zho rnee zho:

—jTib ndziin i gon ziaad i!

²⁷ Dzigo bnee me lo zho rëb me:

—jGdziebde to, naa zial nu!

²⁸⁻²⁹ Pquiab Pedr rëb Pedr:

—Tejne luu i ziaad i, bneedz diidz së naa lo nis glanso naa lo luu i.

—jDë sca! —rëb me.

Lëëlêd biet Pedr leñ barcw, laa Pedr ziezële lo nis co

³⁰ zeene gon Pedr scataa rlis me low, bdzieb Pedr. Tibaque zeene bien Pedr laa Pedr nodedquiele low, hor co broptsiedan Pedr, rbedz Pedr me, tsiebee me Pedr ga.

³¹ Dzigo wbig me bzheñ me nia Pedr, bzoli me Pedr lo nis co.

—jAque luu gon Pedr! —rëb me—. ¿Pe nacte gocchop guic luu? ¿Gard gon gliladz wen luu cho nac naa?

³² Zeene laa me biepnie Pedr leñ barcw, laa me co blêz.

³³ Grëraa zha ne no leñ barcw ga, rleynie zho me, rzee zdoo zho rnee zho:

—jNasi nagon ndion no nli Xpëëd Dios nac luu!

³⁴ Zeene bdziñ zho stib nêz ro nis co, zaatne rnee zho Genesaret, ga biet zho barcw.

³⁵ Grë miech co zeene gocnan zho laa me bdziñ ga, znuse znuse pxoon zho diidz grëraa guiedz ne ndxie gax ga. Dzigo brieë grë miech co, güeynie zho grë meñ rzacnë lo me,

³⁶ rnab zho lo me siguiel me maase ni xabse me xen grë meñ rzacnë co. Grëse zha ne bzheñ ni xab me, biac zho.

15

Ncuaañe runctal xtol miech

(Mr. 7:1-23)

¹ Tib dze, bdziñ bla zha farisé ni zla maistr ley ne ziaad nêz Jerusalén, lo Jesús; rëb zho lo me:

² —¿Pe nacne dien zienald xpëëdsuel luu miñe blu xmengol ne, pe nacne zeene laa zho row, ib rguibd zho nia zho zigne nopaa tsara?

³ Pquiab me rëb me lo zho:

—¿To waa, pe nacne quiaguiits to xley Dios? Golguien ganle laa ne gun to miñe rnabay Dios zigne naca, leñ ncuaañe blu xmengol to, miñ co zienald to.

⁴ Led znu gon rnee lo xley Dios: “Gon pxoz luu, gon xniaa luu”, ni rneew: “Zha ne quie pxoz, quiegaa zho xniaa zho, ib none guet zho.”

⁵ Laa to gon rnee to: “Peet nacda gund zho xyudar xmengol zho niicle no me liaadz, totsaque gdeed zho gon.”

⁶ Tib lad rsan to xley Dios, miñe blu xmengol to miñ co noxcoraa to.

⁷ ¡Loxaque guielwquidie qui no to! Rquiaalo to miech wen nac to, per lëëpaa miñe run to i ga bzeet Isá zeene rëb me:

⁸ Grë miech rii, rquiaalose zho runnon zho naa, rond zho diidz gun zho miñe rnabay naa.

⁹ Zhlēse nac grë ncuaañe run zho, rnee zho laa zho riaadgan naa; sac niapse guicle zho riab grë wseed ne quialu zho lo miech.

¹⁰ Dzigo bnee me lo grë miech ne ndxie lo me ga, rëb me:

—Golquiaadiag miñe gni naa lo to nu, ni goltsoxco guien to zha naca.

¹¹ Golgacnan ganle, grë ncuaañe rdziñ zdoos miech, led mincod runctal xtol zho; sinque grë ncuaañ ntseeb ne rza guic zho, diidz ntseeb ne rriee ro zho, miñ co runctal xtol zho.

¹² Horco wbig xpëëdsuel me, rëb zho:

—¿Pe bien luu ganle blëë zha farisé gon zho sca rëb luu lo zho?

¹³ Pquiab me rëb me:

—Grëse yag ne squi beenbnid Pxoz naa men ne zob gbaa, ib none laaw gliaadz zolo zolow.

¹⁴ Golsaan zho, nli zha noseed miech per nac zho zig nac zha ne rold lo. Ni nanle to ganle, tel tib zha ne sca roldle lo ni xenaque zho nia stib zha ne rand, zaatne nac tib len blë, ib tedsod grop xcuaa zho tsietsoebe ga.

¹⁵ Bdedse ga, wbig Pedr lo me rëb Pedr:

—Bzhiguiel bnë lo no dien zha nac diidz ne në luu ga, ne rnee luu led ncuaañe rowd miech runctal xtol zho.

¹⁶ Pquiab me rëb me:

—¿Pe niicle to riendaquew dzigo lëë?

¹⁷ ¿Pe riende to grë ncuaañe row miech, led mincod runctal xtol zho? Sac grë ncuaañe row zho rdziñda len zdoomban zho, zhaa zaatne rdziña; tib rietedsew xcuerp zho, rlozh ga rrieehaw.

¹⁸ Sañgue grë diidznë ne rriee ro zho, zdoomban zho ga rzaw, ni lëë miñ co nac miñe runctal xtol zho.

¹⁹ Zdoomban zho nac zaatne rza grë ncuaañ ntseeb ne run zho, zig nac: zeene rio zho grë zhgab yozh,

zeene rut zho samiech zho,

zeene rionie zho zha ne nole tsieel,

zeene rionie zho zha ne nacd tsieel zho,

zeene run zho guielgbaan,

zeene lega rnexuu zho samiech zho,

zeene rneenë zho samiech zho.

²⁰ Grë ncuaañ ntseeb co nagon nac miñe runctal xtol miech, gunctald zho xtol zho niicle tsard nia zho zigne nacpaa grë zhiwseed mengol.

*Biac xpëëd tib wnaa zit
(Mr. 7:24-30)*

21 Ga brieë Jesús, güey me haxta nëz Tiro ni nëz Sidón.

22 Nëz co no me güey tib wnaa ne ziaad lo xtiï zha Canaán lo me, nguiedz zëëb tsi wnaa co rnab me lo Jesús siguiel Jesús tsiegunguiac tib xpëdwnaa me nosacsi mendox.

23 Per ib pquiabd Jesús lo xtiidz wnaa co, dzigo wbig xpëëdsuel me, rëb zho: —Mazd bzhiguiel pquiaadiag miñe rnee wnaa qui, bui ganle zha ncuëtaa zëëb tsi me nal me zhifs ne.

24 Pquiab Jesús rëb me:

—Ziald naa par gun naa xyudar zha zit, sinque laa Pxoz naa pxeel naa par gun naa xyudar grë zha Israel ne rzac zig grë mëcwxiil ne zonziaab lo xbaxtor.

25 Scaque nonee me laa wnaa co wbig pquiitsgzhìb lo me.

—Bzhiguiel —rëb me—, been tib guielnzaac been xyudar naa.

26 Rëbchaa Jesús lo me:

—Nonguiel da gon, cob ne guiet ne no nia mëëd gdeed new lo mëcw.

27 —Nliw, scaw —pquiab wnaa co—, per niicle mëcwa name rsaanaque bizhuan ma rbìg ma row ma miñe rrieengaa nia mëëd.

28 Horco pquiab Jesús rëb me:

—¡Squiw ñagon! ¡Rlu nli dib zdoo luu rnalo luu naa! Gacxe waa miñe rnab luu i gun naa, niinagazh laaw gac.

Horcogazh biac xpëëd wnaa co.

Nzian miech ne beenguiac Jesús

(Mr. 8:1-10)

29 Nëz co wbi Jesús bdziñ me ro Nisdoo Galilé.

Ro nis co no me, miech guizhiu ne pcaalsa lo me. Tib dze gon me scataa nzian miech co, dzigo güey me güeysob me tib guic gui win zob gax ga.

30 Ga zob me rdziñ grë miech co rdzinnie zho grë zhimguidz zho lo me, no zho zienie grë zha ne në ni, no zho zienie grë zha ne rold lo, grë zha ne guiend tib nia, grë zha ne guiend tib ni, grë zha ne guiend tib ni, grë zha ngop, ni grëragaa zha ne rlan pe stib guielguidz; grëse zho beenguiac me.

31 ¡Ncuaane gzee zdoo ne goc ga! Grë zha ne ni tib diidz gard gnee, per nli rley zho laa zho psilo rnee; grë zha ne guiend tib ni, guiend tib nia, laa ni zho laa nia zho biaan zigne no gaca; grë zha ne rgob ni, haxta rias zho laa ni zho goc-wen; grë zha ne rold lo, rlozhd gzee zdoo zho grë ncuaane ran zho. Grëse miech ne ndxie ga, rzee zdoo zho, rley zho roolnie zho Dios.

32 Dzigo bredz me xpëëdsuel me rëb me lo zho:

—Rquia zdoo naa grë miech rii. Nadzele rac tson ngbidz blanso zho lo ne nu, ni na quianiedraa zho pe gow zho. Telne squise gzonëz naa zho, nend pa lo zie zho nëz ycow zho.

33 Pquiab zho rëb zho:

—¿Per pe yguiaan ne zho? ¿Pa guioxi ne guielwagw ne yquini grëtaa miech qui dan rii, naca zaatne guiend miech?

34 Dzigo bnabdiidz me lo zho, rëb me:

—¿Bla guietxtil ziaadnie to i?

—Gadzaquew no —rëb zho—, ni chop tson mel win.

35-36 Dzigo bnabey me grëse miech co bzob zho lo liu. Blozh bzhen me gza gadz guietxtil co, ni gza mel co, bdeed me xquizh lo Dios; blozhse bdeed me xquizh, zigse rungröl me guietxtil co scase scase rdeed mew lo xpëëdsuel me rguiz zhow lo grë miech co; scaque been me gza mel co.

37-38 Grëse miech co dow zho haxta zaatne bieltaa zdoo zho. Miech guizhiuw, zha bguise rgaa zho maase tap mil, nandragaa grë men wnaa, grë mëëdla; ni zeene blozh ga bii biodzë gadz chicuid bio grë miñe biaan.

³⁹ Blozhse bnee me lo grë miech co, blozhse bzonëz me zho, dzigo laa me bzëëb len barcw zie ne nëz xtan zha Magdal.

16

Gocladz zha farisé niungüet zho Jesús

(Mr. 8:11-21; Lc. 12:54-56)

¹ Magdal no Jesús, bdziñ bla zha farisé ni zla zha saducé lo me, gocladz zho niungüet zho me dien pe nxind me tib diidz, pe tib ncuaañe nonguiel dgañ niun me. Rquiaalo zho rnab zho lo me guñ me pe tib milagr, zeena gliladz zho nli Dios pxeel me.

²⁻³ Dzigo pquiab me rëb me lo zho:

—iPe nlipaa rnee to riende to zha nac grë ncuaañe noyac len dze rii! Zha zëëb dzigo runbey to pe rlu lo xcow. Zeene ran to rquia xcow nizhnie bdze dze, rienle to guët stib dze co zriee lo ngbidz. Sil ne rangaa to quia xcow nizhnie, quia xcow nlaan zhan gbaa, rienle to guixoo guiab dze co.

⁴ Nazdpaa ntseeb to, squitaa gocndip zdoo to nëz lo Dios, ¿zha rnaraa milagr në racladz to gan to? Stibaque milagr gon gan to, tib mine gac zigne bzhaac Jonás.

Blozhse sca rëb me lo zho, zoque zho ga, ziega me.

⁵ Zeene brieë zho ga, zoladzd xpëëdscuel me ney zho guietxtil ne niow zho.

⁶ Lega nacle psilo me nonee me lo zho, rëb me:

—Golguien gon, napaa noyab to lo zhincobi zha farisé, lo zhincobigaa zha saducé.

⁷ Zeene gon zho sca rëb me, rneechaa zho:

—Porne nagon ziaadnied ne guietxtil, gane squi rnee me lo ne.

⁸ Bien me sca nonee zho, dzigo rëb me lo zho:

—iGardaque lëë guien to cho nac naa! ¿Pe nacne tso to zhizhgab guietxtil?

⁹ iNi lalnu lëë peet riende to! ¿Pe rsoladzde to zeene gaayaque guietxtil bguiaañ ne gaay mil miech, bla chicuida biaan?

¹⁰ Scaque zeene gadzaque guietxtil ni bgaaw dow tap mil miech, ¿pe niicle min co rsoladzdraa to?

¹¹ ¿Zha nac dzigo rzac to guietxtil nozet naa? Golguien ganle zhincobi zha farisé, zhincobi zha saducé ni naa.

¹² Dzigoraa bien zho led ncobidpaa rzeet me, sinque rëb me lo zho gap zho cuidad lo zhiwseed zha farisé, lo zhiwseedgaa zha saducé.

Bnee Pedr cho nac Jesús

(Mr. 8:27-30; Lc. 9:18-21)

¹³ Bdziñ Jesús nëz xtan zha Cesarea de Filipo grë xpëëdscuel me, nëz co no me bnabdiidz me lo zho rëb me:

—¿Cho dien ron to rnee miech nac naa?

¹⁴ Pquiab zho rëb zho:

—No zho rnee Juan Bautista, no zho rnee Lív, no zho rnee Jeremív, men ne biadteed xtiidz Dios padzeela; nogaa zho rnee no cho stib men ne ziadteed xtiidz Diosa zig biaan zha ne biaan padzeela.

¹⁵ Dzigo rëb me lo zho:

—¿To waa? ¿Cho rzac to nac naa?

¹⁶ Pquiab Pedr, rëb Pedr:

—iLuu nac Men ne zëëble diidz ga cxeel Dios! iXpëed Dios nac luu!

¹⁷ Dzigo rëbchaa me:

—Dichos luu Simón (xingan Jonás) brieed diidz qui ro luu, sac gon Pxoꝝ naa men ne no gbaa, men co bneedz guielbiini qui lo luu, nacda ncuane cho miech nêw lo luu.

¹⁸ Ye naa gon niina laa naa gni ganle cho nac luu, luu nac zig tib quie, ni quie ne gon squi nac gzhixcuuaa naa xyadoo naa; tsod zha ne grielo gnitlo yadoo co, per ni guielgut gnitloda.

¹⁹ Laa naa rzo luu, luu gnee Xtidz naa lo miech zeena gacnañ zho zha grielo yгаа zho zaatne rnabey Dios; luu gac zig tib zha ne rey liow, tel zha cow, zha zac cxal ro yu, ni zha zac csiooga.

²⁰ Dzigo pso me diidz lo zho choot lo gneed zho, me nac Men ne zëëble diidz ga cxeel Dios.

*Bzeet Jesús zha gun miech me
(Mr. 8:31-9:1; Lc. 9:22-27)*

²¹ Len dze co psilo Jesús bzeet me lo xpëëdsuel me zha csacsi miech me. Rêb me nroob ncuane cteed zho me, zeene laa me tsie Jerusalén; grê zha non lo menguedz, grê pxoz ne rnabey, grê maistr ley, ible stsidil zho me ni haxta zut zho me; per zeene gac tson ngbidz gut me, laa me grieban.

²² Gon Pedr zha rnee me, dzigo bredzaque Pedr me blisqui Pedr lo me dien pe nacne rnee me laa me guet.

²³ Zeene bin mew, zoque Pedr ga, biecw me rêb me:

—¡Biche lo naa nu mendox! ¡Loxaque no luu par gungüet luu naa! Zienied guic luu miñe rnabey Dios, sinque miñe rleynie miech, min co zienie guic luu.

²⁴ Dzigo bnee me lo zho, rêb me:

—Zha ne racladz sëëb xnêz naa, none cueeladz zho zho, none lëb zho guiaadnal zho miñe rnabey naa, niicle tel min co yquiaaqui csacsi miech zho. Nodne yquia zdoò zho xquielmban zho,

²⁵ sac zha ne yquia zdoò xquielmban, lel znu nitlo zho; sangue zha ne sca cueeladz xquielmban porne no zho xnêz naa, ib zгаа zho tib guielmban ndzon ne gdzind dze lozh.

²⁶ Zha ne zienie guic loxaque gapchen, ¿pa dien yquina lo zho, tel lëew yquiaaqui guey zho gabil? ¿Niace zrieelo gdziib zho dimi, laa zho len gabil?

²⁷ Naa ne nac naa Mgui ne pxeel Dios, zdzin dze ne gbiire guial naa stib, guialnie naa grê xanj naa, glu naa ganle pa lotaa men nroob nac Pxoꝝ naa; dze co gded naa miñe tsieguial tib tib miech, tel zha wban zho.

²⁸ Ib tedsod lo grê zha ne ndxie nu niina, bii no zha ne gan ganle, zeene laa naa csilo gnabey lo guidzliu rii.

17

*Bdzëëlo Jesús
(Mr. 9:2-13; Lc. 9:28-36)*

¹ Goca xoop ngbidz, bredz Jesús Pedr, Jacob ni Juan bets Jacob güeynie me zho tib guic gui glaa.

² Guic gui co no zho, zeene gon zho laa me bdzëëlo. Masaque biinidoo rrieed lo me, pale lo ngbidz; xab mew, per nli rquiabniw, masaque biini ne rroña.

³ Tibaque zeene gon zho laa Moisés ni Lí men ne biadteed xtiidz Dios padzeela, nozodiidznie me.

⁴ Rdzieb zho, lo dzeb co brieed ro Pedr rêb Pedr:

—Maestro, itebaa zha grielo guiaan ne nu! Telne racladz luu, na maase gzaa no tson yu yag xiid nu, tiba cuëz luu, tiba cuëz Moisés, stiba cuëz Lí.

⁵ Scaque nonee Pedr, zeene znuse pquia tib xcow ngali zaatne zo zho ga, masaque biini ne rron xcow co, lo xcow co bin zho zëeb tsi tib men co, rnee me:

—Lëe xpëed naa i gon, rleynie naa me, rzac zdoo naa mine quiayun me. Mine rnee me, golygona.

⁶ Mazdraa bdzieb zho bin zho sca rnee men co, lëelëd pquitsgzhib zho haxta bdziñ lo zho lo liu.

⁷ Dzigo wbig Jesús, pcaannia me zho, rëb me:

—Golsoli, gdziebde to.

⁸ Zeene blis lo zho bui zho, mese zo ga, gondraa zho schop men co.

⁹ Blozhse ga, laa zho wbi ga. Cho gui co ziad-zëebnie me zho, pso me diidz lo zho mine gon zho ga, choot lo gzodiidzd zhow, nieeda gal dze ne laa me brieaban.

¹⁰ Dzigo bnabdiidz zho lo me, rëb zho:

—¿Bay zha nacne rnee maistr ley, glo Lí no guiaad stib, dzigora a guiaad Men ne zëeble diidz ga cxeel Dios?

¹¹ Rëbchaa me:

—Nliw, ible nacle diidz ne glo Lí guiadseed miech gon zho xtiidz Dios.

¹² Ni gacnan to ganle laa me biaadle, per beenbeyd miech me, lej psacsi zho me been zho me mine gocladztaa zho; ni ib tedsod gon, scaque csacsi zho Mgui ne pxeel Dios.

¹³ Zeene blozh sca rëb me, dzigo bien zho Juan Bautist ga rzeet me.

Biac tib mëed ne nosacsi mendox

(Mr. 9:14-29; Lc. 9:37-43)

¹⁴ Zeene blozh biet zho cho gui co, gon zho miech guizhiu ndxie ga quiambëz Jesús. Lad co brieet tib mgui, wbig me lo Jesús, pquitsgzhib me lo Jesús, rëb me:

¹⁵ —Laa naa r nab lo luu, bzhiguiel beenguiac xpëed naa, nrooble nosacsi guidz gutye win. Blactaa ziyobe win lo gui, ziyobe win lo nis ne.

¹⁶ Blansonie naa win lo xpëedscuel luu nu, per rrieelod zho gunguiac zho win.

¹⁷ Dzigo rëbchaa Jesús lo xpëedscuel me:

—iPe na squitaa miech ntseeb nac to, ib nëde to gnalo to Dios! ¿Palal tiemp ne so naa gne naa lo to? ¡Ncuaañe cxcexwdraa naa lo to squi nac to! ¡Goltënie mëed qui nu!

¹⁸ Dzigo goctox Jesús lo mendox ne nosacsi mëed co, benxoon me ma, hor cogazh laa mëed co biac.

¹⁹ Haxta wbiraa zho ga, wbig zho lo me bnabdiidz zho dien pe nacne brieelod zho niunxoon zho mendox ne nosacsi mëed co.

²⁰⁻²¹ Dzigo rëbchaa me:

—Brieelode to niunxoon to ma, sacne rnalode to Dios. Tel niaca mine rnalole to Dios siquier palal yeen, gzoob ne siquier lal tib midz moxtaz, niicxe ncuaañe mazdraa ngan gnab to lo me, zun mew; tsod ncuaañe grieelod gun to.

Bzeet Jesús laa miech csacsi me

(Mr. 9:30-32; Lc. 9:43-45)

²² Xtan zha Galilé no zho, tib dzew rëb me lo zho:

—Naa ne nac Mgui ne pxeel Dios, ib znaaz miech naa,

²³ haxta zut zho naa; per zeene gac tson ngbidz gut naa, zriebaan naa.

Zeene bin zho sca rnee me, bio zho guielnë, mbanse rac zho.

²⁴ Bdzin me guiedz Capernaum, loxaque bzëeb me lad guiedz, laa zha ne rtop dimi ne razh yadoo wbigle lo Pedr, bnabdiidz zho dien pe rguizh me dimi co. Pquiab Pedr rëb Pedr lo zho:

²⁵ —Rguizh mew, ðpe nacne quizhd mew?

Zeene bdzin zho len yu ne rbëz me, gardle guiab Pedra lo me, glole me bnabdiidz rëb me lo Pedr:

—Zig nac dimi ne razh lo men ne nac rey dien, ðpe ye xpëed me rguizha, te loxaque zha zit rguizha ye?

²⁶ Pquiab Pedr rëb Pedr:

—Zha zitse rguizha.

—Nligaa sca naca —rëb Jesús—. Zha ne nac mëed nodne quizh zho,

²⁷ per par guiabd zho rdziond ne diidz, güey güeyron xanzuel luu lo nis. Mel ne glopaa yгаа low, bzhen ma pxal ro ma, ga gdziel luu dimi; dimi co güeynie bdiizh mine no dizh ne grop ne.

18

¿Cho nonraa?

(Mr. 9:33-37, 42-48; Lc. 9:46-48; 15:3-7; 17:1-3)

¹ Len dze co bnabdiidz xpëedscuel Jesús lo me, dien cho tib zho gac zha ne mazdraa gacnon lo grë zha ne no xnëz Dios.

² Dzigo bredz me tib mëedbgui win, bzo me win glowtaa lo zho,

³ rëb me:

—Gneli naa lo to ganle, telne csaande to xquielntseeb to, telne gacnguud-zladzde to, gac to zig mëedwin rii, per ni xnëz Dios grieelod sëeb to.

⁴ Zha ne racladz gac zho zha non, none gac zho tib miech ndooladz, none gac zho zig tib mëedlas.

⁵ Miech ne gacnie zha ne sca nac, zha ne rleynie naa, rrieequia naale ga racnie zho.

⁶ 'Per miech ne yquuil zho gunctal zho xtol zho, jprobsaxe zha co! Mazd zhi guielnëw lo zho ygadoo tib quie molin zhobxtil yan zho tsieron zho zho nisdoo.

⁷ jNac lo guidzliu rii, runfalte guielntseeb low! Runfalte ncuane gunctal xtol miech, jper probsaxe zha ne yquuil zha ne nole xnëz naa, gunctal zho xtol zho!

⁸ 'Golguien telne tib nia to, tib nigaa to rquiaqui runctal to xtol to, goltichegazha. Peet nacda maase tibaque ni to, tibaque nia to zob totsaque yгаа to guielmban ndzon ne gdzind dze lozh, ledle zob gropa ni laa to guey gabil, lo beldox ne gdzind dze guuu.

⁹ Scaque bziaalo to, mine rquiaqui runctal to xtol to, goltichegazha, peet nacd maase tibaque lo to zob totsaque yгаа to guielmban ndzon ne gdzind dze lozh, ledle zob gropa ni laa to guey lo beldox ne nac gabil.

¹⁰ 'Ib gunde to csanwin to grëraa zha ne no xnëz naa, zha ne nac zha mban, sac gon non zho lo Dios, anj ne quianap zho, tibaque zo me lo Pxoz naa men ne zob gbaa.

¹¹ 'Nziuu miech lo Dios, tel naa ne nac naa Mgui ne pxeel me, ib laa naa zial zialsilaa naa grë zha ne zonziaab lo me.

¹² 'Rzac Dios miech zig tib men ne rquianë zdoe xpëcwxiil. Telne quianie zho tib gayoo ma, ni gziaab tib ma, led zëeb lëe rsan zho stapgal tsiimtap ma ne zo lo zho, rbire zho rieguib zho ma ne bziaab ga.

¹³ Zeene rdziel ma lo zho, rlozhd gleynie zho ma, lëe ma rac guielbley que grëraa xcompañer ma.

14 Scadaa nagon rzac Pxoꝝ naa miech, grē zha ne nole xnēz me, ib racladz me gziaab zho.

15 Golguien sca, tib tib to zeene cho tib zha ne nacgrē to gun pe tib falt lo to, goltſie goltſienee lo zho; gropse to goltzodiid pe nac mine pxin zho. Telne siguiel zho guiaan to mpas, laa to beenle gan ga gneewen to stib.

16 Laa telne nēd zho, dzigo golguib tib zha ne sē, chopgaa zha ne sē gan ganle zha rac zho.

17 Telniicle scaw nēdaque zho guiaan to mpas, dzigo mazd golguiab lo grēse zha ne nacgrē to gnee zho lo zho. Telne niicle xtiidz zha co nēd zho gon zho, dzigotaa mazd golsaan zho, sacdraa to bets to ga, golcuae zho lad to, golsac zho zig rzac miech grē zha ne zienal guielntseeb.

18 Gneli naa lo to ganle, grēse zha ne gon xtiidz to zeene rnee to lo zho gacwen zho, scagaa Dios scaania me zho; per zha ne gonda, ycaaniad me zho.

19 Ni racladz naa gacnan to ganle, grē zha ne no xnēz naa, niicle tib nēzaque zho, per telne tipse rac zho, ncuaañe gnabtaa zho lo Pxoꝝ naa men ne zob gbaa, zdeed mew.

20 Sac zeene rcaalsa zho roolnie zho naa, ga zo naa lo zho; niicle maase chopaque, tsonaque zho.

21 Dzigo wbig Pedr rēb Pedr lo me:

—Zha ne sca dzigo gun falt lo naa, ¿blataa vuelte no gun naa zho perdon? ¿Gadzaaw lēē?

22 Pquiab me rēb me:

—Lēda gon Pedr, led loxaque gadzde vuela. Tel blataa vuelte gun zho falt lo luu, none gun luu zho perdon.

Zha ne beend perdon

23 Grē zha ne no xnēz Dios, ib none gun zho perdon samiech zho.

Tib rey name, tib dzew bredz me grē zha ne rquia dziin lo me, par dien zha quiayun zho dziin.

24 Loxaque psilo me, zeene laa xcuent tib zha co blozh brieē, nroob brieequia zho lo me;

25 par quizh zhow, peet nzheñd zho. Dzigo bnabey me to zho grop tseeel zho, xpēēd zho ne, ni grēse ncuaañe rap zho, parne grieelo gazh xquielqui zho.

26 Zeene gon zho sca rēb me, pquiitſgzhib zho lo me, rēb zho: “¿Been guielnzaac, gop tib paciens, na dien zha gun naa quizh naa xquielqui naa lo luu!”

27 Gon me zha rac zho, pquia zdoo me zho, psilaa me zho, beenquizhdaque me zho xquielqui zho.

28 Loxaque brieē zho ga, bdzieel zho tib zha ne nzēēb palal yeen dimi lo zho, tib zha ne rquiaque xtsiin rey cow. Zigne gon zho zha co, zolinēz wbig zho bdie zho yan zho, rnab zho gagazh quizh zho xtimi zho.

29 Dzigo pquiitſgzhib zha co lo zho, rnab zho siguiel zho gap zho paciens, dien zha gaclō dimi co quizh zhow.

30 Pe nquiaadiag zho ga, bnab zho bio zha co ladzguuib, haxta bdiizh zho dimi ne zēēb zho ga.

31 Grēraa zha ne rquia dziin lo rey co, zeen gocnan zhow, bdeednē zho, güey zho güeyzodiidz zhow lo me.

32 Zeene bin mew, bnabey me gocredz zho, goctox me lo zho rēb me: “¿Pe clas miech nac luu! Pe rsoladz luu zha rac luu bnab luu pquia zdoo naa luu, haxta beenquizhd naa luu guielquidox ne zēēb luu ga.

33 ¿Pe nacre pquiad zdoo luu zha co, zigne pquia zdoo naa luu?”

³⁴ Blëë me gon me sca been zho, bnabey me bio zho ladzguiib, haxta blozh bdiizh zho grëse xquielqui zho.

³⁵ Scadaa nagon gun PxoZ naa to, telne gunde to samiech to perdon, tel pe nac falt ne gun zho lo to.

19

Zha ne rsëbtsieel

(Mr. 10:1-12; Lc. 16:18)

¹ Blozhse sca bnee Jesús lo zho, brienie me zho ga güeyted zho grë guiedz ne ndxie xtan zha Judé, grë miné riaan nêz dan ro guiubee Jordán, nêz ne rlan ngbidz.

² Miech guizhiu ne rrieë grë guiedz co, rdziñ lo me; grë men rzacnë ne rdziñnie zho, beenguiac me zho.

³ Ga no me, bdziñ bla zha farisé gocladz zho niungüet zho me, par dien pe nxind me tib diidz; bnabdiidz zho lo me rëb zho:

—Pe gnë luu dien, ðpe wena csëbtsieel zha bgui ne gacladztaa csëbtsieel?

⁴ Pquiab me rëb me:

—¿Mod rande to zha zhubnee lo Xtiidz Dios? Lo co zhubnee ganle zeene psan me miech, tib nêz zho psan me, tib mgui ni tib wnaa.

⁵ Ni rneew, ib none greezhaa mgui lo pxoz zho, lo xnïaa zho par gbannie zho wnaa ne nac tsieel zho, gac zho tibaque miech grop zho.

⁶ Nligaa nacdraa zho chop miech, sinque laa zho rac tibaque. Dios nac men ne psan ycatsieel miech, cho dzigo nac miech par quiits zho miné rnabey me.

⁷ Dzigo rëb zho lo me:

—¿Pex nac dzigo waa bdeed Moisés diidz csëbtsieel mgui ne racladz csëbtsieel? Rëb Moisés, zac csëbtsieel zho, totsaque yquia tib guits gdeed zho lo wnaa zaatne raquiet laa zho psaan wnaa.

⁸ Pquiabchaa me rëb me:

—Ne squitaaxe waa miech nad, miech ndip zdooc goc xmengol to, gane bdeed Moisés diidz csëbtsieel zho; sangue Dios psand me diidz csëbtsieel miech.

⁹ Gacnan to ganle, zha ne csëëb wnaa ne nac tsieel zho, ni tel peet guilyozh beend wnaa co, dol ga gun zho csëëb zho tsieel zho ycaa zho stib wnaa. Scaquegaa mgui ne ycaa wnaa ne psëëb zho ga, dol ga gun zho sac gon no tsieel wnaa co.

¹⁰ Dzigo rëbchaa xpëëdscuel me:

—Tel scataa nac xcuent guieltsieel, mazd lëëquew dzigo ctsieelniad ne.

¹¹ Pquiab me rëb me:

—Nligaa no mgui ne rtsieelniad, per zhis zho, ni no pe nacne sca riaan zho.

¹² No zho desde rac zho mëëd, nacd zho zha ne grieelo tsonie wnaa; no zho ib miech sca rsan zho. Nogaa zha ne ib zha rbeeladz zho ctsieelniad zho, parne grieelo tsoxcoraa zho gun zho xtsiñ Dios. Zha ne sca rquiabladz ctsieelniad, maase ctsieelniad zho.

Beenlay Jesús mëëdlas

(Mr. 10:13-16; Lc. 18:15-17)

¹³ Ga no Jesús, ndal zha ne bdziñ bdziñnie zho xpëëdlas zho lo me, parne cxobnia me guic win gunlay me win. Grë zha ne nac xpëëdscuel me, lel psilo zho rtsidil zho pe nacne nodziñnie zho grë mëëdlas co lo me.

¹⁴ Zeene gon me sca quiayun zho, rëbchaa me lo zho:

—Ctsirede to grë mëëdlas yeen qui, golsaan guiaad win lo naa. Sac gon grë mëëdlas yeen, ni zha ne nac zig nac win, zha co nac zha ne sëëb ygab lo Dios.

15 Dzigo psilo me pxobnia me guic grë mөөdas yeen co, beenlay me win. Blozhse ga, laa me briece ga.

*Bzodiidnie tib zha ricw Jesús
(Mr. 10:17-31; Lc. 18:18-30)*

16 Laa me zierree ga, zeeñe bdziñ tib mgui nguieg, tib zha ricwa, rëb zho lo me:

—Nan naa luu nac tib men ne noseed miech, ni tib men wen nac luu. Bnë dien, ðpe nac mine gun naa parne grieelo ygaa naa guielmban ndzon ne gdziñd dze lozh?

17 Pquiab Jesús rëb me:

—Rnee luu lëe tib men wen nac naa. ¡Nligaaw, Diosse nac men wen! Telne ni racladz luu ygaa luu guielmban co, none tsoxco luu gban luu mine rnabey Dios.

18 Pquiab zho rëb zho lo me:

—¿Pa min waa?

Rëbcha me:

—Mine rnee:

Gute luu samiech luu,
telne nole tsieel luu, tsonied luu zha ne led tsieeld luu,
cuand luu samiech luu,
yquiadiidzguizhd luu samiech luu,

19 gon pxoz luu, gon xniala luu, cueed luu xquielto me.
Bleynie samiech luu, zigne rleynie luu luu.

20 Dzigo rëbcha zho:

—Ni tib mine rnee luu i gard quits naa, grësew zanañ naaw zigne naca. Racladz naa gacnañ naa, dien peraa no gun naa.

21 Horco rëb me lo zho:

—Tel racladz luu gac luu tib zha ne gban grëse mine rnabey Dios, güey sca güeyto grëse ncuane rap luu, dzigo güeytiiz dimi co lo grë zha ne guiend pe yquin. Lozh ga, dë dënañ zhits naa. Min co nagon gun luu, dzigo zgaa luu guielmban ndzon co; ni scagaa nroob guielnzaac ne ygaa luu nëz lo Dios.

22 Zeene bin zho sca rëb me, mbanse rac zho laa zho zey, sac nroob ncuane quanie zho.

23 Dzigo rëbcha Jesús lo xpëedscuel me:

—Gneli naa lo to ganle, grë zha ne squi rapchen rzacxuu zho par sëeb zho xnëz Dios gnabey me zho.

24 ¡Ne nligaa ngan rzac zhow! Mazd ngandse rded tib camell guieer guzh lëdle sëeb tib zha ne squi rapchen xnëz Dios.

25 Zeene bin zho sca rëb me, rzee zdoo zho, rnee zho:

—Bay, ðchösezhe dzigo waa nac zha ne zrieelo sëeb xnëz Dios?

26 Dze bui me lo zho, dzigo rëbcha me:

—Nligaa par miech zootle tsod zha ne grieelo sëeb xnëz me; sangue me nan me no zho. Sac tel me, tsod ncuane grieelod gun me.

27 Horco pquiab Pedr rëb Pedr lo me:

—No dzigo waa, ðpe nac mine ygaa no? Nanle luu ganle, tel no grëse ncuane rdziaap no, laa no psana, ziaadnañ no zhits luu.

28 Pquiab me rëb me:

—Golgona ganle, dze ne gacncub grëse ncuane no, zeene laa Mgui ne pxeel Dios zob lo xcan ne zo zaatne nac lo guielndzon ne no me, dze co lo gza to ne nac to zha ne biaadnañ zhits naa, sob to lo gza tsiipchop xcan ne rieguial to. To gac zha ne gun guielwxtis lo gza tsiipchop dii ne nac zha Israel.

²⁹ Grëragaa zha ne psan lidz, psan zho bets zho, bzian zho, xniaa zho, pxoz zho, tsieel zho, xpëed zho, liun zho porne noyun zho xtsin naa, na lo guielmban riique laa zho gana stib tib gayoogaw tib tiba; ni ib tedsod zгаа zho tib guielmban ndzon ne gdziandraa dze lozh.

³⁰ Nli zig nac niina, nzian zha ne rzac zha non nac zho, nogaa zha ne rzac zho peet nond, per zeene gal dze co lalga gac zho grë zho.

20

Lalga nac grë zha ne no xnëz Dios

¹ Grë zha ne no xnëz Dios, zac zho lo me zig bzhaac grë zha ne güey xtsiin tib men co.

² Tib men co name nroob dziin quianie me, tib dzew zigne biini liu briece me güeyguib me zha ne tsielaap xuv me.

³ Bdziel me palal zho, biaan zho diidz palal quizh me zho dze, laa zho bzëeb lo dziin.

⁴ Glaale ngbidza briece me güeyted me len guiedz, lëetse güeytsib me lo bla zha ne zob ga racladz dziin.

⁵ Dzigo bree me zho, rëb me: “Goltsie xtsin naa, na quizh naa to mine non xtse to.”

⁶ Rwe ngbidza, biire me güey me güeyguib me spalal zho. Maase las treza güeyaque me stib.

⁷ Zhile sëeb ngbidza, biire me güey me len guiedz. Ga bdzieel me zha zho, gon me scase zob zho ga. Dzigo rëbchaa me lo zho: “¿Pe nacne squise noded dze to?”

⁸ Pquiab zho rëb zho: “Choot rneedzdaxe dziin waa yquiaa no.” Rëbchaa me: “Nasca zeena tsie to lo xtsin naa, maase quizh naa xtse to.” Dzigo laa zho zie.

⁹ Zeene laa dze blozh bdze, bnee me lo zha ne zo lo xtsiin me, rëb me: “Bredz grë zha qui na, bdiizh xtse zho grëse zho. Zha ne bza bzëeb lo dziin, zha co glo bdiizh, lozhraa ga quizh luu zha ne glo bzëeb.”

¹⁰ Dzigo bded zha ne bdzele dze bzëeb lo dziin ga, tib tib zho pcaase zho mine non zho tib dze.

¹¹ Grë zha ne glo bzëeb lo dziin, zeene gon zhow, tibaque güeynie guic zho nroobraa nguizh me zho. Per zeene laa zho gozh, lalgaque pcaa zho.

¹² Zeene gon zho lalga pcaa zho grë zho, blëe zho, güey zho güeylisqui zhow lo men ne nacchen dziin ga, rëb zho:

¹³ “Psacsi luu no i gon squi been luu. Bui ganle gdipse dze ptsuu ngbidz no pquiaa no xtsiin luu, ¿zha nac dzigo lalga quizh luu no grë no zha qui, ni niipyeenaque been zho dziin?”

¹⁴ Pquiab me rëb me: “Bets, nosacsid naa to, biaanle ne diidz name palal quizh naa xtse to.

¹⁵ Nana sca golgüey xtimi to i, zeena golsë. Ib zdoo naa rala lalga quizh naa to grëse to.

¹⁶ ¿Stiba, xtimi naaw, zrieelo gundziin naaw zigne racladz naa! ¿Te në rac zdoo to ye, ran to rquia zdoo naa miech?”

¹⁷ Scapaa nagon gac zha ne no xnëz Dios. Lal gacnon zho, zigtaa zha ne glo bzëeb xnëz mew, zigtagaa zha ne sëeb bzaw.

Bzeet Jesús stib laa miech csacsi me

(Mr. 10:32-45; Lc. 18:31-34)

¹⁸ Nëz no Jesús zie me nëz Jerusalén, tibaque bredz me gza tsiipchop xpëedsuel me,

¹⁸ bzeet me lo zho zha gūn miech me zeene laa zho gdziñ Jerusalén, rēb me:
—Ib ziaab naa lадznia grē pxoz ne rnabey grē zho maistr ley, zha gnab guet naa.

¹⁹ Zha co naa lадznia zha zit, parne guñnguzee zha co naa, parne quñ zho naa, ni haxta squiaa zho naa lo cruz. Per zeene gac tsoñ ngbidza, zriebaanaa.

²⁰ Tibaque zeene wbig tsiel Zebedé wbignie me grop xingan me Jacob ni Juan, pquitsgzhib me lo Jesús rnab me gūn Jesús tib favor ne racladz me.

²¹ Dzigo bñabdiidz Jesús lo me, pe nac favor ne racladz me. Pquiaab me rēb me:

—Racladz naa gneedz luu diidz sob tibga xpēēd rii naa cue luu zeene gdziñ dze ne laa luu zob zobnabey luu; tib zho nēz derech, stib zho nēz revés.

²² Pquiaab Jesús rēb me lo wnaa co:

—iNi luu goñ riend pe rnab luu! ¿Niacxe zlēb zho gañ zho grē guielñe ne gan naa, tedгаа zho grē miñe teed naa?

Pquiaab zho rēb zho:

—Zlēēb no.

²³ Rēbchaa me lo zho:

—Nli nenda zañ to grē guielñe ne gañ naa, ni zdedгаа to miñe teed naa; per ne gnedz naa diidz sob to cue naa nēz derech, nēz revésгаа, led naad raguial min co; sac laa lugar co biaanle par zha ne tsieguiala, ni Pxoz naa men ne zob gbaa men cose nan dien chow.

²⁴ Grēraa xpēēdscuel me, zeene bin zho pe nac miñe rnab Jacob grop Juan, blēē zho lo zho.

²⁵ Dzigo bredz Jesús zho grē zho, rēb me lo zho:

—Rañ to ganle zha ruñ grē zha ne rnabey grē guiedz ne ndxie lo guidzliu, ni grē zha ne nac zha non, masaque rnabey zho samiech zho zigne racladztaa zho.

²⁶ Sañgue to goñ guñscade to. Zha ne racladz gac zho zha non lo to, laa ne glu zho zha non zho, none glo zho guiaanwin, gac zho zig tib ngundziin lo to.

²⁷ Scaqueгаа zha ne racladz gnabey zho lo to, none glo cseed zho gūn zho miñe gnabey to zho.

²⁸ Golgan ganle, niicle naa ne nac naa Mgui ne pxeel Dios, ziald naa par gnabey naa miech, sinque laa naa zial par gac naa tib ngundziin lo zho, ni gded naa xquielmban naa zeena laa zho lo grētaa ncuaañe ngadoo zho. Ni nanpaa naa miech guizhiu ne laa.

Biac chop zha ne rold lo

(Mr. 10:46-52; Lc. 18:35-43)

²⁹ Miech guizhiu nañ zhits Jesús, laa me zieriee guiedz Jericó.

³⁰ Ro nēz co zob chop zha ne rold lo, zeene bin zho laa me ziaad ga, psilo zho nguiedz rbedz zho rnee zho:

—iJesús, men xtii rey David, pquiaa zdoos!

³¹ Blalaa zha ne zie ga, psilo zho ndox zho lo grop zha co parne guioog ro zho, per leñ hor cole nguiedzraa rbedz zho me.

³² Nacne zeene bdziñ me zaatne zob zho, blēz me, bñabdiidz me lo zho rēb me:

—¿Pe nadien gūn to naa?

³³ Pquiaab zho rēb zho:

—iRacladz no guiac lo no!

³⁴ Pquiaa zdoos me zho goñ me sca rac zho, dzigo pquiaania me zhits guidlo zho. Horcogazh laa lo zho biac, laa zho zienañ zhits me.

21

*Bdzin Jesús Jerusalén**(Mr. 11:1-11; Lc. 19:28-40; Jn. 12:12-19)*

¹ Sca no Jesús nêz grê xpêêdsuel me, laa me bdzin guiedz Betfagé. Gaxle ga riaan Jerusalén, nêz danse squi riaan Gui Oliv. Dzigo pxeel me chop xpêêdsuel me, rêb me lo zho:

² —Goltsie guiedz win ne ndxie danse lo ne i. Ga gdzin to zaatne quiadoo tib burr gus grop xpêed, dzigo golxadz ma golténie ma nu.

³ Tel cho gnabdiidz pe nacne noxadz to ma, golguiab lo zho: Men ne rnabey ne, men co rquiin ma, na zigne lozh xtsiin ma guiaadsan no ma.

⁴ Ga briequia mine bnee tib men ne biadteed xtiidz Dios lo miech padzeela, zeene rêb me:

⁵ Golguiab lo men Jerusalén:

“Golwi ganle, laa men ne nac zhirey to ziaad i. Tib men ligase rlu me, zob me lad tib burr win, tib ladse ma ne rey yo zob me.”

⁶ Laa zho zie, zigne bnabeyse me zho ga, scase been zho.

⁷ Zeene wbire zho, laa zho bdzinnie burr co grop xpêed ma. Pxob zho lar ne rbix zho lad xpêed ma, laa me bzob ma.

⁸ Zigse zie me, no grê miech guizhiu co, rta zho lar ne rbix zho ro nêz rded burr ne zob me ga; nogaa zha ne rchoo nia grê yag nguia, rdziin zhow ro nêz rded me.

⁹ Grêse zho, zigtaa zha ne nera, zigtaa zha ne nal, nguiedz roptsie zho rnee zho:

—¡Golgotsaa co ne xviv xingan David! ¡Golgotsaa gleyne ne me! ¡Zha ndzontaa Dios, pxeel me men noob qui lo ne!

¹⁰ Zeene bdzin me Jerusalén, rlozhd gzee zdoz grê miech ne ndxie ga, rnabdiidzlsa zho rnee zho:

—¿Bay cho nac men qui?

¹¹ Rquiab grê zha ne nal zhits me ga, rnee zho:

—¡Lêê Jesús i! ¡Lêê men Galilé qui, noteed xtiidz Dios lo miech!

*Blee Jesús miech len yadoo**(Mr. 11:15-19; Lc. 19:45-48; Jn. 2:13-22)*

¹² Biini liu co, zeene bdzin Jesús Jerusalén stib, güey me yadoo noob ne zob lad guiedz co. Bdzin me gon me nzian miech ne ndxie ga, masaque tib lgui quiayun zho, zha ne no wto, zha ne no wzi. Nacne güey me ptiixche me xmezha zha ne notsêê dimi, ptiixche me xmezha zha ne no wto palom; blee me zho ga grêse zho,

¹³ rêb me lo zho:

—Led znu gon zhubnee lo Xtiidz Dios: “Zaatne nac lidz naa nu, nu none guiaad grêse miech sodiidznie zho naa.” Laa to gon, quiayun to lugar rii zig tib zhibliee ngbaan.

¹⁴ Ga no me bdzin bla zha ne rold lo, zla zha ne nê ni, wbig zho lo me. Gzase zho beenguiac me.

¹⁵ Nzian mēēdas yeen ne ndxie len yadoo ga, psilo win nguiedz rnee win: “¡Zha ndzontaa xingan rey David!”

Grê zha ne nac pxoz ne rnabey, ni grê maistr ley, zeene gon zho milagr ne been me ga, ni gon zho zha rnee grê mēēdas co, rlêê zho,

¹⁶ rêb zho lo me:

—¿Pe ib rond luu ganle pe nonee grê mēēdas qui?

Pquiab me rêb me:

—Ron naaw. ¿To waa, pe ran̄de to gan̄le zha zhoobnee lo Xtiidz Dios, zaatne raquiet mīne noyac nu? Led rneew iēē:
Haxta grē mēēdas ne bii radz,
ye win rley win rool̄nie win me.

¹⁷ Blozhse sca rēb me, zoque zho ga, laa me bio nēz zie me nēz Betain. Ga blēz me wdze co.

Wbidz tib yag guigw

(Mr. 11:12-14, 20-33; Lc. 20:1-8)

¹⁸ Sil co zeēne no me nēz gdzīn me Jerusalén, pcaabedz me.

¹⁹ Gōn me zob tib yag guigw gax ro nēz, dzigo güey me güeyso me low dien pe ndziel̄d tib nex low niow me. Bdzīn me gōn me loxaque zhiblagsew zēēb, nacne rēb me low:

—¡Lēē blozh xtse luu nu gōn! ¡Gdzīndraa dze ne yquia nex lo luu!

²⁰ Biini liu, zeēne laa zho zie Jerusalén stib, gōn xpēēdsuel me, laa yag guigw co bidzle. Bzee zdoo zho, bnabdiidz zho lo me rēb zho:

—¿Bui gan̄le, bay zha nacne squi znuse wbidz yag guigw qui?

²¹ Pquiab me rēb me:

—Gneli naa lo to gan̄le, tel̄ne dib zdoo to rnalo to Dios, niicle ncuaāne mazdraa ngan̄ gnaob to lo me, zun̄ mew. Lēēraasi none dib zdoo to glilad̄z to zaca, ni palal̄ gacchopd guic to.

²² Grēse ncuaāne gnaob to zeēne rzodiidznie to me, zneedz mew, totsaque dib zdoo glilad̄z to laa to ycaaniaw.

²³ Bdzīn me Jerusalén, wbiire güey me len̄ yadoo. Ga noseed me miech, zeēne bdzīn bla zha ne nac pxoz ne rnabey ni zla zha ne nac men̄ non lo men̄guiedz, bnabdiidz zho lo me rēb zho:

—¿Cho dzigo nac luu ne squitaa ziaadnabey luu len̄ yadoo? ¿Cho rnabey luu?

²⁴ Pquiab me rēb me lo zho:

—Ye naa laa naa gun̄ tib wnaabdiidz lo to. Tel̄ne stsire to low, dzigo gni naa lo to gan̄le cho rnabey naa ne laa naa noyun̄ grē ncuaāne noyun̄ naa.

²⁵ Gōlnē dien̄, ¿cho pxeel̄ Juan Bautist biaad me pchoobnis me miech? ¿Pe Dios pxeel̄ me, te miechsew ye?

Psilo zho rnabdiidzlsa zho dien̄ zha ctsire zho lo xtiidz me, rnee zho:

—Tel̄ne dzieets ne Dios pxeel̄ Juan, dzigo laa me gnē: “¿Pex nac dzigo waa bliladzde to mīne bnee me?”

²⁶ Tel̄ na dzieetsгаа ne, miechse pxeel̄ Juan, grieequiadaque ne.

Rdziēb zho niab zho miechse pxeel̄ Juan, sac nan̄ men̄guiedz nli Dios pxeel̄ Juan biadteed Juan xtiidz me lo miech.

²⁷ Dzigo mazd mīne been̄ zho rēb zho lo me:

—Ndion̄d no dien̄ cho pxeel̄ Juan.

Dzigo rēbchaa me lo zho:

—Niicle naagaa nagon, grieelod gni naa lo to cho rnabey naa quiayun̄ naa grē mīn rii.

Zha nac zha ne rond diidz

²⁸ ‘Gōlquiaadiaga gan̄le. Tib mgui, quianie me chop mēēdbgui. Tib dzew, bredz me tib zho rēb me lo zho: “Xin, none gōn tsie luu nadze, tsietop luu uv xcuaa ne.”

²⁹ Pquiab zho rēb zho: “¡Gad naa!” Wdzeelaaw, bien̄ zho nonguiēlda ga sca gun̄ zho, dzigo bio zho nēz güey zho.

³⁰ Laa stib zho, zeēne bredz me zho bnabey me zho tsie zho lo dziin, rēb zho: “Peet nacda, na maase ga naa.” Blozh ga pasē zho nie.

³¹ ‘Gōlnē dien̄, lo grop mēēd co, ¿cho nac zha ne bin xtiidz pxoz?

Pquiab zho rëb zho:

—Zha glo cow.

Dzigo rëbchaa me:

—Gneli naa lo to ganle, mincodaa quiayac nu niina: Grë zha ne rzac to mazdraa ngoopdol, zig nac grë zha ne rtop dimi ne razh lo zha Roma, zig nac grë wnaa ro nëz, mazd glole zha co nozëëb xnëz Dios, lëdle to.

³² Biaadpaa Juan Bautist name biadseed me miech csaan zho xquieIntseeb zho, gban zho zigne racladz Dios, ni pe liaadz to nion to mine rnee me. Mazd grë wnaa ro nëz, grë zha ne rtop dimi ne razh lo zha Roma, znuse psaan zho xquieIntseeb zho. Laa to, niicle ran to nosaan grë zha co xquieIntseeb zho, per ib rsaande to mine nac to.

Xcuent zha ne pqüianap liu
(Mr. 12:1-12; Lc. 20:9-19)

³³ Dzigo bzodiidz me stib cuent lo zho rëb me:

—Tib men name, nroob lbë uv beenbni me lo liun me. Psilo me ptse me igose liu co, bzaa me zaatne gzhii grë uv co, ni bzaa me tib yu glaa zaatne sob zha ne yquiaanapa. Blozh ga, blediin me liu co lo bla zha ne ran liu, dzigo laa me brieë, laa me zey zit.

³⁴ Zeene gol mëë ne laa nex co gol, pxeel me bla zha ne quia xtsiin me zie lo zha ne quianap liun me ga, parne gdeed zha co uv ne rieguial me ycaa me.

³⁵ Per leI bnaaz zho zho, zha ne blooquie zho, zha ne bdeedgolp zho, haxta beet zho tib zho.

³⁶ Wbiire pxeel me zla zho, hor cole nzianraa zho pxeel me, per niapse sca psacsi zha co zho.

³⁷ Tibaque zeene pxeelaque me xpëëd me, bza guic me rëb me: “Ganse zho xpëëd naaw, zon zho mine gnee me.”

³⁸ Pex nion zho diidz, zeene gon zho xpëëd me, rëbchaa zho: “iLëë zha qui nagon guiaanne liu rii! iGolgotsoa dziuut ne zho, zeena guiaana lo ne!”

³⁹ Dzigo bnaaz zho xpëëd me, güeynie zho me zaatne tib lad lo liu co, ga güeygut zho me.

⁴⁰ iZha sca dien rzac to gun bizhuan liu co gza zha co, zeene laa me gbire?

⁴¹ Pquiab grë zha ne nac pxoz ne rnabey, ni zha ne nac zha non lo menguedz ga, rëb zho:

—Ni lalnu yquiad zdoo me zho, znitlogazh me zho. Lozhse ga, cuediinga me liun me lo zla zha ne gundziina, zha ne guien gdeed nex ne rieguial me ycaa me.

⁴² Dzigo rëbchaa me lo zho:

—Haxta lo Xtiidz Dios no tib zaatne znu rnee, ipe gard ganle glab tow? Rneew:

Quie ne psëëb zha ne nozaa yu,

ni nanð zho lëëpaa quie co nac mine rnazdziits yu.

iNcuaahe gzee zdoo new! Sac Dios bnabey sca goca.

⁴³ Gacnan to ganle, scadaa nagon griee to lad grë zha ne ngab lo Dios, parne gbig zha ne tsoxcopaa gun xtsiin me, zha cole guiaan xlugar to.

⁴⁴ Zha ne tsietsohe lo quie ne raquiet ga, zac zho zig tib ncuaahe rac tson tap lë; laa tel lëëgaaw tsohe lad zho, zac zho zig tib ncuaahe die die rac.

⁴⁵ Grë zha ne nac pxoz rnabey ga, ni grë zha farisé, zeene blozh pqüiaadiag zho cuent ne bzodiidz me lo zho ga, bien zho zha ga rzeet me.

⁴⁶ Nacne gocladz zho naaz zho me, per bdziebaque zho; sac ndal miech rleynie me, niicle ne rzac zho tib zha ne noteedse xtiidz Dios nac me.

22

Zha ne nēd sēēb xnēz Dios

¹ Bzodiidz Jesús stib cuent lo zho, rēb me:

² —Grē zha ne rbedz Dios ygab zho xnēz me, none tsoxco zho gon zho mine rnee me; sac nenda gdzieelo zho zig bdzieelo zha ne bredz tib rey co nie zho lo zhilni xpēēd me.

³ Tib rey name, ziaadyob ctsieelnia xpēēd me, nzian zha ne bredz me tsie lo lni. Zeene laa dze co bdziñ, pxeel me zha ne quia dziin lo me zietsedz grē zha ne bredz me lo lni ga, per nēd zho nienal zho.

⁴ Wbiire me pxeel me zla zho rēb me: “Gołtsietsedz zho, gołguiab, laa guielwagw ne yquiin goclole, siguiel zho na guiaad zho.”

⁵ Per ib been casd zho zha ne pxeel me ga, no zho brieē zie lo xcuua, no zho brieē zie zhiwto,

⁶ nogaa zho leļ bnaaz zho zha co, psacsi zho zho, beet zho zho.

⁷ Zeene gon me sca been zho, blēē me, bnabey me grē xmenguiib me güey zho güeygut zho grē zha ntseeb ne psacsi xmandad me ga, ni bnabey me bzēēg zho guiedz co.

⁸⁻⁹ Blozh ga biire pxeel me zla zho, rēb me: “Laa guielwagw rii goclole, miñe naca gołtsie tib nēz yu, zha ne gdzieeltaa to, gołcuedz zho guiaad zho lo lni; sac grē zha ne bredz naa ga niaad, laa zho blule ganle rieguiald zho guiaad zho nu.”

¹⁰ Dzigo brieē zho güey zho, miech ne bdzieeltaa zho, zigtaa zha ndzinliw, zigtaa zha ntseeba, grēse zho bredz zho bdziñnie zho zho lo lni. Goł hor wagw, biodzēse leñ yu ndxie miech.

¹¹ Zeene laa rey bzēēb zienee me lo zho, gon me lad co no tib zha co nacwxabd zho zigne rieguiald gacwxab zha ne sca rie tib lo guieltsieel.

¹² Dzigo rēbchaa me lo zho: “Bets, ¿pe nacne squire luu bzēēb luu nu, bui ganle nacwd luu lar ne bneedz zho niacw luu?”

Dzese zob zho, rdziēd zho pe guiab zho lo me. Gonse me sca rac zho,

¹³ bnabey me zha ne nodziib lo mez h rēb me: “Gołzobdoo zha rii, gołxidoo grop nia zho, grop ni zho, gołcuee zho nu gołtsieron zho lo ncow nēz ley. ¡Ga nac zaatne rieguiald zho, ga gan zho guielnēdox ne no ted zho, goonnē zho, haxta gow lay zho!”

¹⁴ Mincodaa nagon rac leñ dze rii —rēb Jesús—, ndal zha ne racredz sēēb xnēz Dios, per zhis nac zha ne rioxco rzēēb.

Pe nonguiel quizh miech contribucion

(Mr. 12:13-17; Lc. 20:20-26)

¹⁵ Blalaa zha farisé ne ndxie ga güey zho bnediizd zho diēñ zha guñgüet zho Jesús cxin me tib diidz, zeena min co yquiaaqui tsiezo zho me lo wxtis.

¹⁶ Dzigo pxeel zho bla zha ne nacgrē zho, ni güey zla zha ne racnie Herod gogcza zho. Bdziñ zho rēb zho lo me:

—Maestro, ndion no niapse diidzli zienal luu, ni scagaa zeene rseed luu miech, rdziebd luu miñe nac diidzli min co rnee luu lo zho.

¹⁷ Gane niina, racladz no gnē luu diēñ pe nonguiela ga rdeed no dimi ne razh lo rey ne zob Roma, te nonguiel da ye.

¹⁸⁻¹⁹ Biēnga me racladz zho guñgüet zho me, dzigo rēbchaa me lo zho:

—¿Pe nan to na riēñd naa pe no guic to? Masaque rēb to na lēē, znuse guñgüet to naa. Gołneedz tib pes ne rguizh to nu ganle.

Dzigo bdeed zho tib pes plat lo me.

²⁰ Blozh ga, rēbchaa me lo zho:

—¿Cho nu, cho lē nu quia lo pes rii?

²¹ Pquiab zho rëb zho:

—Lëë rey i, lëë lë me i quia lo qui.

Dzigo rëb me lo zho:

—Mïne rieguial sca ycaa rey, goldeeda lo rey; scaquegaa mïne rieguial ycaa Dios, lo Dios goldeeda.

²² Zeene gon zho sca ptsire me lo xtiidz zho, bzee zdoo zho, mazd mïne been zho laa zho wbichese ga, laa zho zey.

¿Pe nli zrieaban miech?

(Mr. 12:18-27; Lc. 20:27-40)

²³ Dze coquew, güey bla zha saducé lo Jesús. Nac zha saducé rliladz zho dzdiz dze grieaban miech. Dzigo bdiz zho,

²⁴ rëb zho lo me:

—Maestro, znu psan Moisés diidz: Telne glo mgui guet lo wnaa ne nac tsiel mgui, ni gopd wnaa mëéd, dzigo none betsaque zho tsielnie wnaa co stib, zeena gap wnaa mëéd ne guiaan xlugar xpëéd zha ne gut ga.

²⁵ 'Bio tib dii zha co znu bzhaac, gadz bets nac zho. Ptsielnie zha ne nac zha gol, zeene laa zho gut biaan xpëéd zho. Dzigo ptsielnie stib bets zho wnaa co.

²⁶ Blozh ga gutaque zha co, pa së zho nsañ mëéd. Ptsielniaque me stib zho, goc zho tson, niicle zha co psandaque mëéd. Sca sca haxta bza gza gadzse zho ptsielnie me,

²⁷ tibaque zeene yeque me laa me gut.

²⁸ Mïne racladz no gacndion no, ¿chopaa dzigo gac tsiel wnaa co zeene laa zho grieaban? Sac gza gadzse zho ptsielnie me.

²⁹ Pquiab Jesús rëb me lo zho:

—I nagon laa to rxin, mïne naca riende to zha nac Xtiidz Dios, niicle rliladzde to zrieelo me gun me ncuaan ro ne gard gan miech.

³⁰ Sac gon zeene gal dze ne laa grë miech grieaban, niicle mguiw niicle wnaaw led yedraa hor co dien cho tsielnie zho; sac hor co laa zho gac zig nac grë anjl ne no gbaa.

³¹ Stiba, ib nli zrieaban mengut. Mod rande to zha zhubnee zaatne raquiet zeene rëb Dios:

³² “Naa nac Dios ne rliladz Abraham, naa nac Dios ne rliladz Isaac, naa nac Dios ne rliladz Jacob.” Niicle ne gutle gza zha co hor co, per zeene sca bnee Dios gase rlu mban zho no zho lo me; sac tel Dios, jnacd me xDios mengut, sinque xDios zha mban nac me!

³³ Grë miech ne ndxie ga, zeene gon zho sca ptsire me lo xtiidz zha saducé co, rzee zdoo zho.

Xley Dios mïne mazdraa non

(Mr. 12:28-34)

³⁴ Grë zha farisé ne ndxie ga, gon zho sca psioog Jesús ro grë zha saducé co. Horco biire grë zha farisé co bzodiidz zho stib.

³⁵⁻³⁶ Lad zho no tib maistr ley, dzigo wbig maistr ley co lo Jesús, rëb zho:

—Maestro, lo grë xley Dios, bzhiguiel bnë lo naa dien, ¿pa min nac mïne mazdraa non?

Sca rëb zho, sac gocladz zho niungüet zho me.

³⁷⁻³⁸ Pquiab me rëb me lo zho:

—Lëë mïne mazdraa non nu znu rnee: “Dib zdoo luu, dib xalm luu, dib guielbiini ne no guic luu, bleynie Dios, men nroob ne rnabey luu.” Lëëw nac mïne mazdraa non, ni lëëw glopaa raquiet lo grëse ley.

³⁹ No stib miñe rnee: “Bleynie samiech luu zigne rleyne luu luu.” Ye min rii nona, meraque lala con miñ glo.

⁴⁰ Zha ne gban zigne rnabey grop ley rii, lëele grë ley ne psan Moisés ga, lëele grë zhiwseed zha ne biadteed xtiidz Dios ga, ziana zho.

¿Cho xpëéd nac Crist?

(Mr. 12:35-37; Lc. 20:41-44)

⁴¹⁻⁴² Goñ Jesús nzian farisé ndxie lo me ga, nacne bnabdiidz me lo zho rëb me:

—¿Zha dien rzac to guiaad Men ne zëëble diidz ga cxeel Dios? ¿Cho lo xtii grieequia me?

Pquiab zho rëb zho:

—Lo xtii David grieequia me.

⁴³ Dzigo rëbchaa me lo zho:

—¿Pe scaw sca? Zha nac waa zeene bdeed Espíritu Sant guielbiini lo David bzeet David men co, rëb David me nac men ne rnabey David. Golgan ganle znu bnee David:

⁴⁴ Rëb Dios lo men ne rnabey naa:

“Cue naa nëz derech, nu bzob, nieeda lozh gnaz naa grëse zha ne rlëe lo luu, csan naa zho ladznia luu.”

⁴⁵ Gase nagon telne nli zha xtii David gac Men ne cxeel Dios ga, ¿zha nac dzigo rnee David men co rnabey David?

⁴⁶ Ni tib zho ib bdziidz zho zha ntsire zho lo xtiidz me; desde dze co ni stib zho biazhdraa pe nabdiidz zho lo me.

23

Mine nac maistr ley grë zho zha farisé

(Mr. 12:38-40; Lc. 11:37-54; 13:34-35; 20:45-47)

¹ Dzigo psilo Jesús bnee me lo grë miech co, ni lo xpëédscuel me,

² rëb me lo zho:

—Grë maistr ley ni grë zha farisé ib lëe xtsiin zho ga, nac cseed zho miech zha nac ley ne psan Moisés.

³ Golguien golgon xtiidz zho, iper nsin golso, ib gunde to miñe run zho! Nac zho, ni lalnu run zho miñe rseed zho miech.

⁴ Rio zho rnee zho lo miech, miñ rii, miñ rii rnabey ley gun to, ni per ni zha rioxcod zho siquier csilo zho gun zhow.

⁵ ¡Grë ncuaañe run zho, laaw runse zho par ganpaa miecha! Par guiab miech nguzbdiidz zho lo Dios, rio zho led zhid nzhen grë lo cint rquiaa zho Xtiidz Dios, rlozh ga rzhidoow yan nia zho, rzhidoow quia zho ne. Lar ne rbix zhow, rlozhd dieñ peraa rquia lada, xab zhow, haxta zhits ni zho rbiba.

⁶ ¡Zeene rbedz miech zho tib wagw nroob, rdziladz zho zhapaa rzob grol mezh, niicle len yadoogaaw, zaatne glupaa zha non nac zho, ga rzob zho!

⁷ Ro nëza, rdziladz zho ndooladz gnee miech bdiuzh lo zho, zeene rnee miech “zha rac”, “zha non”, nac zho, rlozhd gley zho.

⁸ Sangue to goñ yguibde to dien zha gnee miech “zha rac” nac to, sac tibaque men rac no, lëe me ga zëëble diidz cxeel Dios; golguien ganle tel to lalga nac to, rrieequia bets to grë to.

⁹ Ib gunde to zig run grëraa miech, runnon zho tib samiech zho rnee zho lëe pxoz zho ga, sac tibaque men ne nac Pxoz to, lëe men co no gbaa.

¹⁰ Yguibde to sac miech topaa gunctsin zho lo Dios, sac loxaque Men ne nole diidz ga cxeel me, men cose zrieelo gunctsin zho lo me.

11-12 Nodne gacglaa to lo samiech to, mazd ndooladz gołgac lo zho, sac zha ne racglaa, ziaanwin zho. Gacxe waa, telne racladz to gacnon to, none ndooladz gac to lo samiech to.

13 'iProbsaxe to maistr ley, probsaxe to zha farisé! Lēda i goṇ noyṇ to, rzac to noxco to sēeb miech xnēz Dios, per leḷ noca to sēeb zha ne racladz sēeb. Ni stiba, per ni to nod xnēz me.

14 [iProbsaxe to! Guielntseeb i goṇ ruṇ to, rio to rlozhd gooḷ to xlay to rzo to ro nēz, ni noque to rla to ncuaaṇe rapse grē wnaa viud; ib tedsod goṇ guielṇēdōx ne yгаа to.]

15 iProbsaxe to, rzac to na lēew ga ruṇ to! Rio to gui dan rbix to, haxta rded to nisdoo, rquiaguib to dien cho sēeb xnēz to ni rlozh ga laa ne ygab zho nēz lo Dios, leḷ nēz leṇ gabīl zienie to zho.

16 iProbsaxe to, nac diidz name to noseed miech, ni per ni to riend pe rnee to! Rnee to lo miech: “Zha ne rzeet yadoo ni tel gund zho miṇe rnee zho, peet nacd ga, per tel gzeet zho grē or ne no leṇ yadoo ni gund zhow, doḷ ga guṇ zho.”

17 iNadzpaā nxen to, nadzpaā ncw nac guic to! ¿Niacxe mazdraa non or lo yadoo? Gołguien ganle por yadoo, naclay grē or co.

18 Rneequē to: “Zha ne gzeet lo pcoog, led doḷda telne gund zho miṇe rnee zho; per tel gzeet zho gon ne ndziib lo pcoog ni gund zhow, doḷ ga guṇ zho.”

19 iPe nlipaa rnee to peet riende to! ¿Niacxe mazdraa dzigo non gon que lo pcoog? ¿Pe ranḍe to por lo pcoog co raclay gon?

20 Gołguien ganle, zha ne rzeet lo pcoog, yeḷe grē ncuaaṇe ndziib low ga quiazeet zho;

21 zha ne gzeetгаа yadoo, haxta Diosle ga goṇ rzeet zho, sac ga rbēz me.

22 Scasaque zha ne gzeet gbaa, zaatne rzoble Dios ga nozeet zho, masaque rrieequia me ga rzeet zho.

23 'iProbsaxe to maistr ley, probsaxe to farisé! Rzac to na demas nguzobdiidz to lo Dios, rio to haxta grē guizh bitxtil, guizh nizh, guizh comin ruṇ to tsiilal, rded to tib lala miṇe rieguial tsiesan to yadoo, laa ley ne mazdraa non zienied guic to guṇ to miṇe rnabeya. Nli rieguiala gdeed to grē gon co, per none scaque tsoxco to guṇ to miṇe nac diidzli, none yquia zdoo to samiech to, none dib zdoo to gnalo to Dios. Miṇ rii nac miṇe mazdraa non.

24 'iNe nlipaa ib riende to pe quaiyṇ to! Rzac to na noxco to gunctalde to xtoḷ to, masaque ni tib ngurudz rsaande to tso lo ncuaaṇe row to, ni riende to rrieequia haxta tib camell rab to.

25 iProbsaxe to, masaque nac to zig tib plat, zig tib tas ne nēz zhitssew mbe rna, laa nēz leṇa rṇadraa! Laglaase rquiaalo to miech wen nac to, per tibaque noban to, tibaque nosacsi to samiech to.

26 Gołguien none glo csaan to xquielntseeb to, none gac to zig tib plat zig tib tas ne zigtaa mbe nēz zhitsa, scagaa mbe nēz leṇa.

27 iProbsaxe to, nac to goṇ zig grē baa ne dieen paraa nquitsbie rna! Niow rlu nēz zhitsa, laa nēz leṇa loxaque grē ncuaaṇ biodz, loxaque grē dzit ngutoo nodzē.

28 Sca goṇ nac to, ne rac to zootxe luu waa nli miech ndzinli nac to, per nēz leṇ zdoo to loxaque zhgab ne dien zha yquidie to miech, zha csacsi to miech no to.

29 'iProbsaxe to maistr ley, probsaxe to farisé! Ni lalnu guielto guiend lo to, rio to rzhixcuua to ro xpaa grē zha ne biadteed xtiidz Dios, ni lēepaa grē pxozgol to beet zho. Dieen peraa ruṇ to rquiaalo to rsoladz to zho.

30 Rnee to: “Telne niaca miṇe nole ne leṇ dze co, ndeete ne diidz nsacsi xmengol ne grē meṇ rii.”

31 ¡Lëëque to gon nobeero ga, zha nactaa lo dii ntseeb ne ziaad to!

32 ¡Scaque nasca golgun! ¡Goltsienal grë mine been pxozgol to ga!

33 ¡Miech ngoopdol! ¡Zhin mendox! Te!ne csaande to xquie!ntseeb to i, ib tedsod gon gabil guey to.

34 *Grë zha ne cxe! naa, zig nac zha ne guiadteed xtudz naa, zha ne nacie Espiritu Sant, zha ne yгаа guie!biini yquiaa zho mine gnabey Espiritu Sant zho, ib tedsod sacsı to zho. No zho gutgazh to, no zho yquiaa to lo cruz, no zho lëëque len xyadoo to gdeed yag to zho, ib gandzede to zho, stib guiedz, stib guiedz tso to ctsidil to zho.

35 Blactaa grë miech ne sca peet xtold ziyut to grë xmengol to, psilow desde Abel haxta Zacarı xingan Berequí, men ne beet xmengol to zaatne nac gax lo pcoog len yadoo. Ni ye to gon zëeb xchen grëse zha co.

36 ¡Gneli naa lo to ganle, grë miech ne gon mban len dze rii, grë to zho yгаа guie!nëdox ne tsieguial to por grëtaa guie!ntseeb co!

37 ¡Aque tow men Jerusalén! ¿Pe nacie squitaa nac to, rut to zha ne ziadteed xtiudz Dios lo to, rgoquie to grë zha ne rxeel me lo to? Blactaa gocladz naa, niacnie naa to, nquianaap naa to, zig run nguid rgueedz ma xpëed ma, per bzhiguielde to.

38 Gacnan to sca ganle, nadzetaa gon laa lidz to nu guiaan ngan,

39 sac gandraa to naa, haxta gal dze ne guiab to: “¡Zha ndzontaa men qui pxeel Dios lo ne!”

24

¡Nsin golso!

(Mr. 13:1-23; Lc. 17:22-24; 21:5-24)

1 Laa Jesús zieriee len yadoo grë xpëëdscuel me, zeene pçuëezdze zho me, rëb zho:

—Gotsaa gwi ne ganle zha niaataa yadoo rii.

2 Blozhse bui zho low, rëbchaa me lo zho:

—Niicle squitaa nagon niaaw, per zdzin dze ne nitlow dib nacesw. Ni stib quie qui guiaan draa zigne squi zhobxcuaaw i.

3 Brie me len yadoo ga grë me zho, laa zho zie nëz Gui Oliv. Bdzin zho cho gui co, ga bzob me grë me zho. Dzigo wbig gax bla zho lo me, bnabdiidz zho rëb zho:

—Bzhiguiel bnë lo no dien, ¿pa hor dzigo gac mine bzeet luu ga? ¿Zha glu zeene laa luu ziaadyoble guiaad? Zeene nitlogaa guidzliu, ¿zha gancdion no laa dze co ziaadyoble?

4 Pquiab me rëb me lo zho:

—Nsin golso, zeena choot yquidiede to.

5 Sac nzian zha ne grieequia guiab zho zha nac Men ne zëële diidz cxeel Dios; ni nzian miech ne yquidie zho.

6 Zeene gon to nëzrii nëzrec noxtseeb csilo dil, guiabde to togo lëële dze ne guial naa ga bdzin; sac niicle noyacle dil, noxtseebragaa pa csilo gaca, led ledle ne nitlo guidzliu ga.

7 Garaa csilo grë dildox, grë guiedz nroob laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho. Nëzrii nëzrec csilo gni grë zhodox, nzian zaatne gan miech gbin.

8 Ni lega loxaque mine rsilosew ga, sac nroobraa guie!në ne gan miech lozh ga.

⁹ 'Zeene laa grë ncuuañ rii noyac, įnsin goįso! Sac hor co laa miech tsielo to ladznia zha ne csacsi to, haxta zut zho palal to, grëse miech stsidil zho to loxaque ne nac to zha ne no xnëz naa.

¹⁰ Nzian zha ne nole xnëz naa, leñ dze co laa zho gbiche, laa zho csilo lëëque zha glëënie zha ne nacgrë zho, haxta zielo zho zho ladznia zha ne gut zho.

¹¹ Leñ dze co zrieequia nzian zha ne yquidie miech guiab zho xtiidz Dios noteed zho, ni nzian zha ne giladza.

¹² Grë zha ne nole xnëz naa, zeene gañ zho grëtaa guieįntseeb, grëtaa dol ne quaiyuñ miech leñ dze co, ndal zho gleyniedraa zho Dios dib zdoo zho.

¹³ Per zha ne tiblrique gac, gbiched zho lo Dios, niicle tel petaa gañ zho noyac, zha co gac zha ne gdziñ lo me.

¹⁴ Niicle scataa noyac grë ncuuañ co, ib none ygaaz Xtiidz Ndzon Dios lo grëse miech, grëtaa zaatne ndxie miech laa zho gacnaña; lozhraa ga dzigo laa guidzliu rii nitlo.

¹⁵ 'Zeene gañ to zaatne nac Lugar Nda leñ yadoo, zo tib ncuuañe rieguaįd so ga, tib ncuuañe ziaad gnitlo, zigne bzeet Daniel meñ ne biadteed xtiidz Dios (zha ne glaba, none guieñ zho zha naca), hor co goįguib dieñ zha xoon to.

¹⁶ Zha ne no grëraa guiedz ne ngab Judé, none xoon zho tsie zho dan, ga tsietsolan zho.

¹⁷ Zha ne lëëtaque hor co no glaa guic lidz, none lëëlëd xoon zho, ib guiabd zho sëëb zho leñ yu tsiebee zho ncuuañe rap zho.

¹⁸ Zha ne quiaгаа lo dziin dan, ib gund zho tsie zho lad guiedz tsixi zho xab zho.

¹⁹ įProb grë meñ wnaa ne lëëtse leñ dze co zoney xpëëd, meñ ne quianiegaa mëdyeen ne bii radz!

²⁰ Goįnab lo Dios gande to guieįnë co leñ mëë ne rac naį, dze ne rdziiladzгаа to lo dziin.

²¹ Ne nligaa guieįnëdoxa. Wlal ne biaan guidzliu haxta lo nadze, gard gañ miech tib guieįnëdox sca, ni gandragaa zhow ted ga.

²² Telne csaan Dios nroob dze gac guieįnë co, ni stib miech rii guiaandraa; per na por grë zha ne bzooblo me sëëb xnëz me, gdeete me diidz gaca nroob dze.

²³ 'Zigne rne naa ga, leñ dze ne scataa gañ miech grë dil co, zha ne gnë lo to: "Goįtë nu ganle, lëë Meñ ne nole cxeel Dios ga blanso nu", gnëгаа zho: "Goįtsie nec ganle, laa me bdziñ ga", gliladzde tow.

²⁴ Sac zrieequia zha ne yquidie guiab zho zha nac meñ co, zrieequia zha ne guiab xtiidz Dios xiadteed zho lo miech, zuñ zho grë milagr nroob, parne yquidie zho miech, haxta zha ne nole xnëz Dios, zguib zho dieñ zha gdeeda diidz yquidie zho zho.

²⁵ įNsin sca goįso! Benque laa naa nilew lo to.

²⁶ Nligaa zha ne gnë lo to laa meñ ne pxeel Dios ga blansole, gliladzde tow. Nenda cxeel zho to tib dan zit, gnë zho: "Goįtsie ganle laa me no ga", gnëгаа zho pa tib leñ yu ne no me, ni tib xtiidz zho gliladzde to.

²⁷ Sac zeen gal dze ne guiaad me stib, gacda ncuuañ ngeuets zhliaan, grëse miech gañ me. Žig tel guiab tib belye nroob ne glu zhan gbaa, desde nëz ne rlan ngbidz haxta nëz ne rzëëb ngbidz, įniacxe gand grëse miecha?

²⁸ Žlupaa zeene laa me guiaad; nanle to ganle zaatne nix ma gut, ga rcaalsa pech.

Ziaad Jesús stib

(Mr. 13:24-37; Lc. 12:41-48; 17:26-30, 34-36; 21:25-33)

²⁹ Zeene lozhse gan miech grē guielnēdox co, laa lo ngbidz ycow, gziinidraa mēē. Grē mel ne ndziib gbaa, laa ma gliaal; grēraa ncuaaṅe no gbaa, masaque nēzrii nēzrec gaca.

³⁰ Horco zlu ganle zeene laa Mgui ne pxeel Dios ga, ziad-zēēb lo xcow con grē guielndzon, con grē poder ne rap me, grēse miech mban gac zho, zoon zho gan zho me.

³¹ Grē xanjl Dios, hor co laa Dios cxeel zho tsiecuedz zho zhitrompet zho parne ycaalsa grēse zha ne ngab xnēz me, tel pa lotaa lo guidzliu no zho.

³² Golzoob cuidad zha nac yag guigw. Led nanle to ganle, zeene laa grē zhiwaa racnieen, ni rsilo rdzib zhiblaga, gase rlu ne laa mēē nēēg ziaadgaxle.

³³ Scaque nagon zeene gan to laa grē miṅe rne naa lo to nu rsilo noyac, dzigo nanle to laa dze ne guiaad meṅ co ziaadgaxle.

³⁴ Gneli naa lo to ganle, nzian miech ne mban niina bii zaṅ zho zeene laa grē ncuaaṅ co csilo gac; sac ible ncuaaṅe gaca.

³⁵ Dzdzin dze ne nitlo gbaa, nitlo guidzliu, saṅgue miṅe rne naa lo to nu, nitloda; ible laaw none gac.

³⁶ Lēēraasi choot naṅd dien pa dzew, dien pa horgaaw, per ni grē anjl ne no gbaa, per ni naa naṅda, loxaque Pxoze naa naṅa.

³⁷⁻³⁹ Nanle to ganle zha bzhaac miech len dze ne wban Noé, ib bliladzd zho xtiidz me. Guxt no zho lo zhilni zho, zha ne notsieelnia, zha ne nobediingaa xpēēd, laa dze bdzin laa Noé bzēēb len barcw; tibaque zeene baa zho biini laa guiedox co nonitlole zho. Scadaa nagon sac grē miech nad rii, tibaque zeene tsaa zho biini laa Mgui ne pxeel Dios ga ziaadle.

⁴⁰ Horco zaatne quia chop mgui lo dziin dan; tib zho tsienal zhits me, stib zho guiaan.

⁴¹ Zaatne quiayot chop wnaa, tib zho tsienal zhits me, stib zho guiaan.

⁴² iNsin sca golso, sac gon naṅde to dien pa horpaa guiaad me, beṅque laa vis racle lo to!

⁴³ Golgan ganle, tel niaca miṅe gacnaṅ miech laa ngbaan tsieban lidz zho guieel, per naṅd zho dien pa horpaa; iṅniacxe zaaguies zho? Led sobna zho lēē, nsin nsin so zho.

⁴⁴ Scaque to nagon, none nsin so to, sac gon lega naclew zeen gan to laa me ziaadle.

⁴⁵ Golgan ganle, masaque laa to gac nagon zig tib ngundziin ne riaanne ro lidz meṅ ne rquia zho xtsiin.

Ngundziin ne ndzinli, zeene laa meṅ ne quia zho xtsiin ga gree, iṅe niowse guiaan zho guiaanṅie zho grēraa zha ne no lidz me.

⁴⁶ Zha ne sca gun, jwen tsie zho, sac zeene gbire me gan me scataa noxco zho dziin ne pso me zho, ziaṅnziuu zho lo me

⁴⁷ haxta so me zho, zha yquiaanap grēse ncuaaṅe rap me!

⁴⁸ Tel ngundziin yozhgaaw, miṅe tsienie guic zho guiab zho gbireniobd meṅ ne quia zho xtsiin ga,

⁴⁹ csilo zho csacsi zho grēraa zha ne nac ngundziin, csilo zho ctsieelsa zho grē ngonziuu tso zho loxaque gzudz zho, loxaque gowcho zho,

⁵⁰ tibaque zeene gan zho laa me bdzinle.

⁵¹ Zha ne sca gun, per peraa dien gun me, ib tedsod nroob caxtigw ne cteed me zho, sonēz me zho guey zho zaatne no grēraa zha ne rond diidz, ga tso zho grē zho zha co goonnē zho, haxta gow lay zho lo guielnēdox ne ted zho.

¹ Blozh ga rëbchaa Jesús lo zho:

—Par séeb miech zaatne rnabey Dios, masaque naca zig rzëeb miech tib lo lini zaatne noyac tib guiełtsieel.

² Tsii wnaa nguieg name, briece zho ziexinëz zho mgui ne ctsieelnia, tib tib zho bise zho psin win ne rec nceit ne rziini.

²⁻⁴ Gaay zho goc ligier pcodzëe zho zhipsin zho nceit, ni zhaaque bi zho zniipa; laa zgaay zho gocnroladz, zigne bzhense zho psin co scase bi zhow, bid zho nceit ne niodzëraaw.

⁵ Goc pa hora rio zhimcaalo zho, ni rdziñdaque mgui ne ziexinëz zho ga, tibaque zeen laa zho pquia mcaal.

⁶ Göl grol guieela, zeen laa vis rac, laa mgui co ziaadle, zha ne ziexinëz me ga, zac griee zho tsiedzieel zho me.

⁷ Lëëled briece mcaallo gza wnaa nguieg co, psilo zho nozhixcuaa zho zhipsin zho.

⁸ Zeene gon gza zha nroladz co ygaadraa zhinceit zho, dzigo bnab zho lo zgaay zha co, gdeed zho niip nceit yquini zho, sac laa zhipsin zho noyuule.

⁹ Pquiab zho rëb zho: “Grieełoda, sac mine yquinese zhipsin no ziaadnie no. Mazd goltsie zaatne rto zhow, ga goltsiexiw.”

¹⁰ Per lo lal ne xiexi zho nceit, laa mgui co bdziñ. Zeene wbire zho, laa ro yu nioogle, loxaque gza zha ne nsinle zo ga, zha cose bzëeb len yu.

¹¹ Dzigo psilo zho, rcaan nia zho ro yu, rbedz zho mgui co cxal me ro yu sëeb zho.

¹² Per bdeete me diidz nzëeb zho, rëb me: “Runbeyd naa to gon, nanđ naa dieñ cho nac to.”

¹³ ¡Nsin sca golso! —rëb Jesús—. Sac gon nanđe to pa dzepaa, pa horpagaa gbiire guiaad Mgui ne pxeel Dios.

Zha ne biaannie dimi

¹⁴ Mgui ne pxeel Dios ga, ziaad gac me zig tib meñ ne no griee tsie tib viaj zit.

Tib meñ name no griee me tsie me tib guiedz zit, dzigo bredz me zha ne run dziin lo me, bdeed me palalga xtimi me lo zho gundziin zhow len dze ne guieñd me ga.

¹⁵ Tib zho pcaania gaay mil pes plat, tib zho chop mila, stib zho pcaania tib mila. Tib tib zho, bdeedse me mine rgobey me grieeło zho gundziin zho, dzigo laa me briece laa me zie.

¹⁶ Zha ne biaannie gaay mil pes plat co, güey zho bloonon zhow, beena gan zgaay mila.

¹⁷ Zha ne biaannie chop mila, ye zho güey zho bloonon zho dimi co, scaque beena gan schop mila.

¹⁸ Laa zha ne pcaania tib mila ga, leł güey zho güeyteen zho tib guieer güeyloliu zhow.

¹⁹ Goc bla iza laa meñ co bdziñ, dzigo bredz me zho tib tib zho, tsie zho gzodiidz zho dieñ yo dimi ne biaannie zho ga.

²⁰ Bdziñ zha ne pcaania gaay mil pes plat co, bdziñnie zho xtimi me, rëb zho: “Laa xtimi luu nu gon, lëe gaay mil pes ne psan luu lo naa nu, laa zgaay mil min rii nac mine bdziñiaaw.”

²¹ Rley me rëb me lo zho: “¡Zha squi nagon racladz naa! Rley naa ran naa squitaa ndzinli luu, squitaa nguzobdiidz luu; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa mine gnedz naa gundziin luu. ¡Na bded, zeena yga luu grë guiełbley ne quaiyac nu!”

22 'Blozh ga, bdzinaque zha ne biaannie chop mila ga, ye zho laa zho bdzinnie xtimi me, rëb zho: "Laa xtimi luu nu gon, lëë chop mil pes ne psan luu lo naa nu, laa schop mil miñ rii nac miñe bdziniaw."

23 Pquiab me rëb me: "¡Squi w nagon! Rley naa ran naa squitaa ndzinli luu, squitaa nguzobdiidz luu lo naa; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa miñe gnedz naa gundziin luu. ¡Na bded, zeena yгаа luu grë guielbley ne quaiyac nu!"

24 'Zeene bdziintaa zha ne biaannie tib mila ga, rëb zho lo me: "Nli bendziind naa xtimi luu, sac nanle naa zha nac luu, niicle paraa niundziin naaw, grëse miñe niuna gan lo luu niaana;

25 gane mazd bialoliu naaw. Tib mil naca bneedz luuw, ledaaw nu."

26 Blëë guic me, rëb me lo zho: "¡Biche nu, paat rquiind naa miech yozh, miech nroladz ne squi nac! Conque nanle luu sca nac naa,

27 ¿pex nac dzigo waa bioxcod luu maase mbediñ luu dimi qui, ndziniaw palal ncaania naaw niina?"

28 Dzigo rëbchaa me lo zha ne ndxie ga: "Niinagazh golcob tib mil pes qui lo zha qui, goldeeda lo zha ne ziaadnie tsiw i.

29 Sac zha ne rioxco rundziin ncuaane rcaania zho, zacnroobraa ncuaane yquianie zho. Laa zha ne squi nac, haxta miñe pcaaniale zho, zdiooba lo zho.

30 Golxen zha yozh qui, goltsiesan zho lo ncow nëz ley. Ga gan zho guielnëdox ne tsieguial zho, ga goon zho haxta gow lay zho."

Zha gun Jesús guielwxtis

31 Blozhse bzodiidz Jesús cuent co lo zho, rëbchaa me:

—Naa ne nac naa Mgui ne pxeel Dios, zeen gal dze ne laa naa guial stib, zialnie naa grë xanj naa, zlu grëtaa guielndzon ne rap naa, laa naa sob lo xcan ne ragual naa soob naa.

32 Grëse miech ne ndxie dibdoose lo guidzliu, hor co laa zho gacredz lo naa, laa naa cueextso zho zig rbeextso baxtor chiv lad xpëcwxiiil zho.

33 Zha ne no xnëz naa, zha co gdziñ naa cue naa nëz derech, laa zha ne nod xnëz naa, cue nëz revës.

34 'Lozhse ga, naa ne nac naa men ne rnabey, hor co laa naa cuedz zha ne no xnëz naa, guiep naa lo zho: "Goltë grëse to, to ne nac to zha ne nziuu lo Pxoza naa. Golted zeena ycaania to zaatne cuëz to, ible par to bzaa mew desde zeene bzaa me guidzliu.

35 Sac zeene pcaabedz naa, bneedz to ncuaane dow naa; zeene bnaab zhis naa, bneedz to ncuaane go naa; zeene bial naa ladz to, bneedz to lidz to blëz naa;

36 zeene gon to guiend xab naa, bgacwxab to naa; zeene bzhacnë naa, zeene bio naa ladzguiib, biaad to biaadgan to naa."

37-39 See zdoo zho gnë zho: "¿Per pa hor bneedz no ncuaane doow luu, ncuaane go luu, pa hor bneedz no zaatne blëz luu, pa horgaa bneedz no lar ne gotxab luu, ib bdziond no nzhaacnë luu, bdziond no niogaa luu ladzguiib?"

40 'Dzigo guiep naa lo zho: "Gzobtaa hor ne gon been to xyudar zha ne nacgrë to, güeygan to zho, pcaaniagaa to zho, niicle zha ne bzoob miech peet nonda, rrieequia xyudar naa ga been to, rrieequia naa ga biaadgan to."

41 'Laa zha ne ndxie nëz revës, hor co laa naa gzonëz zho, guiep naa lo zho: "¡Golbiche lo naa nu, miech ndziibdee! ¡Golsë lo guidox ne rieguial to, zaatne no guey mendox grë xanj ma!

42 Sac gon, bio dze pcaabedz naa ni bneedzde to ncuaane niow naa; bnaab zhis naa, ni bneedzde to pe nie naa.

⁴³ Bial naa ladz to, ni bneedzde to zaatne mbëz naa; gon to guiend xab naa, ni ni tib lë lar bneedzde to niacw naa. Bio naa ladzguiib, bzhacnë naa, ni pe liaadz to niaadgan to naa.”

⁴⁴ 'Squiab zho gnë zho lo naa: “Per pa hor bdzion no luu rcaabedz luu, rnabгаа zhis luu; pa hor bdzion no guiend pa cuëz luu, guiend lar ne gacw luu; pa horgaa bdzion no no luu ladzguiib, nixгаа luu rzacnë luu.”

⁴⁵ 'Dzigo guiép naa lo zho: “Grëse vuelt ne bzoliaadz to niun to xyudar zha ne no xnëz naa, bzoliaadz to niegan to zho niicle zha ne mazdraa wina, rrieequia naa ga sca been to.”

⁴⁶ 'Horco grëse zha co laa zho guey lo guidox ne gdzindraa dze griee zho; laa zha ne bioxco wban zigne rnabey naa, grëse zho laa zho yгаа tib guielmбан ndzon ne gdzindraa dze lozh.

26

Bnediidz zho dien zha gnaaz zho Jesús

(Mr. 14:1-2; Lc. 22:1-2; Jn. 11:45-53)

¹ Zeene blozh sca bnee Jesús lo grë miech co, dzigo rëbchaа me lo xpëëdsцuel me:

² —Nanle to ganle schopaque ngbidz, laa lni Pascw csilo. Naa ne nac naa Mgui ne pxeel Dios, lo lni co gon gnaaz miech rii naa, tsielo zho naa ladznia zha ne yquiaa naa lo cruz.

³ Grë zha ne nac pxoz ne rnabey, grë maistr ley ni grë zha ne nac men non lo men guiedz Israel, lëëtaque hor co laa zho ndxie lidz Caifás, men ne nac pxoz nroob.

⁴ Laa zho ndxie ga, nonediidz zho dien zha griee lo gnaaz zho Jesús, gut zho me, per tib mod ne griee lo glisqui men guiedza.

⁵ Rnee zho: “Lëëraasi choot gnabeyd yгаа me mepaa dze lni, zeena gactseebd men guiedz.”

Pchoob tib wnaa nceit nex guic Jesús

(Mr. 14:3-9; Jn. 12:1-8)

⁶ Betain ga no tib men ne biac lo guiedz lepr, lë Simón. Lëëtaque no Jesús lidz men co,

⁷ zeene bdzin tib wnaa bdzin nie tib lo nceit nex, nosew tib len ncuaan win niaа niapse quie rbebni, tib lo nceit niazha. Squi zob Jesús lo mezh, güey wnaa co güeychoob me nceit co guic Jesús.

⁸ Zeene gon xpëëdsцuel Jesús sca been wnaa co, blëe zho, rnee zho:

—Pa rieguiala squi pxin zhlë wnaa qui nceit qui!

⁹ Tel niaca mine ndow, pe zhidaа dimi ne nguizh zhow, nquiinpaa dimi co ngaaza lo grë zha ne guiend pe yquii.

¹⁰ Gon Jesús sca rac zho, dzigo rëbchaа me lo zho:

—¿Pe nacne rlëe to lo wnaa qui? Golsaan me. Par naa nroob non mine been me i.

¹¹ Tel nli lëe racladz to gun to xyudar zha ne guiend pe yquii, zac ygad to lo zho stib dze, sac tibaque ran to zho; sangue naa zhlë laa naa gbiche lo to.

¹² Led pxin zhlëd wnaa rii zhinceit me, sac gon rrieequia laa me bzhix-cuaale xcuerp naa nu gal dze ne ygueetsa.

¹³ Gneli naa lo to ganle, dipse lo guidzliu zaatne cseedtaa miech Xtiidz Dios, ible soladz zho wnaa rii, seet zho mine been me nu.

Güeyto Judas Jesús

(Mr. 14:10-11; Lc. 22:3-6)

14 Lo gza tsiipchop zha ne nac xpëëdsuel Jesús ga, brieë zha ne lë Judas Iscariot güeyzodiidznie Judas grë zha ne nac pxoz ne rnabey,

15 rëb Judas lo zho:

—¿Palal quizh to naa telne gun naa Jesús ntregar lo to?

Dzigo biaan zho diidz quizh zho Judas galptsii pes plat.

16 Nacne psilo Judas noguib Judas dien zha gdeeda diidz csan Judas me lадznia zho.

Dowxtseenie Jesús xpëëdsuel me

(Mr. 14:12-25; Lc. 22:7-23; Jn. 13:21-30; 1Co. 11:23-26)

17 Mer dze ne rsilo lni Pascwa, len dze ne sca row zho guietxtil ne riotsd ncobi ga, bnabdiidz xpëëdsuel Jesús lo me dien pa lo racladz me tsiegunlo zho ncuuane gowxtseenie me zho wdze co.

18 Dzigo rëbchaa me lo zho:

—Nanle to ganle cho lidz zrieelo gdziñ ne. Goltsie Jerusalén golguiab lo zho: “Znu në xmaistr no: Gneedz luu lidz luu me dioow no xtsee Pascw rii. Niinataa laa xtse me bdziñ, gane racladz me lidz luu nu diowxtsee no nawdze grë no me.”

19 Dzigo laa zho zie. Güey zho zaatne pxeel me zho ga, ga beenlo zho xtsee co.

20-21 Wdze co, laa me no xtsee grë me zho, zeene bnee me lo zho rëb me:

—Gacnan to ganle, lëëque tib to gon tsielo naa ladznia zha ne gnaaz naa nawdze rii.

22 Zeene bin zho sca rëb me, mbanse rac zho, dzigo psilo zho tibga tibga zho rnabdiidz lo me, rnee zho:

—Bnë dien, ¿cho gun min co? ¿Pe naaw?

23 Pquiab me rëb me lo zho:

—Zha ne gan to csëëb xcuun len xquien naa, lëë zho ga.

24 Naa ne nac naa Mgui ne pxeel Dios, niina laa miech gut naa zigne raquietsew lo Xtiidz Dios; per, ¡probsaxe zha ne tsielo naa ladznia zho! ¡Mazd wen nie zho, ib niacd zho miech lo guidzliu!

25 Yeze Judas rnabdiidz lo me rnee Judas:

—Maestro, ¿pe goon naaw ye?

Rëbchaa me lo Judas:

—Luuw gon Judas, luu güeyto naa.

26 Laa zho noyow, zeene bzhen Jesús tib guietxtil, bdeed me xquizh lo Dios, blozh ga beengrol mew, dzigo bdiiz mew lo zho, ni rëb me:

—Golquiina, lëë xcuerp naa i gon.

27 Ni bzhen me tib cop nroob vin, bdeed me xquizh lo Dios, blozhse bdeed me xquizh, dzigo pteed me cop co lo zho grëse zho, rëb me:

—Golguie vin qui,

28 sac lëë xchen naa i, mine no gzhiee par guiaanmbe grë miech lo xtol zho sëëb zho xnëz Pxoaz naa, sac lëë stib mod cub nu psan me parne sëëb miech xnëz me.

29 Lëë lultm vuelt nu guie naa vin rii, sac zhaale stib vin cub ne guie naa gal dze ne guenie naa tow zaatne rnabey Pxoaz naa.

Dzigo psilo me biilnie me Dios gza me zho.

Bzeet Jesús zha gun Pedr

(Mr. 14:26-31; Lc. 22:31-34; Jn. 13:36-38)

30 Blozhse biilnie zho Dios, laa me brieë ga gza me zho, laa me zienie zho nëz Gui Oliv.

31 —Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nëzrii nëzrec gliaa] mëcwxiiil.”

32 Minçopaa nagon gon miech naa, per zeene laa naa grieeban glole naa ga Galilé, ga cuëz naa to.

33 Dzigo rëbchaa Pedr lo me:

—Niicle telne saan grë zha qui luu, sangue naa gon csaand naa luu.

34 Pquiab me rëb me lo Pedr:

—Gneli naa lo luu ganle, guieel riigazh, gardle ycuedz gall, laa luu csale tson vuelt guiab luu runbeyd luu naa.

35 Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per gunscad naa. ¿Pe nacne guiep naa runbeyd naa luu?

Scaque rnee grëraa xpëëdscuel me.

Bzodiidznie Jesús Pxoze me Getsemani

(Mr. 14:32-42; Lc. 22:39-46)

36 Zeene bdziinne Jesús zho zaatne lë Getsemani, dzigo rëbchaa me lo zho:

—Nuse nagon golsob, laa naa ga gazodiidznie naa Pxoze naa.

37 Horco psilo mban rac zdoo me, riabguieinë me, dzigo bredz me Pedr, ni grop xingan Zebedé, bzënie me zho palal

38 dzigo rëbchaa me lo zho:

—Mban rac zdoo naa, zootle zig zet naa lo guieinë rii. Nuse nagon golguiaan, per golsobna.

39 Bzë me spalal, dzigo pquiitsgzhib me haxta bdziñ lo me lo liu; psilo me bnab me lo Dios, rëb me:

—Papá, laa naa rnab lo luu, telne zala zdoo luu, bzhiguiel silaa naa lo grë guieinë rii. Min rii rnab naa lo luu, per telne grieeloda, minë gnëtaa luu, min co gac.

40 Zeene guso me, güey me zaatne biaan gza tson zha co, gon me laa zho nixguiesle; dzigo rëbchaa me lo Pedr:

—¿Pe ni palal blëbde to nzobna to?

41 Golsobna, golnab lo Dios zeena yquild mendox to. Niicle ne squi lëbdraa xcuerp to sobna to, per golnab lo Dios, sac gon min co nac minë racladz zhiespíritu to.

42 Dzigo güey me stib, güeyzodiidznie me Dios; scaque minë bnab me glo minçoque bnab me.

43 Zeene wbiire me bdziñ me lo zho, gon me laa zho nixguieslaque, sac lëbdraa zho mcaal.

44 Wbiire güey me güeynab me lo Dios, scaque minçoque bnab me.

45 Zeene laa me wbiretaa bion vuelt co, rëbchaa me lo zho:

—Lëëw nagon, zacle na gaguies to, zacle gdziiladz to. Naa ne nac naa Mgui ne pxeel Dios, laa hor nagon bdziñ zeene laa grë miech ntseeb rii guidnaaz naa.

46 Goltsieso, zeena zio ne; sac gon laa zha ne glu naa lo zho ziaadle nu.

Bnaaz zho Jesús

(Mr. 14:43-50; Lc. 22:47-53; Jn. 18:2-11)

47 Laa Jesús bii quianeeque, zeene laa Judas (tib zha ne nac xpëëdscuel me) bdziñ, bdziinne Judas tib dzoon zha ne pxeel grë pxoze ne rnabey, ni grë zha ne nac zha non lo men guiedz Israel. No zho nzhen spad, nogaa zho nzhen yag.

⁴⁸ Biaanⁿiele Judas zho diidz zha glu Judas cho nac Jesús, rëb Judas lo zho zha ne gan zho gow Judas bzhid cuas, lëe me ga, ligier so zho gnaaz zho me.

⁴⁹ Zigne bdziñ Judas pquiaabdiuzh Judas me, blozhse ga wbig Judas dow Judas bzhid cuas me.

⁵⁰ Dzigo rëbchaa me lo Judas:

—Judas, ¿pe ziaadgun luu nu?

Lëelëd wbig be grë zha co, bzhen zho me.

⁵¹ Horco biet tib zha ne rzënie me ga, bdob zho zhispad zho psilaa zho tib niaw, bliengaa zho diag tib zha ne rquia xtsiñ men ne nac pxoz nroob.

⁵² Dzigo rëb Jesús lo zha ne pquiaaw ga:

—Blootsow zhispad luu, ib gundraa luu squi cob luuw. Sac gon zha ne rdil con spad, noxtseeb ne low guet zho.

⁵³ ¿Niacxe nan to na grielod gnab naa lo Pxoza naa niina cxeel me tsiipchop partid xanj l me guiaadla ne nu?

⁵⁴ Per telne sca gun naa, ¿zha dzigo gac miñe zhobnee lo Xtiidz Dios, zaatne raquiet miñe noyac nu?

⁵⁵ Dzigo rëbchaa me lo grë zha ne bdziñ ga:

—¿Pe nacne squitaa rac to? ¿Niacxe naa cho zha ntseeb, ne squitaa nzhen to spad, nzhen to yag ziadnaaz to naa? Blactaa name gon to noseed naa miech len yadoo, ¿pe nacne bnaazde to naa ga?

⁵⁶ Per ible laa grë ncuaan rii gon noyac, zeena grieequia grë miñe bzeet grë zha ne biadteed xtiidz Dios lo miech padzeala.

Horco grëse zha ne nac xpëedscuel me laa zho bzhoon, tipse me psan zho ga.

Güeynie zho Jesús lo zhiwxtis zha Israel

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Ga brienie zho Jesús bdziñnie zho me lidz Caifás, men ne nac pxoz nroob. Grë zha ne rnabey lo menguiedz Israel, laa zho ndxiele ga.

⁵⁸ Ye Pedr maase zit zit nal Pedr laa Pedr bdziñ xley men co. Bdziñ Pedr güeysozga Pedr lo grë zha ne ndxienap, quiambëz Pedr dien zha gun zho Jesús.

⁵⁹ Grë pxoz ne rnabey, grë zha ne nac zha non lo menguiedz, grëse zha ne nac wxtis, laa zho ndxie nëz len yu co, quiaguib zho zha ne gzhixcuua maase diidzguizh ycaadz zho Jesús, parne gdeeda diidz gnab zho guet me.

⁶⁰ Ndal zha ne sca been, per brieequiad xtiidz zho, sac zhaase zhaase rnee zho. Tibaque zeene guso chop zho,

⁶¹ rëb zho:

—Bdzion no gon rnee me laa me ctixche yadoo ne zob lad guiedz nu, zaatne riodziñ ne Dios, lozh ga tsonaque ngbidz gzaalo me stiba.

⁶² Dzigo hor co bzoli men ne nac pxoz nroob, rëb me lo Jesús:

—¿Pe nacne rquiabd luu? ¿Pe nli sca rnee luu, te nlida ye?

⁶³ Gon pxoz nroob co rquiabdaque Jesús, rëbchaa me:

—Zig zob Dios mban ne no gbaa, laa naa rnab lo luu bneeli lo no dien cho nac luu. Bnë tel nli Xpëed Dios nac luu, Men ne zëëble diidz ga cxeel me.

⁶⁴ Dzigo pquiab Jesús rëb me:

—Scaw gon, naa nac men co. Naa ne nac naa Mgui ne pxeel Dios, bii zan to ganle zeene laa naa zoob cue Dios nëz derech, ni zeene laa naa guieet gbaa zialzëeb naa lo xcw.

⁶⁵ Horco ptsiez pxoz nroob co xab me, sac blëe me bin me sca rëb Jesús.

—¿Pe mazdraa textigw ne racladz ne? —rëb me—. Laa to binle ganle zha rzëtaa xtiidz me noguitnie me Dios.

⁶⁶ Nana waa, ¿pe gnë to zha dziuun ne me?

Pquiab be zho rëb zho:

—¡Ib rieguial guet me!

⁶⁷ Dzigo hor co psilo zho nosacsi zho me. Zha ne rtsuc lo me, zha ne rdeed puñet me, nogaa zho rgap lo me,

⁶⁸ rlozh ga rzhidznie zho me rnee zho:

—Luu ne nac luu men ne pxeel Dios, ¿bnë dien cho ga bdiñ luu?

Rëb Pedr runbeyd Pedr Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Horco laa Pedr bii zob nëz ley. Ga zob Pedr, güey tib ndzoop ne quia dziin lidz men rnabey co; rëb ndzoop lo Pedr:

—¿Ye luu lëë rzënie Jesús, men Galilé ne bdziñnie zho i?

⁷⁰ Per bneelid Pedr. Squi zob grë zha co, rëb Pedr:

—Riend naa dien cho men rnee luu.

⁷¹ Laa Pedr ziele nëz ro puert ne quia ro nëz, zeene gon stib ndzoop ne rquia dziin ga Pedr, rëb ndzoop lo zha ne ndxie ga:

—Ye mgui qui gon nacgrë men Nazaret ne bdziñnie zho i.

⁷² Scaque bneelid Pedr, haxta rzeet Pedr Dios rëb Pedr runbeyd Pedr me.

⁷³ Wdzeepaaw, rëb zha ne ndxie ga lo Pedr:

—Ne nligaa ye luu rzënie men ne bdziñ i. ¡Rlupaa name zig rnee zha nëz Galilé rnee luu!

⁷⁴ Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—Dios zobwi ganle, telne led diidzlid nu rne naa, maase cuibdee naa.

Loxaque blozh sca brieë ro Pedr zeene laa tib gall pcuedz.

⁷⁵ Horco psoladz Pedr xtiidz Jesús zeene rëb me lo Pedr: “Gardle ycuedz gall, tsonle vüelt rëb luu runbeyd luu naa.” Dzigo mbanse rac Pedr. Brieë Pedr ga, psilo Pedr biin Pedr guieñe co.

27

¹ Ziadyiinile liuw, wbiire pcaalsa grë pxoz rnabey, grë zha non lo menguedz, bnediidz zho dien zha gnabey zho guet Jesús.

² Blozhse bzodiidz zho, dzigo laa zho bzobdoo me blee zho me ga ziesañ zho me lo Pilat, men ne nac gobernador.

Gut Judas

(Mr. 15:1; Lc. 23:1-2; Jn. 18:28-32)

³ Laa Judas Iscariot zha ne pto Jesús ga, zeene bin Judas laa zho rnab guet me, lëëled güey Judas lo grë pxoz rnabey co, lo grë zha non lo menguedz ga, zietsire Judas dimi ne bdiizh zho Judas ga. Mban rac Judas,

⁴ bdziñ Judas rëb Judas lo zho:

—Naraa rien naa lëda nu ben naa. ¡Tib dol nrooble nu, znu bialto naa tib men ne peet xtold!

Pquiab zho rëb zho:

—¡Mincoataa gon ndiond no! ¡Xcuentzhe luu ga!

⁵ Horco pchel Judas dimi co len yadoo. Lo guieñe co brieë Judas ga güey Judas lëëque Judas pxiiyan Judas.

⁶ Grë zha ne nac pxoz rnabey ga, güey zho ptop zho dimi co. Per blozh ga, riend zho dien zha guñ zhow.

—¿Zha dziuun ne dimi rii? —rëb zho—. Telne guiaana yadoo, per rdzieelda, sac gon xchen tib miech bdzëw.

⁷ Dzigo bzodiidz zho dien zha gaca, nacne mazd pquuin zhow bzhii zho tib lë liu, zaatne rdieen yu ne ríaa grë ncuaan psin ne rquuin; parne lo liu co ygueets grë zha zit ne guet Jerusalén.

⁸ Nacne brielë liu co “Liu ren”, ni sca runbey zhow len dze rii.

⁹⁻¹⁰ Ga bríeequia mine bzeet zha ne biadteed xtiidz Dios padzeela, zeene rëb zho: “Galptsii pes plat ne bzhii zha Israel men nziuu co, dimi co bzhii zho tib lë liu, zaatne rdieen yu ne ríaa grë ncuaan psin ne rquuin. Sca në Dios lo naa.”

Bnab zho guet Jesús

(Mr. 15:2-20; Lc. 23:3-5, 13-25; Jn. 18:33-19:16)

¹¹ Bdzinnie zho Jesús lo Pilat, ga bnabdiidz Pilat lo Jesús rëb Pilat:

—Bnë dien, ¿pe nli luu nac zhírey zha Israel?

Pquiab me rëb me:

—Nliw.

¹² Grë zha ne nac pxoz rnabey ga, ni grë zha ne nac zha non lo menquiedz, rzadraa ncuaane rquiaqui zho me; per ni tib diidz rtsired me lo zho.

¹³ Dzigo rëbchaa Pilat lo me:

—¿Pe nacne rquiabd luu? ¿Pe ib rond luu grëtaa ncuaane rquiaqui zho luu i?

¹⁴ Bzee zdoo Pilat gon Pilat, ible rquiabd me.

¹⁵ Gzobse iz, zeene ral lni Pascw rnabey Pilat ríaa tib zha ne no ladzguiib, zha ne gnabtaa menquiedz laa.

¹⁶ Len dze co no tib zha ntseeb ladzguiib lë Barrabás, zëeb xtiidz zho.

¹⁷ Nacne rëb Pilat lo grë zha ne ndxie ga:

—¿Cho racladz to csilaa naa? ¿Pe silaa naa Barrabás, te silaa naa Jesús ye, men ne nac diidz pxeel Dios lo to?

¹⁸ Sca rëb Pilat sac bien Pilat loxaque porne ndal miech nobig lo Jesús min co ne rlënie zho me, bnabey zho bgaa me.

¹⁹ Laa Pilat zob lo xcan ne run me guielwxtis, zeene bdziñ tib mandad rëb lo me:

—Znu në tsiel luu: bzhiguiel me peet gund luu men qui, rlu peet xtold me; sac nieewdze me nroob ptseb mcaal tsiel luu.

²⁰ Grë zha rnabey co, bio zho pquuil zho menquiedz gnab zho csilaa Pilat Barrabás, ni gnab zho guet Jesús.

²¹ Zeene wbiire Pilat bnabdiidz Pilat stib, dien chopaa racladz zho laa, grëse zho nguiedz pquiab be zho, rëb zho:

—¡Barrabás psilaa!

²² Dzigo rëbchaa Pilat:

—Men ne waa nac diidz pxeel Dios lo to nu, ¿zha gun naa me?

Pquiab zho rëb zho:

—¡Bnabey yquia me lo cruz!

²³ —¿Per pe nacne yquia men rii lo cruz? —rëb Pilat—. ¡Ni tib dol rapd me!

Biireque zho nguiedz roptsie zho rnab zho yquia me lo cruz.

²⁴ Gonse Pilat rquiaadiagd zho xtiidz me, lel mazdraa rac zho, dzigo bnab me nis, squi ndxie zho bdiib me nia me, rëb me lo zho:

—¡Nanle to nasca, led xtoldraa naa nu ne laa xchen men rii gzhíee, sac nanpaa naa peet falt rapd me!

²⁵ Pquiab be zho rëb zho:

—¡Peet nacd ga! ¡Zhits no grë xpëed no cuib dol co, na no guiotizha!

²⁶ Dzigo bnabey Pilat blaa Barrabás, laa Jesús racse me bnabey me zha ne bdiñ Jesús, blozhse ga laa me psan Jesús ladznia men̄guiib ne tsiequiaa me lo cruz.

²⁷ Biire grē men̄guiib co bzēēbnie zho me nēz leñ yulow, ga pcaalsa grēraa men̄guiib ne nacgrē zho, brin̄ zho igose me.

²⁸ Blee zho xab me, bgacw zho me tib lar nizhnie nlaan, zig rna lar ne racw grē rey,

²⁹ bzieecw zho bla lē yag guiets, bzoob zhow guic me zig rzob coron guic zha ne nac rey, ni bloo zho tib lē goobgui nia me. Run̄nguzee zho me, rquitsgzhīb zho lo me, rnee zho:

—¡Golwi gan̄le zha ractaa zhirey zha Israel!

³⁰ No zho rtsuc zho lo me, rgob zho goobgui ne no nia me ga, rdeed zhow guic me.

Güeyquiaa zho Jesús lo cruz

(Mr. 15:21-32; Lc. 23:26-43; Jn. 19:17-27)

³¹ Blozhse sca bdziitnie zho me, blee zho lar nizhnie co lad me, bgacw zho me xab me stib, dzigo laa zho brieenie me ga zienie zho me zaatne yquia me lo cruz.

³² Nēz zienie zho me bdzieel zho tib men̄ Ciren lē Simón, bnabey zho men̄ co bi me zhicruz me.

³³ Zeene bdziñ zho zaatne nac “Gui Beerguic Ngutoo” (Gólgota),

³⁴ ga bdeed zho nziu lo me notsa tiblo guizh nlayag, per zeene pquiaaro mew bien me nziu cow, bnēd me nie mew.

³⁵⁻³⁶ Blozhse pquiaa zho me lo cruz, bzhen̄ zho tib xab me pchug zhow biaan̄nie zho tib lēgaw, laa stiba bio zho rif; dzigo laa zho bzob ga, bzobnap zho.

³⁷ Guic zhicruz me, ga pquiaa zho bla lan diidz zaatne rnee: “LĒĒ JESUS NU, MEN NE NAC ZHIREY ZHA ISRAEL.” Sca pquiaa zho, sac min̄co pquiaqui sca pquiaa zho me lo cruz.

³⁸ Ye chop ngbaan pquiaagza zho me lo cruz, tibga zhicruz zho bzo tib nēz cho zhicruz me.

³⁹ Grēse miech ne rdedtaa ran̄ zho laa me quia ga, rzhidznie zho me, haxta rdzi zho guic zho

⁴⁰ rnee zho lo me:

—Led rēb luu lēē laa luu ntsil̄ yadoo, ni tsonaque ngbidz nzaalo luu stiba, ¿pe nac dzigo rriielod luu guieef luu i? Te!ne nli Xpēēd Dios nac luu, biet lo qui.

⁴¹ Scaque grē pxoz rnabey, grē maistr ley, grē zha farisé ni grē zha ne nac zha non lo men̄guiedz, rzhidznie zho me, rnee zho:

⁴² —Stib miech scataa beenguic me, stib miech scataa bla me, ¿pe nac dzigo rriielod me gla me me? ¡Goon̄ me name nac zhirey ne, quiet me i sca zho; zeena dziuunbey ne men̄ rnabey nac me!

⁴³ ¡Conque tant rnalo me Dios, haxta rnee me Xpēēd Dios nac me, guiaadsi-laa Dios me i nazho!

⁴⁴ Ye ngbaan ne quiaagza me lo cruz ga, min̄coque rbidzgo zho lo me.

Gut Jesús

(Mr. 15:33-41; Lc. 23:44-49; Jn. 19:28-30)

⁴⁵ Zig groļ dzew, tibaque zeen̄ goc tib ncow dipse lo guidzliu, haxta las tres bīaa biini stib.

⁴⁶ Horco nguiedz zēēb tsi Jesús, rnee me:

—Elí, Elí. ¿Lama sabactani?

Diidz co nac zig nac ne rnee ne: Luu nac xDios naa, luu nac xDios naa. ¿Pe nacne psaan luu naa?

⁴⁷ Zha ne ndxie ga, zeene bin zho sca rbedz me, no zho rëb Lí, men ne biadteed xtiidz Dios padzeela, men co rbedz me.

⁴⁸ Dzigo rias tib zho güeygadz tib lë zhiil lo nziu bla, bzoob zhow tib guic goobgui pquiaa zhow ro me.

⁴⁹ Laa zla zho rnee:

—Psaan, nu dzian ne dien pe ziaad Lí guiaadlit Lí me i.

⁵⁰ Tibaque zeene pquiaa me stib redz nroob, znuse blozh me.

⁵¹ Horne nolozh me ga, hor co briez nzoli lar nroob ne quia len yadoo, groltaa goca; psilo bni tib zhodox, grë quie masaque wbiła,

⁵² nzian ro baan grë zha ne bnalo Dios mazd padzeela bzhial.

⁵³ Zeen gol dze ne brieegan me, ye zho laa zho brieegan, brieeg zho len baa, bzëeb zho lad guiedz; nzian miech ne gon zho.

⁵⁴ Grë menquiib ne quianap me ga, ni zha ne rnabey lo zho, zeene gon zho bni zho co, ni gon zho grë ncuane goc ga, per nli bdzieb zho.

—¡Ne nlipagaa —rnee zho—, Xpëed Dios nac men qui!

⁵⁵ Nzianlaa men wnaa, zit zo zho rwi zho. Lëe grë men wnaa co güeynal zhits Jesús, been zho xyudar me dipse len dze ne pseed me miech, desde dze ne psilo me nëz Galilé.

⁵⁶ Lad co no Marí Magdal, Marí tsieel Zebedé, ni Marí ne nac xniala Jacob grop José.

Bgueets Jesús

(Mr. 15:42-47; Lc. 23:50-56; Jn. 19:38-42)

⁵⁷⁻⁵⁸ Zhile sëeb ngbidza, zeene bdzin tib mgui lë José lo Pilat, bnaab me diidzbey tsielit me xcuerp Jesús lo cruz; tib zha ricwa, men guiedz Arimaté nac me, ye me zienal zhiwseed Jesús. Nacne pxeel Pilat diidz lo zha ne quianap Jesús ga, parne siguiel zho glit José me lo cruz.

⁵⁹ Dzigo güey José. Blozhse blit José me lo cruz, laa José neyle tib lë lar cub, pchel José me lar co,

⁶⁰ güeyxob José me tib len baa ne nacchen José ndieen tib cho quie gax ga; tib baa cuba. Blozhse bdzig José tib quie nroob bioog ro baa co, laa José zey.

⁶¹ Laa Marí Magdal bii biala ga, grop me stib Marí ne nacgrop me ga; zobse zho gax ro baa co.

⁶² Biini liu co, pcaalsa grë pxoz rnabey, grë zho zha farisé, güey zho lo Pilat,

⁶³ rëb zho:

—Gon luu dispensar, laa no ziaadaque lo luu stib. Naraa rsoladz no, len dze ne bii mban men ntseeb ne sca biaadquidie miech ga, rëb me, zeene gac tson ngbidz guet me laa me grieegan.

⁶⁴ Gane ziaad no lo luu, bzhiguiel pxeel zha ne yquiaanap ro baan me haxta gac tson ngbidz co; sac nend tsie zha ne nac xpëedsuel me tsiebee zho me, lozh ga guiab zho laa me brieegan. Nanle luu ganle, tel gac min co, cho gnë peraa gzhixcuaa zho.

⁶⁵ Dzigo rëbchaa Pilat lo zho:

—Telne sca racladz to, laa tib partid menquiib ndxie i. Goltsienie zho, golguiab lo zho yquiaanap zhow tel zha racladz to.

⁶⁶ Dzigo laa zho zie zienie zho grë menquiib co. Bdzin zho bloo zho tib bey cho quie ne nioog ro baan Jesús ga, par glu tel cho zha ne tsiegaala, ni biala grë menquiib co yquiaanapa.

28

BRIEBAN JESUS*(Mr. 16:1-8; Lc. 24:1-12; Jn. 20:1-10)*

¹ Zna dze goc dze ne rdziiladz zho lo dziin ga, biini liu, dze ne rsilo zhmal, silgaw zie Marí Magdal grop me stib Marí co zieso zho ro baan Jesús.

² Lëëtaaque hor co bni tib zhodox, lo zho co biet tib xanjí Dios gbaa bdob me quie nroob ne niogor ro baa co, bdiix mew tib lad, bzobga me lada.

³ Masaque rlu me zigne rlu belye, xab mew, nquitsbie rnaw, zig rlu zaatne ndxie guieg.

⁴ Grë menguiib ne quianap ro baa ga, zeene gon zho anjl co, per nli bdzieb zho, rzhidz zho. Lo dzeb co, pcowgazh zho, grëse zho biab liu.

⁵ Zeene laa grop wnaa co bdziñ, rëbchaa anjl co lo zho:

—Gdziebde to. Nanle naa Jesús men ne pquiaa zho lo cruz ga, men co ziaadguib to.

⁶ Per guieñde me nu, ¡laa me brieabanle zigne bneele me ga! Gołwi ganle nu nac zaatne pxob zho me.

⁷ Niinagazh gołtsie gołtsienie diidz lo xpëëdscuel me, gołguiab lo zho laa me brieabanle. Galilé me cuëz me zho, ga gan zho me. Laa to nanlew nasca.

⁸ Lëëled brieegrop wnaa co ga, rias zho laa zho zienie diidz lo xpëëdscuel me; lala rdzieb zho, ni lala rley zho.

⁹ Laa zho zie, tibaque zeene gon zho laa Jesús zole lo zho, ine pquiaabdiuzh me zho. Horco wbig zho pquitsgzhib zho lo me, bdeedz zho ni me.

¹⁰ Dzigo rëbchaa me lo zho:

—Gdziebde to. Gołtsie gołtsienie diidz lo grë zha bets naa, gołguiab lo zho tsie zho Galilé, ga gan zho naa.

¹¹ Horcoraa laa bla zhaguiib ne pquianap ro baan Jesús ga bdziñ lad guiedz. Güey zho lo grë pxoz rnabey, bzodiidz zho zha gon zho bzhal ro baa co.

¹²⁻¹³ Dzigo pcaalsa grë pxoz co grë zho zha ne nac zha non lo menguedz, dien zha gun zho. Nacne biaan zho diidz, mazd gdeed zho dimi lo grë menguiib co, parne gneelid zho, sinque guiab zho, segur xpëëdscuelaque me güeybee me len baa, per biend zhow sac nixguies zho. Nroob dimi bdeed zho lo grë menguiib co,

¹⁴ rëb zho:

—Peet tsienied guic to, niicle telne gon gobernadora na no guionee lo me, zeena peet gund me to.

¹⁵ Dimi co pcaania zho, dzigo laa zho psilo pxoon diidz co zigne rëbse grë zha co lo zho. Grë zha Israel ne bina len dze co, masaque biladz zho nli sca goca, ¡ni haxta lo nadze sca zienie guic zho!

¹⁶ Zeene bdziñ dze ne gdieelo Jesús xpëëdscuel me nëz Galilé, brieegza tsiptib zha ne bzo gaxpaa lo me ga, güey zho nëz co; bdziñ zho guic gui ne rëble me ga gdieelo me zho.

¹⁷ Zeene gon zho me pquitsgzhib zho liu.

Lo grë zha ne ndxie ga, no zho rienpaa lëë me ga, nogaa zha ne bii racchop guic.

¹⁸ Dzigo wbig me lo zho, rëb me:

—Laa to gonle nasca naa rnabey. Grëse ncuanea no gbaaw, nogaa guidzliuw, ladznia naa psañ Pxoz naaw.

¹⁹ Niina nagon, laa naa rsañ diidz lo to: gołtsie dipse lo guidzliu, gołtsieseed miech gac zho zha ne sëëb xnëz naa, gołchoobnis zho, gołguiab lo zho lëë min co rnabey Pxoz naa, rnabey naa ne nac Xpëëd me, ni rnabeygaa Espiritu Sant.

²⁰ Go¹seed zho gban zho, grëse mine bnabey naa to gun to. Miñ co rsan naa diidz lo to gun to; ni gacnan to ganle, ib csaand naa to, gzataa dzew niicle haxta dze ne nitlo guidzliuw, naa gacnie to.

XTIIDZ NDZON DIOS MINE PQUIAA MARCW

¹ Nu ganle laa naa csilo gzodiidz naa, mine been Jesús, Men ne bneele Dios cxeel me lo guidzliu.

² Lo guits ne pquiaa Isá, tib men ne biadteed xtiidz Dios padzeela, lo co zhubnee ganle ible laa Dios no cxeel me. Rneew, glo cxeel me tib zha ne tedner, guiaadnie diidz. Znu zhubnee lo guits co:

Sxel naa tib zha ne tedner lo luu,
zeena zha co gzhixcuaa nēz ne ted luu.

³ Dan tso zho,

zon miech zeene laa tsi zho zēeb gnee zho:
“Golzhixcuaa nēz ne ted men ne rnabey,
golsaan grē guielntseeb ne run to.”

⁴ Ni nligaa scase goca, zeene laa Juan Bautist biaad, dan bio me rchoobnis me miech; rnee me lo zho csaan zho xquielntseeb zho gbig zho lo Dios, ni chobnis zho, zeena csilaa Dios zho lo grētaa xtol zho.

⁵ Dzigo rriee miech grē guiedz ne ngab Judé, dib lad guiedz Jerusalén, riequiaadiag zho zhiwseed me; ni rxobdol zho grē xtol zho, dzigo rchoobnis me zho len guiubee Jordán.

⁶ Guits lad camell niaa xab me, ncuane rzhidoo len me guid niaaw ni niapse nguzhanch ni dzin dan row me.

⁷ Zeene rseed me grē miech co, rnee me lo zho:

—Iraa ziaad men ne mazdraa non lo naa. Tel naa peet nond naa, tib guielnzaac nroob ga yгаа naa telne niaca mine grieelo maase lab me glit naa; per na ni min co rdzind naa.

⁸ Laa naa rchoobnis to niina con nis; sangue me con Espíritu Sant choobnis me to.

Brobnis Jesús

(Mt. 3:13-17; 4:1-17; Lc. 3:21-22; 4:1-15)

⁹ Len ngbidz coquew, laa Jesús brie e guiedz Nazaret xtan zha Galilé, güey me pchoobnis Juan me len guiubee Jordán.

¹⁰ Laa me norieedze lo nis, zeene gon me laa zhan gbaa bzhial, laa men ne nac Espíritu Sant biet gbaa zig tib palom laa me ziad-zēeb guic me.

¹¹ Ni lēētaque zēeb tib tsi men co gbaa, rnee me:

—Xin, rleynie naa luu gon, nziuu luu lo naa.

¹² Zeene blozh brobnis me, dzigo güeynie Espíritu Sant me tib dan ngan, zaatne no grē ma ntseeb;

¹³ bio me ga choo ngbidz. Ga no me güey Satanás (ma ne rnabey lo grēse mendox), gocladz ma niungüet ma me.

Bdedse ga, güey grē xanjl Dios güeygan zho me.

¹⁴ Len ngbidz co bnabey Herod bio Juan ladzguiib. Ladzguiible no Juan zeene brie e Jesús güeyted me grē guiedz ne ngab Galilé güeyseed me miech Xtiidz Ndzon Dios,

¹⁵ rnee me lo zho:

—Laa dze ne gnabey Dios ziaadgaxle, laaw bdzin dzele. ¡Golsaan grē xquielntseeb to, golnab perdon lo Dios; dib zdoo to golliladz Xtiidz me!

Tap zha ne quia gooz mel

(Mt. 4:18-22; Lc. 5:1-11)

16 Tib dze zieded Jesús ro Nisdoo ne lë Galilé, gon me laa Simón grop Ndrés quia gooz mel lo nis co; sac ible dziin co nac xtsiin zho. Grop bets zho laa zho noron guiey ne rgaa mel lo nis.

17 Dzigo bredz me zho, rëb me lo zho:

—¡Goltë, goltënal zhits naa! ¡Laa naa cxel to tsie to stib gooz, tsietop to grë miech ne sëëb xnëz Dios!

18 Horcogazh psan zho guiey ne rnaaz zho mel ga, laa zho zienal zhits me.

19 Zhisaque bzë Jesús ro nis co, gon me laa Jacob ni Juan no tib len barcw noquiaabdie zho guiey ne rnaaz zho mel, lëë grop xingan Zebedé ga;

20 dzigo bredz me zho. Zigne bredz me zho, zoque Zebedé lo barcw ga grë xmoz Zebedé, laa zho zienal zhits me.

Tib mgui ne nosacsi mendox.

(Lc. 4:31-37)

21 Laa zho bđzin guiedz ne lë Capernaum. Zeene gol dze ne rdziiladz zho lo dziin nëz Israel, güey Jesús yadoo win ne zob lad guiedz co güeyseed me miech.

22 Grë miech ne ndxie len yadoo ga, rzee zdoo zho ran zho zha rnee me, sac rlu men rnabey nac me; led yed me rseed zigne rseed grë zha ne nac maistr ley.

23 Lad grë miech co no tib mgui ne nosacsi mendox, tibaque zeene nguiedz pcooptsie ma mgui,

24 rnee ma:

—¿Pe gun luu no Jesús Nazaren? ¿Ziaad luu lëë par gnitlo luu no? Runbey naa luu, tib men peet xtold nac luu ni Dios pxeel luu.

25 Dzigo goctox Jesús lo ma, rëb me:

—¡Psoiog ro luu! ¡Na zeeña psaan men qui!

26 Horco masaque beencxidz ma mgui co, ni rquiaadan ma redz laa ma psaan mgui.

27 Grëse miech ne ndxie ga, bzee zdoo zho rnaabdiidzlsa zho rnee zho:

—¿Bay cho nac men qui? ¡Wseed cub i gon ziaadnie me! ¡Rlu zha rnabey nac me, zha haxta mendox rdzieb zeene ractox me lo ma!

28 Znuse briets bliaal diidz zha beenguiac Jesús mgui co; grëse guiedz ne ngab Galilé gocnan miecha.

Biac xniadzoop Simón Pedr

(Mt. 8:14-17; Lc. 4:38-41)

29 Ga briece Jesús güey me lidz Simón grop Ndrés gza me Jacob ni Juan.

30 Bdzin zho, lëëtaque laa xniadzoop Simón nix rlan xlëë, nacne rëb zhow lo me.

31 Dzigo bded me zaatne nix zhuz co, bzhen me nia me, blische me me. Horcogazh laa zhixlëë me blëz, guche me ga psilo me beenlo ncuane dow zho.

32 Ziedzele dzew, laa ngbidz rzëëblew, zeene psilo grë miech co zo rdziinie zho grë men rzacné, grë zha ne nosacsi mendox ne; bioogse ro yu co ndxie miech.

33 Zootle zig grëse miech ne no lad guiedz co pcaalsa ga.

34 Ndal grë men rzacné co zhaase zhaase guelguidz ne rzac zho, per beenguiac Jesús zho; zha ne nosacsi mendox, beencxoon ne grë mendox ne nosacsi zho. Goctox me lo ma, ib bdeete me diidz nee ma cho nac me, sac runbey ma me.

Pseed Jesús miech Galilé

(Lc. 4:42-44)

³⁵ Silgaw, scase bii ncow rnaw guche Jesús brieë me lad guiedz co, güey me zaatne guiend_{raa} miech, güeyzodiid_{nie} me Dios.

³⁶ Zeene rnit me choot guiend; dzigo brieë Simón ni zla zha ne nacgza Simón güeyguib zho me.

³⁷ Zeene bdziel me, rëb_{chaa} zho lo me laa grë miech co quiaguible me.

³⁸ Dzigo pquiab me rëb me lo zho:

—¡Sca ye! Per ib laa ne none gon guio grë_{raa} guiedz ne ndxie dib gax nu, zeena ye grë guiedz qui gnee naa Xtuidz Dios lo miech; sac ible min co pxeel me naa zial naa lo guidzliu.

³⁹ Dzigo güey zho grëse guiedz ne ngab Galilé. Zaatne rdzi_{ntaa} zho, rie me grëse yadoo win ne zob lad guiedz rseed me grë miech co Xtuidz Dios, ni run_{cxoon} me grë men_{dox} ne nosacsi miech.

Biac tib mgui ne rlan lepr

(Mt. 8:1-4; Lc. 5:12-16)

⁴⁰ Tib vuelt, wbig tib mgui ne rlan guiedzdox ne lë lepr lo Jesús (masaque riaal dipse guid lad mgui), pquiitsgzhib mgui lo me, rëb mgui:

—Tebaa siguieel luu gunguiac luu naa.

⁴¹ Pquia zdoo Jesús mgui, pxobnia me guic mgui rëb me:

—Zunguiac naa luu. ¡Niinagazh laa luu guiaan_{mbel}!

⁴² Zigne sca bnee me laa mgui co biac, mbese biaan_{xcu}erp mgui.

⁴³ Blozh ga bzonëz me mgui, ni pso me diidz lo mgui

⁴⁴ rëb me:

—Bina ganle, choot lo gzodiidzd luu gon zha biac luu. Bzë, güey lo pxoz, güey_{sán} gon ne rnabey xley Moisés gdeed luu; zeena gan zho ganle laa luu biacle.

⁴⁵ Ni zigne brieë mgui ga, psilo mgui grë lo miech bzodiidz mgui zha biac mgui. Grëse miech gocnana, nacne brieelodraa nenlo ndzi_n Jesús grë lad guiedz co. Mine been me, blëz me zaatne choot miech guiend; per niicle scaw, miech guizhiu ne rrieë grë guiedz co rdzi_n lo me.

2

Biac tib men ne gutoo

(Mt. 9:1-8; Lc. 5:17-26)

¹ Goc bla dzew, laa Jesús biire bdzi_n lad guiedz Capernaum stib. Zeene bin zho laa me bdzi_n ro yu,

² miech guizhiu ne pcaalsa zaatne no me ga, haxta ro yu ndxie grë miech co; dzigo psilo me noseed me zho Xtuidz Dios.

³ Laa grë miech co ndxie ga, zeene bdzi_n tap zha bgui ney zho stib men bgui, zhoobse me lo yag, ib gacd së me sac dipse me gutoo.

⁴ Ni ne scataa miech guizhiu ne ndxie, gacd ted zho nëz ro yu gdzi_nnie zho me lo Jesús, nacne biepaque zho guic yu. Pخال zho ngali zaatne zob Jesús, dzigo ga pteed zho men co dib yag ne zhoob me ga.

⁵ Zeene gon Jesús ne nli dib zdoo zho riladz zho me gunguiac men rzacné co, dzigo rëb_{chaa} me lo men co:

—Xin, niinagazh laa naa gun perdon grëse xtol_l luu.

⁶ Blalaa zha ne nac maistr ley zob ga, zeene bin zho sca rëb me lo men rzacné co, bzachaa zdoo zho:

⁷ “¡Lëda i gon squi rnee men qui! Quiaguitnie me Dios i squi rzë xtiidz me. ¡Tibaque men ne run perdon xtol_l miech, ni lëë men co nac Dios!”

⁸ Bienga Jesús sca rza zdoo zho, dzigo rëb_{chaa} me:

—¿Pe nacne rlëë to ron to mine rne naa?

⁹ Parga nli, cholze zha ne zac guiab: “Laa naa gun perdon grëse xtol luu.”

¹⁰ Per laa naa glu lo to ganle, naa ne nac naa Men ne pxeel Dios zial naa lo guidzliu, ible naa no gun miech perdon.

Dzigo bnee me lo men rzacne co, rëb me:

¹¹ —¡Guche i, bi yag ne bzhoob luu i, zeen bzë!

¹² Zigne sca bnee me laa mgui co bzoli, blis me yag co, grop lo grë miech co gon zho laa me brieeg a, laa me zey. Grëse zho rzee zdoo zho, rleynie zho Dios rnee zho:

—¡Nasi laa ne nodzian ncuane gard dzian ne!

Bredz Jesús Leví

(Mt. 9:9-13; Lc. 5:27-32)

¹³ Blozh ga, laa Jesús brieeg a laa me zie nëz ro nisdoo stib; nzian miech ne pcaalsa lo me ga, dzigo pseed me zho.

¹⁴ Ro nis co ziezë me gon me Leví, xingan Alfé, zob Leví zaatne rietizh zho contribucion, dzigo bredz me Leví tsienal Leví zhits me. Guso Leví ga, laa Leví zienal.

¹⁵ Bded ga, bredz Leví me güey me tib wagw lidz Leví. Grë zha ne nac recaudador, grë zha ne zëeb diidz nac zha yozh, tipse lo mezh bzobnie me zho grë xpëëdsuel me; sac ndal grë zha co zienal zhits me.

¹⁶ Blalaa maistr ley ne nacgrë zha farisé, gon zho sca tipse noyownie Jesús grë zha co; bded ga, rëbcha zho lo xpëëdsuel me:

—¡Mod sca na rownie xmaistr to grë zha ngoopdol, grë zha beed ne nac recaudador!

¹⁷ Dzigo rëbcha Jesús lo zho:

—Nanle to ganle, men ne run rmed, zaatne no zha ne rzacne, ga rquiin zho, çniacxe squiin zho zaatne no zha ne ndip ndaan? Ni min co rac niina, tel naa zialguibd naa miech wen, sinque laa naa zialguib miech ngoopdol.

¿Pe nacne rcuand xpëëdsuel Jesús?

(Mt. 9:14-17; Lc. 5:33-39)

¹⁸ Lëëtaaque dze co nocuan xpëëdsuel Juan Bautist, grë zho zha farisé. Dzigo bdziñ bla zha ne bnabdiidz lo Jesús, rëb zho:

—¿Pe nac waa ib rcuand xpëëdsuel luu? Zha grë xpëëdsuel Juan Bautist ni grë zha farisé, rcuan zho.

¹⁹ Pquiab Jesús, rëb me:

—Zaatne nadien noyac tib guieltsieel, çpe niacxe lega csilo grë zha ne ndxie lo lni tso zho guielnë, ycuan zho ni ran zho laa mgui ne notsieelnia mban?

²⁰ Per dzdin dze zeene laa mgui co gbiche; ni zeene laa dze co gdziñ, dzigosi nagon rieguial tso zho guielnë, rieguial ycuan zho.

²¹ Ranle to ganle, zha ne rquiaabdie tib lë lar, rquiaad zho lar cub lad lar gox, sac zha ne sca gun paat yquiind wquiaabdie co. Zeene laa lar cub gbe, lëëque lëew gunnat zaatne nriez lar gox.

²² Scaque tsod zha ne cotsow vin cub tib len guid ne padzeelale noquiin, sac stiez vin cuba; dzigo niicle guid cow, niicle vingaaw laaw nitlo ga. Gacxe, tel vin cuba none len guid cubaque tsotsowa.

Ptop xpëëdsuel Jesús mzion zhobxtil

(Mt. 12:1-8; Lc. 6:1-5)

²³ Tib dze ne rdziiladz zho lo dziin nëz Israel, bdednie Jesús xpëëdsuel me zaatne zëeb zhobxtil, dzigo zigse zieded zho pchoo zho palal mzion zhobxtil co.

²⁴ Gon zha farisew, dzigo rëbcha zho:

—¡Lëda i gon noyun to! ¡Golguien ganle dze nda nac dze rii!

²⁵ Dzigo pquiab Jesús, rëb me:

—¿Pe gard glab to zaatne ziaad ganle zha been rey David tib dze zeene pcaabedz me grë me zha ne ziegza me, ni zienied zho pe gow zho?

²⁶ Rneew, bzëëb me len yadoo güey nab me quietxtil ne nac gon, downie me grë zha ne ziegza me ga, ni loxaque zha ne nacse pxoz row quietxtil co. Len iz co nac men ne lë Abiatar pxoz nroob.

²⁷ Golgacnan sca ganle, biaan dze rii par csacsi miech xcuerp zho, sinque ne rleynie Dios miech gane psan mew.

²⁸ Naa ne nac naa Men ne pxeel Dios zial naa lo guidzliu, naa rnabey dze rii, nanpaa naa pe nac mine nonguiel gac.

3

Biac tib mgui ne mband tib nia

(Mt. 12:9-14; Lc. 6:6-11)

¹ Gol stib dze ne rdziiladz zho lo dziin, güey Jesús len yadoo win ne zob lad guiedz co. Lad grë miech ne no len yadoo co, no tib mgui ne mband tib nia.

² Nzian zha ne ndxie ga, quialeets zho Jesús dien pe zunguiac me nia mgui co dze ne rdziiladz zho lo dziin. Quiambëz zho dien pe gun me, par gdziel pe yquiaaqui zho me.

³ Dzigo bredz me mgui co, bnabey me bzo mgui groltaa lo grë zha ne ndxie ga;

⁴ blozh ga rëbchaa me lo zho:

—¿Pe nadien rzac to nonguiel gun ne dze rii? ¿Pe nonguiela gun ne ncuane yquiin, te nonguiela gun ne guielntseeb ye? Zig nac samiech ne zha ne noxtseeb xquielmban, ¿pe maase csaan ne guet zho?

Ni tib zho pquiabd.

⁵ Dze bui me lo zho grëse zho, wbinladz guic me, ni mban goc zdo me gon me scataa ntseeb zdo zho; dzigo rëb me lo mgui co:

—Bzigaa nia luu.

Zigne bzigaa mgui nia mgui, laaw biac.

⁶ Grë zha farisé, ni grë zha ne nacie rey Herod, zigne brieë zho ga laa zho psilo bnediidz dien zha gdeeda diidz gut zho Jesús.

⁷ Len dze co, tib vuelt bdziñ Jesús ro nisdoo grë xpëëdscuel me. Miech guizhiu ne nal zhits zho, ga zie grë zha ne ziaad nëz Galilé, grë zha ne ziaad nëz Judé,

⁸ grë zha Jerusalén, grë zha ne ziaad nëz Idumé, grë zha no dib nëz dan ro guibee Jordán, grë zha ne no dib gax guiedz Tiro ni guiedz Sidón. Miech guizhiuw, sac ron zho grëtaa milagr ne run me.

⁹ Dzigo bnabey Jesús xpëëdscuel me, yguib zho tib len barcw zaatne gac so me zeena ctaagwd grë miech co me.

¹⁰ Zëëble diidz ndal miech ziyunguiac me, dzigo grëse zha ne rlan pe guielguidz, rbigbe zho dien zha grieelo maase lad xab me xen zho.

¹¹ Grë men dux ne noguitnie miech, zeene ran ma me, runquitsgzhil ma zha ne noguitnie ma lo me ni rquiaadan ma redz rnee ma:

—¡Xpëëd Dios nac luu!

¹² Per ractox me lo ma, rsaand me gnee ma parne xoobneñd cho nac me.

Ble Jesús gza tsiipchop xpëëdscuel me

(Mt. 10:1-4; Lc. 6:12-16)

¹³ Blozh ga biepe me tib guic gui win zob ga, ga bredz me zha ne gocladzse me. Zeene pcaalsa zho grë zho,

¹⁴ dzigo lad co ble me tsiipchop zha ne sēnie me, zha ne cxeel me tsieseed miech Xtiidz Dios. Lēē zha co bleelē me poxtl,

¹⁵ ni bdeed me poder lo zho guṅcxooṅ zho meṅdox.

¹⁶⁻¹⁹ Znu lē gza tsiipchop zha ne ble me ga:

Simón (lēē Simón co bleelē me Pedr),

Jacob ni Juan (xingan Zebedé, zha ne bleelē me “Zhin Nguzi” “Boanerj”).

Ndrés,

Lip,

Bartol,

Matew,

Mazh,

Jacob (xingan Alfé),

Tadé,

Simón (zha ne nacgrē zha ne racladz cuee zha Roma xtan zho)

ni Judas Iscariot (zha ne güeyto me).

Rēb zho meṅdox nacie Jesús

(Mt. 12:22-32, 46-50; Lc. 8:19-21; 11:14-23; 12:10)

²⁰ Wbire Jesús ga, laa me bdziṅ ro yu grē me zho. Scasaque ndal miech ne pcaalsa ga stib, ni rdeetew diidz gownie me zho.

²¹ Zeēne bin menlidz mew, dzigo brieē zho ziexi zho me, sac rēb zho bod rzhinle guic me.

²² Haxta grē maistr ley, zha ne brieē nēz Jerusalén bdziṅ ga, rnee zho:

—Beelzebú, ma ne rnabey lo meṅdox, ma co nacie me gane rrieelo runṅcxooṅ me meṅdox.

²³ Dzigo bredz me zho bzodiidz me tib cuent lo zho, rēb me:

—¿Pa nan to na grieelo lēēque meṅdox guṅcxooṅ samēdox ma?

²⁴ Teḷ tib guiedz nadiēṅ gac miech chop dii, csilo zho tiḷsa zho, ¿niacxe nitlod guiedz co?

²⁵ Tib diigaa miecha, teḷ csilo zho lēēque zha tiḷnie menlidz zho, ¿niacxe nitlod zho?

²⁶ Scaquegaa meṅdox nagon, telne lēēque lēē ma tiḷnie samēdox ma, jpe nale na bnitlo ma!

²⁷ Masaque nac meṅdox zig tib zha ne no xfuers, zha ne gacladz cuee grē ncuaaṅe no lidz zha cō, none cxidoogazh zho zho.

²⁸ Gneli naa lo to ganle, grēse doḷ ne run miech, grē teḷ zha rguie zho, rdzibdee zho, bii zuṅ Dios zho perdon miṅ co;

²⁹ saṅgue zha ne gneenē Espiritu Sant, doḷ nroob ga run zho, gdziṅd dze ne guṅ Dios zho perdon.

³⁰ Sca rēb me lo zho, sac sca quianee zho rēb zho meṅdox nacie me.

³¹ Horco laa xniaa me ni zha bets me bdziṅ, per leyse blēz zho; dzigo pxeel zho zha ne zietsedz me.

³² Blalaa zha ne zob gaxpaa lo me, zha co beēṅ vis rēb zho:

—Laa xniaa luu goṅ, ni zha bets luu ziaadguib luu.

³³ Pquiab me rēb me:

—¿Xnia naa ye, bets naa ye?

³⁴ Dze bui me lo grē zha ne ndxie ga, dzigo rēbchaa me:

—To goṅ nac xnia naa, to nac bets naa.

³⁵ Sac grēse zha ne run miṅe racladz Dios, lēē bets naa ga, lēē bzian naa ga, lēē xnia naa ga.

4

Xcuent zha ne güey gon
(Mt. 13:1-23; Lc. 8:4-15)

¹ Dze coquew, laa Jesús psilo quiaseed miech zaatne nac ro Nisdoo Galilé ga. Miech guizhiu ne pcaalsa lo me, nacne güeytsep me tib len barcw ne zo ro nis co, ga bzob me laa grè miech co bre tib ro nis.

² Ndal grè ncuaañe pseed me zho, per niapse con cuent rnee mew lo zho. Lëe tib cuent ne bzodüdz me ga nu, rëb me:

³ —¡Golquiaadiaga ganle! Tib mgui name, brie me güey me gon zhobxtil.

⁴ Zeene laa me quialaal zhob co, miñe bliaal gax ro nëz; znuse güey grè mguin güeytow maw.

⁵ Laa miñe bliaal zaatne nac lo quie, znuse znuse blana;

⁶ per zeene laa lo ngbidz brie, znusaque bgoola blozh ga bidzgaw; sac guiend nroob low.

⁷ Laa miñe bliaal zaatne nac len yag guiets, zeene laa grè yag guiets co broob znuse bnitlo yag guietsa, pasëw niac.

⁸ Sangue grè miñe bliaal zaatne nac lo liu naal, blana, brooba ni goca; lo tib tib zhob co no mzion co brie galptsii zhob, now brie tsongala, nogaaw brie haxta tib gayoow.

⁹ Blozh ga, rëbcha me lo zho:

—Zha ne racladz guien miñe rne naa, yquiaadiag zhow.

¹⁰ Zeene laa grè miech co zey, laa gza tsiipchop xpëëdscul me, ni zla zha ne rzënie me, laa zho bnabdiidz lo me dien zha nac cuent co.

¹¹ Dzigo rëbcha me lo zho:

—Tel to, Dioszhal rlu lo to zha rnabey me, niicle ncuaañe mazdraa ngueetsa; laa lo grëraa miech ne gard gbig lo me niapse con cuent rzodiidz naaw lo zho parne guien zhow.

¹² Per niicle scaw, nzhal diag zho ron zho, per peet riend zho; nzhal lo zho rwi zho, per peet rand zho; ib nëd zho gbig zho lo Dios, gnab zho gun me zho perdon.

¹³ 'Nana to, telne biende to zha nac cuent co, ¿zha guien to grëraa miñe gne naa dzigo? Golquiaadiaga ganle, znu gon naca:

¹⁴ Mgui ne güeylaal zhob ga, rriequia lëe zha ne rienee Xtiidz Dios lo miech ga, laa zhobxtil co nac Xtiidz Dios.

¹⁵ No miech nac zig nac ro nëz ne bliaal palal zhob co: rquiaadiag zho Xtiidz Dios, rlozh ga lëélëd rdziñ mendox rquil ma zho, rsaanga zhow.

¹⁶ Nogaa zho nac zigne nac lo quie co: zeene rquiaadiag zho Xtiidz Dios, ñe rley zho rcaania zhow,

¹⁷ per led dib zdood zho rcaania zhow; gane zeene laa miech rsilo rlëe lo zho, laa miech rtsidil zho porne rliladz zhow, rsaanga zhow.

¹⁸ Zzhisgaa zho nac zigne nac len yag guiets co: nli rquiaadiag zho Xtiidz Dios,

¹⁹ per rsilo zho lel grè ncuaañe no lo guidzliu rii mazdraa rionie guic zho, rquidie grè dimi zho, rzoobladz zho yquianie zho grëse ncuaañe racladz zho. Grè ncuaañ co rioxcoraa zho, laa ne tsonie Xtiidz Dios guic zho, min co rquiaqui ib rund zho miñe rnabey me.

²⁰ Laa nogaa zho nac zigne nac liu naal co: rquiaadiag zho Xtiidz Dios, dib zdoo zho rliladz zhow, ni rban zhow zigne naca. Grè zha co, no zho nac zig mzion ne brie galptsii zhob ga, no zho nac zig miñe brie tsongala, nogaa zho nac zig miñe brie tib gayoow ga.

*Xcuent biini ni midz moxtaz**(Mt. 13:31-32, 34-35; Lc. 8:16-18; 13:18-19)*

21 Blozh ga, biire pcaalsa miech lo me, dzigo rëb me lo zho:

—¿Pa dien rquiin biini? ¿Pe rquiaguiw par tsolana tib len guin o soogaaw tib zhan lon? Led zeene rquiaguiw lëe, zaatne grieelo gziiniw ga rzoob zhow.

22 Scaque nagon grëse ncuaañe rac nguetsa, grëse ncuaañe rnee miech zhliana, ib none xoobneña.

23 Telne racladz to guien to mine rne naa, golquiaadiaga;

24 ni zigne ron tow scagaa goltsoxco golguna. Telne tosxco to gun tow, scagaa zioguicraa tow.

25 Sac zha ne tsoxcow, zdedraa Dios guielbiini lo zho; sangue zha ne tsoxcoda, haxta tel palalse guielbiini ne bdeed me lo zho stiche mew.

26 Ni rëb me lo zho:

—Znu gon nac zha ne ngab lo Dios; nac zho zig bni ne ran miech.

27 Zha ne rielaal bni co, liu rcow, liu riini, laa zho raagues, laa zho rieche. Sca sca laa dze zie, laa bni co ratslo, laaw rlan, laaw rroob, per riend zho zha nacre laaw rroob.

28 Zhal guidzliu rdeeda guielnzaac co, guizh nac zhob co zeene rлана, rac palal dzew laaw rlan mzion.

29 Laa zeene laaw ral, dzigo laa zho rietiitsa, sac laa dze bdziñle ne laaw tsas.

30 ¿Zha ganle gni naa lo to zeena guien to zha nac xquielrnabey Dios? —rëb Jesús—. ¿Pa tib cuent ganle gzodiidz naa lo to zeena guien to zha naca?

31 Naca gon zigne nac tib midz moxtaz ne ran miech dan rii. Midz moxtaz nac midz ne mazdraa win,

32 ni tel gacbniw, rrooba, ni lëew rroobraa lo grë guizh ne ran zho ro yu, haxta grë mguin riezaa zhiptsieez ma low sacne ncala.

33 Nzian grë cuent rii pquiin me par cseed me grë miech co, ni laa me bnee mine rgobey me guien zho.

34 Niapse sca rseed me zho, laa zha ne nac xpëedscuel me, zeene zhasew rnee mew lo zho zigne naca.

*Pcuëz Jesús tib medox**(Mt. 8:23-27; Lc. 8:22-25)*

35 Zeene bdze dze co, rguetsle liuw rëbchaa me lo xpëedscuel me:

—Golgotsoxaa dieedquia ne stib nëz lo nis rii.

36 Blozhse bnee me lo grë miech co, laa zho biep len barcw ne zob me ga grë me zho, laa zho zie. Ye blalaa barcw ne zob lo nis co zienal.

37 Laa zho zie, tibaque zeene laa tib medox psilo briece, masaque rliis me lo nis co; zeene riasoli low riechoona len barcw, laa barcw psilo noyodzële nis.

38 Dzigo güey zho güeycuacan zho Jesús, sac lëëtaque laa me nixgues nëz zhan barcw ncoogse me tib lmad.

—¡Maestro! —rëb zho—. Bui ganle, ¿pe znuse csaan luu nitlo ne nu?

39 Dzigo guche Jesús, bnee me lo me co, bnee me lo nis co, rëb me:

—¡Lëew ga na! ¡Golcuedze!

Zigne sca bnee me, laa me co blëz, niicle nis cow laaw bredze.

40 Dzigo rëbchaa me lo zho:

—¿Pe nacre squitaa rdzieb to? ¡Gardaque dzigo lëe gliladz to cho nac naa!

41 Riendraa zho zha gun zho lo dzeb co, ni rnabdiidzlsa zho rnee zho:

—¿Bay cho nac me, zha nacre haxta me, haxta nisdoo ron xtiidz me?

5

*Men Gadar ne nosacsi mendox
(Mt. 8:28-34; Lc. 8:26-39)*

¹ Bdziñ Jesús nêz dan ro nisdoo co gza xpëédscuel me, ga nac xtan zha Gadar.

² Laa me biedzê leñ barcw, zeene laa tib mgui ne nosacsi mendox bdziñ lo me. Leñ baa brieë mgui co bdziñ me ga,

³⁻⁴ sac leñ baa nac zaatne rbêz me. Miech ne lëbd zho low, nzian vuelt ziezooob zho caden nia me, ni me ne, per znuse rchug mew, rzhooonga me. jChoot rlëbd lo me!

⁵ Dze, guieel quianzê me grê dan co, rietso me grê leñ baa. Roptsiedan me, ni lëëque me rzhên quie rchug me guidlad me.

⁶ Laa dze co, zitraa gon me Jesús, rias me bdziñ me pquitsgzhib me lo Jesús.

⁷⁻⁸ Dzigo goctox Jesús lo mendox ne noguitnie me, rêb Jesús:

—jMendox, psaan men qui!

Horco pcooptsiedan mendox co mgui co, ni rnee ma lo Jesús:

—¿Pe gun luu naa Jesús? Runbey naa luu, Xpëéd Dios ne no gbaa nac luu.

jNe nli pagaa been guieñ nzaac csacsid luu naa!

⁹ Dzigo bnabdiidz Jesús lo ma dien cho lë ma. Pquiab ma rêb ma:

—Legion lë no, sac nzian nac no.

¹⁰ Rnab grê mendox co lo Jesús, gzonêzd me ma zit.

¹¹ Gaxaque zhan gui co ndxie tib dzoon nguts noyow,

¹² dzigo bnab ma lo Jesús, rêb ma:

—Bzhiguieñ lose grê nguts qui bzonêz no.

¹³ Bdeed Jesús diidz. Dzigo laa grê mendox co psaan mgui co, laa ma zie bzëëb ma zdo co grê nguts ne ndxie ga; psilo grê nguts co rquiaa ma corr güeypix ma glaa tib ro yee ne quia ro nisdoo co, bliaañ ma haxta lo nis. Ga biepp ma nis, grêse ma gut. Rгаа ma zig chop mil.

¹⁴ Zha ne quianap grê nguts co, gzase zho bzhooñ güeyzodiidz zhow lad guiedz, ni grêraa yu ne zob gax ga. Brieë grê miech co, zieso zho.

¹⁵ Zeene bdziñ zho, per nli bdzieb zho, sac gon zho laa mgui ne sca bdziitnie mendox ga zobse lo Jesús, laa mgui nacwxable, rlu ndzinlile nac guic mgui.

¹⁶ Psilo grê zha ne gon zha biac mgui co, ni zha goc grê nguts co, psilo zho rzodiidz zhow lo grê zha ne bdziñ ga.

¹⁷ Min co bin grê zha co, mazd bnab zho lo Jesús siguieñ me gbi me xtan zho.

¹⁸ Zeene laa Jesús zie sëëb me leñ barcw, dzigo laa mgui co wbigaque lo me, nan mgui nziguieñ me nienal mgui zhits me.

¹⁹ Per bdeete me diidz, rêb me:

—Wbire, güey güeyzodiidz lo grê menlidz luu ganle pa lotaa pquia zdo Dios luu, zha nactaa milagr nroob ne been me beenguiac me luu.

²⁰ Dzigo wbiere mgui. Güey mgui dib xtan zha Decápolis, güeyzodiidz mgui lo grê miech co zha beenguiac Jesús mgui. Grêse zha ne rona, rzee zdo zho.

*Brieëban xpëédwnaa tib men lë Jair
(Mt. 9:18-26; Lc. 8:40-56)*

²¹ Zeene laa Jesús biere brieëquia stib nêz ro nisdoo co, miech guizhiu ne pcaalsa lo me ga.

²² Ga zo me zeene laa tib men ne nacgrê zha ne rnabey yadoo lë Jair bdziñ. Zigne bdziñ me lo Jesús pquitsgzhib me,

²³ rêb me:

—Been tib guielnzaac gotsaa guio ne gunguiac luu xpëed naa. Laa win rlozhle; nanpaa naa telne cxobnia luu guic win, ziac win.

²⁴ Dzigo laa Jesús zie nêz lidz men co. Ndal miech ne zienal zhits me, haxta rtaagw zho me.

²⁵ Lad grê miech co zienal tib wnaa, gocle tsiipchop iz rlan me tib guielguidz, rzac me zigne rzac men wnaa gzob mée, tibaque rlan mew ib rbêzda.

²⁶ Nzianle lo men ne run rmed ziye me, grêse ncuaaŋe rap me bloozh me lo rmed; per laa ne cuéz guielguidz co, lel znu rzhizhooraaw.

²⁷⁻²⁸ Ziyonle me grê milagr ne run Jesús. Bza zdo me rëb me: “Totsaque ygaa maase lad lar ne mbix me xeeŋ naa, ziaclae naa.” Dzigo bded me lad grê miech co, wbig gax me nêz zhits Jesús, bzheŋ me lad lar ne mbix Jesús.

²⁹ Nligaa hor cogazh laa guielguidz co blêz, bien me laa me biac.

³⁰ Zeene bien Jesús ne laa me beenguaiac wnaa co, dzigo ptsire lo me rwi me lo grê miech co, rëb me lo zho:

—¿Cho ga bzheŋ lad xab naa?

³¹ Rëbchaa xpëédscuel me:

—¿Zha nan luu glu dien cho bzheŋ lad xab luu, ni squitaa ndaagw ziaad luu lad grê miech qui?

³² Per laa me rwi lo grê miech co dien chow.

³³ Nanpaa wnaa co ne me ga, rdzieb me, rzhidz me laa me wbig pquuits-gzhib me lo Jesús bneeli me zha nacne sca been me.

³⁴ Dzigo rëbchaa Jesús lo me:

—Xin, laa luu biac sacne bliladz luu naa. Bzê na, peet tsieniedraa guic luu, laa guielguidz co bichele.

³⁵ Laa Jesús bii quianeeque, zeene laa bla zha ne ziaad nêz lidz Jair bdzin, rëb zho lo Jair:

—Csodziindraa luu lo men qui, laa xpëed luu gutle.

³⁶ Zeene gon Jesús sca rëb zha co, dzigo bnee me lo Jair rëb me:

—Peet tsienied guic luu. Dib zdo luu bliladz naa.

³⁷ Psaandraa me cho grê miech co nienal zhits me, loxaque Pedr, Jacob ni Juan bets Jacob; zha cose zienie me.

³⁸ Zeene bdzin zho lidz men co, tib ruid ne rac, nguiedz zëeb tsi zho roon zho no zho xquielnê mëed co.

³⁹ Dzigo bzëeb Jesús len yu, rëb me lo zho:

—¿Pe nacne squitaa roon to? Goonde to, gon led gute ndzoop win rii, nixguies ndzoop.

⁴⁰ Leŋ rzhidznie grê miech co me, bin zho sca rëb me. Dzigo bnabey me brieë zho ley grêse zho, loxaque pxoz mëed co, xniala win ni gza tson xpëédscuel me zha ne nal zhits me ga bzëebnie me len yu ne nix win.

⁴¹ Wbig me bzheŋ me nia win, rëb me lo win:

—¡Guche i na, ndzoop yeeŋ! (Talita, cumi.)

⁴² Zigne sca bnee me laa mëed co guche, laa win bzê. Tib mëed tsiipchop iza. Grêse miech co per nli rzee zdo zho.

⁴³ Dzigo pso me diidz lo zho choot lo gneed zhow; blozh ga bnabey me bdeed zho ncuaaŋe dow mëed co.

6

Güey Jesús ladz me
(Mt. 13:53-58; Lc. 4:16-30)

¹ Ga brieë Jesús grë xpëëdsuel me, laa me bdziñ Nazaret zaatne nac ladz me.

² Laa zeene gol dze ne rdziiladz zho lo dziin, laa me bdziñ len yadoo, psilo me pseed me grë miech co. Per nli rzee zdoó zho ron zho grë miñe rnee me, rnabdiidzlsa zho rnee zho:

—¿Pazhe waa squitaa pseed men qui? ¿Zha nac guielbiini ne squitaa rap me i, ne rnee miech ndal grë milagr ne run me?

³ Tib ngurëyagse name nac me. Led lëë xingan Marí i, bets me name nac Jacob, nac José, nac Judas ni Simón, grë bzian mew, nu no zho grë zho.

Íb beencasd zho me.

⁴ Zeene gon me sca rac zho, dzigo rëb me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho, ni menlidz zho ni menladz zho nëd gunbey zho.

⁵ Brieelod niun me nzian milagr ga, blase zha rzacné pxobnia me guic, beenguaiac me.

⁶ Bzee zdoó me gon me scataa ndip zdoó zho, íb bliladzd zho cho nac me.

Blozh ga mazd güey me grë guiedz ne ndxie gax ga, güeyseed me miech.

Pxeel Jesús xpëëdsuel me tsieseed zho miech

(Mt. 10:5-15; Lc. 9:1-6)

⁷ Tib dze, bredz me gza tsiipchop xpëëdsuel me, bnabey me zho tsieseed zho miech. Pxeel me zho chopga chopga zho, ni bdeed me poder lo zho par gunxoon zho mendox.

⁸ Pso me diidz lo zho güeyd zho pe yquiin zho nëz, lëë gdib tib lë yag ne gzoxca zho güey zho. Zig nac ncuaañe gow zho, zig nac dimi, pe tib bziudgaa, güeyd zhow.

⁹ Lab zho, miñe quiase ni zho; xab zho, miñe nacwse zho mincose tsienie zho.

¹⁰ Ni rëb me lo zho:

—Guiedz ne gdziñ to, zha ne gneedz zaatne cuëz to, lidz zha co golcuëz haxta gdziñ dze ne gbi to guiedz co.

¹¹ Laa zaatne ne íb gneedzd zho pa cuëz to, niicle nëdgaa zho yquiaadiag zho miñe gnee to, dzigo gollit grë yudie co ni to, golriiegazh ga, zeena guien zho ganle lëda ga been zho.

¹² Dzigo laa zho brieë, laa zho zie. Güey zho, güeynee zho lo grë miech csaan zho xquielntseeb zho, gbig zho lo Dios.

¹³ Nzian zha ne nosacsi mendox, benxoon zho mendox co; grë zha ne rzacné, bdëëb zho nceit guic zho, beenguaiac zho zho.

Gut Juan Bautist

(Mt. 14:1-12; Lc. 9:7-9)

¹⁴ Bin rey Herod rzeet zho Jesús, sac tel pa lotaaw zëëb diidz grëtaa milagr ne run me. Grë miech co, no zho rzac brieëban Juan Bautist lëë me ga nac Jesús, gane run me grëtaa milagr co;

¹⁵ nogaa zho rnee Líw, men ne biaad pteed Xtiidz Dios padzeela; zzhisgaa zho rnee, no cho stib men ne ziaad noteed Xtiidz Diosa, zig biaad grë zha ne biaad padzeela.

¹⁶ Zeene ron Herod sca rnee miech, dzigo rnee me:

—Nligaa Juan ga. Naa bnabey pchug zho yan me, per lëë me ga brieëban.

¹⁷⁻¹⁸ Sca rnee Herod sac rsoladz me zha been me Juan. Me bnabey bgaa Juan bio Juan ladzguib, loxaque ne rnee Juan lo me nonguielda ga lëëque Herodí ptsieelnia me; sac tsieelpaa bets me Lip nac Herodí.

¹⁹ Blëënie wnaa ne nac Herodí ga Juan, rzac me tebaa zha gut me Juan; per rdeetew diidz,

²⁰ sac rdzieb Herod lega pe guñ me Juan, rien me tib zha ne zienal mine nac diidzli, tib zha ne peet xtold nac Juan; dzigo ib rdeete me diidz pe guñ wnaa co Juan. Niicle ne cadque zeene rnee Juan lo me, rio me zhgab rienñ me dien zha guñ me, per rdziladz me rquiaadiag me grë mine rnee Juan.

²¹ Laa tibtaa dze laa mine no guic Herodí ga goc. Dze ne bloozh Herod stib iz, bnabey Herod goc tib lni nroob, bredz me grë zha ne nacnie me dziin, grë zha ne zo lo menguiib, ni grë zha non lo zha Galilé.

²²⁻²³ Laa zho no mezh noyow zho, zeene bzëëb xindzooop Herodí psilo ndzooop biee ndzooop. Bdziladz Herod guñ me zha biee ndzooop, grë zha ne zob lo mezh ga ne. Dzigo rëb Herod lo ndzooop, tel petaa gnab ndzooop zdeed mew; haxta brieer ro me rëb me:

—Ncuaañe gacladztaa luu gnab luu, niicle zig grol grë ncuaañe rap naaw, znedz naaw.

²⁴ Rias ndzooop güeynabdiidz ndzooop lo xniaa ndzooop. Dzigo rëbchaa me lo ndzooop:

—Bnab lo me gnabey me tsiechug zho guic Juan gneedz zhow lo luu.

²⁵ Bdziñ ndzooop lo Herod rëb ndzooop:

—Racladz naa xoob guic Juan Bautist tib len plat, gneedz luuw lo naa niinagazh.

²⁶ Zeene bin Herod sac rëb ndzooop, mbanse rac me; per rdeetraaw diidz niab me grieeloda, sac grëse zha ne zobnie me ga, bin zho rëb me zdeed me ncuaañe gnabtaa ndzooop.

²⁷ Dzigo racse me pxeel me tib menguiib ne tsiechug guic Juan.

²⁸ Güey menguiib co len ladzguiib pchug zho guic Juan. Bdziñ zho, zhoobsew tib len plat bdeed zhow lo ndzooop, dzigo güey ndzooop güeydeed ndzooopa lo xniaa ndzooop.

²⁹ Zeene bin xpëëdsuel Juana, dzigo güey zho güeylis zho me ga güeyqueets zho me.

Bguiaan Jesús gaay mil miech

(Mt. 14:13-21; Lc. 9:10-17; Jn. 6:1-14)

³⁰ Zeene laa gza xpëëdsuel Jesús bdziñ lo me stib, psilo zho bzodiidz zho lo me grëse tel zha güey zho, grëse tel zha güeyseed zho miech. Per miech guizhiu ne ndxie lo me, zha ne rbi, zha ne rdziñ; haxta ni riobd gow me grë xpëëdsuel me. Dzigo rëb me lo zho:

³¹ —Mazd golgotsaa guio ne tib zaatne zitlaa lo grë miech rii, zeena grielo gdziiladz to niip.

³² Dzigo bzëëb me tib len barcw grë me zho, laa zho zie.

³³ Nzian zha ne guñ zie me, beenbey zho ne mew. Dzigo ndal miech ne no grë guiedz gax co brieer, rias zho zie zho glole zho bdziñ zaatne no gdziñ me.

³⁴ Zeene biet me len barcw, guñ me laa grë miech guizhiu co ndxiele ga. Pquia zdoo me zho guñ me scataa ndxie zho zootle grë mëcwxiiil yeen ne guienñ xbaxtor, dzigo psilo me nzian grë ncuaañe pseed me zho.

³⁵⁻³⁶ Gol bdze dze co, wbig xpëëdsuel me lo me rëb zho:

—Mazd gudz lo grë miech qui guey zho na, zeena guiob tsie zho grë guiedz ne ndxie dib gax i, tsiesi zho ncuaañe gow zho; sac guñ laa dze bdzele, ni choot miech guienñ nu.

³⁷ Pquiab me rëb me lo zho:

—To goldeed ncuaañe gow zho.

Rëbchaa zho lo me:

—¿Pe zhizhe dimi ne yquiin gziuu guietxtil ne gow grëtaa miech qui?

³⁸ Dzigo bnabdiidz me lo zho, rëb me:

—¿Bla guietxtil ziaadnie to? ¡Golwi dien!

Zeene biire zho güeyso zho, rëbchaa zho lo me:

—Loxaque gaay guietxtil ziaad, ni ziaad chop me.

³⁹ Dzigo bnabey me bzob grë miech co, wdzeepaaw bioogse lo guizh nguia ne zëeb ga ndxie zho. Tib dzoonga tib dzoonga zho bre,

⁴⁰ zaatne bre tib gayoo zho, zaatne breegaa grõl gayoo zho.

⁴¹ Dzigo bzhen me gza gaay guietxtil co, ni grop mẽl co, blis lo me bui me nëz gbaa, bdeed me xquizh lo Dios. Blozh ga, beengrõl me guietxtil co, zige rdeed mew lo xpëedscuel me, scase scase noguizh zhow lo grë miech co. Scaque been me grop mẽl co.

⁴² Grëse miech co, dow zho haxta zaatne bieltaa zdoo zho.

⁴³⁻⁴⁴ Miech tafa, zha hguise rgaay zig gaay mil; ni zeene blozh dow zho, scase ncuaañe nroob biaan, biodzë tsiipchop chicuid bio grë guietxtil co, bio grë mẽl co.

Rzë Jesús lo nisdoo

(Mt. 14:22-27, 34-36; Jn. 6:16-21)

⁴⁵ Zeene blozh ga, bnabey Jesús xpëedscuel me bzëeb zho leñ barcw, zeena zienerga zho tedquia zho stib nëz ro nis co, gdziñ zho guiedz ne lë Betsaid; laa me bii blëz ga, nozonëz me grë miech co.

⁴⁶ Blozhse bzonëz me zho, dzigo güey me tib guic gui zob gax ga, güeyzodiidznie me Dios.

⁴⁷ Zig rguets liuw, laa barcw ne zie xpëedscuel me ga no lo nis co. Laa me zo ga tipse me,

⁴⁸ rañ me rlu ib gacd csëeniob zhow, sac rriee me rtsire mew. Merle guimbe liuw, tibaque zeene goñ zho laa me bdziñ zaatne zie zho ga; tib lo nis co ziezë me, rac me zig nac zeene tibted me lo zho.

⁴⁹ Zeene goñ zho laa meñ co sca ziaad-zë lo nis co, bdzieb zho, broptsie zho rnee zho:

—¡Tib ndziin i goñ ziaad i!

⁵⁰ Sac grëse zho rañlo zho laa me sca ziezë lo nis co. Dzigo bnee me lo zho rëb me:

—¡Gdziebde to, naa zial̃ nu!

⁵¹ Zeene laa me biep leñ barcw ne zie zho ga, laa me co blëz; dzigo mazdraa bzee zdoo zho.

⁵² ¡Per ib rieñd zho cho nac me, niicle ne goñle zho beeñ me milagr nroob co bguaañ me miech guizhiu co!

⁵³ Zeene laa zho bdziñ stib nëz ro nis co, zaatne nac xtan zha Genesaret, dzigo laa zho pxidoo xbarcw zho ro nis ga.

⁵⁴ Loxaque biet me leñ barcw laa grë miech co beeñbeyle me.

⁵⁵ Rias zho güey zho grë guiedz co, güeynie zho diidz laa me bdziñ ga. Dzigo psilo grë miech co rxob zho zhinguidz zho lo yag, rdziñnie zho zho lo me zaatne rontaa zho no me.

⁵⁶ Zaatne gdziñtaa me, niicle guiedz nrooba, niicle guiedz lasa, rbee grë miech co zhinguidz zho rienie zho zho zaatne nac leñ guiedz; ga rnab zho lo me siguel me maase ni lar ne mbixse me xeñ grë meñ rzacné co. Ni grëse zha ne rzheñ xab me, riac zho.

7

Ncuaane runctal xtol miech
(Mt. 15:1-20)

¹ Tib dze, bdziñ bla zha farisé, ni zla maistr ley ne ziaad nêz Jerusalén, lo Jesús.

² Dzigo gon zho blalaa zha ne nac xpëëdsuel Jesús, zeene laa zho row rguibd zho nia zho zigne nacpaa grë zhiwseed xmengol zho.

³ (Nac zha farisé, ni grësegaa zha Israel telne tsard nia zho zigne nac xcostumbr xmengol zho, ible rowd zho; sac zienaldox zho miñe nac costumbr.

⁴ Zeene rbire zho lo lgui, ib no mod ne riar nia zho dzigora r zob zho row zho. Nzian grë wseed co psan xmengol zho zienal zho, zig nac zha riar grë tas, grë cant, grë xtsiñ rotie zho miñe niaa guiib, ni grë lo bangw ne r zob zho row zho.)

⁵ Dzigo rëb zho lo Jesús:

—¿Pe nacne zienald xpëëdsuel luu miñe blu xmengol ne? ¿Pe nacne squize nia beed zho i row zho?

⁶ Pquiab Jesús rëb me lo zho:

—Nlipaa miñe bnee Isá, men ne biaad pteed Xtiiid Dios, zeene znu pquiaa me:

Grë miech rii, rquiaalose zho runnon zho naa, rond zho diidz gon zho miñe rnabey naa.

⁷ Paat rquiind riaad zho riaadgan zho naa; sac niapse guicle zho riab grë wseed ne quialu zho lo miech.

⁸ Sac tel to gon, nosaan to grë miñe rnabey Dios, lel grë xcostumbr miech zienal to.

⁹ Xcostumbr to nac miñe mazdraa rioxco to, laa miñe rnabey Dios quiasan to tib lad.

¹⁰ Led znu gon rnee ley ne bdeed Dios lo Moisés: “Gon pxoz luu, gon xniaa luu”, ni no stib miñe rnee: “Zha ne quie pxoz, quiega xniaa, ib none guet zho.”

¹¹ Laa to lel rnee to, zac gund miech xyudar xmengol zho, telne bloogonle zho pe nac ncuaane rieguial gdeed zho lo me.

¹² Tole rdeete diidz ga gon zho xyudar pxoz zho, xyudar xniaa zho.

¹³ Tib ladle gon rsan to Xley Dios ga sca run to, lëëpaaze grë costumbr ne biaanñie to, ni quiasangaa to lo zha ne ziaadquia, miñ co noxcoraa to. Ni nzianraa grë falt ne squi quiaayun to.

¹⁴ Dzigo bnee me lo grëraa miech ne ndxie ga, rëb me lo zho:

—Golquiaadiag miñe gni naa lo to nu, ni goltsocxo guien to zha naca.

¹⁵⁻¹⁶ Golgacnan ganle: Grë ncuaane rdziñ zdoo miech, led mincod runctal xtol zho; sinque grë ncuaane ntseeb ne rza zdoo zho, miñ co nac miñe runctal xtol zho.

¹⁷ Laa zeene laa me bdziñ ro yu grë xpëëdsuel me, dzigo bnabdiidz zho lo me dien zha nac diidz ne sca rëb me lo grë miech co.

¹⁸ Rëbchaa me lo zho:

—¿Pe niicle to riendaquew dzigo lëë? ¿Pe riende to, grë ncuaane row miech, led mincod runctal xtol zho?

¹⁹ Sac grë ncuaane row zho rdziñda len zdoomban zho, zhaa zaatne rdziña. Grë guielwagw, len bzuiud zdoose zho, len zhitriipse zho rieteda, rlozh ga rriiegaw xcuerp zho.

Ga lue me lo zho ganle, grëse ncuaane nac guielwagw lëda runctal xtol miech.

²⁰ Ni rëb me lo zho:

—Mīne rza zdoomban miech, mīn co nac mīne runctal xtol zho.

²¹ Sac zdoomban zho rza grē ncuaaṅe ntseeb ne run zho, zig nac:

zeṅe rio zho grē zhgab yozh,

zeṅe run zho grē guielṅyozh,

zeṅe rban zho,

zeṅe rut zho samiech zho,

²² zeṅe rionie zho zha ne nacd tseeld zho,

zeṅe rzoobladz zho ncuaaṅe rap stib miech,

zeṅe run zho grē guielntseeb,

zeṅe rquidie zho,

zeṅe rien zho run zho grē ncuaaṅe ndzinlid,

zeṅe nē rac zdoo zho ran zho cho zha ne stibnoded,

zeṅe rzhixcuaa zho diidzguizh,

zeṅe racniats zho,

zeṅe run zho grēraa ncuaaṅe paat rquiind.

²³ Grēse ncuaaṅe ntseeb rii, zdoomban miech rzaw, ni lēēw nac mīne runctal xtol zho.

Biac xpēēd tib wnaa zit

(Mt. 15:21-28)

²⁴ Ga brieē Jesús, laa me zie nēz Tiro. Zeṅe bdziṅ me nēz co ga bdziel tib yu ne blēz me, gocladz me choot niacnaṅd ne laa me no ga; per brieeloda, znuse bien diidza.

²⁵⁻²⁶ Zeṅe bin tib wnaa Sirofenis laa Jesús bdziṅ ga, dzigo güey me, sac noguitnie meṅdox tib xpēēd me. Zigne bdziṅ me pquitsgzhīb me lo Jesús, rnab me tsegunṅxooṅ Jesús meṅdox co. Tib wnaa zit nac wnaa co;

²⁷ dzigo rēbchaa Jesús lo me:

—Blēz niip dieṅ. None glo mēēd gow, nonguielṅda cuee ne guiet nia mēēd gdeed new lo mēcw.

²⁸ Pquiab wnaa co, rēb me:

—Nli scaw, zigne rnee luu i; per niicle mēcwa led rio ma zhan mezh rtop ma grē mīne rrieengaa nia mēēd.

²⁹ Dzigo rēbchaa Jesús:

—iSquiw nagon! Lēēgazha i rnee luu. Peet tsieniedraa guic luu naa sca; bzē, laa meṅdox ne nosacsi xpēēd luu bichele.

³⁰ Laa wnaa co zey. Zeṅe bdziṅ me lidz me, gon me iṅe laa xpēēd me nixse lo lon, per laa meṅdox co psaanle win.

Biac tib meṅ ne rcuaat

³¹ Ga brieē Jesús, güeyted me nēz Sidón. Sidón brieē me bdziṅ me ro Nisdoo Galilé stib, zaatne nac xtan zha Decápolis.

³² Ga bdziṅnie zho tib mgui lo me, rcuaat mgui ni nca rnee mgui; bnab zho lo me cxobnia me guic mgui guṅguiac me mgui.

³³ Dzigo blee me mgui lad grē miech ne ndxie ga. Zitlaa güeynie me mgui, ga psēēb me mzhugnia me gropsē lenṅ diag mgui ni bdēēb me zhindzuc me lo ludz mgui.

³⁴ Blozh ga, blis lo me bui me nēz gbaa, bneeladz zdoo me, dzigo rēb me:

—iBzhial! (iEfatal)

³⁵ Zigne sca bnee me, laa diag mgui co bzhial, niicle ludz mguiw laaw wban, laa mgui psilo bneenal.

³⁶ Zigo pso Jesús diidz lo grē miech co, choot lo gzodiidzd zho zha biac mgui co.

Per laa ne rso me diidz lo zho, dzigole nēzrii, nēzrec rzodiidz zhow;

³⁷ sac rzeedox zdoo zho gon zho mine been me ga.
 —iNcuaaṅe gzee zdoo ne i been men qui! —rnee zho—. Zha haxta nguaat,
 haxta ngop, runguiac me.

8

Bguiaan Jesús tap mil miech (Mt. 15:32-39)

¹ Len dze co, miech guizhiu ne biire pcaalsa lo Jesús stib. Zeṅe goc tson
 ngbidza, guiṅdraa ncuaaṅe gow zho. Dzigo bredz me xpëédscuel me, rëb me
 lo zho:

² —iRquia zdoo naa grë miech rii, tsonle ngbidz ga rac blanso zho nu, ni na
 quianiédraa zho ncuaaṅe gow zho.

³ Teṅe squise zho gzonëz naa zho, glëbd zho, scow zho nëz, sac no zho zit
 brieë zho ziaad zho nu.

⁴ Pquiab zho rëb zho:

—iPer pe yguiaan ne zho? iPa guioxi ne guietxtil ne gow grëtaa miech qui
 dan rii, naca zaatne guiṅd miech?

⁵ Dzigo bñabdiidz me lo zho, rëb me:

—iBla guietxtil ziaadnie to i?

—Gadzaquew —rëb zho.

⁶ Dzigo bñabey me grëse miech co bzob zho liu. Blozh ga bzheṅ me gza
 guietxtil co, bdeed me xquizh lo Dios; blozhse bdeed me xquizh lo Dios, zigse
 noyungrol mew, scase scase rdeed mew lo xpëédscuel me rguizh zhow lo grë
 miech co.

⁷ Zienie zho zla meṅ las; bzheṅ me gza meṅ co bdeed me xquizh lo Dios,
 blozh ga bñabeyaue me zho bdiiz zho ma.

⁸⁻⁹ Grëse miech co, dow zho haxta zaatne bieltaa zho dzigo laa me bzonëz
 zho. Rгаа zho maase tap mil, ni zeṅe blozh dow zho bii bdop gadz chicuid
 mine biaan.

¹⁰ Blozh ga, laa me bzëëb leṅ barcw grë xpëédscuel me, laa zho zie nëz xtan
 zha Dalmanut.

Racladz zha farisé gan zho milagr (Mt. 16:1-12; Lc. 12:54-56)

¹¹ Blalaa zha farisé ne no nëz co, zeṅe bin zho laa me bdziṅ ladz zho, güey
 zho rzadraa ncuaaṅe rlisqui zho lo me. Rñab zho glu me cho nac me, rëb zho
 lo me:

—Racladz no dziaṅlo no guṅ luu tib milagr, teṅe nli gbaa ziaad luu.

¹² Zeṅe gon me sca rac zho, bio me guieṅnë; dzigo haxta bneeladz zdoo me,
 rëb me lo zho:

—iZha rñaraa milagr ne racladz to gan to? Gneli naa lo to ganle, ni stib
 milagr gon ganṅdraa to.

¹³ Blozhse sca rëb me lo zho, ndxieque zho ga laa me bzëëb leṅ barcw laa
 me zie stib nëz ro nis co.

¹⁴ Zeṅe brieë zho ga, zoladzd xpëédscuel me ney zho ncuaaṅe niow zho,
 lëë gdib tib guietxtil zienie zho leṅ barcw.

¹⁵ Laa zho zie, tibaque zeṅe rëb me lo zho:

—Golguien gon, napaa noyac-wet to lo zhincobi zha farisé, lo zhincobigaa
 rey Herod.

¹⁶ Zeṅe bin zho sca rëb me, bza zdoo zho rnee zho:

—Ne gon me nagon ziaadnied ne guietxtil gane squi rnee me.

¹⁷ Biṅ me sca rnee zho, dzigo rëbchaa me lo zho:

—¿Pe nacne rnee to ziaadniede to quietxtil? ¿Riende to lëe zha rne naa? N dip nac zdoo to gane riende tow.

¹⁸ ¿Pa rquin lo to, pa rquiin diag to ne laaw zob?

¹⁹ ¿Pe rsoladzde to zeene gaayaque quietxtil ni bgaaw bguian naa gaay mil miech? ¿Bla chicuid biodzë miñe biaan hor co?

Pquiab zho rëb zho:

—Tsiipchopa.

²⁰ Dzigo rëbcha me:

—Zeene waa gadzaque quietxtil co, ni bguian naa tap mil miech, ¿bla chicuida biaan?

—Gadz chicuida —rëb zho.

²¹ Dzigo rëb me lo zho:

—¿Pe niicle nana riendaque to pe rne naa?

Biac tib meñ ne rcow lo

²² Bdzin Jesús guiedz ne lë Betsaid, ga güeynie zho tib mgui ne rcow lo lo me, bnaab zho cxobnia me guic mgui gunguiac me mgui.

²³ Dzigo bzhen me nia mgui güeynie me mgui zaatne nacle ro guiedz co. Ga bdëb me zhinzuc me leñ bziaalo mgui, ni pquiaania me zhits guidlo mgui; blozh ga bnabdiidz me lo mgui dien pe ranle mgui palal.

²⁴ Zeene laa mgui bui, rëbcha mgui:

—Ranle naa niina nagon laa miech ziezë; per masaque ran naa zho zig rlu grë yag.

²⁵ Dzigo biire pquiaania me zhits lo mgui. Zeene laa mgui bui stib, ndiple rwi mgui laa lo mgui biacle. Grëse ncuaañe ran mgui, niicle zitraaw niini ran mguiw.

²⁶ Dzigo bzonëz Jesús mgui nëz lidz mgui, pso me diidz lo mgui tib nëz guey mgui, choot lo tsiezodiidzd mguiw lad guiedz.

Bnee Pedr cho nac Jesús

(Mt. 16:13-20; Lc. 9:18-21)

²⁷ Blozhse ga, laa Jesús briece ga grë xpëedscuel me laa zho zie nëz Cesarea de Filipo, zieted zho grë guiedz las ne ndxie nëz co. Laa zho no nëz, tibaque zeene bnabdiidz me rëb me lo zho:

—¿Cho dien ron to rnee miech nac naa?

²⁸ Pquiab zho, rëb zho:

—No zho rnee Juan Bautista, no zho rnee Líw, meñ ne biadteed xtiidz Dios padzeela; nogaa zho rnee no cho stib meñ ne ziadteed xtiidz Dios.

²⁹ Dzigo rëb me lo zho:

—¿To waa, cho rzac to nac naa?

Pquiab Pedr, rëb Pedr lo me:

—¡Luu nac Meñ ne zëëble diidz ga cxeel Dios guiaad lo guidzliu!

³⁰ Dzigo pso me diidz lo zho choot lo zho gneed zhow.

Bzeet Jesús zha guñ miech me

(Mt. 16:21-28; Lc. 9:22-27)

³¹ Bded ga, psilo Jesús bzeet me lo grë xpëedscuel me zha csacsi miech me. Rëb me nroob grë ncuaañe cteed zho me; grë zha non lo menguiadz, grë pxoz nroob, grë zha ne rseed miech ley, ible stsidil zho me, ni haxta zut zho me; per zeene gac tson ngbidz gut me laa me grieeban.

³² Grëse miñe ted me, laaw nozodiidz me lo zho.

Gon Pedr sca rnee me, dzigo bredz Pedr me, blisqui Pedr lo me dien pe nacne rnee me laa me guet.

³³ Zeene gon me zha rzë xtiidz Pedr, zoque Pedr ga biecw me bui me lo grëraa xpëedscuel me, goctox me rëb me:

—iBiche lo naa nu mendox! Zienied guic luu minë rnabey Dios, sinque laa guic luu zienie minë racladz luu.

³⁴ Dzigo blunia me lo grë miech ne ndxie ga, yquiaadiag zho minë gnee me; rëb me:

—Zha ne racladz sëëb xnëz naa, none cueeladz zho zho, none lëb zho guiaadnal zho minë rnabey naa, niicle tel min co yquiaaqui csacsi miech zho. Nodne yquia zdoo zho xquielmban zho.

³⁵ Sac zha ne yquia zdoo xquielmban, lel znu nitlo zho; sangue zha ne sca cueeladz xquielmban porne rleynie zho naa, porne rleynie zho grë Diidz Ndzon rii, zha co ygaa tib guielmban ne mazdraa ndzon.

³⁶ Nana, tel zha ne gunlo grëse ncuaane no lo guidzliu rii. ¿Pa yquiin grë ncuaan co lo zho, tel lëëw yquiaaqui laa zho guey gabil?

³⁷ ¿Niacxe zrieelo gdziib zho dimi co laa zho len gabil?

³⁸ Naa ne nac naa Men ne pxeel Dios zial naa lo guidzliu, zha ne ctoladz guiab zho lo grë miech ngoopdol rii laa zho no xnëz naa, o ctoladzniegaa zho xtidz naa, scaque naa stoladznie naa zho gal dze ne laa naa gual stib. Dze ne gualnie naa grë anjl, ni glu naa grë guielndzon ne rap Dios.

9

¹ Ni rëb me lo grë miech co:

—Gneli naa lo to ganle, nzian grë zha ne ndxie nu niina ib tedsod gardaque guet zho, bii zan zho ganle zeene laa Dios glu ne nli men rnabey nac me.

Bdzëëlo Jesús

(Mt. 17:1-13; Lc. 9:28-36)

² Goca xoop ngbidz, brieë Jesús gza me Pedr, Jacob ni Juan, güey zho bozquia zho tib guic gui glaa.

Bdziñ zho glaa guic gui co, tibaque zeene gon zho laa me bdzëëlo.

³ Masaque rquiabni xab me, nquitsbie rnaw; ni tib miech grieelod scataa mbe quii lar.

⁴ Gonlo zho zeene laa Lí ni Moisés (grop zha ne biadteed xtiidz Dios glo) bdzinaque, laa zho nozodiidznie me.

⁵ Dzigo rëbchaa Pedr lo me:

—Maestro, jne nligaa wena guiaan ne nu! Laa no gzaa tson yu yag xiid win nu tso to: tiba tso luu, tiba tso Moisés, stiba tso Lí.

⁶ Rdzieb Pedr gza Pedr schop zha co, lo dzeb co niicle riendaque Pedr pe rnee Pedr.

⁷ Tibaque znuse bdop tib xcow pquia ngali zaatne zo zho ga; dzigo bin zho zëëb tib tsi men co lo xcow co, rnee me:

—Lëë xpëed naa i gon, rleynie naa me. Golgon minë rnee me.

⁸ Lëëled biecw lo zho rwi zho, choot gondraa zho, Jesússe zo lo zho ga.

⁹ Blozhse ga, laa zho wbique ga. Laa zho ziezëëb dan noyet zho cho gui co, zeene rëb me lo zho:

—Minë gon to gon, choot lo gneede tow. Golcuëz haxta gal dze ne grieeban Men ne pxeel Dios.

¹⁰ Nacne choot lo bneed zhow, per psilo zho gza tson zho rnabdiidzlsa zho, zha mod grieeban tib zha ne gutle.

¹¹ Dzigo bnabdiidz zho lo me, rëb zho:

—¿Bay zha nacne rnee maistr ley, glo Lí no guiaad stib, dzigora a guiaad Men ne zëëble diidz ga cxeel Dios?

¹²⁻¹³ Pquiab me rëb me lo zho:

—Nliw, ible nacle diidz ne glo Lí guiadseed miech gon zho xtiidz Dios, per laa me biaadle; ni zigne bzeetse grē zha ne biadteed xtiidz Dios ted me, scase been miech me. Scaque Men ne cxeel Dios ga, rnee lo Xtiidz Dios nroob csasci miech me, ible gandzed zho me.

Biac tib niib ngop

(Mt. 17:14-21; Lc. 9:37-43)

¹⁴ Zeene bdzin Jesús zaatne biaan grēraa xpēēdiscuel me ga, gza me Pedr Jacob ni Juan; gon zho miech guizhiu ne ndxie lo zho; blalaa zha ne nac maistr ley zo lo zho ga, nodiidiidznie zho.

¹⁵ Grē miech co, zeene gon zho Jesús, rley zho, rias zho güeydzieelo zho me güeyquiaa bdiuzh zho me.

¹⁶ Dzigo bnabdiidz me rēb me:

—¿Pe nadien squitaa nodiidiidz to?

¹⁷ Lad grē miech co pquiab tib zho, rēb:

—Maestro, lo luu zialnie naa tib xpēēd naa gunguiac luu win; ib gacd gnee win sac noguitnie mendox win.

¹⁸ Tel pataa zo win, zeene laa ma rzēēb zdoos rron ma win liu; ga nix win rdzib mtsiin ro win, ni row lay win; nrooble noyo win lēbdrāa win sē win. Blansonie naa win nu, dzigo bnab naa lo xpēēdiscuel luu guncxoon zho mendox co, per brieelod zho.

¹⁹ Dzigo rēbchaa Jesús lo zho:

—¿Pe na squitaa miech nad nac to, ib rnalode to Dios! ¿Palal tiemp ne so naa gne naa lo to? ¿Ncuane cxeewdraa naa lo to squi nac to! ¿Goltēnie mēēdwin qui nu!

²⁰ Güey zho güeynie zho mēēdwin co lo me. Zigne gon mendox co me, psilo beencxidz ma win, znuse biab win liu, rtiibxto win ni rdzib mtsiin ro win.

²¹ Dzigo bnabdiidz me lo pxoz win, goc palal dze psilo sca rac win.

Rēbchaa pxoz win:

—Bii mēdyeen win psilo squi rac win.

²² Pe zhidaa vuelt zieron mendox qui win lo gui, zieron ma win lo nis ne, racladz ma gut ma win. Bzhiguiel telne zrieelo gunguiac luu xpēēd naa, ipquia zdoos naa, been tib guielnzaac beenguiac win!

²³ Rēbchaa Jesús lo me:

—¿Zha rnee luu “telne zrieelow”? ¿Zha ne dib zdoos rnalos Dios, grēse ncuane racladz zho, zaca!

²⁴ Lēēlēd pquiab pxoz mēēd co, rēb me:

—Rnalo naa Dios, per bzhiguiel been xyudar naa, ¡dib zdoos naa gnalo naa me!

²⁵ Zeene gon Jesús laa grē miech co rbigberaa, dzigo goctox me lo mendox ne noguitnie mēēd co, rēb me:

—Mendox, luu gon psan ngop mēēd rii, luu psan nguaat win. ¡Niinagazh psaan win, ib gbiiredraa luu ygaal luu win!

²⁶ Horco biire beencxidz ma mēēd co stib, masaque roptsiedan ma laa psaan win, nixtaque win ga, zootle gutle win. Nzian grē miech co, tibaque nan zho gutle win.

²⁷ Laa zeene bzhen Jesús nia win, blis me win ga, laa win bzoli.

²⁸ Zeene bdzin Jesús len yu ne rbēz me grē xpēēdiscuel me, bnabdiidz zho lo me rēb zho:

—¿Bay pe nacre brieelod no ndziunxoon no mendox co?

²⁹ Dzigo rēbchaa me lo zho:

—Grē mendox ne sca nac, rquin dib zdoos ne gnab ne lo Dios dzigo zrieelo guncxoon ne ma.

*Bzeet Jesús laa miech csacsi me**(Mt. 17:22-23; Lc. 9:43-45)*

³⁰⁻³¹ Bree Jesús ga grë xpëedsuel me, laa zho wbiere nêz xtan Galilé stib. Racladz me cho gacnañ pa lo no me; sac len dze co nzian grë ncuane noseed me zho. Haxta bzeet me zha csacsi miech me, rëb me:

—Naa ne nac naa Men ne pxeel Dios, ible ziaab naa ladznia miech, ni zut zho naa. Per zeene gac tson ngbidz gut naa, laa naa grieeban.

³² Per ib rienñ zho pe nacne sca rnee me, niicle gnabdiidz gaa zho rdzieb zho gnabdiidz zhow lo me.

*¿Cho nonraa?**(Mt. 18:1-5; Lc. 9:46-50)*

³³ Bdzin zho guiedz ne lë Capernaum; grëse zho laa zho ndxie len yu ne blëz zho, tibaque bnabdiidz Jesús lo zho, rëb me:

—Golnë dien, ¿pe scataa nodildiidz to zeene ziaad ne nêz?

³⁴ Ni tib zho ib pquiabd, sac zeene ziaad zho nêz quianeelsa zho dien cho nac zha ne nonraa.

³⁵ Dzigo bzob me, bredz me zho gza tsiipchop zho rëb me lo zho:

—Zha ne racladz gac zho zha non, none guiaanwin zho gac zho zig tib ngundziin lo samiech zho.

³⁶ Dzigo bzo me tib mëëdbgui win glowtaa lo zho; blozh ga bdeedz me win ni rëb me lo zho:

³⁷ —Zha ne ngab xnêz naa, ni gleynie zho tib mëëdwin zig mëëdwin rii, gun naa cuent naa ga rleynie zho; ni zha ne sca rleynie naa, ye le men ne pxeel naa ga rleynie zho.

³⁸ Blozh ga, rëbcha Juan lo me:

—Maestro, bdzion no gon bzeet tib zha co lë luu zeene benxoon zho mendox; nacne nli blisqui now lo zho, sac gon, led yed zho nacgrë ne.

³⁹ Dzigo pquiab me rëb me lo zho:

—¿Guñscade to! Sac gon zha ne sca rzeet lë naa zeene run zho milagr, niacxe lëëque zha glëë lo naa.

⁴⁰ Zha ne nacne ne, glëëd zho lo ne.

⁴¹ 'Golgacnañ sca ganle, grëse zha ne gdeed maase tib zhigaque nis guie zha ne ngab lo naa, ib tedsod stsire Dios mine been zho ga.

⁴² Sangue zha ne yguib gunctal zho xtoñ zho ne nac zho zig tib mëëdlas yeen; mazd lëëtaa mine ted zha co sobdoo tib quie molin zhobxtil yquiaw yan zho tsieron zho zho nisdoo.

*Choot gdeete diidz guiab lo dol**(Mt. 18:6-9; Lc. 17:1-2)*

⁴³⁻⁴⁴ 'Zha ne rien nia zho nac mine rquiaqui runctal zho xtoñ zho, mazd cchuggazh zho nia co zho. Peet nacd maase tibaque nia zho zob totsaque yгаа zho guielmban ndzon ne gdziñd dze lozh, lëdle zob gropa ni laa zho guey gabil, lo beldox ne gdziñd dze guuu.

⁴⁵⁻⁴⁶ Telne riengaa zho ni zho nac mine rquiaqui runctal zho xtoñ zho, mazd cchuggazh zho ni co zho. Peet nacd maase tibaque ni zho zob totsaque yгаа zho guielmban ndzon ne gdziñd dze lozh, lëdle zob gropa ni laa zho guey gabil, lo beldox ne gdziñd dze guuu.

⁴⁷ Tel tib logaa zho nac mine rquiaqui runctal zho xtoñ zho, mazd cueegazh zho bziaalo co zho. Peet nacd maase tibaque bziaalo zho zob totsaque yгаа zho guielmban ndzon co, lëdle zob grop bziaalo zho ni laa zho guey gabil.

⁴⁸ Zaatne nac gabil, ib gdziñd dze ne guuu lo bel co; grë mziog ne ndxie ga, gdziñd dze ne nitlo ma.

⁴⁹ Grëse zha ne gdziñ ga, masaque cuib gui lad zho zig rbib zed lad bëë.

⁵⁰ 'Zig nac zed, rquiindoxa zeene nzhiw, per zeene nzhida, ¿pa dien yquuina? Scaquegaa to nagon golgac zig zed ne nzhi, zeena yquuin to lo guidzliu rii; niowse golbannie samiech to, glëëlsade to.

10

Zha ne rsëbtsieel

(Mt. 19:1-12; Lc. 16:18)

¹ Brieë Jesús Capernaum güeyted me grë guiedz ne ndxie nëz xtan zha Judé, grë guiedz ne ndxie nëz dan ro guiubee Jordán. Miech guizhiu ne rcaalsa lo me, dzigo rsilo me rseed me zho zigne runtaque me.

² Tib vuelst bdziñ bla zha farisé gocladz zho niungüet zho me, par dien pe nxind me tib diidz; bnabdiidz zho rëb zho:

—Maestro, mgui ne racladz csëbtsieel, ¿pe gnë luu pe zrieelo csëbtsieel zho?

³ Pquiab me rëb me lo zho:

—¿Zha zho psan Moisés diidz lo to?

⁴ Pquiab zho rëb zho:

—Tel Moisésa, bdeed me diidz csëbtsieel zha ne racladz csëbtsieel, lëëraasi none yquia tib guits gdeed zho lo wnaa zaatne raquiet ne laa zho psaan wnaa.

⁵ Dzigo rëbchaa me lo zho:

—Ne sqwicxe waa miech nad nac to ib ronde to diidz, min co nacne biaan ley co.

⁶ Per ib nodne csëbtsieel miech; sac gon, zeene psan Dios grëtaa ncuaaane no, tib nëz miech bzaa me: tib mgui ni tib wnaa.

⁷⁻⁸ Gacxe waa, mgui ne rtsieelnia ib none greezhaa zho lo pxoz zho, lo xniala zho, par gbannie zho wnaa ne nac tsiel zho; laa zho gactipse grop zho. Nacdraa zho chop miech, sinque laa zho rac tbaque.

⁹ Dios nac men ne psan ycatsieel miech, cho dzigo nac miech par quiits zho mine rnabey me.

¹⁰ Laa zeene bdziñ me len yu ne rbëz zho, dzigo bnabdiidzaque xpëëdsuel me min co lo me stib.

¹¹ Dzigo rëbchaa me lo zho:

—Mgui ne rsëbtsieel ni rbannie zho stib wnaa, noguitnie zho wnaa ne gocpaa tsiel zho ga, ni dol ga run zho.

¹² Niicle wnaagaaw, wnaa ne rsëbtsieel ni rbannie zho stib mgui, lëëque dolaque ga run zho.

Beenlay Jesús mëëdlas

(Mt. 19:13-15; Lc. 18:15-17)

¹³ Tib vuelst nzian men ne bdziñ bdziñnie zho xpëëdlas zho lo Jesús, par cxobnia me guic win gunlay me win. Grë zha ne nac xpëëdsuel me, lel psilo zho ndox zho lo grë zha ne bdziñnie grë mëëdlas co.

¹⁴⁻¹⁵ Zeene gon me sca quiayun zho, wbiñladz guic me, dzigo rëb me lo zho:

—Ctsirede to grë mëëdlas yeen qui, golsaan guiaad win lo naa. Sac gon grë mëëdlas yeen, ni zha ne nac zigne nac win, zha co nac zha ne sëëb ygab lo Dios.

¹⁶ Blohse sca bnee me, dzigo psilo me bdeedz grë mëëdlas co, ni pxobnia me guic win beenlay me win.

Bzodiidznie tib zha ricw Jesús

(Mt. 19:16-30; Lc. 18:18-30)

¹⁷ Laa Jesús nole nëz tsie me stib guiedz, zeene rias tib niib nguieg bdziñ pquiitsgzhib lo me, rëb niib lo me:

—Nan naa luu nac tib men ne noseed miech, ni tib men wen nac luu; ¿bnë dien pe nac mine gun naa zeena yгаа naa guielmban ndzon ne gdzindraa dze lozh?

¹⁸ Rëbchaа Jesús lo niib:

—Rnee luu lëe tib men wen nac naa. ¡Nligaaw, Diosse nac men wen!

¹⁹ Nanle luu ganle zha nac Xley Dios, rneew:

Gute luu samiech luu,
telne nole tsieel luu, tsonied luu zha ne led tsieeld luu,
cuand luu samiech luu,
yquiadiidzguizhd luu samiech luu,
yquidieed luu samiech luu,
gon pxoz luu, gon xniaa luu; bin mine rnabey me luu.

²⁰ Dzigo pquiab niib rëb niib lo me:

—Maestro, grësew zigne bzeetse luuw i, ni tiba gard quits naa wlal ne nac naa zha nguieg.

²¹ Dze rwi Jesús lo niib, rleynie me niib.

—Stibaque mine rquiin gun luu —rëb me—, güey, güeyto grëse ncuaañe quianie luu, dzigo bdiiz dimi co lo grë zha mban ne guiend pe yquiin; sca nroobraa guielnzaac ne yгаа luu gbaa. Lozh ga, bleeladz xquielmban luu dënal zhits naa.

²² Zeene bin niib co sca rëb Jesús, biab guielnë niib, mbanse rac niib laa niib zey; sac ne nligaa nroob ncuaañe quianie niib.

²³ Dze rwi me gon me laa zha nguieg co zey, dzigo rëb me lo xpëedscuel me:

—¡Grë zha ne squi rapchen, rzacxuu zho par sëeb zho xnëz Dios gnabey me zho!

²⁴ Zeene bin zho sca rëb me, rzee zdoo zho. Dzigo biire me bnee me rëb me lo zho:

—Xin, ¡ne nligaa tib miech ne ndziib rap chen, rzacxuu zho sëeb zho xnëz Dios gnabey Dios zho!

²⁵ Mazd znuse rded tib camell guieer guzh, lëdle sëeb tib zha ricw xnëz Dios.

²⁶ Zeene bin zho sca rëb me, mazdraa bzee zdoo zho, rnabdiidzlsa zho rnee zho:

—Bay, ¿chose dzigo nac zha ne zrieelo sëeb xnëz Dios?

²⁷ Dze rwi me lo zho, dzigo rëbchaа me:

—Par miech zootle tsod zha ne grieelo sëeb xnëz me. Sangue me, nan me no zho; sac tsod ncuaañe grieelod gun me.

²⁸ Dzigo rëb Pedr lo me:

—Tel no, grëse ncuaañe rdziaap no laa no psana, laa no ziaadnal zhits luu.

²⁹ Pquiab me rëb me:

—Grëse zha ne psan lidz, psan zho bets zho, bzian zho, xniaa zho, pxoz zho, xpëed zho, liun zho, porne rliladz zho naa ni rliladz zho Xtiidz Ndzon Dios;

³⁰ nli nroob guielnë gan zho, per gneli naa lo to ganle: grëse ncuaañe sca psan zho ga, lo guielmban riiquee laa zho gbiire gana stib tib gayoogaw tib tiba; ni ib tedsod zгаа zho tib guielmban ndzon ne gdzindraa dze lozh.

³¹ 'Nli zig nac niina, no zha ne rzac zha non nac zho, per zeene gal dze co peet gacnond zho; laa zha ne rzac zho peet nond, gal dze co lalga gac zho grë zho.

Biire bzeet Jesús laa miech csacsi me

(Mt. 20:17-28; Lc. 18:31-34)

³² Brieе Jesús ga laa me zie Jerusalén. Nzian grë zha ne zienal zhits me, nerse me lo zho laa zho zie. Grë zha ne nac xpëedscuel mew, rzee zdoo zho; laa grëraа miech co per nli rdzieb zho. Dzigo bredz me gza tsiipchop zha ne

nac xpëëdscuel me ga, psilo me bzeet me grëse tel zha ziaadyob ted me, rëb me lo zho:

³³ —Bii zan to ganle, naa ne nac naa Men ne pxeel Dios, niina ne laa ne gdziñ Jerusalén ible zielo zho naa ladznia grë zha ne nac pxoz nroob ni grë zha ne rseed miech ley. Grë zha co gnab guet naa, ni san zho naa ladznia grë zha ne nacdraa zha Israel.

³⁴ Xidznie zho naa, stsuc zho lo naa, zguin zho naa, ni haxta zut zho naa; per dze ne gac tson ngbidz gut naa laa naa grieegan.

³⁵ Dzigo wbig gax Jacob grop Juan (xingan Zebedé) lo me, rëb zho:

—Maestro, laa no gnab tib favor lo luu, per racladz no siguiel luu gun luuw.

³⁶ Dzigo rëb me:

—¿Pe favor ne racladz to gun naa lo to?

³⁷ Rëbchaa zho:

—Laa no racladz, siguiel luu zioob no cue luu gal dze ne laa luu nac rey rnabey luu, tib no nëz derech stib no nëz revés.

³⁸ Pquiab Jesús, rëb me lo zho:

—¿Ni to gon riend pe rnab to! ¿Pe zléb to gan to grë guielnë ne gan naa, pe zléb to ted to grë mine teed naa?

³⁹ Rëbchaa zho:

—¿Zléëb no!

Dzigo rëbchaa me lo zho:

—Ni zan to guielnë ne gan naa, ni zded to mine teed naa;

⁴⁰ per ne gnedz naa diidz sob to cue naa nëz derech o nëz revésgaa, led naad raguial min co; laa lugar co biaanle par zha ne nole diidz ygaaw.

⁴¹ Grëraa zha ne nac xpëëdscuel me, zha ne nacgza Jacob ga grop Juan, zeene bin zho zha rzë xtiidz Jacob grop Juan blëë zho lo zho.

⁴² Dzigo bredz Jesús zho grëse zho, rëb me lo zho:

—Rañ to ganle zha ruñ grë zha ne rnabey grë guiedz ne ndxie lo guidzliu, ni grë zha ne nac zha non, masaque rnabey zho samiech zho zigne racladztaa zho.

⁴³ Sangue to gon, gunscade to. Lo gza to, zha ne racladz gac zho zha non lo to, laa ne glu zho zha non zho, none glo zho guiaanwin gac zho zig tib ngundziin lo to.

⁴⁴ Scaquegaa, zha ne racladz gnabey lo to, none glo cseed zho gun zho mine gnabey to zho.

⁴⁵ Golgan ganle, niicle naa ne nac naa Men ne pxeel Dios, ziald naa par gnabey naa miech, sinque laa naa zial par gac naa tib ngundziin lo zho, ni gded naa xquielmban naa zeena laa zho lo grëtaa ncuane ngadoo zho. Ni nanpaa naa miech guizhiu ne laa.

Biac tib men lë Bartimé

(Mt. 20:29-34; Lc. 18:35-43)

⁴⁶ Sca no grë miech guizhiu co nëz, laa zho bdziñ guiedz Jericó. Laa zeene laa grë miech taf co zieriee ro guiedz co, laa tib mgui ciegw lë Bartimé zob ga rtop gon (xingan tib men lë Timew).

⁴⁷ Zeene bin Bartimé ye Jesús (Nazaren) ziaad ga, psilo me nguiedz rbedz me, rnee me:

—¡Jesús, men xti rey David, pquia zdo naa!

⁴⁸ Nzian grë miech co ndox lo me nan zho guioog ro me, per dzigole mazdraa nguiedz roptsie me, rnee me:

—¡Jesús, pquia zdo naa!

⁴⁹ Dzigo p̄cuëëzni Jesús, bnabey Jesús güeytsedz zho me. Bdziñ zho lo me, rëb zho:

—¡Ligier guso i! Dë ganle laa me rbedz luu.

⁵⁰ Zeene bin mew, haxta squi bron me lar ne mbix me, guso me ga laa me bdziñ lo Jesús.

⁵¹ Dzigo rëbchaa Jesús lo me:

—Bnë nadien, çpe racladz luu gun naa?

Pquiab me rëb me:

—Maestro, racladz naa guiac lo naa.

⁵² Dzigo rëbchaa Jesús:

—¡Niinagazh laa lo luu gan! Laa luu biac, sacne dib zdoo luu bnalo luu naa. Ligier na bzë.

Horcogazha laa lo men co psilo bui, laa me zianał zhits Jesús.

11

Bdziñ Jesús Jerusalén

(Mt. 21:1-11, 18-19; Lc. 19:28-40; Jn. 12:12-19)

¹ Zhile gdziñ zho Jerusalén, laa zho zie gax zaatne riaan guiedz Betfagé ni guiedz Betain, nëz dan squi riaan Gui Oliv, zeene bredz Jesús chop xpëëdsuel me

² rëb me lo zho:

—Goltsie guiedz win ne ndxie danse lo ne i. Zigne sëëb to lad guiedz, laa tib burr quiadoo ga, ni tib miech gard sob lad ma; dzigo golxadz ma, goltënie ma nu.

³ Tel cho gnabdiidz pe nacne noxadz to ma, dzigo golguiab: men ne rnabey ne men co rquiin ma, na zigne lozh xtsiin ma guiaadsan no ma.

⁴ Laa zho zie, nligaaw laa zho güeydziel burr co quiadoo ma tib ro nëz, gax tib ro yu.

⁵ Blalaa zha ne zo ga, zeene gon zho laa zho noxadz ma, rëbchaa zho:

—çPe gun to burr qui dzigo na, ne noxadz to ma?

⁶ Dzigo pquiab zho zigne rëbse Jesús lo zho ga, nacne bdeed men co diidz laa zho zienie ma.

⁷ Bdziñnie zho ma lo Jesús lëëque lar ne rbix zho pxob zho lad ma, bzboga me ma.

⁸ Nzian grë miech co zigse zie Jesús, scase scase ner zho rta zho lar ne rbix zho rded me, nogaa zho rchoo nia grë pe yag rdziin zho zaatne rded me.

⁹ Grëse zho, niicle zha ne ner lo mew, niicle zha ne nał zhits mew, rley zho nguiedz roptsie zho, rnee zho:

—¡Zha ndzontaa men qui pxeel Dios lo ne!

¹⁰ ¡Zha wentaa ziaad me gac me zhirey ne! ¡Me gnabey zigne bnabey pxozgol ne rey David! ¡Zha ndzontaa Dios ne zob gbaa!

Sca nguiedz roptsie zho rleynie zho me, laa me bdziñ Jerusalén.

¹¹ Bdziñ me Jerusalén, güey me güeyso me len yadoo. Blozhse bui me dipse len yadoo, laa me brieëque ga laa me zie nëz Betain grë xpëëdsuel me, sac bdzele dzew.

¹² Biini liu, loxaque zieriee zho Betain laa me psilo rcaabedz.

¹³ Zitlaa ziaad me gon me tib zhan yag guigw, nxii nac low zëëb zhiblaga; dzigo zie me zieso me dien pe gdziel tib guigw low gow me. Bdziñ me zaatne zoba, ni tib guigw guieñd low loxaque zhiblagsew scataa zëëb, sac gardpaa gdziñ mëe ne rquia guigw.

¹⁴ Dzigo rëb me lo yag guigw co:

—¿Squitaa nagon guiaan luu! ¿Gdzindraa dze yquia nex lo luu gow miech! Grëse xpëëdsuel me, bin zho sca bnee me lo yag co.

Blee Jesús miech len yadoo

(Mt. 21:12-17, 20-22; Lc. 19:45-48; Jn. 2:13-22)

¹⁵ Bdzin zho Jerusalén, bzëëb me len yadoo. Psilo me blee me grëse miech ne quiaayun lguí ga, zigtaa zha ne no wtow, zigtaa zha ne no wziw. Grë zha ne no wto palom, grë zha ne notsëë dimi, ptiixche me xmezsh zho.

¹⁶ Blozh ga, pso me diidz choot nodraa sëëbnie grë ncuiaan co len yadoo,

¹⁷ rëb me lo zho:

—Led znu gon rnee lo Xtiiidz Dios: “Zaatne nac lidz naa nu, nu guiaad grëse miech ne ndxie lo guidzliu sodiidznie zho naa.” Laa to gon quiaayun to lugar rii zig tib zhibliee ngbaan.

¹⁸ Grë zha ne nac pxoz nroob ni grë zha ne rnabey lo maistr ley, bin zho sca rëb me, dzigo psilo zho rguib zho dien zha gdeeda diidz gut zho me. Per rdzieb zho lega gnaaz zho me, sac ndal miech ne rley rquiaadiag zhiwseed me.

¹⁹ Zeene laa liu pcow, laa me wbique Jerusalén stib grë xpëëdsuel me.

²⁰ Biini liu co, laa zho zieded zaatne zob yag guigw ne sca güeyguib me nex lo ga, gon zho laaw bidzle dib low.

²¹ Dzigo beencsoladz Pedr mew, rëb Pedr:

—Maestro, bui ganle laa yag guigw ne bdzibdee luu ga bidzle.

²² Pquiab me rëb me:

—Zha ne dib zdoon rnaló Dios,

²³ gneli naa lo to ganle: Niicle ncuane mazdraa ngan gnab zho lo me, zun mew; lëëraasi none dib zdoon zho gliladz zho zac mine rnee zho, ni palal gacchopd guic zho.

²⁴ Golgona sca ganle, grëse ncuane gnab to lo Dios, dib zdoon to golliladz ne zneedz mew, dzigo sca zac mine rnab to.

²⁵ Ni zeene gnab to lo Dios, golsoladz dien pe no cho rlëënie to, dzigo golgun zho perdon; zeena scagaa, Pxoz to men ne zob gbaa zun me to perdon tel pe nactaa xtol to.

²⁶ Sac telne gunde to samiech to perdon, dzigo niicle megaa, gund me to perdon.

Cho rnabey Jesús

(Mt. 21:23-27; Lc. 20:1-8)

²⁷ Blozh ga, laa zho bdzinaque Jerusalén stib. Lëëtaaque laa Jesús quiaawi dib len yadoo, zeene bdzin bla zha ne nac pxoz nroob, bla zha ne nac maistr ley ni zha ne nac men non lo menguedz,

²⁸ rëb zho lo me:

—¿Cho dien nac luu ne squitaa ziaadnabey luu len yadoo? ¿Cho rnabey luu?

²⁹ Pquiab me rëb me lo zho:

—Laa naa gun tib wnabdiidz lo to. Telne stsire to low, dzigo gni naa lo to ganle cho rnabey naa ne laa naa noyun grë ncuane noyun naa.

³⁰ Golné dien, ¿cho pxeel Juan biaad me pchoobnis me miech? ¿Pe Dios pxeel me, te miechsew ye?

³¹ Psilo zho rnabdiidzlsa zho, rnee zho:

—Telne dzieets ne Dios pxeel Juan, dzigo laa me gnë: “¿Pex nac dzigo waa bliladzde to mine bnee Juan?”

³² Tel na dzieetsga ne: “Miechse pxeel Juan, greeequiadaque ne.”

Rdzieb zho niab zho miech pxeel Juan, sac grëse menguedz nan ne nli Dios pxeel Juan biadteed Juan xtiidz Dios lo miech.

³³ Dzigo mazd mine been zho, rëb zho:

—Ndiond no dien cho pxeel Juan.

Dzigo rëbcha me lo zho:

—Niicle naagaa nagon, grieelod gni naa lo to cho rnabey naa quiayun naa grë ncuuan rii.

12

Xcuent zha ne pquianap liu

(Mt. 21:33-46; Lc. 20:9-19)

¹ Dzigo psilo Jesús bzodiidz me tib cuent, rëb me:

—Tib mgui name, nroob lbë uv beenbni me lo liun me. Psilo me ptse me igose liu co, bzaa me zaatne gzhii grë uv co, ni bzaa me tib yu glaa zaatne sob zha ne yquiaanapa. Blozh ga, blediin me liu co lo bla zha ne ran liu, dzigo laa me briege ga, laa me zey zit.

² Zeene gol mëe ne ral uv, pxeel me tib xmoz me lo zha ne quianap liu co, parne gdeed zho uv ne rieguat me ycaa me.

³ Per lel bnaaz zho moz co, bdiin zho zho; blozh ga, scase bzonëz zho zho.

⁴ Dzigo biire men ne nacchen liu co pxeel me stib moz, scasaque been zho: gontseeb zho lo moz co, pquiaago zho zho, bdiin zho zho, blë zho guic zho.

⁵ Biireque me pxeel me stib zho, zha cole beet zho. Ni bii pxeel me nzianraa zho, no zho psiwee zho, nogaa zho beet zho.

⁶ Tibaque zeene loxaque xinganse me riaan. Rleyniedox me xpëed me, per laa me pxeel me, bza guic me rëb me: “Ganse zho xpëed naaw, zon zho mine gnee me.”

⁷ Zeene gon zho laa xpëed me bdiin, rëbcha zho: “jLëë zha qui nagon guiaan nie liu rii! jGolgotsaa dziuut ne zho zeene guiaana lo ne!”

⁸ Dzigo bnaaz zho men co, beet zho me, güeyga zho güeyron zho me tib lad lo liu co.

⁹ Sca nagon —rëb Jesús—, been zha ne quianap liu co. Golnëse nadien, ¿pe nac mine gun bizhuan liu co? Ib tedsod zeene laa me guiaad, znitlo me zha co; zhaale lo zha ne csan me liun me.

¹⁰ Golsoladz ganle znu rnee lo Xtiidz Dios:

Quie ne psëeb zha ne nozaa yu, ni nand zho lëepaa quie co nac mine rnazdziits yu.

¹¹ jNcuane gzee zdoo new! Sac Dios nbabey sca goca.

¹² Zeene gon zho sca bnee me, gocladz zho naazgazh zho me ga; sac bien zho mine run zho ga bzeet me. Per bnaazd zho me, sac rdzieb zho grë miech guizhiu ne ndxie ga, nacne zeyga zho.

Pe nonguiel quizh miech contribucion

(Mt. 22:15-22; Lc. 20:20-26)

¹³ Zhisaque goca, laa zho pxeelaque zla zha farisé, ni zla zha ne nacie Herod, zie zho ziegunguet zho Jesús par dien zha cxin me tib diidz; zeena sca gdeeda diidz tsiezo zho me lo wxtis.

¹⁴ Bdiin zho lo me, rëb zho:

—Maestro, ndion no niapse diidzli rnee luu, led lega gun luu mine rnee tib miech, sac tibeyse nac miech lo luu, ni laa luu zienal cseed zho mine nac diidzli zeena sëeb zho xnëz Dios. Min co nagon, nacne racladz no gnë luu lo no dien, ¿pe nonguiela ga rdeed no dimi ne razh lo rey te nonguiela ye? ¿Pe dzidhraa no dimi co, te mazd dizhdraa now ye?

15 Bienga Jesús racladz zho guṅgüet zho me, dzigo rëbchaa me lo zho:

—¿Pe nacne racladz to guṅgüet to naa? Golguiid tib xpes to nu ganle.

16 Dzigo bdeed zho tib pes lo me. Blozh ga, rëbchaa me lo zho:

—Golnë lo naa dien, ¿cho nu quia lo pes rii? ¿Cho lë nu quia low?

Pquiab zho rëb zho:

—Lëë rey Roma i, lëë lë me i quia low.

17 Dzigo rëb me lo zho:

—Mīne nonguiel ycaa rey, goldeeda lo rey; scaquegaa mīne nonguiel ycaa Dios, lo Dios goldeeda.

Zeene goṅ zho sca ptsire me lo xtiidz zho, rdzieldraa zho zha guṅ zho.

¿Pe nli zrieeban miech?

(Mt. 22:23-33; Lc. 20:27-40)

18 Bdziṅaque zla zha saducé, rëb zho lo me:

19 —Maestro, znu pquiaa Moisés lo libr ley ne psan Moisés lo no: tel glo mgui guet lo wnaa ne nac tsiel mgui ni gopd wnaa mëéd, dzigo none betsaque zho tsielnia wnaa co stib, zeena gap wnaa mëéd ne guiaan xlugar xpëéd zha ne gut ga.

20 'Bio tib dii zha co znu bzhaac, gadz bets nac zho. Ptsielnia zha ne nac zha gol, zeene laa zho gut, biaan xpëéd zho.

21 Dzigo ptsielnia stib bets zho wnaa co, blozh ga gutaque zha co, pasë zho nsaṅ mëéd. Ptsielniaque me stib zho, goc zho tson, niicle zha co psandaque mëéd.

22 Sca sca haxta bza gza gadzse zho ptsielnia me, per ziese zho ni tib zho psan mëéd; tibaque zeene yeque me, laa me gut.

23 Mīne racladz no gacndion no, ¿chopaa dzigo gac tsiel wnaa co gal dze ne laa zho grieeban; sac gza gadzse zho ptsielnia me?

Sca bnabdiidz zho, sac nac zha saducé riladzd zho ne nli zdziṅ dze grieeban zha ne ret.

24 Dzigo pquiab Jesús rëb me lo zho:

—I nagon laa to rxin. Mīne naca riende to zha nac Xtiidz Dios, niicle riladzde to zrieele me guṅ me ncuaan ro ne gard gan miech.

25 Sac goṅ, zeene gal dze ne laa grë miech grieeban, niicle mguiw niicle wnaaw led yedraa hor co dien cho tsielnia zho; sac hor co laa zho gac zig nac grë anjl ne no gbaa.

26 Stiba, ible nli zrieeban mengut. ¿Pe gard ganle glab to lo guits ne pquiaa Moisés, zaatne ziaad zeene bin Moisés tsi Dios tib lo yag zarz nguia ne noyazbel? Rëb Dios lo Moisés: “Naa nac Dios ne riladz Abraham, naa nac Dios ne riladz Isaac, naa nac Dios ne riladz Jacob.”

27 Niicle ne gutle gza zha co hor co, per zeene sca bnee Dios, gase rlu ne mban zho no zho lo me. Sac tel Dios, nacd me xDios mengut sinque xDios zha mban nac me. Ise nagon rlu, peet riende to gane squi rnee to.

Xley Dios mīne mazdraa non

(Mt. 22:34-40)

28 Zeene sca nozodiidznie Jesús zha saducé co, goṅ tib maistr ley niapse diidzli ptsire me lo xtiidz zho. Dzigo wbig maistr ley co, bnabdiidz me lo Jesús, rëb me:

—Bzhiguiel bnë lo naa dien, lo grë xley Dios, ¿pa mīn nac mīne mazdraa non?

29 Pquiab Jesús rëb me:

—Min rii nac mine mazdraa non, znu rneew: “Grëse to men Israel, goiquiaadiaga ganle: men ne nac Dios ne riladz ne, tibaque me ni me nac men ne rnabey ne.

³⁰ Dib zdoo to, dib xalm to, dib guieibiini ne no guic to, dipse xfuers to golleynie me.” Lëë tiba nu,

³¹ Iaa stiba znu rnee: “Bleynie samiech luu zigne rleynie luu luu.” Tsodraa stib ley ne mazdraa non lo grop ley rii.

³² Dzigo rëbcha maistr ley co lo Jesús:

—Diidzli rnee luu maestro, tibaque Dios no.

³³ Ni none dib zdoo ne, dib guieibiini ne no guic ne, dipse xfuers ne gleynie ne me; ni gleynie ne samiech ne zigne rleynieque ne ne. Min co nac mine mazdraa non, lëdle gzëeg ne pe cos cogon ne lo me o dien peragaa gun ne.

³⁴ Zeene gon Jesús sca niini rzë xtiidz me, rëbcha Jesús lo me:

—Zhile runfalt sëëb luu xnëz Dios, gnabey me luu.

Blozh ga, grëse zha ne ndxie ga, ni stib zho biazhdraa zho pe nabdiidz zho lo me.

¿Cho xpëed nac Crist?

(Mt. 22:41-46; Lc. 20:41-44)

³⁵ Sca noseed Jesús miech len yadoo ga, zeene bnabdiidz me lo zho, rëb me: —¿Bay zha nacre rnee grë maistr ley, lo xti rey David ga grieequia Men ne nacle diidz ga cxeel Dios?

³⁶ Sac zeene bdeed Espiritu Sant guieibiini lo rey David, znu bnee David:

Bnee Dios lo men ne rnabey naa, rëb Dios lo me:

“Cue naa nëz derech, nu bzob,

nieeda lozh gnaz naa grëse zha ne rlëë lo luu, csañ naa zho ladznia luu.”

³⁷ Gase nagon telne nli zha xti David gac Men ne nole diidz cxeel Dios ga, ¿zha nac dzigo ne lëëque David rnee ne me rnabey David?

Grë miech guizhiu ne ndxie ga noquiaadiag zhiwseed me, per nli rley zho ron zho zha rnee me.

Zha run grë maistr ley

(Mt. 23:1-36; Lc. 11:37-54; 20:45-47)

³⁸ Laa me noseed grë miech co, zeene pso me diidz lo zho rëb me:

—Ible tsienalde to mine run maistr ley gon. Sac grë zha ne nac maistr ley, rdziladz zho racw zho lar nool haxta zhits ni zho rbiba, rdziladz zho ndooladz yquiaabdiuzh miech zho zeene gdzieel zho zho dib ro nëz.

³⁹ Zig nac len yadoow, zha nac zha ne rzob lo xcan zaatne rzob grë zha non, zeene tsiegaa zho tib lni lidz miech, lëëpaaze zha nac zha ne rzob groļ mezh zeene laa wagw ga.

⁴⁰ Ni rlozh ga, rio zho rla zho tel pe ncuane rapse grë wnaa viud; ni parne peet guiabd miech lo zho, xtse rzo zho rzadraa pe lay ne gool zho.

‘Sca gon nac zho, per ib tedsod zeene laa grë miech ngoopdol quizh xfalt, zha nac zha ne mazdraa nroob caxtigw yгаа.

Gon ne bdeed tib wnaa viud

(Lc. 21:1-4)

⁴¹ Blozh ga, güey Jesús güeysob me gax zaatne zhoob grë alcanci. Dzese rwi me ran me zha riesan miech gon len grë alcanci co; ndal grë zha ricw rdziñ, nroob dimi rsañ zho.

⁴² Tibaque zeene bdziñ tib wnaa viud, tib men prob nac me, ye me laa me psan chop gaay win len alcanci co.

⁴³ Dzigo bredz Jesús xpëedscuel me, rëb me lo zho:

—Gneli naa lo to ganle, mazdraa gon nroob non gon ne bdeed wnaa viud qui, lèdle gon ne bdeed grèraa zha qui.

⁴⁴ Sac zha, dimi ne riaanle lo zho i rgogon zho; sangue wnaa prob qui gon, centav yeen ne quianiese me miñe rnalopaa me gziuu pe gow me, per laa me bloogona.

13

¡Nsin go!so!

(Mt. 24:1-28; Lc. 17:22-24; 21:5-24)

¹ Laa Jesús zieriee len yadoo nroob co grè xpèèdscuel me, zeene rëb tib zho lo me:

—Maestro, ¡bui ganle zha niaataa yadoo rii! ¡zha rnataa grè quie ngol ne niaaw!

² Pquiab me rëb me lo zho:

—Nligaa lèe zha niaataaw. Per niicle squitaa gon ran tow niina, zdziñ dze ne nitlow dib nacesw. Ni stib quie qui guiaandraa zigne squi zho bxcuaaw i.

³ Brie me ga, laa me zie gza me zho. Bdziñ zho cho Gui Oliv, ga bzob zho grè zho. Nieenpaa ro yadoo co zaatne zob zho ga; dzigo wbig Pedr, Jacob, Juan ni Ndrés lo me, gza tap zho bnabdiidz lo me rëb zho:

⁴ —Bzhiguiel bnè lo no dien, ¿pa hor dzigo gac miñe bzeet luu ga? ¿zha nac señ ne tso zeene laaw csilo gac?

⁵ Dzigo psilo me bnee me lo zho, rëb me:

—Nsin go!so zeena choot yquidiede to.

⁶ Sac nzian zha ne greequia gnè zho zha nac Men ne zèèble diidz cxeel Dios; ni nzian miech ne yquidie zho.

⁷ Zeene gon to nèzrii nèzrec noyac dil, ib gdziebdde to; sac ible none gac grè miñ co, ni lèdsew ga.

⁸ Sac garaa csilo grè dildox, grè guiedz nroob laaw tilnie saguiedz nrooba; grè zha ne rnabey grè guiedz nroob, laa zho tilnie sazha rnabey zho. Nèzrii nèzrec csilo gni grè zhodox, nzian zaatne gan miech gbin. Ni lega loxaque miñe rsilosew ga, sac nroobraa guielnè ne gan miech lozh ga.

⁹ Zeene laa grè ncuaan rii rsilo noyac, ¡nsin go!so! Sac hor co laa miech tsiezo to lo zha ne rnabey yadoo, ni lèèque len yadoo ga quin zho to; ziezo zho to lo grè zha non, lo grè zha rnabey, loxaque ne no to xnèz naa. Ga nagon gdeeda diidz gnee to Xtidz naa lo grè zha co,

¹⁰ sac ib none brieets bliiaallew lo grèse miech zeene gal dze ne laa guidzliu nitlo.

¹¹ Zeene tsiezo zho to lo wxtis, tsode to zhgab dien pe guiab to lo wxtis; sac Espiritu Sant nac men ne gacniñ to, ni miñe csiaab me guic to miñ co gnee to.

¹² Len dze co, zio zha ne lèèque zha tsielo bets zho ladznia zha ne gut zho; zio zha ne lèèque zha tsielo xpèèd zho ladznia zha ne gut zho; scaquegaa mèèda, zio zha ne lèèque zha gut pxoz zho, lèèque zha gut xniaa zho.

¹³ Ible gandzed miech to, grèse zho glèè lo to sacne riladz to naa; per scagaa, grèse zha ne dziits so haxta lozh grè guielnè co, ible scaania Dios zho.

¹⁴ Zeene gan to laa ncuaane ziaad gnitlo zo zaatne rieguiald sow, zigne bzeet profet Daniel (zha ne glaba, none guien zho zha naca), hor co go!guib dien zha xoon to. Zha ne no grèraa guiedz ne ngab Judé, none tsie zho dan, ga tsietsolan zho.

¹⁵ Zha ne no glaa guic yu, none lèèlèd xoon zho, ib guiabd zho seèb zho len yu tsiebee zho ncuaane nacchen zho.

¹⁶ Zha ne zogaa dana, ib guṇd zho ne laa zho tsie ro lidz zho tsiexi zho xab zho.

¹⁷ ¡Prob grē meṇ wnaa ne lëëtaque leṇ dze co zoney xpëed, meṇ ne quianie-gaa mëdyeen ne bii radz!

¹⁸ Goṇab lo Dios gaṇde to guielṇē co leṇ mëē ne rac naṽ, sac ne nligaa guielṇē nrooba.

¹⁹ Wlal ne biaan guidzliu haxta lo nadze, gard gaṇ miech tib guielṇēdox sca, ni gdziṇdragaa dze ne gaṇ zhow stib.

²⁰ Teṽne csaan Dios nroob dze gac guielṇē co, ni stib miech rii guiaandraa; per na por grē zha ne bzooblo me sëeb xnēz me, gdeete me diidz gaca nroob dze.

²¹ Leṇ dze co, teṽ cho zha gnē lo to: “Goṽwi gaṇle, lëē meṇ rii nac Meṇ ne nole diidz ga cxeel Dios”, gnēgaa zho: “Goṽwi nec gaṇle, lëē me i”, gliladzde tow.

²² Sac ndal grē zha ne grieequia guiaadquidie miech, no zho gnē zha nac meṇ co, nogaa zho gnē zha ziadteed Xtiidz Dios lo miech; ni zuṇ zho grē milagr parne yquidie zho miech, parne yquidie zho haxta grē zha ne ngable lo Dios.

²³ ¡Nsin sca goṽso! Ib cxende to, beṇque laa naa nilew lo to.

Ziaad Jesús stib

(Mt. 24:29-35, 42, 44; Lc. 21:25-36)

²⁴ Zeene lozhse gaṇ miech grē guielṇēdox co, laa lo ngbidz ycow, gziinidraa mëē.

²⁵ Grē mel ne ndziib gbaa, laa ma gliaaṽ; grēraa ncuaaṇe no gbaa, masaque nēzrii nēzrec gaca.

²⁶ Horco bii zaṇ zho gaṇle, zeene laa Meṇ ne pxeel Dios ziad-zëeb glaa lo xcow con grē guielṇdzon con grē poder ne rap me.

²⁷ Lozh ga laa me gnabey grē xanjṽ me, tsie zho tsietop zho grēse zha ne ngab lo me, niicle zaatne mazdraa zit lo guidzliu, mazdragaa zit gbaaw.

²⁸ Goṽzoob cuidad zha nac yag guigw. Led nanṽ to gaṇle, zeene laa grē zhicwa racnieen, ni rsilo rdzib zhiblaga, gase rlu ne laa mëē nēeg ziaadgaxle.

²⁹ Scaquegaa nagon, zeene gaṇ to laa grē miṇe rne naa lo to nu rsilo noyac, dzigo nanṽ to lëē dze co ziaadyoble.

³⁰ Gneli naa lo to gaṇle, nzian miech ne mban niina bii zaṇ zho zeene laa grē ncuaaṇ co csilo gac; sac ible ncuaaṇe gaca.

³¹ Zdziṇ dze nitlo gbaa, nitlo guidzliu, sangue miṇe rne naa lo to nu, nitloda, ible laaw none gac.

³² Lëëraasi choot naṇd diēṇ pa dzew, diēṇ pa horgaaw, per ni grē anṽl ne no gbaa, per ni naa naṇda; loxaque Pxoze naa naṇa.

³³ Gacxe waa, nsin goṽso, goṇab lo Dios; sac goṇ naṇde to diēṇ pa hora.

³⁴ Nac cuent rii zig nac tib zha ne rriee zie tib guiedz zit. Zeene laa zho rriee, rsanse zho diidz diēṇ pe guṇ tib tib moz ne guiaaṇ ro lidz zho, ni rso zho diidz lo zha ne rquianap ro puert nsin so zho, ib gaguiesd zho.

³⁵ Scadaa to nagon nsin goṽso, sac zig bizhuan yu co scaquegaa naa naṇde to pa hor guaṽṽ naa, yase glanso naa tib bde dze, tib groṽ guielṇ, wxiṇgaa horne rcuedz gall, o ziaadyuṇmbegaa liu.

³⁶ Nsin goṽso, zeena iṇe zobna to zeene laa naa glanso.

³⁷ Miṇe rne naa lo to nu, laaw rne naa par grēse miech.

14

Bnediids zho dien zha gnaaz zho Jesús
(Mt. 26:1-5; Lc. 22:1-2; Jn. 11:45-53)

¹ Schop ngbidz runfalt csilo lni Pascw, lni ne row zho quietxtil ne riotsd ncobi; grë pxoz nroob ni grë maistr ley, laa zho noguib dien zha ngueetsse gnaaz zho Jesús gut zho me,

² rnee zho:

—Laa me no yгаа, per lëëraasi gnaazd ne me mer dze lni, sac miech guizhiu ne ndxie lo lni dze co; zrieequia nzian zha ne glisquiw.

Pchoob tib wnaa nceit nex guic Jesús
(Mt. 26:6-16; Lc. 22:3-6; Jn. 12:1-8)

³ Len dze co, laa Jesús no guiedz Betain. Lëëtaaue laa me no mezh lidz Simón ne blan guiedz lepr, zeene bdziñ tib wnaa bdzinnie tiblo nceit nex, nosew tib len ncuaañ win niaa niapse quie rbeñni, tiblo nceit niazha. Dzigo blë wnaa co ncuaañ win co, blozh ga pchoob me nceit co guic Jesús.

⁴ Blalaa zha ne zobgrë Jesús ga, zeene gon zho sca been wnaa co, blëë zho, rëb zho:

—¿Pa rieguiala squi pxin zhlë wnaa qui nceit qui?

⁵ Telne niaca mine ndow, nguizhpaaz zhow tson gayoo pes plat, nquiinpaaz dimi co ngaaza lo grë zha mban ne guiend pe yquiin.

Laa zho nolisquiw lo wnaa co,

⁶ dzigo rëbchaaz Jesús lo zho:

—Golsaan me. ¿Pe nacne rlisqui tow lo me? Led lega pxind mew, tib guielnzaac nroob i been me lo naa.

⁷ Telne nli rquia zdoo to zha ne guiend pe yquiin, zac ygad to lo zho stib dze, sac tibaque ran to zho; sangue naa dzdiz dze ne gbiche naa lo to, gandraa to naa.

⁸ Laa wnaa qui been mine brieelo lo me, laa me pchoob nceit nex rii guic naa zeena nzhixcuaale xcuerp naa gal dze ne laa naa ygueets.

⁹ Gneli naa lo to ganle, dipse lo guidzliu zaatne cseedtaa miech Xtiiid Dios, ible soladz zho wnaa rii, seet zho mine been me nu.

¹⁰ Lo gza tsiipchop zha ne nac xpëëdsuel Jesús ga, brieë zha ne lë Judas Iscariot güeyzodiidznie Judas grë zha ne nac pxoz nroob, rëb Judas laa Judas gun me ntregar.

¹¹ Zeene bin zhow, per nli rley zho ni rëb zho zdedd zho dimi lo Judas. Dzigo psilo Judas noguib Judas dien pa hor gdeeda diidz gun Judas me ntregar.

Dowxtseenie Jesús xpëëdsuel me
(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹² Mer dze ne rsilo lni Pascw, dze ne rowxtsee zho tib carner, ni rsilo zho row zho quietxtil ne rquiad ncobi lad, dze co bnabdiidz xpëëdsuel Jesús dien pa lo racladz me tsiegunlo zho ncuaañe gowxtseenie me zho wdze co.

¹³ Dzigo pxeel me chop zho Jerusalén, rëb me lo zho:

—Goltsie Jerusalén. Ga gan to tib mgui nzobyañ tib re nis, dzigo goltsienal zhits me.

¹⁴ Yu ne gan to sëëb me, golguiab lo bizhuan yu co: “Znu në maestro: ¿Pa len yu me gneedz luu gac zaatne gowxtseenie me xpëëdsuel me wdze rii?”

¹⁵ Dzigo ga glu me tib len yu nroob ne riaan glaa, nzhixcuaale lena, grële ncuaañe yquiin no ga; dzigo ga golgunlo zhixtsee ne.

¹⁶ Laa grop zha co brieë, laa zho zie. Bdzin zho lad guiedz Jerusalén, nligaa laa zho bdziel yu co zigne rëbse me lo zho ga, dzigo psilo zho beenlo zho xtsee co.

17 Bdze dzew, laa me bdziñ leñ yu co grë xpëedsçuel me.

18 Laa me no mezh noyownie me zho, zeene rëb me lo zho:

—Laa naa gni lo to ganle, lëëque tib zha ne goñ noyownie naa nu tsielo naa ladznia zha ne gut naa.

19 Zeene bin zho sca rëb me, mban rac zho, dzigo psilo zho tibga tibga zho rnabdiidz lo me, rnee zho:

—¿Pe naaw?

20 Pquiab me rëb me lo zho:

—Ladaque to no zho, zha ne nosëëb xcuun leñ xquien naa, lëë zho ga.

21 Naa ne nac naa Meñ ne pxeel Dios, niina laa miech gut naa zigne raquietsew lo Xtiidz Dios; per, ¡probsaxe zha ne tsielo naa ladznia zho! ¡Mazd wen nie zho, ib niacd zho miech lo guidzliu!

22 Laa zho noyow zeene bzhen Jesús tib guietxtil, bdeed me xquizh lo Dios, blozh ga beengrol mew dzigo bdiiz mew lo zho, ni rëb me:

—Golquiina, lëë xcuerp naa i gon.

23 Ni bzhen me tib cop nroob vin, bdeed me xquizh lo Dios, blozhse bdeed me xquizh, dzigo bdeed me cop co lo zho, grëse zho go vin co.

24 Ni rëb me lo zho:

—Lëë xchen naa i, mine gzhiee par grëse miech ne sëëb xnëz Dios, sac lëë stib mod cub nu psan Dios parne sëëb miech xnëz me.

25 Lëë lultm vuelt nu guie naa vin rii, sac zhaale stib vin cub ne guie naa zeene laa naa gdziñ zaatne rnabey Pxoza naa.

Dzigo psilo me biil me bla salm gza me zho.

Bzeet Jesús zha gun Pedr

(Mt. 26:30-35; Lc. 22:31-34; Jn. 13:36-38)

26 Blozhse biilnie me Dios grë me zho, dzigo laa me brienie zho ga zienie me zho nëz Gui Oliv.

27 —Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nëzrii nëzrec gliaal mëcwxii.”

28 Sca gun zho naa, per zeene laa naa grieeban glole naa ga Galilé, ga cuëz naa to.

29 Dzigo rëbçhaa Pedr lo me:

—Niicle telne saan grë zha qui luu, sañgue naa gon csaand naa luu.

30 Pquiab me rëb me lo Pedr:

—Gneli naa lo luu ganle, guieel riigazh, gardle grop gall tsonle vuelt rëb luu runbeyd luu naa.

31 Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per gunscad naa. ¿Pe nacne guiep naa runbeyd naa luu?

Scaque rnee grëraa zho.

Bzodiidznie Jesús Pxoza me Getsemaní

(Mt. 26:36-46; Lc. 22:39-46)

32 Bdziñ Jesús zaatne lë Getsemaní gza me zho, dzigo rëbçhaa me lo zho:

—Nuse nagon goľsob, laa naa ga gazodiidznie naa Pxoza naa.

33 Horco psilo mban rac zdoo me, riabguieľnë me, dzigo bredz me Pedr, Jacob ni Juan, bzënie me zho palal

34 dzigo rëbçhaa me lo zho:

—Mban rac zdoo naa, zootle zig zet naa lo guieľnë rii. Nuse nagon goľguiaan, per goľsobna.

³⁵ Bzë me spalal, dzigo pquitsgzhìb me haxta bdziṅ lo me lo liu; psilo me bñab me lo Dios ne telne zrieeelow mazd tete me grë guielnë ne no gaṅ me,

³⁶ rëbchaa me:

—¡Papá, par luu grëse cos zrieeelo gaṅ luuw! ¡Bzhiguiel psilaa naa lo guielnë rii! Per telne grieeeloda, miṅe gnëtaa luu, sca gaca.

³⁷ Zeene biire me bdziṅ me zaatne biaan gza tsoṅ zha co, gaṅ me gzase zho nixguies; dzigo rëbchaa me lo Pedr:

—Simón, ¿nixguies luu lëë? ¿Pe ni palal blëëbd luu nzobna luu?

³⁸ Goṡsobna, goṡnab lo Dios zeena yquild mendox to. Niicle ne squi lëbdraa xcuerp to sobna to, per goṡnab lo Dios, sac gaṅ miṅ co nac miṅe racladz zhiespíritu to.

³⁹ Dzigo güey güey me stib, güeyzodiidznie me Dios; scaque miṅe bñab me glo miṅcoque bñab me stib.

⁴⁰ Zeene bdziṅ me lo zho, gaṅ me laa zho bii nixguies. Ni rdziel zho pe guiab zho lo me.

⁴¹ Laa zeene goc tsoṅ vüelt biire me güeynab me lo Dios, rëbchaa me lo zho: —Lëew nagaṅ, zacle na gagueies to, zacle gdziiladz to. Naa ne nac naa Meṅ ne pxeel Dios, naataa laa hor bdziṅ zeene laa grë miech ntseeb rii guiadnaaz naa.

⁴² Goṡtsieso, zeena zio ne; sac gaṅ laa zha ne glu naa lo zho ziaadle nu.

Bnaaz zho Jesús

(Mt. 26:47-56; Lc. 22:47-53; Jn. 18:2-11)

⁴³ Laa Jesús bii quianeeque, zeene laa Judas (tib zha ne nac xpëëdsuel me) bdziṅ, bdziṅnie Judas tib dzoön zha ne pxeel grë pxoz ne rnabey, grë maistr ley ni grë zha non lo meṅguiedz Israel. No zho nzheṅ spad, nogaa zho nzheṅ yag.

⁴⁴ Biaanniele Judas zho diidz zha glu Judas cho nac Jesús, rëb Judas lo zho: —Nanle to gaṅ, zha ne gow naa bzhid cuas, lëë me ga; ligier goṡso goṡxeṅ me, ib csaande to xoon me.

⁴⁵ Nligaaw, zigne bdziṅ Judas bredz Judas Jesús; blozh ga dow Judas bzhid cuas me.

⁴⁶ Horco wbig grë zha ne zienal zhits Judas ga bzheṅ zho me.

⁴⁷ Lo grë zha ne nacgza Jesús ga, hor co biasaque tib zho bdoḅ zho zhispad zho pchug zho tib diag xmoz meṅ ne nac pxoz nroob.

⁴⁸ Dzigo rëbchaa Jesús lo grë miech co:

—¿Niacxe naa cho ngbaan, zha nac ne squitaa nzheṅ to spad, nzheṅ to yag ziadnaaz to naa?

⁴⁹ Blactaa dze name gaṅ to noseed naa miech leṅ yadoo, ¿pe nacne bnaazde to naa ga? Per ible laa grë ncuuan rii gaṅ noyac zeena gac grë miṅe raquiet lo Xtiidz Dios.

⁵⁰ Grë zha ne nac xpëëdsuel me ga, grëse zho bzhoön, tipse me psan zho ga.

⁵¹ Tibaque mgui nguieg bii güeynal zhits me, tib lëse lar nquits mbix mgui; dzigo bnaaz zho mgui gocladz zho ye mgui nienie zho;

⁵² per znuse briece mgui leṅ lar co, bzhoön mgui coletse mgui.

Güeynie zho Jesús lo zhiwxtis zha Israel

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Ga brieenie zho Jesús bdziṅnie zho me lidz meṅ ne nac pxoz nroob. Grë pxoz rnabey, grë zha ne rnabey lo maistr ley ni grë zha non lo meṅguiedz, laa zho pcaalsa ga.

54 Ye Pedr, maase zit zit naļ Pedr laa Pedr bdziņ xley meņ co. Bdziņ Pedr, ģiēysobga Pedr lo grē zha ne ndxienap, lēētaque laa zho quiadzēē lo gui.

55 Grē pxoz co, grē zha ne nac zhiwxtis zha Israel, laa zho ndxie nēz len yu co, quiaguib zho dien pe yquiaaqui zho gnab zho guet Jesūs, quiaguib zho dien pe doļ ne ycaadz zho me; pe rdzield zho dien pew.

56 Nzian zha ne pquidie rēb zho znu znu nac ncuanea noyūn me, per rrieequiad xtiidz zho; sac zhaase zhaase rnee zho.

57 Tibaque zeene guso blalaa zho, bnexuu zho rēb zho:

58 —Bdzion no goņ rēb me laa me ctixche yadoo, lozh ga tsonaque ngbidz gzaalo me stiba; per led miechdraa nzaaw.

59 Niicle scaw, rzēdaque xtiidz zho tipse.

60 Dzigo hor co bzoli meņ ne nac pxoz nroob, bzo me glowtaa lo grē miech co, bnabdiidz me lo Jesūs rēb me:

—ǰPe nacne rquiabd luu? ǰDiidzli dzigo lēē nac grē miņe rnee zho i!

61 Dzese zo Jesūs ib rquiabd me. Biireque meņ co bnabdiidz me stib rēb me:

—ǰNligaa cho nac luu? Bnē tel nli Xpēēd Dios nac luu, Meņ ne nacle diidz ga cxeel me lo guidzliu.

62 Dzigo pquiab Jesūs rēb me:

—Nliw, naa nac meņ co. Naa ne nac naa Meņ ne pxeel Dios, bii zan to ganle zeene laa naa zoob cue Dios nēz derech, ni zeene laa naa guieet gbaa zialzēēb naa lo xcow.

63 Horco ptsiez pxoz nroob co xab me, sac blēē me bin me sca rēb Jesūs.

—ǰPe mazdraa textigw ne racladz ne? —rēb me—,

64 laa to binle ganle zha rzētaa xtiidz me noguitnie me Dios. ǰPe gnē to na zha gac me?

Grēse zho pquiab rēb zho, ib rieguiāla guet me.

65 Dzigo hor co blalaa zho laa zho psilo notsuc lo me. Pxidoo zho lo me ni rdeed puñet zho me, lozh ga rnee zho:

—Bnē dien, ǰcho ga bdiņ luu?

Ye grē zha ne quianap ga, rgap zho lo me.

Rēb Pedr runbeyd Pedr Jesūs

(Mt. 26:69-75; Lc. 22:56-62; Jn. 18:15-18, 25-29)

66 Laa Pedr bii zoque ley. Ga zo Pedr, zeene laa tib wnaa ne nac zhicriad meņ rnabey co bdziņ;

67 goņ me laa Pedr zob gax lo gui nodzēē Pedr. Dze rwi me lo Pedr, tibaque zeene rēb me:

—ǰYe luu lēē rzēnie Jesūs, meņ Nazaret ne bdziņnie zho i?

68 Per bneelid Pedr:

—Dieeņ pe rooļ luu —rēb Pedr—. Runbeyd naa meņ co.

Brieega Pedr zie Pedr nēz ro zawan, lēētaque hor co pcuedz tib gall.

69 Dzeque rwi wnaa co lo Pedr, dzigo rēbchaa me lo grē zha ne ndxie ga:

—ǰLēēw, zha ne rzēnie me nac mgui qui!

70 Biire Pedr rēb Pedr runbeyd Pedr me. Wdzeepaa goca, biire zha ne ndxie ga rēb zho lo Pedr:

—Ne nligaa, ye luu rzēnie meņ co. ǰZha Galilé name nac luu!

71 Dzigo psilo Pedr rzeet Pedr Dios rnee Pedr runbeyd Pedr Jesūs, haxta rnee Pedr:

—ǰDios zobwi ganle, telne rned naa diidzli, maase cuibdee naa!

⁷² Lëëtaaque hor co laa gall pcuedz stib. Dzigoraa psoladz Pedr xtiidz Jesús zeeṅ rëb me lo Pedr: “Gardle grop gall, tsonle vuelt rëb luu runbeyd luu naa.” Dzigo mbanse rac Pedr, psilo Pedr biin Pedr guieṅne co.

15

Güeynie zho Jesús lo Pilat

(Mt. 27:1-2, 11-14; Lc. 23:1-5; Jn. 18:28-38)

¹ Ziadyiinile liuw, scase bii nchool rñaw, wbiire pcaalsa grë pxoz non grë zho zha ne rnabey lo maistr ley, grë zha non lo menquiedz ni grë zha ne nac zhiwxtis zho. Blozhse bnediidz zho, laa zho pxidoo Jesús güeyšan zho me lo Pilat men ne nac gobernador.

² Bdzin me lo Pilat, bnabdiidz Pilat rëb Pilat lo me:

—¿Pe nli na luu nac zhirey zha Israel?

Pquiab me rëb me:

—Nliw.

³ Tibaque quia grë zha ne nac pxoz non, rzadraa grë ncuaaṅe rcaadz zho me.

⁴ Nacne wbiire Pilat bnabdiidz Pilat lo me, rëb Pilat:

—¿Pe nacne rquiabd luu? Bui ganle zha nactaa grë ncuaaṅe rcaadzdoṅ zho luu.

⁵ Bzee zdoo Pilat goṅ Pilat ible pquiabd me.

Bnab zho guet Jesús

(Mt. 27:15-31; Lc. 23:13-25; Jn. 18:38-19:16)

⁶ Gzobse lni Pascw rsilaa Pilat tib zha ne no ladzguiib, teṅ cho zha ne gnabtaa menquiedz laa.

⁷ Leṅ dze co no tib mgui lë Barrabás ladzguiib, ni zla zha ntseeb ne nacgza me, laa zho no ga sac nzian zha ne beet zho zeeṅe goctseeb zho lo gobiern.

⁸ Nacne psilo grë miech co, rnab zho lo Pilat csilaa Pilat tib zha ne no ladzguiib zigne runtaque Pilat grëraa iz.

⁹ Dzigo bnabdiidz Pilat lo zho, rëb Pilat:

—¿Cho racladz to csilaa naa? ¿Pe silaa naa men ne rnee zho zhirey to nu?

¹⁰ Sca rëb Pilat lo zho, sac nanle me niapse por rlëë grë pxoz non co ran zho Jesús gane bnabey zho bgaa me güeyšan zho me ga.

¹¹ Per leṅ psilo grë miech co rnab zho csilaa Pilat Barrabás; ni lëëque grë pxoz co pquiil zho.

¹² Dzigo rëb Pilat lo zho:

—¿Zha dzigo racladz to gac men rnee zho zhirey to nu?

¹³ Pquiab be grë miech co, roptsie zho rnee zho:

—jBnabey yquia me lo cruz!

¹⁴ —¿Pe nac falt ne been me? —rëb Pilat—. ¿Pe nacne racladz to yquia me lo cruz?

Biire zho roptsie zho rnee zho:

—jBnabey yquia me lo cruz!

¹⁵ Goṅ Pilat zha rac zho ni racladzaque me guianzniu me lo zho, nacne mazd bzoob me xtiidz zho, bnabey me blaa Barrabás; laa Jesús, blozhse bnabey me bdiṅ zho Jesús laa me been Jesús ntregar lo grë menquuib ne tsiequiaa me lo cruz.

¹⁶ Biire grë menquuib co bzëëbnie zho Jesús nëz len yulow, ga pcaalsa grëraa menquuib ne nacgrë zho.

17 Psilo zho rguitnie zho me, bgacw zho me tib lar morad zig rna lar ne racw grë rey, ni bzieecw zho bla lë yag guiets bzoob zhow guic me, zig rzob coron guic grë rey.

18 Dzigo psilo zho nguiedz roptsie zho rnee zho:

— ¡Golwi ganle zha ractaa zhirey zha Israel!

19 Bzhen zho tib goobgui, rdeed zhow guic me, rtsuc zho lo me, rquiaalo zho rquuitsgzhib zho lo me zig rquuitsgzhib zho lo zha non.

Güeyquiaa zho Jesús lo cruz

(Mt. 27:32-44; Lc. 23:26-43; Jn. 19:17-27)

20 Blozhse sca bdziitnie zho me, laa zho blee lar morad ne nacw me ga, biire zho bgacw zho me mine nac xab me; dzigo laa zho brieenie me ga zienie zho me zaatne yquia me lo cruz.

21 Nëz zienie zho me, bdzieel zho tib mgui Ciren lë Simón (lëë pxoz Lejandr ga grop Ruf), znu ziaad me wbire me dan. Dzigo bnabey zho me bi me zhiczuz Jesús.

22 Zeene bdziinne zho Jesús zaatne lë Gólgota (nac diidz co zig nac ne rnee ne “Gui Beerguic Ngutoo”);

23 ga bdeed zho nziu notsa guizh rmed ne lë mirr, nan zho nie mew, per god mew.

24 Dzigo laa zho pquiaa me lo cruz.

Blozhse pquiaa zho me lo cruz, bzhen zho tib xab me pchug zhow, biaanñie zho tib lëgaw tib tib zho, laa stiba bio zho rif.

25 Zig hor wxeeeren ga pquiaa zho me lo cruz.

26 Glaa guic cruz ne pquiaa zho me ga, ga pquiaa zho bla lan diidz zaatne rnee pe nacne sca psaci zho me, rneew: “LËË MËN RII QUIA NU, PORNE NAC ME ZHIREY ZHA ISRAEL.”

27 Ye chop ngbaan pquiaagza zho me lo cruz, tibga zhiczuz zho bzo tib nëz cho zhiczuz me.

28 [Ga brieequia mine raquiet lo Xtiidz Dios, zaatne rnee: “Bloo zho me lad zha ntseeb.”]

29 Grë miech ne rded zaatne quia me lo cruz ga, runnguzee zho me, rzhidznie zho me, haxta rdzi guic zho rnee zho lo me:

— ¡Pe led rëb luu lëë, laa luu ntsil yadoo ni tsonaque ngbidz nzaalo luuw stib!

30 Nana zho, ¡pe gacd lëëque luu bla luu lo caxtigw qui, biet lo cruz qui!

31 Scasaque grë pxoz non ni grë maistr ley, rzhidznie zho me; rnee zho:

— Stib miech scataa beenguiaic me, stib miech scataa bla me, pe nac dzigo rrieelod me gla me.

32 ¡Telne nli me nac Men ne zëëble diidz ga cxeel Dios, telne nli me nac zhirey ne, niinagazh quiet me lo cruz; zeena gliladz ne me!

Ye zha ne quiaagza me lo cruz ga, rbidzgo zho lo me.

Gut Jesús

(Mt. 27:45-56; Lc. 23:44-49; Jn. 19:28-30)

33 Gol groł dzew, tibaque zeene goc tib ncow dipse lo guidzliu, haxta las tres biao biini stib.

34 Horco nguiedz zëëb tsi Jesús, rnee me:

— ¡Eloi, Eloi! ¿Lama sabactani?

(Diidz co nac zig nacne rnee ne: ¡Luuse name nac xDios naa! ¿Pe nacne psaan luu naa?)

35 Grë zha ne ndxie ga, zeene bin zho sca rbedz me, no zho nan Lí, men ne biadteed xtiidz Dios padzeela, men co rbedz me.

³⁶ Dzigo rias tib zho güeygad z tib lë zhiil lo nziu bla, bzoob zhow tib guic goobgui pquiaa zhow ro me.

—jGotsaa csaan —rnee zho—, nu dzian ne dien pe ziaad Lí guiaadlit Lí me lo cruz!

³⁷ Tibaque zeene pquiaa me stib redz nroob, znuse blozh me.

³⁸ Lëëtaaque laa me nolozh, zeene briez nzoli lar nroob ne quia len yadoo, groltaa goca.

³⁹ Gax lo me ga zo men ne rnabey lo grë men guib co, zeene gon men co zha gut me, rëbchaa me:

—jNe nligaa, Xpëed Dios nac men qui!

⁴⁰ Ye blalaa men wnaa güeyso ga, zit zo zho rwi zho; lad co no Marí Magdal, Salomé ni Marí ne nac xniaa Jacob niab grop José.

⁴¹ Nzianlaa nac zho, lëë grë wnaa co been xyudar me len dze ne güeyted me dib xtan zha Galilé; ni zlagaa zha ne güeynal zhits me zeene bdzin me Jerusalén.

Bgueets Jesús

(Mt. 27:57-61; Lc. 23:50-56; Jn. 19:38-42)

⁴²⁻⁴³ Lëëtaaque dze co nac vispr dze ne rdziiladz zho lo dziin. Zeene laa dze bdzepaa, dzigo güey José (men Arimaté) lo Pilat bnaab me diidzbe y tsiequeets me Jesús. Glo zoot me tsied me, per tibaque bloo me tib valor güey me; niicle ne tib zha non nac me lad zhiwxtis zha Israel, ye me quiambéz gdzin dze ne gnabey Dios.

⁴⁴ Bzee zdoo Pilat zeene bin me laa Jesús gutle. Bnabey me gocredz zha ne rnabey lo men guib ne quianap Jesús;

⁴⁵ haxta bdzinraa men co rëb nliw, dzigoraab bdeed me diidz tselit José Jesús lo cruz.

⁴⁶ Nacne güey José, güeyysi me tib lë lar nroob. Zeene blozh blit me Jesús lo cruz pchel me Jesús lar co, dzigo güeyxob me me tib len baa ne ndieen tib cho quie. Blozh ga, psodan me tib quie nroob psioog me ro baa co.

⁴⁷ Ga zo Marí Magdal ni Marí xniaa José, gon zho pa lo bgueets me.

16

BRIEBAN JESUS

(Mt. 28:1-10, 16-20; Lc. 24:1-53; Jn. 20:1-23)

¹ Bdze dze dze ne rdziiladz zho lo dziin, güey Marí Magdal, Salomé, ni Marí xniaa Jacob güeyysi zho grë nceit nex ne tsietëëb zho lad xcuerp Jesús.

² Laa zeene biini liu, dze ne rzobni zhmal, silgaw loxaque ziaadlan ngbidza laa gza wnaa co brieelaa zho zie ro baan Jesús.

³ Nëz no zho, rnabdiidzlsa zho dien zha gdiob quie nroob ne nioog ro baa, cho siguiel coba.

⁴ Ni zeene bdzin zho, gon zho laa quie co bdiooble.

⁵ Laa zho bzëëb len baa, zeene gon zho nëz derech laa tib mgui nguieg zob ga, nacw me tib lar nool, dib nquitsbiese rna lar co. Bdzieb zho gon zho me;

⁶ dzigo rëbchaa me lo zho:

—Gdziebde to. ¿Jesús lëë, men Nazaret ne pquiaa zho lo cruz, men co ziaadguib to? Guiendle me nu, jlaa me brieebanle! Golwi ganle nu nac zaatne pbox zho me.

⁷ Goltsie, golguiab lo Pedr ni lo grëraa xpëedscuel me tsie zho Galilé, ga tsiedzieel zho me zigne rëble me lo zho glo.

⁸ Rias gza wnaa co laa zho brieeg ga, masaque rzhidz zho rdzieb zho. Lo dzeb co ni par gnee zho gacd.

⁹ [Dze ne rzobni zhmal ga, sil co brieegan Jesús, ni Marí Magdal nac zha ne gloopaa gon me; lëë Marí co ga beenguiac me zeene benxoon me gadz menxox ne nosacsi Marí.

¹⁰ Dzigo güey Marí güeynie Marí diidz lo grë zha ne bzënie me ga. Lëëtaaque laa zho ndxie mban rac zho, roon zho no zho xquielnë me.

¹¹ Niicle bin zho rëb Marí laa me brieeganle, gonlo Marí me; per bliladz zhow.

¹² Bded ga, brieequia me lo schop xpëëdsuel me lëëtaaque no zho nëz zie zho dan.

¹³ Dzigo güey zho güeynie zho diidz lo grëraa zha ne nacgza zho; per niicle xtiidz grop zha co bliladz zho.

¹⁴ Laa stibtaa vult, lëëtaaque ndziib zho lo mezh no zho wagw gza tsiiptib zho, tibaque zeene laa me brieequia; dzigo goctox me lo zho sac gon me ib bliladz zho xtiidz me; ni gon me scataa nad zdoo zho, sac niicle güey zha ne gon me güeynie zho diidz ne nli brieegan me, ni bliladz zhow.

¹⁵ Ni rëb me lo zho:

—Goltsie dipse lo guidzliu, goltsieseed miech Xtiidz Ndzon Dios.

¹⁶ Grëse zha ne dib zdoo gliladza ni chobnis zho, scaania Dios zho; sangue zha ne gliladzda, laa zho bnitole ga.

¹⁷⁻¹⁸ Grë zha ne sca dib zdoo gliladz naa: znee zho stib diidz ne rneed zho. Niicle xen zho grë meel ntseeb, concuaangaa miech zho, ib peet gacd zho. Ni zeene cxobnia zho guic grë men rzacnë, zunguiac zho zho; grë menxox ne noguitnie miech, zeene gzeet zho lë naa zunxoon zho ma.

¹⁹ Blozhse sca bnee me lo zho, laa me zey gbaa bzob me cue Dios nëz derech.

²⁰ Dzigo grëse xpëëdsuel me laa zho brieeg, brieets bliaal zho zieseed zho miech Xtiidz Dios. Ni me nac men ne noyacniën zho run zho grë milagr nroob, zeena glu ne nli Xtiidz me nac miñe noseed zho miech.]

XTIIDZ NDZON DIOS MIÑE PQUIAA LUC

¡Diuzh Tiofl!

¹ Nanle luu ganle, nole bla zha ne bioxco pquiaa zho grë ncuaañe goc zeñe biaad Jesús meñ ne pxeel Dios ga.

² Ncuaañe nlipaa goca, grë ncuaañe pquiaa zho ga, laaw pquiaa zho zigne rzodiidzse miecha leñ dze rii, zigne rzodiidzsegaa zha ne bzëñepaa mew, zha ne pso me noneew lo miech.

³ Yeque naa pquiaa naa wen wen bnabdiidz naa, bleeni naa diidz grëse dien zha psilo grë ncuaañ co; ni niina laa naa rquiaw zigne gocsew laaw rxel naa lo luu. Sac rien naa ìb nonguiela gacnañ luuw;

⁴ zeña lozh gacnañ luu zha nac diidzli rii, wseed ne blu zho lo luu i.

⁵ Len dze ne nac Herod rey rnabey me dib xtan zha Judé, leñ dze co no tib pxoz lë Zacarí, me nac tib zha ne nacgrë “Zha Abí”. Niicle tsieel mew, zha xtiï pxoz Aarón ziaad wnaa co, lë me Lisabet.

⁶ Zigtaa Zacaríw, zigtaa Lisabeta, noxco me miñe rnabey Dios, mban mew zigne naca, ni tib xley Dios rguiitsd me.

⁷ Meñ gol-le nac me grop me, per ni tib mëed quianied me, sac niaad Lisabet gapd me mëed.

⁸ Laa tib dzew bgaa grë zha ne nacgrë Zacarí gun zho dziin leñ yadoo.

⁹ Nac xcostumbr grë zha ne nac pxoz, rio zho tib rif dien chopaa yгаа tsielaadz goxyaal leñ yadoo, dzigo bgaa Zacarí.

¹⁰ Goxyaal co nolaadz me leñ yadoo, laa grë miech ne ndxie nëz ley nonabgaa lo Dios,

¹¹ tibaque zeñe brieequia tib xanjl Dios bzo cue pcoog nëz derech, zaatne nozëëg me yaal ga.

¹² Zeñe gon me anjl co bdzieb me, rdzieldraa me zha gun me lo dzeb co.

¹³ Dzigo rëb anjl co lo me:

—¡Gdzieebd luu! Diidzse ziañie naa lo luu, gacnañ luu ganle mine nlab luu lo Dios ga, pquiaadiag mew; gane niina laa tsieel luu gap tib mëëdbgui. Zeñe gal win, Juan cueelë to win.

¹⁴ Tib guiebley nroob gac win lo to, niicle lo grëragaa miecha,

¹⁵ sac tib meñ nziuu gac win lo Dios. Zeñe gac win zha broob, ni tib ro nziu guied win, per ni vin yquiaarod win; ansraa gal win, laa Espíritu Sant naciele win.

¹⁶ Win gac meñ ne co guic nzian grë zha Israel, gbiire gbig zho lo Dios, meñ ne rnabey zho.

¹⁷ Zigne goc Lí, meñ ne biaad pteed xtiidz me padzeela, sca gac win tedner win lo me, nroob poder ne gap win. Win gnee lo grë miech rii, gbiire gleynie zho me zigne goc xmengol zho zha ne bleynie me; csaan zho grë xquieñntseeb zho, gban zho zigne racladz me; zeña niowse gac zho ycaania zho me.

¹⁸ Pquiab Zacarí rëb Zacarí lo anjl co:

—¡Ncuaañe gacd i gon rnee luu! Zigtaa naaw, zigtaa tsieel naaw, mengol-le nac no.

¹⁹ Rëbchaa anjl co:

—Biñ ganle anjl Gabriel nu quianee lo luu, anjl ne tibaque zo lo Dios. Me pxeel naa ziañie naa diidz rii.

20 Per ne squi riladzd luuw, na laa luu guiaan ngop, haxta gal dze ne gac minē rne naa lo luu nu, dze co glan xtiidz luu stib.

21 Grē miech ne ndxie quianab lo Dios ga, quiambēz zho Zacarí, rnabdiidzla zho pe goc me, sac ran zho rrieed me zaatne ziezēeg me yaal ga.

22 Zeēne brieē me, goṅ zho gacdraa gnee me, dzigo biēn zho no pe blu Dios lo me ga. Teḷ pe racladz me gnee me, niapse seṅ rlu me.

23 Bzase dze ne beēn me dziin leṅ yadoo, dzigo laa me zey lidz me.

24 Goca bla ngbidz, laa mēēd co pquialo zdoō tsiel me.

Dipse leṅ gaay mēē bio zhuz co ro yu, ib brieed me, rley me rnee me:

25 —jZha wentaa Dios, bneedz me diidz bdziṅ dze yquianie naa mēēd rii, zeēna gzhidzniedraa miech naa!

Güeynie tib anjl diidz laa Jesús gac mēēd

26 Goc xoop mēē zoney Lisabet mēēd, pxeel Dios anjl co stib güey me Nazaret, guiedz ne ndxie xtan zha Galilé.

27 Ga no tib ndzooop nguieg lē Marí, leṅ dze co no xtiidz ndzooop co ctsieelnia ndzooop tib zha xtii rey David, lē José.

28 Bdziṅ anjl co zaatne no ndzooop, pquiaabdiuzh me ndzooop, rēb me:

—jDichos luu goṅ, sac tib zha nziuu nac luu lo Dios! Me quianap luu.

29 Zeēne goṅ Marí anjl co, ni goṅ Marí zha rnee me, bzee zdoō Marí, riēṅ Marí diēn pe nac scataa rzē xtiidz me.

30 Dzigo rēbchaa me lo Marí:

—jGdzieebd luu! Laa Dios goṅ bzooblo luu ygaa luu tib guielnzaac nroob.

31 Zdoō luu yquiaaalo tib mēēdbgui, zeēne laa win gal, JESUS cueelē luu win.

32 Tib meṅ nroob gac win, zien miech ganle Xpēēd Dios ro ne no gbaa nac win; ni so me win gnabey win zig gnabey xmengol win David.

33 Win gnabey lo grēse zha Israel, ni gdziṅd dze ne lozh xquielrnabey win.

34 Pquiab Marí rēb Marí lo anjl co:

—jMēēd ye? jPer zha grieelo gap naa mēēd, ni tib naa zo nu?

35 Rēbchaa anjl co:

—Niapse por poder ne rap Dios gac min co. Zeēne laa Espíritu Sant guiaad gacnie luu, hor co laa poder co gacnie luu, laa mēēd co yquiaaalo zdoō luu; gacxe waa Xpēēd Dios guṅbey miech win, minē rnabey Dios min co guṅ win.

36 Ye belyeēn luu Lisabet, niina lo guielgol-le laa tib mēēd pquialo zdoō me; zēēb diidz ib grielod gap me mēēd, per na racle xoop mēē zoney me mēēd,

37 sac par Dios tsod ncuaaṅe grielod gac.

38 Dzigo rēb Marí:

—Teḷ scaw, minē rnee luu i, maase gaca. Laa naa zo nu par guṅ naa minē gnabeytaa Dios naa.

Blozhse ga, laa anjl co zey.

Güeygan Marí Lisabet

39-40 Goc bla dzew, brieē Marí ga zie me ziegān me Lisabet tib guiedz win ne ndxie gui glaa ne nac xtan zha Judé.

41 Bdziṅ me, wbig me pquiaabdiuzh me Lisabet. Bdiuzh co bnee me, zeēne biasoli xpēēd Lisabet zdoō Lisabet; dzigo hor co bdeed Espíritu Sant guielbiini lo Lisabet,

42 nguiedz bnee Lisabet rēb me lo Marí:

—jDichos luu Marí bgaa luu guielnzaac qui! Sac goṅ, lo grēraa no nac no men wnaa, luu bzooblo Dios. Mēēd ne zoney luu i, zha nziuu nac win lo me.

43 jIb guiaanladzd naa dze rii, znu biaad luu nac luu xniaa meṅ ne rnabey naa, biaadgan luu naa!

44 Haxta mëed ne zoney naa nu, rley win biasoli win zdoo naa, zeene pquiaabdiuzh luu naa.

45 ¡Dichos luu, bin luu miñe në Dios, ni bliladz luu zuñ mew!

46 Dzigo hor co bnee Marí rëb me:

¡Men naob nac Dios! ¡Gdib zdoo naa roolnie naa me!

47-48 Rleynie naa me nac me men ne psilaa naa, sac gon niicle peet nond naa, tib ngundziin winse nac naa lo me, per laa me bzóoblo naa.

Grë miech, zigtaa len dze riiw, zigtaa len dze ne ziaadragaaw, ziab zho naa nac tib wnaa ne mazdraa dichos.

49 Ne nligaa zha nactaa guielnzaac rii bneedz me lo naa.

Men ro, men nroob nac me, ¡guiendraa cho zig me!

50 Grëse miecha, zha ne rioxco rquiaadiag miñe rnabey me, tibaque racnie me zho, ib rsaand me zho.

51 ¡Golwi ganle zha nactaa grë ncuaañe run me!

Grë ncuaañe no guic zha niats gun zho, bnitlo mew,

52 ptiche me grë zha ne zob rnabey.

Laa grë zha ndooladz, zha ne rzac miech peet nond, beennon me zho.

53 Grë zha mban ne guien pe yquiiñ, nroob guielnzaac ne bdeed me lo zho, laa grë zha ne rapchen, scase bzonëz me zho.

54 ¡Pe zhidaa ziyacnie me grë zha ne nac xtiñ Israel, menjol ne goc zig tib ngundziin lo me ga! ¡Tibaque rlu me rleynie me zho!

55 Ib biaanladz me xtiidz me miñe bnee me lo pxozgol ne Abraham, zeene rëb me gdziñd dze ne csaan me Abraham, ni grëraa zha ne grieequia lo xtiñ Abraham.

56 Maase tson mëë biaan Marí ga blëz me lo Lisabet, dzigora wbi me ga bdziñ me lidz me stib.

Gol xpëed Lisabet

57 Bdziñ dzew, laa xpëed Lisabet bza mëë, laa me gop win.

58 Grë zha ne no gax lidz me, grë zha ne nac menlidz me, zeene bin zho scataa pquia zdoo Dios me bdeed Dios mëed co lo me, rley zho güeygan zho me.

59 Dze ne goc mëëdbgüi yeen co xon ngbidz, blalaa zha ne güeynal zhits pxoz win, zhits xniaa win güeynie zho win bio win bey ne rio xpëëdbgüi zha Israel, parne glu lo Dios ngab win. Tibaque nan zho Zacarí nrieele win, zigne lëque pxoz win, haxta scale nonee zho lo win,

60 per hor co rëb Lisabet, led scad gac lë win, Juan grieele win.

61 Dzigo pquiaab zho rëb zho:

—¿Pe nacne sca grieele win? Ni tib menlidz to lëd Juan.

62 Bnabdiidzaque zho lo pxoz win, blu zho señ lo me dien zha racladz me gac lë win.

63 Dzigo bnaab me bdeed zho tib lë lo zaatne yquiaa me; bzee zdoo zho zeene blozh pquiaa me gon zho rnee lo co: “Juan grieele win.”

64 Loxaque blozh dze sca pquiaa me, zeene laa me wbiire bnee stib, psilo me rdeed me xquizh lo Dios.

65 Grë zha ne zo ga, zha ne runbey me, zeene gon zhow, per nli rzee zdoo zho.

(Nëzrii nëzrec bzhoon diidz laa mëed co gol, grëse guiedz ne ndxie gui glaa co gocnan miecha.

66 Zha ne rona, rza zdoo zho rnee zho: “¿Bay cho gac mëdyeen co?” Sac nligaa rlu nacnie Dios win.)

⁶⁷ Horco bdeed Espíritu Sant guielbiini lo Zacarí, psilo me bnee me rëb me:
⁶⁸ ¡Xquizh xquielnzaac men nroob ne rnabey, men ne nac xDios ne nac ne zha Israel!

Sac gon laa me ziaad, ziaadgan me ne, ziadbee me ne lo xquielnë ne.

⁶⁹ Nasi laa me pxeel men nroob ne ziaadsilaa ne, lëë men co ga no grieequia lo zha xtii David, men ne been xtsiin me ga.

⁷⁰ Padzeelale bzeet me cxeel me men co, grë zha ne biaad pteed xtiidz me, bzeet zhow.

⁷¹ Rëb zho, ib sxeel me men ne guiaadsilaa ne ladznia zha ne nosacsi ne, zha ne rlëë lo ne.

⁷² Sac ib dzind dze csaan me grë zha xtii pxozgol ne, rquianëpaa zdoos me zho.

Ib guiaanladzd me mine rëb me lo Abraham,

⁷³ zeene rëb me laa me cxeel men ne csilaa ne,

⁷⁴ zeena dziodzebdras ne lo zha ne rlëë lo ne, lo zha ne rsacsi ne; sinque ine tibli gac ne dziuun ne mine rnabey me.

⁷⁵ Gzataa dze ne gneedz me guielmban lo ne, ine mbe zdoos ne, dziuun ne mine rleynie me.

⁷⁶ Luu gon xin, bzooblo Dios ro ne zob gbaa, cteed xtiidz me lo miech, luu tedner tsienee luu lo zho, laa men co no guiaaad.

⁷⁷ Luu gnee lo grë zha Israel, guien zho ganle zha gon Dios zho perdon, parne ycaania me zho.

⁷⁸ Ne nligaa rleynie me ne, rquia zdoos me ne, gane laa me cxeel Xpëed me, men co gac zig tib biini,

⁷⁹ Biini co gziini lo grë zha ne mban lo guielcow, zeena biini co glu nëz lo ne, guio ne nëz ne peet zhgab, peet dzeb guien d.

⁸⁰ Zigse zie dzew, scase scase zieroob mëdyeen co, ni scaquegaa dib zdoos win rleynie win Dios. Zeene laa win broobpaa, dzigo güey win bio win tib dan zit, haxta bdzin dze ne laa win psilo pseed miech laa win blulo lo zho.

2

Gol Jesús

(Mt. 1:18-25)

¹ Lëëtaaque len dze co, laa August, rey nroob ne zob Roma, bnabey top lë grëse miech ne no dib dan ne rnabey me, par gacnan me dien palal zho.

² Lëë primer vuela ga ptop zho lë miech, lëë iz co zob men ne lë Cirein zobnabey me guiedz Siria.

³ Bnabey August grëse miech zha ne no stib ladz ben, laa zho no tsie zaatne nacpaa ladz zho tsiedeed zho lë zho, parne ga ygab zho.

⁴ Min co nagon nagne brieë José guiedz Nazaret (xtan Galilé) grop me Marí zie me Belén (xtan Judé). Laa me zie ga, sac ga goc ladz xmen gol me rey David.

⁵ Gard ctsieelnipaa me Marí, per nole xtiidz me grop me. Len dze co ziaadyobpaa gal xpëed Marí.

⁶⁻⁷ Bdzin me Belén, bgaadraa me zaatne nrieelo mbëz me len yu, lega nac ti len lidz ma bdeed zho blëz me. Lëëtaaque bdzin me ga, laa mëed co gol. Racse Marí pchel me win lar, bdiix me win tib len yag ne row ma guizh; lëë mëed gol ga lo me.

⁸ Guieel co, blalaa zha ne nac baxtor, laa zho ndxie quianap zho xpëcxiiil zho dan,

⁹ tibaque zeene brieequia tib xanjl Dios lo zho, dipse zaatne ndxie zho ga biab tib biini nroob. Zeene gon zho anjl co, gon zho biini nroob co, per nli dzieb zho.

¹⁰ Dzigo bnee anjl co, rëb me lo zho:

—jGdziebde to! jGolgon diidz cub ne ganle zialne naa lo to nu! jTib guielbley nroob gac diidz rii lo grëse miech!

¹¹ Men ne gon quiambëz to ga guiaad csilaa to, laa me blansole lo guidzliu. Me nac Men ne zëëble diidz ga cxeel Dios, me nac men ndzon ne rnabey. Belën, zaatne goc ladz rey David, ga gol me naguieel.

¹² Goltsie, zaatne tsiedziel to tib mëëdbgui yeen, nrielse win lar zhoob win len yag ne row ma guizh, lëë me ga.

¹³ Tibaque zeene gon zho laa stib dzoon anjl brieequia gocgrë anjl ne quianee lo zho ga, psilo grë anjl co roolnie zho Dios, rnee zho:

¹⁴ jHaxta zaatne glaaraa gbaa, nozhoobnen ganle pa lotaa men nroob nac Dios!

jNasi, grëse miech zrieelo guiaanwen zho lo me; zdoo me rala laa me nobedz zho!

¹⁵ Zeene laa grë anjl co zey gbaa stib, psilo grë baxtor co rnee zho:

—jNiinaga golgotsaa guio Belën! jGotsaa guiowi ne dien, zeena dzian ne mine biaadnie anjl co diidz lo ne nu!

¹⁶ Lëëlëd bio zho nëz laa zho zie. Bdzin zho zaatne blëz José ga grop Marí, nligaa laa mëdyeen co nix ga, nixse win tib len yag ne row ma guizh.

¹⁷ Dzigo bzodiidz zho grëse zha rëb anjl co lo zho, zeene güeynie me diidz laa win gol.

¹⁸⁻¹⁹ Grë zha ne bina, per nli rzee zdoo zho; laa Marí nosew zdoo me, tibaque rsoladz mew.

²⁰ Blozh ga, laa zho bio nëz ziequianap zho xma zho stib. Ine roolnie zho Dios, rdeed zho xquizh lo me sca pxeel me xanjl me güeynie diidz lo zho, rley zho sac brieelo gon zho mëdyeen co.

²¹ Dze ne goc xon ngbidz gol win, dze co bio win bey ne rio xpëëdbgui zha Israel, par glu xnëz Dios ngab zho; dze coquew bleelë zho win JESUS, zigne rëb xanjl Dios zeene güeynie me diidz ne laa win gac mëed lo Marí.

Güeynie zho Jesús yadoo

²²⁻²⁴ Nac ley ne psan Moisés lo zha Israel, wnaa ne sca rap mëëdbgui, zeene rac zho tap zhumal, none tsienie zho chop ma cogon zho len yadoo; yase tsienie zho tib nëz coc, tib nëzga palom. Ni rnabeya: “Grëse mëëdbgui ne rac mëëdglo, ib none gdeed zho win gac win tib zha ne gun xtsiin Dios.” Nacne zeene bza dze co, dzigo brie Marí zie me Jerusalén grop me José, zienie me mëdyeen co yadoo csañ me win ladznia Dios; lëë nëzle ga zienieque me gon ne no gdeed me ga.

²⁵ Lëëtaaque dze ne bdziinne zho win len yadoo, laa tib men lë Simeón no ga. Men Jerusalén nac men co, rleynie me Dios, rioxco me mban me zigne rnabey Dios, ni nacie Espiritu Sant me. Quiambëz me gan me Men ne nole diidz ga cxeel Dios csilaa zha Israel,

²⁶ sac rëble Espiritu Sant lo me ible laa me no gan men co.

²⁷ Laa dze co, Espiritu Santaque psiaab guic me zie me yadoo. Nacne lëëtaque no me len yadoo, laa zho bdziinne mëdyeen co ga, ziesañ zho win ladznia Dios zigne rnabey ley.

²⁸ Dzigo me wbig bdeedz win, rdeed me xquizh lo Dios, rëb me:

29 Xquizh xquieInzaac luu Dios, miñe në luu lo zhingun̄dziin win luu nu, laaw goc.

¡Nasi zac̄le nagon̄ guiaad-xi luu naa, haxta gley naa gbi naa lo guidzliu rii!

30-31 ¡Men̄ ne nac̄le diidz cxeel̄ luu guidaasilaa miech lo xtoI zho, grop lo naa laa naa ran̄ me niina!

32 ¡Gr̄ese miech ne ndxie lo guidzliu, me nac̄ biini ne gziini lo zho!

¡Me csan̄nziuu zha Israel, ne nac̄ zho zha ne ngab lo luu!

33 Zeene gon̄ Marí grop José scataa rz̄e gr̄e diidz ne rnee Simeón rzeet Simeón m̄edyeen̄ co, bzee zdoo me.

34 Dzigo bnab Simeón lo Dios gacnīn Dios me gza me m̄edyeen̄ co. Blozh ga, r̄ebchaa Simeón lo xn̄iaa win:

—Tib guieIbley nroob ne gac m̄ēd rii lo zha Israel, por win ndal zho griece lo guieIcow ne no zho, laa zho gbig lo Dios. Ni scagaa zrieequia zha ne gl̄ēnie win, per l̄ēeque zha csacsi zho ga. Mban gac zdoo luu, nroob guieIn̄e ne tso luu gan̄ luu zha sac miech win.

35 Ga glu gan̄le zha nac̄ zdoo tib tib miech.

36-37 Ye tib zhuz gol l̄e An zo ga hor co. Tibaque no me yadoo, dze guieel rool̄nie me Dios, rcuan me ni rzodiidznie me Dios. Tib zhuz gola, len̄ dze co rac tapgal̄ tap iz biaan̄ me viud. Nguieg me ptsieelnia me, per loxaque gadz iz wbannie me tsieel me. L̄ēe pxoz me ga brieel̄e Fanuel, l̄ēe zhey co ga nac̄ zha xtii Aser. Tib men̄ ne rteed xtiidz Dios lo miech nac̄ me,

38 dzigo wbigaque me, psilo me rdeed me xquizh lo Dios; ni bzodiidz me lo gr̄e zha ne ndxie ga, r̄eb me l̄ēe m̄edyeen̄ co ga nac̄ men̄ ne quiamb̄ez zho ga guidaasilaa zho.

39 Blozhse been̄ José miñe rnabey xley Dios grop me Marí, dzigo laa me wbi ga. Bdedraa ga, beynie me m̄ēd co Nazaret, zaatne nac̄ ladz me.

40 Ga broob win, zigse zierooob win scase scase rac macis win, scase riabiin̄iraa win. Tibaque nac̄nie Dios win.

Biaan̄ Jesús len̄ yadoo

41-42 Zeene bloozh Jesús tsiipchop iz, dzigo güey José grop me Marí güeynie me win lni Pascw, lni nroob ne run̄ zho Jerusalén. Gzobse iz rie me grop me, per iz cotaa laa me güeynie win, sac nac̄ zhiwseed zha Israel, m̄ēdbgui ne rap lalga iz, zrieeleole tsie zho lo lni co.

43 Zeene laa lni co bded, laa me bio n̄ez grop me laa me wbi ga. Ib bien̄d me biaan̄ win Jerusalén,

44 tibaque güeynie guic me lad gr̄eraa miech ne wbire lni, lad co zienal̄ win. Laa me no n̄ez, zeene bdzetaa dzew, laa me psilo rguib win, bnabdiidz me lo gr̄e zha lidz me, lo gr̄e zha ne run̄bey me,

45 per ni tib zho choot rdeete win diidz. Nac̄ne wbireque me n̄ez Jerusalén stib, zieguib me win.

46 Dze ne racle tson̄ ngbidz blozh lniw, dzigorāa güeydziel me win len̄ yadoo, laa win zob lo gr̄e zha ne nac̄ maistr ley, noquiaadiag win gr̄e zhiwseed zho ni nzian gr̄e ncuaane rnabdiidz win lo zho.

47 Rzee zdoo zho ran̄ zho scataa nixbiini win, niicle zeene rnee wina, zeene rtsiregaa win lo xtiidz zho.

48 Zeene gon̄ me laa win zob lad gr̄e men̄ co, bzee zdoo me; dzigo r̄ebchaa xn̄iaa win lo win:

—Xin, ¿pe nac̄ne squi been̄ luu? Ptseeb luu no gon̄, quia no grop no pxoz luu noguib no luu.

49 Pquiab win r̄eb win:

—Nguibde to naa. ¿Pe ran̄de to ib none gon̄ naa xtsiin̄ Pxoz naa?

⁵⁰ Ib biend me pe nacne sca rëb win.

⁵¹ Dzigo laa win zienal zhits me, laa me zeynie win Nazaret; nose grë min co zdoo xnïaa win.

Tib mëed nguzobdiidz nac win, ron win xtiidz me.

⁵² Zigse zie dzew, laa win riabiiniraa, laa win noroobraa; rleynie Dios win, niiclegaa miecha rleynie zho win.

3

Psilo Juan Bautist noseed me miech

(Mt. 3:1-12; Mr. 1:1-8; Jn. 1:19-28)

¹⁻² Bdzin dzew, laa Juan psilo pseed miech. Lëë len iz co rac tsiin iz zob men ne lë Tiber nac me rey, rnabey me grë guiedz ne ngab lo zha Roma. Len dze co zob Pilat rnabey me grë guiedz ne ndxie nëz Judé, laa Herod zob rnabey grë guiedz ne ndxie nëz Galilé. Len dze coque zob bets Herod, men ne lë Lip rnabey me grë guiedz ne ndxie nëz Ituré ni nëz Traconit; laa Lisian rnabey grë guiedz ne ndxie nëz Abilin. Zha ne nac zhipxoz nroob zha Israel len dze co, nac Anás ni Caifás. Len dze copaa nagon güeynee Dios lo Juan (xpëed Zacari) dan ngan ne no Juan ga.

³ Nacne hor co psilo Juan güeyted me grë guiedz ne ndxie ro guiubee Jordán, rnee me lo grë miech co, csaan zho xquielntseeb zho gbig zho lo Dios ni chobnis zho, zeena csilaa Dios zho lo grë xtoł zho.

⁴ Ga brieequia mine bnee Isá, men ne biaad pteed xtiidz Dios, zeene znu pquiaa me:

Bii zon miech ganle zeene laa tib tsi men zëeb tib dan ngan, rnee me:

“Golzhixcuaa nëz ne ted men ne rnabey,

golsaan grë guielntseeb ne run to.

⁵ Zaatne nac len blë, golcodzëëw, grë gui glaa, grë gui las, golsiaablow.

Nëz ne niecw, nëz ne quiaya quiaguiet nac, golzhixcuaaw.

⁶ Grëse miech, laa zho gan men ne pxeel Dios ga ziaadsilaa zho.”

⁷ Zeene ran Juan laa miech rdziñ lo me cchoobnis me zho, rnee me lo zho: —iMiech ngoopdol, masaque nac to zig nac meel! Nan to na lëë, loxaque chobnis to laa to laale lo grë guielnëdox ne ziaadyob guiaad.

⁸ Led scada gon, none ndzinli gban to zeena glu nlipaa psaan to xquielntseeb to. Ni gacniatsde to guiab to, loxaque por nacse to zha xtií Abraham, laa Dios csilaale to; sac gneli naa lo to ganle, telne gacladz Dios, haxta grë quie zac gnabey me tsaalow miech ne gac zha xtií Abraham.

⁹ Nanle to ganle, grë yag nex ne rquiad nex lo, zeene ran zho sca naca, rchug zhow, rzëëg zhow; scadaa nagon sac grë zha ne gband zigne racladz Dios, ib tedlaad zho lo gui; sac rrieequia laa me nzhenle xquibyag me, cchug me grë yag ne sca nac.

¹⁰ Dzigo rnabdiidz zho lo Juan, pe no gun zho parne ygaad zho grë guielnë co.

¹¹ Dzigo rquiab me rnee me lo zho:

—Telne quianie to chop lar ne racw to, none gdeed to tiba lo zha ne guiend xab; telne quianiegaa to ncuane gow to, none gdeed to palala yquin zha ne quianieda.

¹² Wbigaque bla recaudador ne zie chobnis, rnabdiidz zho dien pe gun zho.

¹³ Pquiab Juan, rëb Juan lo zho:

—Cuandraa to samiech to, mine rieguialse zho quizh zho, min co golnab lo zho.

14 Ye zla menguiib wbig, rnabdiidz zho rëb zho:

—¿Telzhe no waa, pe nac mine dziuun no?

Rquiab Juan rnee Juan lo zho:

—Ndzinli golgac, ib ctsebde to samiech to par dien pe gla to lo zho; zha ne peet xtold, ib yquiaaquide to zho ncuane beend zho. None sac zdoo to dimi ne quiayazh to.

15 Nzian grë miech co quiambëznë zho gacnan zho dien pe lëele Men ne bzooblo Dios ga cxeel me nac Juan.

16 Dzigo rëb Juan lo zho:

—Tib wrobnisse nu rnedz naa lo to, sangue men ne no guiaad ga Espiritu Sant gdeed me lo zha ne gliladz me; ni scagaa zha ne gliladz me, sonëz me zho zaatne nitlo zho. Ne nligaa men non nac me, tel naa peet nond naa, per ni par tib ngundziin ne glit lab me ni me, raguiald naa gac naa.

17 Laa me guiaad zig tib zha ne rbeeguizh zhobxtil, sac zha co, rlozhse rbeeguizh zho zhob rgotsow zhow, laa paj rlaal zho lo gui, ga reca. Per gui ne gzeëg grë paj ne guidaabee me ga, gdzind dze guiuuw.

18 Sca rnee me lo zho, par guien zho zha nac Xtiidz Dios.

19 Tib vuelte haxta lo rey Herod goctox me, sac lëëque Herodí, wnaa ne nac tsiel bets Herod nonie Herod; grë guieIntseeb ne quiayun Herod, blisqui mew.

20 Per laa ne nion Herod diidz, lel been me stib guieIntseeb, bnabey me bgaa Juan bio Juan ladzguiib.

Brobnis Jesús

(Mt. 3:13-17; Mr. 1:9-11)

21 Len dze ne nochoobnis Juan miech ga, tib dzew laa Jesús bdzin lo Juan ga, ye me bnab choobnis Juan me. Blozhse brobnis me, laa me quiazodiidznie Dios, tibaque zeene bzhial zhan gbaa,

22 laa men ne nac Espiritu Sant biet, rlu me zig rlu tib palom, laa me bdzin guic Jesús, hor co blu zëeb tib tsi men co nëz gbaa, rnee me:

—Xin, rleynie naa luu gon, nziuu luu lo naa.

Xmengol Jesús

(Mt. 1:1-17)

23 Galptsii iz rap Jesús, laa me psilo xtsiin me pseed me miech. Zha ne runbey me, rzoob zho xpëed José nac me,

24 José goc xpëed Elí,

Elí goc xpëed Matat,

Matat goc xpëed Leví,

Leví goc xpëed Melqui,

Melqui goc xpëed Jan,

Jan goc xpëed José,

25 José goc xpëed Matatí,

Matatí goc xpëed Amós,

Amós goc xpëed Nahúm,

Nahúm goc xpëed Esli,

Esli goc xpëed Nagai,

26 Nagai goc xpëed Maat,

Maat goc xpëed Matatí,

Matatí goc xpëed Semei,

Semei goc xpëed José,

José goc xpëed Judá,

27 Judá goc xpëed Joan,
Joan goc xpëed Resa,
Resa goc xpëed Zorobabel
Zorobabel goc xpëed Salatiel,
Salatiel goc xpëed Neri,
28 Neri goc xpëed Melqui,
Melqui goc xpëed Adi,
Adi goc xpëed Cosam,
Cosam goc xpëed Lmodam,
Lmodam goc xpëed Er,
29 Er goc xpëed Josué,
Josué goc xpëed Liezer,
Liezer goc xpëed Jorim,
Jorim goc xpëed Matat,
30 Matat goc xpëed Leví,
Leví goc xpëed Simeón,
Simeón goc xpëed Judá,
Judá goc xpëed José,
José goc xpëed Jonán,
Jonán goc xpëed Liaquim,
31 Liaquim goc xpëed Melé,
Melé goc xpëed Mainán,
Mainán goc xpëed Matata,
Matata goc xpëed Natán,
32 Natán goc xpëed David,
David goc xpëed Isaí,
Isaí goc xpëed Obed,
Obed goc xpëed Booz,
Booz goc xpëed Salmon,
Salmóngoc xpëed Naasón,
33 Naasón goc xpëed Minadab,
Minadab goc xpëed Aram,
Aram goc xpëed Srom,
Srom goc xpëed Far,
Far goc xpëed Judá
34 Judá goc xpëed Jacob,
Jacob goc xpëed Isaac,
Isaac goc xpëed Abraham,
Abraham goc xpëed Taré,
Taré goc xpëed Nacor,
35 Nacor goc xpëed Serug,
Serug goc xpëed Ragau,
Ragau goc xpëed Peleg,
Peleg goc xpëed Heber,
Heber goc xpëed Sala,
36 Sala goc xpëed Cainán,
Cainán goc xpëed Rfaxad,
Rfaxad goc xpëed Sem,
Sem goc xpëed Noé,
Noé goc xpëed Lamec,
37 Lamec goc xpëed Matusalén,

Matusalén goc xpëed Enoc,
 Enoc goc xpëed Jared
 Jared goc xpëed Mahalaleel,
 Mahalaleel goc xpëed Cainán,
 38 Cainán goc xpëed Enós,
 Enós goc xpëed Set,
 Set goc xpëed Adán.
 Adán goc zig tib xpëed Dios.

4

Gocladz mendox niungüet ma Jesús (Mt. 4:1-17; Mr. 1:12-15)

1 Zeene blozh brobnis Jesús guiubee Jordán ga, nacie Espíritu Sant me, dzigo güeynie me Jesús tib dan ngan, zaatne choot miech guiend.

2 Ga bio Jesús, ni tib lë peet dowd me; gzase dze pquiana mendox niungüet ma me niun me mine racladz ma. Zeene goc choo dze no me ga, gon ma lëbdraa me rcaabedz me,

3 dzigo rëbchaa ma lo me:

—Telne nli Xpëed Dios nac luu, bnabey tsaalo grë quie rii ncuaane gow luu.

4 Dzigo pquiab me rëb me lo ma:

—Znu zhobnee lo Xtiidz Dios: “Niapse por xtiidz Dios mban miech, yquiamband zho loxaque guielwagwse.”

5 Blozh ga güeynie ma me glaa tib guic gui, ga znuse blu ma grëse guiedz ne ndxie dib lo guidzliu lo me,

6 rëb ma:

—Bui ganle, grëse guiedz ne gon ran luu i, chen naaw, zrieelo gded naaw lo zha ne racladzaa naa. Grësew, dib guielndaan ne no low, znedz naaw lo luu

7 telne squiitsgzhib luu lo naa, gunnon luu naa.

8 —jBiche lo naa nu mendox! —rëb me lo ma—. Znu gon zhobnee lo Xtiidz Dios: “Diosse nac men ne rnabey, mese none gunnon luu, lo me rieguial yquiitsgzhib luu; ni mine rnabey me min co none gun luu.”

9 Blozh ga güeynieque ma me lad guiedz Jerusalén, ga blep ma me zaatne mazdraa glaa guic yadoo nroob ne zob lad guiedz co, rëb ma lo me:

—Telne nli Xpëed Dios nac luu, bringaa nu,

10 benque led znu rnee lo Xtiidz me: “Znabey Dios grë xanj l me yquiaanap luu,

11 zguedz zho luu, zeena ni tib quie ycaand ni luu.”

12 Dzigo rëb me lo ma:

—Psoladz ganle noque stib zaatne znu rnee lo Xtiidz Dios: “Bien, Dios nac men ne rnabey luu, nodne quitnie luu me gnab luu lo me gon me ncuaane nod gon me.”

13 Gonse ma rdziel zha gungüet ma Jesús, dzigo biche ma lo me palal dze.

14 Blozhse ga, dzigo laa Jesús wbi ga bdziñ me nëz Galilé, scaque nacie Espíritu Sant me. Znuse beenbey miech me por grëtaa ncuaan ro ne run me, grëse guiedz ne ndxie nëz co, rzeet zho me.

15 Zaatne rdziñtaa me, rie me xyadoo zho, rseed me zho Xtiidz Dios, rleynie zho me, rley zho ron zho grë mine rnee me.

Güey Jesús Nazaret (Mt. 13:53-58; Mr. 6:1-6)

¹⁶ Tib dzew, laa me bdziñ Nazaret, zaatne broob me. Goļ dze ne rdziiladz zha Israel lo dziin, güey me xyadoo zho zig runaque me grëraa zaatne ziye me. Zeene goļ horne rlab zho Xtiiðz Dios, dzigo bded me,

¹⁷ bdeed zho miñe pquiaa Isá glab me. Pخال me low, lëëtse zaatne znu rnee blab me:

¹⁸ ZhiEspíritu Dios nacnie naa, ible Dios bzooblo naa, gnee naa Diidz Ndzon ne nac xtiidz me lo grëse zha ne rquiinnëw.

Laa me pxeel naa gne naa lo grë zha ne ngadoo lo ncuaañe nosacsi zho, zeena guieñ zho zha griee zho lo grë ncuaañ co.

Laa me pxeel naa gziini naa lo grë zha ne no lo guielcow, grë zha ne rzac guiendraa zha griee zho lo zhizhgab zho, laa me pxeel naa, naa cuee zho lo zhgab co.

¹⁹ Laa naa zialnie diidz lo miech, gacnañ zho pa lotaa noxco Dios guñlay me grëse zha ne gbig lo me.

²⁰ Blozhse blab me lo co, ptiðëd mew bdeed mew lo zha ne quianapa, dzigo laa me bzob. Grëse zha ne no leñ yadoo ga, dze rwi zho lo me,

²¹ dzigo bnee me lo zho, rëb me:

—Grë diidz ne blozh blab naa lo to nu, leñ dze rii goñ laaw noyac cumplir.

²² Grëse zho rleynie zho me, rlozhd gzee zdoo zho ron zho grëtaa diidz ndzon ne rnee me. Rnabdiidzlsa zho rnee zho:

—¿Bay zha squitaa pseed meñ qui? ¡Led lëë xingan José i!

²³ Dzigo rëb me lo zho:

—No tib diidz ne rnee: “Zha ne racnie stib miech, none guieñ zho glo menladz zho gacnie zho.” Rienpaa naa goñ, min co racladz to gnë to lo naa; quiambëz to gan to grë milagr ne ziyon to beñ naa guiedz Capernaum.

²⁴ ‘Gneli naa lo to ganle: Zha ne riaad rteed xtiidz Dios, ible znu ranðzed menladz zho zho; gane rriee lod pe guñ zho.

²⁵⁻²⁶ Goļsoladz ganle zeene biaad Lí, bio tib tiemp ne biabd guie tsoñ iz groļ, tib gbindow ne goñ miech Israel nu. Ndal wnaa viud ne nac menladz me mban bded zho, guieñd pe nquiin zho, per brieelod niuñ me xyudar zho; leļ xyudar tib wnaa Sarept pxeel Dios me güeyguñ me, guiedz ne ndxie gax Sidón.

²⁷ Scaque zeene biaad Liséw, ndal zha Israel rlan guiezdxdox ne nac lepr, per ni tib zho beñguiaed me; leļ tib zha Siria lë Naamán, meñ co beñguiaic me.

²⁸ Zeene goñ zho sca rnee me, blëë zho.

²⁹ Gusobe zho, blee zho me lad guiedz, güeynie zho me tib ro yee ne quia glaa guic gui ne ndxie guiedz co. Laa zho nole par ctiix zho me ga,

³⁰ zeene znuse bded me lad zho, ziega me.

Biac tib mgui ne nosacsi menðox

(Mr: 1:21-28)

³¹ Ga wbi Jesús, bdziñ me guiedz Capernaum stib, guiedz ne ndxie nëz Galilé. Gzobse dze ne rdziiladz grë miech co lo dziin, rie me xyadoo zho rieseed me zho.

³² Rzee zdoo zho ron zho grë zhiwseed me, grëse miñe rnee me, rlu zha rnabey nac me.

³³ Tib vuel, lad grë zha ne noseed me ga no tib mgui ne nosacsi menðox; roptsie menðox co rnee ma lo me:

³⁴ —¡Psaan no! ¿Pe guñ luu no Jesús Nazaren? ¿Ziaad luu lëë par gnitlo luu no? ¡Ruñbey naa luu, luu nac meñ ndzon ne pxeel Dios!

³⁵ Dzigo goctox me lo ma, rëb me:

—¡Psoog ro luu! ¡Na zeena psaan meñ qui!

Horco, squi ndxie grë miech co bron ma ngui co liu, mincose been ma, laa ma brieë laa ma zie.

³⁶ Rlozhd gzee zdoo grë miech co, rnabdiidzlsa zho rnee zho:

—¿Zha nac xtiidz men qui, zha nacne haxta menodox rdzieb ma me, rzhoon ma zeene laa me ractox lo ma?

³⁷ Grëse guiedz ne ndxie gax ga, zigse zie dze rzhoon diidz scataa milagr ne run me.

*Biac xniadzoop Pedr
(Mt. 8:14-17; Mr. 1:29-39)*

³⁸ Brieë Jesús len yadoo, zie me nêz lidz Simón. Bdzin me lëëtaque laa xniadzoop Simón nix rlan xlëë, nzho rac me; dzigo wbig zha ne been vis laa zhuz co rzacnë, bnab zho lo me gunguiac me me.

³⁹ Nacne bded me zaatne nix zhuz co, goctox me lo xlëë co. Horcogazha laaw blëz, guche zhuz co ga, beenlo me ncuaane dow zho.

⁴⁰ Laa ngbidz rzëëblew, zeene bdzin grë miech co lo Jesús, bdzinie zho grë zhimguidz zho. Zhaase zhaase guieguidz ne rzac tib tib mguidz co, per grëse zho zigne rxobnia me guic zho laa zho riac.

⁴¹ Nzian zho benchoon me menodox ne nosacsi zho, zeene laa ma rrieë, nguiedz roptsie ma rnee ma lo me:

—¡Rdziuunbey no luu, Xpëed Dios nac luu!

Dzigo ractox me lo ma, rsaand me gnee ma cho nac me, sac wen wen nan ma me nac Men ne nacle diidz ga cxeel Dios.

⁴² Biini liu co, silgaw brieë Jesús lad guiedz co güey me tib zaatne choot miech guieñd. Zeene bnit me lo grë miech co, brieë zho güeyguib zho me haxta bdziel me lo zho; rnab zho lo me Capernaumse ga cuëz me, paat tsiedraa me.

⁴³ Dzigo rëbchaa me lo zho:

—Griëloda, ib none ga naa grëraa guiedz, gaseed naa miech gacnan zho zha racladz Dios gban zho; sac ible min co pxeel me naa zial naa.

⁴⁴ Nligaaw, grëse guiedz ne ndxie nêz Galilé ga güeyted me, güey me yadoo ne zob tib tib guiedz co, güeynee me Xtiidz Dios lo grë miech co.

5

Nroobdox mel bga
(Mt. 4:18-22; Mr. 1:16-20)

¹ Tib vuelt miech guizhiu ne pcaalsa lo Jesús ro Nisdoo Genesaret, haxta rtaagw zho me; grëse zho racladz yquiaadiag zho Xtiidz Dios.

² Gax ga zo chop barcw, blalaa ngooz mel biet lena, laa zho no lo nis ga noguüib zho guieñ ne rnaaz zho mel.

³ Nacne güey me biep me tib len barcw co, bnabey me Simón psëë Simóna bzëëba lo nis palal; sac lëë xbarcw Simón ga. Dzigo leen co bzob me pseed me grë miech co.

⁴ Zeene blozh bnee me lo zho, rëbchaa me lo Simón:

—Nana ganle zeeynie barcw rii guionie new zaatne quietlaa nis, zeena gron to guieñ ne rgaa mel i gnaaz to palal ma.

⁵ Pquiab Simón rëb Simón:

—Dib guieel-le bdzio no lo nis rii, per ni tib mel bnaazd no; per lega ne luu rneew, na dien laa no grona stib.

⁶ Bron zho guieñ co lo nis, zeene laa zho cueew, ya zig zrieza, biodzëse lena no mel.

⁷ Horco blunia zho lo grëraa zha ne nacgrë zho no stib leñ barcw co, parne tsie zho guñ zho xyudar zho. Bdzin zha co gogcza zho, gropsle leñ barcw co pcodzë zho grë meļ co; ya zig zdedquiew lo nis.

⁸ Zeene gon Simón scataa meļ taf ne bgaa, pquitsgzhib me lo Jesús, rëb me: —Bzhiguiel mazd psaan naa, tib miech ngoopdol nac naa, rdzieeld so luu lo naa nu.

⁹ Zigtaa Simóna, zigtaa zha ne ziegza mew, rzee zdoo zho ni rdzieb zho scataa nac milagr ne gon zho ga.

¹⁰ Scasaque rac Jacob ni Juan (xingan tib meñ lë Zebedé), zha ne nacgza Simón.

—Gdziebd luu —rëb Jesús lo Simón—. Zigne squi gon rioxco luu riaad luu gooz meļ niina, desde nadze laa luu tsoxco guñ luu stib gooz; laa naa cxel luu tsietop luu grë miech ne sëeb xnëz Dios.

¹¹ Zigne bdzinie zho barcw co ro nis, bzo zhow ga, laa zho zienaļ zhits me.

Biac tib zha ne rlan guiedz lepr

(Mt. 8:1-4; Mr. 1:40-45)

¹² Laa Jesús no tib guiedz co, tib dzew, bdzin tib mgui ne rlan guiedzdox ne lë lepr lo me, pquitsgzhib mgui haxta bdzin lo mgui liu, rëb mgui lo me:

—Tebaa siguiel luu guñguiac luu naa.

¹³ Dzigo pxobnia me guic mgui, rëb me:

—Zuñguiac naa luu. ¡Niinagazh laa luu guiaanmbe!

Horcogazha laa mgui biaanmbe lo guiedz co.

¹⁴ Dzigo pso Jesús diidz lo mgui, choot lo gzodiidzd mgui zha biac mgui; ni rëb me lo mgui:

—Bzë, güey lo pxoz, güeyson gon ne rnabey xley Moisés gdeed luu; zeena gan zho ganle laa luu biacle.

¹⁵ Niicle sca nëd me gacnan miecha, per znuse znuse rliaal diidz grëtaa milagr ne run me; miech guizhiu ne rdzin lo me, zha ne zie yquiaadiag zhiwseed me, zha ne zieegaa guñguiac me zho tel pe guielguidz ne rzac zho.

¹⁶ Zhiga, zhiga rbiche me lo miech, rie me zaatne choot guienð riezodi-znie me Pxoz me.

Biac tib zha ne gutoo xcuerp

(Mt. 9:1-8; Mr. 2:1-12)

¹⁷ Stib dzew, miech guizhiu ne ndxie lo Jesús noquiaadiag zho zhiwseed me. Nzian grë zha farisé, grë maistr ley, zha ne brieed dib nëz Galilé, dib nëz Judé, zha ne brieegaa Jerusalén, ye zho laa zho no lad co noquiaadiag zho grë mine rnee me.

¹⁸ Laa grë miech co ndxie ga, zeene bdzin bla zha bgui, ney zho stib meñ bgui, zhoobse me lo yag, ib gacd së me sac dipse me gutoo. Gocladz zho nzëëbnie zho me leñ yu ne no Jesús ga, ndzinie zho me lo me.

¹⁹ Per ib gocd nded zho lad grë miech co. Nacne biepaque zho guic yu, pxal zho tiblë guic co, ga pteed zho meñ rzacné co dib yag né zhoob me ga, bdzin me lo Jesús.

²⁰ Zeene gon Jesús ne nli dib zdoo zho rnalo zho me, me guñguiac meñ rzacné co, rëbchaa me lo meñ co:

—Peet tsienied guic luu, niinagazh laa naa guñ perdon grëse xtoļ luu.

²¹ Zeene bin grë zha farisé co, grë maistr ley co sca rëb me, rneechaa zho gza zho: “¿Cho dzigo rzac mgui qui nac me? ¡Falt i gon noyun me lo Dios! ¡Tibaque meñ ne run perdon xtoļ miech, ni lëë meñ co nac Dios!”

²² Bienga Jesús sca quianee zho, dzigo rëbchaa me:

—¿Pe nacne rzac to laa naa quiaayun falt?

23-24 Nli cholze zac guiab laa zho gun perdon xtol miech, per grielod gunguiac zho zho. Golwi ganle laa naa gunguiac mgui rii, zeena gacnan to naa ne nac naa Mgui ne pxeel Dios, ible rap naa poder par gun naa miech perdon.

Dzigo bnee me lo men rzacne co, reb me:

—iNiinagazh guche i, bi yag ne bzhoob luu i, zeen bzè!

25 Zigne sca bnee me, laa mgui co bzoli, squi ndxie grè miech co laa me blis yag co, ine roolnie me Dios laa me zey.

26 Psilo zho grese zho, roolnie zho Dios; lala rzee zdo zho, lala rdzieb zho, rnee zho:

—iNadzesi, laa ne bdzian ncuane gard dzian ne!

Bredz Jesús Levi

(Mt. 9:9-13; Mr. 2:13-17)

27 Blozh ga, laa Jesús brie ga. Ro nēz zieded me gon me tib men lē Levi, zobse men co lo mezh ne rietizh zho dimi ne razh lo zha Roma, sac me rtop dimi co. Dzigo bredz Jesús me tsienal me zhits Jesús.

28 Biaanaque xmez h me ga, guso me ga, laa me zienal.

29 Bded ga, güeynie me Jesús tib wagw lidz me. Grè zha ne run dziin co, ni grèragaa zha ne bdzin ga, tipse brenie Jesús zho grè xpèedscuel me.

30 Blalaa zha farisé, ni zla maistr ley, rlēè zho gon zho sca zobnie Jesús grè zha co, bded ga rebchaa zho lo xpèedscuel me:

—iLēda i gon run to! ¿Pe nacne sca tipse rownie to grè zha ngoopdol co, grè zha beed ne nac recaudador ga?

31 Dzigo rebchaa Jesús lo zho:

—Nanle to ganle, zha ne run rmed, zaatne no zha rzacne ga rquiuin zho, ¿niacxe squiuin zho zaatne no zha ne ndip ndaan?

32 Scaque naa nagon, zialguibd naa zha wen, sinque laa naa zialguib grè zha ngoopdol, zeena gbig zho lo Dios.

¿Pe nacne rcuand xpèedscuel Jesús?

(Mt. 9:14-17; Mr. 2:18-22)

33 Bdziinaque bla zha ne bnbdiidz, reb zho lo Jesús:

—¿Pe nac waa ib rcuand xpèedscuel luu, tibaque quiyow zho, tibaque quiaye zho? Zha xpèedscuel Juan, zha xpèedscuel farisé, rdzian no tibaque nocuan zho, tibaque nonab zho lo Dios.

34 Pquiab Jesús reb me lo zho:

—Zaatne nadien noyac tib guieltsieel, ¿niacxe znabey to ycuan grè zha ne ndxie lo lni, ni ran to laa mgui ne notsieelnia zo lo zho?

35 Per zdziñ dze zeene laa mgui co gbiche, ni zeene laa dze co gdziñ, dzigosi nagon riegual ycuan zho.

36 Blozhse sca bnee me, rēbaque me lo zho:

—Zha ne rquiaabdie lar, tsod zha ne ctsiez xab cub cuee zho tib lē lar ne yquiaabdie zho tib xab gox zho. Sac tiba, znitlo zho xab cub zho ga, ni stiba rdzieeld yquia tib lē lar cub lad lar gox.

37 Scaque zha ne rgotsow vin, tsod zha ne cotsow vin cub tib len guid ne padzeelale noquiuin, sac stsiez vin cuba; lozh ga zigtaa vina, zigtaa guid cow, laaw nitlo ga.

38 Gacxe waa, tel vin cuba none len tib guid cubaque tsotsowa.

39 “Nac cuent rii zig rzac miech vin, zha ne bienle rie vin ne padzeelale notsow, rdziladzd zho guie zho vin cub; sac biaanle guic zho rnee miech: “Vin ne padzeela notsow, miñ co nizhraa rdioow.”

6

*Dze ne rdziiladz zha Israel lo dziin**(Mt. 12:1-8; Mr. 2:23-38)*

¹ Tib vuel, lëëtse dze ne rdziiladz zho lo dziina, bded Jesús zaatne zëëb zho bxtil grë xpëëdsuel me; psilo zho pchoo zho mzion zho bxtil co, zigse runmbe zho zho b co, scase row zhow.

² Gon blalaa zha farisé sca no zho, dzigo rëbchaa zho:

—jLëda i gon noyū to! Golguien ganle dze nda nac dze rii.

³ Pquiab Jesús rëb me lo zho:

—¿Pe gard glab to zaatne ziaad ganle zha been rey David, tib dze zeene pcaabedz me grë me zha ne ziegza me, ni zienied zho pe gow zho?

⁴ Rneew, bzëëb me len yadoo güeynab me grë guietxtil ne nac gon, downie me grë zha ne ziegza me ga; ni loxaque zha ne nacse pxoz, zha cose row guietxtil co.

⁵ Ni rëb me lo zho:

—Gacnañ to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

*Biac tib mgui ne mband tib nia**(Mt. 12:9-14; Mr. 3:1-6)*

⁶ Goj stib dze ne rdziiladz zho lo dziin, güey Jesús len yadoo win ne zob lad guiedz co, psilo me noseed me miech. Lad grë miech ne no len yadoo ga, no tib mgui, mband nia derech me.

⁷ Blalaa zha farisé, blalaa maistr ley no lad co, quialeets zho Jesús dien pe zunguiac me mgui co, dze co; sac quiambëz zho tel laa me gunguiac mgui, dzigo min co yquiaaqui zho tsiezo zho me lo zhiwxtis zho.

⁸ Bien Jesús sca no guic zho, dzigo bredz me mgui co, bnabey me bzo mgui groitaa lo grë zha ne ndxie ga;

⁹ blozh ga rëbchaa me lo zho:

—¿Pe nadien rzac to nonguiel gun ne dze rii? ¿Pe nonguiela gun ne ncuane yquiin, te nonguiela gun ne guielntseeb ye? Zig nac samiech ne zha ne noxtseeb xquielmban, ¿pe maase csaan ne guet zho?

¹⁰ Dze rwi me lo zho tib tib zho, dzigo rëbchaa me lo mgui co:

—jBzigaa nia luu!

Zigne bzigaa mgui co nia mgui, laaw biac.

¹¹ Zeene gon zho sca beenguiac me nia mgui, per nli rlëë zho, psilo zho quianediidz zho dien zha gun zho me.

*Bzo Jesús zha ne tsienee xtiidz me**(Mt. 4:23-25; 10:1-4; Mr. 3:13-19)*

¹² Tib vuel, güey Jesús tib guic gui, dipse guieel blëz me ga bzodiidznie me Dios.

¹³ Biini liu co, bredz me grëse zha ne nac xpëëdsuel me, dzigo lad co ble me tsiipchop zho, zha ne tsepaa tsienee xtiidz me lo miech.

¹⁴⁻¹⁶ Znu lë gza tsiipchop zha co:

Simón (zha ne bleelë me Pedr),

Ndrés (bets Pedr),

Juan,

Jacob,

Lip,

Bartol,

Matew,

Mazh,

Jacob (xingan Alfé),
 Simón (zha ne no lad grë zha ne racladz cuee wxtis Roma Israel),
 Judas (bets Jacob),
 ni Judas Iscariot (zha ne güeyto me).

¹⁷ Cho gui co biet me grë xpëëdsuel me, bdziñ zho tib ro lets. Loxaque bdziñ zho ga, laa stib dzoon xpëëdsuel me bdziñaque lo me ga; zhiits co nal stib dzoon miech, no zho racladz yquiaadiag zhiwseed me, nogaa zho zie ga par guñguiac me zho. Miech guizhiuw, zha ne ziaad nêz Judé, zha ne ziaad nêz Tiro, zha ne ziaad nêz Sidón, zha ne brieegaa Jerusalén.

¹⁸ Nzian grë zha co nosacsi menox, grëse zho beenguiac me zho.

¹⁹ Rbig be grë miech co racladz zho xen zho lad xab me, sac ran zho, zha ne rzhen lad xab me, tel pe guielguuidztaa rzac zho, runguiac me zho por grëtaa poder ne rap me.

Cho nac zha ne wen zie

(Mt. 5:1-12, 38-48; 7:1-5, 12)

²⁰ Dzigo dze bui Jesús lo grëse zha ne nac xpëëdsuel me, rëb me lo zho:

—jWen zie zha ne rien none gbig zho lo Dios, sac ib zdziñ zho zaatne rnabey me!

²¹ jWen zie zho! Sac niicle telne noyan zho gbin, per me gdeed ncuaane yquuin zho; niicle tel no hor mban rac zho roon zho; per zdziñ dze ne gdeed me tib guielbley nroob lo zho.

²² Zig nac to, zeene csilo miech glëënie zho to, guñxoon zho to, yquiaago zho to, gneenë zho to, sac zho haxta ni lë to gondraa zho, loxaque ne nac to zha ne no xnêz Mgui ne pxeel Dios nu, jwen zie to ga!

²³ jNley golco zdoo to dze co, nguieel golgac, sac gon tib guielnzaac nroob ne gneedz Dios lo to! Golsoladz ganle, scaque been pxozgol zho grë zha ne pxeel me padzeela biadnee xtiidz me.

²⁴ Sangue grë zha ne rzac grëse ncuaane rquuin zho quianie zho, ib rquiind zho gbig zho lo Dios, jprobsaxe zho, sac lo guidzliu riise gac ncuaan co guielbley lo zho!

²⁵ jProbsaxe zho, sac niicle ne grëw quianie zho niina, per zdziñ dze gan zho ganle zha nac gbin; rlozhd gzhidz zho, rlozhd gley zho niina, per zdziñ dze laa zho gan ganle zha nac guielnë!

²⁶ Padzeela, biaad bla zha ne pquidie rëb zho Dios pxeel zho, bio pxozgol to bleynie zho zho, jprobsaxe to telne yguib to sca gleynie miech to!

²⁷ Golquiaadiaga ganle: Zha ne rlëë lo to, golleynie zho, tel pe nac xliaadz zho golgacnie zho.

²⁸ Zeene rdzibdee zho to, golnab lo Dios gunlay me zho; zeene rsacsigaa zho to, golnab lo Dios yquia zdoo me zho.

²⁹ Tel gneedz zho tib puñet lo to, gzoobd nia to, golsaan zho maase yquiaa zho stiba.

jZha ne gla xabnal to, golsaan maase ye biaagw güey zho.

³⁰ Zha ne gnabtaa pe cos lo to, goldeeda; tel scasegaa xen zhow, ib gnabde tow lo zho.

³¹ None zaacse gac to lo miech, zeena scagaa zha, zaacse gac zho lo to.

³² Sac gon, tel loxaque zha ne ndzieeldiidz to, zha cose rleynie to, jled ncuaan nroobd ga run to! Haxta grë zha ntseeb run min co.

³³⁻³⁴ Tel loxaque zha ne runsegaa favor lo to, lo zha cosegue run to favor; zeene rungaat to tib pextad, lo zha ne rgobeyse to zguizh lo to, lo zha cose runxtad to, jni lalnu peet nond ncuaane run to ga! Sac gon haxta grë zha ntseeb run min co.

35 'Golguien sca, none gleynie to zha ne rlëe lo to, none gacnie to zho lo xliaadz zho. Zha ne guiaad tib pextad lo to, goldeed ncuaañe rnab zho, ib guiabde to nend lega scase gun to favor co lo zho. Zha ne gun grë min rii, nroob guielnzaac ne gdeed Dios lo zho, ni ga glu zho ganle nli xpëed me nac zho; sac gon tel me wen me lo grëse miech, niicle zha ne run falt lo mew, niicle zha ne riendgaa gdeed xquizh lo me, rsaand me zho.

36 Ndzinli sca golgac, zigne sca wen PxoZ to lo grëse miech, scaque none wen gac to lo zho.

37 'Ib gunde to në gac zdoo to, zeene ran to ncuaañe nonguield ne run stib miech, sac to tozhal gunquizh zhow; zeena scagaa Dios gunscaD me to. Golguien none gun to samiech to perdon, zeena scagaa Dios zun me to perdon;

38 sac grëse ncuaañe run miech, mincoque rcaania zho. Grëse ncuaañe gun to, scaania tow, ni haxta ndziibraa mine ycaania to. Sac ncuaañe gun to lo samiech to, mincoque gun Dios to.

39 Blozh sca bnee me, dzigo rëbchaa me:

—Golwi ganle, zig nac zha ne rold lo, ¿niacxe zrieelo glu zho nëz lo stib zha ne rold lo? Zha ne sca gun, tel griel ni tib zho zaatne nac tib ro blë, ib tedsod grop xcuaa zho tsietsobe ga.

40 'Grë zha ne nac mëedscuel, tsod zha ne racraa lo zha ne noseed zho; haxta csiaalraa zho zhiwseed zho, ni telne tsoxco zhow, dzdin zho medid co.

41 'jLëda ga gon tso to lozhd gzee zdoo to dien cho pe run, ni nenda mazdraa mine run to!

42 ¿Pe ro to glisqui to mine run stib zho, ni tel mazdraa nac mine run to? jGolguien sca glude to ncuaañe nacde to! jGlo goltsoxco ndzinli gac to, dzigo lozh ga zac tsienee to zha gacndzinli stib zho!

*Nex rlu zha nac tib tib yag
(Mt. 7:17-20, 24-27; 12:34-35)*

43 'Tib tib yag rdeedsew xnexa. Grielod yquia nex ncuaañ tib lo yag ne rdeed nex wen; grielodgaa yquia nex wen tib lo yag me rquia nex ncuaañ.

44 Tel zha nac nex ne rquia lo yag, gase rlu zha nac yag. Tsod yag guiets ne yquia guigw lo; ni tsodgaa lbë zarz ne gdeed uv.

45 Scadaa nagon nac miech, zha ne wena, ncuaañ wen run zho, diidz wen rnee zho, sac desde zdoo zho no guielwen co; laa zha ne ntseeb, niapse ncuaañ ntseeb run zho, niapse diidz dox rnee zho, sac desde zdoo zho no guielntseeb co. Gacxe waa, tel zha rzë xtiidz tib miech, gase rlu zha nac zdoo zho.

46 'Griyelod lega gnee to, naa rnabey to, sac zha ne rneew ib none gun zho mine rnabey naa. Nzian zha ne rnee, naa rnabey zho, ni runD zho mine rne naa.

47 'Zha ne rquiaadiag mine rne naa, ni rioxco zho rban zhow zigne naca,

48 rrieequia nac zho ga zig tib zha ndzielguic ne quiet blee xcimient lidz, psilo zhow haxta zaatne bgaa lo quie. Niicle riab guiedox, peet racd lidz zho, nis naal ne raclo rded zaatne zoba ga, per rbixcheda.

49 Laa zha ne rquiaadiag xtidz naa, ni rioxcoD zho gban zhow, ziaad gac zho zig tib zha nxen ne güeyzoob lidz laglaase lo liu. Znuse bnitlo lidz zho, sac zeene biab guiedox, lo nis naal ne goclo bded zaatne zoba, znuse bixchew, ni stib lëw biaand.

7

Biac tib zha ne rquia dziin tib lo menꞑuiib

(Mt. 8:5-13)

¹ Zeene blozh bnee Jesús lo grë miech co, dzigo laa me wbi ga, bdziñ me Capernaum.

² Lëëtaaque len dze co rzacnë tib zha ne run dziin lo tib men ne rnabey lo xmenguiib zha Roma, no guiedz co; nzhoo rac zho zootle laa zho guetle. Rleyniedox men co zho,

³ zigne bin me laa Jesús bdziñ, lëëlëd pxeel me bla zha ne nac zha non lo menguiiedz Israel, güey zho güeynee zho lo Jesús siguiel Jesús tsiegunꞑiac Jesús zhingundziin me.

⁴ Bdziñ zho bnab zho lo Jesús siguiel me tsie me.

—Bzhiguiel been xyudar me —rëb zho—. Tib zha wen nac me,

⁵ rleynie me menladz ne, haxta bzaa me tib xyadoo no lad guiedz nu.

⁶ Dzigo zienal Jesús zhits zho. Zhile gdziñ zho lidz men rnabey co, zeene bdzieelo zho bla zha ne ndzieeldiidz me, zienie tib xtiidz me lo Jesús. Rzë xtiidz me, rëb me:

—Bzhiguiel mazd guiaate luu. Naraa rien naa choot nacd naa, par csodziin naa lo luu guiaad luu haxta ro lidz naa.

⁷ Nligaa rien naa tib zha winse nac naa par gbig naa lo luu, gane niicle biald naa nialdziel naa luu. Nanpaa naa, zaatne ziaad luu i, con tib lan xtiidz luu zac gnabey luu guiac zhingundziin naa.

⁸ Sca rnee naa, sac tel naa no zha ne rnabey lo naa, zeene rnabey zho naa none gon naa mine rnee zho; scaque zhaguiib ne rnabey naa, zeene rne naa tib lo zho: “Güey nu”, rie zho; zeene rnegaa naa: “Dë nu”, riaad zho; zha ne nacgaa zhingundziin naaw, mine rnabeytaa naa zho, run zhow.

⁹ Zeene bin Jesús sca rzë xtiidz men co, bzee zdoo me, ptsire lo me, rëb me lo grë zha ne zienal zhits me:

—Golwi ganle pa lotaa rnalo men qui Dios. Lo grë zha Israel gon, ni tib zho gard gan naa squitaa dib zdoo gnalo Dios.

¹⁰ Grë zha ne güey mandad ga, zeene bdziñ zho gon zho laa ngundziin co biacle.

Rrieban xpëed tib wnaa viud

¹¹ Bded ga, güey Jesús tib guiedz lë Naín grë xpëedscuel me, miech guizhiu ne zienal zhits zho.

¹² Zeene bdziñ zho gax ro guiedz co, lëëtaaque bdzieelo zho tib dzoon miech ziequeets xpëed tib wnaa viud; lëëse mëed ga lo wnaa co.

¹³ Gon Jesús zha rac me, pquia zdoo Jesús me, wbig Jesús rëb Jesús lo me:

—jGoondraa luu!

¹⁴ Dzigo bzhen Jesús yag ne zhoob ngutoo co. Zeene gon gza zha ne nxobyen yag cow, hor co bzodze zho; dzigo bnee me lo mëed co rëb me:

—Xin, iguche i!

¹⁵ Horcogazha brieban niib co, bzobli niib, laa niib psilo bnee.

Rley xniala niib, pcaania me niib.

¹⁶ Zeene gon grë miech co sca brieban mëed co, lala rdzieb zho, lala rdeed zho xquizh lo Dios, rnee zho:

—jTib men nroob ne gon ziadteed xtiidz Dios i, ziaad lo ne! jLaa ne bdzian niina ganle, laa Dios ziaadgan ne, ziadbee me ne lo xquielnë ne!

¹⁷ Gdipse nëz Judé, ni grëraa guiedz ne ndxie dib gax ga, gocnan miech milagr nroob ne been Jesús ga.

Zha ne pxeel Juan Bautist

(Mt. 11:2-19)

¹⁸ Bin Juan Bautist grëtaa milagr ne run Jesús ga, sac rie xpëëdsuel Juan riezdiidz zhow lo Juan. Dzigo pxeel Juan chop zho,

¹⁹ zienabdiidz lo Jesús, dien pe me nac Men ne nole diidz ga cxeel Dios, te dzigora gdzin men co ye.

²⁰ Bdzin zho lo Jesús, wbig zho lo me, rëb zho:

—Laa Juan pxeel no ziaadnabdiidz no lo luu, dien pe lëële Men ne nacle diidz ga cxeel Dios i nac luu, te naraa guiaad me ye.

²¹ Lëëtaaque ndal miech ndxie lo me ga, quiayunguiac me grë men rzacne. Nzian zho, tel pe guielguiidztaa rzac zho, no zho nosacsi menox, no zho rold lo, grëse zho runguiac me zho.

²² Dzigo rëbchaa me lo zha ne pxeel Juan ga:

—Grëse mine bin to rne naa, grëgaa ncuane gon to quiayun naa, goltsie golzodiidza lo Juan. Ran to ganle, grë zha ne rold lo, zha ne në ni, zha ne rlan guiedz lepr, zha ne rcuaat, grëse zho laa zho riac, haxta grë mengut, rrieeban. Grësew golzodiidza lo me, golguiab lo me ganle blactaa zha ne rquiin gbig lo Dios, laa zho noquiaadiag xtiidz Dios;

²³ ni golguiab lo me: dichos zha ne tiblrique rliladz cho nac naa.

²⁴ Zeene laa xpëëdsuel Juan zey, dzigo psilo me bzeet me Juan lo grë miech guizhiu ne ndxie ga, rëb me lo zho:

—Zeene dien güey to dan ngan ne bio Juan ga, ¿zha güeynie guic to nian to me? ¿Pe rëb to rlu me zig tib goobgui ne nëzrii nëzrec rey me,

²⁵ te rëb to ye masaque grë lar niazh ne racw zha non nacw me? Per nanle to ganle, zha ne scataa racwxab, len grë yu ne rzob zha rnabey, ga rio zho.

²⁶ Nligaa cho güeynie guic to nac me, ¿te rëb to ye tib men ne noteed xtiidz Diosa?

‘Gacnan to ganle, tib men ne noteed xtiidz Dios gon nac me, ni me nac tib zha ne mazdraa nroob lo grë zha ne ziyun dziin co.

²⁷ Me ga raquiet lo Xtiidz Dios, zaatne znu rnee: “Sxel naa tib zha ne tednerga lo luu, zha co gzhixcuua nëz ne ted luu.”

²⁸ Ne nligaa lo grëse mgui ne zieded lo guidzliu, gard grieequia tib zha ne mazdraa non lo Juan Bautist; per zha ne gon winraa zaatne rnabey Dios, nonraa zha co lo me.

²⁹ Len dze ne nochoobnis Juan miech ga, ndal zha ne bin zhiwseed me, haxta grë zha ne rtop dimi ne razh lo zha Roma, bien zho nonguiela gun zho mine rnabey Dios, güey zho pchoobnis Juan zho.

³⁰ Sangue grë maistr ley ni grë zha farisé, pe liaadz zho nion zho mine rnabey Dios, ib güeyd zho nchoobnis Juan zho.

³¹ Blozhse sca bnee me, rëbchaa me:

—Nac grë miech ri, ib riend zho pepaa racladz zho. ¿Cho ganle run zigne run zho?

³² Lëë zho run mine run grë mëëdlas ne rio wguit dib ro nëz. Niicle rool xcompañer win di nguieel, rieded win; niicle roolga zho di ngan, roond win.

³³ Sac gon, ziaad Juan, ran zho rowd me grë ncuane nac xquielwagw zho, niicle vina ried mew; dzigo rnee zho menox nacie me.

³⁴ Blozh ga, ziaad Mgui ne pxeel Dios, ran zho row me, rie me, laa zho rneeque lega rowcho me, lega riecho me vin; ib riend me cho rtsieelsa me, haxta grë zha yozh ne rtop dimi ne razh lo zha Roma, haxta grë zha ngoopdol rzënie me.

³⁵ Sca rnee zho, sangue zha ne rgaa guielbiini ne rdeed Dios, rien zho cho nac zha ne ziaadgun xtsiin me.

Güey Jesús lidz tib zha farisé

³⁶ Tib dze bredz tib zha farisé Jesús güey me tib wagw lidz zho. Bdzin me, bded me bzob me lo mezh.

³⁷ Lad guiedz co no tib wnaa ro nêz, bin me laa Jesús bdzin lidz zha farisé co, dzigo bi me tib bot nceit nex, tiblo nceit niazha, brie me zie me nêz lidz zha co.

³⁸ Bdzin me ga, wbig me zaatne zob Jesús, psilo me roon me. Zigse roon me, lëeque nis ne riet lo me ga, bdiib me ni Jesús, ni pcuidz mew con guits guic me. Dzigo ptsieelro mew, blozhse ga blee me nceit co bdëeb mew.

³⁹ Zeene gon zha farisé co sca been wnaa co, bza zdoo zho rëb zho: “Telne niaca mine nli men ne ziadteed xtiidz Dios nac men qui, nien me ganle tib wnaa ngoopdol i, ndeete me diidz squitaa nguëëbnia zho zhits ni me.”

⁴⁰⁻⁴¹ Dzigo bnee Jesús lo zha farisé co yquiaadiag zho chop lan xtiidz me, rëb me:

—Pquiaadiaga ganle Simón: Chop mgui name, quia zho guielqui lo men ne blediin dimi lo zho. Tib zho zëeb gaay mil pes plat, stib zho zëeb gaay gayoow.

⁴² Gonse men co ni tib zho rdzielz zha quizh zho dimi co, dzigo mazd pquia zdoo me zho, beenquizhd me zho xquielqui zho. Bnë nasca dien, lo grop zha co, zcho mazdraa sac zdoo mine been men co?

⁴³ Dzigo pquiab Simón, rëb Simón:

—Par naa, zha ne nroobraa xquielqui ga, zha co sacraa zdoo mine been me.

—Scaw gon —rëb Jesús—.

⁴⁴ Mincopaa nagon squi rac wnaa prob qui! Gon ganle zeene bzëeb naa lidz luu, bneedzd luu nis niar ni naa; mazd me gon bdiib me ni naa, maase niicle con nis ne biin me bdiib mew, ni haxta pcuiidz mew con guits guic me.

⁴⁵ Zeene blanso naa per ni tib bzhid bneedzd luu nquiaabdiuzh luu naa, laa me gon wlal ne blanso me nu tibaque quiatsieelro me ni naa.

⁴⁶ Nac costumbr none nchoob luu nceit guic naa, per been luuw; mazd mele gon biaad biadtëeb me nceit nex rii zhits ni naa.

⁴⁷ Laa me noyuñ min rii, sacne nlipaa rzac zdoo me ben naa me pardon grëtaa dol dox ne nzëeb me. Zigne rneeque ne ga, tel zha ne zhis xtolä, zhi rzac zdoo zho zeene laa zho rac pardon.

⁴⁸ Dzigo bnee Jesús lo wnaa co, rëb Jesús peet tsienied guic me, laa Jesús beenle pardon grëse xtol me.

⁴⁹ Zha ne zobgza Jesús lo mezh ga, zeene gon zho sca rëb Jesús psilo zho rnabdiidzlsa zho, rnee zho:

—zcho dzigo rzac mgui qui nac me? zZha nacne guiab me laa me been pardon xtol wnaa qui?

⁵⁰ Horco biire Jesús bnee me lo wnaa co, rëb me:

—Laa naa psilaa luu lo xtol luu, sac dib zdoo luu bnalo luu naa. Bzë naa, peet tsieniedraa guic luu.

8

Güeyseed Jesús miech dipse Galilé

¹ Bded ga, brie Jesús grë xpëëdsuel me güey me grëraa guiedz ne ndxie nêz Galilé ga, zigtaa guiedz nrooba, zigtaa guiedz wina, güey me güeynee me lo miech zha racladz Dios gban zho.

²⁻³ Ye blalaa men wnaa güeynal zhits zho, tel pe ncuaane quianie grë men wnaa co, rdeed zhow run zho xyudar me; sac rzac zdoo zho beenguiac me zho. No zho beenguiac me lo guielguidz, nogaa zho benxoon me mendox ne nosacsi zho. Ga güeynal tib wnaa lë Mari Magdal (lëe wnaa co benxoon Jesús

gadz men^dox ne nosacsi me), ga güeyna^l stib men^l lë Zhuan (lëë tsieel Chuz ga, men^l ne quianap grë lo xtsiin rey Herod) ni stib men^l lë Susan.

Nac Xtiidz Dios zig zhobxtil
(Mt. 13:1-23; Mr. 4:1-20)

⁴ Tib dzew, miech guizhiu ne pcaalsa lo Jesús; nzian guiedz ne brieë zho bdziⁿ zho lo me. Laa me noseed zho, zeene bzodiidz me tib cuent rii lo zho, rëb me:

⁵ —Tib mgui name, brieë zho güey zho gon zhobxtil. Zeene laa zho quialaal zhob co liu, now bliaa^l gax ro nëz, now bliaa^l lad quie, nogaaw bliaa^l len^l yag guiets. Miⁿe bliaa^l ro nëz ga, zha ne bded bzëni zhow, blozh ga güeyaque grë mguin^l dow maw.

⁶ Miⁿe bliaa^l zaatne nac lad quie, blana per znuse bidza sac guiend^l gop ga.

⁷ Miⁿe bliaa^l len^l yag guiets co, zigne blana blanaque stib dzoon yag guiets, znuse bnitlo yag guietsa.

⁸ Sangue miⁿe bliaa^l zaatne nac niapse lo liu, blana, brooba, ndzon goca, tib tib zhob ne biab liu ga now goc haxta tib gayoo zhob.

Blozhse bzodiidz me cuent co, nguiedz bnee me lo zho rëb me:

—i Zha ne racladz guien^l miⁿe rne naa, yquiaadiag zhow!

⁹ Dzigo wbig grë zha ne nac xpëëdsuel me, bnabdiidz zho lo me dien^l zha nac cuent co.

¹⁰ Rëbchaa me lo zho:

—Tel^l to, Dioszhal rlu lo to gan^le zha rnabey me, niicle ncuane mazdraa nguetsa; sangue grëraa zha ne squi gard gbig lo me, niapse con cuent rzodiidz naaw lo zho, parne guien^l zhow; per niicle scaw, ib rzoobdiagd zhow, ib rioguicd zho zha naca.

¹¹ Znu gon^l nac cuent co: Zhobxtil co nac Xtiidz Dios.

¹² Ro nëz ne sca bliaa^l zhob co, ga rlu gan^le zha rzac zha ne rquiaadiag Xtiidz Dios, per znusaque rdziⁿ men^dox rquiil ma zho gliladzd zhow, zeena laad zho lo dol.

¹³ Lad quie ne bliaa^l spalala ga, ga rlu zha rzac zha ne rley rquiaadiag Xtiidz Dios, rley zho rcaania zhow, per rcaaniad zhow dib zdoo zho. Nli rliadz zhow palal dze, per zeene ran^l zho zha run^l miech zho, zha rnee miech lo zho, rsaanga zhow.

¹⁴ Nogaa zho nac zig len^l yag guiets co. Rquiaadiag zho Xtiidz Dios, per laa ne tsoniew guic zho, lel rsilo zho grë zhgab ne dien^l zha gapchen^l cho, dien^l zha gdeedguxt xcuerp zho lo guidzliu rii, miⁿ co rionie guic zho; pa së zho gban zigne rnabey Dios.

¹⁵ Laa lo liu naa^l co, ga rlu gan^le zha rzac zha ne nguudz zdoo. Zeene rquiaadiag zho Xtiidz Dios, dib zdoo zho rcaania zhow, dib zdoo zho rliadz zhow. Grëse ncuane run^l zho, ndzinli rrieequiaw; sac tiblique rac zho.

Xcuent biini
(Mt. 12:46-50; Mr. 3:31-35; 4:21-25)

¹⁶ Blozh ga, bnee me lo grë miech ne ndxie ga, rëb me lo zho:

—Tsoz zha ne yquiaagu^l tib biini, lozh ga ctoos zho pe cos low, gzolangaa zhow tib zhan lon. Sac biini ne rquia, glaa rzoba par gziiniw len^l yu, zeena guiab biini lo grëse zha ne sëëb len^l yu.

¹⁷ Scaque nagon^l, grë ncuane rac nguets, grë ncuane rnee miech zhli-aaⁿ, none xoobneⁿa.

¹⁸ Wen wen golquiaadiag miⁿe rne naa, ni goltsoxcow. Sac zha ne tsoxcow, zdedraa Dios guiel^lbiini lo zho; sangue zha ne tsoxcoda, haxta tel^l palalse guiel^lbiini ne rzac zho quianie zho, stiche mew.

¹⁹ Dze co, scaque noseed me miech, zeene bdziñ xniaa me ni zha bets me ziegan zho me. Per brieelod ndziñ zho haxta lo me, sac miech guizhiu ne ndxie lo me ga.

²⁰ Dzigo rëb tib zho lo me:

—Laa xniaa luu goñ, ni zha bets luu bdziñ ley ziaadguib zho luu.

²¹ Pquiab me rëb me:

—¿Xnia naa ye, bets naa ye? Grëse zha ne goñ rquiaadiag Xtiidz Dios ni rioxco zho mban zhow, lëe zha co nac xniaa naa, zhà co nac bets naa, zha co nac bzian naa.

Pcuëez Jesús tib medox
(Mt. 8:23-27; Mr. 4:35-41)

²² Tib bdze dze, bzëëbnie Jesús xpëëdsuel me tib len barcw, rëb me lo zho, tedquia zho stib nëz ro nis co.

²³ Laa zho zie lo nis co zeene laa me gootgues. Tibaque zeene psilo brieet tib medox, masaque riasoli lo nis co, zootle laa barcw ne no zho ga yguuitsle len nis.

²⁴ Zeene goñ zho scataa ntseeb rac lo nis co, lëëlëd güey zho güeycuaan zho me.

—¡Maestro! —rëb zho—. ¡Blee mcaal lo luu ganle, laa ne nonitlo lo nis rii niina!

Dzigo guche me bnee me lo me co, ni bnee me lo nis co. Zigne bnee me, dzese biac me, dzese bre nis co.

²⁵ Dzigo rëbchaa me lo zho:

—¿Pe nacne rdzieb to? ¿Niacxe riladzde to Dios dib zdoo to?

Ne nligaa rdziej zho, ni lala rzee zdoo zho, rnabdiidzlsa zho rnee zho:

—¿Bay cho nac me? ¿Zha nacne haxta me, haxta nis ron xtiidz me?

Men Gadar ne nosacsi mendox
(Mt. 8:28-34; Mr. 5:1-20)

²⁶ Bdziñ zho stib nëz ro nis co, ga nac xtan zha Gadar. Zo zho ga, nëz dan squi riaan xtan zha Galilé.

²⁷ Laa Jesús bietdze len barcw, zeene laa tib mgui ne no nëz co bdziñ lo me. Mban rlu mgui co nosacsi mendox me, niicle xab me nacwdraa me; ìb rbëzd me lidz me, niapse grë len xpaà ngutoo rio me.

²⁸ Zeene goñ me Jesús, masaque roptsie me bdziñ me pquiitsgzhib me lo Jesús, zëeb tsi me rnee me:

—¡Psaan naa Jesús! Nanpaa naa goñ Xpëed Dios nroob ne zob gbaa nac luu. ¡Bzhiguiel csacsid luu naa!

²⁹ Per mendox co sca rnee, sac hor co laa Jesús bnabeyle ma csaan ma me. Ziele dze sca nosacsi ma me, ntseeb rac me, niicle rzoob zho caden ni me, rzoob zho caden nia me, parne paat tsied me, znuse rchug mew; dzigo rienie mendox co me rquianzé me grë dan ngan, zaatne choot miech guiënd.

³⁰ Dzigo bnabdiidz Jesús lo ma dien cho lë ma. Pquiab ma rëb ma:

—Legion lë no.

Sca rëb ma sac nzian nac ma no ma zdoo mgui co.

³¹ Ni bnab ma lo Jesús gzonëzd me ma lo ncowdoo ne noraa ma ne nacgrë ma.

³² Gaxaque ga ndxie tib dzoon nguts notop lag, bnab ma gdeed me diidzbey lose grë nguts co gdziñ ma. Dzigo bdeed me diidz.

³³ Horco laa grë mendox co psaan mgui co, güeyseëb ma zdoo grë nguts co. Psilo grë nguts co rquiaa ma corr, güeypix ma tib ro yeedox ne quia ro nis co, bliaal ma haxta lo nis; grëse ma gut.

34 Grē zha ne quianap nguts co, bzhoon zho, rias zho güeyzodiidz zhow lad guiedz, ni grēraa yu ne zob gax ga.

35 Nacne brieē grē miech co ziewi zho. Zeēne bdziñ zho, per nli bdzieb zho gon zha laa meñ co zob gax lo Jesús, laa me nacwxable, rlu niinile nac guic me.

36 Psilo grē zha ne gon zha biac me rzodiidz zhow lo grē zha ne bdziñ ga.

37 Mazdraa bdzieb grē miech co bin zhow, dzigo mazd bñab zho lo Jesús siguiel me gbi me xtan zho.

38 Zeēne laa Jesús zie sēēb me leñ barcw par gbi me ga, dzigo wbig mguī co rñab me lo Jesús siguiel Jesús tsienal me zhits Jesús; per bzhiguiel d Jesús nienal me, rēb Jesús lo me:

39 —¡Biaan! Güey, güeyzodiidz lo grē meñlidz luu ganle zha nactaa milagr ne been Dios beenguiac me luu.

Dzigo wbire meñ co. Güey me lad guiedz, grēse lo miech güeyzodiidz me zha nactaa guiel nzaac ne been Jesús ga, beenguiac Jesús me.

Brieēban tib xpēdwñaa tib meñ lē Jair

(Mt. 9:18-26; Mr. 5:21-43)

40 Zeēne laa Jesús biire bdziñ stib nēz ro nis co, miech guizhiu ne quiambēz me ga, rley zho gon zho laa me bdziñ.

41 Loxaque bdziñ me, laa tib meñ ne rñabey yadoo lē Jair wbigle pquits-gzhib lo me. Rñab Jair siguiel me tsienal me lidz Jair tsiegunguiac me tib xpēdwñaa win Jair.

42 Nzhoo rac mēēd co, tib mēēd tsiipchop iza, ni lēēse mēēd ga lo me.

Dzigo laa Jesús zie nēz lidz meñ co. Miech guizhiu ne zienal zhits me, haxta rtaagw zho me.

43 Lad grē miech co zienal tib wñaa rzacnē, gocle tsiipchop iz rlan me tib guielguidz, rzac me zigne rzac grē meñ wñaa gzob mēē; tibaque rlan mew ib rbēzda. Grēle ncuaane rap me bloozh me lo grē meñ ne ruñ rmed, per ni tib zho runguiacd me.

44 Laa me no lad co, tibaque wbig gax me nēz zhits Jesús, bzheñ me ni lar ne mbix Jesús; hor cogazha laa me biac.

45 Bien Jesús sca bzheñ wñaa co lad xab me, dzigo rēbchaa me:

—¿Cho ga bzheñ lad xab naa?

Grēse zho rnee led zhada. Dzigo rēbchaa Pedr lo me:

—Maestro, wi ganle zha ndaagwtaa ziaad luu lad grē miech rii, haxta rcheep zho luu, ¿zha nañ luu choot xend lad xab luu?

46 —Per no cho bzheñ lad xab naa —rnee me—, sac bienpaa naa beenguiac naa zho.

47 Zeēne gon wñaa co bien Jesús sca bzheñ me lad xab me, rdzieb me laa me wbig pquitsgzhib me lo Jesús. Squi ndxie grē miech co, bzodiidz me zha nacne sca been me, ni zha zigne bzheñ me lad xab Jesús laa me biac.

48 Dzigo rēbchaa Jesús lo me:

—Xin, laa luu biac sacne dib zdoo luu bñalo luu naa. Bzē na, peet tsieniedraa guic luu.

49 Laa Jesús bii quianeeque lo wñaa co, zeēne laa tib zha ne nac mandad ziaad nēz lidz Jair bdziñ, rēb zho lo Jair:

—Csodzindraa luu lo meñ qui, laa xpēēd luu gutle.

50 Zeēne gon Jesús sca rēb zha co, rēbchaa me lo Jair:

—Peet tsienied guic luu. Dib zdoo luu bñalo Dios, zeēna peet gacd xpēēd luu.

⁵¹ Bdzin zho lidz Jair, psaandraa Jesús na_l grè miech co zhits me ndzin zho zaatne nix mëéd co. Loxaque Pedr, Jacob, ni Juan, pxoz win ni xniaa win bzëëbnie me len yu ne nix win.

⁵² Grè miech ne ndxie ga, roon zho no zho xquie_lne win; dzigo rëbchaa Jesús lo zho:

—Goonde to; sac gon nixguiesse mëédwin rii, gute win.

⁵³ Psilo zho le_l rzhidznie zho me, sac nan_paa zho gutle win.

⁵⁴ Dzigo wbig me, bzhen me nia win, nguiedz bnee me lo win, rëb me:

—¡Guche i na, ndzoop yeen!

⁵⁵ Zigne sca bnee me, laa mëéd co brieegan, laa win guche ga; dzigo bnabey me bguiaan zho win.

⁵⁶ Zigtaa pxoz wina, zigtaa xniaa wina, per nli rley me. Dzigo pso Jesús diidz lo me, choot lo godzidzd me zha brieegan win.

9

Pxeel Jesús xpëédscuel me güeyseed zho miech

(Mt. 10:5-15; 14:1-12; Mr. 6:7-29)

¹⁻² Tib dze bredz Jesús gza tsiipchop xpëédscuel me, pxeel me zho tsienee zho lo miech gacna_n zho zha racladz Dios gban zho; bdeed me poder lo zho gun_cxoon zho grè mendox ne nosacsi miech, ni gun_guiac zho grè men_n rzacné.

³ —Goltsie —rëb me lo zho—. Per ib güeyde to ncuaa_ne yquiin to nëz. Zig nac dimi, zig nac ncuaa_ne gow to, pe bziuud, pe baxtongaa, güeyde tow; xab tow, mi_ne nacwse to mi_ncose goltsienie.

⁴ Guiedz ne gdzin to, zha ne gneedz zaatne cuëz to, lidz zha co gol_ccuëz, haxta gdzin dze ne gbi to guiedz co.

⁵ Per telne gdzin to tib guiedz, néd miech yquiaadiag zho mi_ne zienee to, dzigo gollit grè yudie co ni to, gol_rieegazh ga, zeena guien zho gan_le dol ga been zho lo Dios, néd zho ycaania zho xtiidz me.

⁶ Dzigo laa zho brieeg, laa zho zie. Grëse guiedz ne ndxie dib gax ga, güey zho güeynee zho Xtiidz Dios lo miech, ni beenguiac zho grè men_n rzacné.

⁷ Bin rey Herod rzeet zho Jesús, sac tel pa lotaaw zëëb diidz grëtaa milagr ne run me. Grè miech co, no zho rzac Juan Bautist ga brieegan, lëë me ga nac Jesús;

⁸ nogaa zho rnee bod Líw, men ne biadteed xtiidz Dios padzeela, me ziaad stib; zzhisгаа zho rnee no cho stib men biadteed xtiidz Dios padzeelaw, sinque brieegan me gane ziaad me stib.

⁹ Zeene ron Herod rnee grè miech co lëë Juan ga, rio me zhgab, rnee me: —¿Bay cho nac men co? Per gacda Juan; naazhal name bnabey pchug zho yan Juan.

Racladz Herod tebaa zha gan me Jesús.

Bguiaan Jesús gaay mil miech

(Mt. 14:13-21; Mr. 6:30-44; Jn. 6:1-14)

¹⁰ Goc bla dzew, laa grè zha ne pxeel Jesús ga wbire bdzin lo me. Blozhse bzodiidz zho lo me grëse tel zha güey zho, dzigo güeynie me zho tib lugar riaan gax guiedz Betsaid.

¹¹ Zeene bin grè miech co laa me brieeg, dzigo brieenal zho me, bdzin zho lo me ga. Zeene gon me zho, rley me pcaania me zho, bnee me lo zho zha racladz Dios gban zho, ni beenguiac me grè zha ne rzacné.

¹² Laa dze rdzelew, wbig gza tsiipchop xpëédscuel me rëb zho lo me, mazd gnee me lo grè miech co gbi zho ga; zeena guiob tsie zho grè guiedz las, grè

yu ne riaan gax ga, yguib zho dien pa cuëz zho, yguib zho dien pe gow zho; sac choot miech nod ga.

¹³ Dzigo rëbchaa me lo zho:

—To goldeed ncuuaane gow zho.

Pquiab zho rëb zho:

—Gaayaque guietxtil ni chop mel ziaadnie no nu, ipe rnase ncuuaan co lo grëtaa miech qui! Niicle niaca mine gziuu ncuuaane gow zho, pe zhidaa dimi yquiin, ¿pa guioxi now?

¹⁴⁻¹⁵ Nligaa miech tafa, zig gaay mil rgaaloxaque zha bguise. Dzigo bnabey me zho güey zho, güeynee zho lo grë miech co sob zho, cue zho grol gayooga, grol gayooga zho tib lugar.

¹⁶ Laa grë miech co bzob, dzigo bzhen Jesús gza gaay guietxtil co ni grop mel co, blis lo me nëz gbaa, bdeed me xquizh lo Dios. Blozhse ga, beengrol me gza guietxtil co, mel co ne, dzigo zigse rdeed mew lo xpëedscuel me, scase scase rguiz zhow lo grë miech co.

¹⁷ Grëse zho dow haxta zaatne bieltaa zdoo zho; ni zeene blozh dow zho, biodzë tsiipchop chicuid bio grë mine biaan.

Bnee Pedr cho nac Jesús

(Mt. 16:13-19; Mr. 8:27-30)

¹⁸ Tib dze biche Jesús lo miech palal, güey me tib zaatne güeyzodiidnie me Dios; loxaque xpëedscuelse me güeynal zhits me. Ga bnabdiidz me lo zho rëb me:

—¿Cho dien ron to rnee miech nac naa?

¹⁹ Pquiab zho rëb zho:

—No zho rnee Juan Bautista, nogaa zho rnee Lív (men ne biadteed Xtiidz Dios padzeela); nogaa grol zho rnee no cho stib men ne biadteed Xtiidz Dios padzeelaw, sinque brieegan me gane ziaad me stib.

²⁰ —¿To waa? —rëb me lo zho—. ¿Cho rzac to nac naa?

Horco pquiab Pedr, rëb Pedr lo me:

—¡Luu nac Men ne zëëble diidz ga cxeel Dios!

²¹ Dzigo pso me diidz lo zho choot lo gneed zhow.

Bzeet Jesús zha gun miech me

(Mt. 16:21-28; Mr. 8:31-9:1)

²² Tib vuelt bzeet Jesús lo grë xpëedscuel me zha csacsi miech me. Rëb me, nroob grë ncuuaane cteed zho me; grë zha non lo menguedz, grë pxoz rnabey, grë zha ne rseed miech ley, ible stsidil zho me, ni haxta zut zho me; per zeene gac tson ngbidz gut me laa me grieegan.

²³ Ni rëb me lo grë miech ne ndxie lo me ga:

—Zha ne racladz sëëb xnëz naa, none cueeladz zho zho, none lëb zho gzataa dze guiaadnal zho mine rnabey naa, niicle tel min co yquiaaqui csacsi miech zho. Nodne yquia zdoo zho xquielmban zho,

²⁴ sac zha ne yquia zdoo xquielmban, lel znu nitlo zho; sangue zha ne sca cueeladz xquielmban porne no zho xnëz naa, ib zгаа zho tib guielmban ne gdzind dze lozh.

²⁵ Zha ne zienie guic loxaque gapchen, ¿pa dien yquina lo zho, tel por lëew rsacsi zho zho, tel lëew yquiaaqui guey zho gabil?

²⁶ Naa ne nac naa Mgui ne pxeeł Dios, zha ne ctoladz guiab zho laa zho no xnëz naa, ctoladzniegaa zho xtidz naa; scaque naa stoladznie naa zho gal dze ne laa naa guial stib. Dze ne guialnie naa grë xanjł Pxoz naa, guiallu naa guielndzon ne rap me.

²⁷ Blozhse sca bnee me, rëbchaa me lo grë miech co:

—Ni gni naa lo to ganle, nzian grë zha ne ndxie nu niina, ib tedsod bii zan zho zeene laa Dios glu zha rnabey me.

Bdzëëlo Jesús

(Mt. 17:1-8; Mr. 9:2-8)

²⁸ Goca maase xon ngbidz, güey Jesús tib guic gui gza me Pedr, Jacob ni Juan; laa me zie ga ziezodiidznie me Dios.

²⁹ Laa me nozodiidznie Dios, zeene laa me bdzëëlo. Masaque biinidoo ne rree lo me, xab mew, nquitsbie rnaw, haxta rquiabniw.

³⁰⁻³¹ Tibaque brieequia Lí grop Moisés bdziñ lo me ga, psilo zho nozodiidznie zho me grë guielñe ne cteed miech me Jerusalén, zeene laa me gbi lo guidzliu. Masaque biinidoo ne riab, ncuaane gzee zdoow new.

³² Laa zha ne zienal zhits me, rcow zho mcaal zob zho ga; per zeene biab biini nroob co, hor co bzhial lo zho gon zho zha rlu me gza me Lí ni Moisés.

³³ Laa grop men co ziebiche lo Jesús, zeene rëb Pedr lo me:

—Maestro, iwena gon tebaa gbiaaz ne nu! Na maase gzaa no tson yu yag xiid win, tiba cuëz luu, tiba cuëz Moisés, stiba cuëz Lí.

Per niicle Pedr rienadaque dien pe nacne sca rnee Pedr.

³⁴ Laa Pedr bii quaneque, zeene bre tib xcow zaatne zo zho ga; per nli bdzieb zho gon zho laa zho biaan len xcow co.

³⁵ Dzigo bin zho zëeb tib tsi men co lo xcow co, rnee me:

—Lëë Xpëed naa i gon, rleynie naa me. Golgon mine rnee me.

³⁶ Zeene blozh bin zho tsi men co, gon zho loxaque Jesússe zo ga.

Grëse mine gon zho ga, ib choot lo bneed zhow len dze co.

Biac tib mëed ne nosacsi mendox

(Mt. 17:14-21; Mr. 9:14-29)

³⁷ Biini liu co, laa Jesús wbi guic gui co gza me zha ne güeynie me ga. Miech guizhiu ne güeydzieelo me.

³⁸ Lad grë miech co brieet tib mgui, wbig me lo Jesús rëb me:

—Maestro, bzhiguiel bui ganle zha rac xpëed naa. Tibaque mëëdbgui rii nac mëed lo naa,

³⁹ ni na laa mendox nosacsi win. Zeene rdziñ na rcoptsiedan ma win, rron ma win liu, ga nix win runcxidz ma win, ni masaque rdzib mtsiin ro win; nen rsaan ma win.

⁴⁰ Blansonie naa win nu, bnab naa lo xpëëdsuel luu guncxoon zho mendox co, per brielod zho.

⁴¹ Dzigo rëbchaa Jesús:

—iPe nac squitaa miech ntseeb nac to, ib nëde to gnalo to Dios! ¿Pa lal dze ne so naa gnë naa lo to? ¡Ncuaane cxcwdraa naa lo to squitaa nac to! Dënie xpëed luu nu —rëb me lo men co.

⁴² Zeene laa mëed co ziegax lo Jesús, hor co bron mendox co win liu, nix win ga masaque rzhidz win. Dzigo goctox Jesús lo ma, beñcxoon me ma. Horcogazh biac mëed co, laa me bdeed win lo pxoz win.

⁴³ Grë miech ne ndxie ga, per nli rzee zdoow zho gon zho scataa nroob poder ne rap Dios.

Grëse miech ne ran grëtaa milagr ne run Jesús, rzee zdoow zho.

Bzeet Jesús stib laa miech csacsi me

(Mt. 17:22-23; Mr. 9:30-32)

⁴⁴ Biire Jesús bzeet me lo xpëëdsuel me zha gun miech me, rëb me:

—Wen wen golquiaadiag mine gni naa lo to nu ganle. Naa gon ne nac naa Mgui ne pxeel Dios, ible ziello zho naa ladznia miech.

⁴⁵ Per ib rienḁ zho zha nacne sca rnee me, sac gard gdeed Dios diidzbey hor co guien zho zha naca; niicle par gnabdiidzгаа zho, rdzieb zho gnabdiidz zhow lo me.

¿Cho nonraa?

(Mt. 18:1-5; Mr. 9:33-40)

⁴⁶ Horco psilo zho noneelsa zho dien cho tib zho gac zha non.

⁴⁷ Bien Jesús sca no zho, dzigo bnee me lo zho, bredz me tib mëëdbgui win,

⁴⁸ rëb me:

—Grë zha ne no xnëz naa, zha ne guncas tib mëëdwin zig mëëd rii, gleynie zho win, rrieequia naa ga rleynie zho. Ni zha ne gleynie naa, rrieequia men ne pxeelle naa ga rleynie zho. Telne racladz to gacnan to dien cho nac zha non, gacnan to ganle, zha ne tsoxco gac zig tib ngundziin lo samiech, zha co nac zha non.

⁴⁹ Blozh ga, rëbchaа Juan lo me:

—Maestro, bdzion no tib zha co gon bzeet zho lë luu zeene bençxoon zho mendox, nacne nli blisqui now lo zho, sac led yed zho nacgrë ne.

⁵⁰ Dzigo pquiab me, rëb me:

—¡Guñscade to! Sac gon zha ne racnie ne, grielod lëëque zha glëënie ne.

Ndox Jesús lo Juan grop Jacob

(Mt. 8:19-22)

⁵¹ Len dze ne ziaadyob gbi Jesús lo guidzliu rii, len dze co bio me nëz laa me zie nëz Jerusalén. Tiblique bio guic me, ib pquiad zdoo me, laa me zie.

⁵² Zeene bdziñ me xtan Samar, pxeel me bla zho bdedner zie zho tib guiedz win ne ndxie nëz co, par dien pa lo gdeed miech co cuëz me.

⁵³ Bdziñ zho guiedz co, choot bzhiguielḁ ndeed zaatne mbëz me; sac bien zho nëz Jerusalén tsie me. Nac zha Samar, rlëënie zho zha Israel.

⁵⁴ Zeene bin Jacoba grop Jacob Juan, blëë guic zho, rëbchaа zho lo me:

—Maestro, ¡mazd tibaque gotsaa gnab ne gliaalḁ gui lad grë miech rii, zeena nitlogazh zho!

⁵⁵ Biecwaque me, goctox me lo zho rëb me:

—Rienḁ to lëë zhapaa nac men ne nacnie to.

⁵⁶ Golguien ganle, naa ne nac naa Mgui ne pxeelḁ Dios, zialḁ naa par gnitlo naa miech, sinque laa naa zialḁ csilaa naa zho lo dol.

Ga briece zho güey zho stib guiedz.

⁵⁷ Nëz zie zho, zeene wbig tib mgui co rëb me lo Jesús, laa me racladz tsienalḁ me zhits Jesús, telḁ pa lotaa nac zaatne tsie Jesús.

⁵⁸ Dzigo pquiab Jesús rëb Jesús lo me:

—Gocnana ganle, naa ne nac naa Mgui ne pxeelḁ Dios, peet rapd naa nu, mazd zig nac grë mëz, grë mguin, rap ma zhibliee ma, rap ma zhiptsieez ma; per naa per ni zaatne gaguies naa quianied naa.

⁵⁹ Laa zha ne bredz me tsienalḁ zhits me, pquiab zho rëb zho:

—Sënalḁ naa zhits luu, per bzhiguielḁ bneedz diidzbey cuëz naa, gangazh naa tsoliu pxoz naa.

⁶⁰ Rëbchaа me lo zho:

—Nzian grë zha gut no, psaan tsow tsie samengut zho tsiequeets zho. Sangue luu zhits naa dënalḁ, zeena tsie luu tsienee luu lo miech, gacnan zho zha racladz Dios gban zho.

⁶¹ Pquiab stib zho rëb lo me:

—Maase sënalḁ naa zhits luu, per bneedz diidz ganiegazh naa diidz lo grë menlidz naa.

⁶² Dzigo rëbchaа me:

—Zha ne xen nia rad ni csilo zho gwi zho nēz zhits zho, niacxe zrieelo ygan zho ngon. Scaque zha ne sēēb xnēz Dios, grieelod sēēb zho telne mazdraa rleynie zho grē ncuaan lo guidzliu rii.

10

Güey tsongaltsii zha ne güeynee Xtiidz Dios (Mt. 11:20-24)

¹ Tib dze, ble Jesús stsongaltsii zha ne rquiaadiagle zhiwseed me, bnabey me tedner zho lo me tsie zho grē guiedz ne no ted me, pxeel me zho chopga chopga zho.

² —Golnab lo Dios —rēb me—, cxeelraa me zha ne gun xtsiin me. Sac ne nligaa ndaldoo miech ne quiambēz yquiaadiag Xtiidz me, zha ne gnelew lo zho rgaad.

³ Goltsie sca, per nsin nsin golso. Golguien ganle rrieequia nac to zig cho mēcwxii yeen, ni laa naa rxel to zaatne no grē coyot dox.

⁴ Peet güeyde to, güeyde to dimi, güeyde to ncuane gow to, lab tow, miñe quiaise ni to mincose goltsienie.

‘Miech ne yquiaabdiuzh to nēz, sode to dieen zharaa yquiaabdiuzh to zho.

⁵ Zeene yguib to zaatne cuēz to, yu ne gdziñtaa to, golnab gunlay Dios grē zha ne no yu co.

⁶ Telne squiaadiag zho miñe rnee to, zunlay me zho; telne nēdgaa zho yquiaadiag zhow, dzigo toque gunlay me.

⁷ Zha ne gneedz zaatne cuēz to, lidzse zha co golcuēz, tsiede to stib yu stib yu; guielwagw ne gneedz zho lo to, ctoladzde to golgowa; sac gon zha ne run dziin, ib none ycaa zho miñe non xtsiin zho.

⁸ Guiedz ne yquiaadiag miech miñe zienee to, zaacse golgac lo zho, tel pe guielwagw ne gneedz zho, golquiina;

⁹ golgunguiac grē men rzacnē ne no ga. Golguiab lo zho, laa dze ne nolu Dios zha sēēb miech xnēz me, laa dze co bdziñe.

¹⁰ Sanguē guiedz ne siguielid miech yquiaadiag zho miñe zienee to, golriee grē ro xnēz zho,

¹¹ ganlo zho glit to grē yudie co ni to, zeena guien zho ganle nēz ne nitlo zho ga zie zho. Golguiab lo zho, zha bguiba, sac binpaa zho zha grieeo sēēb zho xnēz Dios ni nēd zho gon zho diidz.

¹² Gacnan zho ganle, gal dze ne gun Dios xquielwxtis me, lēētaa gac guielnē ne tsieguial zha Sodom, mazdraa nac guielnē ne tsieguial zho.

¹³ Scadaa nac zha Corazín ni zha Betsaid. ¡Probsaxe zho, sac gon gonpaa zho grē milagr ne run Dios, per ib psaand zho xquielntseeb zho! Tel niaca miñe ngaa grē men Tiro, grē men Sidón, nian grē milagr ne gon zho, ib ndedsod mban niac grē zha co nio zho guielnē, zēēb nsaan zho xquielntseeb zho mbig zho lo Dios.

¹⁴ Gacnan zho ganle, gal dze ne gun Dios guielwxtis, lēētaa caxtigw ne yгаа zha Tiro ni zha Sidón, mazdraa miñe yгаа zho.

¹⁵ Scaque zha Capernaum, masaque rzac zho niina zha nziuuraa lo Dios, per gacnan zho ganle haxta quiet len gabil ga guey zho.

¹⁶ Blozhse sca bnee me, rēbchaa me lo zho:

—Grēse zha ne yquiaadiag miñe gnee to, rrieequia naa ga rcaania zho. Zha ne nēdgaa ycaania to, rrieequia naa ga nēd zho ycaania zho; ni zha ne nēd ycaania naa, rrieequia men ne pxeel naa ga nēd zho ycaania zho.

*Wbire tsongaltsii zha ne pxeel Jesús ga
(Mt. 11:25-27; 13:16-17)*

¹⁷ Zeene laa gza tsongaltsii zha co wbire, rley zho bdziñ zho lo Jesús. Rëb zho haxta grë mendox bdzieb ma zho, zeene bzeet zho lë me.

¹⁸ Dzigo pquiab me rëb me lo zho:

—Haxta ma ne rnabey lo ma, gonpaa naa gon bringaa ma, biab ma zig riabse tib belye.

¹⁹ Laa naa bneedz poder qui lo to, parne gdeete to diidz gun ma mine racladz ma; grë meeldox, grë meegu ntseeb, niicle gzoobni to ma, peet gacde to.

²⁰ Nli laa to runcxoon mendox niina, per gleyde to por min co, sinque mazd golley porne laa lë to zhooble lo Dios, laa to ngable lo me.

²¹ Horco biaad tib guiebley nroob zdoo Jesús, bnee me lo Dios, rëb me:

—Papá, luu nac men ne rnabey gbaa, luu nac men ne rnabey guidzliu, rnedz naa xquizh lo luu, sac grë mine noyun luu nu niina, bdeete luu diidz niacnañ grë zha raca, sinque laaw blu luu lo grë zha ne nac zig grë mëedlas. Sca quiayun luu, sac ib scale racladz luu gaca.

²² Blozh ga rëb me lo grë miech ne ndxie lo me ga:

—Grëse ncuane ran to quiayun naa, Dios men ne nac Pxoza naa, me bneedz poder rii lo naa; sac ib laa me bzo naa, naa guna. Xpëed me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gded naa diidz gunbey me, zunbey zho me.

²³ Dzigo rëbchaa me lo xpëedscuel me:

—Dichos to bgaa to noyan to grë min rii.

²⁴ Sac gon blactaa zha ne biadteed xtiidz Dios padzeela, haxta grë zha ne bnabey len dze co, bzoobladz zho nian zho grë ncuane noyan to, bzoobladz zho nquiaadiag zho grë ncuane noquiaadiag to.

Xcuent tib zha Samar

²⁵ Tib dze wbig tib zha ne nac maistr ley lo Jesús, bnabdiidz zho lo me, rëb zho:

—Maestro, bnë lo naa dien, ¿pe nac mine gun naa parne grielo ygaa naa guielmban ndzon ne gdziñd dze lozh?

²⁶ Pquiab Jesús rëb me:

—¿Zha dien zhobnee lo ley? ¿Pe rnabeya?

²⁷ Rëbchaa maistr ley co:

—Znu rneew: “Dib zdoo luu, dib nacse luu, dib guiebiini ne no guic luu, dipse xfuers luu, bleynie Dios; ni bleynie samiech luu, zigne rleynie luu luu.”

²⁸ —¡Min qui nagon bioxco gun luu —rëb Jesús—, zeena ygaa luu guielmban ndzon ne gdziñd dze lozh ga!

²⁹ Per par glud ne noxcod me gun me mine rnabey ley, dzigo pquiaalo me rëb me lo Jesús:

—¿Chopaa dzigo nac samiech naa, zha ne no gleynie naa?

³⁰ Dzigo bzodiidz Jesús tib cuent lo me, rëb Jesús:

—Tib men wladz name brie me Jerusalén zie me guiedz Jericó. Nëz zie me briequia ngbaan, bdiñ ngbaan me, mer niut ngbaan me; grëse ncuane ney me, haxta xab me blan ngbaan.

³¹ Laa me nix ga, zeene laa tib pxoz bded. Zigne gon pxoz me, biecwga pxoz bded pxoz tib lad.

³² Wdzeepaaw, zeene laa tib zha ne runaque dziin len yadoo ziaad ga; scaque zigne gon zho me, tib tib bded zho.

³³ Sca nix me ga, zeene laa tib zha Samar bdziñ. Zeene gon zho me, wbig gax zho lo me; pquia zdoo zho me gon zho zha rna me.

³⁴ Gagazh been zho me rmed, blee zho vin bdiib zho lo grë rid ne ney me, bdëeb zho nceita, pxidoo zhow. Blozhse ga, blis zho me bzoob zho me lad xcuay zho laa zho zienie me, haxta bdziñnie zho me tib yu ne rbëz miech ne zo nëz; ga blëznie zho me, pquianap zho me.

³⁵ Biini liu, zeene laa zho brieë ga, blee zho palal dimi, lal ne non chop xtse zha ne rie dziin, bdeed zhow lo bizhuan yu co, parne yquiaanap me men co, rëb zho: “Peet tsienied guic luu, telne nroobraa gun luu gaxt, na zeene gbire naa dzigo quizh naaw.”

³⁶ Blozhse bzodiidz me cuent co, rëbchaa me lo maistr ley co:

—Lo gza tson zha ne nadien bded zaatne nix men co, çcho tib zho bien samiech zho ga nac me?

³⁷ Pquiab maistr ley co rëb me:

—Zha ne bion bded gaw, sac zha co pquia zdoo me.

Dzigo rëbchaa Jesús lo me:

—Sca nagon none gun luu.

Blëz Jesús lidz Mart ni Marí

³⁸ Laa Jesús no nëz gza xpëëdsuel me. Bdziñ me tib guiedz win, ga no tib wnaa lë Mart, dzigo men co bdeed zaatne blëz zho.

³⁹⁻⁴⁰ Bdziñ zho lidz Mart, lëëlëd bzëëb Mart ro tie. Zhixco ro tie no Mart, laa tib bel Mart lë Marí zob noquiaadiag grë zhiwseed Jesús. Gon Mart rgaadraa nia Mart, dzigo wbig Mart rëb Mart lo Jesús:

—Bzhiguiel bnee lo bel naa guiaad me gun me xyudar naa. Bui ganle tipse naa psan me ro tie.

⁴¹ Pquiab Jesús rëb Jesús lo me:

—Aque luuw nli Mart, squitaa noxco luu dien zha gac xtsiin ro tie luu.

⁴² No tib ncuane mazdraa none tsoxco luu, ni lëë min co nu gon noyun Marí; gane grieelod ycaa naa mine quiaayun me.

11

Zha none gzodiidznie ne Dios

(Mt. 6:9-15; 7:7-11)

¹ Tib vuilt, loxaque blozh bzodiidznie Jesús Dios, wbig tib xpëëdsuel me rëb lo me:

—Maestro, bzhiguiel blu lo no dien zha gzodiidznie no Dios, zigne been Juan Bautist pseed me xpëëdsuel me zha gzodiidznie zho Dios.

² Dzigo rëbchaa Jesús:

—Zeene gzodiidznie to Dios, golguiab:

Dios, luu nac Pxoz no, zob luu gbaa;

luuse nac men ne mazdraa ndzon.

Luu nac men ne gnabey no,

mine gnabeytaa luu, zigne raca gbaa,

scaque none gaca lo guidzliu nu.

³ Been guielnzaac bneedz ncuane dioow no nadze.

⁴ Bzhiguiel been no perdon grëse dol ne ziodziun no lo luu,

zigne rdziun no samiech no perdon grë falt ne run zho lo no.

Gdeete luu diidz yquuil mendox no,

been guielnzaac bla no lo ma.

⁵ 'Sca nagon gnee to —rëb Jesús—. Ncuane gnab to lo me zneedz mew. Samiechse to name, gzoob ne wxina, lega nacle glanso tib zha ne ndzieeldiidz

to ni guieḽ pe gdeed to gow zho. Dzigo tsie to lidz stib zha ne ndzieeldiidz to guiab to lo zho: “Bzhiguielḽ beenxtad tsonaque xcuunḽ luu lo naa.

⁶ Lega nacle blanso tib zha ne runbey naa, na guieḽ pe gded naa yquiuḽ zho.”

⁷ Segur znē zho: “Gunneete luu naa nu, dziitsle nioog ro lidz naa, nataa nixgues grē xpēēd naa; grielod gache naa gnedz naa ncuaane racladz luu.”

⁸ Per telne sonaad to ga, ganse zho tibaque quianee to, gnid naa zho tsiehd zho gnedz zho ncuaane racladz to. Per gneedzd zhow porne ndzieeldiidz to zho, sinque laa zho gneedza porne goḽ zho tibaque quianab tow.

⁹ Scaque nagon none guḽ to, zeene pe gnab to lo Dios. Ncuaane rquiuḽ to, golnaba lo me, scagaa me zneedz mew. Golguib tel pe racladz to, me nac men ne gacnie to gdziel tow. Golcuedzlē me, scagaa me scaania me to.

¹⁰ Sac grēse zha ne rbig lo me rnab zho ncuaane rquiuḽ zho, rdeed mew. Zha ne rguib ncuaane racladz zho, racnie me zho rdziel zhow. Zha ne rbedzlē me, rcaania me zho.

¹¹ Golguieuḽ ganle, zig nac to, zeene rnab xpēēd to tib melḽ gow win, ḽniacxe ziazh to co to tib meelḽ nia win?

¹² Zeene rnabgaa win tib dzit, ḽniacxe zgo to tib meegu nia win?

¹³ Led rioxco to lēē niapse ncuaane wen rdeed to lo xpēēd to, niicle ne miech ntseeb nac to. Telne sca rioxco to xpēēd to, peleḽ Pxoḽ to dzigo, men ne zob gbaa, tsoxcd me to. Ib tedsod grēse zha ne gnab lo me gdeed me ncuaane rquiuḽ zho, zdeed mew; haxta zha ne gnab cxeel me Espiritu Sant gacnie zho, zuḽ me miḽe gnab zho.

Rēb zho mendox nacie Jesús

(Mt. 12:22-30, 43-45; Mr. 3:20-27)

¹⁴ Tib vuelt benxoonḽ Jesús mendox ne nosacsi tib mgui co. Ib gacd gnee mgui, sac psan ngop ma mgui. Dzigo zigne benxoonḽ Jesús ma, laa mgui psilo bnee. Grē miech ne ndxie ga, bzee zdoo zho goḽ zhow.

¹⁵ Nogaa zho rnee, Beelzebú ma ne rnabey lo mendox, ma co nacie me gane rrieelo runxoonḽ me mendox.

¹⁶ Brieequia spalal zho, rnab zho lo me guḽ me pe stib milagr, parne gliladz zho nli Dios pxeelḽ me.

¹⁷ Bien Jesús zha rza guic zha ne noneenē me ga, dzigo rēbchaa me lo zho: —ḽNcuaane gacd goḽ rnee to! Telḽ tib guiedz nadienḽ, csilo miech, lēēque zha tilnie menladz zho, ḽniacxe nitlod guiedz co? Tib diigaa miecha, telḽ lēēque zha tilnie menlidz zho, led znuse lēē nitlo dii co.

¹⁸ Scaque mendox nagon, telne lēēque lēē ma guḽxoonḽ samendox ma, ipe nale na bnitlo ma! Laa naa rne miḽ rii lo to, porne rnee to ma ne rnabey lo mendox nacie naa, gane rrieelo runxoonḽ naa ma.

¹⁹ Nana telne sca rzac to, ḽzha ne nacgrē to dzigo, cho nacie zho ne ye zho runxoonḽ ma? Gase naganle rlu dolḽox i quiyunḽ to squi rnee to.

²⁰ Sangue telḽ naa, Dios nacie naa runxoonḽ naa mendox, ni ga rlu ganle laa Dios pxeelle menḽ ne gnabey lo to.

²¹ iMasaque nac mendox zig tib zha ne no xfuers! Tib zha ne no xfuers, telḽ tibaque ney zho xquiuḽ zho, ḽcho dienḽ lega sēēb lidz zho gla ncuaane quianie zho?

²² Per zeene rrieequia stib zha ne mazdraa no xfuers, zha cole rtiche zha co, runxoonḽ zho zho, riaanne zho grē ncuaane gopchen zho.

²³ Golgacnanḽ sca ganle, zha ne rlēē lo naa, ga rlu nacnied zho naa; ni zha ne racnied naa lo xtsinḽ naa, paat yquiuḽ zho.

²⁴ Mendox ne rsacsi miech, zeene laa ma rsaan zho, rie ma riequianzē ma dan zaatne choot miech guiend, rguib ma dien pa cuēz ma; ranse ma rdziold zaatne cuēz ma, rnee ma: “Mazd gbire naa guia naa lidz naa stib.”

²⁵ Dzigo rbire ma, zeene rdzin ma lo zha ne psacsi ma ga, masaque rzac ma zho zig rzac miech tib yu ne griin blioob, tib yu ne ine nzhixcuua len.

²⁶ Dzigo rie ma riexi ma gadz samendox ma, ma ne mazdraa ntseeb, rdzin ma gza ma rzēeb ma zdoo zha co, rsilo ma rsacsi ma zho. jHorcole mazdraa mban run ma zho!

²⁷ Sca quianee Jesús, zeene nguiedz bnee tib wnaa ne no lad grē miech ne ndxie lo me ga, rēb wnaa co:

—jDichos wnaa ne gop luu, wnaa ne bgadz luu!

²⁸ Pquiab Jesús rēb me:

—jMazdraa dichos zha ne gon, yquiaadiag Xtiidz Dios ni tsoxco zho gban zhow zigne naca!

Zha ne rliładz cho nac Jesús

(Mt. 5:15; 6:22-23; 12:38-42; Mr. 8-12)

²⁹ Miech guizhiu ne quiazinraa lo me ga, dzigo bnee me rēb me:

—Nadzpaan ntseeb zdoo to nac to miech ne mban len dze rii. Tibaque quia to racladz to gan to pe stib milagr, parne gliladz to Dios pxeel naa, z zha rnaraa milagr ne racladz to gan to? Gacnan to ganle, stibaque milagr gon gan to, tib mine csoladz to zha goc Jonás.

³⁰ Haxta dzigoraanagon guien to nli Dios pxeel naa. Sac tel Jonás, zeene gocnan zha Nínive zha bzhaac me, dzigo bliladz zho nli Dios pxeel me.

³¹ Ni gacnan to ganle, zeene gal dze ne laa Dios gun xquielwxtis me, zieso wnaa ne goc rein nēz Sabá, steedquie me to. Sac gon pa lo ga brie me, biaad me biadzquiaadiag me grē xtiidz Salomón; ni to, lo to nu zo men ne mazdraa non lo Salomón, ni nēd to gon to xtiidz me.

³² Scaque grē zha Nínive, steedquie zho to; sac gon zeene güeynee Jonás lo zha Nínive, znuse bin zho diidz psaan zho xquielntseeb zho wbig zho lo Dios; ni to, lo to nu zo men ne mazdraa non lo Jonás, ni ib runcasde to me.

³³ Tsođ zha ne yquiaagui tib biini, lozh ga ctoos zho pe cos low, gzolangaazhow zaatne nguets. Sac biini ne rquia, glaa rzoba par gziiniw len yu, zeena guiab biini lo grēse zha ne sēeb len yu.

³⁴ Rriequia nac bziaalo miech zig nac tib biini. Telne niapse lo grē ncuane ndzinli rwi zho, dzigo gdipse xcuerp zho no lo guielbiini. Laa telne loxaque lo grē ncuane nonguielđga rwi zho, dzigo gdipse xcuerp zho no lo guielcow ga.

³⁵ Golguien sca pa lo rwi to, napaa laa ne tso to lo biini, lel lo guielcow no to.

³⁶ Sac gon, tel dipse xcuerp to no lo guielbiini, ni tib lēw nod lo ncow, zlupaa to; sac masaque nac to ga zig tib zha ne zo gax tib lo biini nroob.

Güey Jesús lidz tib zha farisé

(Mt. 23:1-36; Mr. 12:38-40; Lc. 20:45-47)

³⁷ Zeene blozhse bnee Jesús lo grē miech co, dzigo bredz tib zha farisé me güeynie zho me tib wagw lidz zho.

Bdzin me lidz zho, bded me bzob me lo mezh,

³⁸ psilo me dow me, per bdiibd me nia me zigne nacpaa xcostumbr grē zha Israel. Zeene gon zha farisé cow, rlozhd gzee zdoo zho;

³⁹ dzigo rēbcaa me:

—Grē to ne nac to zha farisé, laglaase rlu to miech wen nac to, per zdoo to ntseeb to, sac niapse guielntseeb, niapse guielgban run to; masaque nac to gon zig tas, zig plat ne nēz zhitsse mbe rna, laa nēz lena rnadraa di beed.

⁴⁰ ¡Nadzppaa ncow nac guic to! ¿Pe riende to racladzd Dios ne laglaase glu miech wen nac to, sinque racladz me desde zdoo to gac to miech wen? Sac dib nace to psan me to.

⁴¹ Laa ne squi no to noban to, mazd goldeed ncuane nacchenppaa to lo grë zha ne guiend pe yquuin, zeena gac to miech ne nlipaa wen.

⁴² ¡Probsaxe to! Rzac to demas nguzobdiidz to lo Dios, rio to haxta grë guizh bitxtil, grë guizh rud, ni grëragaa guizh ne ran to, rdeed to xdiezm to yadoo; per rioxcode to gban to zigne rnabey Dios, ib rioxcode to gleynie to samiech to. Ible none tsoxco to min rii, ni bii scaquegaa tsoxco to gdeed to xdiezm to.

⁴³ ¡Probsaxe to! Rdziladz to gacnon to lo miech, zeene rie to yadoo, zaatne glupaa non to, ga rzob to; scaque ndooladz racladz to gnee miech bdiuzh lo to, zeene rdzieel zho to dib ro nëz.

⁴⁴ ¡Probsaxe to, lëetaa rdzieel to grë to maistr ley! Masaque nac to zig nac grë baa ne rludraa pa nac. Tel baa cow, zeene rded zho zaatne niaaw, ib riend zho lad grë ncuaan noyodz ga, noded zho.

⁴⁵ Horco pquiab tib maistr ley, rëb zho lo me:

—Maestro, ¿ye no dzigo lëe rzoob luu squi nac?

⁴⁶ Pquiab Jesús rëb me:

—Ye to gon. ¡Probsaxe to! Rio to rzadraa ley ne rnabey to gun miech, ni per ni to rioxcode to siquier csilo to gun tow.

⁴⁷ ¡Probsaxe to! Paat rquiinda gon squi rio to, rlozhd dieen paraa rzhixcuua to ro xpa grë zha ne biadteed xtiidz Dios padzeela.

⁴⁸ ¡igual ntseeb to grë pxozgol to! Sac gon, zha beet grë zha co, laa to no rzhixcuua to ro baa.

⁴⁹ Nanle Dios squitaa ntseeb zdoo to, mine run to ga bnee me, zeene rëb me: “Sxel naa grë zha ne tsieteed xtidz naa lo zho, sxel naa zha ne tsieneew lo zho, per nanle naa gandzed zho zho, haxta zut zho grol zho.”

⁵⁰ Gacnan to sca ganle, grë to miech ne mban len dze rii, grë to gunquizh Dios xchen grë zha ne pxeel me biadteed xtiidz me wlal ne ndxie guidzliu,

⁵¹ desde Abel haxta Zacari men ne beet pxozgol to len yadoo zaatne nac gax lo pcoog. ¡Ne nligaa grëse dol co gon, to quizha!

⁵² ¡Probsaxe to maistr ley squi nac to, ib rneede to diidzli lo miech! Nac diidz to cseed miech guien zho zha nac Xtiidz Dios, per nëde to gliladz tow, ni niicle nëedgaa to gliladz zha ne racladz ycaaniaw.

⁵³⁻⁵⁴ Blozhse ga, laa me brie ga. Grë zha farisé, grë maistr ley, per nli rlëë zho bin zho sca rëb me. Psilo zho nzian grë ncuane rnabdiidz zho lo me, rguib zho dien zha gunglëë zho me, par dien pe cxind me pe tib diidz, zeena min co yquiaaqui zho tsiezoob zho xdemand me.

12

Grë ncuane rac ngeets zhliian

(Mt. 10:19-20, 28-33; 12:32)

¹ Miech guizhiu ne pcaalsa lo Jesús, haxta rcheeplsa zho. Dzigo bnee me lo xpëédscuel me, rëb me:

—Golguien gon, gunde to mine run zha farisé, tel zha rquiaalose zho miech wen nac zho.

² Sac grëse ncuane sca ngeets rac, grëse ncuane rlud miech, dzin dze ne xoobneña.

³ Zig nac grë ncuane zhlianse rnee to lo ncow niina, dzin dze ne gon miecha zobna ngbidz; grë ncuane rnee to len yuse, dzin dze ne dib lad guiedz gacnan miecha.

⁴ 'Golgona ganle bets: Ib gdziebde to zha ne gacladz gut to. Nli zrieelo gut zho xcuerp to, per peet grieelodraa zho gun zho.

⁵ Golguien, Dios nac men ne mazdraa nroob, mine rnabey me min co none gon to. Sac tel me, zrieelo me gnitlo me miech dib xcuerp zho, ni lozh ga zrieelo me gzonez me zho nez len gabil.

⁶ Nligaa gdziebde to miech, csaand Dios lega pe gac to. Golwi ganle, zig nac gre mguin, niicle ne rzac miech peet nond ma, haxta chop ma rto zho por tib gaay centav; per tel Dios, ib rsaanladzd me ma.

⁷ Pelel to dzigo csaan me, haxta guits guic tow, gresew ngaba lo me. Gdziebde to sca, golguien ganle nonraa to lo tib dzoon mguin.

⁸ 'Ni gni naa lo to ganle, zha ne glu lo miech nacie zho naa, scaque naa ne nac naa Mgui ne pxeel Dios, zeen gal dze co zlu naa lo gre xanjl Dios, nacie naa zho.

⁹ Sangue zha ne ctoladznie naa lo miech, scaque naa ziep naa lo gre anjl co runbeyd naa zho.

¹⁰ No zha ne rneene naa, per zun Dios zho perdon dol co; sangue zha ntseeb ne gneene Espiritu Sant, ib gundraa me zho perdon.

¹¹ 'Zeene tsiezo miech rii to lo gre zha ne rnabey xyadoo zho, tsiezogaa zho to lo gre zha ne nac wxtis, tsode to zhgab dien pe gnee to;

¹² sac zeene sca tsiegala, Espiritu Sant csaab guic to pe nac mine gnee to lo zho.

Zha ne loxaque rapchen

¹³ Horco wbig tib zha ne no lad gre miech co, reb zho lo Jesus:

—Maestro, bzhiguiel bnee lo bets naa gle zho zho ncuane psan pxoz no, gneedz zho mine raguiäl naa yca naa.

¹⁴ —Aque luuw nli —reb Jesus—, icho ne lo luu laa naa noyun guielwxtis co? Ziald naa gon par quizz naa ncuane rap miech.

¹⁵ Dzigo bnee me lo gre miech co, reb me:

—iGolguien gon, gzoobladzde to demas gapchen to! Sac niicle ndziibraa gapchen miech, grieelod por gre ncuane co ndzon gac lo xquielmban zho.

¹⁶ Znu gon bzhaac tib men ne nroob gopchen. Nat liu quianie me, zeene rlaap me gre ncuane ran me, nroob ncuane rlis me low.

¹⁷ Bdzin tib dze rgaadraa pa tsotsow gre ncuane co, dzigo bzob me dien zha gun me.

¹⁸ Tibaque zeene reb me: “Mine naca laa naa gun nroob gre yu qui, zeena zigtaa gre guielnzaac quiw, greraga ncuane rap naa, ga tsotsowa gresew.

¹⁹ iPe zhidaa iz ne leb gre ncuane co! Peet tsieniedraa guic naa, ine guxt sob naa, gow naa, guie naa ncuane gacladztaa naa.”

²⁰ Min co rza guic me, tibaque zeene reb Dios lo me: “Nadzpaa nxen luu. Guieel riigazh gon laa luu guet. iZhaale zha ne guiaannie gretaa ncuane beenlo luu i!”

²¹ Zeene blozh bzodiidz Jesus cuent co, rebchaa me:

—Sca nagon rzac gre zha ne loxaque dien zha gapchen zho zienie guic zho. Ncuane cose rionie guic zho, ib rioxcod zho gun zho ncuane non nez lo Dios.

Rsaand Dios zha ne no xnöz me

(Mt. 6:19-21, 25-34)

²² Blozh ga, rebchaa me lo xpeedsuel me:

—Gacxe waa, gni naa lo to ganle: Tsode to zhgab dien zha gban to lo guidzliu rii, pa griee pe gow to par gban to, pa gdzielgaa ncuane gdze xcuerp to.

23 Mazd golconie guic to dien zha gac xquielmban to, dien pa tsiebannie to xcuerp to.

24 'Golwi lo grë nga ganle, led yed ma ran, led yed ma rlaap, led yed ma rgotsow pe guielgon, per row ma; sac Dios rdeed ncuaane row ma. ¡Tel to gon, mazdraa non to lo grë mguin co!

25 Ni lalnu paat rquiinda tant tso to zhgab. Telne guiab to tso to zhgab dien zha gacnool xtse to spalal yeense, ¿niacxe zrieelo to gunnool tow?

26 Nanle to ganle led ncuaane grieelod ga. ¿Pe nac dzigo tant tso to zhgab ncuaane mazdraa nroob?

27 Zig nac lar, ¿pe nacne tant tso to zhgab dien pe gacwxab to? Pe rwide to lo grë guiee dzil ne ganle zëëb dan, zha rrooba, niow rluw, ni led yeda rio zhgab dien zha gacwxaba; ni gni naa lo to ganle, per ni rey Salomón con grë xab niazh me, blud me scataa niow.

28 Gase na ganle golwi, niicxe grë guiee dan co na, zna dze zob nguiaw, gzhe widz laaw bidzle, laaw tsecle, ni scataa niow rgacwxab Dios; ¿pe lel to dzigo ygacwxabd me, niicle ne squi gard guien to dib zdoo to gnalo to me?

29 'Tsodraa to zhgab sca, guiab to: "¿Pa griee pe dioow ne, pa griee pe dio ne?"

30 Grë miech ne runbeyd Dios, tibaque zhgab co rio zho. Sangue to, golsoladz ganle PxoZ to men ne zob gbaa, nanle me pe nac grë xliaadz to.

31 Me nac men ne gneedz ncuaane yquiu to, per ib none glo tsoxco to gban to zigne rnabey me.

32 'Nli zhis to, pale tib dzoon win mëcwxiiil yeen, per gdziebde to. Sac niicle zhis to, per rley PxoZ to men ne zob gbaa, laa me rneedz grëse ncuaane rap me lo to.

33 Gacxe waa, laa ne tsonie guic to dien zha gacnroob ncuaane rap to, mine quianie to goltow, dzigo goldeed dimi co yquiu zha ne rappaa liaadz; zeena sca nroobraa guielnzaac ne yгаа to gbaa. Guielnzaac cosi, led yeda nitlo, led yeda grë, led yeda tsoxtseeb lo ngbaan, tsoxtseebгаа lo mxil.

34 'Sca golgun, sac gon guielnzaac ne gunlo to, zaatne gunlo tow, ga gdziñ to.

¡Nsin golsol!

(Mt. 5:25-26; 10:34-36; 16:1-4; 24:45-51; Mr. 8:11-13)

35 'Nsin sca golsol —rëb me lo zho—.

36 Golgac zig tib ngundziin ne rquiambëz gbire men ne rnabey zho zeene pa rie me tib lo guieltsieel. Nsin rzo zho, zigne rdziñ me, rxal zho ro yu rzëëb me.

37 'Dichos zha ne nsin zo zeene laa men ne rnabey zho glanso. Ib tedsod, steed me zho nëz len yu, soob me zho lo mezh, csilo me mezhaz gdziib ncuaane gow zho.

38 Nligaa dichos zha ne sca nsin so, horne glansotaa me; niicle tel wxina, ziadyiinigaa liuw.

39 Golgan ganle, tel niaca mine gacnan miech laa ngbaan tsieban lidz zho guieel, per nand zho dien pa horpaaw, ¿niacxe zaaguies zho? Led sobna zho léë, nsin nsin so zho parne csaand zho sëëb ngbaan lidz zho.

40 Scaque to nagon, none sca nsin so to, sac gon lega naclew zeene gan to laa Mguí ne pxeel Dios ziaadle.

41 Zeene blozh sca bnee me, rëbchaa Pedr lo me:

—Maestro, mine blozh bnee luu i, ¿pe par nose naca, te ye par grëraa miecha ye?

42 Pquiab me rëb me:

—Laaw rne naa, par grëse zha ne zienie guic zaacse gun zho mine rnee men ne rnabey zho. Nligaa nsin none so zho, sac laa zho guiaanne zha

ne nacgrë zho, zig riaannie tib ngundziin sangundziin zho parne gdeed zho ncuaañe gow zho.

⁴³ 'Dichos zho, telne ñe niowse noyũ zho dziin co zeene laa men ne rnabey zho glanso.

⁴⁴ Zeene gañ mew, ib tedsod so me zho, zha gnabey grëse ncuaañe quianie me.

⁴⁵ Per tel tsienie wguit guic zho guiab zho gbireniobd me, csilo zho lel csacsi zho grë zha ne biaannie zho, tso zho loxaque gowcho zho, loxaque gzudz zho,

⁴⁶ tibaque zeene gañ zho laa me zole lo zho; ib tedsod hor cogazh ctiche me dziin co lo zho, gzonëz me zho guey zho zaatne no grëraa zha ne rond diidz. Nroob caxtigw ne cteed me zho.

⁴⁷ 'Sac gon zha ne sca nanle pe nac miñe racladz men ne rnabey zho, ni tsoxod zho guñ zhow; ible nroob nac caxtigw ne ted zho.

⁴⁸ Mazd lëëtaa caxtigw ted zha ne peet nan, niicle guñd zho miñe rnabey me. Grëse zha ne nanle pe nac miñe no guñ zho, ib none guñ zhow; nac cuent rii zig tib zha ne rcaania pe cos, tel palal miñe pcaania zho, none haxta nroobraaw ctsire zho.

⁴⁹ 'Niina ne laa naa zial, rrieequia zialzobgui naa lo guidzliu. ¡Ni zoot naa gon, tebaa ranle naa laaw quiayazbel! ¡Tebaa psiaalle naa lo dziin ne zialgun naa!

⁵⁰ Per na naraa none teed naa tib guielñe nroob, ni mbanse gon rac zdoonaa quiambëz naa gdziñ dze co.

⁵¹ ¿Masaque nan to na lëë, laa naa zial loxaque par cuiñ wense miech? Lëda gon, ye zial naa zialgunctil naa zho.

⁵² Sac desde len dze rii, yu ne no gaay miech, laa zho ctsolsa. Tel sëëb chop zho xnëz naa, laa stson zha ne guiaan ga, ctsidil zho; tel sëëbgaa tson zho, scaque grop zha ne guiaan ga, gandzed zho zho.

⁵³ Mëed ne gañ laa pxoz zho, laa xniaagaa zho bzëëb xnëz naa, gandzed zho pxoz zho, gandzed zho xniaa zho; scaquegaa zha ne quianie mëëda, zeene gañ zho laa xingan zho, laa xindzoopgaa zho bzëëb xnëz naa, gandzed zho zho. Zha ne nac nguzhizha, zlëënie xniaa tsiel zho zho; tel xniaagaa tsiel zhow, zlëënie zho me.

⁵⁴ Blozhse sca bnee me, rëbchaa me lo grë miech ne ndxie ga:

—¡Pe nlipaa rnee to riende to pe nac grë ncuaañe noyac len dze rii! Zha zeene ran to rquia xcow nëz ne rzëëb ngbidz, znuse rien to laa guie guiab.

⁵⁵ Zeene rangaa to ziaad me nëz ne rzë ngbidz len mëë nañ, nanle to laa nëëg gac.

⁵⁶ ¡Guie!wquiaalo i lo to gon! Zha zëëb dzigo runbey to grë señ ne rlu zhan gbaa, rlugaa lo guidzliu, laa grë miñe quiayan to len dze rii riende to.

⁵⁷ ¡None guien to tozhal cobey dien pe nac miñe nonguieñ guñ to!

⁵⁸ Gzoob ne bdilnie to tib samiech to, laa to nole nëz zie to lo wxtis grop to. None guien to, laga no to nëz mazd golguiaan mpas, lëde tsiezo zho to lo wxtis; sac tel laa to gdziñ lo wxtis, ib znabey wxtis zha ne co to ladzguuib.

⁵⁹ Ni nanle to ganle, grieede to ga, haxtaque lozh quizh to tel palal gac mult ne gnab zho lo to.

13

Grëse miech, ngoopdol nac zho

¹ Len dze co, bdziñ bla zho lo Jesús bzodiidz zho lo me zha bnabey Pilat gut bla zha Galilé, lëëtse zeene no zho len yadoo noyut zho ma ne nogogon zho lo Dios.

² Dzigo rëbchaa Jesús lo zho:

—Segur na lëë, rëb to mazdraa ngoopdoḷ grë zha co lo grëraa zha ne no nëz Galilé, gane sca bdzieelo zho.

³ ¡lëda gon! Zigtaa ngoopdoḷ zha co, scaque to ngoopdoḷ nac to; telne csaande to xquielntseeb to gbig to lo Dios, ye to znitlo to.

⁴ Scaque tsiimtson zha ne bgaadz yuglaa ne bixche Siloé, masaque rëb to nagon mazdraa ngoopdoḷ zho lo grëraa zha Jerusalén, gane sca gut zho.

⁵ Per gacnan to ganle, ¡lëda! ¡Zig rne naa ga, ye to miech ngoopdoḷ nac to, ni telne csaande to xquielntseeb to gbig to lo Dios, ye to dzin dze ne nitlo to!

⁶ Dzigo bzodiidz me tib cuent lo zho, rëb me:

—Tib men name, zob tib zhan yag guigw lo xcuaa me zaatne quianie me lbë uv. Cad rdzin mëë ne rquia guigw, rie me rieguib me nex low, per ib peet rquiad. Zeene goctaa tson iz, gon me sca rdeetew nex,

⁷ dzigo bnabey me zha ne quianap liu co chuggazh zhow, rëb me: “¡Pchuggazh yag yozh qui, zhlëse zoba i! Nale rac tson iz ziyal naa rguib naa nex low, ni peet nex rneedzda.”

⁸ Dzigo pquiab zha ne quia dziin lo me ga, rëb zho: “Psaan dien guiaaṇa stibtaa iz rii, na laa naa glë zhana, na laa naa gdzin beeba.

⁹ Telne yquiadaque nex low iz ne ziaad, maase cchug new dzigo.”

Biac tib zhuz ne nosacsi mendox

(Mt. 13:31-33; Mr. 4:30-32)

¹⁰ Tib dze ne rdziiladz zha Israel lo dziina, bdzin Jesús len yadoo, psilo me noseed me miech.

¹¹ Lad grë zha ne noseed me ga, lad co no tib men wnaa nlengw nac zhits, gogle tsiimtson iz sca nosacsi mendox me, ib gacd ganli me.

¹² Zeene gon Jesús me, dzigo bredz me me, pxobnia me guic me, rëb me lo me:

—¡Niinagazh gon, laa luu guiac!

¹³ ¡Horcogazh laa zhits me ga gocnli, rley me, psilo me rdeed me xquizh lo Dios!

¹⁴ Laa zha ne rnabey yadoo, zeene gon zho sca beenguiaac Jesús me dze co, blëë zho, rëb zho lo zha ne ndxie ga:

—Zha ne racladz guiac pe lo guielguidz, pe gacd guiaad zho len dze ne rac dziin, ¡led tsod zho guiaad zho guiac zho dze nda rii!

¹⁵ Dzigo pquiab Jesús rëb me:

—¡Nazdpaa ntseeb to! Rquiaalo to ib peet dziin runde to dze rii. ¿Pezhe ga waa run to zeene rsilaa to xcon to, rsilaa to xpurr to dze rii rieguie to ma nis?

¹⁶ Zha nac dzigo rzac to, nonguielda nu ben naa beenguiaac naa wnaa rii, dze rii. Golwi ganle zha xti Abraham nac me, len tsiimtson iz goc sca nosacsi mendox me.

¹⁷ Zha ne rlëë ga, zeene bin zho sca rëb me, ptoladz zho; laa grëraa zha ne ndxie ga, rley zho ran zho grëtaa milagr ne run me.

¹⁸ Blozh ga, bnee me rëb me:

—¿Zha ganle racnroob lo xtsiin Dios lo guidzliu rii?

¹⁹ Racnrooba gon zig rroob tib midz moxtaz ne ran zho dan rii. Tel midz moxtaza niicle tib midz winsew, zaatne racnriw, rrooba, raca tib yag nroob; haxta rie grë mguin riezhixcuaa ma zhiptsieez ma low.

²⁰ Ziaadaque gon gaca, zig ncobi.

²¹ Sac tel ncobiw, niipaquew rcots men wnaa tson lmud rin, ni dib nacse ncob co rzibe.

Zha ne ycaania Dios

(Mt. 7:13-14, 21-23)

²² Laa Jesús no nēz zie me nēz Jerusalén. Guiedz ne rdedtaa me rseed me miech; zigtaa guiedz nrooba, zigtaa guiedz wina.

²³ Tib vuel̄t bnabdiidz tib zho lo me, diēn̄ pe zhis nac miech ne ycaania Dios. Dzigo pquiab me rēb me:

²⁴ —Nligaa zhis zho, sac masaque naca zig tib puert niase. Goltsoxco sca niinasraa golsēēb xnēz me ycaania me to, sac zdziñ̄ dze ne nzian zho gacladz sēēb, per grieelodraaw.

²⁵ Deque laa men ne rnabey csioog ro yu, tel̄ne biaan to nēz ley, niicle cuedzraa to me gnab to siguiel̄ me cxal me ro yu sēēb to, per cxaldr̄aa mew. “Runbeyd naa to”, gnē me, “nan̄d naa diēn̄ cho zha to.”

²⁶ Niicle guiab to runbey me to, biaadpaa me ladz to pseed me miech, haxta downie to me.

²⁷ “Laa naa nile”, gnē me, “runbeyd naa to. ¡Gun̄neetraa to naa, ib rdziguieñd naa grē miech yozh, miech ngoopdol̄ ne nac to!”

²⁸ Mban gac to zeene gan̄ to laa Abraham, laa Isaac, laa Jacob ni grēraa zha ne biadteed xtiidz Dios, laa me pcaania zho, laa to biaan̄se nēz ley. Nligaa mbandox gac to, zoon to, haxta zow lay to lo guieñ̄e co.

²⁹ Ni mazdraaw gon̄, zeene gan̄ to pa lo guidzliu brieē grē miech ne bdziñ̄ ga, iñe zobnie me zho lo xmez̄h me noyownie me zho.

³⁰ Grē zha ne rzac to niina peet nond, lēt̄tse zha co yгаа guieñ̄zaac co; laa grē zha ne rzac non zho niina, peet ygad zho.

Bzeet Jesús zha nac zha Jerusalén

(Mt. 23:37-39)

³¹ Dze coquew, bdziñ̄ bla zha farisé rēb zho lo Jesús grieeniob me ga, sac laa Herod racladz gut me.

³² Dzigo rēbchaa me lo zho:

—Golt̄sie gol̄guiab lo mēz win co cxcw me spalal, nadzese ni gzhe gun̄guiac naa miech nu, zigtaa zha ne rzacnēw, zigtagaa zha ne nosacsi mēndoxa; gal̄ widz guieñ̄de naa nu.

³³ ¡Nligaa nadzesew ni gzhe, widz laa naa gdziñ̄le Jerusalén zaatne za naa! Sac ib̄le Jerusalén, ga rut zho grēse zha ne riadteed xtiidz Dios lo miech.

³⁴ ¡Aque tow men̄ Jerusalén! ¿Pe nacne squitaa nac to, rut to zha ne ziadteed xtiidz Dios lo to, rgoquie to grē zha ne rxeel̄ me lo to? Blactaa gocladz naa niacnie naa to, nquiianaap naa to zig run̄ nguid̄ rgueedz ma xpēēd ma, per bzhiguiel̄de to.

³⁵ Gacnañ̄ to gan̄le, nadzetaa gon̄ laa lidz to guiaan̄ ngan, sac gand̄raa to naa, haxta gal̄ dze ne guiab to: “¡zha ndzontaa men̄ qui pxeel̄ Dios lo nel!”

14

Biac tib men̄ ne rriee gui

¹⁻² Tib dze ne rdziiladz zha Israel lo dziina, güey Jesús lidz tib zha farisé ne nac zha non, sac bredz zho me tib wagw lidz zho. Bdziñ̄aque tib men̄ bgui, rzacnē me, gdipse me no gui. Grēraa zha farisé ne ndxie ga, quialeets zho rzacñ̄e quiambēz zho diēn̄ pe zun̄guiac me mgui co.

³ Dzigo rēbchaa Jesús lo zho, ni lo grē maistr̄ ley ne ndxie ga:

—Gol̄nē diēn̄, ¿pe nonguiel̄a gun̄guiac naa miech dze rii, te nonguiel̄da ye?

⁴ Ni tib zho pquiabd. Horco pxobnia me guic mgui co, beenguiac me mgui. Blozhse bzonēz me mgui,

⁵ rëbchaa me lo zho:

—¿Pe nli na peet dziin runde to dze rii? Teļ zha tsietsobe tib xpëed to, tib xmagaa to tib len guiuu dze rii, ¿niacxe tsiebeegazhde to xpëed to, tsiebeegazhdgaa to xma to ga?

⁶ Loxaque lo zho rac, ib bdziel zho pe nquiab zho.

⁷ Grëraa miech ne nodziñ ga, no zho gruib zho dieñ zha ygaa zho zaatne nzhixcuaaraa sob zho. Goñ Jesús zha rac zho, dzigo bnee me lo zho, rëb me:

⁸ —Golguien goñ, zeene znu cuedz miech to, zig nac tsie to tib wagw zaatne noyac tib guieltsieel, ib gunde tsiesob to zaatne nzhixcuaaraa. Sac goñ, nenda glanso tib zha ne nonraa lo to,

⁹ lozh ga, laa zha ne bredz to lo lni guiaadliso to ga, gnë zho: “Guso i dien sob meñ rii.” Led tib guielto ga par to, racse to laa to tsieso ga, tsiesob to zaatne rialle ro beel.

¹⁰ Mazd ganle, zeene sca pa lo tsie to tib lo lni, ndooladz golgac, tib lad golsob. Zha ne bredzle to lo lni, zeene gan zho laa to zob ga, ziaad zho ziaad-xi zho to tsiesobnie zho to zaatne nzhixcuaa. Zha ne zoble lo mezh ga, zeene gan zhow, zianziuu to lo zho.

¹¹ Golsoladz ganle: grë zha ne lëëque zha runnon zho, leļ riaanwin zho; laa zha ne riaanwin, runnon miech zho.

¹² Blozh ga, rëbchaa me lo meñ ne nac lidz ga:

—Scaque luu goñ, zeene cuedz luu miech guiaad zho tib wagw lidz luu, tsod luu loxaque zha ne ndzieeldiidz luu, loxaque zha bets luu, zha lidzse luu, lo grëгаа zha ne no gax lidz luu zha ne rapchense, zha cose cuedz luu; sac goñ ib tedsod zbedzaque zho luu lo zhilni zho, stsire zho miñe been luu ga.

¹³ Mazd bredz grëse miech, zig nac zha ne guiend pe yquiin, zig nac zha ne guiend tib nia, zha ne guiend tib ni, zha ne roldgaa lo;

¹⁴ zeena gal dze ne grieegan grë zha ne bioxco wban zigne racladz Dios, iñe gley luu ygaa luu guielnzaac ne tsieguial luu gnezd me lo luu.

¹⁵ Lad zha ne zobgrë me lo mezh ga, pquiab tib zho rëb:

—¿Dichos grë zha ne sca ygaa tsiesob lo mezh, tsietownie zho Dios zaatne rnabey me!

¹⁶ Pquiab Jesús rëb me:

—Tib meñ name, nzian zha ne bredz me tsie tib wagw lidz me.

¹⁷ Zeene gol dze ne laa guielwagw co gac, pxeel me tib zhingundziin me ziexi grë zha co.

¹⁸ Per pasë zho nie, zhaase zhaase ncuaañe pquiaqui zho. Tib zho rëb: “Grieelod së naa, sac laa naa pca tib lê liu, ni lêetse nadze no gaso naa low; bzhiguiel gudz lo me guñ me naa dispensar.”

¹⁹ Stib zho rëb: “Niina wriin pca naa gaay nëz ngon, laa naa no ganie ma dieñ zha run ma dziin, gudz lo me yquiambëzd me naa.”

²⁰ Laa stib zho rëb: “Grieelod së naa, sac niina wriin ptsieelnia naa, bzhiguiel gudz lo me gacd guial naa.”

²¹ Bdziñ ngundziin co bzodiidz zho lo me zha rzë xtiidz grë zha co. Zeene bin mew, wbiñladz guic me, bnabey me zho güey zho dib lad guiedz güeyxi zho grë zha ne guiend pe yquiin, grë zha ne guiend nia, zha ne guiend ni, zha ne rold lo, grëse zho bdziñnie zho ga.

²² Blozh ga, rëbchaa zho lo me: “Laa naa wbirele xmandad luu goñ, per scase noraa zaatne cue miech.”

²³ Dzigo pxeel me zho stib, rëb me: “Güey dib ro guiedz, zha ne gdzieeltaa luu, dënie zho nëz rii, bloo guic zho guiaad zho; ib none tsodzëse miech lidz naa.

24 Sac grë zha ne bredz naa glo ga, ni lalnu racladzdraa naa yгаа zho guiełwagw rii.”

*Zha ne racladz sëeb xnëz Jesús
(Mt. 10:37-38)*

25 Laa Jesús no nëz zie me nëz Jerusalén, miech guizhiu ne nał zhits me. Tibaque ptsire lo me bui me lo grë miech co, rëb me lo zho:

26 —Lo grë to ne ziaadnal to zhits naa, gacnan to ganle zha ne racladz ygab xnëz naa, ib none gleynie zho miñe rnabey naa. Sac zha ne mazdraa rleynie pxoz, mazdraa rleynie xnıaa, mazdragaa rleynie zho tsieel zho, xpëed zho, bets zho, bziangaa zho, xquiełmban zhow, rquia zdoo zhow, peet xtsiind grë zha co par sëeb zho xnëz naa.

27 Sac ni tib zha ne sca yquia zdoo cueeladz zho zho guiaadnal zho zhits naa, grieelod ygab zho lo naa.

28 Antes ne yquiabladz to sëeb to xnëz naa, none wen wen sob to dien pe zlëb to ted to miñe rieguial to. Zig nacse tib zha ne gzaa tib yu glaa ne gac chop tson xcuaa, led rzobgazh zho rbee zho cuent dien pe zгаа xtimi zho tsaalow.

29 Sac gon nenda loxaque cueeze zhow, ni lozh ga grieelod gzaalo zhow. Miech ne gaña laa zho gzhidznie zho,

30 guiab zho: “Gołwi lo zha qui ganle, loxaque bleeze zho lidz zho, na blëbd zho nzaalo zhow.”

31 Scaque rey ne no tilnie stib rey, led none sobgazh zho gan zho dien pe zlëb tsi mil xmenguiib zho tsietilnie gal mil xmenguiib stib rey co.

32 Telne rgobey me lëbd me, laga bii zit ziaad stib rey co, rxeel me bla zha ne tsie tsienee dien zha gataa cuëz lo xtil zho.

33 Scaque to nagon none glo gwi to pe nac grë ncuane no csaan to, parne grieelo ygab to xnëz naa.

34 Sac gon zed ne nzhid, ¿pa dien yquiina?

35 Per ni par gaca beeb peet xtsiinda; miñe ractaaw, laaw rziaab. Zha ne no liaadz guien zho pe rnee naa, yquiaadiag zhow.

15

*Zha rzac Dios zha ne zozit lo me
(Mt. 18:10-14)*

1 Zeene rseed Jesús miech, nzian grë zha ne rtop dimi ne razh lo zha Roma, ni grë zha ne rzoob miech nac zha yozh, ye zho rbig zho rquiaadiag zho zhiwseed me.

2 Nacne grë zha farisé ni grë maistr ley, rneenë zho me, rnee zho lëda ga run me sca rtsieelsa me grë zha co, rownie me zho.

3 Dzigo bnee me lo zho, rëb me:

4 —Togase nadien, gzoob ne quianie to tib gayoo mëcwxiil, ni lega naclew rziaab tib ma, ¿zha dien run to? Led rsan to ma ne ndxie lo to ga lëe, laa to rie rieguiib to ma ne bziaab ga, haxta rdziel to ma.

5 Zeene rdziel ma lo to, lo guiełbley co haxta rxobyay to ma rdziñnie to ma ro yu.

6 Lëelëd rzodiidz tow lo zha ne ndzieeldiidz to, lo zha ne no gax lidz to, sac rley to laa xpëcwxiil to brieequia.

7 Gni naa lo to ganle, scadaa nagon rzac Dios, tib guiełbley nrooba lo me, zeene ran me laa tib zha ngoopdoł rsaan xquiełntseeb, laa zho rbig lo me. Ne nligaa tib guiełbley rac zha co lo me, lëdle zha ne rzac miech wenle nac zho lo me.

⁸ 'Zig rzacga a tib meṅ wnaa, gzoob ne nzhēn me tsii gayoo pes, ni lega naclew rsēēb me tib gayoow, ¿zha dien ruṅ me? Led hor cogazh lēē rquiaa me biini, rsilo me dzega dzega floob me leṅ lidz me haxta rdziel me dimi co.

⁹ Zeēne rdziel mew, rley me rzodiidz mew lo grē zha ne ndzieeldiiz me, lo grē zha ne no gax lidz me.

¹⁰ Zig rne naa ga, scadaa nagon rzac grē xanj̄l Dios, tib guieḷbley nrooba lo zho zeēne ran̄ zho laa tib zha ngoopdoḷ rsaan xquieḷntseeb, laa zho rbig lo Dios.

¹¹ Dzigo psilo Jesús bzodiidz me tib cuent lo zho, rēb me:

—Tib meṅ name quianie me chop mēēdbgui.

¹² Tib dze, rēb zha ne nac zha niab lo me: “Papá, tel̄ pe nac ncuaaṅe no gneedz luu lo no, bzhiguiḷ niinaga beēngrola, zeēna gneedz luu miṅe raguial̄ naa.” Dzigo beēngrol̄ me ncuaaṅe rap me, bdeed mew lo zho.

¹³ 'Zhisaque goca, pto zha niab co grēse ncuaaṅe biaḷ zho, brieē zho laa zho zie. Bdziṅ zho stib dan, ga beēn̄ zho grē guieḷyozh ne gocladztaa zho, grēse xtimi zho pxin̄ zho ga.

¹⁴ Tibaque zeēne laa xtimi zho blozh, mbanse rac zho guieṅdraa pe gow zho, ni lēētaque leṅ dze co laa tib gbin psiloque nēz co.

¹⁵ Dzigo racse zho güeyguib zho dziin lad guiedz co, ga brieēquia tib meṅ co bree zho, pxeel̄ me zho yquiaanap zho nguts.

¹⁶ Lo gbin ne noded zho ga, rzac zho tebaa cho gdeed maase grē duuzhye dan ne row grē nguts co gow zho, per ni min̄ co choot rdeete lo zho.

¹⁷ 'Sca no zho ga, tibaque zeēne biaa zho biini psoladz zho nzian zha ne quia dziin lo pxoz zho, grē ncuaaṅe raclo row grē zha co, haxta riaana, ni laa zho sca noded ga; rēbchaa zho:

¹⁸ “Mazd miṅe naca laa naa guia gdziin̄ naa lo pxoz naa stib, guiep naa lo me guṅ me naa perdon grētaa falt ne beṅ naa lo me, falt ne beṅaa naa lo Dios.

¹⁹ Maase sacdraa me naa zig xpēēd me, siguiḷ me ycaania me naa gac naa zig tib zha ne quiaze dziin lo me.”

²⁰ Horco bio zho nēz laa zho zey nēz lidz pxoz zho. Zitraa ziaad zho laa me gonle zho, pquia zdoo me zho gon̄ me zha rac zho; rias me güeydzieelo me zho bnaaz me nia zho, bdeedz me zho.

²¹ “‘Papá’, rēb zho lo me, “rieṅ naa nroob falt ne beṅ naa lo Dios, beṅaa naa lo luu. Rieguiḷdraa sac luu naa zig tib xpēēd luu.”

²² 'Ni blēzd me nlozh nee zho, lēēlēd bredz me zha ne quia xtsiin̄ me, rēb me: “¿Na goḷtēnie tib nēz lar wen nu gacw xpēēd naa! ¿Goḷtēnie tib niḷ wen tso nia me, tib nēz guieḷguid cub yquia ni me!”

²³ Bnabey me zho güeyxi zho tib ngon ne mazdraa ndaan, beet zho, rēb me: “¿Ib none gac tib lni, none dioow ne, none dio ne!

²⁴ ¿Sac gon̄ guṅ naa cuent, brieēban xpēēd rii naa! ¿Bnitle me ga, na laa me bdziel!” ¿Laa lni psilo!

²⁵ 'Lni co noyac, zeēne laa stib xpēēd me zha ne nac zha gol ga, wbire lo dziin dan. Bdziṅ zho gax ro yu, rlu rquia di, haxta wiee rlu noyac;

²⁶ dzigo bredz zho tib zha ne quia dziin lo pxoz zho ga, bnabdiidz zho dien̄ pe lni ne noyac.

²⁷ Dzigo rēbchaa zha co: “Bets luu blanso, gane squitaa bnabey pxoz luu noyac lni; rley me gon̄ me mban zho laa zho blanso. Bnabey me gut tib ngon ne mazdraa ndaan.”

²⁸ Blēē zha gol co bin zhow, lo guieḷblēē co bzēēbd zho ro yu. Nacne brieē pxoz zho, bnee me lo zho sēēb zho ro yu.

²⁹ Dzigo rëbchaa zho lo me: “¡Lëdraaw i gon papá noyūn luu! Bui ganle blactaa iz ne quaiyūn naa dziin lo luu, wlaftaa gard quits naa tib xtiidz luu. Ni zha rna tib dze, siquier tib chiv yeen ygad luu lo naa, gownie naa grë zha ne ndzieeldiidz naa.

³⁰ Cho dzigo nac zha qui, blozhse güeyloozh zho xtimi luu lo grëtaa guielyozh ne beən zho, na no luu beet luu ngon ne mazdraa ndaan, noyūn luu zhilni zho.”

³¹ Dzigo rëbchaa me lo zho: “Nliw xin, ni lalnu gard csaan luu naa, gacxe waa grëtaa ncuaañe quianie naa, luu guiaaññew.

³² Per niina ne laa bets luu blanso, ib nonguiela znu dziuūn ne tib lni gleyinie ne me; sac gon bnit me, ni na laa me bdziel. ¡Dziuūn ne cuent brieeban me nu!”

16

Ligier miech par lo guielntseeb

¹ Tib vuelte bzodiidz Jesús tib cuent lo xpëëdsuel me, rëb me:

—Tib men name nroob rapchen me, quianie me tib zha ne zo lo grëtaa ncuaañe rap me; tib dzew, lega nacle bded diag me zhliaan noxin zha co xtimi me.

² Dzigo bredz me zho, rëb me lo zho: “Lëda i gon squi ruñ luu, lega noxin luu xtimi naa. Niinaga racladz naa guiaadnie luu cuent nu dien zha quaiyūn luu dziin; sac grielodraa so luu lo grë ncuaañe rap naa.”

³ Wbire zho ga, rëb zho: “Zha na ganle guñ naa, telne guiab ne ga naa dziin dan, lëbdraa naa guñ naa dziin co; tel guiaabgaa ne na ga naa gatop naa gon, rtoladz naa gnab naa gon lo miech.”

⁴ Tibaque zeene biab guic zho rëb zho: “¡Laa naa bienle zha guñ naa, zeena tso zha ne guñ xyudar naa zeene laa naa grie lo xtsiin men rii!”

⁵ Dzigo psilo zho bredz zho zha ne quia guielqui lo men ne quia zho xtsiin ga. Bdzin tib zha co bnabdiidz zho lo zho dien palal nzëeb zho lo me.

⁶ Rëb zha co: “Tib gayoo tamb nceit nac mine nzëeb naa lo me.” Dzigo rëbchaa zho: “Nliw, lalga quia lo tib val ne psan luu nu. Ledaa val co nu, zac ctsieez luuw; bzhixcuaa stiba, pquiaa lo co, groñ tamba zëeb luu.”

⁷ Bdziñaque stib zha co, bnabdiidz zho lo zho dien palal nac xquielqui zho lo men co. Zha co rëb zëeb zho tib gayoo sac zhobxtil. Dzigo rëbchaa zho: “Nliw, lalga raquiet lo val ne psan luu; per na zac ctsieez luu min rii, bzhixcuaa stiba, pquiaa lo co tapgalaque saca zëeb luu.”

⁸ Zeene bien men co zha noyūn zho, bzee zdo me gon me scataa ndzielguic zho. Ncuaañe ntoladza, per grëse miech ne zienal ncuaañ lo guidzliu rii, ndzielguic zho par guñ zho grë guielntseeb. Par min co ndziibraa ndzielguic zho lo zha ne no xnëz Dios.

⁹ Sangue to gzooblazde to guñ to min co, ncuaañe rap to lo guidzliu rii, golquina per par guñ to xyudar samiech to. Zeene laa ncuaañ co grë, nenda zacie zho to, per mine mazdraa non Diosi ible zacie me to, zneedz me tib lugar ndzon cuëz to, led yedraa ga pe nitlo.

¹⁰ Zha ne ndzinli rundziin tel palal yeense ncuaañe riaañie zho, scaque ndzinli gundziin zhow zeene guiaañie zho nrooba. Laa zha ne ndzinlid, mine guñ zho zeene guiaañie zho ncuaañ zhis, mincoque guñ zho zeene guiaañie zho ncuaañe nroob.

¹¹ Nana zha ne sca gacd ne ndzinlise gundziin zho ncuaañe no lo guidzliu rii, ¿zha dzigo grielo gundziin zho ncuaañ ndzon ne gdeed Dios lo zho zaatne no me?

¹² Stiba, tel sca ndzinlide to lo chen ben, ¿pe naczhe ncuaañe guñ to tib ncuaañe chenpaa to?

13 Golgona ganle, grielod gon gleyinie to dimi ni gleynieque Dios. Ib none telne Dios rleyinie to, me none gleyinie to, togo dimigaaw, dimi golleyinie.

14 Grë zha ne nac farisé zeene gon zho sca rnee me, lel rzhidznie zho me, sac tel zhaw rleyniedox zho dimi.

15 Dzigo rëbchaa me lo zho:

—Masaque rzac to nalëë nli miech wen nac to nëz lo Dios, sangue me gon, wen wen nan me zha nac zdoo to. Nli miech ne ran to, zha wen rzoob zho to; sangue Dios ni lalnu rzacd zdoo me mine run to.

16 'Leñ dze ne gard guiaad Juan Bautist, niapse xley Moisés ni grë mine bnee zha ne biadteed xtiidz Dios, min co nac mine güeynal to. Per zeene psilo Juan pseed me miech, desde hor co laa miech quiayacnan stib mod ne grielo yгаа zho zaatne rnabey Dios; gane na nzian zha ne noxc yгаа lugar co.

17 Per guiabde to togo nondraa ley, sac grëse mine zhobnee lo ley, jib laaw none gac! jzig nac guidzliu, zig nac gbaa zrieelo nitlow, sangue ley nitloda, tibaque naca!

18 Gacxe waa, grë zha bgui ne rsëbtsieel niina ni rtsieelnia zho stib wnaa, zha ne rtsieelniaгаа tib wnaa ne psëëbtsieel, dol ga quiayun zho; zigtaa dol a padzeela, scaque niina dola.

Xcuent tib zha prob lë Lazh

19 'Tib ricw name —rëb Jesús—, niapse grë lar niazh racw me, gzobse dze run me lni lidz me.

20 Zaatne noque me ga, guiedz co no tib zha prob lë Lazh, lala prob me ni rlanaque me guiedz, gdipse lad me noyacnë guiedz co. Riese me riesob me ro lidz zha ricw co,

21 rquiambëz me dien pe grielod gow me maase ncuane rrieengaale lo xmezhen men co; ga zob me haxta rdzin grë mëcw rzëëludz ma lo guiedz ne rlan me ga.

22 'Bdzin dzew laa Lazh gut, dzigo biet xanjl Dios beynie zho me lo Abraham, zaatne rdzin grë zha wen. Goc palal dzew, laa men ricw co gutaque, blozhse pquianap zho me, laa zho güeyqueets me;

23 zeene biala me biini laa me nole gabil. Lëbdraa me no me lo guielnë co, lega naclw blis lo me, zit squi gon me Abraham, laa Lazh zobnie Abraham ga.

24 Horco bnaab me lo Abraham siguiel Abraham cxeel me Lazh, maase guic mzhugniase Lazh yquiaa Lazh nis tsiegadz Lazh lo ludz me; sac lëbdraa me lo guidox ne no me ga.

25 Dzigo rëbchaa Abraham lo me: “Xin, psoladz ganle zeene wban luu lo guidzliu, ncuane gocladztaa luu pquianie luuw; laa Lazh mbanse bded me. Nagaa na, me nac men ne nogaa noyan guielbley, laa luu bgaa squi no luu lo guielnë qui.

26 Stiba, zha ne no nëz rii gacd guiaad zho i, niicle zha ne nogaa iw, gacd guiaad zho nëz rii; sac no tib yeedox ne rtse.”

27 “Bzhiguiel sca”, rëb men ricw co, “pxeel Lazh tsie me lidz pxoz naa,

28 tsienie me diidz lo zgaay bets naa zha ne biaan, guiab me lo zho ib gund zho mine ben naa, zeena guiaate zho nu yгаа zho lo guielnëdöx rii.”

29 Pquiabchaa Abraham, rëb Abraham: “Tel mincow, tsow glab zho lo grë ley ne psan Moisés, lo grë mine bnee grë zha ne güeyteed xtiidz Dios, benque lo co zhobnee zha no gban zho.”

30 “Nliw”, rëb me, “per tel squi tib men ne gutle tsie tsienee lo zho, rien naa znuse csaan zho xquielntseeb zho gbig zho lo Dios.”

³¹ Dzigo rëbchaa Abraham: “Telne rond zho minë rnabey grë ley ne psan Moisés, grë minë bnee zha ne güeyteed xtiidz Dios, scaque gond zho diidz niicle tsie tib zha ne brieebanle tsienee lo zho.”

17

Zha ne gunctal xtoĭ stib zho (Mt. 18:6-7, 21-22; Mr. 9:42)

¹ Tib vuelte rëb Jesús lo xpëëdsuel me:

—Nac lo guidzliu rii, ib gunfalte ncuaañe rgogui miech gunctal zho xtoĭ zho, ĩper probsaxe zha ne rquuil samiech runcal zho xtoĭ zho!

² Mazd zhi guielnëw lo zho ygadoo tib quie molin zho bxtil yan zho tsieron zho zho nisdoo, lëdle guielnëdoo ne gan zho; sac gon doĭ nroob ga gun zho yquuil zho zha ndooladz ne no xnëz naa.

³ ĩGolguien sca ndzinli golgac! Tib bets tow, zeene pe tib falt gun zho lo to, golnee lo zho gundraa zhow; telne gnab zho perdon, golgun zho perdon.

⁴ Niicle telne nzian vuelte sca gun zho falt lo luu tib dze, been zho perdon zeene laa zho rbig rnab zho perdon lo luu.

⁵ Stib dzew, rëb zha ne rzënie me lo me:

—Bneedz guielbiini lo no dib zdooraa no gnalo no Dios.

⁶ Pquiab me rëb me:

—Telniaca minë gzoob ne rnalole to Dios siquier lal tib midz moxtaz, niicle ncuaañe mazdraa ngan gnab to lo me, zun mew.

⁷ ĩPe ran to ganle, zha nac zha ne run xtsiin ben? Zeene rbire zho dan, yase güey zho gon, güeygaa zho güeyquianap zho ma, pe liaadz men ne quia zho xtsiin ga, guiab me lo zho: “Na bded, bzob, zeena gowxtsee luu.”

⁸ Mine run me, gloque rnabey me zho gunlo zho ncuaañe gowxtsee me, gdziib zhow lo me; rlozhraa row me, dzigoraa rowxtsee zho.

⁹ Niicle scataa ron zho minë rnabey me, ni rlozh ga, per ni xquizh rdeete me lo zho.

¹⁰ Scaque to nagon, zeene lozh gun to grë dziin ne pso Dios to gun to, peet yquiambëzde to, golguien tib ngundziinse nac to, minë rieguial to ga, min co been to.

Biac tsii zha ne rlan guiedz lepr

¹¹ Laa Jesús no nëz zie me nëz Jerusalén. Laa me zieded tib guiedz win ne riaan zaatne ndzieel xtan Samar xtan zha Galilé,

¹² zeene brieequia tsii zha ne rlan guiedz lepr. Zit zo zho,

¹³ nguiedz rbedz zho me, rnab zho lo me yquia zdoo me zho.

¹⁴ Zeene gon me zho, rëbchaa me lo zho:

—ĩGoltsie, goltsielulo lo pxoz, zeena gan zho ganle laa to biacle!

Dzigo laa zho zie. Nëz no zho laa zho biaanmbe lo guiedz co.

¹⁵⁻¹⁶ Lo gza zho, hor co rias tib zho wbire, nguiedz rnee zho:

—ĩZha ndzontaa Dios! ĩGolwi ganle laa me beenguiacl naa!

Zigne bdziñ zho lo Jesús, pquitsgzhib zho lo me, haxta bdziñ lo zho lo liu, rdeed zho xquizh lo me. Tib zha Samara, zha zit nac zho.

¹⁷ Dzigo rëbchaa Jesús:

—ĩYoraazhe grë zha co waa? Conque tsii zho name beenguiacl naa.

¹⁸ ĩTibaque zha zit rii dzigo lëë rzac zdoo minë been Dios lo zho?

¹⁹ Dzigo bliso me zha co ga, rëb me lo zho:

—Porne dib zdoo luu gon bnalo luu Dios, gane biac luu. Bzë, peet tsieniedraa guic luu.

Zeene gbiire guiaad Mgui ne pxeel Dios

(Mt. 24:23-28, 36-41)

²⁰ Tib dze bnabdiidz zha farisé lo Jesús, rëb zho:

—¿Poc dzigo csilo gnabey Dios lo ne?

Dzigo pquiab me rëb me lo zho:

—Gacnan to ganle, nacd min co ncuaañe ganlopaa miech.

²¹ Grielod guiab zho laaw psilo nec, laaw psilolegaa nëz rii; sac gon tel niina laa me quianabeyle nu.

²² Bded ga, rëbchaa me lo xpëedscuel me:

—Zdziñ dze, gacladz to tebaa zha znu so naa lo maase tibaque dze, per gacdraaw.

²³ Len dze co, zio zha ne gnë lo to: “Goltë ganle laa Mgui ne pxeel Dios bdziñ nu”; gnëgaa zho pa stib lugar none tsie to par gan to naa; tsienalde to, gliladzde to xtiidz zho.

²⁴ Sac zeene gbiire guial naa, grëse miech gana. Zig nac tel guiab tib belye nroob ne glu zhan gbaa desde nëz ne rlan ngbidz haxta nëz ne rzëeb ngbidz, ¿niacxe gand grëse miecha?

²⁵ Per ansraa ne gac min co, ible nroob guielnë ne cteed miech rii naa, ni lalnu gandzed zho naa.

²⁶⁻²⁷ Len dze ne guial naa ga, grë miech ne ndxie lo guidzliu gal hor co, zhaa grë ncuaañe tsonie guic zho. Rsoladz to ganle zha rac miech len dze ne bиаad Noé, lel lo grë zhilni zho no zho, zha ne notsieelnia, zha ne nobediin xpëed, tibaque zeene bиаa zho biini laa guiedox co psilole. Laa Noé nole len barcw, laa zho bиаan grëse zho bnitlo lo nis co. Scadaa nagon no miech len dze ne guial naa.

²⁸ Zig racgaa miech Sodom len dze ne brieë Lot ga. Scaque, loxaque ncuaañ lo guidzliu rii noxco zho, zha ne no lo zhilni, zha ne no zhiwto, zha ne nozigaa, zha ne quia gon, zha ne quiazhixcuaagaa lidz.

²⁹ Lega naclew, zeene laa Lot brieë, hor co laa tib guidox biet gbaa, notsa zufr bliaala lad guiedz co, grëse miech co bnitlo lo guidox co.

³⁰ Scapaa nagon rac miech ne ndxie lo guidzliu len dze ne laa naa guial.

³¹ 'Zha ne lëëtaque hor co no glaa guic yu, ib guiabd zho sëeb zho len yu tsiebee zho ncuaañe no len lidz zho, zha ne quiagaa lo dziin dana, ib guiabd zho gbi zho guey zho ro yu.

³² ¡Golsoladz ganle zha bzhaac wnaa ne goc tsieel Lot!

³³ Grëse miech, zha ne sca rquianë zdoo grë ncuaañe rap zho, ible znitlo zho xquielmban zho; sangue zha ne rquiad zdoo grë ncuaañ co, haxta xquielmban zho rbeeladz zhow, nitlod zho.

³⁴ Gal hor co, zaatne tipse nixguies chop zho, tib zho sënal zhits naa, laa stib zho guiaan.

³⁵⁻³⁶ Zaatne tipse quiaayot chop wnaa, zaatne tipsegaa quia chop mgui lo dziin dana, tib zho sënal zhits naa, laa stib zho guiaan.

³⁷ Dzigo rëbchaa xpëedscuel me lo me:

—¿Pa lo dzigo gdziñ grë zha co?

Pquiab me rëb me:

—Horco bii zlu ganle paw. Zig nac grë pech, zaatne nix magut ga rdziñ ma.

18

Zha ne rnab lo Dios

¹⁻² Stib dzew, bzodiidz Jesús tib cuent lo xpëedscuel me, par guien zho ib guiaan zdoo zho zeene racniobd mine quianab zho lo Dios, rëb me:

—Tib guiedz name, no tib men co nac me wxtis, ni palal rquiad zdo me samiech me, per ni Dios rdziebd me.

³ Guiedz coque no tib zhuz viud, gzobse dze rie zhuz co rienab zhuz gun me guielwxtis, cuedz me tib zha co rlëë lo zhuz.

^{4,5} Glo ib rquiaadiagd me mine r nab zhuz co, per zeene goc palal dze gon me tibaque quia men co quianab me gac guielwxtis, dzigotaa rëb me: “Ncuaane lëbdraa guic naa lo men rii, tibaque squi quia me. Nli rdziebd naa Dios, niicle nodgaa naa liaadz pe rzac miech, per parne guida gunneetraa me naa, mine naca mazd laa naa gun guielwxtis ne rnab me.”

⁶ Blozhse bzodiidz Jesús cuent co, rëbchaa me lo zho:

—Telne sca bdziñ dze ne pquiaadiagd zha ntseeb co mine bnab wnaa viud co,

⁷ ¿pe leļ Dios dzigo yquiaadiagd xtiidz zha ne ngab lo me, tel tibaque gnab zho mine racladz zho?

⁸ ¡Nligaa, ib tedsod zun me mine rnab zho! Per segur zhis zho quiambëz gac xquielwxtis me, zeene laa naa guial stib.

⁹ Laa grë zha ne riats, zha ne rzac masaque zha wen nac zho nëz lo Dios, haxta rbix zdo zho ran zho grëraa miech, bnee Jesús lo zho, rëb me:

¹⁰ —Chop zha name, bdziñ zho len yadoo ziezodiidznie zho Dios. Tib zho nac zha farisé, stib zho nac zha ne rtop dimi ne razh lo rey Roma.

¹¹ Zha ne nac farisé ga, psilo zho rnee zho: “Dios, rnedz naa xquizh lo luu, sac nacd naa zigne nac grë miech ngoopdol, zig nacse zha ne zo i. Waltaa rund naa guielgbaan, rund naa guielntseeb, niicle rquiangoobd naa stib wnaa.

¹² Haxta chop vult rcuan naa tib len zhmal, grëse ncuaane run naa gan, run naaw tsii lal, rnedz naa tib lal mine rieguial luu.”

¹³ Laa zha ne rtop dimi ne razh Roma ga, gaxaque ga zo zho, per nquiitrunse zho liu. Mban rac zho, quiase nia zho zdo zho, rnee zho lo Dios: “¡Dios, rnab naa lo luu pquia zdo naa znutaa miech ngoopdol nac naa!”

¹⁴ Gnelli naa lo to ganle —rëb Jesús—, mazdraa gon wen biaan recaudador co lo Dios, lëdle zha farisé co. Sac zha ne lëëque zha runnon zho, racnond zho lo Dios, laa zha ne riaanwin, runnon me zho.

Beenlay Jesús mëëdlas

(Mt. 19:13-15; Mr. 10:13-16)

¹⁵ Tib dze, nzian men ne bdziñ lo Jesús, bdziñnie zho xpëëdlas zho lo me, parne cxobnia me guic win gunlay me win. Grë zha ne nac xpëëdscuel me, leļ psilo zho ndox zho lo grë zha ne bdziñnie grë mëëdlas co.

¹⁶ Zeene gon me sca quiayun zho, dzigo bredz me zho, rëb me lo zho:

—¡Ctsirede to grë mëëdlas yeen qui! ¡Golsaan guiaad win lo naa! Sac gon grë mëëdlas yeen qui, ni zha ne nac zig nac win, zha co nac zha ne sëëb ygab lo Dios.

¹⁷ Nligaa zha ne gacndooladzd, zha ne gliladzd dib zdo, zigne run grë mëëdlas, grieelod gdziñ zho zaatne rnabey Dios.

Ncuaane run dimi

(Mt. 19:16-30; Mr. 10:17-31)

¹⁸ Tib vult, wbig tib men ne nac zha non lo menguiedz Israel, rëb me lo Jesús:

—Nan naa luu nac tib men ne noseed miech, ni tib men wen nac luu, ¿bnë lo naa dien, pe nac mine gun naa parne grielo ygaa naa guielmban ndzon ne gdziñ dze lozh?

¹⁹ Pquiab Jesús rëb me:

—Rnee luu lëë tib miech wen nac naa. ¡Nligaaw, Diosse gon nac men wen!

²⁰ Telne nli racladz luu ygaa luu guielmban co, none tsoxco luu gban luu zigne nac Xley Dios. Nanle luu ganle zha naca, rneew: Tsonied luu zha ne led tsieeld luu,

gute luu samiech luu,
cuand luu samiech luu,
yquiadiidzguizhd luu samiech luu.

Gon pxoz luu, gon xniaa luu, cued luu xquielto me.

²¹ Dzigo rëbchaa men co:

—Maestro, grëse mine bzeet luu i, ni tiba gard quits naa wlal ne nac naa zha nguieg.

²² Horco rëb Jesús lo me:

—Stibaque mine rquin gun luu. Güey, güeyto grëse ncuane quianie luu, dzigo bdiiz dimi co lo grë zha mban ne guiend pe yquiin; sca nroobraa guielnzaac ne ygaa luu gbaa. Lozh ga, dë, denal zhits naa.

²³ Zeene bin men co sca rëb Jesús, mbanse rac me laa me zey; sac nroob ncuane quianie me.

²⁴ Dzigo rëbchaa Jesús lo xpëedscuel me:

—jZha ngantaal léë, rzac zha ne squi rapchen sëeb zho xnëz Dios gnabey me zho!

²⁵ Mazd ngandse rded tib camell guieer guzh.

²⁶ Grë zha ne ndxie ga, zeene bin zho sca rëb me, rneechaa zho:

—Telne scataa ngan sëeb miech xnëz Dios, çhosezhe dzigo waa nac zha ne zrielo sëeb xnëz me?

²⁷ Dzigo rëbchaa Jesús:

—Nligaa par miech, zootle tsod zha ne grieelo sëeb xnëz me; sangue me nan me no zho. Sac tel me, tsod ncuane grielod gun me.

²⁸ Horco pquiab Pedr, rëb Pedr lo me:

—Tel no, grë ncuane rdziaapse no psan now, laa no ziaadnal zhits luu.

²⁹ Pquiab me rëb me:

—Golgacnana ganle, grëse zha ne psan lidz, psan zho tsiel zho, psan zho xpëed zho, psan zho pxoz zho, psan zho xniaa zho, psan zho bets zho, bziangaa zho, porne bzëeb zho xnëz Dios,

³⁰ na lo guielmban riique, mazdraa nroob mine gan zho, ni lozh ga ib tedsod zgaa zho guielmban ndzon ne gdzindraa dze lozh.

Bzeet Jesús stib zha csacsi miech me

(Mt. 20:17-19; Mr. 10:32-34)

³¹ Ne sca no Jesús nëz zie me nëz Jerusalén, tibaque bredz me gza tsiipchop zha ne rzëniepaa me ga, bzeet me lo zho zha gun miech me, rëb me:

—Grëse mine bzeetle zha ne biadteed xtiidz Dios padzeela teed naa, niina ne laa ne gdzin Jerusalén, laaw gac cumplir.

³² Ga gnaaz zho naa, tsielo zho naa ladznia grë zha ne nacdraa zha Israel, idznie zho naa, squiaago zho naa, stsuc zho lo naa,

³³ zguin zho naa, ni haxta zut zho naa. Per zeene gac tson ngbidza, zriebaanaa.

³⁴ Per ib biend zho dien zha nacne sca rnee me.

Biac tib zha ne rold lo

(Mt. 20:29-34; Mr. 10:46-52)

³⁵ Laa Jesús bzëeb ro guiedz Jericó, miech guizhiu ne nal zhits me. Ro nëz co zob tib men ne rold lo, rnab me gon.

³⁶ Zeene bien me rlu nzian miech noded ga, dzigo bnabdiidz me dien pe nacne scataa ziaad grë miech co ga.

³⁷ Dzigo rëb zho lo me, Jesús, men Nazaret ziaad ga, zhits me ziaadnaḡ grë miech co.

³⁸ Horco psilo me nguiedz rbedz me, rnee me:

—jJesús, men xtii rey David, pquia zdoo naa!

³⁹ Grë zha ne ner, psilo zho ndox zho lo me parne guioog ro me, per lej hor cole nguiedzraa rbedz me Jesús, r nab me yquia zdoo Jesús me.

⁴⁰ Nacne zeene bdziḡ Jesús gax zaatne zob me, blëz Jesús, bnabey Jesús güeyxi zho me. Bdziḡ me lo Jesús, rëbchaa Jesús lo me:

⁴¹ —¿Pe nadien guḡ luu naa?

Pquiab me rëb me:

—jRacladz naa guiac lo naa!

⁴² Dzigo rëbchaa Jesús:

—jNiinagazh goḡ laa luu gaḡ stib! Laa luu biac, sacne dib zdoo luu bnalo luu naa.

⁴³ Horcogazh laa men co psilo bui, ine rley me roolnie me Dios, laa me zianaḡ zhits Jesús. Haxta grë miech ne zianaḡ ga, zeene goḡ zhow, ye zho roolnie zho Dios.

19

Güey Jesús lidz tib men læ Zaquew

¹⁻² Guiedz Jericó, ga no tib men ne rnabey lo grë zha ne rtop dimi ne razh lo rey Roma, læ me Zaquew. Zeene laa Jesús zieded lad guiedz co,

³ brie me, ziewi me, sac racladz me guḡbey me Jesús. Bdziḡ me, pasëse me gan me Jesús, sac lala miech guizhiu ne naḡ zhits Jesús, ni lala ndopse me.

⁴ Miḡne been me, rias me bdedner me güeytsep me tib lo yag guḡw zob ro nëz co, par gdeeda diidza gaḡ me Jesús, zeene laa Jesús ted ga.

⁵ Zeene laa Jesús bded ga, blis lo Jesús goḡ Jesús laa me zob ga, dzigo bredz Jesús me, rëb Jesús lo me:

—Zaquew, na zeena biet i. Sac racladz naa, lidz luu cuëz naa nadze.

⁶ Rley Zaquew goḡ Zaquew sca rëb Jesús, lælëd biet me lo yag co, laa me zienie Jesús nëz lidz me.

⁷ Zeene goḡ grë miech cow, rlëë zho, rnee zho:

—jPe læëtaa lidz zha ngoopdoḡ qui ziebëz me!

⁸ Laa Zaquew, ine rley zobnie Jesús. Tibaque bzoli Zaquew, rëb Zaquew:

—Gacnaḡ luu goḡ, lo grë ncuaaḡ rap naa, laa naa gded grola ygaaz lo grë zha ne guiedz pe yquii, ni tel nogaa zha ne ndziibraa miḡne beenquizh naa zho, naa maase ctsiree naa tap lal miḡne blan naa zho ga.

⁹ Horco pquiab Jesús, rëb me lo zha ne ndxie ga:

—I nagoḡ rlu laa men qui wbigle lo Dios, parne ycaania Dios me. Nli zha xtii Abraham nac me, per bzonziaab me

¹⁰ ni naa ne nac naa Mgui ne pxeel Dios, ible laa naa ziaḡ ziaḡsilaa naa grë zha ne zonziaab.

Zha ne biaanmie dimi

¹¹ Grë miech ne zianaḡ zhits Jesús ga, rzac zho zigne laa me gdziḡ Jerusalén, laa me sob gac me zhirey zho; nacne bzodiidz me tib cuent riḡ, rëb me lo zho:

¹² —Tib xpëëd zha non name, no me tib guiedz win, nacle diidza laa me no tsie zaatne zob men nroob ne rnabey, parne gzo zho me gac me rey guiedz ne no me ga.

¹³ Zeene laa dze co bdziḡ, dzigo bredz me tsii zha ne quia xtsiin me, nroob dimi ne psan me lo zho tib tib zho, parne gundziin zhow, mientras gbire me.

14 'Nzianlaa zha ladz me, rlëe zho ran zho me, dzigo pxeel zho bla zha ne güey lo men ne rnabey ne zie me ga, güey nab zho gdeete men co dziin co lo me.

15 Per niicle sca güey grë zha co, peet brieelod niun zho. Blozhse bzo rey co me, laa me bdzin ladz me. Zeene bdzin me, bredz me gza zha ne biaannie xtimi me ga, par dien palal ziyaca.

16 Bdzin tib zho, rëb zho: "Laa xtimi luu nu gon, tsii lal mine psan luu ga naca niina."

17 Rley me rëb me lo zho: "iZha squi nagon racladz naa! iWen brieequia xtsiin luu! Niicle zhis ncuane psan naa lo luu, per bien luu niowse bendziin luuw. Na nagon, laa naa gzo luu, gnabey luu tsii guiedz."

18 Bdzin stib zho, rëb zho: "Laa xtimi luu nu gon, gaay lal mine psan luu lo naa ga naca niina."

19 Scaque rley me. Bzo me zho gnabey zho gaay guiedz.

20-21 Zeene bdziintaa tib zho, rëb zho: "Nli bendziind naa xtimi luu, sac nanle naa zha nac luu, niicle paraa niundziin naaw, grëse mine niuna gan lo luu niaana; gane mazd pquia naaw tib lë lo lar, blootsow naaw, ledaaw nu."

22 Blëe guic me, rëb me lo zho: "iBiche nu, paat rquiind naa miech yozh ne squi nac! Conque nanle luu zha nac naa,

23 ipep nac dzigo waa bioxcod luu maase mbediin luu dimi qui, ndziniaaw palal ncaania naaw niina?"

24 Dzigo rëbchaa me lo grë zha ne ndxie ga: "Niinagazh golcob dimi qui nia zha qui, goldeeda lo zha ne ziaadnie tsii lala i."

25 Pquiab zho rëb zho: "Per pe nacne zha coque ycaaniaw, ni nrooblew beenlo zho."

26 "Ib sca no gaca", rëb me, "sac zha ne rien zha gundziin zho ncuane rcaania zho, nroobraa ncuane ycaania zho. Laa zha ne squi nac, haxta mine pcaaniale zho, zdiooba lo zho.

27 Sangue zha ne sca ptsidil niac naa rey, goltsiexi zho, niinaga racladz naa ganlo naa gut to zho."

Bdzin Jesús Jerusalén

(Mt. 21:1-17; Mr. 11:1-11, 15-19; Jn. 2:13-22; 12:12-19)

28 Blozhse bzodiidz Jesús cuent co lo zho, laa zho bio nëz stib, nerse me lo zho.

29 Zeene bdzin zho gax Gui Oliv, zaatne ndxie guiedz Betfagé ni guiedz Betain, pxeel me chop xpëedscuel me,

30 rëb me lo zho:

—Goltsie guiedz win ne ndxie danse lo ne i. Ga gdzin to zaatne quiadoo tib burr yeen ne choot gard sob lad, dzigo golxadz ma, goltënie ma nu.

31 Tel cho gnabdiidz lo to pe nacne noxadz to ma, golguiab lo zho: men ne rnabey ne, men co rquiin ma.

32 Laa zho zie. Bdzin zho, zaatne quiadoo burr co,

33 nligaa, lëetaque noxadz zho ma, zeene laa bizhuan ma bdzin.

—iPe gun to xpurr naa? —rëb me lo zho—. iPe nacne noxadz to ma?

34 Dzigo rëbchaa zho:

—Men ne rnabey ne, men co rquiin ma.

35 Bdzinnie zho ma lo Jesús, pxob zho lar ne rbix zho lad ma, bzob me ma.

36 Zigse zie me, no grë miech guizhiu co rta zho xab zho ro nëz rded burr ne zob me ga.

³⁷ Grëse miech co, rleynie zho me. Laa zho xiuxto dze cho gui Oliv, zeene psilo zho nguiedz zëeb tsi zho, rley zho roolnie zho Dios, por grëtaa milagr ne ziyen zho run Jesús;

³⁸ rnee zho:

—¡Nasi laa Dios pxeel zhirey ne! ¡Zha ndzontaa Dios! ¡Haxta gbaa noyac guiebley dze rii!

³⁹ Blalaa zha farisé ne zienal ga, zeene gon zho zha roolnie grë miech co me, wbig zho lo me, rnab zho gnee me lo zho guioog ro zho.

⁴⁰ Dzigo rëbchaa me:

—¡Zac guioog ro zho, per hor co dzigo laa grë quie rii csilo goolniew naa!

⁴¹ Zeene bdzin me zaatne nieenpaa Jerusalén, psilo biab guieinë me, biin me gon me guiedz co,

⁴² rëb me:

—¡Prob to men Jerusalén! ¡Tebaa ye to niën niunbey to men ne needz guiebley rii lo to! Per na ib biende tow, masaque rzac to zig zha ne nioog lo.

⁴³ Na nagon laa dze co bdedle. Grë zha ne rlëë lo to, ible ziaad zho ziadsoiog corral zho to, ni tib nëz tedlaade to lo zho,

⁴⁴ haxta guiab to ladznia zho, grë xpëed to. Znitlo zho ladz to, nëzrii nëzrec glaal zho grë quie ne niaa grë lidz to i; sac squi been to ib pcaaniade to Dios, zeene biaadpaa me nsilaa me to lo xtol to.

⁴⁵ Bdzin me Jerusalén, güey me yadoo, psilo me blee me grëse zha ne noyun lgui ga, rëb me lo zho:

⁴⁶ —Znu zhubnee lo Xtiidz Dios: “Zaatne nac lidz naa, ga none guiaad miech zodiidznie zho naa.” Laa to gon, quiayun to lugar rii zig tib zhubliee ngbaan.

⁴⁷ Bded ga, gzobse dze rie me rieseed me miech len yadoo ga. Nacne psilo grë pxoz ne rnabey, grë maistr ley, ni grë zha ne nac zha non lo menguedz, quiaguib zho dien zha gdeeda diidz gut zho me.

⁴⁸ Per rdzielid zho dien zha gun zho, sac tibaque ndxie miech lo me, grëse zho rquiaadiag zho zhiwseed me.

20

Bnabdiidz zho cho nac Jesús (Mt. 21:23-27; Mr. 11:27-33)

¹ Len dze ne sca noseed me miech len yadoo, nonee me lo zho zha nac Xtiidz Dios, tib vuelt bdzin bla zha ne nac pxoz ne rnabey, grë zho bla maistr ley ni zla men ne nac men non lo menguedz,

² rnabdiidz zho lo me dien cho nac me, cho rnabey me, zha nacne sca quiayun me.

³ Dzigo rëbchaa me lo zho:

—Ye naa laa naa gun tib wnabdiidz lo to.

⁴ Golnë dien cho pxeel Juan zeene biadchoobnis Juan miech, ¿pe Dios pxeel Juan, te miechsew ye?

⁵ Psilo zho rnabdiidzlsa zho dien zha ctsire zho lo xtiidz me, rnee zho:

—Telne dzieets ne Dios pxeel Juan, dzigo laa me gnë: “¿Pex nac dzigo waa biladzde to mine bnee Juan?”

⁶ Tel na dzieetsgaa ne, miechse pxeel Juan, grieequiadaque ne; zgoquie menguedz ne, sac grëse zho riladz Dios pxeel Juan.

⁷ Dzigo mazd lëë gdib mine been zho, rëb zho nand zho dien cho pxeel Juan.

⁸ Nacne rëbchaa Jesús lo zho:

—Niicle naagaa nagon, grieelod gni naa lo to cho rnabey naa quiaayun naa gre min rii.

Xcuent zha ne pquianap liu

(Mt. 21:33-46; 22:15-22; Mr. 12:1-17)

⁹ Blozhse ga, biire psilo me noseed me gre miech co. Bzodiidz me tib cuent rii lo zho, reb me:

—Tib men name, nroob lbë uv beenbni me lo liun me. Blozh ga blediin me liu co lo bla zha ne ran liu, dzigo laa me breee ga, zey me stib dan.

¹⁰ Zeene gol mēē ne laa nex co gol, pxeel me tib zha ne quia xtsiin me zie lo zha ne quianap liun me ga, parne gdeed zha co nex ne rieguial me ycaa me. Per lel bnaaz zho zha ne pxeel me ga, bdiin zho zho, blozh ga scase bzonēz zho zho.

¹¹ Wbiire pxeel me stib zho, scaque peet bdeete zho lo zho, lel ndox zho lo zho, bdiin zho zho.

¹² Pxeelaque me stib zho, goc zho tson, scasaque been zho, haxta psiwee zho zho.

¹³ Quianie me tib mēēd, rleynie me mēēd co. Zeene gon me sca been zha co, rebchaa me: “Miñe naca laa naa cxel xpēēd naa, zeene gan zho xpēēd naaw, peet gund zho me, nend zon zho xtiidz me.”

¹⁴ Pex guien zho cho nac xpēēd me, zeene gon zho men co, reb zho: “iLēē zha qui nagon guiaanne liu rii! iGolgotsaa dziuut ne zho, zeena guiaana lo ne!”

¹⁵ Bnaaz zho xpēēd me, güeynie zho me zaatne nac tib lad lo liu co, ga güeygut zho me.

‘¿Zha sca dien rzac to gun bizhuan liu co gza zha ntseeb co?

¹⁶ Ib tedsod lēē, zeene gbire me, znitlogazh me zho. Lozhse ga, cuediinga me liun me lo zla zha ne gundziina.

Zeene bin zho sca reb me, rneechaa zho:

—iIb lic Dios qui, dziuunscad no!

¹⁷ Dze bui me lo zho, dzigo rebchaa me:

—Per led znu lēē, zhobnee lo Xtiidz Dios: “Quie ne psēēb zha ne nozaa yu, ni nanđ zho lēēpaa quie co nac miñe rnazdziits yu.”

¹⁸ Ni quie co gon, zha ne tsietso be low, zac zho zig tib ncuane rac tson tap lē; laa tel lēēgaaw tso be lad zho, zac zho zig tib ncuane die die rac.

¹⁹ Grē zha ne nac pxoz ne rnabey, ni grē maistr ley, hor co bien zho miñe nac zho ga, bzeet me lo cuent co. iGocladz zho gagazh naaz zho me! Per bdiēb zho, niacntseeb grē miech ne ndxie ga.

²⁰ Dzigo miñe been zho, pxeel zho bla zha ne zie ziegungüet me par cxin me tib diidz, dzigo min co yquiaaqui zho tsiezo zho me lo zhiwxtis zha Roma. Rquiaalo zha co, no zho liaadz dien zha gzoobdiag zho xtiidz Dios,

²¹ bdiin zho lo me, bnabdiidz zho reb zho:

—Maestro, ndion no niapse diidzli zienal luu, ni scagaa zeene rseed luu miech, rguibd luu guiannziiu luu lo zho, sinque niapse miñe nac diidzli, miñe rlu zha seēb zho xnēz Dios, min co rnee luu lo zho.

²² Gane niina, racladz no gnē luu dien pe nonguiēla ga rdeed no dimi ne razh lo rey Roma, te nonguiēla ye.

²³ Bienga me racladz zho gungüet zho me, dzigo rebchaa me lo zho:

²⁴ —iGolneedz tib xpes to nu ganle!

Dzigo bdeed zho tib pes lo me. Blozh ga, rebchaa me lo zho:

—¿Cho nu? ¿Cho lē nu quia lo pes rii?

Pquiab zho reb zho:

—Lēē rey Roma i, lēē lē me i quia lo qui.

25 Dzigo rëb me lo zho:

—Mine rieguai sca ycaa rey Roma, goldeeda lo rey Roma; scaquega mine rieguai ycaa Dios, lo Dios goldeeda.

26 Bzee zdoo zho gon zho sca ptsire me lo xtiidz zho. Mazd dzese bre zho, sac bdziel zho zha niungüet zho me; gocladz zho squi ndxie miech nxin me pe tib diidz, per brieelod niungüet zho me.

¿Pe nli zrieeban miech?

(Mt. 22:23-33; Mr. 12:18-27)

27 Blozh ga, güeyaque zla zha saducé lo Jesús. Nac zha saducé riladzd zho dzin dze grieeban miech; bdzin zho, rëb zho lo me:

28 —Maestro, znu psan Moisés diidz: telne glo mgui guet lo wnaa ne nac tsieel mgui, ni gopd wnaa mëed, dzigo none betsaque zho ctsieelna wnaa co stib, zeena gap wnaa mëed ne guiaan xlugar xpëed zha ne gut ga.

29 Bio tib dii zha co znu bzhaac, gadz bets nac zho. Ptsieelna zha ne nac zha gol, zeene laa zho gut, biaan xpëed zho.

30 Dzigo ptsieelna wnaa co stib bets ngutoo co. Blozh ga, gutaque zha co, pa sê zho nsa mëed.

31 Ptsieelnaque me stib zho, goc zho tson, niicle zha co psandaque mëed. Sca sca haxta bza gza gadzse zho ptsieelna me,

32 tibaque zeene yeque me laa me gut.

33 Mine racladz no gacndion no, ¿chopaa dzigo gac tsieel wnaa co, zeene laa zho grieeban, ne sca gza gadzse zho ptsieelna me?

34 Pquiab Jesús rëb me:

—Tiba, gacnañ to ganle, lo guielmban riise rtsieelna miech.

35 Zeene grieeban zho, zig nac zha ne ygaa guielnzaac gdzin zho zaatne no Dios, led yedraa ga ctsieelna zho.

36 Sac laa zho mbanle ga, gdzindraa dze guet zho. Masaque laa zho gac zig nac grê xanj me, mëed gac zho lo me.

37 Laa stiba, gacnañ to ganle ible zrieeban grê mengut. Golwi ganle, zeene bzeet Moisés zha rëb Dios lo me zeene gon me tib yag zarz ne noyazbel ga; ga rlu rrieeban mengut. Rëb Dios lo me: “Naa nac Dios ne riladz Abraham, naa nac Dios ne riladz Isaac, naa nac Dios ne riladz Jacob.” Zeene sca rëb me, ga rlu ganle mban zha co.

38 Sac tel me, nacd me xDios mengut, sinque xDios zha mban nac me. ¡Par me, grêse zha ne ngab lo me, zha mban nac zho!

39 Blalaa maistr ley zo ga, gon zho sca rëb me lo zha co, dzigo rëbchaa zho lo me:

—Maestro, nli squi naca zigne rnee luu i.

40 Dzigotaa ni stib zho beendraa pe nabdiidz zho lo me.

¿Cho xpëed nac Crist?

(Mt. 22:41-46; 23:1-36; Mr. 12:35-40; Lc. 11:37-54)

41 Horco bnabdiidz Jesús lo zho, rëb me:

—¿Zha nac dien ne rnee zho tib xpëedaque rey David gac Men ne nacle diidz cxeel Dios ga?

42 Led Davitaque name znu bnee tib lo salm ne pquiaa me:

43 Bnee Dios lo men ne rnabey naa, rëb Dios lo me:

“Cue naa nêz derech, nu bzob, nieeda lozh gnaz naa grêse zha ne rlëe lo luu, csañ naa zho ladznia luu.”

44 Gase ganle rlu, led scada; telne nli zha xtii David gac men co, ¿zha nac dzigo ne lëeque David rnee ne me rnabey David?

⁴⁵ Squi ndxie grë miech co noquiaadiag zho, zeene bnee me lo xpëedscuel me, rëb me:

⁴⁶ —Golguien gon, ib tsienalde to mine run maistr ley. Sac grë zha ne nac maistr ley, rdziladz zho racw zho lar nool, haxta zhits ni zho rbiba, rdziladz zho ndooladz rquiaabdiuzh miech zho zaatne rdziel zho zho ro nëz. Zig nac len yadoo, zha nac zha ne rzob lo xcan zaatne rzob grë zha non; zeene riegaa zho tib lo lni lidz miech, lëepaaze zha nac zha ne rzob gröl mezh zeene laa wagw rac.

⁴⁷ Ni rlozh ga, rio zho rla zho tel pe ncuane rapse grë wnaa viud; ni parne peet guiabd miech lo zho, xtse rzo zho rzadraa pe lay ne rool zho. Sca run zho, jper ib tedsod nroob caxtigw ne yгаа zho!

21

Gon ne bdeed tib wnaa viud

(Mt. 24:1-2; Mr. 12:41-44; 13:1-2)

¹ Laa Jesús no len yadoo ga noseed me miech. Ga no me, gon me zha rdzin grë zha ricw, nroob dimi rсан zho len alcanci ne zob ga.

² Tibaque zeene bdzin tib wnaa viud, tib men proba, ye me laa me psan chop gaay win len alcanci co.

³ Zeene gon Jesús a, rëbchaa me:

—Gneli naa lo to ganle, mazdraa gon non gon ne bdeed wnaa viud qui, lëdle grë gon ne psan grë zha qui.

⁴ Sac tel zha, dimi ne riaanle lo zho i rgogon zho; sangue wnaa prob qui gon, centav yeen ne quianiese me, mine rnalopaa me gziuu pe yquin me, per laa me bloogona.

⁵ Laa Jesús zieriee ga, zeene psilo bla zha ne nac xpëedscuel me, rlozhd gwi zho zha niaa yadoo co, rzee zdoo zho ran zho grë quie ne niaaw, grë ncuane ngalgiee lena. Zeene gon mew, rëbchaa me lo zho:

⁶ —Niicle squitaa gon ran to niaaw niina, per zdzin dze ne nitlow, dib nacew. Ni tib quie qui guiaandraa zigne squi zhobxcuaaw i.

jNsin golso!

(Mt. 24:3-28; Mr. 13:3-23)

⁷ Bded ga, bnabdiidz zho lo me, rëb zho:

—Maestro, ¿poc dzigo gac mine bzeet luu ga? ¿Zha glu zeene laaw ziaadyob gac?

⁸ Dzigo rëbchaa me lo zho:

—Nsin golso, zeena choot yquidiede to. Sac nzian zha ne grieequia, guiab zho laa dze co bdzinle, guiab zho zha nac Men ne zëëble diidz ga cxeel Dios. jlb gliladzde tow!

⁹ Zeene gon to pa lo ndxiidil tib guiedz, pa lo noyacгаа grë dillox, ib gdziebde to. Ib none gac grë ncuaan co, per lega loxaque mine csilosew ga.

¹⁰ 'Grë guiedz nroob, laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho.

¹¹ Nèzrii nèzrec csilo gni grë zhodox, nzian zaatne gan miech gbin, zaatne glaangaa zho grë gueilguidzox. Nzian grë ncuane glu zhan gbaw, nzian grë ncuanaa co, ncuane ctseb miecha.

¹² Per ansraa gac grë ncuaan co, stsidil miech to, squiana zho to; znaaz zho to, tsiezo zho to lo wxtis ne rnabey yadoo, zha co co to ladzguiib, ni haxta ziez zho to lo wxtis ne rnabey guiedz, loxaque porne nac to zha ne no xnèz naa.

¹³ Ga nagon gdeeda diidz gnee to lo grë zha co, gacnan zho ganle cho nac naa.

14 Ib gunde to tso to zhgab dien pe guiab to lo zho, zeene laa to ctsire lo mine rquiaqui zho to;

15 sac naa gnedz guielbiini lo to, zeene laa to gnee guien to pe guiab to. Zha ne gona, squiaadiag zhow, per ni gdzielid zho pe ctsire zho lo to.

16 Haxta pxoz to, xniaa to, bets to, grē menlidz to, grē zha ne ndzieeldiidz to, stsidij zho to, lēēque zha tsielo to ladznia zha ne csacsi to. Lo grē to, zio zha ne haxta zet ladznia grē zha co.

17 Grēse miech glēē gan to porne nac to zha ne no xnēz naa.

18 Nli stiche zho xquielmban to lo guidzliu rii, per, jni tib guits guic to, grielod zho gnitlo zho!

19 Tibrlique sca golgac, sozite to lo naa, zeena yгаа to guielmban ndzon ne gneedz Dios.

20 Zeene gan to igose guiedz Jerusalén ndxienap menquiib, nanle to len dze co laaw nitlo.

21 Grē zha ne no guiedz ne ngab Judé, none xoon zho tsie zho nēz yagui, ga tsietsolan zho. Zha ne no Jerusalén nu, none grieeniob zho. Grēгаа zha ne quia dziin dana, ib guiabd zho gbire zho lad guiedz.

22 Tib guielnēdox ne csiaab Dios gan grē miech rii len dze co, ga gac grē mine raquiet lo Xtiidz me ted zho.

23 jProb grē men wnaa ne lēētse len dze co zoney xpēēd, men ne quianiegaa mēēd ne bii radz! jMbandox ted miech, guielnēdox ne csiaab Dios gan zho guiedz rii!

24 Zutxuu miech zho, zha ne tedlaagaa lo guielgut zeyzhoo miech zho, zhaase zhaase dan ne gueynie zho zho. Horco laa grē zha zit co, sēēb gunchen Jerusalén; haxta gdziñ dze ne gnabey Dios griee zho.

Ziaad Jesús stib

(Mt. 24:29-35, 42-44; Mr. 13:24-37)

25 Nzian grē ncuaañe glu lo ngbidz, glu lo mēē, glu lo mel. Mbanse gac miech, dziebdox zho zeene gon zho bidox ne tso tsasoli nisdoo.

26 Nzian zha ne haxta scow zho lo dzeb, zeene laa zho gan grētaa ncuaañe noyac lo guidzliu len dze co. Grē ncuaañe no zhan gbaa, nēzrii nēzrec gaca.

27 Horco bii zan zho ganle zeene laa naa zialzēēb tib lo xcow con grē guielndzon, con grē poder ne rap naa.

28 Zeene gan to laa grē ncuaañ co rsilo noyac, nley golco zdoos to; jsac hor co laa Dios ycaania to!

29 Golzoob cuidad ganle zha nac yag guigw, beelzegaa pe stib yag.

30 Led ran to ganle, zeene laa grē zhicwa racnieen, laa zhiblaga rsilo rdzib, gase runbey to laa mēē nēēg ziaadgaxle.

31 Scaque nagon zeene gan to laa grē mine rne naa lo to nu rsilo noyac, dzigo nanle to laa dze ne csilo gnabey Dios ziaadgaxle.

32 Gneli naa lo to ganle, nzian grē miech ne mban niina, bii zan zho zeene laa grē ncuaañ co gac; sac ible ncuaañe gaca.

33 Zdziñ dze ne nitlo gbaa, nitlo guidzliu, sanque mine rne naa lo to nu nitloda; ible laaw none gac.

34-35 jNsin sca golso, zaacse golgac! jAdel gal dze ne laa naa guial, lel lo grē ncuaañe ndzinlid, lel lo guielgonziu, lel lo grē zhgab ne rac lo guidzliu rii no to, zigne gun grēraa miech! Sac gon, lega naclew glanso naa.

36 Nligaa nsin golso. Tibaque glnab lo Dios, gacnieñ me to peet gacde to lo grē guielnē co, ine peet xtolde to zeene laa to gacredz lo naa.

³⁷⁻³⁸ Gzase len dze co pseed me miech. Silgaw, miech guizhiu ne rdziñ len yadoo, parne yquiaadiag zho zhiwseed me. Guidze sca rseed me zho, laa pcow liu riebez me cho Gui Oliv.

22

Bnediidz zho dien zha gnaaz zho Jesús
(Mt. 26:1-5, 14-16; Mr. 14:1-2, 10-11; Jn. 11:45-53)

¹ Ziaadyoble lni Pascwa, zhilni nroob men Israel, lni ne row zho quietxtil ne rquiad ncobi lad.

² Grè zha ne nac pxoz rnabey ni grè maistr ley, len dze co laa zho no quiaguib zho dien zha gut zho Jesús. Noguib zho tib mod ne glisquid menguedza; sac rdzieb zho gacntseeb menguedz.

³ Tib dzew, laa mendox bzëëb zdoos Judas Iscariot, tib zha ne rzëniepaa me ga,

⁴ rias Judas güey Judas lo grè pxoz rnabey co, lo grè men ne zo lo zha ne rquiapan yadoo, rëb Judas zha csan Judas Jesús ladzña zho.

⁵ Zeene bin zhow per nli rley zho, nacne biaan zho diidz quizh zho Judas.

⁶ Dzigo desde hor co psilo Judas noguib Judas dien zha gdeeda diidz guien miech csan Judas me ladzña zho.

Dowxtseenie Jesús xpëëdsuel me
(Mt. 26:17-29, 31-35; Mr. 14:12-25, 27-31; Jn. 13:21-30, 36-38; 1Co. 11:23-26)

⁷ Mer dze ne rsilo lni Pascwa, len dze ne sca row zho quietxtil ne rquiad ncobi lad, ni rut zho carner yeen ne rowxtsee zho.

⁸ Dze co bnabey Jesús Pedr grop Juan tsiegunlo zho xtsee ne gownie me zho wdze co.

⁹ Dzigo bnabdiidz zho lo me, rëb zho:

—¿Pa lo racladz luu guio no guidzuiuñlo now?

¹⁰ Rëbcha me lo zho:

—Goltsie Jerusalén. Zeene sëëb to lad guiedz, ga gan to tib mgui nzobyan tib re nis, goltsienal zhits me. Yu ne gan to sëëb me,

¹¹ golguiab lo bizhuan yu co: “Znu në Maestro, ¿pa len yu me gneedz luu gac zaatne gowxtseenie me xpëëdsuel me wdze rii?”

¹² Ga glu me tib len yu nroob ne riaan glaa, nzhixcuaale lena, dzigo ga golgunlo zhixtsee ne.

¹³ Dzigo laa zho zie. Güey zho zaatne pxeel me zho ga, ga beenlo zho xtsee co.

¹⁴ Wdze co, zeene gol hor xtsee laa Jesús bded lo mezh gza me gza tsiipchop xpëëdsuel me. Xtsee co no zho,

¹⁵ zeene rëb me lo zho:

—¡Blactaa gon pquiambëz naa gdziñ dze rii, znu gowxtseenie naa to nawdze rii, ansraa csaci miech naa, gut zho naa!

¹⁶ Lëë lultm vuelte nu gon teed naa lni Pascw rii, haxta gdziñ dze ne laa Dios csilo gnabey, dze ne glupaa ganle zha nac xtsee rii.

¹⁷ Dzigo bzhen me tib cop nroob no vin, bdeed me xquizh lo Dios, blozh ga bdeed me cop co lo zho, rëb me:

—Golquiiñ vin rii gza to.

¹⁸ Gneli naa lo to ganle, lëë lultm vuelte nu guie naa vin rii, haxta gdziñ dze ne laa Dios csilo gnabey.

¹⁹ Ni bzhen me quietxtil, bdeed me xquizh lo Dios, blozh ga beengrol mew bdiiz mew lo zho, rëb me:

—Golquiina, rrieequia gon lëë xcuerp naa i, sac gon znu gun zho xcuerp naa parne csilaa naa to grë to. Zeene gdeedtaaw diidz, golgun min rii parne glu to ganle tibaque rsoladz to naa.

²⁰ Blozhse dowxtseenie me zho, scaque bzhen me stib cop no vin, blozhse bdeed me xquizh, rëb me lo zho:

—Lëë stib trat cub nu gon riaan Dios grë me miech, rrieequia xchen naa nu nac vin rii, ren ne gzhiee xcuent to, ren ne tso firm trat co par glu nona.

²¹ Ni gacnan to ganle, lo mezhaque nu gon zob zha ne tsielo naa ladznia zha ne gut naa.

²² Naa ne nac naa Mgui ne pxeel Dios, nli, ible none guet naa, parne gac mine pxeel Dios naa zialgun naa, jper probsaxe zha ne tsielo naa ladznia zha co!

²³ Horco psilo gza zha ne zobnie me ga, rnabdiidzlsa zho dien cho nac zha ne rzeet me ga;

²⁴ haxta psilo zho nodiidiidz zho dien cho gac zha ne gacnon lo zho.

²⁵ Dzigo bnee me lo zho, rëb me:

—Nli grë zha ne rnabey guiedz ne ndxie lo guidzliu, masaque rnabey zho miech zig nac zeene bzhiü zho zho, per zha gunraa miech, lëë gdib rxecw zho, haxta rnee zho nroob quiaayun zha co xyudar guiedz.

²⁶ Sangue to gon, zha ne gnabey lo to, none guien zho gac zho zig tib ngundziin lo to; zha ne racladzgaac gacnon, none guien zho guiaanwin zho.

²⁷ Lo guidzliu rii, zha ne rnabey, rzobse zho, zha ne nac ngundziin, zha co rdziib ncuane row zho. ¡Sangue lo ne, led scad naca! ¡Golwi ganle, tib ngundziin nac naa lo to!

²⁸ Tose goc zha ne tibaque gocnie naa lo grëtaa mine bdeed naa len dze rii.

²⁹ Gane niina, laa naa gneedz tib guielnzaac nroob lo to ygaa to gdzin to zaatne bneedz Pxoz naa gnabey naa;

³⁰ zeena ine znu tipse zioob ne lo xmezh naa ga, dioow ne, dio ne. Haxta so naa to, to gac zha ne cobey, pe nac mine been gza tsiipchop dii ne nac menladz to nu.

³¹ Horcoque bnee me lo Pedr rëb me:

—Bina ganle Pedr, racladz Satanás gon ycuuib ma to, zigne run zho zhobxtil.

³² Per laa naa bnable lo Dios, gacnien me luu, csaand me sozitpaa luu lo naa. Gacxe waa, zeene guien luu lëda ga been luu, luu gnee lo grëraa zha qui, parne tibaque dib zdoo zho gnalo zho naa.

³³ Pquiab Pedr rëb Pedr:

—Niicxe peraa waa gac, csaand naa luu. Telne co zho luu ladzguuib, ye naa tso ga, jtelne gutgaa zho luu, zaatne guet luu, ga guet naa!

³⁴ —Bina ganle Pedr —rëb Jesús—. ¡Guieel riigazh gon, gardle ycuedz gall, tsonle vuelt rëb luu runbeyd luu naa!

³⁵ Dzigo bnee me lo zho gza zho, rëb me:

—Led rsoladz to ganle zeene pxel naa to güeyseed to miech, scase güey to, peet dimi bide to, per ni ncuane gow to, per ni lab to bide to. ¿Pe beenfalt ncuane nquiin to hor co?

Pquiab zho rëb zho:

—Beenfaldedew.

³⁶ Dzigo rëbcha me:

—Horco nagon peet bide to, sangue niina zha ne quanie dimi, zha ne quaniegaa ncuane gow zho, none güey zhow. Niina nagon none laa to yquuin spad. Zha ne quanieda, none maase tib xab zho cto zho, si zho tiba.

³⁷ Sac nataa nagon, laa miech cteed naa miñe zhubnee lo Xtiidz Dios, zaatne rnee: “Bnabey zho gut me, zigne rut zho grë zha ntseeb.” Grëse miñe zhubneele teed naa, ib laaw none gac niina.

³⁸ Pquiab zho rëb zho lo me:

—iBui ganle laa chop spad nule!

Dzigo rëbcha me:

—iMazd peet gnedraa naa lo to!

Bzodiidznie Jesús Pxoze me Getsemani

(Mt. 26:36-46; Mr. 14:32-42)

³⁹ Blozhse ga, laa me brieze zie me nëz Gui Oliv, zaatne riettaque me; zienalaque gza xpëëdschuel me zhits me.

⁴⁰ Bdzin zho ga, rëbcha me lo zho:

—Golnab lo Dios gacniën me to, zeena yquuuld menodox to.

⁴¹ Bzë me spalal, bdzin me zig zaatne riab tib quie ne rchej ne nia ne, dzigo ga pquuittsgzhüb me, psilo me bnab me lo Dios,

⁴² rëb me:

—Papá, laa naa rnab lo luu, telne zala zdoo luu, psilaa naa lo grë guielnë rii. Per telne grieeloda, miñe gnëtaa luu sca gaca.

⁴³ Horco biet tib anjl gbaa bdzin pchoobladz zdoo me.

⁴⁴ Mban rac me laa me nozodiidznie Pxoze me, per hor cole mazdraa rnab me lo Pxoze me; lo guielnë ro co haxta rzonis me, masaque zëbdzuun grë nis co lo me zootle ren.

⁴⁵ Zeene laa me guso ga, bdzin me zaatne biaan xpëëdschuel me, gon me gzase zho laa zho nixguies. Ye zho mban rac zho, lo guielnë co bguudz zho mcaal.

⁴⁶ Dzigo pcuaan me zho, rëb me lo zho:

—iNixguies to ye? Lëda i gon, igolsobna! Golnab lo Dios, gacniën me to, zeena yquuuld menodox to.

Bnaaz zho Jesús

(Mt. 26:47-58, 67-75; Mr. 14:43-50, 53-54, 65-72; Jn. 18:2-18, 25-27)

⁴⁷ Laa Jesús quianeeque, zeene laa Judas bdzin bdzinne Judas tib dzoon miech. Zigne bdzin Judas, wbig Judas lo me, dow Judas bzhid cuas me.

⁴⁸ —iJudas! —rëb me—. iCon tib bzhid dzigo lëë glu luu naa lo grë zha qui?

⁴⁹ Zeene bien xpëëdschuel me, me zienaaz grë miech co, rëbcha zho lo me:

—Maestro, i zha dziuun ne? iPe zdeed spad no zho?

⁵⁰ Znuse biet tib zho pchej zho tib nia spad, pchug zho diag tib xmoz men nac pxoze nroob.

⁵¹ Dzigo bnee Jesús lo zho rëb me:

—Golsaan zho, ndzinli golgac.

Horco wbig me bzhen me diag zha co, beenguic mew, lëëtse min derecha.

⁵² Lad grë miech co no ndal grë pxoze ne rnabey, grë zha ne zo lo zha ne rquianap yadoo, ni spalal men ne nac zha non lo menguedz; dzigo bnee Jesús lo zho, rëb me:

—iPe nacne squitaa ziaad to, nzhen to yag, nzhen to spad ziadnaaz to naa? iNiace naa cho ngbaan?

⁵³ Blactaa dze name gon to no naa len yadoo, ni bnaazde to naa ga. Per nole guic to nagon nawdze rii gnaaz to naa; grë miñe racladz to grë to menodox, niina laaw gac.

⁵⁴ Horco wbig be zho bnaaz zho me, laa zho zienie me nëz lidz men nac pxoze nroob.

⁵⁵ Bdzin zho lidz men co, bre zho xley me, bzëëg zho gui, laa zho no nodzëë zho. Ye Pedr maase zit zit naļ Pedr, laa Pedr bdzin ga; laa Pedr wbig bzob lo zho ga.

⁵⁶ Zeene gon tib wnaa ne quia xtsiin men co laa Pedr zob ga, dze rwi me, tibaque rëb me:

—iYe mgui qui gon rzënie men ne blansonie to i!

⁵⁷ —iNaa ye? —rëb Pedr—, i per ni runbeyd naa men qui!

⁵⁸ Wdzeepaaw, laa tib zha ne zo ga, gonaque Pedr, rëb zho lo Pedr:

—iSegur lëë ye luu nacie men ne bgaa i?

Scasaque bneelid Pedr:

⁵⁹ Wdzeelaaque goca, zeen laa stib zho brieequia, rëb zho:

—Lëë tib zha ne nacie men qui nu gon. iRlu zha galilé nac zho!

⁶⁰ Pquiab Pedr, rëb Pedr:

—iRiend naa gon, pe nacie squi rnee luu!

Gardle lozh grieë diidz co ro Pedr, zeene laa tib gall pcuedz.

⁶¹ Gall co nocuedz, zeene ptsire lo Jesús, dze bui me lo Pedr; dzigoraa psoladz Pedr zeene rëb me lo Pedr: “iGuieel riigazh gon, gardle ycuedz gall, tsonle vuelte rëb luu runbeyd luu naa!”

⁶² Mbanse rac Pedr. Brieë Pedr ga, psilo Pedr biin Pedr guieñe co.

⁶³ Grë zha ne zopaa quianap Jesús, nzian grë ncuaañe run zho me, psilo zho noyunguzee zho me.

⁶⁴ Pxidoo zho lo me, ni rguin zho me, rlozh ga, rnee zho:

—Luu ne nac luu men ne ziadteed xtiidz Dios, i bnë sca dien cho ga bdin luu?

⁶⁵ Nzian grë ncuaañe rgoredz zho lo me.

Güeynie zho Jesús lo zhiwxtis zho

(Mt. 26:59-66; Mr. 14:55-64; Jn. 18:19-24)

⁶⁶ Zeene biini liu, pcaalsa grë men ne nac zha non lo menquiedz, grë zho pxoz rnabey, ni grë zha ne nac maistr ley, güey zho güeynie zho Jesús lo zhiwxtis zho. Bdzin me ga, bnabdiidz zho lo me rëb zho:

⁶⁷ —Bnë lo no dien, i pe lëë Men ne nacie diidz cxeel Dios lo guidzliu ga i nac luu?

Pquiab me rëb me:

—Niicle telne gni naa lo to nli lëë men co nu nac naa, gliladzde tow,

⁶⁸ tel pe gnabdiidz gaa naa lo to, ctsirede to low; sac gliladzde to mine nac diidzli.

⁶⁹ Naa ne nac naa Mgui ne pxeel Dios, zhile laa dze gdzin zeene laa naa sob cue Dios nëz derech, men nroob ne rrieelo run grëse ncuaañe racladz me.

⁷⁰ Horco grëse zho pquiab, rëb zho lo me:

—iXpëed Dios dzigo lëë nac luu?

Dzigo rëbchaa me:

—Tozhal name rnee, nli Xpëed me nac naa.

⁷¹ Horco rëb zho:

—iPe mazdraa textigw ne racladz ne! iLaa ne bdzionle ganle mezhal rnee Xpëed Dios nac me!

23

Güeynie zho Jesús lo Pilat

(Mt. 27:1-2; 11-14; Mr. 15:1-5; Jn. 18:28-38)

¹ Horcogazh pcaanie zho Jesús nëz, bdzinie zho me lo Pilat, men ne nac gobernador ne nzoob zha Roma ga.

² Ga psilo zho nzian grë ncuaañe rquiaqui zho me, rëb zho:

—Laa no bnaaz meñ rii goñ ziaadnie no me lo luu, sac bгаа me noquiil me meñladz no gacntseeb zho. Rnee me lo zho nonguiel da gdeed zho dimi ne razh lo zhirey ne, meñ ne zob Roma; haxta rnee me mele nac rey ne guñbey zho, sac Dios pxeel me ziaad me.

³ Dzigo bnabdiidz Pilat lo me, rëb Pilat:

—¿Pe nli na luu nac Rey ne rnabey lo zha Israel?

Pquiab me rëb me:

—Nliw, rey nac naa zigne rnee luu i.

⁴ Dzigo rëbchaa Pilat lo grë zha ne ne nac pxoz rnabey co, ni grë miech ne ziegrë zho ga:

—¿Ni tib doñ rapd meñ rii!

⁵ —¿Zha gapd me doñ? —rëb zho—. Ni zaatne zieetaa me noquiil me miech gacntseeb zho lo zhirey ne. ¿Dible nëz Judé nu güeyted me; desde nëz Galilé brie me ziaad me haxta nu!

⁶ Goñ Pilat sca rëb zho, dzigo bnabdiidz me dien pe zha Galilé nac Jesús.

⁷ Zeene gocnañ me zha nëz co nac Jesús, dzigo pxeel me Jesús lo Herod, sac Herod rnabey nëz Galilé; lëëtaque leñ dze co laa Herod no Jerusalén ga.

⁸ Rley Herod zeene goñ Herod me, sac ziyon Herod grëtaa mine run me; quiambëz Herod gdziñ dze ganlo Herod me, ganlo Herod guñ me pe tib milagr.

⁹ Psilo Herod nzian grë ncuaañe rnabdiidz Herod lo me, per ni tib lo wnabdiidz co ib ptsired me.

¹⁰ Zeene goñ Herod rquiabd me, ni goñ Herod noque grë pxoz rnabey co, grë maistr ley co, ib rioogd ro zho rzadraa pe yquiaaqui zho me, rnab zho cteed Herod me caxtigw,

¹¹ nacne leñ psilo Herod grë xmenguiib Herod rzhidznie zho me, runnguzee zho me. Bgacw zho me tib lar ne racw rey, sca nacw me lar co biire pxeel Herod me lo Pilat.

¹² Glo ib rdzieeld xtiidz Herod grop Pilat, laa dze co laa zho psilo bneewen stib.

Bnab zho guet Jesús

(Mt. 27:15-26; Mr. 15:6-15; Jn. 18:39-19:16)

¹³ Dzigo bnabey Pilat pcaalsa grëse pxoz rnabey, grë zha ne nac zhiwxtis zha Israel, ni grëraa menquiedz,

¹⁴ rëb Pilat lo zho:

—Laa zho biad-zoob xdemand meñ rii lo naa nu, nac diidz noquiil me miech gacntseeb zho lo zhirey ne. Nacne pquiep naa me, ni blalagaa to goña; par naa peet doñ rapd me.

¹⁵ Niiclegaa Herod, ye Herod goñ ni tib doñ rapd me; gane pxeelaque Herod me lo naa. Quiayund me ncuaañe guiab ne rieguial guet me.

¹⁶ Mine gaca, laa naa gnabey ted me tib caxtigw, lozh ga dzigo laa naa csilaa me.

¹⁷ Nac costumbr, gzobse lni Pascw rsilaa zho tib zha ne no xcuent lo wxtis.

¹⁸ Per zeene bin grë miech co laa Pilat csilaa Jesús, grëse zho nguiedz roptsie zho, rnee zho:

—¿Csilaad luu meñ qui, bnabey guetgazh me! ¿Barrabás psilaa!

¹⁹ Barrabás lé tib meñ co no ladzguiib leñ dze co, sac bгаа me zo me lo tib dii zha ne noyactseeb lo rey leñ guiedz Jerusalén ga, ni zëëbaque me tib ngutoo.

²⁰ Bguib Pilat dien zha nrieelo nsilaa me Jesús,

21 per psilo grë miech co nguiedz roptsie zho, rnee zho:

—¡None guetgazh meñ qui! ¡Lo cruz bnabey yquia me!

22 —Per, ¿pe nacne gnabey naa yquia me lo cruz? —rëb Pilat stib—. ¿Pe nac falt ne rap me? Laa naa pquieple me, ni tib dol rapd me, parne gnabey naa guet me. Laa naa nile lo to, laa naa gnabey ted me tib caxtigw, lozh ga laa naa csilaa me.

23 Psiloque grë miech co stib, nguiedzraa roptsie zho, rnab zho yquia Jesús lo cruz; haxta goc mine racladz zho.

24 Racse Pilat, laa Pilat bdeed diidz.

25 Blozhse bnabey Pilat psilaa zho Barrabás, zha ntseeb ne no ladzguuib ga, dzigo laa Pilat psañ Jesús ladhnia zho.

Güeyquiaa zho Jesús lo cruz

(Mt. 27:32-44; Mr. 15:21-32; Jn. 19:17-27)

26 Horco laa zho brieenie Jesús laa zho zienie me zaatne yquia me lo cruz. Nëz zienie zho me, bdzieel zho tib meñ Ciren lë Simón wbire lo dziin dan, pcuëëz zho meñ co, bnabey zho me bi me zhiczuz Jesús; nalse me zhits Jesús, laa zho zienie Jesús.

27 Miech guizhiu ne zie ga, ndal grë meñ wnaa psilo zho roon zho no zho xquieinë me,

28 dzigo dze bui me lo zho, rëb me:

—Xin, nac to meñ Jerusalén rii, goonde to xquieinë naa. Mazd golgoon por grëtaa guieinë ne no gan to, por grëtaa guieinë ne no gan xpëëd to;

29 sac zeene gal dze co grë meñ wnaa ne quianie mëëd, ziab zho: “Mazd wenaque zie zha ne quaniem mëëd, zha ne nañd zha radz mëëd, zha ne niaadga gap mëëd.”

30 Horco grë miech, laa zho gnab tebaa zha pixche grë gui guiaan zho zhana.

31 ¡Golwi ganle, telne znutaa mine nodeed naa nac naa zig tib yag nguia, pelej to dzigo ne nac to zig tib yag bidz!

32 Ye schop zha ne nac ngbaan, zienie zho ga yquiaagza zho me lo cruz.

33 Zeene bdziñ zho zaatne nac “Gui Beerguic Ngutoo”, ga pquiaa zho me lo cruz gza me ngbaan co. Tibga zhiczuz zho bzo tib nëz cue zhiczuz me.

34 Lo cruz co quia me, zeene nguiedz bnee me rëb me:

—¡Papá! Ncuane quiayun grë miech rii nu, bzhiguieñ gunquizhd luu zhow; sac riend zho pe run zho.

Gza menquuib ne bdziñ ga yquiaanap me, hor co tib tib zho bzhense zho tib lë xab me, laa stiba bio zho rif.

35 Ndal miech ne ndxie quiawi. Haxta grë zha ne nac wxtis zo ga, no zho rzhidznie zho me, rnee zho:

—Stib miech scataa beenguiac me, stib miech scataa bla me. ¿Pe rac me na ne riete me i? ¡Guet me i zho, telne nli me nac Meñ ne zëëble diidz cxeel Dios, telne nli Dios bzooblo me ziaad me!

36 Wbig menquuib co rdeed zho nziu bla guie me, rzhidznie zho me, rnee zho:

37 —¡Zhirey zha Israel name nac luu! Psilaa luu lo guieinë qui nazho.

38 Glaa guic zhiczuz me quia choplan diidz ne pquiaa zho, rneew: “LËË ZHIREY ZHA ISRAEL NU.”

39 Grop ngbaan ne quianie me lo cruz ga, psilo tib zho ye zho rzhidznie me, rnee zho lo me:

—¡Led rëb luu lëë, luu nac Meñ ne zëëble diidz ga cxeel Dios! ¡Blu nazho nli meñ co nac luu, psilaa ne lo guieinë rii!

⁴⁰ Horco pquiab stib zha co, rëb zho lo zho:

—iPsoog ro luu! ¿Pe niice niina ne laa luu guetle ib rdzieebd luu Dios?

⁴¹ Bien ganle, jtel ne ible miñ rii rioguial ne grop ne, nu nodizh ne grë gielntseeb ne bdziuun ne; sangue men qui, peet dol rapd me!

⁴² Dzigo rëb zho lo me:

—iBzhiguel zeene guiaad luu gnabey luu, ib csand luu naa tib lad!

⁴³ Pquiab me rëb me lo zho:

—Peet tsienied guic luu, nadzegazh laa luu së guioo ne zaatne nac lo xquielbley Pxoza naa.

Gut Jesús

(Mt. 27:45-56; Mr. 15:33-41; Jn. 19:28-30)

⁴⁴⁻⁴⁶ Gol groł dzew, tibaque zeene goc tib ncow dipse lo guidzliu. Ni palal rlud xbiini ngbidz, haxta las tres biao biini stib. Horco pquiaa Jesús tib redz nroob, rëb me:

—Papá, laa naa rsañ zhiespíritu naa ladznia luu, luu pcaaniaw.

Diidz co brieo ro me, znuse blozh me. Laa me quialozh, zeene laa lar nroob ne quia len yadoo Jerusalén ga briez nzoli, grołtaa goca.

⁴⁷ Zha ne rnabey lo zhaguiib ne pquiaa me lo cruz ga, zeene gon zho zha blozh me, bien zho Dios been miñ co, rëb zho:

—iNe nlipagaa tib men peet xtold goc men qui!

⁴⁸ Scaque grë miech ne goclo ga, zeene gon zho zha blozh me, biabguielne zho, mbanse rac zho laa zho wbi ga.

⁴⁹ Laa grë zha ne runbey me, zha ne gocnie me, zig nac grë men wnaa ne gocgrë zha ne brieenal zhits me zeene brieo me nëz Galilé, grë zho laa zho ndxiese tib lad rwi zho.

Bgueets Jesús

(Mt. 27:57-61; Mr. 15:42-47; Jn. 19:38-42)

⁵⁰ Lad grë zha ne nac zhiwxtis men Israel ga, no tib men guiedz Arimaté lé me José; lëe guiedz co ndxie xtan Judé. Tib miech wen nac me, noxco me miñe rnabey Dios,

⁵¹ ye me quiambéz gdziñ dze ne csilo gnabey Dios. Zeene bnabey zha ne nacgrë me dziin ga zha gac Jesús, ni lalnu biod me conform miñe bnabey zho.

⁵² Nacne hor co güey me lo Pilat, bnab me diidzbeey tselit me xcuerp Jesús lo cruz.

⁵³ Dzigo güey me, blozhse blit me cuerp co lo cruz, pchel me me tib lo lar nroob, güey me güeyqueets me me tib len baa cub ndieen tib cho quie gax ga.

⁵⁴ Lëe bdze dze co no zho xco ne laa dze ne gdziiladz zho lo dziin sëeb.

⁵⁵ Grë men wnaa ne sca nacgza grë zha ne brieenal zhits me zeene brieo me nëz Galilé ga, ye zho güeynal bgueets me, gon zho pa lo bio me.

⁵⁶ Blozhse bgueets me, laa zho zey. Bdziñ zho bzhixcuaa zho, tiblo zënex ne tsietëeb zho lad xcuerp me; dzigo laa zho bdziiladz zigne rnabey ley no gun zho.

24

BRIEBAN JESUS

(Mt. 28:1-10; Mr. 16:1-8; Jn. 20:1-10)

¹ Laa zeene gol dze ne rzobni zhmal, silgaw laa gza men wnaa co brieo, bi zho grë zënex ne bzhixcuaa zho ga, laa zho zie ro baan Jesús.

² Bdziñ zho, gon zho laa quie ne bioog ro baan me ga bdiooble;

³ bzëëb zho len baa gon zho, niicle xcuerp me guiendle ga.

⁴ Laa zho zo ga, riend zho dien pe nacne sca nialse ro baa co, pe nacne niicle xcuerp me guiendleen co. Tibaque zeene gon zho laa chop men bgui zole lo zho ga, masaque riaazbel lad xab grop men co.

⁵ Horco per nli bdzieb zho, lo dzeb co mine been zho laa zho pquitsgzhib haxta bdzin lo zho lo liu. Dzigo rëb grop men bgui co lo zho:

—¿Pe nacne ziaadguib to men mban zaatne rio mengut?

⁶ ¡Laa me brieëbanle! ¡Guiendle me nu! Golsoladz ganle zha në me lo to len dze ne no me nëz Galilé,

⁷ në me: “Mgui ne pxeel Dios, ible none guiab me ladznia grë miech ngoopdol, squiaa zho me lo cruz, per zeene gac tson ngbidza, laa me grieëban.”

⁸ Dzigatoraa psoladz zho, nligaa sca bnee me,

⁹ hor co lëëlëd güeynie zho diidz lo gza tsiiptib zha ne nac xpëëdscuel me, ni lo grëraa zha ne nacgza zho ga.

¹⁰ Nzianlaa nac men wnaa co, lad co no Marí Magdal, no Zhuan, ni Marí ne nac xníaa Jacob.

¹¹ Niicle bzodiidz zhow lo xpëëdscuel me, per con rnee zho led ncuuan gacd ga, ni lalnu bliladzd zhow.

¹² Tibaque zeene brieë Pedr, rias Pedr laa Pedr zie nëz ro baa. Bdzin Pedr bdiixlo Pedr len baa co, gon Pedr nligaa, ¡loxaque lar ne briel me zhoob leen co! Blozh ga, laa Pedr zeyaque, rzee zdoo Pedr gon Pedr nli guiendle xcuerp me ga.

*Gon zho Jesús nëz Maús
(Mr. 16:12-13)*

¹³ Dze co brieë chop xpëëdscuel me zie zho tib guiedz win lë Maús. Gax Jerusalén riaan guiedz win co, maase chop hor rzë zho rdzin zho ga.

¹⁴ Nëz no zho nozodiidz zho grë mine pteed miech Jesús ga,

¹⁵ tibaque zeene bien zho laa zho bgaa tib lo men co, gogza me zho laa zho no nëz, per, ¡ib biend zho lëë Jesús ga!

¹⁶ Ranlo zho laa me ziegza zho ga, per ni lalnu beenbeyd zho ne mew, sac zig nac zeen pe tib ncuanea ptse lo zho.

¹⁷ Dzigo rëb me:

—¿Pe squitaa nozodiidz to? ¿Pe nac squi rac to, zig nac zeene pe guieñe no to?

Dzigo bzodze zho. Mban rac zho, haxta lo zho rlu nroob guieñe no zho.

¹⁸ Pquiab tib zha ne lë Cleof, rëb zho:

—¿Niacxe bind luu ganle zha nactaa ncuanea goc Jerusalén len dze rii? Grëse zha ne name güey Jerusalén, gocnaa.

¹⁹ —Nligaa —rëb me—, ¿pe dien goc ga?

Rëbchaa zho:

—Len dze rii psacsi zho men Nazaret ne lë Jesús. Tib men ne biadteed xtiidz Dios lo miech nac me, nzian grë milagr nroob ne been me; miech guizhiu ne bley pquiaadiag zhiwseed me. Rlu tib men nziuu nac me lo Dios.

²⁰ Per lel brieë grë pxoz rnabey, grë zho zha ne nac wxtis, bnaaz zho me, bnab zho gut me, pquiaa zho me lo cruz.

²¹ Tibaque rdzieets no, me niac tib men ne nsilaa zha ladz ne ladznia zha Roma. Pasëse min co niac, nadzele rac tson ngbidz beet zho me.

²² Per riend no dien zha nac cuent co, sac nasil güey bla men wnaa ne nacgrë no ro baan me,

²³ zeene wbire zho bzodiidz zho lo no nē zho guiendle xcuerp me len baa, loxaque chop anjl brieequia lo zho ga, rēb anjl co mban me.

²⁴ Blozh ga, güeyaque bla zha bgui ne nacgrē no, gon zho nligaa guiendle xcuerp me ga.

²⁵ Dzigo rēbchaa me lo zho:

—¡Nadzppaa ncow nac guic to, nadzppaa ndip nac zdoo to! ¿Rliladzde to grē mine dzigo lēē bzeet zho padzeela ted Men ne nole diidz ga cxeel Dios?

²⁶ Bzeetle zha co name ible no csacsi miech me, antes ne gbire me lo guielndzon ne no me.

²⁷ Dzigo psilo me bnee me lo zho pa lo zhobnee grē mine bded me ga, psilo me desde grē mine pquiaa Moisés, haxta grē mine pquiaa grēraa zha ne biadteed xtiidz Dios.

²⁸ Sca no zho nēz laa zho bdziñ Maús. Bdziñ zho ga, rac me zig nac zeene tib ted me,

²⁹ dzigo quia zho rnab zho lo me cuēz me ga, sac laa dze bdzele, zhile laa liu ycow. Nacne blēz me.

³⁰ Laa zho zob lo mezh gowxtsee zho, bzhen me guietxtil bdeed me xquizh lo Dios, blozh beengrol mew bdeed mew lo zho.

³¹ Dzigoraa zig nac zeene bzhial lo zho, laa zho beenbey me. Per par nianraa zho me, znuse bnit me lo zho, gon draa zho me.

³² Horco per nli rley zho rnee zho:

—Con razon zeene sca ziaadgza ne me nēz nonee me lo ne zha raquiet lo Xtiidz Dios, masaque tib guielbley nroob ne biaadnie xcodiidz me zdoo ne.

Sca rnee zho, sac bien zho bdziñ tib guielbley nroob zdoo zho, zeene sca nonee me lo zho.

³³ Lēēlēdaque brie zho ga, bio zho nēz wbire zho Jerusalén stib. Bdziñ zho lo gza tsiiptib zha ne bzēnieppaa me ga, ni grēraa zha ne nacgrē zho,

³⁴ rēbchaa zha co lo zho:

—¡Tebaa gan to ganle nli brieeban xmaistr ne! ¡Laa Pedr gonle me!

³⁵ Psiloque zho grop zho bzodiidz zho zha gon zho me no zho nēz, per haxta horne no zho xtsee, zeene laa me beengrol guietxtil dzigoraa beenbey zho me.

Brieequia Jesús lo grē xpēdscuel me

(Mt. 28:16-20; Mr. 16:14-20; Jn. 20:19-23)

³⁶ Lēētaaque sca nozodiidz zho, tibaque zeen gon zho laa Jesús zole lo zho ga, pquiaabdiuzh me zho, rēb me lo zho, peet tsieniedraa guic zho.

³⁷ Leļ rdzieb zho, haxta rzhidz zho lo dzeb co, sac rēb zho bod ndziin ga ran zho.

³⁸ Dzigo bnee me lo zho rēb me:

—¿Pe nacne rdzieb to? ¿Pe nacne rliladzde to naa nu?

³⁹ Goļwi len nia naa, goļwi zhits ni naa ganle. Goļkeen naa, zeena giladz to ganle nli naaw; sac tel ndziina, mese naca, gacd xen tow.

⁴⁰ Sca quianee me, blu me nia me, blu me ni me lo zho, zaatne biaaz me clav.

⁴¹ Per nli rley zho, rzee zdoo zho, per rliladzdaque zho dien pe nliippaa lēē me ga. Gon me sca rac zho, nacne bnab me ncuaane gow me lo zho.

⁴² Dzigo bdeed zho tib lē meļ bguiee lo me,

⁴³ bnaaz me meļ co, squi ndxie zho gon zho dow me ma.

⁴⁴ Dzigo rēb me lo zho:

—¿Pe ib rsoladzde to nile naa laa grē miñ rii no gac? Led ni naa lo to, grēse mine bzeet Moisés, grēse mine bzeet grē zha ne biadteed xtiidz Dios, mine raquietgaa lo Salm teed naa, ible laaw none gac.

⁴⁵ Psilo me clar nonee me lo zho, parne guienpaa zho zha zhubnee lo grë guits co,

⁴⁶ rëb me:

—Ible lo co zhubnee sca teed naa ne nac naa Mgui ne pxeel Dios, rneew ib no gut miech naa, per zeene gac tson ngbidza, laa naa grieeban.

⁴⁷ Rneew, Jerusalén nu, nu csilo gacnañ miech ible none csaan zho xquieIntseeb zho, gnalo zho naa, parne gun Dios zho perdon.

⁴⁸ Ni to gon ganle grëse min co, goca.

⁴⁹ Na len dze ne ziaadaque nu, laa naa cxel Espiritu Sant gacnieñ to, sac ib scale nac xtiidz PxoZ naa. Per guiabde to niinaga griee to tsienee to lo miech, Jerusalénse nu golcuéz, haxta nieeda ygaa to poder ne gneedz Espiritu Sant lo to.

⁵⁰ Zeene gol dze ne laa me guey gbaa, dzigo güey me güeynie me zho nëz Betain. Bdzin zho ga, blis me nia me, psilo me noyunlay me zho.

⁵¹ Laa me quiayunlay zho, tibaque zeene laa me bias lo guidzliu, igonlo zho laa me bzoquia gbaa!

⁵² Horco pquiiitsgzhib zho liu, beennon zho me, rnee zho grë diidz ndzon lo me; blozh ga ine rley zho laa zho wbi ga, bdzin zho Jerusalén stib.

⁵³ Psilo zho gzataa dze rie zho yadoo roolnie zho Dios, rdeed zho xquizh lo me.

XTIIDZ NDZON DIOS MIÑE PQUIAA JUAN

¹⁻² Jesús, men ne nac Diidz Ndzon, nole me zeene biaa grëtaa ncuaañe no; lo Dios no me ni Diosaque nac me. Notaque me, tibaque nac me: me ni Dios.

³ Me bzaa grëtaa ncuaañe no, tsod ncuaañe lega scase niaan; sac me bzaaw grësew.

⁴ Ladznia me no guielmban ne gdziñd dze lozh, nac guielmban co zig tib biini ne rziini lo miech.

⁵ Me nac biini ne quiaziiini zaatne nac lo guielcow, ni rriee lod guielcow ctsew lo biini co.

⁶⁻⁷ Bio tib mgui brieelë Juan, Dios pxeel Juan biadnee Juan lo miech cho nac Jesús, zeena grëse zho gliladz Jesús.

⁸ Led Juand nac biini, sinque loxaque biaad Juan biaadlu Juan Jesús, men ne nac biini co.

⁹ Bdziñ dzew laa Jesús biaad, ni niina me nac men ne noziini lo grëse miech, sac mepaa nac biini co.

¹⁰ Jesús nac biini, me nac Diidz Ndzon co. Me bzaa guidzliu, per zeene biaad me lo guidzliu ib biend miech cho nac me.

¹¹ Per ni menladz me, niicle ne lopaa zho bdziñ me ib gondzed zho me; tib chop zha ne blëzlo me.

¹² Ni grë zha ne sca bleynie me, grë zha ne dib zdoo gliladz cho nac me, grëse zha co laa me bzo zho gac zho xpëed Dios.

¹³ ¡Grëse zho, rrieequia gol zho stib! Per guiabd ne togo gol zho zigne ral grë miech guidzliu rii, sinque laa zho gol zigne racladz Dios; gane niina xpëed me nac zho.

¹⁴ Zeene bdziñ dze ne laa men ne nac Diidz Ndzon ga goc miech biaad me lo guidzliu, grop lo no bdzion no me, ni bzianie no me. Blu me pa lotaa nquialadz me miech, ni niapse diidzli bnee me. Bdzion no xquielndzon me ne nac me tibpaa mëed lo Dios, men ne nac Pxoze ne.

¹⁵ Zeene bzeet Juan Bautist me lo miech, tib vuelt haxta blu Juan me lo zho, rëb Juan: “Lëe men rii ga gon rzet naa lo to zeene rne naa: Iraa ziaad tib men ne mazdraa non lo naa, sac notaque me; nole me zeene blanso naa lo guidzliu.”

¹⁶ Nquialadzdox Jesús ne, grëse ne gzataa dze laa ne nogaa grëtaa guielnzaac ne rsiaab me.

¹⁷ Zeene psan Moisés ley, loxaque bnabeya ne; sangue niina ne laa Jesús biaad, laa me biaadnie miñe nacpaa diidzli ni biaadlu me ganle pa lotaa nquialadz Dios miech.

¹⁸ Wlaltaa ib choot gard gan Dios; sangue niina ne laa Xpëed me Jesús biaad, men co biaadlu ganle zha nac Dios; sac zaatne no Dios gaque no me.

*Rnee Juan Bautist cho nac Jesús
(Mt. 3:11-12; Mr. 1:7-8; Lc. 3:15-17)*

¹⁹ Tib dze pxeel grë zha ne nac zha non Jerusalén, bla zha ne nac pxoz ni zla zha ne rquianap yadoo, zienabdiidz zho lo Juan dien cho nac Juan.

Bdziñ zho bnabdiidz zho lo Juan.

²⁰ Dzigo bneeli Juan lo zho, rëb Juan:

—Golgancañ ganle, led naad nac Men ne quiambëz to ga cxeel Dios.

21 —¿Chox nac luu waa? —rëb zho—. ¿Te luu ye nac Lí, men ne biadteed xtiidz Dios padzeela?

Pquiab Juan rëb Juan:

—Lëda, led Líd naa.

Biire zho bñabdiidz zho, rëb zho:

—¿Te luu ye nac men ne bzeet Dios padzeela cxeel me guiadteed xtiidz me?

Pquiab Juan rëb Juan:

—Zhaa men co, led naad nac men co.

22 —¿Cho dzigo nac luu? —rëb zho—. Bñë dien cho nac luu; sac gon ib none gdzinnie no tib xtiidz luu lo zha ne pxeel no.

23 Dzigo pquiab Juan, rëb Juan lo zho:

—Naa nac mgui ne bzeet Isá, men ne biadteed xtiidz Dios padzeela, zeene znu bnee me: “Zon to zëëb tsi tib mgui dan rnee me lo miech: ¡Golgun nguudz zdoo to, sac gon ile ziaad men ne rnabey ne!”

24 Horco laa zha ne pxeel zha farisé pquiab, rëb zho lo Juan:

25 —Telne led luud nac Men ne zëëble diidz ga cxeel Dios, niicle led luud nac Lí, niicle nacdgaa luu cho stib zha ne pxeel Dios ziadteed xtiidz me, ¿zha nac dzigo ne nochoobnis luu miech?

26 Pquiab Juan rëb Juan:

—Tel naa niab nis rchoobnis naa miech, per no tib men ne gard gunbey to.

27 Tib men non nac me, per ni par gac naa tib ngundziin win ne glit lab me ni me raguiald naa; ni merle csilo gon me dziin ne pxeel Dios me gon me.

28 Betain lë tib guiedz ne riaan gax ro guiubee Jordán, nëz ne rlan ngbidz; ga no Juan nochoobnis me miech zeene scataa pquiepe zho me.

¿Cho nac Jesús?

29 Biet stib dzew, laa Jesús bdzin zaatne no Juan ga. Zeene gon Juan me, rëbchaa Juan lo grë miech ne ndxie ga:

—¡Golwi ganle, lëë men qui gon csilaa miech lo grëtaa xtol zho! ¡Me gac zig tib carner yeen ne guet tsogon lo Dios par guiaanmbe miech lo dol!

30 Lëë men rii ga nagon rzet naa lo to zeene rne naa: “Iraa ziaad tib men ne mazdraa non lo naa, sac notaque me; nole me zeene blanso naa lo guidzliu.”

31 Len dze co niicle naa runbeyd naa me; per laa naa nochoobnis miech sac ible laa naa zial par glu naa me lo grë zha Israel.

32 Dzigo bzodiidz Juan lo zho, zha gonlo Juan biet Espiritu Sant gbaa, rlu me zigne rlu tib palom blëz me guic Jesús.

33 —Ne nligaa runbeyd naa me —rëb Juan—. Per zeene pxeel Dios naa zialchobnis naa miech, hor co në me lo naa: “Zeene gan luu guiet Espiritu Sant gbaa cuëz me guic tib mgui ne nochoobnis luu, dzigo gocnan lëë men co nac men ne rxeel Espiritu Sant zdoo miech.”

34 Gonlo naa blëz Espiritu Sant guic me; gane nanween naa ne nli Xpëed Dios nac me.

Zha ne glopaa goc xpëëdsuel Jesús

35 Biini liu co, laa Juan zoque ga zonie me chop xpëëdsuel me.

36 Ga zo me, gon me laa Jesús zieded ga; dzigo rëbchaa me lo zho:

—¡Golwi ganle! ¡Lëë men qui gon nac Xcarner yeen Dios!

37 Zigne bin zhow, laa zho zienal zhits Jesús.

38 Zeene ptsire lo me, gon me laa zho nalë zhits me; dzigo rëbchaa me lo zho:

—¿Pe nac ziaadnal to zhits naa?

—Maestro —rëb zho—, laa no racladz gacndion no dien pa rbëz luu.

³⁹ Dzigo rëbchaa me lo zho:

—Na ganle guio ne, zeena gan to paw.

Nacne güeynal zho zhits me, gon zho pa lo no me; dzigo blëz zho lo me ga. Ga blozh ptse zho dze, sac ziedzele dze zie zho.

⁴⁰ Ndrës lë tib zha ne güeynal zhits me ga; lëe Ndrës co nac bets Simón Pedr.

⁴¹ Dzigo zigne brieë Ndrës ga güey Ndrës güeyguib Ndrës Simón. Bdzin Ndrës rëb Ndrës lo Simón:

—¡Nasi gon laa no bdzion Men ne nacle diidz ga cxeel Dios!

⁴² Dzigo güeynie Ndrës Simón zaatne no Jesús ga. Zeene gon Jesús Simón, rëbchaa me lo Simón:

—Bina ganle, nli Simón nac lë luu ni xingan Jonás nac luu, sangue niina laa luu grieele Cef.

(Cef rnee zha Israel quie, laa xtiidz zha Gres rnee zhow Pedr.)

⁴³ Biet stib dze co, laa Jesús no nëz tsie me nëz Galilé. Laa me zieriee dze ga, zeene bdzieel me tib mgui lë Lip; dzigo rëbchaa me lo Lip:

—Dënal zhits naa.

⁴⁴ Zha Betsaid nac Lip, ni zha coque nac Ndrës grop Simón.

⁴⁵ Dzigo güey Lip güeyguib Lip Natanael; rëb Lip lo Natanael:

—¡Laa no bdzion Men ne nacle diidz ga cxeel Dios! Men ne rzeet Moisés lo libr ley ne psan me, men ne scataa bzeet grë zha ne biadteed xtiidz Dios padzeela. ¡Laa no bdzion me, tib men Nazareta, lëe me ga nac Jesús, xingan José!

⁴⁶ Pquiab Natanael, rëb Natanael:

—¿Nazaret ye? ¡Gard grieequia tib zha non Nazaret!

—Gotsaa guio ne ganle —rëb Lip—, zeena ganzhal luu me.

Dzigo laa zho zie.

⁴⁷ Squi ziaad Natanael, zeene gon Jesús Natanael rëbchaa me:

—¡Golwi ganle, lëe zha qui gon nac merpaa zha Israel, sac mesi ib rquidied me!

⁴⁸ —¿Zha nacne runbey luu naa? —rëb Natanael.

Pquiab me rëb me:

—Glole naa beenbey luu, dzigora a bredz Lip luu. Zeene zob luu tib zhan yag guigw, hor co gon naa luu.

⁴⁹ Rzee zdoo Natanael, rëb me lo Jesús:

—¡Nlique nagon luu nac Xpëd Dios! ¡Luu nac zhirey zha Israel!

⁵⁰ Dzigo rëbchaa Jesús lo Natanael:

—¿Pe ne binse luu ni naa gon naa zeene zob luu tib zhan yag guigw, pe mincose laa luu bliladz cho nac naa? ¡Naraa ganle gan luu ncuaañe mazdraa nroob!

⁵¹ Ni rëb me lo grë zha ne ndxie ga:

—Gneli naa lo to: zanaque to ganle zeene laa zhan gbaa gzhial, zlpaa grë xanjl Dios, zha ne ziad-zëeb zha ne ziequia, quiayuñ zho dziin lo naa, nac naa Mgui ne pxeel me.

2

Güey Jesús tib lo guie!tsieel

¹ Goc tson ngbidza, bio tib guie!tsieel guiedz Caná, xtan zha Galilé ga. Dzigo bredz zho xníaa Jesús lo lni co,

² ni bredz zho me; nacne bional no zhits me grëse no ne nac no xpëdscuel me.

³ Laa lni noyac, tibaque zeene laa vin blozh. Dzigo güey xniala Jesús rëb me lo Jesús:

—Laa xvín men rii blozh. ¡Guiend_{raa} pe quizz zho!

⁴ Pquiab Jesús rëb me:

—¿Pe nacle rnee luuw lo naa? Goñ ganle naraa gdziñ dze ne gacnan miech cho nac naa.

⁵ Niicle sca rëb Jesús lo me, güey me lo zha ne quiaguiz vin ga rëb me lo zho:

—Mine gnabeytaa me to, golguna.

⁶ Lidz men co ga ndxie xoop guies ne niala quie; zaatne rio nis ne rquiin zha Israel riar nia zho, zigne nac grë xcostumbr zho. Tib tib guies co, rio maase xoopga re nis lena.

⁷ Dzigo bnabey Jesús zha ne rguiz vin ga pcodzëe zho nis len gza guies co.

⁸ Blozhse guiel guiel pcodzëe zhow, rëbchaa me lo zho:

—Golcuae niip nis qui, goltsieniew lo men ne zo lo lni.

Zeene laa zho blee niip nis co tsienie zho, laaw nacle vin.

⁹ Ni lalnu ib güeynied guic men co pa brieew vin co (loxaque zha ne nacle ngundziin ga, zha ne blee nis ga, zha cose goñ pa brieew), zeene pquiaaro mew, bredz me mgui ne notsieelnia ga, rëb me:

¹⁰ —¡Zha nan luu naraa cuee luu vin rii! Grëtaa zaatne znu rac lni, glo rgaaz vin niazh, zeene nrooblew noye zho, dzigo rgaaz vin ligase. Laa luu goñ lel naraa bnabey luu brieew vin niazh.

¹¹ Milagr ne been Jesús guiedz Caná ga, ga glopaa blu me lo miech ganle nli tib men nroob nac me. Grëse no ne nac no xpëedsuel me, zeene bdziñ now, hor co bliladz no nli me nac Men ne zëeble diidz ga cxeel Dios.

¹² Zeene blozh guiełtsieel co, laa no wbiere guiedz Capernaum stib grë no me, xniala me, ni zha bets me ne. Bdziñ no Capernaum, ga bliaaz no blalaa ngbidz.

*Blee Jesús grë zha ne noyún lgui len yadoo
(Mt. 21:12-13; Mr. 11:15-18; Lc. 19:45-46)*

¹³ Len dze ne ziaadyob lni Pascw, lni nroob ne run zha Israel rsoladz zho zha psilaa Dios zho Egipt, len dze co brieew Jesús zie me nëz Jerusalén.

¹⁴ Bdziñ me Jerusalén, güey me len yadoo nroob ne zob lad guiedz co. Zeene bzëeb me, goñ me nzian miech ne ndxie ro yadoo co, zha ne no wto ngon, zha ne no wto mëcwxiil, zha ne no wto palom ne, haxta zha ne rtsëe dimi ndxie ga.

¹⁵ Dzigo bzhixcuua me tib lë doo zig riaa dooguid ne rcaa ma, bzhen me doo co benxoon me zho ga grë xma zho; blozh ga, ptiixche me xmezha zha ne notsëe dimi ga, nëzrii nëzrec blaal me xtimi zho.

¹⁶ —¡Niinagazh golcuae grë ncuaan qui nu! —rëb me lo zha ne rto palom—. ¡Golguien ganle lidz PxoZ naa nu! ¡Nacda yu lgui parne tso to wto nu!

¹⁷ Dzigo psoladz no zha ziaad lo Xtiiidz Dios, zaatne rnee: “Rbinladz guic naa, sac ne nligaa racladz naa yquiaanap naa lidz luu.”

¹⁸ Blalaa zha non lo menguiedz Israel, zeene goñ zho sca benxoon me grë miech co, wbig zho lo me rëb zho:

—¿Cho nac luu ne squitaa noyún luu grë ncuaan qui? ¡Been tib milagr, dzigo ziladz no men rnabey nac luu!

¹⁹ —Telne racladz to milagr —rëb me—; goltsil yadoo rii, ni gni naa lo to ganle ngbidz tsona laa naa bzaalolew stib.

²⁰ Pquiab zho rëb zho:

—¡Ncuaane gliladzdraa no rnee luu! ¡Len choopxooPraa iz name biao yadoo rii! ¿Zhazhe gun luu, tsonaque ngbidz gzaa luuw stib?

²¹ Per zeene sca bnee Jesús lo zho, xcuerp me ga nac yadoo ne bzeet me.

²² Gane zeene brieaban me, hor co psoladz no zeene znu bnee me, dzigo bien no ne me ga bzeet me ni bien no ne me ga raquiet lo Xtuidz Dios zaatne scaque rnee.

²³ Len dze lni Pascw co, nzian miech zeene gon zho grëtaa milagr ne run me, bliladz zho ne nli me nac Men ne zëëble diudz ga cxeel Dios.

²⁴ Per ib pxend me lo zho, sacne nanwen me zha nac zho tib tib zho.

²⁵ Pquiind me chopaa niab lo me zha nac zho; sac nanwen me zha nac tib tib miech ni nan me pe rza zdoo zho.

3

Jesús ni Nicodem

¹ Ziecowle liuw, bdziñ tib zha farisé lë Nicodem zaatne rbëz Jesús; tib zha non nac me lo menguedz Israel. Bdziñ me rëb me lo Jesús:

² —Maestro, ndion no ible Dios pxeel luu ziadseed luu no. Grë milagr nroob ne run luu, ga rlu ne Dios nacie luu.

³ —Gneli naa lo luu ganle Nicodem —rëb Jesús—, grëse miech, telne gald zho stib grielod gdziñ zho zaatne rnabey Dios.

⁴ Pquiab Nicodem, rëb Nicodem:

—¿Gal zho stib ye? ¿Zha grielo gal miech stib? Tib zha ne nacle mengol, ¿niacxe zrieelo sëëb zho zdoo xniaa zho gbiire gal zho?

⁵ Rëbcha Jesús:

—Ible none gal miech, none gal zho zigne racladz Dios. Sac telne chobnisd zho ni ygaad zho Espiritu Sant, grielod sëëb zho zaatne rnabey Dios.

⁶ Grëse miech zeene ral zho glo, miechse nac zho; sangue zeene ral zho stib, Espiritu Santle nac men ne rnabey zho.

⁷ Gacxe waa, gzeed zdoo luu znu rne naa: “Grëse miech, ib none gal zho stib.”

⁸ Nac cuent rii zig nac me ne rtop xcow, zeene rriee me, nëzrii nëz rec zie me, ron luu razh zhoob me; per ran luu dien pa nëz zie me dien pa nëz ziaadga me. Scaque nagon nac zha ne ral stib, grielod guien miech zha rnabey Espiritu Sant lo xquielmban zho.

⁹ —Riend naa zha rnee luu —rëb Nicodem—. ¡Riend naa dien zha grielo gac grë mine rnee luu i!

¹⁰ Rëbcha Jesús:

—¿Riend luu ye zha rne naa? ¡Men rseed miech name nac luu lo menguedz Israel!

¹¹ Mine rne naa nu ncuaane rien naaw, ncuaane gon naaw, ni riende to zha naca.

¹² Telne riend luu zha nac grë mine rne naa nu zeene rzet naa ncuaane rac lo guidzliu, ¿zha dzigo guien luu mine gne naa telne gzet naa grë ncuaane rac gbaa?

¹³ 'Wlaltaa gard tso tib zha ne soquia gbaa, per no tib men ne biet gbaa, men cosi soquia me gbaa, sac ga nac zaatne no me; ni lëe men co nu nac naa.

¹⁴ Ni zigne pquianga Moisés tib meel brons tib guic yag zeene nonie me zha Israel dan zit co; scaque none yquianga naa tib lo yag,

¹⁵ zeena grëse miech, zha ne gbig dib zdoo zho gnalo zho naa, zga zho tib guielmban ne gdziñd dze lozh.

16 Sac gon rleyniedox Dios grëse miech ne ndxie lo guidzliu; gane niicle tib naa nac mëed lo me per laa me pxeel naa lo guidzliu; zeena grëse zha ne gnalo naa, zgaa zho tib guielmban ne gdziind dze lozh; led yed zho nitlo.

17 Laa Dios pxeel naa lo guidzliu par csilaa naa miech lo dol, ziald naa par gdziibdol naa miech.

18 Sac grëse zha ne dib zdoe gnalo naa ne naa csilaa zho lo dol, nitlod zho. Sangue zha ne gnalo naa, laa zho bnitlole ga, sac gon Xpëed Dios nac naa ni biladzd zho naa.

19 Laa zho bnitlole, sac gon biaadpaa biini lo guidzliu ni laa ne nleynie zho biini, lel guielcow bleynie zho, sac guielntseeb nac mine zienal zho.

20 Grëse zha ne run guielntseeb, riëe zho ran zho biini. Ib rbigd zho lo biini, sac racladzd zho xobnen grë guielntseeb ne quiayun zho.

21 Sangue zha ne run mine rnabey Dios, haxta rley zho rbig zho lo biini, zeena glu ganle zienal zho mine rnabey me.

Rzeet Juan Bautist Jesús stib

22 Ga brieet Jesús güeynie me no nëz xtan zha Judé. Xtselaa bliaaz no ga grë no me, rchoobnis me grë miech co.

23-24 Len dze co gard guiab Juan Bautist ladzguib; dzigo ye me nochoobnis miech zaatne lë Enón gax Salim; sac ga no naal nis. Zian miech ne rdziin lo me ga, rchoobnis me zho.

25 Tib dzew, wbig tib zha Israel lo zla xpëedscuel Juan, psilo zho nodiidiidz zho dien cho zhiwrobnis nonraa; pe zhiwrobnis Jesúsá, te zhiwrobnis Juana ye.

26 Blozhse bdiidiidz zho, wbig xpëedscuel Juan lo Juan, rëb zho:

—Maestro, men ne gon bzodiidznie luu ro guibee Jordán ga, men ne scataa bzeet luu lo miech, iye me laa me quiachobnis miech niina, ni ndal miech niapse lo me zie zho, ziaatraade zho nëz ri!

27 Pquiab Juan rëb Juan:

—Ib Dios rdeed diidz zha gun miech tib tib xtsiin me, gacd ne lega zhal zho gun zho pe cos.

28 Mine psio Dios naa, laaw ben naa: laa naa biallu ganle cho nac Men ne zëeble diidz ga cxeel Dios. Ni bneeli naa lo to ganle led naad nac men co; laa naa zial loxaque par gzet naa me lo miech zeena gunbey zho me.

29 Ible lo me none gdziin miech. Nac me niina zig tib mgui ne notsieelnia: Mgui ne notsieelnia, jled zha lëe rzobnie ndzooop ne notsieelnia zho! Ni grë zha ne ndzieeldiiz zho, rley zho ran zho laa xamigw zho notsieelnia, rley zho ron zho pe rnee xamigw zho. Scadaa nagon rzaac naa niina: rley naa ron naa grë ncuane run me.

30 Zigse zie dze, laa me gacnonraa; scagaa naa, zigse zie dze laa naa guiaanwinraa.

31 Nëz gbaa ziaad me, min co ne mazdraa non me lo grë miech. Tel naa tib miech guidzliuse nac naa, ni ncuane riense tib miech lo guidzliu min co rne naa;

32 sangue me, niapse grë mine bin me, grë mine gon me min co rnee me lo miech; jni choot rliladzda!

33 Zha ne rliladzse xtiidz me, rien zho ganle niapse diidzli rnee Dios.

34 Xtiidz Dios rnee me lo miech; sac Espiritu Sant rdeed guielbiini lo me, ni Dios nac men ne pxeel me.

35 Rleyniedox Dios me, nac me Xpëed Dios; gane grëtaa ncuane no gbaa, no lo guidzliu, ladznie me psan Diosa.

³⁶ Grëse zha ne gnalo me, laa zho bgaale tib guielmban ne ib gdziñd dze lozh; sangue zha ne gond xtiidz me, gdziñd zho gbaa, zaatne ygaa zho guielmban co. ¡Grëse zha co, ible zgaa zho guielnëdox ne csiaab Dios!

4

Tib wnaa Samar

¹ Zeene bien Jesús laa zha farisé gocnanle ndalraa miech zianał zhiwseed me, ni ndalraa miech ne quiachoobnis me lo Juan

² (niicle ne led medpaa rchoobnis, sinque zha ne nac xpëëdsuel me zha co rchoobnis),

³ nacne brieë me xtan zha Judé ga, wbiire me nëz xtan men Galilé stib.

⁴ Par gdziñ me Galilé, none ted me xtan men Samar.

⁵ Xtan men Samar zieded me, zig groł dzew, laa me zie gax guiedz ne lë Sicar,

⁶ dzigo güeyted me zaatne quia guiuu ne rnee zho “Zhibzie Jacob”; lo liu ne psan Jacob lo xpëëd me José padzeela. Rdzag me ziaad-zë me lo nëëg co, bdziñ me bzob me ro guiuu co;

⁷⁻⁸ ga blëz me, laa no zio lad guiedz Sicar zioxi no ncuaane dioownie no me. Ro guiuu co zob me bdziñ tib wnaa Samar ziexi nis ga; dzigo rëbchaa me lo wnaa co:

—Bzhiguieł bzoladz niip zhis luu guie naa.

⁹ Bzee zdoo wnaa co gon me bñab Jesús nis lo me, sac rlëëdox zha Judé ran zho zha Samar, per ni rneed zho lo zho.

—¡Ncuaane gliladz naa! —rëb me—. ¡Ti zha Judé gnab nis lo ti zha Samar!

Dzigo rëbchaa Jesús:

¹⁰ —Teł niaca miñe guien luu ganle cho rnab nis lo luu, ni guien luu zha nactaa ncuaane rzoladz Dios lo miech, haxta znab luu nis lo naa. Ni naasi gon, znedz naa nis ne rdeed guielmban.

¹¹ Pquiab wnaa co, rëb me:

—Per ni nzhend luu name pe cuee luu nis, ¿pa dzigo tsiebee luu nis ne rdeed guielmban ga? ¡Gon ganle, guietdox bie rii!

¹² Stiba, ¿niacxe mazdraa dzigo nac luu que pxozgol ne Jacob, men ne psan bie rii? Nu name go me nis grë xma me; niicle grë xpëëd mew, nuque go zho nis.

¹³ —Grëse zha ne rie nis rii —rëb Jesús—, rbiire rnab zhis zho;

¹⁴ sangue nis ne rded naa, zha ne guiew gdziñdraa dze gnab zhis zho. Sac nis ne gded naa, masaque gdziba zdoo zho zig rdzib nis tib ro zhlian, ni nis co gdeed tib guielmban ne gdziñ dze lozh lo zho.

¹⁵ Dzigo rëbchaa wnaa co lo Jesús:

—Bzhiguieł bneedz nis co guie naa, zeena gnabdraa zhis naa, zeena gualxidraa naa nis nu.

¹⁶ —Güeygazh —rëb Jesús—, güeyxi tsieel luu, dzigo gołtë grop to.

¹⁷ —Guiend tsieel naa —rëb wnaa co—. Gard tsiieelnia naa.

—Nli rnee luu —rëb Jesús—;

¹⁸ sac gaay mgui ne zibannie luu, ni tib zho ptsieelnia luu, niicle mgui ne nonie luu niinaw, ptsieelniadaque luu zho. ¡Nli miñe rnee luu ii!

¹⁹ Zeene bin wnaa co sca rëb Jesús, rëbchaa me:

—Zootne tib zha ne ziadnee xtiidz Dios lo miech nac luu.

²⁰ Teł scaw, bzhiguieł bnë dien, ¿zha nacne rnee grë men Israel ne len yadoo nroob ne zobpaa Jerusalén, gapaa none tsiegan miech Dios? Sac no ne nac

no men Samar, rnee no ne ib guic gui ne zob nu, ga none tsiegan miech Dios; sac grë xmengol no ga güeygan zho Dios.

21-24 Pquiab Jesús rëb me:

—Bina ganle, zdziñ dze zeene yquiindraa ne goon guic gui riipaa, o Jerusalénpagaa tsie to tsiegan to Dios men ne nac Pxoze ne. ¡Ni laa dze co ziaadgaxe! Gacdraaw ne dien pa lo tsie ne tsiegan ne Dios, sinque zha ne nlipaa racladz gleynie me, none dib zdoo zho gleynie zho me; zigne gdeedse Espiritu Sant guielbiini lo zho.

Choot grielod gan Dios; gaxe waa zha ne gleynie me, none gleynie zho me zigne rdeed Espiritu Sant guielbiini lo zho; ni none dib zdoo zho gleynie zho me. Ni zha ne sca gleynie me, zha co rguib me. Teļ to laa to rieganse Dios ni runbeyde to me; sangue no rdziuunbey no men ne riogan no, sac gon lo xti men Israel ziaad men ne guiaadsilaa miech lo dol.

25 —Nenda —rëb wnaa co—, per nan naa ib ziaad Men ne zëëble diidz ga cxeel Dios, men ne lë Crist; ni zeene laa me guiaad, me gnë diidzli lo no.

26 Pquiab Jesús, rëb me:

—¡Naa gon nac men co! Lëe me nu nonee lo luu.

27 Lëetaaque hor co grëse no ne nac no xpëedscuel me laa no bdziñ. Bzee zdoo no bdzion no laa me nozodiidznie wnaa co, per ni tib no bnabdiidz lo me dien pe quianabdiidz me, dien pegaa quiazodiidznie me wnaa co.

28 Laa wnaa co, zoque xche me ga, rias me laa me zie nëz lad guiedz. Bdziñ me, rëb me lo grë miech co:

29 —¡Goltë ganle gunbey to ti men co! ¡Bzeet me grëse zha nac lo xquielmban naa! ¿Bay pe lëdle Men ne nole diidz cxeel Dios ga?

30 Horco brie grë miech co lad guiedz, ziaad zho zaatne gon wnaa co Jesús.

31 Laa no, quia no rdeed no ncuane gow me, per nëd me.

32 —Gowd naa —rnee me—. No stib xquielwagw naa miñe runbeyde to.

33 Dzigo rnabdiidzlsa no, rnee no:

—Bod no cho biaadnie pe dow me, lal ne bio ne lad guiedz.

34 Nëchaa me lo no:

—Lëe xquielwagw naa nac ne gun naa miñe rnabey Dios naa, ni csiaal naa dziin ne pxeel me naa zialgun naa.

35 To lëe rnee to: “Len stapraa mëë csilo gac wlaap.” ¡Per golwi lo grëtaa miech qui ganle, nac zho niina zig grë guielgon ne gollë gliap!

36 Gaxe waa, ib none tsie to tsielaap to, tsietop to zho, zeena yгаа zho tib guielmban ne gdziñd dze lozh. Ni zigne razh zha ne rie wlaap, scaque zguzih Dios to tsietop to zho. ¡Ti guielbley nrooba, zigtaa par zha ne rana, zigtagaa par zha ne rlaapa!

37 Ible nli diidz ne znu rnee: “Zhaa zha ne rie gon, stible zha ne rie wlaap.”

38 Zig nac niina, laa naa rxel to tsielaap to zaatne ni tib xtsiñ to psëëbde to; zhaa zha ne güey gon, na tole tsie wlaap.

39 Laga laa me sca quianee lo no, laa grë menladz wnaa co no nëz ziaad zho nëz lo no ga. Nzian grë miech co, zeene bin zho rëb wnaa co bzeet Jesús grë ncuane ziyun me, bliladz zho Jesús.

40 Laa zeene blanso zho ga, bnab zho lo me cuëz me ladz zho zhis. Dzigo nacne blëz me lo zho chop ngbidz.

41 Nzianraa grë miech co bliladz me, zeene bin zho grë zhiwseed me.

42 —Nasi nagon laa no riladz me —rnee zho lo wnaa co—, sac nozhaldzion me, ni bdzion no grë miñe rnee me. Nliw, ible me nac men ne ziaadsilaa grëse miech lo xtol zho.

Biac xpëed tib zha ne quia dziin lo rey

⁴³ Zeene goc chop ngbidz co, laa no brieë ga gza no me, laa no bdzio nëz stib zio no nëz Galilé.

⁴⁴ Niicle ne bzeetle me: grëse zha ne ziadteed xtiidz Dios, ib ranðzed miech zho zaatne nac ladz zho; per

⁴⁵ zeene bzëëb me grë guiedz ne ngab Galilé, wen pcaania grë miech co me. Nzian zho güey lni Pascw co Jerusalén, gon zho grëtaa milagr ne been me ga.

⁴⁶ Nëz no no bdziñ no Caná, zaatne sca bzaalo me nis vin. Ga bdzieelo me tib zha Capernaum, tib zha ne rquia dziin lo rey; lëëtaque len dze co rzacné xpëed me.

⁴⁷ Bin me laa Jesús brieë xtan men Judé, laa me no gdziñ Galilé. Dzigo biaad me biaddzieelo me Jesús ga, bñab me lo Jesús tsienal Jesús zhits me Capernaum, tsiegunguiac Jesús xpëed me; sac nzho rac win.

⁴⁸ Dzigo rëbchaa Jesús lo me:

—¿Pe haxta gan to dzigo gun naa milagr, dzigora galiladz to naa?

⁴⁹ —Been tib guielnzaac gotsaa guioniob ne —rëb men co—, nend znuse lozh xpëed naa.

⁵⁰ Rëbchaa Jesús:

—Bzë, tsod luu guielnë. ¡Laa xpëed luu biacle!

Dib zdoo men co bliladz me xtiidz Jesús, laa me bio nëz laa me zey.

⁵¹ Zhilew gdziñ me lidz me, zeene bdzieelo me bla zha ne quia xtsiñ me, rëb zho laa xpëed me biacle.

⁵² Dzigo bnabdiidz me lo zho, maase pa hor biac win. Rëbchaa zho:

—Nieeg, zig rwe ngbidza, tibaque znuse brieë zhixlëë win.

⁵³ Dzigo psoladz me zig hor cotaque rëb Jesús lo me, laa xpëed me biacle. Dzigo dib zdoo me bliladz me Jesús, tsieel me, xpëed me, menlidz me ne, grëse zho dib zdoo zho bliladz zho Jesús.

⁵⁴ Ga goc brop milagr ne been Jesús lo zha Galilé. Min co been me zeene wbiire me nëz Judé.

5*Biac tib men ne gacd grial*

¹ Goc palad dzew, laa stib lni nroob rac Jerusalén, dzigo nacne güey Jesús Jerusalén stib.

² Ro guiedz Jerusalén, gax zaatne quia puert ne rded mëcwxiil, ga niaa tib pil nis rnee zho Betesd. Igo ro pil co niaa tib nsaap, rap nsaap co gaay arcw.

³ Lo nsaap co, ga ndxie nzian men rzacné, no zho rold lo, no zho në ni, no zho ib gacd grial [grëse zho laa zho ndxie ga quiambëz zho gni lo nis ne no len pil co,

⁴ sac nac diidz poc poc riet tib xanj] Dios riesini lo nis co, dzigo zha ne znuse sëëb lo nis co, tel pe guielguidztaa rzac zho, riac zho].

⁵ Ga nix tib mgui, gogle galptsiipxon iz rzacné me.

⁶ Laa zeene gon Jesús me, ni bin Jesús scataale nroob dze rzacné me, rëbchaa Jesús lo me:

—¿Pe racladz luu guiaac luu?

⁷ —Racladz naa —rëb me—, per guien cho csëëb naa len pil qui zeene laa lo nis rni. Zeene racladz naa sëëb naa, zhaale stib zha ne glo rzëëb.

⁸ Dzigo rëbchaa Jesús lo me:

—¡Nasca zeena guche i! ¡Bzoli, bi yag ne bzhoob luu i, zeena bzë!

⁹ Zigne sca rëb Jesús, laa meṅ co biac. Horcogazh blis me yag co, nzëni me laa me brieë ga.

Ni ne dze co nac tib dze nda lo zha Israel,

¹⁰ zeene goṅ zho ney me yag ne bzhoob me, rëbchaa zho lo me:

—iPe riend luu nda nadze! iLëda i goṅ squi yquianlan luu ncuaaṅ qui dze rii!

¹¹ Pquiab me rëb me:

—Meṅ ne beenguiac naa, mezhah në lo naa, güey naaw.

¹² —iCho meṅ sca në lo luu? —rëb zho.

¹³ Niicle me riendaque dien chow, sac ndaldox miech ne ndxie ga; hor co laa Jesús bzëëble lad grë miech co.

¹⁴ Haxta len yadooraa bdzieel Jesús me, dzigo rëbchaa Jesús lo me:

—Nana goṅ ne squi laa luu biacle, bien gunctaldraa luu xtoṅ luu. Sac telne gond luu diidz, nend dzigole glaan luu tib guielguidz ne mazdraa ntseeb.

¹⁵ Zeene laa me brieë ga, güey me lo zha ne rnabey lo zha Israel ga, rëb me lo zho Jesús nac meṅ ne beenguiac me.

¹⁶ Nacne psilo zho quianaṅ zho dien zha gnaaz zho Jesús pe nacne runguiac me miech dze nda.

¹⁷ Blisqui zhow lo me, dzigo rëbchaa me:

—Tel Pxoz naa gzataa dze quiayun me dziin; ni miṅcoque nac miṅ quiayun naa.

¹⁸ Zeene goṅ zho sca rëb me, mazdraa blëë zho lo me rzac zho tebaa zha gutgazh zho me. Rlëë zho, sac zienald me dien pa dze nda; mazdraa zeene rëb me Dios nac Pxoz me, sac ga rlu me ne lalga nac me con Dios.

Meṅ nroob nac Xpëëd Dios

¹⁹ Ni rëb me:

—Gneli naa lo to ganle: peet grielod gun Xpëëd Dios lega guicse me, sinque ncuaaṅe ran me run Pxoz me, miṅ co run me.

²⁰ Nquialadzdox Dios me, grëtaa dziin ne run Dios rlu Dios a lo me; gane zun me milagr nroob ne mazdraa gzee zdoo to; ncuaaṅe palalse i goṅ to niina ne biac meṅ qui.

²¹ Sac telne gacladz me cueeban me tib mengut, zbeeban me zho, zigne rbeebanaque Pxoz me mengut.

²² Ni bzo Dios me, me gun guielwxtis,

²³ zeena grëse miech guien ganle zigne nonaque Pxoz me, scaque meṅ non nac me, ni sca none gunnon zho me. Sac tel zha ne gunnond me, yeje Pxoz me ga (meṅ ne pxeel me) runnond zho.

Ni rëb me:

²⁴ —Gneli naa lo to ganle: Zha ne gliladz xtiaz naa, ni gliladz zho meṅ ne pxeel naa, laa zho bgaale tib guielmban ne gdziṅd dze lozh. Led yedraa zho ygaa guielnëdox ne ygaa grëraa miech ntseeb; sac laa zho brieële ladznia guielgut ga, bdziṅ zho lo guielmban co.

²⁵ Zdziṅ dze zeene ye grë mengut, zon zho xtiidz Xpëëd Dios; ni grëse zha ne gzoobdiaga, zban zho. iNi lëë dze co bdziṅ niina!

²⁶ Sac goṅ, zigne rdeed Dios guielmban lo miech, scaque zrieelo gded naa guielmban lo miech.

²⁷ Ni bzo me naa, naa gun guielwxtis, gded naa miṅe tsieguial tib tib miech.

²⁸ iGzeed zdoo to! Sac ne nligaa, zdziṅ dze, grëse mengut ne no len baa, laa zho grieëban

²⁹ zeene gon zho tsi naa. Grëse zha ne ndzinli wban, hor co laa zho yгаа tib guielmban ndzon; sangue zha ne been guielntseeb, hor co laa zho guey lo guielnëdox ne rieguial zho.

³⁰ Per grielod gun naa guielwxtis naase, ib none gacnan Pxoз naaw. Grëse guielwxtis ne gun naa, laaw gun naa zigne gnabey Pxoз naa, laaw gun naa zigne nonguieła, sac gon gund naa mine guiaabtaa guic naa, sinque laa naa gun mine racladz Pxoз naa.

³¹ Telne niaca mine naase rne cho nac naa, zrieequia zha ne guiab nlida.

³² Per na, no stib men ne rzeet naa lo miech; ni nan naa diidzli rnee me.

³³ Haxta Juan Bautist, zeene pxeel to bla zha ne güeynabdiidz lo me, grëse mine rëb me lo zho ga, diidzliw.

³⁴ Laa naa rzet min rii lo to, zeena gliladz to cho nac naa, zeena sca laa to lo xtol to; sac rquiindpaa dien cho miech guidzliu rii gnee cho nac naa.

³⁵ Zeene bиаad Juan, goc me zig tib biini bziini me lo to palal dze zeena gunbey to naa; ni bley to pquiaadiag to mine bnee me.

³⁶ Nli bnee me cho nac naa; per grë milagr ne run naa min co quiaxobenraa ganle cho nac naa. Pxoз naa rneedz diidz run naaw; ni ga rlu ganle ne me pxeel naa.

³⁷ Haxta ye me mezhал quialu ganle cho nac naa, parga nli gard gan to me, niicle gard gon to tsi me.

³⁸ Ronde to pe rnee me, sac rililadzde to naa; sac gon me pxeel naa zialne naa xtiidz me.

³⁹ Nli rioxco to rseed to grë guits ne ziaad Xtiidz me, sac rien to ga ziaad dien zha yгаа to guielmban ne gdzind dze lozh. Ni niicle ne lo co zhoinee ganle cho nac naa,

⁴⁰ per nëde to gbig to lo naa, zeena yгаа to guielmban co.

⁴¹ Nëde to gunbey to naa, nëde to guien to cho nac naa, per peet nacd min co;

⁴² runbey naa to, ni lalnu rleyniede to Dios.

⁴³ Sac gon, me pxeel naa zial naa lo to, ni rlëe to ran to naa; mazd zha ne lega ziaadse, zha cosi lëelëd rcaania to zho.

⁴⁴ Min co gon, ib rililadzde to cho nac naa! Sac laa guic to zienie loxaque dien zha gunnon samiech to to, ib rguibde to zha gacnon to lo Dios.

⁴⁵ Ni guiabde to togo naapaa gazo to lo Pxoз naa, glisqui naa grë ncuaañe run to. Moisés gon nac men ne glisquiw; sac ley ne psan me, mine rnalo to csilaa to lo xtol to, lëew glu ganle pe nac grëtaa ncuaañe quiayun to.

⁴⁶ Sac gon, telne niaca mine nlipaa rililadz to grë mine pquiaa Moisés, zililadz to dzigo cho nac naa; golgan ganle, lo grë guits ne pquiaa me, ga rzeet me naa.

⁴⁷ Rlu rililadzde to grë mine pquiaa Moisés ga, gane rililadzde to mine rne naa lo to.

6

Row gaay mil miech

(Mt. 14:13-21; Mr 6:30-44; Lc. 9:10-17)

¹ Bded ga, tib dzew brieë Jesús bdedquia me nëz dan ro Nisdoo Galilé (lëëque nisdoo co ga rnee zho Nisdoo Tiberias).

² Miech guizhiu ne brieenał zhits me, sac ziyan zho grëtaa milagr ne run me, runguiac me grë men rzacnë.

³⁻⁴ Nzian zho nac zha ne zie lni Pascw, lni nroob ne rac Jerusalén gzobse iz. Grëse no ne nac no xpëëdsuel me, laa no nal zhits me. Zeene bdiëedquia no ro nis co, dzigo bdzieep no tib cho gui win zob gax ga. Loxaque laa no bziob ga grë no me,

⁵ zeene bdzion no miech guizhiu ne ziaadquia cho gui co, laa zho glansole lo no ga. Dzigo rëbchaa me lo Lip:

—Lip, çpa guioziu ne ncuaañe gow grëtaa miech qui?

⁶ Per lega scase rëb me lo Lip, par dien pe guiab Lip; sac nanle me pe nac ncuaañe gun me.

⁷ —iNe nligaa pe zhidaa zho! —rëb Lip—. Niicle telne niaca mine gziuu nzian gayoo guietxtil, ni ygaad ncuaañ co yгаа zho tiblë wingaw tib tib zho.

⁸ Dzigo pquiab Ndrës, bets Pedr, stib zha ne nacgza no; rëb Ndrës:

⁹ —Nu zo tib mëëdbgui win ney gaay guietxtil cebad ni schop me l win. çPer pa yгаа ncuaañ co lo grëtaa miech qui?

¹⁰ —Golnee lo zho dien —në me lo no—. Golguiab lo zho sob zho.

Ndzon zëëb guizh nguia ga, dzigo laa grë miech guizhiu co bzob lo guizh nguia co (zig gaay mil rgaa loxaque zha bguise).

¹¹ Dzigo bnaaz me gza guietxtil co, bdeed me xquizh lo Dios. Blozhse ga, zigs rneedz mew lo no scase scase rguiiz now lo grë miech co; scaque been me grop me l co. çGrëse miech co, dow zho zaatne bieltaa zho!

¹² Blozhse dow zho, nëchaa me lo no:

—çGoltsietop grëse mine biaan i, zeena nitloda!

¹³ Psilo no ptop no grë guietxtil ne biaan ga, zeene blozh bdopa, çlo gaay guietxtil cebad co, biodzë tsiipchop chicuid biow!

¹⁴ Zeene gon grë miech co milagr ro ne been Jesús ga, rneechaa zho:

—iNe nlipagaa, lëë men qui ga quiambiaaz ne! çMe nac Men ne zëëble diidz ga cxeel Dios lo guidzliu guiadteed xtiidz me!

¹⁵ Bienga Jesús racladz zho, zhoo tsienie zho me gac me zhirey zho, nacne bzoquia me guic gui win co, tipse me.

Rzë Jesús lo nis

(Mt. 14:22-27; Mr. 6:45-52)

¹⁶ Rguetsle liuw, bzhiuxto no dan bdziñ no ro nisdoo co; ga bliiaz no me.

¹⁷ Bdzionse no choot rlansod ni laa liu rcowraa, dzigo mazd laa no bziaab len canó, laa no zio nëz Capernaum.

¹⁸ Laa no zionie canó co lo nis, tibaque zeene psilo rrieë me, ntseeb riasoli lo nis co.

¹⁹ Maase gaay kilómetro o xoopgaaw goc zio no, tibaque zeene bdzion no laa me ziaad-zë lo nis co, gaxle lo no ga. Zeene bdzion no sca ziaad-zë me lo nis, bdzieëb no.

²⁰ Dzigo bnee me, në me lo no:

—çGdziebde to! çNaa zial nu!

²¹ Dzigoraa rley no bdzion no laa me bzëëb len barcw; tibaque zeene bien no laa no brieequiale zaatne no gdziñ no ga.

²² Biini liu co, grë miech ne biaan stib nëz ro nis co, laa zho bdziñ zaatne nac ro nis ga, quiambëz zho gan zhō me. Sac gon zho tibaque barcw zo ga, ni zeene wbii no ga, loxaque nose wbii.

²³ Gax zaatne bguiaan me zho ga, ga bdziñ bla barcw ne ziaad nëz Tiberias;

²⁴ dzigo gonse zho niicle me niicle no ne nac no xpëëdsuel me, choot guiend ga, nacne bzëëbaque zho len barcw ne bdziñ ga ziaad zho nëz Capernaum.

Jesús nac men ne rdeed guielmban

²⁵ Zeene blanso zho Capernaum, laa Jesús zole lo no ga; dzigo rëbchaa zho lo me:

—Maestro, çpa horzhe waa blanso luu nu?

²⁶ Dzigo rëbchaa me:

—¿Naa lëë ziaadguib to? Per ziaate to porne rien to cho nac naa, sinque laa to ziaad porne gon to bnedz naa ncuaañe pquiu to.

²⁷ ¡Golguien, tsienied guic to loxaque ncuaañe gowse to, sac znuse rnitlo grë ncuaañ co! Sinque, goltsoxco golgun mine racladz Dios, zeena ygaa to tib guielmban ne ib gdzind dze lozh. Ni naa ne nac naa Mgui ne pxeel me, naa gneedz guielmban co lo to; sac ible min co pxeel me naa.

²⁸ Dzigo bnabdiidz zho lo me, rëb zho:

—¿Zha dzigo dziuun no mine racladz Dios? ¿Pe nac ncuaañe dziuun no?

²⁹ Pquiab me rëb me:

—Mine racladz Dios gun to: gliladz to cho nac men ne pxeel me.

³⁰ —Telne scaw —rëb zho—, none dzianlo no gun luu nzian milagr, zeena gliladz no luu. ¡Nligaa peet milagr nroob gard dzian no gun luu!

³¹ Tel grë pxozgol ne, zeene wban zho grë dan bidz co padzeela, gzobse dze biet tiblo guietxtil zhan gbaa, dow zho; rnee lo Xtiidz Dios: “Moisés rdeed guietxtil co lo zho.”

³² Pquiab me rëb me:

—Golgacnañ ganle led Moisésd bdeed guietxtil co, sinque Pxoz naaw. Ni niina gon laa me quianeedz merpaa guietxtil gbaa lo to.

³³ Sac gon, me pxeel men ne biet gbaa ziaddeed guielmban lo grë miech rii; men co nac guietxtil gbaa co.

³⁴ —Been tib guielnzaac sca —rëb zho—, ¡gzataa dze bneedz guietxtil co dioow no!

³⁵ Pquiab me rëb me:

—Naa gon nac guietxtil ne rdeed guielmban ga. Grëse zha ne gbig lo naa sëëb zho xnëz naa, gdzindraa dze ne ycaabedz zho; grëse zha ne gliladz cho nac naa, gdzindraa dze ne gnab zhis zho.

³⁶ Laa to gon, zigne bnelegaa naa lo to ga, ¡niicle ran to naa, per rliladzde to cho nac naa!

³⁷ Grëse zha ne rxeel Pxoz naa, rlanso lo naa; ni tib zho ctsireed naa.

³⁸ Sac gon, laa naa bieet gbaa zialgun naa mine racladz Pxoz naa (men ne pxeel naa); bieete naa par gun naa mine gacladztaa naa.

³⁹ Ni mine racladz me, grëse zha ne bneedz me lo naa, ni tib zho nitlod, sinque cueeban naa zho gal dze ne laa guidzliu nitlo.

⁴⁰ Sac racladz me: grëse zha ne gbig lo naa ni gliladz zho naa dib zdoo zho, grëse zho ygaa tib guielmban ne ib gdzind dze lozh, ni cueeban naa zho gal dze ne nitlo guidzliu.

⁴¹ Dzigo psilo grë zha Israel rneenë zho me, loxaque ne rëb me, me nac guietxtil ne biet gbaa;

⁴² rnee zho:

—Men rii ga name rnee zho Jesús, me nac xingan José. Rdziuunbey ne xniaa me, rdziuunbey ne pxoz me. ¿Zha nac dzigo ne rnee me gbaa biet me?

⁴³ Dzigo rëbchaa me lo zho:

—Lëëwga na, golsioog ro to. Nodne squitaa gzee zdoo to min co.

⁴⁴ Laa Pxoz naa pxeel naa zial naa lo guidzliu, per ni tib miech gon grielod gbig lo naa telne niaca mine cuedzd me zho; ni zig rnele naa ga, zha ne gbig, naa cueeban zho gal dze ne laa guidzliu nitlo.

⁴⁵ Znu rnee lo Xtiidz Dios, zaatne pquiaa grë zha ne biadteed xtiidz me padzeela, rneew: “Laa Dios cseed grëse miech.” Ni lëë min co rac niina; gacxe nagon waa, grëse zha ne rquiaadiag mine rnee Pxoz naa ni rseed zhow, grëse zha co lo naa rlanso zho.

46 Zha ne rlanso lo naa, guiabde to togo gonlo zho me; ni tib choot gard gan me, naase nac men ne ziyan me, sac zaatne no me ga brie naa zial naa lo to.

47 Golliladz mine gni naa lo to nu sca: ¡Grëse zha ne dib zdoo zho gliladz zho cho nac naa, zgaa zho tib guielmban ne gdzindraa dze lozh!

48 Ne nligaa naa nac guietxtil ne rdeed guielmban ga.

49 Grë pxozgol to, zeene sca bio zho grë dan bidz co, nli dow zho guietxtil ne biet gbaa ga, per bdeetew guielmban lo zho, sac grëse zho gut.

50 Sangue guietxtil ne rne naa lo to, gbaa bieta ni grëse zha ne yquiina zgaa zho tib guielmban ne gdzind dze lozh.

51 Xcuerp naa nac guietxtil ne biet gbaa, mine rdeed guielmban ga; grëse zha ne gow guietxtil co, zgaa zho tib guielmban ne gdzind dze lozh. Lëew gded naa zeena grieeo yгаа grëse miech lo guidzliu rii stib guielmban.

52 Psilo grë zha Israel co stib, quianeelsa zho, rnee zho:

—¿Zha nacne squi rnee men qui? ¡Zootne rnee me none dioow ne xcuerp me!

53 —Gneli naa lo to ganle —rëb me—, telne gowde to xcuerp Mgui ne pxeel Dios, ni guiede to xchen me, ygaade to stib guielmban co.

54 Sangue zha ne gow xcuerp naa, ni guie zho xchen naa, ib zgaa zho guielmban ndzon ne gdzind dze lozh ga, ni naa cueeban zho gal dze ne laa guidzliu nitlo;

55 sac xcuerp naa nac mine mazdraa rquiin gow miech, ni xchen naa nac mine mazdraa rquiin guie zho.

56 Grëse zha ne row xcuerp naa, ni rie zho xchen naa, mbannie zho naa, niiclegaa naaw mbannie naa zho.

57 Men mban nac Pxoza naa, men ne pxeel naa, me nac men rneedz guielmban lo naa; ni scaquegaa zha ne gow xcuerp naa, naa gded guielmban lo zho.

58 Naa nac guietxtil ne nliپaa biet gbaa. Grëse zha ne gow guietxtil rii, zgaa zho guielmban; led yed zho guet zig gut grë pxozgol to, zha ne sca dow guietxtil co.

59 Lëë grë min rii bnee Jesús zeene pseed me miech len yadoo win ne zob Capernaum.

Diidz ne rdeed guielmban

60 Nzian grë zha ne rzënie Jesús, zeene bin zho grë mine bnee me ga, rneechaa zho:

—Zha ngandoxtaa nac grë diidz ne rnee me i. ¡Cho gnë dien pe bnee me!

61 Bien Jesús sca nonee zho, dzigo rëbchaa me lo zho:

—¿Pe rlëë guic to bin to mine rne naa ga?

62 ¿Pe guiabzhe to dzigo zeene gan to laa Mgui ne pxeel Dios soquia gbaa, gbiire guey me zaatne no me glo?

63 Espiritu Sant rneedz guielmban lo to, telne guiend espíritu peet nond xcuerp to, sac bëelse naca. Ni grë diidz ne bne naa lo to, lëew nac Espiritu, ni lëew gneedz tib guielmban ne gdzind dze lozh lo to;

64 sinque to, bii no zla to riladzd cho nac naa.

Sca rëb me sac desde psilo bzënie zho me, rienle me cho nac zha ne ib riladzd me, ni cho nac zha ne tsieto me.

65 —Runbey naa to —rëb me—, gane ni naa lo to ni tib miech grieelod gbig lo naa sëëb zho xnëz naa, telne niaca mine cuedzd Pxoza naa zho.

66 Nzian zha ne rzënie me, hor co laa zho bzozit lo me, bzënedraa zho me.

67 Dzigo bnee me lo no gza tsiipchop no ne nac no xpëëdscuel me, në me:

—To waa, ¿pe led yede to racladz gbiche lo naa?

68 Pquiab Simón Pedr, rëb Simón:

—¿Per cho lora nadien guio no? Luuse nac men ne rseed miech diidz ndzon ne rdeed guielmban ne gdziind dze lozh.

69 Laa no bliladzle cho nac luu, laa no gocndionle ne luu nac Men Ndzon ne pxeel Dios.

70 —Nliw —rëb me—, ni naa bzooblo to gza tsiipchop to, per na gon laa tib to bzëëble xnëz menodox.

71 Zeene sca rëb me, lëële Judas ga bzeet me (zhin Simón Iscariot); sac ye Judas nacgza no lo tsiipchop no ne bzooblo me ga, ni Judas nac zha ne güeyto me.

7

Rliladzd menlidz Jesús cho nac me

1 Bded ga, loxaque grë guiedz ne ndxie xtan zha Galilé, gase rieted Jesús. Sac grë zha Israel ne no xtan zha Judé, zha ne rlëë lo me, racladz zho gut zho me.

2 Laa zeene bdziñ dze ne run zha Israel lni ne rzhixcuaa zho grë yu guizh, ni rbëz zho lena;

3 rëbchaa zha bets me lo me:

—¿Pe nacne ib rrieed luu nu? Brie zho, güey dib xtan zha Judé, zeena ye grë zha ne racnie luu ga gan grëtaa ncuaane run luu.

4 Sac gon, zha ne racladz gunbeyraa miech zho, grë ncuaane rac zho, run d zhow ngeets zhliaan zigne run luu. Rac luu name run luu grë milagr nroob, beena zaatne gan nzian miecha.

5-6 Sca rnee zho lo me, sac niicle zha rliladzd cho nac me; dzigo rëbchaa me:

—Grielod ga naa niina, sac gard gdziñ dze co; zhaa nac to, zac tsie to zeene gacladztaa to.

7 Tel to, rlëënie miech to; sangue naa rlëënie zho naa, sac rne naa lo zho pe nac grë guielntseeb ne run zho.

8 Goltsie, tedse lni rii dzigo ga naa; sac gard gdziñ dze ne glu cho nac naa.

9 Dzigo laa me biaan ga.

10 Per loxaque brie zho zie zho, yeque me brie zie me; lëëraasi ngeetsse bdziñ me.

11 Grë zha Israel ne rlëë lo me, quiaguib zho me lo lni co.

—¿Bay yo men co? —rnee zho—. ¿Pe nacne ib choot gard dzian me?

12 Grë zha ne ndxie lo lni, loxaque me rzeet zho. No zho rnee: “Tib miech wen nac me”; nogaa zho rnee: “Pe miech wen na zho gac me, loxaque noquidie me miech.”

13 Per zhlianse rzodiidz zho rzeet zho me, sac rdzieb zho grë zha Israel ne rlëë lo me.

14 Goc chop tson ngbidz ne noyac lni, tibaque zeene laa me bzëëb len yadoo nroob ne zob lad guiedz ga, psilo me pseed me grë zha Israel ne no len yadoo ga.

15 Zeene gon zho zha rseed me, rzee zdoo zho rnee zho:

—¿Zha nac squitaa rac men qui, ni laa me pseete me grë zhiwseed yadoo?

16 Pquiab me rëb me:

—Led naad nobeebey grë mine quiaseed naa miech, sinque laa naa quiaseed zho mine rnabey men ne pxeel naa.

17 Telne yquiabladz to gon to mine rnabey me, ga guien to dien pe nli xtiidz Dios rseed naa miech, te mine riab guic naaw ye.

18 Sac grë zha ne rnee grë mine riab guicse zho, laa zho runa zeena gacnziiu zho lo miech; sangue zha ne rioxco glu ne non men ne pxeel zho, zha cosi niapse diidzli rnee zho, rund zho ne yquidie zho miech.

19 Laa Moisés psan ley lo to, per, jni tib to gon zienald mine rnabeya! ¿Pe nac dzigo racladz to gut to naa?

20 Pquiab be grë miech co, rëb zho:

—jMendzable i gon noguitnie guic luu! ¿Chozhe racladz gut luu?

21 Rëbchaa me:

—Tib vuel, loxaque gon to beenguiac naa tib men rzacne dze ne rdziiladz to lo dziin, na grëga to squitaa rac lo naa.

22 Ni to gon, no hor par gon to mine rnabey ley run to dziin dze co; zig nac zeene rio tib mëed bey (niicle ne rirole pxozgol to bey co, zeene laa ley biaan).

23 jGase na ganle golwi! Rquia to rgo to tib mëed bey haxta dze ne rdziiladz to lo dziin, loxaque par quiitsde to xley Moisés. ¿Pe nac dzigo ne rlëe to lo naa loxaque ne beenguiac naa tib miech dze co?

24 Golguien ganle, nonguield ne lega gdziibdol to tib miech. Goltsoxco goltsenal mine nac diidzli.

¿Cho nac Jesús?

25 Blalaa men Jerusalén ndxie ga, dzigo psilo zho rnabdiidzlsa zho rnee zho:

—¿Pe led men riid ga zho scataa quiaguib zho gut zho?

26 Pa zotaa me gon quianee me lo grë miech qui, ni choot peet rund me. ¿Pe goon bliladzle zhiwxtis ne naye ne me nac Men ne zëëble diidz ga guiaad lo guidzliu?

27 Per gacda men qui. Tel men quiw, rdziuunbey ne me, ndion ne cho zha nac me; sangue Men ne zëëble diidz guiaad ga, zeene gal dze ne laa me guiaad, choot gacnand dien cho zha me.

28 Bin Jesús sca nonee zho. Squi ndxie grë zha ne noquiaadiag zhiwseed me len yadoo ga, nguiedz bnee me rëbchaa me:

—Ah, conque runbey to naa dzigo, jnan to pa nëz zial naa! Per led zhaald naa gon zial naa, no tib men ne pxeel naa per runbeyde to me; men co nac men ne rnee niapse diidzli.

29 Sangue naa runbey naa me, sac lo me brie naa, me pxeel naa zial naa lo to.

30 Dzigo gocladz zho naaz zho me ga, per ni tib zho wbigd nzhen zho me; sac gard gal dze co.

31 Grë zha ne ndxie ga, ndal zho bliladz me.

—Telne led med nac Crist —rnee zho—, niacxe zun me grëtaa milagr nroob ne run me. jTsodraa zha ne gun grëtaa milagr ne run me!

32 Bin zha farisé nozeet grë miech co Jesús, dzigo bnediidzaque zho grë zho pxoz ne rnabey, pxeel zho bla zhaguiib zie zienaaz me.

33 Bdzin grë zhaguiib co, rëbchaa me lo zho:

—jGolxecw zniip! Zhile dze ne cuëz naa lo to; ib laa naa none gbiire guia naa lo men ne pxeel naa.

34 Zguib to naa, per gdzieldraa to naa, ni grielod gdzin to zaatne guia naa.

35 Grë zha ne ndxie ga, zeene bin zho sca rëb me, rzee zdoo zho.

—¿Pa nac zhe zaatne tsie me? —rnee zho—. ¿Zha nacne ib gdziel ne me? Nend grë zha ladz ne tsieseed me, grë zha ne no stib ladz ben.

36 ¿Zha nacne rnee me, zguib ne me per gdziel me lo ne, niicle grieelodgaa guio ne zaatne gey me?

Nis ne rdeed guieḷmban

³⁷ Zeene goḷ dze ne laa lni co lozh (dze co nac dze ne mazdraa nroob), miech guizhiu ne ndxie; dzigo nguiedz bnee Jesús lo grē miech co, rēb me:

—Grēse zha ne racladz guiaanwen zdo, rzac zho zig nac zeene r nab zhis zho, guiaad zho lo naa, naa gded nis ne guie zho.

³⁸ Sac grēse zha ne dib zdo gliladz cho nac naa, rnee lo Xtiidz Dios, masaque rreeequia tib nis ndzon ne gdzib zdo zho, pale tib guiubee nroob; nis co gdeed tib guieḷmban cub lo zho.

³⁹ Sca bzeet Jesús Espiritu Sant. Ga bzeet me, grēse zha ne gliladz cho nac me zacnie Espiritu Sant zho. Gard guiaad Espiritu Sant len dze co, sac gard gbire Jesús lo guieḷndzon ne no me gbaa hor co.

⁴⁰ Blalaa zha ne ndxie ga, zeene bin zho sca bnee me, rneechaa zho:

—Ne nlipagaa, lēē meḷ qui ga no guiaad antes ne glanso Meḷ ne nacle diidz cxeel Dios ga.

⁴¹ Rreeequia zla zha ne rnee:

—ḷLēda! ḷLēgagh me i! Meḷ qui nac Meḷ ne zēēble diidz ga cxeel Dios guiaad lo guidzliu.

Rquiab zla zha ne rnee:

—Meḷ Galilé nac meḷ qui. ¿Niacxe lo xti grē zha co greeequia Meḷ ne cxeel Dios ga?

⁴² Pe led rnee lo Xtiidz Dios lo xti rey David, ga greeequia me ni Belén ga gal me, zaatne gocaque ladz rey David.

⁴³ Zhaase zhaase rnee zho; leḷ psilo zho nodiḷdiidz zho dien cho nac me.

⁴⁴ Breeequia bla zho gocladz naaz me, per ni tib zho wbigd nzheḷ zho me.

⁴⁵ Grē zhaguiib ne zienaaz me ga, scase zho laa zho bdziḷ. Zeene goḷ grē pxoz rnabey co, grē zha farisé co choot bdziḷnied zho, rēbchaa zho:

—¿Pe nac dzigo ne ziaadniede to me?

⁴⁶ Pquiab zho rēb zho:

—ḷWaltaa gard dzian no tib meḷ ne scataa ndzon rnee!

⁴⁷ Rēbchaa zha farisé:

—ḷPe nlipaa rnee to! ¿Yelaque to dzigo beengüet me?

⁴⁸ ¿Pe rwide to, niicle zhiwxtis new, niicle now, ni tib choot riladzd ne me nac Meḷ ne zēēble diidz cxeel Dios ga?

⁴⁹ Grē zha nxen ne riladz ne nli Dios pxeeḷ me, ḷmiech ndziibdeele nac zho, sac goḷ rienḷ zho zha rnee lo ley!

⁵⁰ Ga zob Nicodem, meḷ ne güeyzodiidznie Jesús ga glo, ye me nacgza grē zha rnabey co, dzigo guso me bnee me lo zho, rēb me:

⁵¹ —Goḷguien ganle nonguiēda ne lega pe gnee ne. Sac goḷ, zig nac xley ne, rnabeya none gacndiongagh ne zha nac xtiidz tib miech, dien pe nac miḷe quiayun zho, dzigoraac gac guieḷwxtis.

⁵² Pquiab zho rēb zho:

—¿Zootne ye luu lēē nacgza grē zha Galilé ne rleynie me? ḷGrē zha ne cxeel Dios, ni tib zho greeequiad Galilé! ḷLuuzhal bguiba lo grē guits ne ziaad Xtiidz Dios ganle, zeena gliladz luu!

⁵³ Blozh ga, grēse zho laa zho wbi, tib tib zho zeyse zho lidz zho.

8

Tib wnaa ro nēz

¹ Ga brie Jesús güey me zaatne rnee zho Gui Oliv.

² Zeene biini liu co, silgaw laa me bdziñ leñ yadoo co stib. Nzian miech ne goclo lo me ga, nacne bzob me psilo me pseed me zho.

³ Laa me noseed grë miech co, zeene bdziñ bla maistr ley, ni zla zha farisé, bdziñnie zho tib wnaa ne nole tsieel ni bgaanie me stib mgui; dzigo bzo zho wnaa co glowtaa lo grë miech ne ndxie ga.

⁴ —Maestro —rëb zho lo Jesús—, laa wnaa rii bgaa nonie me stib mgui.

⁵ ¿Pe gnë luu dien zha gac me? Sac zig nac ley ne psan Moisés, rnabeya gdeedquie no grë wnaa ne squi nac, haxta guet zho.

⁶ Sca rëb zho, sac laa zho quiaguib dien zha cxin me tib diidz, zeena sca grielo tsiezo zho me lo wxtis. Per zeene bin me sca rëb zho pquiitsrunga me liu, psilo me con mzhugnia me noquiaa me lo liu.

⁷ Ran zho rquiabd me, wbiire zho bnabdiidz zho lo me stib; haxta blis lo me, rëb me lo zho:

—Peet nacda, goldeedquie me. ¡Lëëraasi, zha ne rien ni tib dol rapd, zha co csilo gdeedquie me!

⁸ Blozh ga biire pquiitsrun me, psilo me stib noquiaa me lo liu.

⁹ Zeene bin zho sca rëb me, mazd mine been zho laa zho brie ga, sac bien zho miech ngoopdol nac zho. Zha ne nacpaa zha gol lo zho bner, blozh ga zo zo brie zho grë zho; loxaque wnaa cose biaan ga.

¹⁰ Dzigo bzoli me, rëb me lo wnaa co:

—¿Yo grë zha ne scataa biaad-zo luu nu? ¿Ni tib zho lëë beenquizhd luu xtol luu?

¹¹ —Ni tib zho —rëb wnaa co.

—Niicle naa —rëb Jesús—, gunquizhd naa luu xtol luu. Bzë, per bien gbiiredraa luu gun luu grë ncuaañe gunctal xtol luu.

Jesús nac zig tib biini

¹² Bded ga, tib dze nonee Jesús lo grë zha ne noquiaadiag zhiwseed me, rëb me lo zho:

—Nac naa zig nac tib biini ne rziini lo miech. Grëse zha ne gbig lo naa, led yed zho sorieñ ni lo ncow, sac naa gziini lo zho zeena ygaa zho tib guieñmban ndzon.

¹³ Zeene bin zha farisé sca rëb me, psilo zho nguiedz roptsie zho rnee zho:

—¿Cho gliladz xtiidz luu! ¡Lëëque luu rnee cho nac luu!

¹⁴ Pquiab me rëb me:

—Niicle ne naaque rne dien cho nac naa, per diidzli nac mine rne naa. Rien naa pa nëz zial naa, pa nëzga za naa; sangue to gon peet riende to,

¹⁵ gacxe waa, rcaadzol to naa ncuaañe ni nacd naa; ncuaañe rcaadzol to naa, niapse guic to riaba. Tel naa, zig nac niina noyund naa guieñwxtis

¹⁶ per zeene gdziñ dze co, tib tib miech mine been zho min co glu dien pe nac mine tsieguañ zho; sac Pxoz naa meñ ne nacie naa, me gnë zha gun naa guieñwxtis.

¹⁷ ¿Pe nacne rliladzde to mine rne naa? Led rnee lo xley to zeene tipse rzë xtiidz chop miech, ga rlu ne diidzli rnee zho.

¹⁸ Zig nac niina, naa nac tib zha ne rne cho nac naa, laa stib zho nac Pxoz naa meñ ne pxeñ naa; sac gon ye me rnee ganle cho nac naa.

¹⁹ Pquiab zho rëb zho:

—¿Yo Pxoz luu na? ¿Pa no me?

—Runbeyde to me —rëb Jesús—, sac niicle naa runbeyde to naa. Telne niaca mine runbey to naa, runbeyle to me na.

²⁰ Gax zaatne riesañ miech gon leñ yadoo nroob ne zob lad guiedz Jerusalén, ga zob Jesús zeene sca rëb me; per choot bnaazd me, sac gard gal dze co.

Griee lod gdziṅ to zaatne guia naa

21 Bded ga, biire Jesús rëb me:

—Laa naa guia nagon. Squiaguib to naa, per lëëque lo xtoḷ to i nitlo to, sac zaatne guia naa griee lod gdziṅ to ga.

22 Grë zha Israel ne ndxie lo me ga, rnee chaa zho:

—¿Pe goon lëëque me naye gut me? Zha nacne squi rnee me goon griee lod gdziṅ ne zaatne guey me.

23 —Tel to —rëb me—, zha nëz lo guidzliu nac to; laa naa gon zha nëz gbaa nac naa. Men guidzliu rii nac to, sangue naa nacd naa zha guidzliu rii.

24 Gane ni naa lo to lëëque lo xtoḷ to i nitlo to. Ne nligaa, telne gliladzde to ne naa nac men ne nac naa, ible lëëque lo xtoḷ to nitlo to.

25 —¿Cho dzigo nac luu? —rëb zho.

Rëb chaa me:

—Blactaale rne naaw lo to. Haxta zeene psilo naa xtsin naa, laa naa rne lo to ganle cho nac naa.

26 Ndal grë ncuane zac glisqui naa lo to nu niina, ni ndal ncuane racladz naa gne naa lo to, per laa naa noyun mine rnabeyse men ne pxeel naa; ni men co nac men ne rnee diidzli.

27 Per ib rienḍ zho ne Dios ga rzeet me lo zho.

28 Dzigo bnee me lo zho stib, rëb me:

—Nieeda gal dze ne yquiaa to naa tib lo yag, dze co gunbey to ganle ne naa nac Mgui ne pxeel Dios ga, dze co guien to ganle led guicd naa riab grë mine quiaayun naa; sinque mine pseed me naa, min co rne naa lo to.

29 Dios pxeel naa ni tibaque nacnie me naa, ib rsaand me naa, sac tibaque noxco naa run naa mine rdziladz me.

Zha ne nac xpëd Dios

30 Grë zha Israel ne ndxie ga, zeene bin zho sca rëb me, bliladz zho ne me nac men ne no cxeel Dios ga.

31 Dzigo bnee me lo zho, rëb me:

—Telne racladz to gac to xpëdscuel naa, zha ne nlipaa ygab xnëz naa, none guiaadnal to grëse zhiwseed naa.

32 Sac sca gunbey to mine nacpaa diidzli, ni lëew glu lo to zha laa to ne squi nac to zig tib ngundziin.

33 Pquiab zho rëb zho:

—¿Ngundziin ye! ¡Tel no, zha xtiipaa Abraham nac no, waltaa gard gac no ngundziin lo miech! ¿Pe lo dzigo laa no, ne rnee luu laa xtiidz luu csilaa no?

34 Dzigo rëb chaa me:

—Golquiaadiaga ganle: zha ne tibaque noyunctal xtoḷ, rrieequiacxe waa tib ngundziin nac zho lo dol ga, sac lëew rnabey zho.

35 Ni zha ne nac ngundziin lëë, zig run miech nëz rii, griee lod xoon zho lo men ne rree zho; sangue zha ne nac mëed, choot lo ngadood zho.

36 Gacxe waa, tel csilaa Xpëd Dios to, dzigosi choot lo ngadoodraa to.

37 Nli lo xtii Abraham ziaad to; per laa to quia gon quiaaguib to dien zha gut to naa, sac racladzde to yquiaadiag to zhiwseed naa.

38 Laa naa rne grë mine blu PxoZ naa lo naa, zeene no naa lo me; sangue to gon, laa to zienal mine rnabey men ne nac pxoz to.

39 Pquiab zho rëb zho:

—¡Ni Abraham gon nac pxoz no!

—¡Nlid ga nagon! —rëb me lo zho—. Telne niaca mine nli zhinpaa Abraham nac to, zun to grë mine been me.

40 Per na gon leḷ racladz to gut to naa, loxaque ne rseed naa to miṇe nac diidzli, miṇe blu Dios lo naa. ḷTel Abraham led squid been Abraham!

41 Ni lalnu zienalde to miṇe been Abraham, sinque laa to noyuu miṇe run zha ne nlipaa nac pxoz to.

Pquiab zho rēb zho:

—ḷLed-xe mēēd ro nēzd no waa! Tibaque meṇ ne nac pxoz no, ni lēē meṇ co nac Dios.

42 Dzigo rēbchaa me lo zho:

—Telne niaca miṇe nli zhin Dios nac to, nleynie to naa, sac gon lo me brie naa ziaḷ naa lo to nu. Led zhaald naa ziaḷ naa, me nac meṇ ne pxeel naa.

43 Ib riogicde to zha nac grē miṇe rne naa, ib riende tow, sacne ib nēde to yquiaadiag tow.

44 Golgacnaṇ sca ganle, lēē pxoz to ga gon nac mēdox, lo ma ngab to, gacxe waa rdziladz to run to grē ncuaaṇe run ma. Tel mēdox, haxta zeēne biaan guidzliu tibaque nonitlo ma miech, ni ib rneed ma miṇe nac diidzli, sac ib naṇd ma zha nac diidzli. Ible lēē xtsiṇ ma ga nac guielwquidie, gacxe waa ma nac pxoz zha ne rquidie.

45 ḷMiṇ co nagon, niicle diidzli nac grē miṇe rne naa lo to, per ib rliladzde tow!

46 Ni tib to choot grieelod gnē laa naa noquidie, sac niapse diidzli rne naa. ḷPe nac dzigo rliladzde to miṇe rne naa?

47 Grēse zha ne nlipaa ngab xnēz Dios, rley zho rquiaadiag zho xtiidz Dios; per to gon led xnēzd me ngab to, gacxe waa nēde to yquiaadiag tow.

48 Horco pquiab zho rēb zho lo me:

—ḷPsoog ro luu meṇ Samar ngoopdoḷ! ḷNlique miṇe rnee no ga nagon, ne mēdox noguitnie luu!

49 —Choot mēndzab noguitnied naa —rēb Jesús—, sinque laa naa noxco xoobnen ganle pa lotaa meṇ nroob nac Pxoḷ naa; laa to gon leḷ rsanwin to naa.

50 Noguibd naa dien zha guiaan non naa, per Dios gon racladz me ne sca gaca; ni mesi naṇ me pe run me.

51 Gneli naa lo to ganle: ḷGrēse zha ne gzoob xtidz naa, gdziṇd dze ne guet zho!

52 Pquiab zho rēb zho:

—ḷPer nlique nagon mēdox noguitnie luu! Zig nac Abraham name gut me, grē zha ne biadteed xtiidz Dios ne, grēse zho gut zho. ḷZha nac dzigo rnee luu, zha ne gzoob xtiidz luu, gdziṇd dze guet zho?

53 ḷPe mazdraa dzigo nac luu lo pxozgol ne Abraham, lo grēгаа zha ne biadteed xtiidz Dios ga? ḷCho rzac luu nac luu?

54 Rēbchaa me:

—Telne lēēque naa noyuu non naa, nlid miṇe rne naa dzigo. Per na gon, Pxoḷ naa, meṇ ne nac Dios ne rnee to rliladz to, me rlu ganle ne nli meṇ non nac naa.

55 Tel naa runbey naa me, ni run naa miṇe rnabey me; sanḷue to gon, nlid runbey to me. Tel gni naa runbeyd naa me, yeḷe naa ga dzigo noquidie zigne rquidie to.

56 Pxoḷgol to Abraham, bley me zeēne gocnaṇ me laa naa znu guaḷ lo guidzliu ri. Ni zeēne bdeed Dios diidz gon me naa, mazdraa bley me.

57 Zeēne bin zho sca rēb me, rēbchaa zho:

—ḷGon luu Abraham ye? ḷNi chooptsii iz name rapd luu! ḷZha dzigo gon luu Abraham!

58 —Gneli naa lo to ganle —rëb me—, notaque naa; nole naa zeene gol Abraham.

59 Horco ptop zho quie laa zho gdeedquie me, per znuse bded me lad zho brie me len yadoo, gonndraa zho me.

9

Biac tib mgui ne rold lo

1 Zieded Jesús tib lugar co, gon me tib mgui ne rcow lo, scale nac lo men co zeene gol me.

2 Dzigo bnabdiidz xpëedsuel Jesús rëb zho:

—Maestro, ¿bay zha nacne squi golnie men qui guieñe qui? ¿Pe no pe xtol mew, te xtol xmenjol mew ye?

3 —Lëda —rëb Jesús—, led por xtold zhow; sinque squi gol me, zeena zeene laa me guiac, ga gan miech ganle zha nactaa grë ncuane run Dios.

4 Zhile laa liu ycow. None dzioxco ne dziuun ne xtsiin men ne pxeel naa laga nasraa bii zob ngbidz, sac deque ycow liu choot grielodraa gun dziin.

5 Laga bii no naa lo guidzliu rii, naa nac zig tib biini ne rziini lo grë miech rii.

6 Blozhse sca bnee me, ptsuc me lo liu, bzhixcuaa me niip ben, dzigo bdëeb mew zhits guidlo mgui ne rcow lo ga;

7 blozh ga, rëbchaa me:

—Güey na, güeytiib lo luu ro pil Siloé.

(Siloé nac zig nacne rnee ne Pxeel zho zho.)

Dzigo güey mgui co güeytiib me lo me, zeene laa me wbire laa me ranle.

8 Grë zha ne no gax zaatne no me, ni grë zha ne runbey me; zeene gon zho me, rneechaa zho:

—¿Mgui rii ga lëe rzob gdib i rnab gon?

9 No zho rnee mew, nogaa zho rnee led meda.

—Squidaa rlu me —rnee zho—, per led med i.

Nacne pquiab me mezhall rëb lo zho:

—Naaw, naa nac mgui co.

10 Dzigo bnabdiidz zho zha biac lo me. Rëbchaa me:

11 —Men ne rnee zho lë Jesús, men co bzhixcuaa niip ben dzigo bdëeb mew zhits guidlo naa, blozh ga pxeel me naa biatiib naa lo naa ro pil Siloé; zeene laa naa wbire laa lo naa biacle.

12 —¿Yo men co niina na? —rëb zho.

—Dieenda —rëb me—, nand naa dien yo me.

13 Dzigo güey zho güeynie zho me lo grë zha ne nac zha farisé;

14 sac lëetse dze ne rdziiladz zho lo dziin, lëetse dze co sca beenguiaac Jesús lo me.

15 Grë zha farisé co, biire zho bnabdiidz zho lo me dien zha biac me; dzigo bzodiidz me lo zho zha bdëeb Jesús niip ben lo me, blozh ga güeytiib me lo me, zeene laa me wbire laaw biacle.

16 Blalaa zha farisé ne ndxie ga, psilo zho rnee zho:

—Nlid ne Dios pxeel men co, gacxe waa niicle runbeydraa me pa dze nac dze nda.

Pquiab zla zho rnee:

—Tel cholze miech ngoopdol nac me, ¿niacxe zrieelo gun me grë milagr qui? Zhaase zhaase rnee zho.

17 Dzigo wbiire zho bnabdiidz zho lo me, rëb zho:

—Luu waa, ¿cho rzac luu nac men ne beenguiaac lo luu ga?

Pquiab me rëb me:

—Ible Dios pxeel me. Tib men ne ziadteed xtiidz Dios lo miech nac me.

18 Per ib rliadzd grë zha wxtis co ne biac lo me, sac rliadzd zho ne rold lo me glo; dzigo bnabey zho gocredz pxoz me, gocredz xniaa me.

19 Bdzin grop mengol co, rëbchaa zho:

—¿Pe nli xpëed to nac men rii? ¿Pe nli na rold lo me zeene gol me? Tel nli rold lo me, ¿zha biac lo me ne laa me ran niina?

20 —Nli xpëed no nac me —rëb grop mengol co—. Ni nli rold lo me zeene gol me;

21 per ndiond no dien zha biaca ne laa me ran niina, niicle ndiondgaa no dien pe no cho beenguiaca. Benque zha gol-le nac me, mazd lo me golnabdiidz, mezhal gnë dien zha biac lo me.

22-23 Sca rëb grop mengol co, sac rdzieb zho grieë zho xyadoo zho. Biaanle grë zha rnabey co diidz: zha ne guiab Jesús nac Men ne zëëble diidz ga cxeel Dios lo guidzliu; csaandraa zho sëëb zho yadoo.

24 Wbiire zho bredz zho men ne biac lo ga, rëb zho:

—Bien ganle Dios zobwi, bnë diidzli lo no; sac tel no ndion no cholze miech ngoopdol nac men co.

25 —Dieenda —rëb me—. Nand naa dien pe miech ngoopdol nac me, te men wena ye. Per me gon beenguiac lo naa, sac rold lo naa glo.

26 Dzigo biire zho bnabdiidz zho stib dien zha beenguiac Jesús lo me.

27 Pquiab me rëb me:

—Ledaaw nile naa lo to, per ib rliadzde tow. ¿Zha nac dzigo ne racladz to gonaque tow stib? ¿Te racladz to ye, ye to sëëb xnëz me?

28 Dzigo psilo zho ndox zho lo me, rëb zho:

—Luuzhe tel xnëz me no luu, sangue tel no zhiwseed Moisés, min co zional no.

29 Sac tel Moisés, ndion no nli Dios pxeel Moisés, per mgui co ni ndiond no dien pa brieë me.

30 Pquiab me rëb me:

—iNcuaane gzeegaa zdoo ne i runbeydaque to cho nac me, ni ron to me beenguiac lo naa!

31 Ndion ne ganle rquiaadiagd Dios xtiidz cholze miech ngoopdol, sinque laa me rquiaadiag xtiidz zha ne rien ne nli men nroob nac me, ni run zho mine rnabey me.

32 Stiba, waltaa gard dzion ne cho zha beenguiac lo tib miech ne znu gol rold lo.

33 Telne niaca mine nacnied Dios men co, nriee lod me niunguiac me lo naa.

34 —iPsioog ro luu! —rëb zho lo me—. ¡Ib racladzd no guiaad tib ngoopdol nu guidseed no!

Horco wbig zho, blee zho me ga.

Zha ne rold lo

35 Bin Jesús sca blee zho me ga, dzigo zeene bdzieel Jesús me, rëbchaa Jesús lo me:

—¿Pe rliadz luu men ne nac Xpëed Dios?

36 Pquiab me rëb me:

—Bzhiguiel bnë lo naa dien cho nac men co, zeena gliladz naa me.

37 —Gonle luu me —rëb Jesús—. Naa gon nac men co, lëë me nu nozodidznie luu niina.

38 Dzigo pquiitgzhib me lo Jesús, ni rëb me:

—Dib zdoo naa rliadz naa ne nli Xpëed Dios nac luu.

³⁹ Blozh ga rëbchaa Jesús:

—Laa naa zial lo guidzliu rii, zeena glu dien cho rap dol, dien chogaa rapd dol; sac zha ne rzac miech peet riend, laa zho tsaa biini; laa zha ne rzoob zho niini, laa xquielrien zho ycow, guiaan zho zig tib zha ne rold lo.

⁴⁰ Blalaa zha farisé zo ga, zeene bin zho sca rëb me, rëbchaa zho lo me:

—¿Rzë diidz qui na lëë ye lo no rold?

⁴¹ Dzigo pquiab me rëb me lo zho:

—Tel niaca mine nlipaa zha ne rold lo nac to, grieelod gni naa rap to dol. Per na, ne masaque rzac to rolraa lo to, gane grëse ncuane quiayun to xtol to noyaca, to zëëba.

10

Mëcwxiił ni zha ne rquianap ma

¹ Ni rëb Jesús:

—Golquiaadiaga ganle: grëse zha rded stib nëz zeene rzëëb zho len lidz mëcwxiił, laa ne ted zho nëz ro puert, gase rlu ngbaan ga nac zho;

² sac tel men ne noyan maw, nëz ro puert nëz co rzëëb me.

³ Zha ne rquianap ro lidz ma, ga rxal zho rded me; niicle magaaaw, zeene ron ma tsi me, grëse ma rdziñ lo me; dzigo rbedz me ma, rneelë me ma tib tib ma, laa me rbee ma ga.

⁴ Rlozhse rbee me grë ma ne nac xma me, laa me rner lo ma; grëse ma laa ma rnal zhits me sacne runbey ma tsi me.

⁵ Rienald ma zhits stib miech, zeene ran ma zho znuse rzhoon ma; sac runbeyd ma tsi zho.

⁶ Grë zha ne ndxie lo me ga, ib biend zho zha nac godiidz co;

⁷ dzigo wbiire me bnee me lo zho, rëb me:

—Golquiaadiaga ganle: Naa gon nac zig ro Puert, zaatne rded mëcwxiił ga.

⁸ Grëse zha ne biaad glo rnee zho zha nac Men ne nacle diidz cxeel Dios ga, grëse zha co ngbaan ga nac zho, loxaque psacsi zho par grielo cuan zho; ni grëse mëcwxiił ne nacpaa xpëcwxiił naa, güeyald ma zhits zho.

⁹ Sangue naa, laa naa nile lo to ganle: Naa nac zig ro Puert, zaatne rded mëcwxiił ga. Grëse zha ne gbig lo naa, zlaa zho, peet lo tsoxtseebdraa zho; pale grë mëcwxiił ne zozëëb zoríee ro lidz, ni rdziel ma guizh nguia, guizh ndzon row ma.

¹⁰ Zha ne nac ngbaan, zeene riaad zho loxaque rban zho ni rut zho; sangue naa, laa naa zial zeena yгаа to tib guielmban ne mazdraa ndzon, tib guielmban ne gdziñd dze lozh.

¹¹ Naa nac Baxtor ne nquialadzpaaw xpëcwxiił. Sac zha ne nquialadzpaaw xpëcwxiił, rquiad zdoo zho xquielmban zho, rsilaa zho ma lo guielxtseeb ne notaa ma.

¹² Per tel noyac-wree zha ne noyan ma, rquiad zdoo zho ma, zigne ran zho palo ziaad tib coyot ntseeb, ndxieque mëcwxiił ga laa zho rzhoon; sac led chend zho ma, led zhad nac xbaxtor ma. Zeene rdziñ coyot, nëzrii nëzrec rtsieets coyot ma, nogaa ma rgaa lo coyot.

¹³ Rzhoon zho, sac dimise nonie guic zho, peet liaadz nod zho ma.

¹⁴⁻¹⁵ Naa nac Baxtor ne nquialadz xpëcwxiił. Zigne runbey Pxož naa naa ni runbey naa me, sca runbey naa grëse xpëcwxiił naa, niicle magaaaw runbey ma naa. Grëse ma, rleynie naa ma, laa naa rbeeladz xquielmban naa totsaque cuee naa ma lo guielxtseeb ne no ma.

¹⁶ No spalal xp̄ecwxiiil naa, ma ne ngabd leñ corral rii; gr̄ese ma co, ible zon ma tsi naa sac laa naa no gaxi ma, zeena tipse gac ma gr̄e ma yquianaap naa ma.

¹⁷ Men ne nac Pxoꝝ naa, rleynie me naa sac laa naa rbeeladz xquieꝛmban naa; per ible zriebaan naa.

¹⁸ Naazhal rbeeladz xquieꝛmban naa, choot grieelod lega ctiche xquieꝛmban naa. Rap naa poder gded naa xquieꝛmban naa, ni rap naa poder gbire gban naa stib. Dios bneedz diidzhey co lo naa.

¹⁹ Gr̄e zha Israel ne ndxie ga, zeene bin zho sca rnee me, laa zho goc chop dii stib.

²⁰ No zho rnee:

—Yase mendox noguitnie guic men qui, o rzhinlegaa guic me. ¿Pe nacne rquiaadiag to xtiidz me?

²¹ Rquiab stib zho rnee:

—Niini rz̄e xtiidz men qui, led squid rac zha ne noguitnie mendox. Stiba, ¿niacxe zrieelo mendox guñguiac ma tib lo zha ne roꝛd lo?

Rnee Jesús Xp̄eēd Dios nac me

²² Leñ mēe ne rac naꝛa, leñ dze co noyac tib lni Jerusalén, lni ne run zho rsoladz zho dze ne glopaa psilo quiaquiin yadoo. Ye Jesús bdziñ Jerusalén leñ dze co.

²³ Laa me zieded tib leñ nsaap ne quia cho yadoo co, nsaap ne rnee zho zhiNsaap rey Salomón;

²⁴ zeene wbig bla zha ne rnabey Israel, bnabdiidz zho lo me rēb zho:

—¿Poc dzigo gdziñ dze ne gnē luu diidzli lo no? Telne nli luu nac Men ne zēēble diidz ga cxeel Dios guiaad lo guidzliu, niinagazh bnēw lo no.

²⁵ Pquiab Jesús rēb me:

—Blactaale zine naaw lo to, per rililadzde tow. Stiba, pe zhidaa milagr ne ziyan to run naa, gase rlu ganle cho nac naa; sac Dios men ne nac Pxoꝝ naa, men co racniēn naa run naaw.

²⁶ Ib rililadzde tow, sacne led yede to ngab lo naa.

²⁷ Tel zha ne ngab lo naaw, runbey zho naa; niicle naagaaw runbey naa zho, ni zhits naa rzēnal zho.

²⁸ Gr̄ese zho, rded naa tib guieꝛmban ne gdziñ dze lozh lo zho, ni gdziñ dze nitlo zho. Choot grieelod ctiche zho lo naa,

²⁹ sac men nroob nac Pxoꝝ naa men ne pxeel zho lo naa; choot grieelod cuee zho ladznia me.

³⁰ Ni tibaque nac no grop no me.

³¹ Zeene bin gr̄e zha rnabey co sca rēb me, psilo zho ptop zho quie nan zho ngoquie zho me.

³² Dzigo rēbchaa me lo zho:

—Lo gr̄etaa milagr ne quiayacniēn Pxoꝝ naa naa quiayun naa lo to. Goꝛnē dien, ¿pa miñ rlisqui to ne laa to racladz gneedzquie to naa?

³³ Pquiab zho rēb zho:

—¿Coquiedaxe no luu waa por gr̄e milagr ne run luu, sinque laa no coquie luu por gr̄e diidz ne rnee luu i, quiaguitnie luu Dios! ¡Tib miech beñse name nac luu, ni rnee luu laa luu nac Dios!

³⁴ Dzigo rēbchaa me lo zho:

—¿Lo xlibr ley to name zhobnee zha rzac Dios zha ne pcaania xtiidz me, rēb me dios nac zho!

³⁵ Ni ndion ne ganle, gr̄ese mine rnee lo Xtiidz Dios, diidzliw; gacxe waa tel sca rēb me lo zha ne pcaania xtiidz me ga,

³⁶ ¿niacxe rguitnie naa me ga, zeene rne naa Xpëed me nac naa, ni mezhaz bzooblo naa pxeel me naa lo guidzliu rii?

³⁷ Telne rund naa milagr ne rlu Dios pxeel naa, ib gliladzde to naa.

³⁸ Per telne ran to rlu ne me nacie naa, maase gliladzde to naa tosaque golliladz ne me nacie naa; tsow guien to ganle ne tibaque nac no grop no me, zigtaa nacie me naa, scaque nacie naa me.

³⁹ Horco gocladz zho stib naaz zho me, per znuse brieer me nia zho.

⁴⁰ Dzigo brieer me ga güey me ro guiubee Jordán, zaatne bio Juan pchoobnis Juan miech; ga blöz me palal dze.

⁴¹ Nzian miech ne güey lo me ga, rnee zho:

—Nli beend Juan ni tib milagr nroob, per grëse mine bnee me zeene bzeet me men rii, zigne bneese me laaw norieequia niina.

⁴² Nzian grë miech ne güeyquiaadiag zhiwseed me ga, dib zdoo zho bliladz zho ne me nac Men ne zëeble diidz ga cxeel Dios.

11

Gut Lazh

¹ Len dze co blanguidz tib mguie ne no guiedz Betain, lë Lazh; no chop bzian Lazh tib zho lë Mart stib zho lë Marí.

² (Lëë Marí rii pchoob tiblo nceit nex ni Jesús, ni pcuidz mew con guitsguic me.)

³ Dzigo pxeel grop wnaa co diidz lo Jesús, gacnan me laa Lazh rzacnë, sac nan zho rleyniedox me Lazh.

⁴ Zeene blanso diidz, nëchaa me:

—Peet tsienied guic to, niicle tel blanguidz me per nacda par guet me, sinque par glu ganle pa lotaa men nroob nac Dios. Ga glu ganle pa lotaa men nroob nac Xpëed me.

⁵ Zigtaa Maríw, zigtaa Marta, zigtagaa Lazha, nquialadz Jesús zho gza zho,

⁶ per ib biobladz me; lel blöz me schop ngbidz zaatne no me ga.

⁷ Dzigoraa në me lo no:

—Laa ne guio nëz xtan men Judé stib.

⁸ Dzigo rdzieets no:

—Maestro, ¿racladz luu tsie luu nëz co stib ye? Pense name goc bla ngbidz ga gocladz zho ngoquie zho luu ga.

⁹ Nëchaa me:

—Tsiipchopraa hor name rziini ngbidz, ni laga niini rna zac tibliladz zia ne, noxtseebd ne lega pa griel ni ne;

¹⁰ loxaque pcow liu, noxtseeb pa griel ni ne; sac ncow rna.

¹¹ Blozh ga në me:

—Laa xamigw ne Lazh nixguesle, per na laa ne guio zeena gabee naa zhimcaalo me.

¹²⁻¹³ Tibaque ndion no nli nixgues Lazh, dzigo rdzieets no lo me:

—Telne raaguesle me, zac-wen me sca.

Ib biend no ne gutle Lazh, gane sca rnee me.

¹⁴ Dzigoraa clar bnee me lo no, në me:

—Laa Lazh gutle.

¹⁵ Ni rley naa gon ne guiend naa ga dze co, zeena sca grieelo lozh gliladz to ganle cho nac naa. Golgotsaa guio ne nëz lo me ga niina sca.

¹⁶ Laa Mazh, zha ne rnee zho “Mëedgrop”, zeene bin Mazh sca në me, rneechaa Mazh lo no:

—Guiend rson, golgotsaa cchoob zdoon ne guional ne zhits me dien. Tel gut zho me, maase gut zho ne.

Jesús rbeeban ni me rdeed guielmban

¹⁷⁻¹⁹ Gax Jerusalén riaan Betain. Zha ne rriee Jerusalén, maase grol hor run zho nêz rdziñ zho Betain. Nzian grê zha Jerusalén rdziñ riequiaabdiuzh zho Marí grop Mart, riechoobladz zho zdoon me lo xquielnê me ga.

Dze ne rac tap ngbidz bioliu Lazh, dzigora laa Jesús bdziñ.

²⁰ Gon Mart pa lo ziaad Jesús, dzigo brie me biaad-xinêz me Jesús; laa Marí biaan ro yu.

²¹ —Jesús —rêb Mart—, telne niaca miñe nu no luu segur niete bzian naa;

²² sac nan naa, grêta ncuane r nab luu lo Dios, run me miñe r nab luu.

²³ —Peet tsienied guic luu —rêb Jesús—, ible zrieeban bzian luu.

²⁴ Pquiab Mart, rêb Mart:

—Nliw, nanpaa naa ible zrieeban me gal dze ne laa guidzliu rii nitlo, zeene grêse mengut, laa zho grieeban.

²⁵ Dzigo rêb Jesús:

—Naa nac men ne rbeeban grê mengut, ni naa nac men ne rdeed guielmban lo grê miech. Grêse zha ne dib zdoon gliladz naa, niicle guet zho zig ret grêraa miech rii, zdziñ dze ne gban zho stib.

²⁶ Sac grêse zha ne dib zdoon rliladz naa, laa zho bgaale tib guielmban ndzon ga, guiaand zho ladznia guielgut. ¿Led rliladz luu lêê Mart, ne sca gaca?

²⁷ —Rliladz naaw —rêb Mart—. Rliladz naa ne luu nac men ne bzooblo Dios ga, luu nac Xpêed Dios, Men ne zêêble diidz ga cxeel me guiaad lo guidzliu.

²⁸ Blozhse ga, wbiere Mart zie Mart zietsedz Mart Marí. Bdziñ Mart zhlianse bredz Mart Marí (sac nzian zha ne ndxie ga ziequiaabdiuzh Marí) rêb Mart:

—Niinapaale blanso Maestro, na laa me rbeedz luu.

²⁹ Zigne bin Marí sca rêb Mart, brie nguzhoon Marí laa Marí zie nêz co.

³⁰ (Bdziñ Marí, laa Jesús bii zo zaatne güeydziel Mart me ga; gase blêz me, bzêêbd me lad guiedz.)

³¹ Grê men Israel, zha ne ndxie lidz Marí ga ziechoobladz zdoon me, zeene gon zho sca lêêled brie me, nalaque zho zhits me; sac nan zho bod ro xpaabzian me ziegoon me.

³² Zigne bdziñ me zaatne zo Jesús ga, pquiitsgzhib me lo Jesús.

—Jesús, luu ne nac luu men ne rnabey —rêb me—, telne niaca miñe nu no luu zeene blanguidz bzian naa, niete me.

³³ Psilo Marí roon Marí. Zeene gon Jesús, niicle Maríw, niicle grê zha Israel ne bdziñ ga, mban rac zho, grêse zho roon, dzigo ye me biab guielnê me.

³⁴ Bnabdiidz me rêb me:

—¿Pa lo pqueets to me?

—Dê ganle —rêb zho—, zeena gan luu pa lo bguets me.

³⁵ Horco psilo Jesús biin me.

³⁶ Grê zha Israel co, zeene gon zho roon me, rneechaa zho:

—¡Golwi ganle, blactaa nquialadz me Lazh!

³⁷ Laa zla zho rnee:

—Led me name beenguiac lo mgui ne rold lo ga, ¿pe nriee lod zha niun me, zeena niete Lazh?

Brieaban Lazh

³⁸ Zeene laa Jesús bdziñ ro baan Lazh, biire biab guielnê me.

Zig nac tib bliee niaa baa co; rna tib quie nroob ntse zaatne rsëeb zho ngutoo;

³⁹ dzigo bnabey Jesús cob zho quie co.

Pquiab Mart, bzian ngutoo co rëb me:

—¡Mazd gdioobda! ¡Nadze rac tap ngbidz gut me, mbanle na rlaa me!

⁴⁰ Dzigo rëbchaa Jesús:

—Led laa naa nile lo luu, telne dib zdoo luu rlladz luu naa, bii zan luu ganle zha nactaa grë ncuane ndzon ne run Dios.

⁴¹ Zeene blozh bdoob zho quie co, dzigo blis Jesús lo me nëz gbaa, ni rëb me:

—Dios, luu ne nac luu Pxoza naa, xquizh xquielnzaac luu sac rquiaadiag luu mine rne naa.

⁴² Nan naa tibaque rquiaadiag luu mine rnee naa, per laa naa rzeta niina, zeena grëse miech ne ndxie nu gliladz zho ganle ne nli luu pxeel naa.

⁴³ Dzigo nguiedz bredz me, rëb me:

—¡Lazh, brieie i!

⁴⁴ Zigne sca bnee me, laa ngutoo co brieie ga, scase nriel lar dib nia me, dib ni me ne, ni nioog stib lë lar lo me. Dzigo rëb Jesús:

—¡Golxadz grë lar ne nriel me i, zeena guey me!

Rguib zho dien zha yгаа Jesús

(Mt. 26:1-5; Mr. 14:1-2; Lc. 22:1-2)

⁴⁵ Grë men Israel ne güeynal zhits Marí ga, zeene gon zho sca bleeban Jesús Lazh, nzian zho bliladz ne nli Dios pxeel me.

⁴⁶ Nogaa zho lel güey zho güeyzodiidz zho lo grë zha farisé zha bleeban me Lazh.

⁴⁷ Horco lëelëd pcaalsa grë pxoz ne rnabey, ni grë zha farisé, rëb zho:

—¿Pe gnë to dien zha gaca? ¿Zha dziuun ne mgui ne rnee zho Jesús ga, sac gon pe zhidaa milagr ne quiayun me?

⁴⁸ Telne squise csaan ne me, mbe grëse miech sëeb xnëz me; lozh ga, zeene gacnan men rnabey ne zob Romaw, laa me cxeel grë xmenguiib me guiaadnitlo zho xyadoo ne, guiaadnitlo zho ladz ne.

⁴⁹ Dzigo pquiab Caifás, men ne nac pxoz nroob len iz co, rëb me lo zho:

—¡Ni lal nu lëë peet riende to!

⁵⁰ ¿Pe riende to mazd wena yгаа tib zha guet zho, zha quizh par gdib guiedz, lëdle grëse zha ladz ne nitlo?

⁵¹ Zeene sca rëb Caifás men ne nac pxoz nroob ga, ga bzeet me ible no guet Jesús par csilaa me grëse miech lo dol; per led guicd me biaba, sinque Dios psiaaba guic me. Ga goquiet ne laa Jesús guet, par csilaa me grëse zha Israel,

⁵² ni grëragaa zha ne no dipse lo guidzliu, zeena tipse gac grëse zha ne nac xpëed Dios.

⁵³ Dzigo grëse zha ne nac wxtis ga, laa zho biaan diidz ne ible no yгаа Jesús zho me.

⁵⁴ Nacne briedraa Jesús ne nenlo nian zho me; dzigo mazd laa me brieenie no xtan zha Judé, güeynie me no zaatne wzhi no miech, bdziñ no tib guiedz win lë Efraín, ga bliiaz no grë no me.

⁵⁵ Len ngbidz co, ziaadyob lni Pascw. Nzian grë miech ne no grë guiedzlas ne ndxie dib ga, laa zho rsilo quiariee zie zho nëz Jerusalén; sac ansraa csilo Pascw nzian zho rie yadoo run zho grëse mine rnabey ley par guiaanmbe zho lo xtol zho.

⁵⁶ Grëse zha ne rdzin, len yadoo no zho rnabdiidzlsa zho dien pe zdziñ Jesús lo lni; sac grëse zho racladz gan me.

⁵⁷ Laa grë pxoz ne rnabey, ni grë zha farisé, laa zho bnabeyle, zha ne gantaa Jesús, tsienie zho diidz parne tsie zha ne tsienaaaz me.

12

Pchoob tib wnaa nceit nex guic Jesús

(Mt. 26:6-13; Mr. 14:3-9)

¹ Sxoop ngbidz gdziñ dze lni Pascwa, güey Jesús guiedz Betain, zaatne no Lazh, men ne bleeban me ga.

² Sac grëse menlidz Lazh, beenlo zho tib xtsee, gownie zho me.

Mezh no zho, laga laa Lazh zobnie me, laa Mart nodziib ncuane gowxtsee zho lo mezh,

³ tibaque zeene bzëëb Marí bzëëbnie Marí tib lo nceit nex ne rriee guiee ne lë nard, tib lo nceit niazha, rgaaw maase groļ boté. Zigne bdziñ Marí bdëëb Marí nceit co ni Jesús, blozh ga con guitsguic Marí pcuuidz Marí ni me. Dipse len yu zëbılaa nceit co.

⁴ Laa Judas Iscariot, tib zha ne nacgza no (zha ne bded ga pto me) zeene gon Judas sca bdëëb Marí nceit co ni Jesús, rneechaa Judas:

⁵ —Mazd tebaa zha ndo nceit qui. Nguizhpaa zhow maase tson gayoo pes plat, dzigo needz zho dimi co ngaaza lo grë zha mban ne guiend pe yquini.

⁶ Sca rnee Judas, per nlid ne rquia zdoo Judas zha ne guiend pe yquini, sinque laa Judas rguib dien zha cuan Judas dimi co, sac Judas ngotsow bziuud ne no dimi; zigse raclo dimi len bziuud co, zhlianse rbee Judas dimi co.

⁷ Dzigo rëbchaa Jesús:

—Psaan me. Ib laa me bdëëb nceit qui ni naa, zeena nzhixcuale xcuerp naa gal dze ne laa naa ygueets.

⁸ Telne raclad to gun to xyudar zha ne guiend pe yquini, tibaque ranlsa to grë to zho, zac tsoy ygad to lo zho; sangue naa zdziñ dze gandraa to naa.

⁹ Ndal grë zha Israel, zeene bin zho laa Jesús no guiedz Betain, bio zho nëz güey zho lo me ga, ni güeyso zho lo Lazh, men ne bleeban me ga.

¹⁰ Zeene gon grë pxoz rnabey cow, nacne bnediidaque zho ye Lazh none gut zho;

¹¹ sac por Lazh, nzian grë zha non, laa zho rbig nëz lo Jesús, laa zho riladz ne nli me nac Men ne zëëble diidz ga cxeel Dios.

Bzëëb Jesús Jerusalén

(Mt. 21:1-11; Mr. 11:1-11; Lc. 19:28-40)

¹² Biini liu co, dipse lad guiedz Jerusalén zhoob diidz laa Jesús gdziñ ga dze co. Grë miech guizhiu ne bdziñ ga zie lni Pascw,

¹³ psilo zho brie zho ziaad-xinëz zho me; tib tib zho nzhenze zho tib lë zin. Lo guielbley co, zeene gon zho me, psilo zho nguiedz roptsie zho, rnee zho:

—iZha men nroobtaa nac Dios! iZha ndzontaa men rii pxeel Dios ziaad lo ne! iLëe men rii gnabey Israel!

¹⁴ Laa Jesús, zobse me lad tib burr yeen, zigne raquiet lo Xtiidz Dios zaatne rnee:

¹⁵ Grëse to men Israel, gdziebde to.

iGolwi ganle, laa men ne rnabey ladz to ziaad i, zobse me lad tib burr yeen!

¹⁶ Grëse no ne nac no xpëëdsuel me, ni tib no biend hor co ne grëse ncuane nosac ga, raquietlew lo Xtiidz Dios; sinque haxta zeyle me gbaa, dzigoraa psoladz no nzian grë ncuane raquiet lo Xtiidz Dios ga, gonlo no goca; ni bien no Jesús raquiet ga.

17 Lad grē miech guizhiu co no nzian zha ne gon zha bleeban me Lazh, dzigo nguiedz rzodiidz zhow lo grē miech co.

18 Ni nzian grē miech co, laa zho blanso ga ziaad-xinēz zho me, sac bin zho zha been me milagr nroob co.

19 Grē zha farisé, zeene gon zho grē miech guizhiu co, rneechaa zho:
—¡Pe zhidaa grē miech qui racnie men qui! ¡Peraa nadien dziuun ne!

Rguib bla zha Gres Jesús

20 Lad grē miech ne bdzin Jerusalén ga, ziegan Dios len ngbidz Pascw co, lad co no blalaa zha zit ne nacd zha Israel,

21 dzigo bnee zho lo Lip (zha Betsaid nac Lip) rēb zho:

—Bzhiguiel bnē dien pa lo no Jesús, laa no racladz dzian no me.

22 Dzigo güey Lip rēb Lipa lo Ndrés, blozh ga güey zho grop zho güeynie zho diidz lo Jesús.

23 Dzigo rēbchaa me lo zho:

—Naa ne nac naa Mgui ne pxeel Dios, niinataa nagon laa dze bdzin zeene laa naa gbire guia gbaa stib.

24 Golquiaadiaga ganle: Tib zhobxtil, telne tsoda liu tibaque zhob naca; per zeene laa zhob co rio liu, nzian raca. Scaque naa nagon, none guet naa, none tsoliu naa, zeena gacnzian zha ne ygab xnēz naa.

25 Sac zha ne rquia zdoo xquielmban, znitlonie zhow; sangue zha ne cueeladz xquielmban, zha cosi zgaa zho tib guielmban ndzon ne ib gdzind dze lozh.

26 Zha ne racladz sēeb xnēz naa, none gun zho mine rnabey naa; ni zaatne gdzin naa yeque zho no gdzin ga. Ni grēse zha ne sēeb xnēz naa ni gon zho xtidz naa, zunnon Pxoza naa zho.

27 Mban rac zdoo naa niina. Per lēda ga gun naa, telne guiep naa lo Pxoza naa csilaa me naa lo grētaa guielnē ne no teed naa. ¡Sac par mincopaa zial naa lo guidzliu rii!

28 'Dios, luu ne nac luu Pxoza naa —rēb me—. Blu lo grē miech rii ganle ne men nroob nac luu.

Dzigo bin zho zēeb tib tsi men co gbaa, rēb me:

—Laaw blule naa, ni niina laa naa gbire gluw stib.

29 Nzian grē miech ne ndxie ga, zeene bin zho tsi men co, bzhaac zho nguziw; zha ne bien led nguzida, rnee zho:

—Xanj! Dios ga gon bnee lo me.

30 Dzigo rēbchaa me lo zho:

—Laa to bin ganle laa Pxoza naa bnee, ni por to gon bnee me, zeena gon to tsi me ni gliladz to ne me pxeel naa.

31 Laa dze nagon bdzin zeene laa Dios gunquizh naa xtol grēse miech guidzliu rii; lēe dze bdzin zeene laa mendox piche gnabeydraa ma lo guidzliu rii zigne rnabey ma niina.

32 Sac zeene laa naa quia glaa lo cruz, ga cuedz naa grēse miech zeena sēeb zho xnēz naa.

33 Ga bzeet me zha gut miech me.

34 Grē miech ne ndxie ga, zeene bin zho sca rēb me, rēbchaa zho:

—¿Guet luu ye? Lo Xtiiidz Dios name rnee, ib guete Men ne cxeel Dios ga. ¿Zha nac dzigo ne rnee luu laa luu guet? ¿Chopaa dzigo nac luu?

35 Dzigo pquib me rēb me lo zho:

—Naa nac zig tib biini ne noziini lo miech; ni ngabse dze ne cuēz naa lo to. Laga noziini naa lo to, golsēni zaatne riab biini zeena ygaade to guielcow; sac zha ne rzē lo ncow riend zho palo zie zho.

³⁶ Niina ne rdeeda diidz golliladz cho nac naa, zeena gac to zha ne nlipaa no lo biini.

Blozhse sca rëb me laa me biche ga, blulodraa me lo zho.

³⁷ Niicle gonlo zho nzian milagr ne been me, per ib rililadz zho ne nli Dios pxeel me.

³⁸ Ni ib scalegaa no gaca, sac ga brieequia mine bzeet Isá (tib men ne biadteed xtiidz Dios) zeene znu rëb me:

Dios, bui ganle ni tib choot nëd gliladz xtiidz luu,
niicle ran zho grëtaa milagr ne run luu.

³⁹ Ni nligaa ib brielod nliiladz zho me; sac zeene pquiaa Isá, znu rëb me:

⁴⁰ Ncow psan Dios lo zho, ni beenndip me zdoo zho;
zeena gand zho me, niicle guiengdga zho zha gbig zho lo me csilaa me zho lo xtol zho.

⁴¹ Zeene znu bnee Isá, ible Jesús ga bzeet me; sac gon me grëtaa guieindzon ne rap Jesús.

⁴² Ndal zho sca ib bliladz me, per noquegaa zha ne bliladz me; zig nac grë zha ne rnabey lo zha Israel, ndal zho bliladz ne nli Dios pxeel me, per ib pxobnend zhow; sac rdzieb zho cuee zha farisé zho yadoo.

⁴³ Ni stiba rdziladzraa zho guiaannon zho lo miech, laa ne guiaannon zho lo Dios!

⁴⁴ Len dze co, tib vuelt nguiedz bnee Jesús, rëb me:

—iGrëse zha ne rililadz naa, yele Pxo z naa ga rililadz zho!

⁴⁵ Ni zeene rwi zho lo naa, yele men ne pxeel naa ga ran zho!

⁴⁶ Naa nac zig tib biini ne rziini lo miech, ni grëse zha ne dib zdoo gliladz cho nac naa, zrie zho lo guieicow ne no zho.

⁴⁷ Grëse zha ne gon Xtidz naa, ni gband zho zigne rnabeya, led naad gunquizh zho dol co; sac ziald naa par gdziibdol naa miech, sinque laa naa zial par csilaa naa zho lo dol.

⁴⁸ Xtidz naa gac ley ne gunquizh zhow; zigtaa zhaw zigtagaa grë zha ne nëd gunbey naa, grë zha ne nëd yquiaadiag xtidz naa.

⁴⁹ Sac grëse ncuane pseed naa miech, led guicd naa biaba, sinque Pxo z naa men ne pxeel naa, men co rnabey naa pe nac mine cseed naa zho.

⁵⁰ Ni nanpaa naa, grëse diidz ne rnabey Pxo z naa naa rne naa, lëew rlu zha ygaa miech tib guieimban ndzon ne gdzind dze lozh; gacxe waa, grëse mine rnabey me gne naa, zigne racladz me scase rne naaw lo to.

13

Rguiib Jesús ni xpëëdsuel me

¹ Guieel ne rsilo lni Pascw; wdze co pcaalsanie Jesús no grëse no ne nac no xpëëdsuel me, laa no nodiowxtsee. Rienle me ne gataa laa dze co bdzin, zeene laa me gbi lo guidzliu rii gbire me lo Pxo z me stib. Grëse zha ne ngab lo me, rleynie me zho; ne nligaa rleynie me zho haxta bdeed me xquieimban me psilaa me zho.

²⁻⁴ Rien me grëtaa ncuane no, ladznia me psan Pxo z mew; lo Pxo z me brie me ziaad me lo guidzliu, ni lo Pxo z me gdzin me niina ne laa me gbi lo guidzliu.

Laa no zioob no no mezh, tibaque zeene guso me blee me lar ne mbix me, bdiinlen me tib lë lar nool. Par hor co, laa mendox pquii-le Judas, zhin Simón Iscariot, parne tsieto Judas me.

⁵ Dzigo blaat me nis tib len bandej laa me psilo noguiib me ni grë zha ne nacgza no, zigse rlozh rguiib me ni tib zho scase scase rcuiidz mew con lar ne ndxie len me ga.

⁶ Zeene laa me zie quiib me ni Simón Pedr, rëbchaa Simón lo me:

—İLëda i gon! İPe nacne leİ luu quiib ni naa?

⁷ Pquiab me rëb me:

—Grieelod guien luu niina, pe nacne quiib naa ni luu; haxta tedraa nu dzigo ganle guien luuw.

⁸ —İNend scaw! —rëb Pedr—. İPer naasi gon gnedzd naa diidz quiib luu ni naa!

Dzigo rëbchaa me:

—Grieelod sca ygab luu xnëz naa, telne siguield luu quiib naa ni luu.

⁹ Horco pquiab Simón, rëb Simón:

—Bzhiguiel sca, niinagazh bdiib ni naa, per led loxaque nidse naa, sinque dib nia naa, dib guic naa bdiib.

¹⁰ Dzigo rëbchaa me:

—Zha ne gozle, nise zho riar; sac mbele zho. Scaque to nagon, mbele to grë to. Grë to rne naa, niicle ne led gzadpaa to mbe.

¹¹ Sca rëb me, sac rienle me cho tsieto me.

¹² Blozhse bdiib me ni no, wbiire wbix me xab co me, bzob me lo mezh; dzigo në me lo no:

—İPe bien to na pe nacne znu bdiib naa ni to?

¹³ Golwi ganle: To lëë, Maestro rnee to lo naa, ni rnee to naa nac men rnabey; ni nonguiela gon, sac ne nligaa scaw.

¹⁴ Golgan sca, niicle ne maistr naa, niicle ne naa nac men ne rnabey, per laa naa bdeed zig tib ngundziin win bdiib naa ni to. Nana sca, scaque golgac lo samiech to.

¹⁵ Laa naa blule lo to zha gun to, nana sca goltsienal min co.

¹⁶ Gneli naa lo to ganle, lo grë zha ne nac ngundziin, tsod zha ne nonraa lo zha ne rnabey zho; scaque grë zha ne rie mandad, tsod zha ne nonraa lo zha ne rxeel zho.

¹⁷ Laa to nanlew nasca. Gacxe waa, telne tsienal to wseed rii, zaacse gac lo xquielmban to.

¹⁸ 'Golquiaadiag ganle, grëse mine none naa nu, led par grëde tow. Naa bzooblo to, nanween naa zha nac to tib tib to, ni nanween naa zha rnee lo Xtiidz Dios, rneew: "Lëëque tib zha ne rownie naa, grieequia tsielo naa lадznia zha ne gut naa."

¹⁹ Laaw rnegazh naa lo to niina, zeena zeene gaca, gliladz to ganle ne nli naa nac men ne rne naa nac naa.

²⁰ Ni golgona ganle, grëse zha ne ycaania Espiritu Sant, men ne cxel naa, naale ga nocaania zho; ni zha ne rcaania naa, yele men ne pxeel naa ga rcaania zho.

Rëb Jesús ne Judas nac zha ne tsieto me

(Mt. 26:20-25; Mr. 14:17-21; Lc. 22:21-23)

²¹ Horco psilo rlupaa mban goc zdoo Jesús, dzigo bneeli me lo no në me:

—Gneli naa lo to ganle, lëëque tib to gon tsielo naa lадznia zha ne gut naa.

²² Zeene bdzion no sca rnee me, psilo no rwilolsa no, rienđ no dien cho nac zha ne rzeet me ga.

²³ Cuepaa me, ga zoob naa (rleynie me naa niicle ne raguiald naaw);

²⁴ dzigo blunia Pedr lo naa, gnabdiidz naa lo me dien cho nac zha ne rzeet me ga.

²⁵ Nacne wbig gax naa, bnabdiidz naa lo me.

²⁶ Dzigo nëchaa me:

—Laa naa cobie tib lë guietxtil, ni lo zha ne gan luu gded naa guietxtil co, lëë zho ga.

Dzigo bzhən me tib lë guietxtil, blozhse bloobie me guietxtil co, laa me bdeeda lo Judas.

²⁷ Zigne bnaaz Judas guietxtil co, laa men̄dox bzëëb zdoo Judas. Dzigo rëbchaa Jesús lo Judas:

—M̄ine no guic luu guṇ luu, na zeen̄ nawdzegazh beeṇa.

²⁸⁻³⁰ Zigne blozh dow Judas guietxtil co, lëëləd briece Judas ley; pcowle liuw.

Lo grë no ne zioobnie no me lo mezh ga, ni tib no biend̄ pe nacne sca rëb me lo Judas. No zho nan̄ bod no pe ncuaaṇe r̄quiin lo lni co, rxeel̄ me Judas tsiesi Judas, o nogaa pa tsiesan̄ Judas palal̄ dimi lo grë zha ne guiend̄ pe yquiiṇ; sac Judas nac zha ne ngotsow bziuud win ne no dimi.

³¹ Gon̄se Jesús laa Judas briece ley, dzigo nëchaa me lo no:

—Niina nagon̄ bdziṇ dze zeenē glu gan̄le zha nroobtaa guieṇdzon ne rap M̄gui ne pxeel̄ Dios, ni ga glu gan̄le pa lotaa nac guieṇdzon ne rap Dios.

³² Ni scaque Dios, zlu me gan̄le pa lotaa nac guieṇdzon ne rap M̄gui ne pxeel̄ me ga.

³³ Xin yeṇa, ¡zhile cuëz naa lo to nu! Squiaguib to naa, per zigne rep naa lo grë zha Israel co, laaw rneque naa lo to niina: Grieelod sēnaṽ to zaatne ga naa.

³⁴ Gane laa naa rsaṇ tib diidz cub rii, ni laa naa rnabey to guṇ tow: Tib tib to, gol̄leynie zha ne nacgrë to, gol̄gantsi zho. Zigne rleynie naa to, sca gol̄leynie zho.

³⁵ Zeenē gan̄ miech, ne nligaa dib zdoo to rleynie to samiech to, dzigo zien̄ zho xpëëdsuel̄ naa nac to.

Ible ziaḅ Pedr run̄beyd Pedr Jesús

(Mt. 26:31-35; Mr. 14:27-31; Lc. 22:31-34)

³⁶ Dzigo bnabdiidz Pedr lo Jesús, rëb Pedr:

—Maestro, ¿pa dzigo nac zaatne tsie luu?

Dzigo rëbchaa me:

—Zaatne ga naa, grieelod sēnaṽ luu niinagazh; per ib laa luu no guiaadnaṽ.

³⁷ Pquiab Pedr, rëb Pedr:

—¿Per pe nacne grieelod sēnaṽ naa zhits luu niina? ¡Sēnaṽ naa zhits luu gon̄, niicxe maase gut zho naa waa!

³⁸ Dzigo rëbchaa me:

—¿Goon̄ csaand luu naa ye Pedr, niicle gut zho luu? Nlid ga gon̄. Gneli naa lo luu gan̄le, zeenē laa gall ycuedz tson̄le vuel̄t rëb luu run̄beyd luu naa.

14

Niapse por Jesús gdziṇ miech lo Dios

¹ Tsode to zhgab, tsode to guieṇnë. Tiblique gol̄guṇ guic to, zigne dib zdoo to r̄liladz to Dios, scaque dib zdoo to gol̄liladz cho nac naa.

² Gol̄gona gan̄le: Zaatne nac lidz Pxoṽ naa, ndaldoo zaatne cuëz miech no ga, tel̄ niaca m̄ine guiend̄ zaatne cuëz to, nile naaw lo to na. Gacxe waa, niina laa naa ga, gazhixcuaa naa zaatne cuëz to ga.

³ Ni zeenē lozh gzhixcuaa naa zaatne cuëz to, hor co laa naa gbire guiaṽ stib, dzigosi laa to sēnaṽ zhits naa; zeenēn̄a tibaque zaatne gbiaaz ne.

⁴ Laa to nan̄le nasca pa lo ga naa, ni nan̄legaa to nëz ne.

⁵ Pquiab Mazh rëb Mazh lo me:

—Maestro, peleṽ nëz na gacndion̄ no, ni per ni zaatne tsie luu ndion̄ no.

⁶ Dzigo rëbchaa Jesús:

—Naa nac nëz co, naa rseed miech mine nac diidzli, ni naa rded tib guielmban ndzon ne ib gdziṅd dze lozh. Lo grëse miech, zha ne gliladz cho nac naa, zha co gdziṅ lo Pxoꝝ naa; guieṅdraa stib mod ne gdziṅ zho lo me.

⁷ Telne runbey to naa, dzigo runbeyaꝑue to Pxoꝝ naa. Ni runbeylegaa to me, sac tibaꝑue ran to me.

⁸ Dzigo rëbchaa Lip lo me:

—Bzhiguieṅ mazd blu Pxoꝝ luu lo no. Totsaque dzian no me, lëlew ga dzigo.

⁹ Pquiab Jesús, rëb me:

—Blactaale dze ga name Lip no naa lo to, ni gardaque ye gunbey luu naa. jGrëse zha ne ran naa, lëeꝑue Pxoꝝ naa ga ran zho! ¿Zha nac dzigo ne racladz luu glu naa me lo to?

¹⁰ ¿Niacxe riladzd luu dzigo ne tibaꝑue nac no grop no Pxoꝝ naa? Grëse mine rseed naa to, led guicd naa riaba; grëse ncuaaṅe run naa, me rnabeya, me ruṅa sac tibaꝑue nac no grop no me.

¹¹ Golliladz sca ne tibaꝑue nac no grop no Pxoꝝ naa. Telne goon riladzdgaaw tow zigne rnee naa lo to nu, siquier lo grë dziin ne nodziuuṅ no, ga golgan ganle ne nli tibaꝑue nac no grop no me.

¹² 'Ne nligaa, gneli naa lo to ganle: Grëse zha ne riladzd cho nac naa, ye zho zuṅ zho grë milagr ne run naa, ni haxta nroobraa ncuaaṅe gun zho; sac tel naa, laa naa no guia zaatne no Pxoꝝ naa.

¹³ Ncuaaṅe gnabtaa to lo Pxoꝝ naa, totsaque glu to ne nli riladzd to naa, zuṅ naaw; zeena ga gan miech ganle me nac men ne mazdraa nroob, me nac men ne mazdraa non.

¹⁴ Ne nligaa, telne rnalo to naa, ncuaaṅe gnabtaa to zuṅ naaw.

Sxeel Jesús Espiritu Sant

¹⁵ Telne nli rleynie to naa, golgun grë mine rnabey naa to sca.

¹⁶ Scagaa naa, laa naa gnab lo Pxoꝝ naa cxeel me tib men ne tibaꝑue gacniṅ to, tibaꝑue cchoobladz zdoꝝ to; ib gdziṅd dze ne csaan me to. jLëe men co ga nac Espiritu Sant, men ne rlu pa miṅ nac diidzli; ni ible sxeel Pxoꝝ naa me!

¹⁷ Zha ne ngabd xnëz naa, grieeṅlod ycaania zho me, sac ranḅ zho me niicle runbeyd zho me; sangue to, runbey to me sac me quianap to niina, ni zbëzgaaw me zdoꝝ to.

¹⁸ 'Ib csaanladzd naa to, zbire naa guial naa lo to stib.

¹⁹ Nli zhilew, zeene gandraa grë miech naa, sangue to gon bii zan to naa; sac zriebaan naa, ni scaꝑuegaaw to zgaaw to tib guielmban ndzon ne gdziṅd dze lozh.

²⁰ Gal dze co, zeene gan to laa naa grieeban, ga gliladz to ganle ne nli tibaꝑue nac no grop no Pxoꝝ naa, zigne tibaꝑue nacnie naa to ni nacniegaaw to naa.

²¹ Zha ne runbey zha nac grë mine rnabey naa, ni rban zhow zigne naca, ga rlu ne nli rleynie zho naa; ni zigne rleynie zho naa, scaꝑue Pxoꝝ naa zleynie me zho; niicle naagaaw zleynie naa zho, ni zlu naa lo zho ganle cho nac naa.

²² Dzigo pquiab Judas (zhaa Judas Iscariot), rëb Judas lo me:

—¿Pe nac waa lose no glu luu cho nac luu? ¿Telzhe grëraa miech waa?

²³ Pquiab me rëb me:

—Zha ne run mine rnabey naa, lo zha co glu naa cho nac naa; sac rlu zho ne nli rleynie zho naa. Ni haxta ziaad no grop no Pxoꝝ naa gbannie no zho; sac zigne rleynie zho naa, scaꝑue zleynie me zho.

²⁴ Sangue zha ne rund mine rnabey naa, ¿zha dien glu naa lo zho cho nac naa? Sac rlu rleynied zho naa. Gol̄soladz gan̄le: gr̄ese diidz ne ron to rne naa, led guicd naa riaba, xtiidz P̄xoz naaw.

²⁵ Laa naa rne gr̄e min̄ rii, laga bii zo naa lo to nu,

²⁶ per zeene laa P̄xoz naa cxeel̄ Esp̄ritu Sant̄ meñ ne guiaad cchoobladz zdoo to (meñ co guiaad xcuent naa), meñ co lozh cseed to, ni guñsoladz me to gr̄ese mine bne naa lo to.

²⁷ Laa naa guia, per laa naa r̄san̄ tib guieļbley zdoo to, zeena zigne tibliladz rac zdoo naa, scaque tibliladz gac zdoo to. Sac guieļbley ne rnedz naa lo to nu, nacda zig nac guieļbley ne run̄bey gr̄eraa miech guidzliu rii. Tsođe to zhgab sca, niicle gđziebde to.

²⁸ Laa to binle gan̄le, laa naa no guia lo P̄xoz naa per zbire naa guiaļ naa lo to stib. Tel̄ne nli rleynie to naa ine nley gol̄gac, niina ne ron to laa naa guia lo me, sac gon̄ meñ nroobraa nac me lo naa.

²⁹ Laa naa rne gr̄e min̄ rii lo to niina, zeena zeene gaca, ga lozh guieñ to gan̄le cho nac naa.

³⁰ Led nroobdraa sodiidznie naa to, sac ile ziaad mendox, meñ ne rnabey lo guidzliu rii. Peet grieelod guñ mendox naa,

³¹ per ible none gon naa xtiidz P̄xoz naa meñ ne pxeel̄ naa, zeena gan̄ miech gan̄le ne nli rleynie naa me. ¡Gol̄tsieso nasca, zeena zio ne!

15

Jesús nac zig tib lbë uv

¹ Naa nac zig tib zhan lbë uv, laa to nac zhicwa, laa P̄xoz naa nac zig tib zha ne quianapa.

² Gr̄ese zhicw lbë co mine rquiad nex lo, rchug mew; laa gr̄e mine rquia nex lo, ine r̄san̄mbe me low, rbelaan me low zeena yquiaraa nex low.

³ Zig nac to gon̄, laa Dios psan̄mbele to sacne zienal̄ to gr̄e xtidz naa mine pseed naa to.

⁴ Gbichede to lo naa sca, sinque tibaque gol̄gacnie naa zigne nacie naa to. Gol̄gan̄ gan̄le, zig nac tib zhicw lbë uv, peet nex grieelod yquia low tel̄ne tibn̄zle nixa; scaquegaa to nagon̄, grieelod guñ to gr̄e ncuaane rdziladz naa, tel̄ne nacniede to naa.

⁵ Gol̄soladz gan̄le: Naa nac zig nac lbë co, laa to nac zhicwa. Zha ne tibaque gacnie naa, gr̄ese ncuaane guñ zho zdziladz Dios̄a;

⁶ sac tel̄ piche zho lo naa, laa zho nacle zig tib zhicw lbë co mine nixle tib n̄z, laaw nixle ga, ga gbidza; lozh ga laaw tsec.

⁷ Tel̄ne tibaque gacnie to naa, ni tibaque tsoxco to gr̄e mine pseed naa to, dzigosi ncuaane gacladztaa to gol̄naba, ni scagaa scaania tow.

⁸ Gol̄lu sca ne nli xp̄ëēdsuel̄ naa nac to, gol̄san̄non P̄xoz naa, niapse ncuaane rdziladz me min̄ co gol̄gun̄.

⁹ Ne nligaa rleyniedox naa to. Gol̄wi gan̄le, zigne rleynie P̄xoz naa naa, scaque rleynie naa to. Gol̄guieñ sca tibaque gol̄gun̄ mine rnabey naa.

¹⁰ Sac gon̄, zha ne guñ mine rnabey naa, gzataa dze zleynie naa zho; sac sca rleynie P̄xoz naa naa ne run̄ naa mine rnabey me.

¹¹ Laa naa rzet min̄ rii lo to, zeena guiaad tib guieļbley zdoo to. Ne nligaa, zeena guiaad tib guieļbley nroob zdoo to; ni naa gnedz guieļbley co lo to.

¹² Laa naa rnabey to, laa naa rnab lo to: ¡Gol̄leynie samiech to, zigne rleynie naa to! Tel̄ naa, gol̄guieñ gan̄le pa lotaa rleynie naa to,

¹³ sac led lega gdeedse tib zha xquie|mban zho par csilaa zho samiech zho, sinque ga rlu zho ganle pa lotaa rleynie zho zho.

¹⁴ 'Ni to gon, telne gon to grë mine rne naa lo to, dzigosi nli rleynie to naa.

¹⁵ Led yedraa niina nac to zig tib ngundziin, sac zha ne nac ngundziin nand zho pe run men ne rnabey zho. Ne nligaa rleynie naa to, sac grëse mine rnabey PxoZ naa, grëse zigne rnee me, laaw bzodiidzle naa lo to.

¹⁶ Golguien ganle, led tod gon bzooblo naa, sinque, jnaa bzooblo to! Ni laa naa bzooblo to zeena gun to niapse ncuaa ne rdziladz Dios; dzigosi ncuaa ne gnabtaa to lo PxoZ naa, ne nac to zha ne no xnëz naa, zneedz mew.

¹⁷ Laa naa rso diidz lo to: Golleynie samiech to.

¹⁸ Niicle rlëe zho ran zho to, golsoladz ganle, desde naa squi rlëe zho ran zho.

¹⁹ Rlëe zho ran zho to, sac laa naa bleele to lad zho, zienaldraa to ncuaa ne rleynie zho; laa telne nagon bii nac to zigne nac zho, dzigosi zëeb gleynie zho to.

²⁰ Golsoladz ganle, zeene znu ni naa lo to: ¡Tsod ngundziin ne ndziibsráa non lo zha ne rnabey zho! Tel naa, pquianal miech naa, ¿pe lel to dzigo gandze zho? Nana, zigne brieequiagaa palal zha ne bililadz xtidz naa, scaque zrieequia zha ne yquiaadiag mine gnee to.

²¹ 'Ible squianal miech to ne nac to zha ne ngab xnëz naa, sac runbeyd zho Dios men ne pxeel naa.

²² Tel niaca mine niald naa, niicle ned naa lo zho, zac guiab ne peet xtold zho, sac riend zho pe run zho. Per na gon, guien pe yquiaaqui zho; sac bial naa bne naa lo zho.

²³ Zha ne rlëe ran zho naa, ye le PxoZ naa ga rlëenie zho.

²⁴ Ne nligaa telne niaca mine niand zho grëtaa milagr nroob ne run naa, zac guiep naa peet xtold zho; per na gon, blactaa milagr ne gon zho ben naa, ni laa zho bii rlëe ran zho no grop no PxoZ naa.

²⁵ I nagon norieequia mine raquiet lo Xtiidz Dios, zaatne znu rnee: "Peet guie|ntseeb quiaayund naa lo zho, per rlëenie zho naa."

²⁶ 'Laa naa nile lo to ganle, ible sxel naa Espiritu Sant gacnie to, niapse diidzli rnee me. Lo PxoZ naa gree me guiaad me, me cchoobladz zdoos to, ni me gneedz guie|biini lo to lozh guien to cho nac naa.

²⁷ Ni scagaa to, ye to laa to none sodiidz lo grëraa miech gacnan zho cho nac naa; sac gon tibaque bzënie to naa desde ne psilo naa xtsin naa.

16

¹ 'Laa naa rne grë min rii lo to zeena peet tsienied guic to, tibaque dib zdoos to gnalo to naa.

² Sac gon zunxoon zho to, zbee zho to yadoo; ni zdziñ dze haxta zut zho to, sac masaque sac zho lëe mine racladz Dios ga noyun zho.

³ Laa zho gun grë min co, sac niicle PxoZ naaw, niiclegaa naaw, runbeyd zho no.

⁴ 'Laa naa rzodiidz grë min rii niina, zeena zeene gal dze ne laaw noyac, csoladz to ganle grësew bzodiidzle naaw lo to. Bzodiidzd naaw lo to glo, sacne hor co laa naa bii zo lo to.

⁵ Laa niina nagon laa naa gbiche lo to, laa naa gbire guia lo men ne pxeel naa, per ran naa ni tib to zienied guic gnabdiidz dien pa nac zaatne ga naa, dien pe nacgaa ne laa naa ga.

⁶ Lëe gdib mine run to, riab guie|né to ron to grë mine rne naa nu.

⁷ 'Gneli naa lo to ganle: Mazd wen gon tsie to zeene laa naa guia lo men ne pxeel naa, sac telne cuéz naa nu, grielod guiaad men ne guidchoobladz ddo to ga. Sangue telne guia naa, dzigo naazhal cxel me.

⁸ Ni zeene laa me guiaad, me gunquien miech ganle grése zho zha ngoopdol nac zho, me gunquien zho zha laa zho lo dol co guiaanwen zho lo Dios, ni guien zho ne nli zdzin tib dze zeene laa Dios gun xquielwxtis me.

⁹ ¿Pe nacne nac zho miech ngoopdol? Miech ngoopdol nac zho, sacne riladzd zho cho nac naa.

¹⁰ ¿Zha grielo laa zho lo dol co guiaanwen zho lo Dios? Zrielow, mincoxe waa nacne bial naa, ni na laa naa guia zaatne zob PxoZ naa, gandraa to naa.

¹¹ ¿Zha rlu ne nli zun Dios guielwxtis? Nli zun mew, sac gon laa me bnabeyle zha nac gré guielndox ne ygaa mendox, men ne quianabey lo guidzliu rii.

¹² ¿Nzianraa ncuane racladz naa sodiidz naa lo to! Per rien naa grielod tsoquic to zha naca niina.

¹³ Zeene guiaad Espiritu Sant, me gneedz guielbiini lo to guien to gréraa ncuane no gacnan to, ni gréga ncuane naraa gac. Niapse diidzli gnee me, sac led guicd me guiab gré mine gnee me, sinque mine nac xtiidz PxoZ naa, min co gnee me.

¹⁴ Ga glu me lo miech ganle ne nli men nroob, men non nac naa.

¹⁵ Rne naa ga glu me, sac grétaa ncuane rnabey PxoZ naa, yeque naa rnabeya.

¹⁶ Zhilew zeene laa naa gbiche lo to gandraa to naa; per gacdaquew xtse zeene laa to gbiirelaque gan naa stib.

¹⁷⁻¹⁸ Zeene bdzion no sca rnee me, blalaa no psilo no rnabdiidzlsa no rnee no:

—¿Bay zha nacne squi rnee me? ¿Zha nacne rnee me, zhilew dziandraa ne me, per gacdaquew xtse laa ne dzianlaque lo me stib? Ni rneeque me laa me guey lo PxoZ me.

¹⁹ Bien me racladz no gnabdiidz no lo me, dzigo në me lo no:

—¿Racladz to lëë gacnan to zha nacne znu rne naa?

²⁰ Golquiaadiaga sca ganle: Zeene gdzin dze co, laga noyoon to no to guielné ne laa naa biche lo to, laa gréraa miech haxta zley zho ne laa naa wbiche lo zho. Nli nroob guielné ne tso to, per zeene laa to gan naa stib, guielbley nroob ne tso to.

²¹ Nac cuent rii zig rzac tib men wnaa ne ral xpëed. Glo yoob ro, yoobdox ne rquia me, per deque laa mëed co ralse, ni rsoladzdraa me yoob co; sac mazdraa nroob nac guielbley ne rio me ran me laa xpëed me blanso lo guidzliu.

²² Scadaa nagon rzac to, nli mban rac to niina, per zeene laa to gan naa stib, dzigosi tib guielbley nroob ne tso to, ni choot grielod ctiche guielbley co lo to.

²³ Zeene gal dze co, yquiindraa to pe gnabdiidz to lo naa. Ncuane gnabtaa to, lo PxoZ naa gnab tow, ni zneedz mew, sac xnëz naa ngab to.

²⁴ Haxta lo nadze peet gard gnab to, niicle ne xnëz naa ngab to; laa niina laa naa rne lo to ncuane rquiu to gojnaba lo me, ni ible zneedz mew gon. Nroob guielbley ne tso to hor co.

²⁵ Nzian gré ncuane zine naa lo to, rned naaw clar; per laa dze bdzin zeene grése ncuane gne naa, clar gne naaw lo to, zig nac zeene gzet naa PxoZ naa.

²⁶ Ni zig nile naa ga, hor cosi ncuane gnabtaa to lo me, zneedz mew, sac xnëz naa ngab to. Yquiindpaa gne naa lo me gneedz me ncuane gnab to lo me,

²⁷ sac ye me rleyne me to. Rleyne me to, sac gon rleyne to naa ni riladzd to ne nli lo me brie naa bial naa lo guidzliu.

²⁸ Ni nligaa, lo me brie naa bial naa lo guidzliu; ni niina ne laa naa gbi, loque me gdziin naa.

²⁹ Dzigo rdzieets no lo me:

—iNasi nagon rien no zha rnee luu! Sac clar rnee luu, rneedraa luu zigne rnee luu glo.

³⁰ Nasi rien no grëse ncuaañe nan luu, sac zig nac niina pquiindpaa nabdiidz no lo luu. Gacxe waa, nasi nagon riladz no ne nli lo Dios brie luu.

³¹ Pquiab me, nē me:

—iWen ga telne riladz to niina cho nac naa!

³² Per lēē hor co nagon bdzin; ni niina, grëse to laa to csaan naa, tib tib to zhaase zhaase nēz ne xen to. Per guiaand naa loxaque naase, sac tibaque nacie Pxoza naa naa.

³³ Grëse ncuaañe bne naa lo to nu, laaw bne naa zeena peet tsienied guic to, benque nanle to ganle tibaque nacie naa to. Parga nli, laga no to lo guidzliu rii, nzian grē guielnē ne ted to, per gdziebde to; sac gon naa rnabey, ladznia naa no grētaa ncuaañe no lo guidzliu.

17

Rnab Jesús gacniñ Dios xpēēdscuel me

¹ Blozhse sca nē me lo no, blis lo me bui me nēz gbaa.

—Dios, luu ne nac luu Pxoza naa —rēb me—, niina nagon laa dze co bdzin. Blu ganle men nroob nac naa ne nac naa Xpēēd luu, zeena ga glu naa lo miech ganle pa lotaa men nroob nac luu.

² Zigne psan luu grëse miech ladznia naa, ni gdeed naa tib guielmban ndzon ne gdziid dze lozh lo grëse zha ne bneedz luu ngab xnēz naa; scaque niina blu ganle men nroob nac naa.

³ Lēē guielmban co yгаа grëse zha ne gunbey luu, ne nli luuse nac Dios nguia mban, ni guien zho cho nac naa, ne pxeel luu naa bial naa lo guidzliu rii.

⁴ Grëse ncuaañe bnabey luu naa, laaw noyūn naa; ni ga rlu naa lo grē miech rii ganle pa lotaa men nroob nac luu.

⁵ Scagaa luu ne nac luu Pxoza naa, niina ne laa naa glanso lo luu, blu ganle men nroob nac naa; sac desde mazd glo zeene gard tsaa grētaa ncuaañe no, tibaque nac lo guielndzon ne bdzio ne haxta dze ne blanso naa lo guidzliu rii.

⁶ Grëse zha ne ble luu lad grē miech rii bneedz luu lo naa, laa naa pseed zho gunbey zho luu; ni scagaa zha, biladz zho xtiidz luu. Chen luu zho per laa luu bneedz zho lo naa.

⁷ Zig nac niina, grëse ncuaañe bneedz luu lo naa, nanle zho ne luu bneedza,

⁸ sac pseed naa zho grëse wseed ne bneedz luu lo naa, ni biladz zhow. Wen wen gocnan zho ne lo luu i brie naa zial naa lo guidzliu rii, ni riladz zho ne luu pxeel naa.

⁹ Laa naa rnab lo luu gacniñ luu zho. Rnabd naa par grëse miech guidzliu rii, sinque laa naa rnab por grē zha ne bneedz luu lo naa; sac gon chen luu zho,

¹⁰ ni zha glu ganle pa lotaa men nroob nac naa. Grëse zho chen luu zho; sac grëse ncuaañe nacchen naa, chen luuw; ni grēsegaa ncuaañe nacchen luu, chen naaw.

¹¹ Rien naa, led nroobdraa cuēz naa lo guidzliu rii, laa naa gbile guial naa lo luu i; per zha, laa zho guiaanaque nu. Gane niina, luu ne nac luu Pxoza naa, luu ne nac luu tib men ne guiend xtol, laa naa rnab lo luu: pquianap zho ne nac zho zha ne bneedz luu lo naa, zeena ni tib zho nitlod, sinque tibaque gac zho gza zho zigne tibaque nacie grop ne.

¹² Leñ dze ne blëz naa lo zho nu, zigne racladz luu sca pquianaap naa zho. Ni scagaa ni tib zho bnitlod; zha ne bnitlo ga, nole ne sca nitlo zho, zeena sca grieequia mine raquiet lo Xtuidz luu.

¹³ Zhilew laa naa glanso zaatne no luu i; per leñ dze ne blëz naa lo zho nu, nzian grë ncuaañe bne naa lo zho, zeena ye zho tso guieñbley nroob ne no naa.

¹⁴ Pseed naa zho mine nac xtiidz luu; per na rlëë grëraa miech ran zho zho, sacne zianañdraa zho grë ncuaañe ndzinlid ne rac lo guidzliu rii. Nac zho zigne nac naa, rleyñied naa grë ncuaañ co.

¹⁵ Per rnabd naa cuee luu zho lo guidzliu rii, sinque laa naa rnab csaand luu gun zho ncuaañe racladz mendox.

¹⁶ Sac niicle zhaw, niicle naaw, choot zionañd grë ncuaañe ndzinlid ne rac lo guidzliu rii.

¹⁷ Bzhiguiel sca bdeed guieñbiini lo zho guieñ zho zha nac Xtiidz luu, sac Xtiidz luu nac diidzli; zeena dib zdoo zho tsoxco zho gban zho zigne rnabey luu.

¹⁸ Sac gon, niina laa naa rxeñ zho lo grëraa miech guidzliu rii, zigne ne pxeelaque luu naa.

¹⁹ Ni niina, dib zdoo naa laa naa gun mine rnabey luu, zeena ye zho guieñ zho none dib zdoo zho gun zho mine rnabey luu.

Rnab Jesús por grë zha ne ygabraa xnëz me

²⁰ Laa naa rnab gacñeñ luu zho, ni gacñeñ luu zha ne naraa gliladz naa, zeene laa zho tsieseed zho;

²¹ zeena tibaque gac zho, zigne tibaque nac ne grop ne. Ni scaquegaa gacñe zho ne, zeena gliladz grëraa miech ganle ne nli luu pxeel naa.

²² Laa naa psañnon zho zigne psañnonaque luu naa, ni tipse gac zho zigne tibaque nac ne grop ne.

²³ Zigne nacñie luu naa, scaque nacñie naa zho. Bzhiguiel gocñeñ zho, tibaque gac zho grëse zho, zeena gan grëraa miech ganle ne nli luu pxeel naa, ni guieñ zho ganle zigne rleyñie luu naa, scaque tibaque rleyñie luu grëse zha ne ngab lo naa.

²⁴ Papá, grëse zha ne bneedz luu lo naa nu, racladz naa ye zho guiaad zaatne glanso naa i, zeena gan zho lo grëtaa guieñdzon ne no naa. Lo guieñdzon ne bneedz luu lo naa, sac rleyñietaque luu naa haxta zeene gard tsaá guidzliu.

²⁵ Papá, luuse nac meñ ne rapd ni tib dol, niicle ne runbeyd grë miech rii luu, sanque naa runbey naa luu; ni scaquegaa grë zha ne bneedz luu lo naa nu, nanle zho ne luu pxeel naa.

²⁶ Laa naa pseedle zho gocnan zho cho nac luu ni bii seedragaa naa zho, guieñ zho ganle pa lotaa rleyñie luu naa; zeena scaque guieñ zho gleyñie zho samiech zho, ni gacñie zho naa.

18

Bnaaz zho Jesús

(Mt. 26:47-58; Mr. 14:43-50, 53-54; Lc. 22:47-54)

¹ Zeene blozh bñab Jesús lo Dios, laa me brieenie no ga bdieedquia no nëz dan ro psë ne rnee zho Psë Cedron. Ga no tib zaatne zëeb niapse yag nex, dzigo ga bliaaz no gza no me.

² Judas zha ne pto me ga, wen wen runbey Judas lugar co, sac nzian vuelt ziyenie me no ga.

³ Dzigo zeene laa Judas blanso ga, laa Judas blansoniele tib dzoon menguiib, ni zla zha ne rquianap yadoo; no guierbel nia zho blanso zho ga, zha ne

nzhən yag, zha ne nzhəngaa spad. (Lëe grë zha co pxeel grë pxoz rnabey, ni grë zha farisé.)

⁴Loxaque blanso zho, laa Jesús brieequiale, rëb me lo zho:

—¿Cho rguib to?

Sca rëb me sac rienle me pe nacne zie zho ga, nanle me pe nac grëtaa ncuaane ted me.

⁵Pquiab zho, rëb zho:

—Men Nazaret ne lë Jesús, men co ziaadguib no.

Dzigo rëb me:

—Naa nac men co, tel me ziaadguib to.

⁶Zeeñe bin zho rëb me: “Naa nac men co”, whire rzhitsaque zho, grëse zho biab liu. Ye Judas no lad co.

⁷Whiire Jesús bnabdiidz me lo zho, rëb me:

—¿Cho zho rguib to?

Pquiab zho rëb zho:

—Men Nazaret ne lë Jesús, men co rguib no.

⁸—Laa naa nile lo to —rëb me—. Naa nac men co. Telne naa ziaadguib to, golsaan sca guey grë zha ne zo lo naa nu.

⁹Ga brieequia xtiidz me zeeñe rëb me: “Lo grë zha ne bneedz luu lo naa, ni tib zho bnitlod.”

¹⁰Laa Simón ney tib spad, hor co bdobaque Simón spad co psilaa me tib niaw, bliengaa me diag derech tib mgui lë Malcw. (Lëe mgui co quia xtsiin men ne nac pxoz nroob.)

¹¹Zeeñe gon Jesúsaa, rëbchaa me:

—¡Blootsow spad qui Pedr! ¡Bieñ ganle Pxoze naa rnabey znu teed naal! ¿Niacxe gond naa miñe rnabey me naa dzigo?

¹²Horco laa grë menguiib co, grë zho zha ne rnabey lo zho, ni grë zha ne rquianap yadoo ga, laa zho wbigbe bnaaz zho me. Blozhse bzobdoo zho me, laa zho zienie me.

¹³Sca nzobdoo me, laa zho bdziñnie me lidz men ne lë Anás, pxozdzoop Caifás. Caifás nac pxoz nroob len iz co,

¹⁴ni me ga rëb lo grë men non lo zha Israel, ne mazd wena tibaque zha ne ygaa guet, quizh zho par dib guiedz.

Rëb Pedr runbeyd Pedr Jesús

(Mt. 26:69-70; Mr. 14:66-68; Lc. 22:55-57)

¹⁵Zhiits co, ga nal no grop no Pedr. Ni ne runbey naa Caifás men ne nac pxoz nroob ga, zeeñe bdziñ no ro lidz Anás, loxaque naa brieelo bzëeb nëz ley.

¹⁶Laa Pedr, zaatne nactaa ro yu par gdziñ zaatne nac ley, gataa biaan Pedr. Nacne brieque naa bnee naa lo wnaa ne zonap ro yu, dzigora bdeed wnaa co diidz bzëeb Pedr.

¹⁷Dzigo rëbchaa me lo Pedr:

—¿Bod ye luu dzigo lëe nac xpëedscuel men ne bdziñnie zho i?

—Coo, led yed naa —rëb Pedr.

¹⁸Grë zha ne quia xtsiin men co ni grë menguiib ne ndxie ga, laa zho bzëegle gui. Grëse zho, laa zho ndxiedzë lo gui ga, sac rac nal. Ye Pedr bdziñ lo zho ga nodzëe Pedr.

Rquiep Anás Jesús

(Mt. 26:59-66; Mr. 14:55-64; Lc. 22:66-71)

¹⁹Laa nëz len yu, laa Anás psilo noquiep Jesús dien yo grë xpëedscuel me, ni dien pe nac grë wseed ne nolu me lo miech.

²⁰ Dzigo pquiab Jesús, rëb me:

—Grëse miech, nanwen zho ganle pe nac zhiwseed naa. Sac zeene pseed naa zho, bend naa ne ngueets zhliaan nseed naa zho; sinque zaatne rcaalsa nzian miech, ga bne naa lo zho. No hor pseed naa zho len grë yadoo win, nogaa hor pseed naa zho len yadoo nroob ne zob lad guiedz nu.

²¹ Nana bod rieguialda ne lo naa rnabdiidz luu. Mazd lo grë zha co ganle bnabdiidz, zha bin grëtaa ncuane bne naa.

²² Loxaque blozh sca pquiab Jesús, zeene bias tib menguiib ne rquianap yadoo zo gax ga, bdap me lo Jesús.

—¡Bien ganle! —rëb me—. ¡Led squid gon none yquiab luu lo men ne nac pxoz nroob!

²³ Dzigo rëbchaa Jesús:

—Telne rzac luu ben naa falt, bnë dien pe nac diidz ne pxin naa. ¿Te wal rdziladz luu ye, rguin luu zha ne rnee diidzli?

²⁴ Blozh ga scaque nzobdoo Jesús pxee! Anás me lo Caifás, men ne nac pxoz nroob.

Rnee Pedr stib runbeyd Pedr Jesús

(Mt. 26:71-75; Mr. 14:69-72; Lc. 22:58-62)

²⁵ Horco laa Pedr bii zodzëeque lo gui nëz ley. Dzigo wbiire zho bnabdiidz zho lo Pedr, rëb zho:

—¿Bod xpëedscuel men ne blansonie zho i lëe nac luu?

Laane neeli Pedr, le! pquiab Pedr rëb Pedr:

—¡Lëda! ¡Zha gaczhe naa xpëedscuel men qui!

²⁶ Ye tib zhalidz Malcw, zha ne pchug Pedr diag ga, laa zho zodzë lo gui ga, sac ye zho quia xtsiin pxoz nroob co; dzigo rëbchaa zho:

—Ni gon naa name, ye luu no lad zha ne zonie me len yag oliv ga.

²⁷ Wbiire Pedr rëb Pedr runbeyd Pedr me, ni lëetaque hor co laa tib gall pcedz.

Güeynie zho Jesús lo Pilat

(Mt. 27:1-2, 11-14; Mr. 15:1-5; Lc. 23:1-5)

²⁸ Ziadyiinile liuw, zeene laa zho brienie Jesús lidz Caifás, zienie zho me zaatne nac xyulow Pilat, men ne nac gobernador. Zeene bdzin zho, ni tib zho bzëëbd len yulow, sac racladzd zho quiits zho mine rnabey xley lay zho; parne grieelo yquiin zho guielwagw ne row zho lni Pascw co.

²⁹ Nacne briece Pilat bnabdiidz Pilat lo zho, rëb Pilat:

—¿Pe nacne ziaadnie to men qui nu? ¿Pe rquiaqui to me?

³⁰ Pquiab zho, rëb zho:

—¡Por grëtaa guelntseeb ne noyun me, gane ziaadnie no me! ¡Telne niac me men ndzinli, niacxe lega guiaad-zo no me lo luu!

³¹ Dzigo rëbchaa Pilat:

—Golsënie me, tose golgunquizh me mine been me; zigne nac xley to.

—Racladz no guetgazh me —rëb zho—. Ni nanle luu ganle, no ne nac no men Israel, grieelod ne nose gnabey guet tib miech.

³² Ga brieequia mine bnee Jesús, zeene bzeet me ible zut miech me.

³³ Dzigo bzëëb Pilat len yulow, bnabey me gocredz Jesús. Dzigo bnabdiidz me lo Jesús, rëb me:

—¿Pe nli luu nac zhirey men Israel?

³⁴ —Ne squi rnee luu —rëb Jesús—. ¿Pe guic luu biaba, te no cho nëw lo luu ye?

³⁵ Pquiab Pilat, rëb Pilat:

—Nanle luu ganle led zha Israeld naa. ¿Pe nac sca ne ziaadnie zho luu nu? ¿Pe been luu? Sac gon zha ladzaque luu grë zho zha ne rnabey lo zhipxoz zho, zha biaadsan luu nu.

³⁶ Dzigo rëbchaa Jesús:

—Nli rey nac naa, per led lo guidzliu riida, telne niaca miñe lo guidzliu riiw, dzigosi grëse zha ne nacie naa niactseeb zho, nsaand zho naaz zha Israel naa. Per na, zhaa zaatne nac naa rey.

³⁷ Pquiab Pilat, rëb Pilat:

—¿Rey luu dzigo lëê?

—Scaw gon —rëb Jesús—, nli rey naa; zigne rnee luu i. Ible min co nacie bial naa gol naa lo guidzliu rii, ni bial naa bialseed naa miech gunbey zho miñe nac diidzli. Ni zha ne zienal miñe nac diidzli, zha co ngab lo naa.

³⁸ —¿Diidzli ye? —rëb Pilat.

Bnabey Pilat tsiegut zho Jesús

(Mt. 27:15-31; Mr. 15:6-20; Lc. 23:13-25)

Zigne blozh sca rëb Pilat, brieë Pilat ga güeynee Pilat lo grë zha ne bdziñnie me ga, rëb Pilat lo zho:

—Ni tib dol gon rapd men rii.

³⁹ Per gzobse lni Pascw rii, rnab to rlaa cholze tib zha ne no ladzguiib. ¿Pe gnë to sca, mazd csilaa naa men ne nac zhirey to nu?

⁴⁰ Pquiabbe zho, rëb zho:

—¡Csilaad luu me! ¡Mazd psilaa Barrabás!

Ni laa Barrabás tib ngbaan nac Barrabás.

19

¹ Zeene gon Pilat sca rac zho, dzigo bnabey Pilat bla menguiib, bdeed dooguid zho Jesús.

² Bzieecw zho bla lë yag guiets bzoob zho guic me, ni bgacw zho me tib lë lar nizhnie nlaan.

³ Dzigo psilo zho runnguzee zho me, nguiedz roptsie zho rnee zho:

—¡Bley na ganle, laa luu nacle zhirey zha Israel!

Ni rgap zho lo me.

⁴ Wbiire Pilat brieëquia Pilat zaatne ndxie grë miech co, rëb Pilat lo zho:

—Golwi ganle laa naa cuee me, glu naa me lo to, per gacnan to ganle rieguiald guet me; laa naa pquieple me rlu ni tib guieñtseeb beend me.

⁵ Zeene laa Jesús brieëquia, nzobguicse me coron yag guiets co, ni nacw me lar nizhnie co.

—Golwi na ganle —rëb Pilat—, lëê me nu.

⁶ Grë pxoz ne rnabey, ni grë menguiib ne rquianap yadoo, zeene gon zho me, psilo zho nguiedz roptsie zho rnee zho:

—¡None guet me! ¡Bnabey yquia me lo cruz!

Dzigo rëbchaa Pilat:

—¡Goltsienie me sca! ¡To golquiaa me lo cruz! Sangue naa, grieelod yquia naa me lo cruz; sac laa naa gonle peet guieñtseeb beend me.

⁷ Pquiab zho rëb zho:

—¡Rdziaap no xley no! Ni ley co rnabey ib none guet me, sac rquidie me rnee me laa me nac Xpëed Dios.

⁸ Zeene bin Pilat sca rëb zho, mazdraa bdzieb me.

⁹ Dzigo bzëëbnie me Jesús len yulow stib, bnabdiidz me lo Jesús, rëb me:

—¿Bnë dien cho menpaa nac luu? ¿Pa nac ladz luu?

Per ib pquiabd Jesús lo xtiidz Pilat.

10 Dzigo rëb Pilat:

—¿Pe nacne rquiabd luu? ¿Gon ganle naa rnabey, zrieelo csilaa naa luu, o gnabeygaa naa yquiaa luu lo cruz?

11 Pquiab Jesús, rëb me:

—Nli luu nac zha rnabey niina, per telne niaca mine needzd Dios guielrnabey qui lo luu, grieelod ne luu gnabey zha gac naa. Mincoxe waa, zhi nac xtol luu, mazdraa nac xtol zha ne biaadlo naa nia luu.

12 Dzigo gocladz Pilat nsilaa me Jesús, per bzhiguield grë zha ne güeyसान me ga.

—Telne laa luu csilaa mguì qui gon —rëb zho—, rriequia dzigo ye luu rlëenie César. Sac gon, grëse zha ne racladz gac rey, lo César ga racndaan zho.

13 Zeene bin Pilat sca rëb grë miech co, bnabey Pilat briece Jesús nèz ley stib. Dzigo güeysob Pilat lo xcan ne zo ley co, zaatne rzob me run me guielwxtis. (Dipse ley co, niapse quie lag now; gane rnee zha Israela Gabata.)

14 Lëe dze vispr Ini Pascw co ga nagon, zig grolle dzew noyac grë min co. Dzigo rëb Pilat lo zho:

—Laa zhirey to nu gon. ¡Golsënie me!

15 Psilo zho stib, nguiedz roptsie zho, rnee zho:

—¡Beetgazh men qui! ¡Bnabey yquia me lo cruz!

Rëbchaa Pilat:

—Zhirey to nac me, ¿ni racladz to ye gnabey naa yquia me lo cruz?

Pquiabbe grë pxoz ne rnabey rëb zho:

—¡Tibaque men ne nac zhirey no, ni lëe men co nac César!

16 Dzigotaa mazd laa Pilat bloo Jesús nia zha ne tsiequiaa me lo cruz.

Pquia Jesús lo cruz

(Mt. 27:32-44; Mr. 15:21-32; Lc. 23:26-43)

17 Zeene laa Jesús briece ga, rna tib cruz nroob ney me; laa zho zienie me. Bdzinnie zho me ro guiedz, zaatne rnee zho “Gui Beerguic Ngutoo”;

18 ga pquiaa zho me lo cruz. Ni pquiaa zho schop zha ntseeb, tibga zhiczuz zho bzo cue zhiczuz me.

19-20 Bnabey Pilat pquia bla lan diidz guic zhiczuz me, rneew: “LËË JESUS MEN NAZARET NU, MEN NE NAC ZHIREY ZHA ISRAEL.” Pquiaw xtiidz zha Israel, xtiidz zha Roma ni xtiidz zha Gres. Nzian zha Israel gon sca quia guic zhiczuz me, sac gaxpaa ro guiedz nac zaatne pquiaa zho me lo cruz ga.

21 Nacne güey grë pxoz rnabey, güeylisqui zhow lo Pilat, rëb zho:

—¿Pe nacne pquiaa luu guic zhiczuz mguì co, ne me nac zhirey zha Israel? Pe gacd nquiaa luu: “Rnee me, me nac zhirey zha Israel.”

22 Pquiab Pilat rëb Pilat:

—Mine pquia naa, laaw pquiale ga. Ni sca none guiaana.

23 Laa grë menguiib ne pquiaa Jesús lo cruz ga, zeene blozh pquiaa zho me lo cruz, bzhen zho xab me been zhow tap lë, tib lëgaw biaannie zho tib tib zho. Laa lar ne rbix me, tiblagaque naca, ndiibda;

24 dzigo rëbchaa zho:

—Minritaa nagon dziuungrold ne. Mine naca gotsaa dzio new rif, dzigo zha ne grieequia zha co guiaanniew.

Ga briequia mine raquiet lo Xtiidz Dios, zaatne rnee: “Xab naa, mine racw naa nzian lë been zhow bgaaza lo zho; laa mine rbix naa, bio zhow rif.” Ni scadaa been gza menguiib co.

25 Gax zaatne zo zhiczuz Jesús ga, zo blalaa men wnaa. Ga zo xniaa Jesús, zo tib bel xniaa me, zo Marí tsieel Cleof, ni Marí Magdal.

²⁶ Gaxaque ga zo naa. Zeene gon Jesús xniaa me, ni gon me naa, rëbchaa me lo xniaa me:

—Been cuent nagon lëë xpëed luu i zo i.

²⁷ Laa lo naa në me:

—Been cuent lëë xniaa luu i gon. Bzhiguiel luu gan me.

Dzigo desde dze co, pcaania naa xniaa me bianie naa me lidz naa, pteedlo naa me.

Gut Jesús

(Mt. 27:45-56; Mr. 15:33-41; Lc. 23:44-49)

²⁸ Rienle Jesús ne gataa laa me psiaal dziin ne pxeel pxoz me me gun me, ni par grieequia grëse zigne rzeet lo Xtuidz Dios ted me, hor co bredz me rëb me:

—Rnab zhis naa.

²⁹ Gax lo grë menguiib ne quianap me ga, ga zo tib cant win no nziu bla. Zeene bin zho sca rëb me, rias tib zho bgadz zho tib lë zhiil lo nziu co, bzoob zhow guic tib goobgui nool güeyquiaa zhow ro me.

³⁰ Zeene bdziñ nziu co ro me, pquiin me niipa, dzigo rëbchaa me:

—Lëew nagon, nataa laaw bza.

Zeene blozh sca bnee me, znuse pqianrun guic me; laa me blozh.

³¹ Guini liu co nac tib dze ne mazdraa nda lo zha Israel. Nacne güey grë zha ne rnabey lo menguiiedz güeynee zho lo Pilat, gnabey Pilat tsietiits zho gzhíbni Jesús ni zha ne pquiagza me lo cruz ga, zeena guietgazh zho lo cruz dze co; sac racladz zho scaque quia zho lo cruz zeene laa dze nda co gdziñ.

³² Dzigo pxeel Pilat bla menguiib. Zeene bdziñ zho, glose güeytiits zho ni tib zha ne quiagza Jesús lo cruz ga; blozh ga, güeytiitsaque zho ni stib zho.

³³ Zeene bdziñ zho zaatne zo zhicruz Jesús, gon zho laa me gutle; nacne bdiitsd zho ni me.

³⁴ Horco wbig tib menguiib co, bliz zho xlanz zho ro xcuxti me. Zeene bdob zho lanz co, nis ne, ren ne brieeg ga.

³⁵ Naazhal gon znu been zho me. Laaw rne naa lo to zigne gocsew. Golliladza, sac ne nligaa diidzliw.

³⁶ Ga brieegquia mine raquiet lo Xtuidz Dios, zaatne rnee: “Ni tib dzit ne no me quiitsd zho.”

³⁷ Ni stib lugar, zaatne rnee: “Bii zanaque zho ganle cho nac men ne bliz lanz zho ga.”

Bgweets Jesús

(Mt. 27:57-61; Mr. 15:42-47; Lc. 23:50-56)

³⁸ Laa José, tib men Arimaté, zeene bin me laa Jesús gutle, dzigo güey me lo Pilat güeynab me diidzbey par griee lo tselit me xcuerp Jesús lo cruz. Ye me xpëedsuel Jesús nac me, per pxobnend me ne ye me nacgza Jesús; sacne rdzieb me grë men Israel ne rlëë lo Jesús. Dzigo bdeed Pilat diidzbey.

³⁹ Nicodem, men ne güeyzodiidznie Jesús ga tib pcow liu, ye me güeynal zhits José; güeynie me zig galptsiiptap kil tiblo zënex ne raa yaal ne lë mirr ni yaal ne lë áloe.

⁴⁰ Zeene blozh biet Jesús lo cruz, psilo zho bdëeb zho zënex co xcuerp me; blozh ga, pchel zho me tib lar nquits; sac sca rqueets grë men Israel zhingutoo zho.

⁴¹ Gax zaatne quia Jesús lo cruz ga, niaa tib corral no niapse yag nex. Len corral co, ga ndieen tib baa tib cho quie, ni tib ngutoo gard ygueets len baa co;

⁴² dzigo nacne gase güeyqueets zho me, sac zhile runfalt seëb dze nda co, ni baa cose nac miñe riaan gax ga.

20

BRIEEBAN JESUS

(Mt. 28:1-10; Mr. 16:1-8; Lc. 24:1-12)

¹ Goḷ dze ne rzobni zhmalá, silgaw, scase bii ncow rnaw, brie Marí Magdal zie me ro baan Jesús. Zeene bdziñ me, goñ me laa quie ne nioog ro baa co bdioble, laaw zole tib nēz.

² Horco lēēlēd wbire nguzhoon me, biaad me zaatne no no grop no Pedr, biaadnie me diidz lo no, nē me laa zho güeybeele Jesús len baa, dieen palo güeyšan zho me.

³ Dzigo lēēlēd, brie no grop no Pedr, zioso no ro baa.

⁴⁻⁵ Zeene bdziñ naa ro baa, blēz naa niip, dzigo bdiixlo naa len baa goñ naa laa lar ne briel me zhoob ga; per bzēēbd naa. Laa naa blozhdze bdiixlo len baa, zeene laa Pedr blanso.

⁶ Zigne blanso Pedr bzēēb Pedr len baa, goñ Pedr nligaa laa lar co zhoob ga,

⁷ niicle lar ne briel guic mew, laaw zhoobaque ga; ndibēdsew, zhooba tib lad.

⁸ Nacne bzēēbaque naa. Zeene goñ naa zha zhoob lar co, dzigoraá bliladz naa ne nli brieaban me.

⁹ ¡Sac hor co, bii gard tso guic naa zha rnee lo Xtiidz Dios; sac ga raquiet ne ible zrieaban me!

Goñ Marí Magdal Jesús

(Mr. 16:9-11)

¹⁰ Ye Marí biire blanso ro baa ga stib. Zeene wbii no ga grop no Pedr, laa Marí bii zo ro baa ga.

¹¹ Ga name zo Marí roon me. Sca roon me, tibaque zeene bui me nēz len baa co,

¹² goñ me laa chop anjl zob leen co. Dib nquitsbiese rna xab grop anjl co, tib me zob nēz ne bzhoob guic Jesús, stib me zob nēz ne bio ni me;

¹³ dzigo rēbchaa me lo Marí:

—¿Pe nacne roon luu?

—Roon naa —rēb Marí—, sac laa zho biadbee xcuerp Jesús nu, na dieen pa güeyšan zho me.

¹⁴ Loxaque blozh sca bnee me, zeene ptsire lo me goñ me laa tib meñ co zo gax zhits me. ¡Per ib beenbeyd me ne Jesúsá!

¹⁵ —¿Pe nacne roon luu? —rēb Jesús—. ¿Cho rguib luu?

Leḷ güeynie guic Marí rēb me bod meñ ne rquianap gaw, dzigo rēbchaa me: —Bzhiguieḷ, telne luu biadbee me nu, bnē dien pa lo güeyšan luu me; zeena ga naa gaxi naa me.

¹⁶ Horco bneelē Jesús Marí, bredz me me. Zeene bin Marí lē me, lēēlēd biecw me; dzigoraá beenbey me Jesús.

—¡Maestro! —rēb me—. ¡Mod luu i!

Laa me zie gbig me lo Jesús.

¹⁷ Dzigo rēbchaa Jesús:

—¡Xeeñd luu naa! Sac gard guia naa lo Pxoꝝ naa gbaa. Miñe naca, güey güeynie diidz lo grē zha ne bzēnal zhits naa; gudz lo zho: Laa naa nole nēz guia naa lo meñ ne nac Pxoꝝ ne, meñ ne nac Dios ne rdziuunbey ne.

¹⁸ Horco lëelëd wbi Marí ga, ziaadnie me diidz lo no. Blanso me bzodiidz me zha gon me Jesús, ni në me lo no zigne rëbse Jesús lo me ga.

Brieequia Jesús lo xpëëdsuel me
(Mt. 28:16-20; Mr. 16:14-18; Lc. 24:36-49)

¹⁹ Pcow liu dze dmingw co, grëse no ne nac no xpëëdsuel me laa no pcaalsa; loxaque Mazh runfalt. Dziits nquiaa no yag yu, sac rdzieeb no grë zha Israel ne rlënie me. Laa no ndxie ga, tibaque zeene brieequia me bzo me glowtaa lo no; pquiaabdiuzh me no.

²⁰ Blozhse pquiaabdiuzh me no, dzigo blu me len nia me lo no, zaatne biaaz clav zeene pquia me lo cruz, ni blu me ro xcuxti me. ¡Grëse no per nli rley no zeene bdzion no ne nli mew!

²¹ Blozh ga, në me lo no:

—¡Laa naa rnedz tib guielbley zdo to, zeena peet tsienied guic to! Zigne pxeel Pxoza naa naa bial naa, scagaa niina laa naa rxel to.

²² Dzigo blub me lo no grëse no.

—Golcaania Espiritu Sant —në me—.

²³ Ni zeene gon gun to tib mieh perdon, scaque Dios zun me zho perdon; laa telne siguel d zho gun to zho perdon, laa zho biaanle lo xtol zho ga.

Gon Mazh Jesús

²⁴⁻²⁵ Zeene bdzion no Mazh (Mazh ne rnee zho “Mëëdgrop” ga), bzodiidz now lo Mazh, per bliladz Mazha, rnee Mazh:

—Rliladz naa mine rnee to i gon. Zliladz naaw, per haxta ganlo naa me, haxta gan naa len nia me zaatne biaaz clav, ni cteed-xug naa ga; ni csëëbnia naa ro xcuxti me zaatne biaaz lanz ga.

²⁶ Goc xon ngbidza, laa no pcaalsaque len yu co stib; hor cosi yele Mazh ndxiegrë no ga. Scaque dziits nsioog no ro yu, per tibaque zeene bdzion no laa Jesús bzëëb len yu ga stib, bzo me glowtaa lo no, pquiaabdiuzh me no. Blozhse pquiaabdiuzh me no,

²⁷ rëbcha me lo Mazh:

—Wbig na Mazh, bui len nia naa, psëëb mzhugnia luu nu. Dien nia luu nu, psëëbnia ro xcuxti naa. Gacchopdraa guic luu, sinque bliladz ganle ne nli mban naa.

²⁸ Dzigoraa bliladz Mazh ne nli mban me.

—Nasi rliladz naa mban luu —rëb Mazh—. Luu nac men ne rnabey naa, luu nac xDios naa.

²⁹ Pquiab Jesús rëb me:

—Laa luu rliladz niina, lëëcxë laa luu gonle naa waa. ¡Dichos zha ne gliladz ne nli mban naa, niicle ran d zho naa!

¡Pe nacne pquia grë diidz rii?

³⁰ Lo lal ne bzënie Jesús no, ndaldoo milagr ne bdzion no been me, led grëda raquiet lo guits rii.

³¹ Mine pquiase naa nu, laaw pquia naa zeena zeene glab tow, guien to ganle ni gliladz to: Jesús nac men ne bиаadsilaa ne lo xtol ne, Dios bzooblo me bиаad me, ni Xpëëd Dios nac me; sac zha ne dib zdo gliladz cho nac me, zgaa zho tib guielmban ndzon ne gdziñd dze lozh.

21

Gon zho Jesús Galilé

¹ Bded ga, wbiire brieequia Jesús lo no stib, zaatne nac ro nisdoo nroob ne rnee zho Tiberias.

² Tib bdze dzew, tipse ndxie no gza no Simón Pedr; Mazh, Natanael (men ne nac men Caná ga), bets naa Jacob ni schop zha ne nacgza no.

³ Tibaque zeene nê Pedr; laa Pedr tsie gooz meĭ. Dzigo rdzieets no:

—Yeque no sca zia guio ne.

Dzigo bziaab no tib len barcw win gza no, laa no zio.

Dipse guieel bdzienie no barcw co lo nis, per ni tib meĭ bgaad.

⁴ Laa liu ziaadle lozh guini, zeene bdzion no laa tib men co zo ro nis, per ni tib no bdziunbeyd me.

⁵ Dzigo bnee men co lo no, nê me:

—Yo to dien xin, ĩpe bгаа ma?

Pquiab no rdzieets no lo me:

—Choot ma bgaad.

⁶ Dzigo nêchaa me:

—Golron guix ne rгаа ma i nêz derech ganle, znaaz to ma.

Dzigo bron no guix co nêz derech. Zeene laa no cueew lo nis, ib lëbd no glis now; ndaldoo meĭ ne biodzê lena.

⁷ —ĭPedr! —rep naa—. ĭBina ganle, xmaistr ne i gon!

Zeene bin Pedra, lëliëd wbix Pedr xab Pedr, biab Pedr lo nis; psilo Pedr bzhoobnis Pedr brieequia Pedr ro nis.

⁸ Laa no biaan len barcw ga; nole bdzinnew zaatne nac ro nis. Maase tapgaltsii metr sca bdioobniu no guix co lo nis.

⁹ Zeene briece no len barcw, bdzion no laa gui noyecle, laa tib meĭ zhooble lo gui co, ye guietxtil ne.

¹⁰ Dzigo nê Jesús lo no:

—Goltënie bla meĭ ne blozh bnaaz to i nu dien.

¹¹ Dzigo güey Pedr biepe me len barcw, güeyxadz me guix ne no meĭ ga; dzigo bdoobniu mew bdzinne mew haxta zaatne nacpaa ro nis. Meĭ tafa, niapse ma mbeew, zeene bgab ma rгаа ma tib gayoo chooptsiptson lo grê ma; niicle scataa nzian ma, per lëb guix co, briezda.

¹² Blozh ga, bredz me no, nê me:

—ĭGoltë na, zeena gowxeren to!

Ni tib no bnabdiidzd lo me dien pe nli mew; sac, ĭrienpaa no ne nli mew!

¹³ Dzigo wbig me bdiiz me guietxtil co lo no, bzhen me meĭ ne, bneedz me ma lo no.

¹⁴ Ga bion vuilt brieequia me lo no wlal ne brieegan me.

Bzodiidznie Jesús Pedr

¹⁵ Blozhse bdioowxeren no, bredz Jesús Pedr; psilo zho bzê zho grop zho; dzigo rëb me lo Pedr:

—Simón (xingan Jonás), ĩpe nli dzigo rleynieraa luu naa que grê zha qui?

—Nquialadz naa luu —rëb Pedr—, ni nanlegaa luuw ganle.

—Pteedlo grê xpëcwxiil win naa sca —rëb me.

¹⁶ Wbiire me, rëb me lo Pedr:

—Simón (xingan Jonás), ĩpe nliipaa dzigo rleynie luu naa?

—Nquialadz naa luu —rëb Pedr.

Dzigo rëb me:

—Pquianap xpëcwxiil naa sca.

¹⁷ Wbiireque me stib rëb me lo Pedr:

—Simón (xingan Jonás), ĩpe nliipaa nquialadz luu naa?

Zeene bin Pedr sca rëb me, mban goc zdoo Pedr; sac gale rac tson vuilt zinabdiidz me lo Pedr, dzigo rëb Pedr:

—Luu nac men ne rnabey, luu nana grësew, nan luu ganle nquialadz naa luu.

Dzigo rëb me:

—Telne nli nquialadz luu naa, yquiaanap luu xpëcwxiil naa sca.

¹⁸ Zeene gon bii nguieg luu, led rsoladz luu ganle luuzhal racw xab luu, rrieelo rie luu zaatne racladztaa luu; per zeene gon laa luu gac mengolraa, loxaque nia luu glis luu zhaale zha ne ygacwxab luu, ni zienie zho luu zaatne ni racladzd luu.

¹⁹ Zeene znu rëb me lo Pedr, ga bzeet me zha nac guielgut ne yгаа Pedr, ni ga glu Pedr ganle pa lotaa men nroob nac Dios. Blozhse ga, rëbchaa me:

—jDënal zhits naa!

²⁰ Dzigo nalaque naa zhits me grop me Pedr. Zeene ptsire lo Pedr, gon Pedr laa mëédscuel ne scataa rleyne me ga, laa zho nal ga, zha ne zobpaa cue me ga lo xtsee co, zha ne wbigpaa bnabdiidz lo me dien cho nac zha ne tsielo me lадznia zha ne gut me; dzigo rëbchaa Pedr lo me:

²¹ —Telzhe zha rii waa, ¿pe nac mine ted zho?

²² Rëbchaa me:

—¿Pe nadien gun luu ne racladz luu gacnan luuw? Telne gacladz naa, zrieelo gnabey naa gban mgui haxta len dze ne guial naa stib. Led xcuenta luu ga. jNa zeen dënal zhits naa!

²³ Zeene gocnan grëraa zha ne rililadz Jesús sca bnee me, grëse zho tibaque güeynie guic zho gdzindraa dze guet naa. Per led scada, sinque znu naca, rëb me: jPe gun Pedr! Telne gacladz me, zrieelo gnabey me gban naa haxta gal dze ne guiaad me stib.

²⁴ Grëse mine pquia naa nu gon, grop lo naa gon naaw, grëse zha ne nacgrë no nanpaa zho ganle ne diidzli rne naa.

²⁵ Ndaldooraa grë ncuaañe nroob ne been Jesús, tel niaca mine yquiw grësew, ni ygaad dib lo guidzliu tsotsow grë guits ne yquiw ga.

MINE BEEN ZHA NE PXEEL JESÚS BNEE XTIDZ ME

¡Diuzh Tiofl!

¹ ¿Yose luu dien bets? Naa gon nac Luc, laa naa rxel stib guits rii lo luu. Mine pxel naa lo luu glo ga, lo co pquia naa grëse mine been Jesús, grëse wseed ne blu me lo miech zeene psilo me xtsiin me

² haxta gol dze ne psan me diidz pe nac ncuane gon grë zha ne bzooblo me tsie tsienee Xtiidz me. Espíritu Sant bdeed guielbiini lo zho bien zho zha racladz me; lëe dze co ga zey me gbaa.

³ Nli psacsi miech me, beet zho me, per brieegan me. Ni par glu ganle ne nli brieegan me, dipsa len choo ngbidz brieequia me lo grë zha ne sca bzooblo me tsienee Xtiidz me. Gzataa zeene rrieequia me lo zho, rnee me lo zho zha rnabey Dios.

⁴ Tib vuelt ndxie zho grë zho me, dzigo pso me diidz lo zho ible grieed zho lad guiedz Jerusalén, haxta quiet Espíritu Sant gdeed guielbiini lo zho zigne nacle xtiidz Pxo; ni biire rëb me lo zho:

⁵ —Golsoladz ganle laa naa nile lo to: nli laa Juan pchoobnis, per niab nisa; sangue to zgaa to guielbiini ne gneedz Espíritu Sant, rrieequia Espíritu co chobnis to; ni zhile gdziñ dze ne laa miñ co gac.

⁶ Len ngbidz ne sca nolulo me lo zho, tib vuelt bnabdiidz zho lo me, rëb zho:

—Ndion no men rnabey nac luu. ¿Pe niina na so luu gnabey luu, zeena cuee luu zha Israel ladznia zha Roma?

⁷ Dzigo pquiab me rëb me lo zho:

—Dios, men ne nac Pxo; naa, ncuane gon me rieguialde to gacnan tow, mese nan dien pa dzew, dien pa horgaaw; sac mese nac men ne grieelo gūa.

⁸ Sinque to, zeene laa Espíritu Sant gneedz guielbiini lo to, hor co laa to ygaa poder ne rap me, laa to csilo gnee lo grë zha Jerusalén cho nac naa; tsie to dib xtan zha Judé, dib xtan zha Samar, ni lo grëragaa miech, tsienee tow.

⁹ Blozhse sca bnee me lo zho, zowique zho lo me, dzega, dzega laa me bzoquia gbaa. Glaale ziequia me zeene znuse bdop tib xcow, laa me biongueetsse len xcow co, gondraa zho me.

¹⁰ Laa zho bii quiawique zhan gbaa zaatne gon zho biongueets me ga, tibaque zeene bdziñ chop mgui zaatne zo zho ga, dib nquitsbiese rna xab grop mgui co;

¹¹ rëb me lo zho:

—¿Pe nacre squitaa quiawi to zhan gbaa? Zigne gon to i nagon zey me gbaa niina, squique quiet me gbaa gal dze ne laa me guiaad stib.

¹² Blozh ga dzigo laa zho wbi guic gui co (lëe Gui Oliv ga). Zhisaque bzë zho laa zho bdziñle Jerusalén, lalse ne rzë zho dze ne rdziiladz zho lo dziin.

¹³ Bdziñ zho zaatne rbëz zho, biep zho len yu ne riaan glaa; sac len yu glaa co ga no zho. Ga rbëz Pedr, rbëz Ndrés, Jacob, Juan, Lip, Mazh, Bartol, Matew, ni Jacob ne nac xingan Alfé; Simón Zelot, ni Judas menlidz Jacob.

¹⁴ Grëse zho tibaque rcaalsa zho rzodiidznie zho Dios grë zho zha bets Jesús, xniaa me Marí, ni grëraa men wnaa ne nacgrë zho.

Bzo zha ne gon dziin ne psaan Judas

¹⁵ Tib dze pcaalsa maase tib gayoo gal zho, dzigo guso Pedr bnee me lo zho, rëb me:

¹⁶ —Grëse to bets, grëse to bzian, golgacnan ganle, mine been Judas zeene sca güeyto me Jesús, nole ne sca gaca. Lo Xtii dz Dios zho bnee, lëe min co pquiaa rey David zeene psiaab Espiritu Santa guic me.

¹⁷ Ye Judas gogza no, ye me nac diidz niun dziin ne nodziun no niina.

¹⁸ Ni nligaa laa ne niun me dziin co, lele been me guielntseeb pto me Jesús, ni blozh ga lëe que lo liu ne bziuu dimi ne bdiizh zho me ga, ga güeytsobe me zbob guic me lo liu, wbilgash me, nëzrii nëzrec bliiaal len me.

¹⁹ Min co nacne zeene laa grë zha Jerusalén gocnana, dzigo bleelë zho liu co “Liu Ren”.

²⁰ Zigne rneque naa ga —rëb Pedr—, ible lo Xtii dz Dios sca zho bnee; ni lëe min co ga raquiet zaatne znu rnee:

Ible ziaandets lidz zho,

ni stib choot gbandraa zaatne bio zho.

Ni rneequew:

Zhaale zha ne guiaannie dziin ne no niun zho.

²¹⁻²² Min co nagon, ible nonguie la so tib zha ne guiaan xlugar Judas, gacgza zho no guioxobnen no ne nli brieeban Jesús. Nana sca, lo grë zha ne nacgrë no psilo bzianie no me zeene pchoobnis Juan me, haxta gol dze ne laa me zey gbaa, lad co golgotsaa cue ne tib zha ne so gacgza no.

²³ Dzigo ble zho tib men ne lë José Barsabás (lëe que me ga rnee zho Just), ni stib men ne lë Matí.

²⁴ Blozh ga, bnaab zho lo Dios, rëb zho:

—Dios, ndion no luu nac men ne rnabey no; ndion no luuse nac men ne runbey zdoo tib tib miech, gane niina laa no rnab lo luu, luu blu dien cho tib zha rii racladz luu so

²⁵ gun dziin ne psaan Judas; sac laa Judas zeyle zaatne rieguial Judas.

²⁶ Blozhse bnaab zho lo Dios, laa grop zha co bio rif. Nacne brieequia men ne lë Matí ga, dzigo dze cotaa laa me gogza stsiptib zha poxtl co.

2

Biaad Espiritu Sant

¹ Zeene goc gadz zhmal gut Jesús, lëetaque dze co run grë zha Israel lni ne rnee zho Pentecostés. Dze co grëse zha ne no xnëz Jesús, laa zho pcaalsa.

² Laa zho ndxie grë zho, tibaque zeene bio tib bi nroob zhan gbaa, zig nac zeene rrie tib medox, haxta len yu ne ndxie zho ga pquiab;

³ ni brieequia nzian biini, rluw zig nac ludz miech, tibga tibga biini co blëz guic zho grëse zho.

⁴ Horco grëse zho pcaania guielbiini ne bdeed Espiritu Sant, psilo zho rnee zho grë xtii dz stib miech mine rsiaabta me guic zho.

⁵ Len dze co nziandoo grë zha Israel ne no stib ladz ben bdzin Jerusalén, grë zha ne bii zianal xley Dios.

⁶ Laa zeene bio bi co, ye zho no lad grë miech guizhiu ne bdopbe zaatne zob yu co; tib tib zho zeene bin zho laa grë zha ne pcaania guielbiini co nonee xtii dz zho, per nli rzee zdoo zho.

⁷⁻⁸ Rlozhd gwi zho rnee zho:

—Pe nli diidz rii! ¿Zha rrieelo rnee grë zha qui xtii dz ne, ni led zha Galilé nac zho? ¡Tib tib ne ndxie ne nu, zhaase zhaase diidz ne rnee ne!

⁹⁻¹⁰ Nu ndxie grë men Part, men Media, men Elam, men Mesopotam, men Judé, men Capadós, men Pont, men Asia, men Frij, men Panfil, men

Egipt, haxta grë meñ ne ziaad nëz África, delant guiedz Ciren; grë meñ Cret, meñ Arab, grë zha Israel ne ziaad nëz Roma, grë meñ Roma, zha ne zianal zhiwseed zha Israel.

¹¹ Pe zhidaa ne —rnee zho—, ni diidz ne rneepaa ne tib tib ne laa ne nodzion rnee zha qui grëtaa milagr nroob ne ruñ Dios.

¹² Grëse zho per nli rzee zdoo zho, rdzieldraa zho zha guñ zho, rnabdiidzlsa zho rnee zho:

—¿Bay pe i? ¡Ncuuañe gard dzian ne!

¹³ Laa nogaa zho rzhidznie, rnee zho:

—Rzudz grë zha qui, gane squi rzë xtiidz zho.

Bdeed Pedr tib lban

¹⁴ Dzigo bzoli Pedr gza me stsiiptib zha ne nac poxtl ga, psilo me nguiedz bnee me lo grë miech ne ndxie ga, rëb me lo zho:

—Grëse to, zigtaa zha Jerusaléna, zigtagaa zha ne blanso Jerusalén nuw, golgona ganle.

¹⁵ No bla to quianee rëb to rzuudz no, per led rzuudzd no. Griinpaale name blan ngbidz, niicle niaca zha ne riepaa nziu, niacxe goon nale laa zho gzudz.

¹⁶ Led rzuudzd no, sinque niina nagon noyac grë mine bzeet Joel padzeela (tib meñ ne biadteed xtiidz Dios), zeene znu rëb me:

¹⁷ Znu rnee Dios:

Zeene wzhile runfalt ga dze co, laa naa cxel zhiEspíritu naa zdoo grëse miech; grë xingan zhow, grë xindzooop zhow, laa zho cteed xtidz naa, grë zha nguieg, nzian grë ncuuañe glulo lo zho, grë mengol, nzian grë ncuuañe glu mcaal lo me.

¹⁸ Len dze co,

grëse zha ne nguzobdiidz lo naa, niicle mguiw, niicle wnaaw laa naa cxel zhiEspíritu naa zdoo zho, dzigo grëse zho cteed xtidz naa.

¹⁹ Nzian grë ncuuañe gzee zdoo to glu naa zhan gbaa, scaque lo guidzliu, zan to ren, zan to bel, zan to grë goxdoo.

²⁰ Zeene zhile gdziñ dze ne guiaad meñ ne rnabey ne, laa lo ngbidz ycow, laa mëë gna nizhnie zig rna ren.

Dze ne guiaad me ga,

dze co gac tib dze ne mazdraa nroob, tib dze ne mazdraa ndzon.

²¹ Grëse zha ne dib zdoo gnab lo Dios yquia zdoo me zho, grëse zha co scaania me zho.

²² ¡Grëse to, golquiaadiaga sca ganle! Led nanwen to ganle Dios pxeel Jesús, meñ Nazaret ne biaad lo guidzliu rii, Dios bnabey been me grë milagr nroob, been me grë ncuuañe bzee zdoo to; ga blu ganle ne nli Dios nacie me.

²³ Laa zeene laa Dios bdeed diidz biab me ladznia to (sac ible xtiidzle Dios naca, nanle me zha nac ne sca ted Jesús), laa to bnaaz me, bzobdoo to me, bnabey to gut me. Led to gon bloo me ladznia grë zha ntseeb ne sca psacsi me pquiaa zho me lo cruz.

²⁴ Per bleeban Dios me, psilaa Dios me ladznia guielgut; sac lëbd guielgut ne lëew gnabey lo me.

²⁵ Zeene bzeet David Jesús, znu rëb me:

Meñ ne rnabey naa, ran naa tibaque quianap me naa; tibaque zo me cue naa nëz derech, ¿pe nac nadien ne lega pe gac naa?

²⁶ Gacxe waa, nley no zdoo naa, niicle ludz naaw, rleya roolnie naa me.

Ni gane tibliladz rac naa;

²⁷ sac nan naa niicle guet naa,

ib csaand me guiaan naa len baa,
ib gdeete me diidz xin xpëel naa.

Naa nac tib ngundziin lo me, ni rleynie me naa.

²⁸ Me blu lo naa zha grieelo yгаа naa guielmban,
ni tib guielbley nroob ne yгаа naa zeene laa naa gdziin lo me.

²⁹ 'Bets, bzian, to ne nac to menladz naa, golgona ganle: led mine bdeete
pxozgol ne David bnee me nu; sac gon, zeene gut me güey zho güeyqueets zho
me, ni haxta lo nadze laa xpaа me bii niaа.

³⁰ Sinque mine bded Jesús ga bzeet me, sac gon tib zha ne biadteed xtiidz
Dios goc me. Gocnanle me ne lo xtii me grieequia Men ne nacle diidz ga cxeel
Dios, ni men co sob gnabey zigne bnabey me; sac scale rëb Dios lo me, ni
haxta bzeet Dios lë Dios parne glu ne yquidied me.

³¹ Dzigo zig nac zeene ranle me grëtaa mine ted Jesús, nagne bzeet me ne
ib zrieeban Jesús, rëb me guiaan xcuerp Jesús zaatne rbëz grëraа mengut,
niicle xindgaaw.

³² 'Jesús ga gon bzeet me, sac zig nac Jesús grop lo no bdiön no bleeban Dios
me,

³³ ni niina gbaа zob me cue Dios nëz derech, sac me nac men rnabey. Ni
zigne nacle xtiidz Dios men ne nac Pxoz me, laa me pxeel Espíritu Sant lo
no; ni niina grëse ncuaañe noyañ tow, grëse ncuaañe noyongaa tow, xtsiin
Espíritu Santow.

³⁴ Laa naa rbire rne lo to stib ganle, led mine bdeete David ga bzeet David;
sac gon, zeene gut David güeysobd David gbaа. Davitaque goc zha ne znu rëb:
Rëb Dios lo men ndzon ne rnabey naa:

—'Cue naa nëz derech, nu bzob,

³⁵ nieeda lozh gnaz naa grëse zha ne rlëe lo luu, csañ naa zho lадznia luu."

³⁶ 'Grëse to men wladz, golgona sca ganle: Jesús gon, men ne pquiaа to lo
cruz ga, lëe men co nac men ne rnabey. Dios bzo me, ni Dios pxeel me biaad
me lo guidzliu.

³⁷ Zeene bin grë miech ne ndxie ga sca bnee Pedr, biab guielnë zho, psilo
zho rnabdiidz zho lo Pedr ni lo grëraа zha ne nacga Pedr ga, rëb zho:

—Bets, nana, ¿pe nac ncuaañe dziuun no?

³⁸ Dzigo rëb Pedr lo zho:

—Tib tib to, golsaan xquielntseeb to, golbig lo Dios, ni none chobnis to zeena
guiaanmbe to lo xtoł to; scagaa ible sxeel Dios Espíritu Sant gacnie to.

³⁹ Sac psanle Jesús diidz ne ible sxeel me Espíritu Sant gacnie grëse zha ne
cuedz me sëeb xnëz me; zigtaa tow, zigtaa xpëed tow, zigtagaa grëraа menzita.

⁴⁰ Nzianraа grë ncuaañe bzodiidz Pedr lo zho, ni pso me diidz lo zho csaan
zho grëtaa guielntseeb ne ruñ miech lo guidzliu rii.

⁴¹ Lo grë zha ne bzoobdiag grë mine pseed me zho dze co, rgaa zho maase
tson mil; blozh ga, grëse zho brobnis, laa zho gocgrë grë zha ne riladzle Jesús
ga.

Niowse mban zho

⁴² Grëse zha ne riladz Jesús ga, dib zdoо zho zienal zho grë mine rseed
grë zha poxtl co zho, tibaque rcaalsa zho rzodiidznie zho Dios, ni row zho
guietxtil zigne psanse Jesús diidz gun zho.

⁴³ Grëraа zha ne zo stib lad, rdzieb zho; laa grë zha poxtl co, nzian grë
milagr nroob ne ruñ zho.

⁴⁴⁻⁴⁵ Tipse rnee zho, rdeedlsa zho ncuaañe rquiin zha ne nacgrë zho; zha
ne quianie liu, tel pe grëragaa ncuaañe quianie zho, haxta rto zhow, dzigo
rguiiz zho dimi co lo grë zha ne guieñd pe yquiin.

⁴⁶ Gzataa dze rcaalsa zho len yadoo; rlozh ga, rcaalsaque zho lidz grë zha ne nacgrë zho row zho quietxtil zigne psan Jesús diidz ga; ine nley, ine ndooladz rbe zho grë zho rquuin zho guielwagw ne runlo zho,

⁴⁷ ni rley zho roolnie zho Dios. Grëse miecha, rley zho ran zho sca niowse mban zho; ni zigse zie dzew, scase scase laa Dios rbedzraa grë zha ne rzëeb xnëz Jesús, laa zho racnzianraa.

3

Biac tib men ne në ni

¹ Tib dze zig rbixwe ngbidza, brieed Pedr grop Juan zie zho yadoo nroob ne zob Jerusalén, sac lëe hor co nac horne rie zho yadoo riezodiidznie zho Dios.

² Gax ro yadoo co quia tib puert rnee zho Puert Ndzon, ga rzob tib zhey gol ib gacd së, sac nële ni me zeene gol me. Gzobse dze, rie zha ne riezooob me ga rnab me gon lo grë zha ne rzëeb yadoo.

³ Laa dze co, zeene gon me laa Pedr grop Juan zieded ga ne laa zho sëeb yadoo, zëeb nia me rnab me gon lo zho.

⁴ Dze rwi zho lo me, tibaque rëb Pedr:

—Lo no bui.

⁵ Dzigo blis lo me bui me lo zho, nan me bod no pe dimi ne gdeed zho lo me.

⁶ Wbiire bnee Pedr lo me, rëb Pedr:

—Quanied naa dimi ygad naa lo luu. Ncuaaane grieelese gnedz naa, laaw gnedz naa niina, jniapse por Jesús (men Nazaret), laa naa rnab lo luu, niinagazh guso i zeen bzëni!

⁷ Dzigo bzhen Pedr nia derech me bliso Pedr me, hor cogazh laa grop ni me ga bdaan,

⁸ laa me psilo bzë. Rley me laa me bzëeb len yadoo gza me zho, lo guielbley co haxta rias me, ni roolnie me Dios.

⁹ Grë miech ne no len yadoo, zeene gon zho laa me rzële, ni scataa rley me roolnie me Dios,

¹⁰ bzee zdoo zho; sac runbey zho me, nanpaa zho rzëd me glo, tibaque ran zho me rzob me zaatne quia Puert Ndzon ga rnab me gon.

¹¹ Zeene laa Pedr grop Juan brieed len yadoo nroob co, yeque me nal zhits zho ib rsaand ne zho, laa zho bdziñ stib nëz cho yadoo co zaatne quia tib nsaap nroob ne rnee zho zhiNsaap Salomón. Nalaque grë miech co, rlozhd gwi zho, rlozhd gzee zdoo zho.

¹² Dzigo rëbchaa Pedr lo zho:

—¿Pe rac to? ¿Pe nacte squitaa rzee zdoo to, squitaa rwi to lo no, zig nac zeene no bdziunnguiac men rií, zig nac zeene por nguzobdiidz no lo Dios gane brieelo psëe no me?

¹³ Golgacnan ganle led scada; sinque Dios men ne bliladz Abraham, men ne bliladz Isaac, men ne bliladz Jacob, men ne bliladz grëraa xmengol ne, men co blu lo to niina ne nli men nroob nac Xpëed me Jesús. Lëe Jesús co ga gon bnaaz to, bloo to me ladznia zhiwxtis ne, ni zeene gocladz Pilat nsilaa Pilat me, pe liaadz to ndeed to diidz.

¹⁴ Bdeete to diidz nlaa men ne nac men ndzon, men ne peet xtold; lel bnab to blaa tib zha ntseeb ne nzëeb ngutoo.

¹⁵ Laa me, pquia to haxta beet to me, ni me nac men ne rdeed guielmban. Per bleeban Dios me, ni mban me niina; sac grop lo no bdziön no me.

16 'Ni niina men ne ran to biac nu, niapse por Jesús biac me; led runbeyle to me nanle to ganle rzéd me glo. Ne dib zdoo no riladz no Jesús, gane brieelo bnab no beenguiac Jesús me.

17 'Grése to bets, ne nac to menladz naa, rgobey naa niicle to ni niiclegaa gré zha ne nac zhiwxtis ne, lega laa to bnabeyse bgaa Jesús beet to me, niicle to biaadaque dien pe nacre sca been to.

18 Laa Dios bneedz diidz been to gré guieIntseeb co, sac sca goc grése mine bzeet gré zha ne biadteed xtiidz Dios padzeela, zeene bzeet zho zha nac gré guieIné ne ted Jesús, Men ne nacle diidz cxeel Dios guiaad lo guidzliu.

19 'Dol nroob ga gon been to, gacxe nana gon waa golsaan xquieIntseeb to, golbig lo Dios; zeena csaambe me to lo xtol to. Me gneedz guiebley lo to stib,

20 ni zbiire cxeel me Jesús lo to stib, guiaadsilaa me to.

21 Gbaa no me niina, ni ga cuéz me niieda gal dze ne laa Dios blozh bnabey goc grése ncuane none gac, zigne bzeetse gré zha ne pxeel me padzeela, biadteed xtiidz me.

22 Zig nac Moisés bzeet me laa Jesús guiaad, rëb me lo gré pxoz gol ne: "Dios men ne rnabey ne, ible znabey me ne lo xti to griequia tib men ne gac zig nac naa lo to niina. Zeene laa me guiaad, golgon xtiidz me;

23 sac zha ne gond xtiidz me, ib tedsod znitlo zho."

24 Scaque Samuel, ni grëraa zha ne biadteed xtiidz me, grése zho bzeetle zho gré ncuane noyac len dze rii.

25 'Grése to, xmengol to nac gré zha co, ye to ga rëb Dios gunlay me zeene znu biaan me diidz grop me Abraham, rëb me: "Niapse por tib men ne griequia lo xti luu, laa naa gunlay grése miech ne ndxie gdbdoose lo guidzliu."

26 Ni niina ne laa Dios bleeban Jesús, gloque lo to pxeel me me, gunlay me to, zeena csaan to xquieIntseeb to.

4

Güeyzo zho zho lo wxtis

1 Laa Pedr grop Juan bii noneeque lo gré miech co, zeene laa bla zha ne nac pxoz bdziñ ga, bdziñnie zho tib zha non ne quianap yadoo co ni zla zha ne nacgré zha saducé.

2-3 Zigne bdziñ zho bnaaz zho Pedr grop Juan, güeysëeb zho zho ladzguiib; ni ne bdzele dzew, ga biaan zho dipse guieel co. Rlëë gré zha co, sacne laa Pedr grop Juan quianee lo gré miech co zha bleeban Dios Jesús; ni rnee zho grése mengut, scaque grieeban zho.

4 Niicle ne scataa rlëë gré zha rnabey co, per nzian zha ne ndxie ga bliladz Jesús; zig gaay mil rgaa loxaque zha bgui.

5 Zeene biini liu co, grése zha non, grése zha ne rnabey lo menguedz, laa zho pcaalsa.

6 Ga bdziñ Anás men ne nac pxoz nroob ne rnabey, ga bdziñ Caifás, bdziñ Juan, bdziñ Lejandr ni gré zha ne nac menlidz pxoz ne rnabey ga.

7 Dzigo bnabey zho gocredz Pedr grop Juan, bzo zho zho glowtaa, bnabdiidz zho lo zho, rëb zho:

—Golnë nadien, zcho rnabey to, cho pxeel to ne squi no to?

8 Horco laa Espiritu Sant bdeed guieIbiini lo Pedr, pquiab Pedr rëb Pedr lo zho:

—Grése to ne nac to zha ne rnabey lo menguedz, grése to ne nac to zha gol ne non xtiidz.

9 Telne mine rlisqui to nac ne dien zha bdziuun no men rii ne laa ni me biac,

¹⁰ golsiguiel golquiaadiaga ganle, zeena gacnan tow ni gacnan grëragaa menguietza. Jesús gon, men Nazaret ne bnabey to gut lo cruz ga, men ne bleeban Dios ga, men co beenguiac men rii; ni laa to rangaa me laa me zo lo ne nu.

¹¹ Lëe Jesús ga raquiet lo Xtiidz Dios zaatne znu rnee: “Quie ne psëeb zha ne nozaa yu, ni nand zho lëepaa quie co nac mine rnazdziits yu.” Ni scapaa nagon bzhaac to me.

¹² Loxaque me zrieelo csilaa ne lo xto] ne, sac bzodraa Dios cho stib zha ne niaad lo guidzliu niaadsilaa miech.

¹³ Zeene gon grë zha wxtis co, scataa peet dzeb nod lo Pedr grop Juan, bzee zdoo zho; sac runbey zho Pedr, runbey zho Juan, nacd zho cho zha ne güey wseed nroob. Ga gon zho, pa lotaa guielbiini ne bgaa Pedr grop Juan ne bzënie zho Jesús.

¹⁴ Peet brieelod nlisqui grë zha co, sac nligaa laa men ne biac ga zo lo zho ga.

¹⁵ Dzigo mazd bnabey zho brie Pedr ley grop me Juan; laa zho biaan bzodiidz zho dien zha gon zho zho,

¹⁶ sac rien zho tib milagr nroob ga sca biac ni men co; niicle ne racladz zho yqueets zhow, per grële menguietz bina.

¹⁷ Nacne biaan zho diidz, ctseb zho zho gbiiredraa zho cseed zho miech zhiwseed Jesús; zeena lozhd gacnan grëraa miech zha biac men co.

¹⁸ Dzigo bredz zho Pedr stib, grop me Juan, goctox zho lo zho.

—Laa no rso diidz lo to gon —rëb zho—, gbiiredraa to cseed to miech zhiwseed men ne rnee to Jesús ga.

¹⁹ Pquiab Pedr grop Juan, rëb zho:

—Zha dien rzac to, ¿pe nonguiela ga laa ne dziuun no mine rnabey Dios, lel mine rnee to i dziuun no?

²⁰ Grielod gon dziuun no mine rnee to i, sac grëse ncuaaane bdzion no, grëse ncuaaane bdziongaa no ib none gnee now, zeena gacnan grëse miecha.

²¹ Dzigo wbiire grë zha rnabey co, ntseeb rac zho lo zho pso zho diidz csetraade zho miech; blozhse ga laa zho psilaa zho. Bdeetew diidz nsacsi zho zho, sac ndal miech ne rleynie Dios, rdeed zho xquizh lo me ne been me milagr

²² beenguiac me men co, ni choole iz rac sca gacd së me.

Bnab zho lo Dios

²³ Zeene laa Pedr grop Juan bdzin lo grë zha ne nacgrë zho, bzodiidz zho grëse tel zha rëb grë zha rnabey co, zha rëb pxoz non co.

²⁴ Grë zha ne nacgrë zho ga, zeene bin zhow grëse zho psilo zho bnab zho lo Dios, rëb zho:

—Dios, luu nac men ro ne rnabey grëtaa ncuaaane no, luu bzaa gbaa, luu bzaa guidzliu, luu bzaa nisdoo, luu bzaa grëraa ncuaaane no.

²⁵ Padzeela zeene bdeed Espiritu Sant guielbiini lo pxozgol no David, men ne been xtsiin luu hor co; znu bnee me:

¿Pe nacne squitaa rac grë miech ne nacd zha Israel rlëënie zho Dios?

Racladz zho gon zho ncuaaane ni grielod lo zho.

²⁶ Grëse zha non ne rnabey grë guiedz,

tipse rac zho laa zho racntseeb lo Dios rlëënie zho me, ni rlëënie zho men ne bzooblo me pxeel me lo guidzliu.

²⁷ Ni nligaa na scase goca. Guiedz Jerusalén nu, nu biaad rey Herod, biaad Pons Pilat, pcaalsa zho grë zho menladz no ni grë menzit, tipse bnediidz zho

psacsi zho Jesús, men ndzon ne bzooblo luu pxeel luu biaadgun xtsiin luu lo guidzliu nu.

²⁸ Grése zigne psanle luu diidz, scase been zho.

²⁹ Ni scaque niina, bui ganle zha racladz zho ctseb zho no parne peet gnedraa no; luu nac men ne gocnie no ne nac no zha ne rdziuuñ xtsiin luu, zeena gdzieebd no cseed no miech xtiidz luu.

³⁰ Laa no rnab lo luu, beenguiac grē men rzacnē, been grē milagr nroob, blu grē ncuaañe gzee zdoo miech; zeena gan zho ganle men nroob, men ndzon nac Xpēed luu Jesús.

³¹ Zeene blozh bzodiidznie zho Dios, masaque bzhidz zaatne ndxie zho ga; hor co grēse zho laa zho bgaaraa guielbiini ne bdeed Espiritu Sant lo zho; peet rdziebdraa zho laa zho zieseed miech Xtiidz Dios.

³² Len dze co, grēse zha ne rliladzle Jesús ga, tibaque nac zho, tibaque rnee zho, tibaque nac mine zienie guic zho. Nod zha ne guiab lose zho yquiin ncuaañe rap zho; sinque grēse ncuaañe quianie zho chen grē zho naca.

³³ Grē zha poxtl co, zeene rseed zho miech zha briebeban Jesús, nzian zha ne rliladz me; rlupaa ne Dios nacie zho.

³⁴⁻³⁵ Ne nligaa tipse nac zho grē zho, nod zha ne guiab ne guiend pe yquiin, sac grēse zha ne quianie liu, zha ne quianie nzian yu, rto zhow dzigo rdeed zho dimi co rguuiz grē zha poxtla lo zha ne rquiina.

³⁶ Sca been tib men ne nacgrē zho lē José. (Zha xtií Leví nac me, gol me tib lo guidzliu win ne no lo nisdoo lē Chipr; zha poxtl-le bleelē me Bernabé. Bernabé, nac zig nac ne rnee ne: Zha ne rchoobladz zdoo miech.)

³⁷ Pto me tib lē liuñ me, dzigo bdeed me dimi co lo zha poxtl, bdiiz zhow.

5

Znu bzhaac Ananí grop Safir

¹⁻² Tib mgui lē Ananí, laa tsiel me lē Safir; ye me pto tib lē liuñ me. Gonlo tsiel me, tel palal dimi ne bdo liu co, bzhenga me zhisa. Zeene laa me ziesañ mine biaan ga, lo poxtl, rēb me lēē grē dimi ne bdo liuñ me ga.

³ Dzigo rēbchaa Pedr lo me:

—Ananí, ¿pe nacie bdeed luu diidz bzēēb mendox zdoo luu? Mendox i gon noquiil luu nan luu yquidiee luu Espiritu Sant, rnee luu lēē grē dimi ne bdo liuñ luu nu.

⁴ Bien ganle chen luu liu co. Dimi ne bdiizh zhow, chen luuw, niac niuñ luuw zigne niaccladztaa luu, ¿pe nac dzigo ne racladz luu yquidiee luu? Gon ganle led nod noquidiee luu, Dios i gocladz luu nquidiee luu.

⁵ Loxaque sca bin Ananí bnee Pedr, znuse biab Ananí liu, gagazh gut Ananí. Grése miēch ne bina, bdzieb zho.

⁶ Dzigo güey bla zha nguieg pchel zho ngutoo co lar, blis zho me ga laa zho ziqueets me.

⁷ Wdzeelaaque goca zeene laa tsiel me bdiñ, ni lalnu güeynied guic me ne laa tsiel me gutle.

⁸ Bnabdiidzaque Pedr lo me, rēb Pedr:

—Bnē diēñ, ¿pe nli lēē grē dimi ne bdo liuñ to nu?

Pguiab wnaa co, rēb me:

—Nliw, lalgui pto now.

⁹ —¿Pa brie pensar qui lo to grop tsiel to? —rēb Pedr—. Ne squi tipse bnee to nan to yquidie to Espiritu Sant; dol nroob i gon been to lo Dios. Laa zha ne güeyqueets tsiel luu blansole ro yu nu, ni niina gon laa zho güeyaque luu.

¹⁰ Diidz co blozh brieë ro Pedr, znuse biab wnaa co liu, guchedraa me ga. Zeene laa gza zha nguieg co bzëëb leñ yu, laa me nixle ga; gon zho gutle me, dzigo blis zho me güey zho güeyqueets zho me cue xpaä tsiel me.

¹¹ Grëse zha ne gon sca goc meñ co grop me, zha ne bingaaw, zigtaa zha ne riladz Jesúsa zigtagaa grëraa miecha, per nli bdzieb zho.

¹² Grë zha poxtl co, tibaque rcaalsa zho tib lo nsaap ne quia cho yadoo ga rnee zho zhiNsaap Salomón; nzian grë milagr ne rdeed Dios diidz run zho.

¹³ Grëse miech ne rcaalsa ga, rleynie zho grë zha poxtl co, nzian zho riladz mine rseed zho, per rbigd zho gacgrë zho zho.

¹⁴ Zigse zie dze, scase racndalraa miech ne rzëëb xnëz Jesús, nguisaque wnaasaque laa zho riladz me dib zdoo zho.

¹⁵ Zhoob diidz scataa milagr ne run grë zha poxtl co. Dzigo psilo miech rbee zho grë meñ rzacné, rguix zho me ro nëz, no me zhoobse lo xlon me, no me zhoob lo yag ne ney zho me; rquiambëz zho maase zhimplëse Pedr guiab lad grë meñ co zeene laa Pedr ted.

¹⁶ Haxta grë guiedz win ne ndxie gax Jerusalén ga, rriee grë miech rdziñnie zho grë meñ rzacné, no grë meñ co noguitnie mendox; grëse zho runguiac zha poxtl co zho.

Bio grë zha poxtl ladzguiib

¹⁷ Zeene gon meñ ne nac pxoz nroob ne rnabey, ni grë zha saducé, scataa racnie miech grë zha poxtl co, per nli blëë zho,

¹⁸ bnabey zho bgaa zho psëëb zho zho ladzguiib stib.

¹⁹ Pcow liu co, guieela bdziñ tib xanjl Dios pxal me ro ladzguiib, blee me zho ga; dzigo rëb me lo zho:

²⁰ —Goltsie leñ yadoo, grëse miech ne ndxie ga golnee lo zho, zeena gacnan zho zha ygaa zho guielmban ndzon ne nodeed Dios niina.

²¹ Biinigazh liu, silgaw laa zho bdziñle leñ yadoo; psilo zho laa zho noseed grëse miech ne ndxie ga.

Laga laa zho noseed miech leñ yadoo, laa meñ ne nac pxoz nroob ga, grë me zha ne nacnie me, bnabey zho ycaalsa zha ne nac wxtis ni grë zha non lo menquiedz.

Zeene laa grë zha co pcaalsa, dzigo pxeel zho zha ne ziebee grë zha poxtl co ladzguiib.

²² Bdziñ zho ro ladzguiib, ni tib choot guiend leñ co; rzhitsaque wbire zho güeynie zho diidz,

²³ rëb zho:

—jchoot guiend leñ ladzguiib! Dziits niooga bdziñ no, ga zo zha ne quianap; per zeene bzhial ro ladzguiib bziaab no, bdziñ no choot guiend leñ co.

²⁴ Grë pxoz ne rnabey, ni meñ ne zo lo menquib ne rquianap yadoo, zeene bin zhow, rdzieldraa zho zha gun zho.

²⁵ Lëëtaaque sca no zho, zeene bdziñ tib zho rëb:

—Zha ne gon bloo to ladzguiib ga, laa zho nolaque leñ yadoo noseed zho miech.

²⁶ Lëëlëd brieë meñ ne zo lo grë menquib ne rquianap yadoo, brieenie me bla xaguiib me, güey zho niapse wen diidz güeyxi zho zha poxtl co leñ yadoo; sac rdzieb zho ngoquoie grë miech co zho.

²⁷ Zeene bdziñnie zho zho lo grë zha wxtis co, dzigo rëb meñ ne nac pxoz nroob ga lo zho:

28 —¿Pe nacre ronde to diidz? Led pso no diidz lo to cseetraade to miech zhiwseed mgui ne nac Jesús ga. Ni na gon dible lad guiedz nu nozhoobnen zhiwseed to i, haxta rcaadzdoł to no ne no bdziuut me.

29 Dzigo pquiab Pedr rëb Pedr:

—Rdzion no mine rnabey samiech no, per glo none dziuuñ no mine rnabey Dios no.

30 Men co bliladz grë pxozgol ne, ni men co gon bleeban Jesús, men ne sca psacsi to beet to lo cruz.

31 Ni meque zeynie Jesús gbaa, bzoob me Jesús cue me nëz derech; sac Jesús nac men ne rnabey, men ne rsilaa miech lo dol. Ni Jesús gon, gdeed guielbiini lo grëse men Israel gbiire gbig zho lo Dios stib; zeena gunquizhd me zho xtol zho.

32 Mine rnee no lo to nu diidzliw, nozhal bdziona, ni led loxaque nodsegaa; sinque ye Espíritu Sant men ne rxeel Dios racnien grë zha ne ron xtiidz me, ye men co quianee ganle ne nliw.

33 Zeene bin zho sca rëb Pedr, blëye zho, rzac zho tebaa gagazh gut zho gza zha poxtl co.

34 Lad zha wxtis co no tib zha farisé lë Gamaliel, ye me rseed miech Xley Dios, tib zha non nac me lo menguedz; dzigo guso me bnabey me brieë grë zha poxtl co nëz ley,

35 bnee me lo grëraa zha ne ndxie ga, rëb me:

—Grëse to menguedz, laa naa rso diidz lo to, golcobey gon dien pe gun to zha qui. Golguien ganle, nonguiel da ne lega mine gacladzttaa to gun to zho.

36 Golsoladz ganle, padzeela squi bio tib men ne brieelë Teudas, rëb me laa me niac tib zha ne nabey, ndal zha ne wbig lo me, goclo zho zig tap gayoo. Ni pasë me nabey, zeene laa me gut nëzrii nëzrec bliaal grë zha ne gocnie me ga.

37 Laa len iz ne nodop lë miech, scaque brieequia tib men Galilé brieelë Judas. Ndal zha ne gocnie me, per zeene laa me gut scasaque nëzrii, nëzrec bliaal grë zha ne gocnie me; brieelodaque pe niuñ me.

38 Gane nagon rne naa lo to, mazd peet gunde to zha qui, golsaan zho squise golsilaa zho. Tsow glu telne guicse miech biab wseed ne ziaadnie zho i, zdzin dze ne nitlow.

39 Laa telne nligaa Dios rsiaab guic zho squi rseed zho miech, niacxe zlëb to gnitlo to wseed ne ziaadnie zho. ¡Telne guiab to gnitlo tow, nande to nend Dios ga tilnie to!

40 Grëse zha wxtis co bzoobdiag zho xtiidz Gamaliel, bien zho ne scataa nonguiel gaca. Dzigo biire bredz zho grë zha poxtl co, bdiñ zho zho, ni biire pso zho diidz lo zho gbiiredraa zho cseed zho miech zhiwseed Jesús. Blozhse ga, dzigo laa zho psilaa zho.

41 Zeene laa zho wbi ga, rley zho por grëtaa mine pteed grë zha non co zho loxaque ne riladz zho Jesús.

42 Ib psaaand zho zhiwseed Jesús, gzobse dze rie zho yadoo ni rieque zho stib yu stib yu, rnee zho lo miech ne nli lëë Men ne zëëble diidz cxeel Dios lo guidzliu ga nac Jesús.

6

Bzo gadz zha ne gun xyudar poxtl

1 Ni ne len dze co quaiyac nzianraa miech ne rzëëb xnëz Jesús, dzigo psilo grë zha Gres rlisqui zho, rnee zho rdioond grë wnaa viud ne nac zha ladz zho zaacse; zeene rgaaz ncuane row zho, rgaad zho lal mine rgaaz grë wnaa viud ne nac zha Israel.

² Dzigo nache bredz gza tsiipchop poxtl co grëse zha ne nole xnëz Jesús ga, bnee zho lo zho rëb zho:

—Gacnan to ganle, grieelodraa ne noque so dzian no dien zha ygaaz ncuaane yquini to, sac gon nonguielda csaan no mine nac xtsiin no, ib none guioseedraa no miech Xtiidz Dios.

³ Min co nagon, mazd golzo gadz zha bgui ne gun dziin co, lëëraasi golguien cho gzo to; golguib zha ne ndzinli, zha ne nixbiini, zha ne nacie Espiritu Sant;

⁴ zeena sca guio lo no gzodiidznie no Dios, gnab no lo me, ni cseed no grëraa miech Xtiidz me.

⁵ Grëse zho rëb, wen sca gaca. Horcogazh psilo zho ble zho zha ne so gun dziin co. Bzo zho tib men lë Lip, tib men lë Prócoro, tib men lë Nicanor; tib men lë Timon, tib men lë Parmen, tib men lë Xteb, rlupaa dib zdoo me riladz me Dios ni nacie Espiritu Sant me; ni tib men Antioquí lë Nic, mazd glo Nic goc tib zha ne bleyniedox grë zhiwseed zha Israel.

⁶ Dzigo güeynie zho gza zha co lo zha ne nac poxtl. Blozhse bnab poxtl lo Dios gacnie me zho, dzigo pxobnia poxtl guic zho, bnab zho lo Dios gdeed me guielbiini lo zho.

⁷ Zigse zie dze, laa Xtiidz Dios quiagaazraa dib Jerusalén. Nzian grë zha ne rzëeb xnëz Jesús, haxta grë men ne nac pxoz, nzian zho laa zho bliladz me dib zdoo zho.

Bnaaz zho Xteb

⁸ Goc palal dzew, nzian grë milagr nroob ne run Xteb, sac tibaque sca dib zdoo me riladz me Jesús, ni nacie Espiritu Sant me.

⁹ Laa tib dze, brieequia bla zha ne rie tib xyadoo win zha Israel, lë “Esclavos Libertados” gocladz zho ndiidiidznie zho Xteb. Brieaque zla zha Israel ne ziaad nëz Ciren, nëz Alejandrí, nëz Cilis, ni nëz Asia, ye zho gocgza zha co rlëe zho lo Xteb.

¹⁰ Gonse zho rlëbd xtiidz zho lo Xteb, sac niapse Espiritu Sant rdeed guielbiini lo me, rien me pe rnee me lo zho;

¹¹ dzigo bdiizh zho bla zha ne ptsieets diidz, pquidie zho rëb zho bin zho laa Xteb noneenë Moisés ni rneenë me Dios.

¹² Zeene bin menguedza, blëe zho; nache bnabeyaue zha ne rnabey lo menguedz bgaa Xteb güeyzo zho me lo wxtis.

¹³ Ni güeynie zho bla zha ne lega bnexuu, rëb zho:

—Nliw, rtsidil mgui qui xyadoo ne, rtsidil me xley ne.

¹⁴ Bdzionpaa no gon quianee me laa Jesús men Nazaret ne quiazeet zho dib i ctsil yadoo rii, ni ctsëe me ley ne psan Moisés lo xmengol ne.

¹⁵ Horco zeene laa grë zha wxtis co ni grëraa zha ne ndxie ga bui lo Xteb, gon zho tib biini nroob ne riab lo me, masaque rlu me zig rlu tib xanjl Dios.

7

¹ Dzigo bnabdiidz men ne nac pxoz nroob ga lo Xteb, rëb me:

—¿Bnë dien pe nli quiayun luu grë ncuaane rnee zho i?

² —Grëse to ne nac to menladz naa —rëb Xteb—, laa naa rzaac to zig bets naa, zig pxozgaa naa. Golsiguiel golquiaadiag chop tson lan diidz ne gne naa lo to nu ganle: Padzeela, zeene bii no pxozgol ne Abraham dan ne lë Mesopotam, brieequia Dios ndzon ne no gbaa lo me, rëb Dios

³ griece me ga, csañ me grë menlidz me, tsie me nëz ne glutaa Dios lo me.

⁴ Nacne briece me xtan zha Caldé ga, bey me nëz Harán, ga wban me zhis. Laa zeene laa pxoz me gut, dzigo laa Dios biaadnie me nëz rii, zaatne mban ne nu niina.

⁵ Niicle ne laa me blanso lo liu rii, ni tib lë win zaatne so ni me bdeete Dios lo me; per rëb Dios ib grë zha xpëed me guiaañniew. iNi laa me quianied mëed len dze co!

⁶ Rëbgazh Dios lo me, ib zieban grë zha xpëed me ga ladz beñ dipse len tap gayoo iz, ga csacsi miech zho guñcuñ zho zho dziin.

⁷ “Per ib tedsod sacsi naa zha ne csacsi zho ga”, rëb Dios, “ni ga greee zho glanso zho nu, nu goolnie zho naa.”

⁸ Ni parne glu ib zac mine bnee Dios lo Abraham ga, dzigo psan me diid grëse mëëdbgui ne grieequia lo xtií Abraham none tso tib bey lad zho. Miñ co nagon, zeene laa xpëed me Isaac goc xon ngbidz, laa me bloo Isaac bey co. Scaque been Isaac xpëed me Jacob, ni scaque been Jacob gza tsiipchop zha ne goc xpëed Jacob; lëe gza tsiipchop zha co nagon goc pxozgol ne.

⁹ Ziese pxozgol ne ga, blëenie zho bets zho zha ne lë José, pto zho José lo men ne zie wto nëz Egipt. Ni ne nacie Dios José,

¹⁰ psilaa me José lo grëtaa guielnë ne bded José, ni gocien me José beenbey rey Egipt José. Ib psaand me José, bdeed me guielbiini lo José. Zeene gon rey co scataa men nixbiini nac José, dzigo bnabey me bzo José goc me tib men non ne bnabey dipse Egipt; haxta grë ncuaan non ne no lidz rey, me bnabeya.

¹¹ Lëetaaque len iz ne nac me dziin, biaad tib gbin; dipse xtan zha Egipt, dipse xtan zha Canaan mban bded miech. Grë zha ne goc pxozgol ne ga, guien draa pe gow zho.

¹² Laa zeene bin Jacob laa zhobxtil bii no Egipt, dzigo pxeel me zho güeyxi zho zhob ga.

¹³ Zeene goc chop vuel zixxi zho zhob Egipt, dzigoraa gocnañ zho bets zho ga rnabey Egipt; niicleгаа rey cow, hor coraa beenbey me bets José.

¹⁴ Dzigo bnabey José güeyxi zho pxoz me Canaan, güeyxi zho tsiel zho, güeyxi zho xpëed zho. Lo grë zho rgaa zho tsongal tsiin, laa zho bdzin Egipt.

¹⁵⁻¹⁶ Sca nacie laa Jacob bey Egipt. Ga gut me, dzigo güeyqueets zho me Siquem, tib len baa ne bzhii Abraham lo Hamor; scaque grë xpëed me zha ne goc pxozgol ne ga, ga gut zho.

¹⁷ Grë zha ne brieequia lo xtií zha gol co, zha ne na guiab ne nac menladz ne, ndal iz ne bio zho Egipt ga, ni ndal doo goc zho. Laa zeene ziaadyob cuee Dios zho ga zigne rëble me lo Abraham glo,

¹⁸ laa men ne nac rey Egipt len dze co, psilo ptsidiñ zho; sac rsoladzdraa me grëtaa dziin ne been José lo menladz me.

¹⁹ Psacsi me zho, been me zho zigne gocladztaa me, haxta bnabey me grëse mëëdbgui ne ral gandraa zho win parne guet win.

²⁰ Len dze copaa nagon gol Moisés, tib mëed niow nac win. Tson mëe bloolan xniaa win win,

²¹ laa zeene brieelodraa ngolan me win, dzigo güeysañ me win tib ro guiubee Egipt, ga bdziel tib xindzooop rey win. Wnaa co gon win, biaan win lo me zig tib xpëed me;

²² haxta bioxco me grëse wseed ne rac zha Egipt, pseed win. Zeene laa win broob, tib men nixbiini goc win, niicle ne gnee wina, niicle ncuaane guñгаа wina.

²³ Choo iz rap Moisés, zeene biab guic me güeyted me lo menladz me.

²⁴ Dzigo gon me laa tib zha Egipt quiaguin tib zha Israel; nacie bzëëbaque me bla me zho, beet me zha Egipt co.

²⁵ Sca been Moisés, nan me nien grë zha Israel ne Dios bzo me gacnie me zho, csilaa Dios zho ladznia zha Egipt; per biend zho ne scaw.

26 Biini liu co, gon me laa chop zha Israel nodil, zie me nla me lo xtil zho, bnee me lo zho nonguield ga til zho, guien zho ganle menladzaque zho.

27 Dzigo biasaque tib zha ne noquiaaw ga pcheep zho me, ntseeb rac zho reb zho lo me: “¿Cho bzo luu guiaadnabey luu no, guiaadlisquigaa luu dien pe nodziuuñ no?”

28 ¿Te racladz luu ye gutaque luu no zigne beet luu zha Egipt co nieeg?”

29 Zeene bin Moisés sca reb zha co, hor co bzhoon me bey me nez xtan zha Madián. Nez co ptsieelnia me, ga gop tsieel me chop meëdbgui.

30 Choo iz goc no me nez xtan zha Madián, tib dze no me cho gui Sinaí, tibaque zeene gon me laa tib anjl zo groltaa tib lo yag zarz, masaque rso bel lo yag co.

31 Bzee zdoo me, læetaque laa me zie gbiggax me, zeene bin me tsi Dios reb Dios lo me:

32 “Naa nac Dios ne bliladz pxozgol luu Abraham, pxozgol luu Isaac, pxozgol luu Jacob.”

Zeene bin Moisés tsi Dios, per nli bdzieb me; lo dzeb co per ni blisdraa me lo me nwi me.

33 Dzigo bnee Dios stib, reb me lo me: “Blit lab luu, sac gax lo naa i zo luu.

34 Laa dze nagon bdzin ne laa naa csilaa gre zha Israel ladznia zha Egipt; sac ran naa zha nactaa gre guielne ne noded zho ga, ron naa blactaa roon zho nosacsi zha co zho. Ni luu zbooblo naa tsiebee zho ga.”

35 Dzigo laa Dios pxeel Moisés ziesilaa me zha Israel; niicle ne glo reb zho lo me: “¿Cho bzo luu guiaadnabey luu no, guiaadlisquigaa luu dien pe nodziuuñ no?” Per me bzo Dios bnabey lo zho, blee me zho Egipt.

36 Nzian gre milagr, nzian gre ncuane nroob ne gzee zdoo ne been Moisés blee me zho ga; zigtaa len guiedz Egiptow, zigtaa lo Nisdoo Nizhniew, zigtagaa gre dan bidz ne bio zho dipse len choo iz ne bzénie me zho ga.

37 Moisés ga bzeet lo pxozgol ne, ne laa Dios gnabey lo xtiique zho grieequia tib men ne cxeel me guiadteed xtiidz me, zigne pxeel me Moisés.

38 Zeene nonie Moisés zho gre dan bidz co, Anjl ne bnee lo me guic gui Sinaí, me pteed xtiidz Anjl co lo zho; me pcaania ley ne biaan lo ne ga, diidz ne rap guielmban.

39 Per ib bind zho xtiidz me, lel gocladz zho mbiire ney zho Egipt stib,

40 bnabey zho Aarón reb zho: “Bzaa tib mdio tedner lo no gacniñ no laa no guioo Egipt stib; sac loxaque biadbee Moisés no ga, na choot nand dien yo Moisés.”

41 Dzigo bzaa zho tib ngon yeen goc zhimdio zho, haxta beet zho gre ma ne bloogon zho lo mdio co; bleynie zho ncuane bzaania zho.

42 Nacne wbinladz Dios, psaan me zho; psilo zho bleynie zho gre ncuane ran zho zhan gbaa. Been zho zigne bzeetse zha ne biadteed xtiidz me padzeela, zeene reb zho:

Golsoladz ganle,

laa ne nleynie to naa dipse len choo iz ne bio to gre dan bidz co,

laa ne niut ma ne ngogon to lo naa,

43 lel gre mdio ne bzaa to, mdio co bleynie to, lo mdio co pquiitsgzhib to.

Mdio ne rnee to Moloc,

zaatne zieetaa to tibaque ney to lidza,

zhmel mdio ne rnee to Renfán, pa csaan to ma.

Mincoxe waa, laa naa cuee to ladz to,

gzonéz naa to guey to gre dan ne riaan zitraa lo guiedz Babiloin.

44 'Leñ dze ne sca bio pxozgol ne grë dan bidz co, tib yu larse goc xyadoo zho, ga biotsow quie ne quia xley Dios. Dioszhal blu lo Moisés zha tsaa yu co.

45 Goc bla iza, zeene blozh bnitlo Dios grë guiedz ne brin nu glo, laa Josué blansonieque yu co. Haxta leñ dze ne goc David rey, bii lëew nac xyadoo zho.

46 'David goc tib rey ne gocziuu lo Dios, bleynie Dios me, dzigo gocladz me nzaa me tib yadoo nroob zaatne mbëzlo zho Dios.

47 Per brieelod nzaa mew, Salomónraa goc rey ne bzaaw.

48 Nli laa yadoo co biala, per tel Dios, men nroob nac me, led yed me cuëz leñ grë yu ne rzaa miech.

49 Zigne zhobneeque lo Xtiidz me, zeene znu rëb me:

Gbaa nac zaatne zoob naa,

laa lo guidzliu nac zaatne rzo ni naa.

¿Zha nadien nac yu ne nan to gzaa to cuëz naa?

¿Pa nadien guiab to gzaa to zaatne gdziiladz naa?

50 ¿Niacxe led naad bzaa gbaa?, ¿niacxe led naad bzaa guidzliu?

51 'Golgona sca ganle —rëb Xteb—, zigne beënaque grë pxozgol to ga padzeela, scadaaque gon quia yun to niina. Miech nad, miech ntseeb zdooc nac to; ib ronde to mine rnee Espiritu Sant.

52 Tel pxozgol to, nelte gondze zho grë zha ne pxeel Dios biadnee xtiidz me; haxta beet zho grë zha ne bzeet ne laa Dios cxeel tib men peet xtold ne bzooblo me guiaad lo guidzliu. Ni niina ne laa Dios pxeel men co, scasaque been to, ptsidil to me, bnabey to bga me beet to me.

53 Tibaque squi quia to quia guits to Xley Dios; xanjlpaa me biaadsana lo to, ni runde to mine rnabeya.

Beet zho Xteb

54 Zeene bin zho sca rëb Xteb, blëeye zho haxta rowye ro zho rwi zho lo me.

55 Laa me, ne nacie Espiritu Sant me, zeene blis lo me bui me nëz gbaa, gon me lo guie indzon ne no Dios, gonpaa me laa Jesús zo cue Dios nëz derech.

56 Dzigo bnee me, rëb me:

—Ranpaa naa niina gon nzhialse gbaa, laa men ne pxeel Dios biaad lo guidzliu ga, laa me zo cue Dios.

57 Mine been zho ptse zho diag zho, ni nguiedz roptsie zho parne gondraa zho pe rnee me; laa zho wbigbe bnaaz zho me, güeynie zho me tib lad ro guiedz.

58 Zha ne goc textigw ga, blee zho lar ne mbix zho, bdziin zhow tib lo mgui nguieg lë Saul, mgui co pquianapa; laa zho psilo bdeedquie me.

59 Sca nodeedquie zho me, laa me rnab lo Dios rnee me:

—Jesús, luo ne nac luo men ne rnabey, luo pcaania zhiespirtu naa.

60 Dzigo pquitsgzhib me, ni pquiaa me stib redz nroob bnab me lo Dios, rëb me:

—Dios, luo ne nac luo men ne rnabey, dol ne quia yun miech rii, laa naa rnab lo luo gunquizhd luo zhow.

Loxaque blozh sca bnee me, laa me gut. Ye mgui ne lë Saul ga, bdeed diidz sca beet zho me.

8

1-2 Dzigo pcaalsase bla zha bgui ne noxco rleynie Dios, güey zho güeyqueets zho Xteb; mban rac zho, bio zho xquie lne me.

Leñ dze co, psilo zha ne sca rlëenie zha ne rliladz Jesús, ptsidil zho grëse zha ne rliladz me; dipse leñ guiedz Jerusalén pquianañ zho zho. Grëse zho

bzhoon, zha ne zie grëraa guiedz ne ndxie nëz Judé ga, zha ne zieegaa nëz Samar; loxaque zha ne nacse poxtl biaan Jerusalén.

³ Ntseeb rac Saul, rzac me tebaa zha gnitlogazh me grëse zha ne riladz Jesús. Stib yu stib yu zie me, riebezho me zho lidz zho, mgui wnaasaque rey me riesëeb me zho ladzguib.

Bdziņ Xtiidz Jesús nëz Samar

⁴ Laa grë zha ne bzhoon Jerusalén ga, zaatne zieetaa zho rnee zho Xtiidz Jesús lo miech.

⁵ Zig nac Lip, zeene bdziņ me tib guiedz nëz Samar, psilo me bnee me Xtiidz Jesús lo grë miech co.

⁶ Ndal zho rquiaadiag miņe rnee me, rzee zdoo zho ran zho grëtaa milagr ne run me.

⁷ Ndal grë zha ne noguitnie menđox, riac zho, rquiaadan grë menđox co redz zeene laa ma rzhoon; grë zha ne gutoo, grë zha ne nde ni, runguiac me zho.

⁸ Grëse miech ne no guiedz co, rley zho.

⁹⁻¹¹ Ga no tib men ne rool diidz dox, lë Simón. Ye me rzee zdoo miech grë ncuane run me. Nzianle iz sca noquidie me zho, grëse menguiedz runbey me, haxta niats rac me rnee me guiendraa cho zig me. Grëse zho, haxta grë zha non rbig lo me, rzac zho lëe poder ne rap Dios ga nacie me.

¹² Laa zeene bnee Lip lo grë miech co gocnan zho diidz ndzon ne nac Xtiidz Dios, bin zho zha racladz Dios gban zho, bin zho cho nac Jesús; grëse zha ne bliladza, mgui wnaasaque, laa zho brobnis.

¹³ Dzigo yeque men ne lë Simón ga bliladz Jesús, ye me laa me brobnis; zaatne zieetaa Lip nal me zhits Lip, rzee zdoo me ran me grëtaa milagr nroob ne run Dios.

¹⁴ Grë zha poxtl ne no Jerusalén, zeene gocnan zho scataa ndal zha Samar nocaania zhiwseed Jesús, dzigo pxeel zho Pedr grop Juan zie nëz co.

¹⁵ Laa zho zie gnab zho lo Dios yгаа grë zha ne bliladzle Jesús ga guielbiini chen Espíritu Sant;

¹⁶ sac zeene bliladz zho Jesús, loxaque brobnisse zho, gard yгаа zho guielbiini co.

¹⁷ Bdziņ zho pxobnia zho guic grë men co, bnaab zho lo Dios; dzigo grëse men co laa me bgaa guielbiini ne rdeed Espíritu Sant.

¹⁸ Zeene gon men ne lë Simón ga, ne loxaque rxobniase zha poxtl co guic grë miech co laa zho rgaa guielbiini ne rdeed Espíritu Sant, dzigo laa me rdeed dimi,

¹⁹ rëb me:

—Golneedz poder qui lo naa; zeena ye naa zha ne cxobniataa naa guic yгаа zho guielbiini ne rdeed Espíritu Sant.

²⁰ Pquiab Pedr rëb Pedr lo me:

—jBien ganle pe rnee luu! ¿Pa bin luu ye xpoder Dios zac si miech? jTebaa niinagazh nitlo luu grë xtimi luu i!

²¹ Ni lalnu rieguald luu gun luu dziin rii, ni gdziņdгаа dze gun luuw; sac mbed zdoo luu, zienied guic luu gun luu miņe rnabey Dios.

²² Blee zhgab yozh qui guic luu, bnaab lo Dios zeena togo squia zdoo me luu, gunquizhd me luu dol ne squi bza zdoo luu i;

²³ sac rlu niapse guielntseeb nonie guic luu, ni lëeque luu gon nosacsi luu ne squitaa noyunctal luu xtol luu.

²⁴ Pquiabse me rëb me:

—Golgun guieInzaac, goInab lo Dios yquia zdo me naa, zeena ygaad naa grē guieInēdox ne rnee to i.

²⁵ Blozhse bzodiidznie Juan grē miech co grop me Pedr, blozhse pseed zho zho Xtīdz Dios, laa zho w bire zey zho Jerusalén stib. Guiedz ne rdedtaa zho dib xtan zha Samar ga, rnee zho Xtīdz Dios lo grē miech co.

Bzodiidznie Lip tib men Etiopí

²⁶ Laa Lip no Samar ga, tib dze brieequia tib xanjI Dios lo Lip, rēb me tsie Lip nēz ne rreee Jerusalén zie nēz Gaza.

²⁷ Dzigo güey Lip nēz co. Tib dan ngana, lēētaque laa tib men ne nac dziin lo rein ne lē Candás zie ga, dziin nroob nac me lo rein co, sac me ngotsow grētaa dimi ne no Etiopí.

²⁸ Zobse me tib len carret nroob zie me ga; znu w birele me Jerusalén güeygan me Dios. Laa me zob leen co quialab me lo Xtīdz Dios mine pquiaa Isá, men ne biadteed xtīdz Dios padzeela.

²⁹ Dzigo bnabey Espiritu Sant Lip yga carret co lo Lip.

³⁰ Zeene bgaa carret co lo Lip, bin Lip pa lo nolab men co; nacne rēbchaa Lip lo me:

—¿Pe rien luu cho raquiet zaatne nolab luu i?

³¹ —Riend naaw —rēb me—, rquiin tib zha ne gnē lo naa dien zha naca.

Dzigo bredz me Lip biep Lip len carret co, güeysob Lip cue me.

³² Znu rnee zaatne nolab me ga:

Zigne racse mēcwxiiI yeen zeene rnaaz zho ma rut zho ma, scadaa ndooladz goc me, peet beend me zeene laa zho zienie me. Ni zigne roptsied ma zeene rtsiib zho ma, scaque ni tib diidz ptsired me lo zho.

³³ Niicle ne gon zho scataa ndooladz me, per psacsi zho me.

¡Pa lotaa bdziñ guieIntseeb ne been grē menladz me!
Sac gon, ptiche zho xquieImban me lo guidzliu.

³⁴ Dzigo rēbchaa men co lo Lip:

—BzhiguieI bnē lo naa dien, cho nu znu rzeet Isá lo rii. ¿Pe me bded min rii, te stib zhow ye?

³⁵ Dzigo rēb Lip lo me Jesús raquiet ga, ni bnee Lip grēraa mine nac zhiwseed Jesús.

³⁶ Laa zho no nēz, tibaque zeene bdziñ zho tib lugar co no nis; rēbchaa me lo Lip:

—¡Bui ganle laa nis no nu! Mazd bzhiguieI pchoobnisgazh naa.

³⁷ [—Zaca —rēb Lip—, totsaque dib zdo luu rliladz luu Jesús.

—Rliladz naa me —rēb men co—, rliladz naa ne nli Xpēed Dios nac me.]

³⁸ Dzigo bnabey me blēz carret co ga. Biet me leen co grop me Lip bzēeb zho lo nis co, ga pchoobnis Lip me.

³⁹ Blozhse ga, laa Espiritu Sant blis Lip gon draa me Lip; per rley me laa me bio nēz stib, laa me zie.

⁴⁰ Zeene laa Lip brieequia, laa Lip nole guiedz ne lē Azot. Ga psilo me zigse zie me, guiedz ne rdedtaa me rnee me Xtīdz Dios lo grē miech co. Sca bio me nēz, haxta bdziñ me guiedz Cesarea.

1 Laa mgui ne lë Saul ga, per nli ntseeb rac me, tibaque ne laa guic me zienie gut me grëse zha ne rliadz Jesús. Güey me lo men ne nac pxoz nroob,

2 bdeed pxoz co ti xtiidz me guey lo grë zha ne zo lo xyadoo zho nëz Damasc, parne gacnie zho Saul gnaaz zho grëse zha ne rliadz Jesús; zha ne ygaataa niicle mguiw niicle wnaaw, gzobdoo zho zho tsiesan zho ladzguuib Jerusalén.

3 Laa Saul bio nëz, laa Saul zie. Zhile gdziñ me guiedz Damasc, tibaque zeene brieequia ti biinidoo zhan gbaa biab zaatne zie me ga. Groltaa lo biinidoo co biaan me, biabgazh me liu.

4 Liu nix me, bin me zëeb ti tsi men co rnee lo me:

—Saul, Saul, ¿pe nacne quianañ luu naa?

5 —Been guieñzaac —rëb me—, bnë dien cho luu.

Dzigo pquiab men co, rëb me:

—Naa nac Jesús men ne squiatsidil luu. [Lëëque luu gon nosacsi luu i, rzac luu zigne rzac ngon ne rcaañni, ni lëëque lo guuib lots ne rtseb zho ma riecaañni ma.

6 Rdzieb Saul, rzhidz me lo dzeb co rëb me:

—Bzhiguieñ bnë dien, ¿pe racladz luu gun naa niina?]

Rëbchaa Jesús lo me:

—Guche i, güey Damasc, ga gnë zho ganle pe nac mine no gun luu.

7 Zha ne ziegza Saul ga per nli bdzieb zho, haxta ni gacdraa gnee zho; loxaque tsi men co ron zho zëeb, per choot ranð zho.

8 Laa Saul guche ga. Zeene laa me pxal lo me gwi me ranðraa me, jlaa lo me pcowle! Zha ne ziegzale me ga bzheñ nia me bdziñ me Damasc.

9 Tson dze sca brieelod nian me, gzase dze co dowd me, niicle peet god me.

10 Guiedz Damasc ga, ga no ti mgui ne rliadz Jesús lë Ananí; dzigo gon me Jesús, bredz Jesús me. Pquiab me,

11 dzigo rëbchaa Jesús lo me:

—Güey nëz ne lë Derech, zaatne nac lidz ti mgui lë Judas; ga bnabdiidz men Tars ne lë Saul. Zeene quiazodiidznie me naa,

12 blu naa lo me laa tib zha lë Ananí bdziñ rxobnia guic me, zeena gbiire gan me stib.

13 Pquiab Ananí rëb Ananí:

—¿Saul ye? Ziyon naa name zha nac grëtaa ncuaañe noyün me Jerusalén, notsidil me grë zha ne rliadz luu.

14 Haxta pxoz nroob ne rnabey bdeed diidzbey gnaaz me grëse zha ne no nëz rií.

15 —Güey —rëb Jesús lo Ananí—, sac laa naa bzooblolle me, ib me tsie grë guiedz zit tsieseed me miech xtidz naa, me gneew lo grë zha rnabey, ni lo grëgaa zha Israel.

16 Na naa glu lo me ganle zha nac grë guieñë ne gan me, zeene laa me quiaayünle xtsin naa.

17 Dzigoraa güey Ananí zaatne no Saul ga. Bdziñ me, pxobnia me guic Saul, rëb me lo Saul:

—Saul, bina ganle bets, laa Jesús gon, men ne rnabey, men ne brieequia lo luu zeene ziaad luu nëz ga, laa me pxeeñ naa zial naa nu; zeena gnab naa lo me gunguic me bziaalo luu, ni ycaania luu guieñbiini ne rneedz Espíritu Sant.

18 Zigne sca bnee Ananí, laa lo Saul biacgazh; lega zigne nac xmed meñ nac grë ncuaañ co brieel lo me. Horcogazh laa me brobnis.

19 Blozh ga laa me dow stib, zhiga zhiga laa me wbire pcaa fuerz.

Goc bla dze no Saul lo grë zha ne rliadz Jesús Damasc ga, dzigo brieel me

²⁰ güey me grë yadoo win ne no ga, rnee me lo grë miech co cho nac Jesús, rnee me lo zho ne nli Xpëed Dios nac Jesús.

²¹ Rzee zdoo grëse miech co ran zho sca rnee me, rneechaa zho:

—¿Led lëe men qui ga name scataa ntseeb rac Jerusalén, notsidil me grë zha ne riladz Jesús? Conque nac diidz min co ziaad me nu, ziadnaaz me zho tsiesan me zho lo grë pxoz ne rnabey.

²² Per zigse zie dze, mazdraa rac Saul tibaque ne rnee me lo grë miech co, lëe men ne zëëble diidz cxeel Dios lo guidzliu ga, nac Jesús. Grë zha Israel ne no ga, riendraa zho dieñ pe gliladz zho.

²³ Goc bla dze no me ga, laa grë zha Israel ne no ga blëe lo me; bnediidz zho rëb zho laa zho gut me.

²⁴ Dze guieel riesobnap zho gzaase zaatne rap biedz nroob ne ndze igo guiedz co nëz, riequiambëz zho ted me, gut zho me. Per gocnan mew,

²⁵ nacne gol ti pcow liu pcaalsa grë zha ne bliladz mine bnee me, bloo zho me ti len chicuid nroob, bzoob zho doow dzigo blit zho me cho biedz nroob ne sca ndze igo guiedz co. Sca bdeeda diidz brie me ga.

Bdzin Saul Jerusalén

²⁶ Zeene bdzin Saul Jerusalén gocladz me ndzin me lo grë zha ne riladz Jesús ga, per lel bdzieb zho zeene gon zho me, sac riladz zho ne nli yele me bzëeb xnëz Jesús.

²⁷ Dzigo güeyne Bernabé me lo grë zha ne nac poxtl, bzodiidz Bernabé lo zho zha gon me Jesús zeene no me nëz zie me Damasc, zha rëb Jesús lo me; ni zha bdziebd me bnee me lo grë miech cho nac Jesús, len dze ne blëz me Damasc.

²⁸ Dzigoraa pcaania zho me. Laa zho gocgza me, zaatne zietaa zho zieseed zho miech, ib rdziebd me rnee me cho nac Jesús.

²⁹ Briequia bla zha Israel ne rnee xtiidz zha Gres bdilididznie zho me. Zhisaque goca, laa zho gocladz niut zho me.

³⁰ Zeene gocnan grë zha ne riladz Jesús gaw, dzigo güeysan zho me guiedz Cesarea; ga brie me laa me zie nëz Tars, zaatne nac ladz me.

³¹ Len dze co, grëse miech ne no xnëz Jesús, zigtaa zha ne no Judé, zha ne no Galilé, zha ne nogaa Samar, nguieel rac zho peet lo guielxtseeb nodraa zho; zigse zie dze riogucraa zho zha nac Xtiidz Dios. Grëse zho rioxco zho mban zho zigne rnabey me, tibaque nacie Espiritu Sant zho. Ni scagaa, zigse zie dze ndal grë miech ne rzëëbraa rcaania Xtiidz Dios.

Rieted Pedr lo grë zha ne riladz Jesús

³² Len ngbidz coque, zie ziaad Pedr rieted me lo grëse zha ne riladz Jesús. Nacne güeyted me lo grë zha ne no Lida.

³³ Guiedz co, beenbey me ti mgui lë Ené, gogle xon iz nix mgui co, ib gacd së me sac dipse me gutoo.

³⁴ Dzigo rëbchaa Pedr lo me:

—¡Ené, niinagazh gon laa Jesús gunguiac luu! Na zeen guche i blis xta luu. Zigne sca bnee Pedr laa men co biac, laa me guche ga.

³⁵ Grëse men Lida, grëse men Sarón zeene gon zho sca biac men co, grëse zho bliladz Jesús.

³⁶ Gaxaque Lida riaan ti guiedz lë Jop. Jop ga no ti wnaa ne riladz Jesús, lë Tabit (laa xtiidz zha Gres rnee zho me Dorc). Nquialadz me miech, grë zha ne guieñd pe yquiin, run me xyudar zho.

³⁷ Lega nacle blanguidz me, laa me gut.

Zha ne riladz Jesús ga, laa zho noxco dien zha ygueets me. Bgaz zho me, blozhse ga güeyxob zho me sti len yu ne riaan nêz glaa. Xco co no zho,

³⁸ zeene bin zho laa Pedr no Lida. Pxeelaque zho chop zha bgui zienie diidz lo Pedr tsienob Pedr Jop.

³⁹ Zigne bdzinne zha co diidz, zienalgazh Pedr zhits zho. Bdziñ zho lidz men co, zolinêz güeynie zho Pedr zaatne zhoob me. Nzian grê wnaa viud ndxie ga, wbigbe zho lo Pedr, roon zho rlu zho grê lar ne dbib me.

⁴⁰ Dzigo bnbey Pedr briece zho ley grêse zho, laa me biaan ga, pquitsgzhib me bnb me lo Dios. Blozhse ga wbig me lo ngutoo co, bnee me lo me rêb me: —Guche i, Tabit.

Zigne sca rêb Pedr laa lo ngutoo co bzhial, zeene gon me laa Pedr zo ga, laa me bzobli.

⁴¹ Bzhen Pedr nia me, bliso Pedr me, dzigo bredz Pedr grê zha ne riladz Jesús ga, ni grê wnaa viud co; gon zho laa me brieebanle.

⁴² Dipse lad guiedz co bzhoob diidz sca brieeban wnaa co; grê zha ne bina, ndal zho bliladz Jesús dib zdoo zho.

⁴³ Nzianlaa dze biaan Pedr ga, blêz me lidz Simón ti men ne rcuudz grê guid ma.

10

Güeyzodiidznie Pedr Cornel

¹ Guiedz Cesarea, ga no ti men lë Cornel, rnabey me lo ti partid menguiib lë partid Italian.

² Zigtaa mew, zigtaa grê menlidz mew, dib zdoo zho riladz zho Dios, noxco zho mban zho zigne racladz Dios. Tibaque nonab zho lo Dios, ni nroob ncuaañe rgad zho lo grê zha ne guiend pe yquiin.

³ Tib dze, bdzele dzew tibaque zeene gon me laa ti xanjl Dios bdziñ zaatne zo me, bredzlë anjl co me.

⁴ Dze rwi me lo anjl co, rdzieb me laa me pquiab. Dzigo rêbchaa anjl co lo me:

—Gocnañ ganle grêse mine rnab luu lo Dios ron mew, ni ran me grêtaa yudar ne squi quiaayun luu lo grê zha ne guiend pe yquiin.

⁵ Gacxe waa, laa naa zialnie diidz lo luu: pxeel bla zha ne tsie guiedz Jop tsixi zho ti men ne lë Simón Pedr.

⁶ Gax zaatne nac ro nisdoo, ga no ti men lëque Simón, rcuudz me grê guid ma; lidz men co ga rbêz me; ga tsieguiib zho me.

⁷ Zeene laa anjl co zey, dzigo bredz me chop zha ne quia dziin lidz me, ni bredz me ti zhaguiib ne nacgrê zhaguiib ne zopaa gax lo me; dib zdoo zhaguiib co riladz zho Dios.

⁸ Blozhse bzodiidz me lo gza zha co zha bzhaac me, dzigo laa me pxeel zho zixi zho Pedr Jop.

⁹⁻¹⁰ Biini liu, zig rwe ngbidza gaxle Jop zie zho. Lëëtaaque hor co laa Pedr biep nêz glaa guic yu ne rbêz me ga. Rcaabedz me, dzigo laga noyacro ncuaañe gow me laa me biep guic yu co ziezodiidznie me Dios.

¹¹ Dios nozodiidznie me, tibaque zeene gon me laa ti lar nroob ziad-zëeb zhan gbaa, nzhidoo gzatap nêza laaw bdziñ lo me.

¹² Grê lose ma no lo lar co, ga no ma ne rzê gza tap ni, no grê ma ne rzê zigne rzê meel, ni no grê ma ne rsiibe.

¹³ Horco bin me ti tsi men co, rêb lo me:

—Pedr, ma ne racladztaa luu gow luu zac gut luu ma.

¹⁴ Pquiab me rêb me:

—¡Min cogaa nagon grielod! Wlaltaa gard gow naa grë ma beed qui.

¹⁵ Rëbchaa men co lo Pedr:

—Grë ncuuaane beenlayle Dios, nodne gnee luuw ncuuañ beed.

¹⁶ Blulo lar co tib, bluloquew stib, laa zeene biontaa gon mew dzigo laaw biire bzoquia nëz gbaa.

¹⁷ Lëëtaaque laa Pedr no zhgab dien pe nacne sca gon me lar co, laa zha ne pxeel Cornel ga bdziñ ro yu ne rbëz me ga,

¹⁸ rnabdiidz zho me.

¹⁹ Zhgab co no Pedr; zeene rëb Espiritu Sant lo Pedr:

—Laa tson zha bgui gon ziaadguib luu.

²⁰ Biet, bnee lo zho. Ib peet tsienied guic luu güeynal zhits zho, sac naa bnabey ziaad-xi zho luu.

²¹ Dzigo laa Pedr biet ga, bdziñ me lo zha ne pxeel Cornel ga, rëb me lo zho:

—Naa nac Simón Pedr. ¿Pe nac mandad ne ziaad to?

²² Pquiab zho rëb zho:

—Laa no ziaad xmandad Cornel, ti men ne rnabey lo menquiib Cesarea. Laa me pxeel no ziaad-xi no luu, sac ti xanj Dios rëb lo me cxeel me zha ne guiaad-xi luu tsie luu lidz me, tsienee luu lo me. Ti miech wen nac me, dib zdoo me rliladz me Dios, grëse zha Israel rleynie zho me.

²³ Dzigo bredz Pedr zho bded zho nëz len yu; ga biaan zho wdze co. Biiniraa liu zienie zho me, ye palal zha Jop, zha ne rliladz Jesús zienal zhits me.

²⁴ Dze ne rac chop ngbidz brieë zho Jop, laa zho bdziñ Cesarea. Laa Cornel bredzle grë menlidz me, grë zha ne ndzieeldiidz me; ndal nac zha ne ndxienie me lidz me, quiambëz me Pedr.

²⁵ Zeene laa Pedr bdziñ, brieë me güeydzieelo me Pedr, pquiitsgzhib me lo Pedr nan me niun me Pedr zigne riegān me Dios.

²⁶ Dzigo bliso Pedr me, rëb Pedr lo me:

—¡Guso i, nodne yquiitsgzhib luu lo naa! Bien ganle samiechaque luu nac naa.

²⁷ Dzigo laa menquiib co guso ga. Nozodiidz zho laa zho bzëeb len yu. Zeene bdziñ zho zaatne ndxie grë miech co,

²⁸ psilo Pedr bnee me lo zho, rëb me:

—Nanle to ganle zha Israel naa, ni ib lo xley no rnabey nodne ziaab no lidz grë zha zit, per ni ctsieelsad no zho; per laa niina laa Dios blu lo naa, grëse miech ne beenlayle me nod pe nacne gbix zdoo naa gan naa zho.

²⁹ Gacxe waa, zigne gocnan naa laa to rbedz naa, zialnalgazh naa zhits zha ne pxeel to. Nana sca, golnë dien pe nacne bredz to naa.

³⁰ Dzigo bzodiidz Cornel zha bzhaac me, rëb me:

—Nadze rac tap ngbidz ga, zig znaw gon, no naa lidz naa nu nocuan naa, ni nonab naa lo Dios. Tibaque zeene gon naa laa ti mgui zole lo naa, masaque riaazbel xab me,

³¹ në me: “Gocnan ganle grëse mine rnab luu lo Dios ron mew, ni ran me grëtaa yudar ne squi quiaayun luu lo grë zha ne guiend pe yquiin.

³² Gacxe waa, laa naa zialnë diidz lo luu: pxeel bla zha ne tsie guiedz Jop tsixi zho ti men ne lë Simón Pedr. Gax zaatne nac ro nisdoos, ga no ti men lëque Simón, rcuudz me grë guid ma; lidz men co ga rbëz me; ga tsieguib zho me.”

³³ Sca nagon në men co lo naa, nacne bnabey naa biaad-xi zho luu; ni xquizhгаа luu ne laa luu ziaad. Dios zobwi ganle, grëse no laa no ndxie nu par yquiaadiag no mine bnabey me luu gnë luu lo no.

³⁴ Dzigo rëbchaa Pedr:

—¡Naraa rien naa, led yed Dios cue miech dien cho nac zha Israel, cho nacгаа zha zit!

³⁵ Sínque grêse miech lo guidzliu, tel pa guiedztaa nac zho, rcaania me zho totsaque ron zho mine rnabey me, ni rioxco zho zaacse rban zho.

³⁶⁻³⁷ Rgobey naa ziyonle to Diidz Ndzon ne pxeel Dios lo menladz naa niina wriin. Lo Diidz Ndzon co rnee, ne zac guiaanwen miech lo Dios, totsaque gliladz zho cho nac Jesús, men ne zëëble diidz ga cxeel me (ni Jesús gon bzaa grëtaa ncuane no). Zig nac dib Judé, desde ne psilo Juan pseed me miech Galilé, laa zho gocnana.

³⁸ Ni nanaxe to ganle, bdeed Dios poder lo Jesús, pxeel me Espíritu Sant gocie Jesús. Zaatne bdedtaa Jesús, pquia zdoo me miech, grê zha ne nosacsi mendox psilaa me zho ladznia ma; sacne nli Dios nacnie me.

³⁹ No ne nac no zha ne bzianie me, grop lo no bdzian no grëtaa milagr ne been me, zigtaa Jerusaléna zigtagaa dib Judéw. Jerusalénpaa ga beet zho me pquiaa zho me lo cruz,

⁴⁰ per zeene goc tson ngbidza laa Dios bleeban me, ni bneedz Dios diidz biire bdzian no me.

⁴¹ Led grëdraa miech gon me, loxaque nose bdzian me; sac ib Dios bzooblo no dzian no grê dziin ne been me. Haxta bdioownie no me, bdionie no me,

⁴² ni pxeel me no gnee no lo miech gacnan zho ganle laa Dios bzo me, me gun guielwxtis gal dze ne laa Dios cuedz grêse miech, zigtaa zha guta zigtagaa zha mbana.

⁴³ Me ga bzeet grê zha ne biadteed Xtiidz Dios lo miech padzeela, zeene rnee zho: “Grêse zha ne gliladz cho nac me, silaa Dios zho lo dol.”

⁴⁴ Laa Pedr bii quianeeque, zeene laa grê zha ne noquiaadiag ga bgaa guielbiini ne bdeed Espíritu Sant lo zho.

⁴⁵⁻⁴⁶ Grê zha Israel ne ziegza Pedr ga, zeene gon zho laa grê zha co psilo quianee stib diidz, ni rdeed zho xquizh lo Dios, bzee zdoo zho gon zho ye grê menzit rgaa guielbiini ne rdeed Espíritu Sant.

⁴⁷ Dzigo rëbchaa Pedr:

—¿Peraa nadien gbiaaz ne, ne cchoobnisgazhd ne zha rii? Laa ne bdzianle ganle zigne rdeed Espíritu Sant guielbiini lo zha Israel, scaque bdeed me guielbiini lo zho.

⁴⁸ Dzigo bnabey Pedr brobnis zho, laa zho bzëëb xnëz Jesús.

Blozh ga bnee Cornel lo Pedr cuëz me ga ti bla dze.

11

Bzodiidz Pedr zha güey me lidz Cornel

¹ Grê zha poxtl ne no Jerusalén, ni grëraa zha ne rililadze Jesús zha ne no Judé, bin zho sca bliladz gza menzit co Xtiidz Dios.

² Dzigo zeene laa Pedr bdzian Jerusalén güey bla zho güeytiidiidznie zho Pedr,

³ blisqui zho lo Pedr pe nacne güey Pedr lidz menzit, pe nacne güeytownie Pedr zho.

⁴ Dzigo psilo Pedr bzodiidz me lo zho zha nacne güey me lidz men co, rëb me:

⁵ —Guiedz Jop no naa, tib dze lëëtaque nozodiidznie naa Dios, tibaque zeene gon naa laa ti lar nroob ziad-zëëb zhan gbaa, nzhidoo gzatap squina laaw ziaad nëz lo naa.

⁶ Zeene bdixlo naa bui naa dien pe quia lo lar co, gon naa niapse ma no lo co, grê ma ntseeb, grê ma ne rzë gzatap ni, grê ma ne rzë zig rzë meel, ni grê ma ne rsiibe.

⁷ Lo grē ma co nowi naa, zeene bin naa ti tsi men co, nē lo naa: “Pedr, ma ne racladztaa luu gow luu, zac gut luu ma.”

⁸ Dzigo pquiab naa rep naa: “Min cogaa nagon grieelod, waltaa gard gow naa grē ma beed qui.”

⁹ Nēchaa me lo naa: “Grē ncuaañe beenlayle Dios, nodne gnee luuw ncuaañ beed.”

¹⁰ Tson vuelt sca gon naa lar co. Blulow tib, bluloquew stib, zeene biontaa gon naaw dzigo laaw biire zey gbaa.

¹¹ Loxaque blozh gon naa lar co, laa tson zha bgui blanso ro lidz men ne blēz naa ga, pxeel men Cesarea co zho ziaadguib zho naa.

¹² Ni laa Espiritu Sant bneeeque lo naa, no ganal naa zhits zho, niicle ne zhazit nac zho; nacne bianañ naa. Ye gza xoop zha ne zialñie naa nu bzē bio no.

¹³ Bdziñ no lidz men co, psilo me bzodiidz me lo no zha bzhaac me, nē me len yu no me, zeene gon me ti xanjñ Dios, rēb anjñ co lo me cxeel me bla zha ne tsie Jop tsiexi zho naa

¹⁴ zeena gane naa lo me zha grielo csilaa Dios me lo dol grē menlidz me.

¹⁵ Laa naa psilo quiane lo me grē menlidz me, zeene grēse zho laa zho pcaania Espiritu Sant, ni bgaa zho grē guielbiini ne rdeed me zigne bgaaque new.

¹⁶ Ga nagon psoladz naa xtiidz Jesús men ne rnabey ne, zeene znu nē me lo ne: “Nli nisse pchoobnis Juan miech, sanque to zgaa to guielbiini ne rneedz Espiritu Sant.”

¹⁷ Sca nagon pcaania zho Espiritu Sant, laa zho bgaa guielbiini ne rdeed me zigne bgaaque new. ¿Cho nac naa nadien ne glisqui naa mine run Dios?

¹⁸ Zeene blozh bin zho grē mine bnee Pedr ga, peet rēbdraa zho. Psilo zho rleynie zho Dios, rdeed zho xquizh lo me; sac hor coraa bien zho ye grē menzit zrieelo gbig zho lo Dios, gdeed me ti guielmban ndzon ne gdziñd dze lozh lo zho.

Bliladz zha Antioquí Xtiidz Dios

¹⁹ Zeene sca pquianañ zho grē zha ne riladz Jesús len dze ne beet zho Xteb ga, nēzrii nēzrec bliaañ zho. No zho bdziñ haxta Fenicia, no zho bdziñ Chipr, nogaa zho bdziñ nēz Antioquí. Zaatne bdziñtaa zho bnee zho cho nac Jesús, per loxaque lo grē menladz zho bnee zhow.

²⁰ Niicle ne scaw, lēēque grē zha Israel ne no Chipr, zha ne no Ciren, zeene laa zho bliladz Jesús güey zho guiedz Antioquí, bnee zho lo grē zha zit co cho nac Jesús.

²¹ Ni ne nacie Dios zho, ndal grē miech co bzēeb xnēz Jesús.

²² Grē zha ne no Jerusalén, zeene gocnañ zhow pxeelaque zho Bernabé güey Antioquí.

²³ Zeene bdziñ Bernabé Antioquí, rley me gon me scataa quiayunlay Dios grē miech co; dzigo pso me diidz lo zho ib csaand zho zhiwseed Jesús.

²⁴ Ti men dib zdoo riladz Dios nac Bernabé, nacie Espiritu Sant me, ti miech wen nac me; gane zeene laa me bdziñ ga nzianraa zha ne bliladz Jesús.

²⁵ Goc palal dzew, dzigo güey Bernabé guiedz Tars güeyxi me Saul, bdziñnie me Saul Antioquí.

²⁶ Dipse ti len iz blēz zho ga grop zho, blozh pseed zho grē zha ne bliladz Jesús. Ga gloopaa psilo ne laa grē zha ne riladz Jesús brieelē CRISTIAN.

²⁷ Len iz co blalaa zha ne noteed xtiidz Dios no Jerusalén. Dzigo brie zho ga güey zho Antioquí.

²⁸ Lad co no tib men lè Agab, psiaab Espiritu Sant guic me bnee me laa ti gbin dox gan miech nêz Israel. (Ni nligaa scase goca, lèë gbin co biaad len iz ne zobnabey men ne lè Claud.)

²⁹ Grè zha ne riladz Jesús Antioquí, zeene bin zho sca rëb Agab, nacne bnediidz zho grè zho, tel palaltaa ncuaañe rgaa lo zho tib tib zho gdeed zhow gaclo ti gon cxeel zho lo zha Judé.

³⁰ Dzigo ptop zho gon co, zeene laaw goclo, pxeel zho Bernabé grop Saul güeysaña lo grè zha rnabey ne zo lo zha ne riladz Jesús nêz Judé.

12

Bio Pedr ladzguiib

¹ Len dze co psilo rey Herod notsidil me grè zha ne riladz Jesús.

² Bnabey me bgaa Jacob bets Juan, beet zho Jacob lo spad.

³ Zeene gon Herod rley grè zha ne rnabey lo menguiédz Israel ran zho zha rsacsi me grè zha ne no xnêz Jesús ga, dzigo bnabeyaue me bgaa Pedr bio Pedr ladzguiib; lèëtaue len dze co noyac lni Pascw.

⁴ Laa Pedr no ladzguiib, bnabey me bzo xon nêz menguiib quianap Pedr. Quiambêz me tedse lni co, laa me cuee Pedr gan grè menguiédz zha csacsi me Pedr.

⁵ Grè zha ne riladz Jesús, zeene gocnan zho scataa ndxienap menguiib Pedr no Pedr ladzguiib, psilo zho tibaue quianab zho lo Dios gacniën me Pedr.

⁶ Nacle diidz pa dze cuee Herod Pedr. Wdze ne guini liu co, laa Pedr nixguiesse len ladzguiib; tib ga caden zob ti nia me, tibga menguiib tib nêz cue me, ni zhaaque zo zla zha ne quianap ro ladzguiib.

⁷ Tibaue zeene biab ti biinidoo len ladzguiib, laa ti xanjl Dios bdziñ ga. Bdziñ me, pcaañnia me cue Pedr, pcaaan me Pedr, rëb me:

—¡Na zeen guche il!

Zigne sca bnee anjl co, lega zhal caden ne zob nia Pedr ga bzhiala brieew nia Pedr;

⁸ dzigo rëbchaa anjl co lo Pedr:

—¡Pxidoo len luu, pquiaa lab luu ni luu!

Blozhse pxidoo Pedr len Pedr, ni pquia lab Pedr; rëbchaa anjl co:

—¡Wbix xab luu na, zeen dënal zhits naa!

⁹ Nañse Pedr zhits anjl co laa Pedr brieë ga. Riend Pedr ne nli nosilaa anjl co Pedr, masaque rzac me nonixquieel mew.

¹⁰ Bded zho chop len yu zaatne ndxie menguiib ne quianap, laa zho bdziñ zaatne quia puert guib ne rriee ro nêz. Zigne bdziñ zho, zhal puert co bzhiala; laa zho brieë. Bzënie anjl co Pedr spalal, zeene gol zho zaatne rdedlsa nêz co, dzigo laa anjl co psan Pedr ga.

¹¹ Dzigoraa bien Pedr led nonixquieel Pedr; nli Dios pxeel xanjl me güeysilaa Pedr ladznia Herod, zeena gleyd zha Israel nian zho grè guieinë ne nded Pedr.

¹² Dzigo laa Pedr zie nêz lidz Marí, xniaa Juan Marcw; lèëtaue hor co nzian zho ndxie ga quianab zho lo Dios.

¹³ Zeene bdziñ Pedr pcaañnia Pedr ro yu. Brieë ti ndzoop ne quia dziin ga lè Rode, zieso ndzoop dieñ chow.

¹⁴ Zeene beenbey ndzoop co tsi Pedr, rley ndzoop. Lo guieibley co niicle pxaldaue ndzoop ro yu, rias ndzoop zienie ndzoop diidz lo grè zha ne ndxie ga; rëb ndzoop laa Pedr bdziñ ro yu ga.

¹⁵ Per bliladzd zhow.

—¡Dieën pe rool luu! —rëb zho—. ¡Ncuaañe gliladzd ne rnee luu!

—¡Coo, nli lëë mew! —rneë ndzooop—, laa me zo ga.
 —¡Led meda, —rneë zho—, bod anjl ne quianap mew!

¹⁶ Sca no zho, laa Pedr bii nocaannia ro yu. Zeene güey zho pxal zho ro yu, bzee zdoo zho gon zho nli Pedra, laa Pedr zo ga.

¹⁷ Dzigo blunia Pedr lo zho gnee nguiedzd zho; laa zho bzëëbnie Pedr len yu. Ga psilo Pedr bzodiidz Pedr lo zho zha güeybee xanjl Dios Pedr len ladzguiib; ni pso Pedr diidz lo zho sodiidz zhow lo Jacob, ni lo grëraa zha ne nacgrë zho. Blozhse ga, laa Pedr brieë ga.

¹⁸ Zeene biini liu, grë menguiib ne pquianap Pedr len ladzguiib ga, rdziield-raa zho zha gun zho; sac ib biend zho dien yo Pedr.

¹⁹ Zeene laa Herod pxeel zha ne ziebee Pedr ladzguiib, pa sële Pedr. Dzigo güey zho güeynie zho diidz lo Herod; nacne bnabey Herod gocredz grë zha ne pquianap Pedr ga, pquiep Herod zho; blozhse ga, bnabey Herod gut zho gzase zho. Bded ga, laa Herod brieë Judé zey me Cesarea.

Dow mziog Herod

²⁰ Len dze co, pcaalsa menguiedz Tir ni menguiedz Sidón güeynee zho lo Herod; sacne rlëënie Herod zho. Lëëque ti men ne nac dziin lo Herod lë Blast güeynie zho bnee lo Herod, bnab zho tlniedraa me zho, niicle zhagaaw laa zho gbigo lo me; sac grëse ncuaane rquiin zho, grë guiedz ne rnabey me ga rrieew.

²¹ Dzigo bzo Herod ti dze ne tsie zho tsiezodiidznie zho me. Zeene gol dze co, got me lar niazh ne racw rey; bdziin me bzob me lo zhixcan me, psilo me bnee me lo grë miech co.

²² Goc palo quianee me, psilo zho rleynie zho me, nguiedz roptsie zho rnee zho:

—¡Led miechdraa i gon! ¡Ti diosle i nac men qui quianee lo ne!

²³ Laa me bii quianeeque, zeene biet tib xanjl Dios bdiin me, psilo dow mziog me, gagazh gut me. Sca gut me, sac beenbeyd me ne Dios nac men ne non, men ne rnabey.

²⁴ Laa Xtiidz Dios, zigse zie dze laaw quiagaazraa lo miech; ndal zha cub ne nozëëb xnëz me.

²⁵ Jerusalén ga no Bernabé grop Saul len dze co; zeene bialse xtsiin zho, laa zho brieëque ga laa zho zie nëz Antioquí zienie zho Juan Marcw.

13

¹ Lo grë zha ne riladz Jesús Antioquí, nzian zha ne noteed Xtiidz Dios, nzian zha ne rseed miech Xtiidz Dios no lo zho. Lad grë zha co no Bernabé, no ti mgui lë Simón ne rnee zho “Men Yaas”, no ti men Ciren lë Lus, gaque no Saul, ni ti men lë Manaén, bets pchoob Herod.

² Laa ti dze lëëtaque ndxie zho noyoolnie zho Dios ni nocuan zho, zeene laa Espiritu Sant bnee lo zho, rëb me:

—Golcueextso Bernabé i grop Saul, zeena csilo zho lo dziin ne gded naa gun zho.

³ Blozhse pcuan zho, blozhse bzodiidznie zho Dios, dzigo pxobnia zho guic Bernabé grop Saul, bnab zho lo Dios gacniën me zho; bnee zho lo zho, laa zho zie.

Güey Saul Chipr grop me Bernabé

⁴ Ga brieë Bernabé grop Saul zienie Espiritu Sant zho bdziin zho guiedz Seleucia, Seleucia bzëëb zho barcw laa zho zie nëz Chipr (ti guidzliu win ne no lo nisdoo).

⁵ Ye Juan Marcw zienie zho gun xyudar zho.

Bdziñ zho ro guidzliu win co zaatne ndxie guiedz Salamin, biet zho barcw güey zho grë leñ xyadoo meñ Israel ne no ga, güeyseed zho miech Xtiidz Dios.

⁶ Ga brieë zho güeyted zho dipse lo guidzliu co bdziñ zho guiedz Pafos; guiedz ne bdedtaa zho bnee zho Xtiidz Dios lo miech. Pafos, ga beenbey zho ti meñ Israel lë Barjesús (laa xtiidz zha Gres rnee zho me Elim). Rquidie me rnee me xtiidz Dios nooted me lo miech, per diidz dox rool me.

⁷ Guiedz co ga no ti meñ lë Sergio Paul, meñ co zob rnabey guidzliu co; dzigo lo meñ co ga no Barjesús. Ti meñ nixbiini nac meñ ne lë Sergio ga, no me liaadz gacnañ me zha nac Xtiidz Dios; dzigo bnabey me gocredz Bernabé grop Saul.

⁸ Zeene bdziñ zho psilo Barjesús quiaguib me dien pe yquiaaqui yquiaadiagd meñ rnabey co Xtiidz Dios.

⁹ Dzigo buitapaque Pabl lo Barjesús (Pabl nac sti lë Saul), ni ne nacie Espíritu Sant Pabl

¹⁰ rëb Pabl lo me:

—¡Biche nu zhin mendox! Zhin mendox gon nac luu, squitaa noquidiee luu miech, notsidil luu diidzli. ¿Zha rna dze ne csaan luu miñe nac luu i, squi notsidil luu Xtiidz Dios?

¹¹ Gon ganle, ¡laa Dios csiabzi luu, niinagazh laa lo luu ycow, ni spalal xbiini ngbidz gandraa luu!

Zigne sca rëb Pabl laa lo meñ co pcow, nëzrii nëzrec zie me racladz me dien cho gnaaz nia me.

¹² Zeene gon meñ rnabey co sca pcow lo Barjesús, hor co bliladz me Xtiidz Dios, bzee zdoo me gon me scataa poder ne ziaadnie zhiwseed Dios.

Bdziñ zho guiedz Antioquí

¹³ Bded ga, laa Pabl gza Bernabé ni Juan bzëëb barcw stib, laa zho zie nëz xtan zha Panfil. Bdziñ zho guiedz Perg laa zho brieë leñ barcw, ga ptso Juan lo zho, laa Juan zey nëz Jerusalén;

¹⁴ laa zho bio nëz zie zho nëz xtan zha Pisid, bdziñ zho sti guiedz lë Antioquí.

Zeene gol dze ne rdziiladz miech lo dziin, güey zho xyadoo zha Israel.

¹⁵ Blozhse bded zha ne blab lo guits ne pquiaa Moisés, ni blab zho miñe pquiaa grëraa zha ne biadteed xtiidz Dios padzeela, dzigo laa meñ ne rnabey yadoo co bnee lo Pabl grop Bernabé, rëb me lo zho:

—Telne racladz to gnee to chop lan xtiidz to, zac gnee tow niina.

¹⁶ Dzigo guso Pabl, blunia me lo grë zha ne ndxie ga cuedze zho, rëb me lo zho:

—Grëse to ne ndxie to nu, zigtaa tow ne nac to menladz naa, zigtaa togaaw ne nac to zha stib guiedz zha ne noxco gban zigne rnabey Dios; golquiaadiag chop lan xtidz naa ganle gne naa lo to:

¹⁷ Dios ne riladz no nac no meñ Israel, ib me bzooblo grë pxozgol no laa zho bgab lo me. Me gocniën zho zeene bio zho ladz meñ Egipt, ni me güeysilaa zho ga, blu me ganle ne nli meñ nroob nac me.

¹⁸ Dipse leñ choo iz ne bio zho grë dan bidz ne bded zho ga, pxecw me grëtaa xquielntseeb zho.

¹⁹ Blozh ga, bnitlo me gadz guiedz nroob ne ndxie xtan zha Canaán, bdeed me liu co lo zho.

²⁰ Ni dipse leñ tap gayoo gol iz, me bzooblo grë zha ne bzo bnabey lo zho; lëë lultm zha ne bzo me ga bnabey lo zho goc profet Samuel.

21 Blozh ga, laa zho bñab so ti rey gnabey lo zho, nacne bzo me Saúl, bzob Saúl choo iz goc me zhirey zho. Lëë pxoz Saúl ga brieelë Cis, men ne ziaad lo xtiï pxozgol no Benjamín.

22 Zeene laa Dios ptiche dziin co lo Saúl, dzigo bzo me David goc rey. Lëë David ga rzeet Dios zaatne znu rnee: “Rleynie naa xingan Isai zha ne lë David, laa naa gonle ib zun David mine gnabey naa.”

23 Ni lo xtiï David co nagon brieequia Jesús, men ne pxeel Dios lo guidzliu biaadsilaa miech lo dol, zigne psanle me diidz lo xmengol no padzeela.

24 Len dze ne merle xoobnen cho nac Jesús, len dze co bnee Juan Bautist lo grë men Israel: csaan zho xquielntseeb zho gnab zho perdon lo Dios, zeena chobnis zho.

25 Laa zeene zhile gdziñ dze ne gut zho Juan, dzigo bnee me lo miech rëb me: “Golgacnañ ganle, led naad nac men ne quiambëz to ga cxeel Dios. Merle gunbey to me, ti men non nac me, per ni par gac naa ti ngundziin win ne glit lab me ni me raguiald naa.”

26 ‘Golgacnañ sca ganle bets: zigtaa tow ne ziaad to lo xtiï Abraham, zigtagaa tow ne nac to miech stib guiedz zha ne rliladzle Dios, ib laa Dios pxeel Jesús csilaa me ne lo xtol ne grëse ne.

27 Grë zha Jerusalén ni grë zha ne rnabey lo zho, ib biend zho cho nac Jesús, niicle ne scataa gzobse dze ne rdziiladz zho lo dziin, rlab zho lo grë guits ne pquiaa zha ne biadteed xtiidz Dios padzeela; haxta bñab zho gut me zigne bneese grë zha co.

28 Niicle ne gon zho peet xtold me, niicle ne brieequiad dol ne pquiaqui zho me, per bguib zho bdeeda diidz bñabey Pilat gut me.

29 ‘Blozhse psacsi zho me, pteed zho me grëse zigne bzeetle grë zha ne biadteed xtiidz Dios ga, dzigo güey zha ne blit me lo cruz, güeyqueets zho me.

30 Per bleeban Dios me.

31 Grë zha ne güeynal zhits me zeene briece me Galilé bdziñ me Jerusalén, nzian zho gon me; ni niina grëse zho laa zho quianee lo miech ganle cho nac me.

32 ‘Scaquegaa no grop no Bernabé, laa no ziaadnie diidz lo to gacnañ to ganle niina ne laa Dios bleeban Jesús, laa me been mine bnee me lo pxozgol ne padzeela.

33 Lëë Jesús ga raquiet lo Salm brop, zaatne rnee: “Xpëed naa nac luu. Desde nadze laa zho gunbey ne Xpëed naa nac luu.”

34 Ni bzeetle Dios ne laa me cueeban Jesús, bzeetle Dios xiñd xcuerp me len baa; miñ co ga raquiet lo Xtiidz me, zaatne rnee: “Zunlay naa luu, zigne bnese naa lo David gun naa.”

35 Laa stib lo Salm ne pquiaa David rnee: “Gdeete luu diidz xiñd xcuerp naa len baa.”

36 Rlu led Davite raquiet ga, sac zeene bza dze ne goc me dziin lo menladz me laa me gut, ni zaatne pqueets zho me, ga bnitlo xcuerp me.

37 Led meda, zhaa men ne raquiet ga; gacxe na rneew waa peet gacd xcuerp men co, zbeeban Dios me.

38-39 ‘Grëse to bets, golgacnañ sca ganle! ¡Jesús nac men ne rsilaa miech lo dol! Zha ne gliladztaa me dib zdoo zho, tel pe nactaa grë xtol zho, sanmbe me zho. Mine wlaalaa brieelod ngaa to, niicle ne zienal to xley Moisés; sac niicle gun tow grëse zigne naca, csanmbeda to lo dol.

40 ‘Golguien sca gacnroladzde to! Zeena ygaade to mine bzeet zha ne biadteed xtiidz Dios padzeela, zeene znu bnee zho:

41 Grëse to ne rzhidznie to mine nac diidzli,

bii zan to ganle laa naa gun ti milagr nroob ne gzee zdoo to;
per znitlo to, sac gliladzde tow niicle guiaad zha ne gzodiidza lo to.

⁴² Blozh bnee Pabl; laa zeene laa Pabl griee ga grop Pabl Bernabé bñab grë miech co lo zho, siguiel zho guiet sti zhmal co biire tsie zho tsieseed zho zho.

⁴³ Zeene briee zho len yadoo co, nzian grë zha Israel, nzian grë zha stib guiedz zha ne riladzle Dios zienal zhits zho. Nëz no zho bnee zho lo grë miech co tiblque tso guic zho tsienal zho zhiwseed Dios, guien zho ganle pa lotaa noxco me zho.

⁴⁴ Biet sti zhmal co, miech guizhiu ne goclo len yadoo co, zootle zig grëse miech guiedz co pcaalsa ga ziequiaadiag zho Xtiidz Dios.

⁴⁵ Zha ne rnabey lo grë zha Israel ne no ga, zeene gon zho scataa ndal miech ne goclo ga, blëe zho lo Pabl, ndox zho lo me, rëb zho led diidzlid nac miñeed me.

⁴⁶ Niicle Pabla, niicle Bernabéw bdziebd zho, dzigole bnee zho lo zho rëb zho:

—Nli to glo rieguial yquiaadiag Xtiidz Dios ne nac to zha Israel. Per ne squi run to guielntseeb nëde to ycaania tow par yгаа to guielmban ndzon ne rneedz Dios; na laa no guioseed grë zhazit.

⁴⁷ Ni scalegaa rnabey Dios gaca, sac znu rnee me:

Laa naa bzole luu tsienee luu Xtiidz naa lo grë menzit,
luu gac zig ti biini ne gziini lo grë miech ne ndxie lo guidzliu;
zeena guien zho zha laa zho lo dol.

⁴⁸ Grë zha ne nac zhazit, zeene bin zho sca rëb Pabl, per nli rley zho, rdeed zho xquizh lo Dios scataa ndzon nac Xtiidz me. Grëse zha ne nole yгаа guielmban ndzon ne gdeed Dios ga, grëse zho dze cogazh laa zho bliladz Jesús.

⁴⁹ Dipse dan co, gocnan miech Xtiidz Dios.

⁵⁰ Grë zha Israel ne rlëe lo Pabl ga, psilo zho pquuil zho grë men wnaa ne nac diidz noxco Xtiidz Dios, ni güey zho güeynee zho lo grë zha ne nac men non lad guiedz co; zeena ctsidil zho Pabl grop Bernabé, guñcxooñ zho zho dan co.

⁵¹ Zeene bin Pabla grop Bernabé, par glu ne nonguield sca been zha co zho, beenbe zho grë yudie co ni zho laa zho briee ga, laa zho zie nëz Icon.

⁵² Grë zha ne bliladz Jesús ga, nguieel rac zho, rdeed Espiritu Sant guielbiini lo zho.

14

Bdzin Pabl Icon grop me Bernabé

¹ Zeene bdzin Pabl Icon grop me Bernabé, güey zho tib xyadoo zha Israel zob lad guiedz co, bnee zho Xtiidz Dios lo grë zha ne pcaalsa ga. Zigtaa zha Israela, zigtagaa zha lad guiedz cow, nzian zho bliladza.

² Laa grë zha Israel ne bliladzda, psilo zho bloo zho diidz lo grëraa miech guiedz co glëenie zho Pabl grop Bernabé.

³ Niicle sca been grë zha co per wbid zho, bii blëz zho ga, peet dzeb nod lo zho rie zho rienee zho Xtiidz Dios lo miech; scagaa Dios, nzian grë milagr ne bdeed me diidz run zho par glu ne nli Xtiidz me nonee zho.

⁴ Dzigo grë miech ne no lad guiedz co goc zho chop dii, groļ zho racnie grë zha Israel ne rlëe ga, zgroļ zho racnie grop zha poxtl co.

⁵ Zha ne rlëe ga, zigtaa zha Israela zigtagaa zha guiedz cow, bñediidz zho grë zho wxtis laa zho tsie tsiedeedquie zho Pabl grop Bernabé.

⁶⁻⁷ Zeene bin Pabla grop Bernabé, mazd laa zho briee ga, laa zho zie nëz xtan zha Licaon. (Güey zho Listr; güey zho Derb ni grëraa guiedz ne ndxie gax ga; güeynee zho lo grë miech co zha nac Xtiidz Dios.)

⁸ Guiedz Listr ga gon zho ti mgui nē ni, wlaltaa lo xquielmban me ib gard sē me; sac scale nē ni me zeene gol me.

⁹ Zeene gon Pabl dze zob me rquiaadiag me mine nonee Pabl lo grē miech co, dzigo dzeque bui Pabl lo me, gon Pabl dib zdoo me rliladz me nli zrieelo gunguaiac Dios me;

¹⁰ dzigo nguiedz bnee Pabl lo me, rēb Pabl:

—jBeenli ni luu, zeena bzoli!

Zigne sca bnee Pabl, znuse guso nguzhoon me, bzoli me laa me psilo bzē.

¹¹ Zeene gon grē miech co sca biac me, psilo zho con xtiidz zho nguiedz rnee zho:

—jDiosle i gon, nasi zig rlu miech rlu me laa me biet gbaa ziaadgan me ne!

¹² jMasaque rzac zho lē xdios zho ga! Rnee zho Bernabé nac dios Júpiter, laa Pabl nac dios Mercur; sac Pabl nac zha ne ndziibraa rnee.

¹³ Ro guiedz co ga zob xyadoo zhimdio zho Júpiter, dzigo brieepxoz ne no yadoo co grē me miech lad guiedz, zienie zho ngon, zienie zho guiee, nan zho gut zho ngon co cogan zho ma lo Pabl grop Bernabé.

¹⁴ Zeene bien Pabla grop Bernabé wbinladz guic zho. Ptsiez zho xab zho, bzēeb zho lad grē miech co, nguiedz rnee zho lo zho:

¹⁵ —jNdzinli golgac! jPe nacne squi rac to? jGolgan ganle miech guidzliuque nac no, tibaque nac ne grē ne! Laa no ziaad lo to ziadseed no to wseed cub ne nac Xtiidz Dios, zeena guien to csaan to grē ncuaaane paat rquiind ne run to i, gbiire gbig to lo Dios men ne nlipaa mban. Me bzaa gbaa, me psan guidzliu, me psan nisdoo, grēse ncuaaane no gbaaw, ncuaaane no lo guidzliuw, ncuaaane no lo nisdoo, me bzaaw grēsew.

¹⁶ Niicle ne glo bdeed me diidz been miech grē ncuaaane gocladztaa zho,

¹⁷ per psaanladz me zho. Gocnie me zho zigne racnieque me ne niina, rsiaab me nisguie rac xcuaa ne, rneedz me ncuaaane rdioow ne gzataa dze, rneedz me guiebley lo ne.

¹⁸ Niicle sca rnee grop zha poxtl co, nen bin grē miech co diidz beete zho ngon co ngogon zho ma lo zho.

¹⁹ Len dze co, blalaa zha Israel ne ziaad nēz Antioquí ni nēz Icon bdzin Listr ga. Psilo zho bloo zho diidz lo grē miech co gocntseeb zho lo Pabl; güey grē miech co bdeedquie zho Pabl.

Masaque bzhaac zho gutle Pabl, bdoobniu zho me güeyron zho me tiblad ro guiedz.

²⁰ Grē zha guiedz co zha ne rliladzle Jesús, zeene bin zhow, güey zho zaatne nix me ga. Lēetaaque ndxie zho lo me, zeene laa me guche; ga guche me laa zho zeynie me nēz len guiedz. Biini liu, pcaa me nēz grop me Bernabé laa zho zie nēz Derb.

²¹ Bdzin zho Derb, psilo zho bnee zho Xtiidz Dios lo grē miech co; ndal grē zha ne bliladza. Blozh ga, laa zho wbi ga biire güeyted zho nēz Listr, güeyted zho Icon, ni güeyted zho Antioquí,

²² güeynee zho lo grē zha ne rliladz Jesús ga, pchoobladz zho zdoo zho, pso zho diidz lo zho, niicle nroob guielné ne noded zho per none tibaque gac guic zho tsienal zho Xtiidz Dios; sac ible sca nzian ncuaaane ted zho laga gdzin dze ne gdzin zho zaatne rnabey Dios.

²³ Tib tib guiedz co, bzose zho grē zha ne so gnabey lo grē zha ne rliladz Jesús ga; rlozhse rcuan zho grē zho zho ni rzodiidznie zho Dios, dzigo laa zho rsan zha co ladznia me yquianap me zho.

Bdzin Pabl grop Bernabé nēz Siria stib

²⁴ Něz no Pabl grop Bernabé bded zho dib xtan zha Pisid, bzëëb zho xtan zha Panfil, bdziñ zho guiedz Perg.

²⁵ Blozhse bnee zho Xtiidz Dios lo grë miech co, dzigo laa zho brieë ga, bdziñ zho guiedz Atalia.

²⁶ Atalia ga bzëëb zho barcw bdziñ zho sti guiedz ne lë Antioquí, gataa laa zho psiaal viaj co. Guiedz coque ga brieë zho grop zho güey zho grë guiedz co güeynee zho Xtiidz Dios lo miech; zeene sca bñab grë zha ne riladzle Jesús ga lo Dios gacniën me zho tsiegun zho xtsiñ me.

²⁷ Zigne bdziñ zho Antioquí ga, bnabey zho pcaalsa grëse zha ne riladz Jesús, bzodiidz zho lo grë miech co grëse zha gocniën Dios zho güeygun zho xtsiñ me, ni zha rquia zdoo Dios zha ne nacd zha Israel rbedz me zho ye zho rzëëb xnéz me.

²⁸ Xtselaa bio Pabl ga grop me Bernabé, blëz zho lo grë zha ne riladz Jesús ga.

15

Pcaalsa zho Jerusalén

¹ Ga no Pabl grop Bernabé zeene bdziñ bla zha ne ziaad nöz Judé, psilo zho noseed zho grë zha ne riladzle Jesús ga, rnee zho lo zho ib none tso zho bey zigne rnabey xley Moisés, niicle ne riladzle zho Jesús; zeena sca csilaa Dios zho lo xtol zho.

² Zeene gon Pabl sca noseed zha co miech, nacne bdildiidznieque Pabl zho grop Pabl Bernabé. Dzigo mazd bnediidz grë zha ne riladz Jesús ga, bzo zho zla zha ne gacgza Pabl grop Bernabé tsie zho Jerusalén tsienabdiidz zho lo zha poxtl ni lo grë zha ne rnabey lo zha ne no ga, diën pe guiab zho.

³ Nacne brieë zho zie zho. Něz no zho bded zho xtan zha Fenicia, xtan zha Samar; zaatne notaa zha ne riladz Jesús, rzodiidz zho lo zho grëse zha nobedz Dios grë zha ne nacdraa zha Israel, rsaan zho grë zhiwseed xmengol zho laa zho riladz Jesús. Rley grë miech co ron zhow. Sca bio zho nöz, laa zho bdziñ Jerusalén.

⁴ Zeene bdziñ zho Jerusalén, pcaalsa grë zha poxtl, grë zha ne riladz Jesús ga, ni grë zha ne rnabey lo zho. Dzigo ga bzodiidz Pabl grop Bernabé grëse zha gocnie Dios zho, zeene güeyted zho grë dan co güeynee zho Xtiidz me lo miech.

⁵ Miñ co quianee zho zeene guso bla zha ne glo goc farisé rëb zho, grë zha ne nacd zha Israel zeene laa zho riladz Jesús ib none tso zho bey, ni none gun zho grëse miñ rnabey Xley Moisés.

⁶ Dzigo nacne bnabey grë zha poxtl co ni grë zha rnabey co, ycaalsa zho stib diën zhapaa gaca, pe nonguiela tso grë zha zit bey co.

⁷ Zeene pcaalsa zho, goc pa lo quianee zho zeene guso Pedr rëb Pedr lo zho: —Grëse to bets, goiquaadiag miñe gne naa lo to nu ganle. Led rsoladz to, zeene griinpaal psilo quiagaaz Xtiidz Jesús lo miech, ible Dios bzooblo naa pxeel me naa gaseed naa grë zha ne nacdraa zha Israel giladz zho me.

⁸ Ni megaa ne runbey me zdoo tib tib miech, laa me blu ganle, niicle ne zha zit nac zho laa me pcaania zho; pxeel me Espiritu Sant nacnie zho, zigne pxeelaque Espiritu Sant nacnie ne.

⁹ Gotsaa gwi ne ganle, led yed Dios rbe diën cho nac zha Israel cho nacгаа zha zit; zigtaa zhaw, zigtagaa new, laa me pcaania ne porne dib zdoo ne biladz ne me.

10 ¿Zha nac dzigo ne racladz to gnabey to grë zha co guñ zho grë miñe nac xley ne? ¿Pe niacxe rienraa ne lo Dios dzigo? ¡Niicxe ne name, niicxe xmengol ne brieelod niuna zigne naca!

11 Golguien ganle, zigtaa zhaw zigtagaa new laa me csilaa ne lo dol grë ne, per nacda por ncuaañe rdziuuñ ne; sinque laa me csilaa ne porne nquialadz me ne.

12 Zeene blozh sca bnee Pedr, dzese biac zho grë zho; dzigo laa Pabl grop Bernabé psilo bzodiidz grëtaa milagr ne blu Dios lo grë menzit zaatne güeynee zho Xtiidz me lo grë miech co.

13 Blozhse bnee grop zha co, laa Jacob gusoque rëb me:

—Grëse to bets, golquiaadiaggaa chop lan xtidz naa naganle gne naa lo to.

14 Laa Pedr bzodiidzle lo ne ganle zha psilo bredz Dios grë zha zit, bzooblo me zho ye zho gac zha ne sëëb xnëz me.

15 Ga nagon goca zigne zhozneese lo Xtiidz me, miñe pquiaa grë zha ne pxeel me padzeela, rneew:

16 Tedse nu ganle,

laa naa cuedz grëse miech ne ygab lo naa; grë zha xtii David zha ne bzozit, laa zho gbig stib.

17 Horco grëse zha zit, laa zho gon ganle cho nac naa, zeena grieelo sëëb zho xnëz naa.

18 Znu nac xtiidz Dios, ni padzeelale bzeet me ne laa me guñ miñ co.

19 'Miñ co nagon grë zha zit ne rliladzle Jesús, ib nonguielda ga gnabey ne zho guñ zho miñe nac xley ne.

20 Sinque mazd yquia tib diidz cxeel ne lo zho gon zho, grë ma ne rut miech rgogon zho lo grë zhimdio zho, ib gowd zho bëël co; grë ma ne rxieed ren zeene ret ma, gowd zho ma; ni niicle grëragaa ma ne gut zho, ib gowd zho xchen ma. Grë zha bgui, nodne tsonie zho wnaa ne nacd tsiel zho; niicle wnaagaaw, nodne tsonie zho mgui ne nacd tsiel zho.

21 Niicle mazd padzeelaw, tibaque quiayon miech guñd zho miñ co; sac desde hor co tib tib guiedz bzose Moisés tib zha ne gneew lo miech len xyadoo zho, dze ne rdziiladz zho lo dziin.

22 Blozhse ga, dzigo biaan zho diidz so chop zha ne tsie Antioquí tsienal zhits Pabl grop Bernabé, tsiesan zho ti diidz ne guey lo zha co. Nacne bzo zho Judas xingan Barsabás, ni bzo zho Silas; grop zha co, zha rien nac zho lo grëraa zha ne rliladz Jesús ga.

23 Pquia ti guits güey zho, rnee lo guits co:

“Zigne nose no Jerusalén nu, zigtaa zha ne nacgrë no nu biaad lo to i, biaadcots zho guic to dien peraa no guñ to. Gacnan to ganle led nod pxeel zho, grëraa zha ne rliladz Jesús nuw, grë no laa no rquiaabdiuzh to grëse to bets ne nac to zha ne no guiedz Antioquí, ni grëraa guiedz ne ndxie nëz Siria i, ni nëz Cilis.

24 Niina ne gocndion no laa bla zha ne nacgrë no nu biaad lo to i, biaadcots zho guic to dien peraa no guñ to. Gacnan to ganle led nod pxeel zho,

25 Zgane niina bzodiidz no grë no bzo no Judas ni Silas ziaadnal zhits Pabl grop Bernabé, laa zho ziaad i ziaadgan zho to. Zha nziuu nac Pabl grop Bernabé lo no, sac gon rbeeladz zho xquielmban zho quiayun zho xtsiin Jesús.

26 'Lo godiidz ne bdziuuñ no, laa no bdzianle nonguielda ne dien peraa gnabey no to guñ to, ni niiclegaa Espíritu Sant scaque rnee me. Rquiind ne peraa guñ to, léëlew ga tsaque tsoxco to

29 gowde to xpëël grë ma ne rgogon miech lo grë zhimdio zho; grë ma ne rxieed ren zeene ret ma, gowde to ma; ni niicle gowdgaa to xchen grë ma ne gut to. Grë zha bgui, nodne tsonie zho wnaa ne nacd tsiel zho; niiclegaa

wnaaw, nodne tsonie zho mgui ne nacd tseeel zho. Miñ rii nagon nac miñe no tsoxco to.

'Guiaannie Dios to sca."

³⁰ Gza tap zha co laa zho brieer Jerusalén, laa zho zie nëz Antioquí. Zeene bđziñ zho ga, bnabey zho pcaalsa grëse zha ne rlıladz Jesús, dzigo bdeed zho guits co lo zho.

³¹ Zeene gocnañ grë zha co zha rnee low, rley zho sacne pchooblada zdoos zho.

³² Blozhse ga, psilo Judas grop Silas pseed zho grë miech co Xtiidz Dios, zeena dib zdooraa zho gnalo zho Dios; sac bdeed me guielbiini lo Judas grop Silas rteed zho xtiidz me lo miech.

³³ Xtselaa blëz Silas ga grop Judas, laa zeene goł dze ne laa zho grieer gbiire zho nëz Jerusalén stib, iñe güeyzonëz grë zha co zho, rdeed zho xquizh lo zho.

³⁴ [Laa zho nole nëz, tibaque zeene rëb Silas laa Silas guiaanaque ga spalal dze.]

³⁵ Laa Pabl grop Bernabé ible laa zho biaan ga been zho xyudar grë zha ne noseedle miech ga.

Ptso Pabl grop Bernabé

³⁶ Goc palal dze no Pabl guiedz Antioquí ga grop me Bernabé, zeene rëb me lo Bernabé laa zho gbiire tsie grë guiedz ne güeynee zho Xtiidz Dios lo miech ga, par gacnañ zho dieñ yo grë zha co.

³⁷ Dzigo gocladz Bernabé ye Juan Marcw nienie zho;

³⁸ per bzhiguield Pabl, sac zeene güeynie zho Juan glo, psanaque Juan zho guiedz Panfil, laa Juan biire zey Jerusalén, güeynałd Juan nlozh nsiaał zho lo dziin co.

³⁹ Miñ co pquiaqui bneelsa Bernabé grop Pabl, nrooblaa güey lo xtiidz zho; nacne gataa laa zho ptso. Pcaa Bernabé nëz grop Bernabé Juan bzëeb zho barcw zie zho nëz lo guidzliu win ne no lo nisdoo lë Chipr;

⁴⁰ laa Pabl goc grop Silas. Blozhse bnab grë zha co lo Dios gacniñ me Pabl grop Silas, laa zho brieer ga

⁴¹ güeyted zho grë guiedz ne ndxie nëz xtan zha Siria, grë guiedz ne ndxie nëz Cilis, güeynee zho lo grë miech ne rlıladz Jesús nëz co, güeychoobladz zho zdoos zho.

16

Beenbey Pabl Timoté

¹ Leñ dze co güey Pabl grop Silas güeyted zho Derb ni güeyted zho Listr. Listr ga beenbey zho tib zha nguieg ne rlıladzaque Jesús lë Timoté, ti men Israel ne rlıladzle Jesús nac xnıaa me, laa pxoz me nac men Gres.

² Grëse zha Listr, zha Icon, zha ne rlıladz Jesús tibaque rzeet zho Timoté rnee zho ti miech ndzinli nac me, nacne bnee Pabl lo me tsianał me zhıts Pabl.

³ Ni ne nod me bey ne rio zha Israel sac led zha Israeld nac pxoz me, dzigo bloo Pabl me bey co, zeena tsod pe glisqui grë zha Israel ne no nëz co.

⁴ Laa me zianał zhıts Pabl. Guiedz ne rdedtaa zho rnee zho lo grë zha ne rlıladz Jesús ga, tsoxco zho guñ zho grë miñe pso zha poxtl ga diidz, grë zho zha rnabey ne no Jerusalén.

⁵ Zeene ron grë zha cow, dib zdooraa zho rnalo zho Dios, zigse zie dze racnzianraa zha ne rlıladz Jesús.

⁶ Blozh ga, tibbdeed zho xtan zha Frij ni xtan zha Galás, sac bdeete Espíritu Sant diidz nienee zho Xtíidz Dios lo miech grè guiedz ne ndxie nëz Asia ga.

⁷ Zeene bdziñ zho zaatne rsilo xtan zha Misia gocladz zho nie zho nëz xtan zha Bitin, scaque bdeete Espíritu Sant diidz nie zho nëz co.

⁸ Dzigo tibbdeed zho dib xtan Misia bdziñ zho ti guiedz ne ndxie ro nisdoo lè Troas.

⁹ Guieel co blulo ti mgui Macedon lo Pabl, rnab me gun Pabl guieInzaac tsie Pabl nëz co, tsiegun Pabl xyudar grè miech co.

¹⁰ Nacne hor cogazh bzhixcuaa no, sac bien no ible Dios racladz guio no nëz co guionee no Xtíidz me lo miech.

¹¹ Dzigo brie no ga bziaab no ti len barcw bdziñ no ti lo guidzliu win ne no lo nisdoo lè Samotras. Biini liu brie no ga bdziñ no Neápolis, ga bliaaz no wdze co.

¹² Biini sti liu co brie no Neápolis bziani no bdziñ no Filip. Lëe guiedz co riaan zaatne rsilo xtan zha Macedon, niapse men Roma no ga; nziaanlaa ngbidz bliaaz no ga.

¹³ Laa tib dze ne rdziiladz miech lo dziin, brie no bio no tib lad ro guiedz co, gax ti ro guiubee, zaatne bdzion no rcaalsa zha ne rienab lo Dios. Bdziñ no nziaanlaa men wnaa ndxie ga, dzigo psilo no bnee no lo zho cho nac Jesús.

¹⁴ Lad co no ti wnaa Tiatir lè Lidia, rto me grè lar nizhnie nlaan mine nac lar niazh; ye me dib zdoo me riladz me Dios. Laa me noquiaadiag mine nonee Pabl ga, zeene psiaab Dios guic me bliladz mew.

¹⁵ Dzigo hor cogazh brobnis me grè menlidz me; blozh ga, bredz me no guiobiaaz no lidz me, nëchaa me lo no:

—Telne rzac to nli dib zdoo naa rleynie naa Dios, gołtè sca cuèz to lidz naa. Rzoobguic me lo no, nacne biobiaaazeque no lidz me.

Bio Pabl ladzguuib grop Silas

¹⁶ Tib dze, lëetaque zio no zaatne riozodiidznie no Dios, bdzieelo no ti ndzooop nguieg noguitnie mendox. Zëeb diidz grëse tel pe rnabdiidz miech lo ndzooop, rnee mendox cow; nroob dimi ne riab nia zha ne rnabey ndzooop.

¹⁷ Nał ndzooop zhits no, nguiedz roptsie ndzooop rnee ndzooop:

—jXtsiñ Dios ndzon ne zob gbaa gon noyñ gza mgui rii! jLaa zho ziadseed to zeena gacnañ to zha csilaa Dios to lo xtoł to!

¹⁸ Nzian dze zaatne rdzieeltaa no ndzooop tibaque sca rnee ndzooop. Zeene bieedtaa guic Pabl, biireque me bnee me lo mendox ne noguitnie ndzooop ga, rëb me:

—Jesús nacie naa, ni laa naa rnabey luu gon niinagazh psaan ndzooop qui. Zigne sca rëb Pabl laa mendox co bzhooñ.

¹⁹ Gza zha ne rnabey ndzooop ga, zeene gon zho rundraa ndzooop guieInsin co gdziniaa ndzooop dimi, bnaaazeque zho Pabl grop Silas güeyzo zho zho lo wxtis, rëb zho:

²⁰⁻²¹ —jGolwi ganle pe nac ncuaane noyñ grop zha Israel rii lad guiedz nu! jNogodil zho miech, laa zho quiaseed miech ncuaane nonguiełdraa dziuuñ ne nac ne zha Roma!

²² Pcaalsa grëse miech co, grëse zho ntseeb rac zho lo Pabl grop Silas. Dzigo bnabey wxtis co brie xab zho grop zho bdeed bar zho zho, nroob bdiñ zho zho.

²³ Blozhse bdiñ zho zho laa zho psëeb zho ladzguuib, bnabey zho men ne quianap ladzguuib ga tibaque yquianap me zho, sac tel laa zho xoon me tsietizha.

²⁴ Zeene bin men co sca rëb zho, güeyaque me güeyseeb me zho stib lena mine riaan caanraa, ga psëeb me ni zho lad chop lè yag nroob.

²⁵ Wdze co, zig groḷ guieela laa Pabl grop Silas bii noyooḷnie Dios, ni rnab zho lo me gacnieḅ me zho. Grēse zha ne no ladzguuib ga, ron zho sca no Pabl grop Silas.

²⁶ Tibaque zeene bni ti zhodox, psiniw dib nacse ladzguuib co, grēse ro ladzguuib co bzhial, guuib ne no nia grē zha ne no ga, wbiḷa.

²⁷ Lēēlēd briece mcaallo meḅ ne quianap ga, zeene goḅ me grēse ro ladzguuib co zonial, masaque güeynie guic me bzhooḅle grē zha ne no ga, bdoabaque me spad ne ney me laa me zie gut me me.

²⁸ Horco broptsie Pabl lo me, rēb Pabl:

—jGute luu luu! jGrē no ndxie no, choot bzhiooḅd!

²⁹ Lēēlēd bnab me biini, bzēēb nguzhooḅ me leḅ ladzguuib, masaque rzhidz me dzeb pquitsgzhib me lo Pabl grop Silas.

³⁰ Blee me zho ga, rēb me lo zho:

—Goḷḅe lo naa, ḷpe nac miḅe guḅ naa zeena csilaa Dios naa lo grētaa xtoḷ naa?

³¹ —Dib zdoḷ luu bliladz Jesús, meḅ rnabey ne pxeel Dios lo guidzliu —rēb zho—, dzigo silaa me luu lo doḷ, silaa me meḅlidz luu ne.

³² Dzigo güeynie me zho lidz me, bnee zho Xtiidz Dios lo me grē meḅlidz me.

³³ Guieel co no me bdiib me zhits zho, zaatne brēē bar ne bloobar zho zho; blozhse ga, laa me brobnis grē meḅlidz me.

³⁴ Bnabey me goclo ti guieḷwagw downie me zho, rley me, niicle grēgaa meḅlidz mew rley zho ne laa zho bliladz Jesús.

³⁵ Biini liu, pxeel wxtis zha ne güeynie diidz lo me cuee me Pabl ladzguuib grop Pabl Silas.

³⁶ Dzigo güey me güeynee me lo Pabl rēb me:

—Laa wxtis pxeel diidz cuee naa to ladzguuib; zacle nasca greece to, peet tsieniedraa guic to.

³⁷ Dzigo rēbchaa Pabl lo zha ne bdziḅnie diidz ga:

—jZha ndzielguictaa zhiwxtis to goḅ! Squi ndxie meḅguiedz bdiḅ zho no, ni gardle gacnan zho dieḅ pe nli no pe falt ne rdziaap no. Bnabey zho bio no ladzguuib, ni zha Roma nac no; nana racladz zho zhliaanse greece no. jLēda ga goḅ! jGoḷtsie golguiab lo zho, lēēzhal zho guiaad guiadbee zho no nu!

³⁸ Dzigo güey zha co güeynie zho diidz lo wxtis. Zeene bin wxtis zha Roma nac Pabl, bdiieb zho;

³⁹ lēēlēd güey zho ro ladzguuib güeynab zho dispensar lo Pabl grop Silas. Blee zho zho ladzguuib, ni bnab zho lo zho siguiel zho mazd gbi zho guiedz co.

⁴⁰ Ga briece zho güey zho lidz wnaa ne lē Lidia ga, bnee zho lo grē zha ne pcaalsa ga, zha ne rililadz Jesús, pso zho diidz lo zho tiblique gac zho tsienal zho xtiidz me. Blozhse ga, dzigo laa zho briece guiedz co.

17

Güey Pabl Tesalónica grop me Silas

¹ Briece Pabl guiedz Filip grop me Silas, güey zho güeyted zho guiedz Anfipolis ni guiedz Apolonia, bdziḅ zho guiedz Tesalónica. Lad guiedz co zob ti xyadoo zha Israel,

² dzigo güey Pabl güeynee me Xtiidz Dios lo grē zha ne rcaalsa ga, zigne runaque me grēraa guiedz ne zieded me.

Blēz zho ga tson zhmal, gzobse dze ne rdziiladz miech lo dziin güey Pabl güeyzodiidznie Pabl grē zha co,

³ bzeet me lo zho grë zaatne raquiet grëtaa ncuuaane ted men ne cxeel Dios lo guidzliu ga, ni zha grieeban me; ni blu me lo zho gacnan zho ganle lëë men co ga nac Jesús.

⁴⁻⁵ Ndal zha ne pquiaadiag xcodiidz Pabl, bien zho ne nli sca naca, laa zho bliladz Jesús, ndal zho nac zha nëz Gres, zha ne noxcole mine rnabey Dios, ye blalaa men wnaa ne nac men non lad guiedz co. Laa zha Israel ne rnabey yadoo co, zeene gon zho scataa ndal zha ne bliladz Jesús, blëë zho; güey zho güeytop zho grë zha yozh ne quianzë lad guiedz co, ti ruid ne been zho lad guiedz. Güey zho güeysëëb zho lidz Jasón nan zho niebee zho Pabl ga grop Silas, ngo zho zho ladznia grë miech co.

⁶ Zeene gon zho bgaad grop zha co lo zho, bnaaзаque zho Jasón ni zla zha ne rliadz Jesús, bdoobniu zho zho bdziñnie zho zho lo wxtis, roptsie zho rnee zho:

—¡Golgan ganle laa zha ne sca quianzë nocots guic grë miech, laa zho blansole nu!

⁷ Ni Jasónpaa rdeed zaatne rbëz zho. Racladzdraa zho gon zho mine rnabey rey César, sac rnee zho no sti zhirey zho lë Jesús.

⁸ Grë zha wxtis co ni grë menguiedz ne pcaalsa ga, zeene bin zho sca rnee grë zha co, riendraa zho zha gon zho.

⁹ Mine been zho beenquizh zho Jasón ti mult gza Jasón zla zha co, dzigo laa zho wbi ga.

¹⁰ Pcow liu co, wxina laa grë zha ne rliadz Jesús ga bleese Pabl ga grop me Silas, pxeel zho zho nëz Beré. Zigne bdziñ zho Beré, gloque ti xyadoo zha Israel güey zho.

¹¹⁻¹² Grë zha Israel ne no Beré ga, rley zho rquiaadiag zho mine rnee Pabl grop Silas, gzobse dze rlab zho lo Xtiidz Dios rwi zho dien pe nli mine rnee zho ga. Ndal zha Israel co bliladz Jesús, ndal zha Gres ne, zigtaa mguiw zigtaa wnaaw; blalaa men wnaa co zha non nac zho guiedz co. Tibliladz nac grë miech co, gocntseebd zho zigne gocntseeb zha Tesalónica.

¹³ Laa zeene gocnan zha Israel ne no Tesalónica laa Pabl nolaque guiedz Beré, güeyaque zho güeyquii zho grë miech co glëënie zho Pabl.

¹⁴⁻¹⁵ Dzigo lëëled brieë bla zha ne rliadz Jesús ga, zienie zho Pabl nëz ro nis; laa Silas grop Timoté biaan ga. Güey zha co güeyсан zho Pabl guiedz Aten; laa zeene laa zho wbi, pxeel Pabl diidz lo Silas grop Timoté tsieniob zho Aten.

Len dze ne no Pabl Aten

¹⁶ Laga quiambëz Pabl gdziñ Silas grop Timoté güey me güeyted me lad guiedz co, wbiñladz guic me gon me led zhid grë mdio ne riegan grë miech co.

¹⁷ Nacne bioxco me bnee me Xtiidz Dios lo zho, güey me xyadoo grë zha Israel ne no ga, bzodiidznie me zho grë zho zha guiedz co zha ne rliadzle Dios. Gzobse dze rie me len guiedz rienee me lo grë miech ne rdziñ ga.

¹⁸ Tib dze bdzieelo me bla zha rac ne zienal zhiwseed ti men lë Epicur, ni zla zha ne zienal wseed ne rnee zho estoic; psilo me bzeet me Jesús lo zho, bnee me zha brieëban Jesús. Zeene bin zho zha rnee me, no bla zho rzhidznie me, rnee zho:

—¡Dieen pe riab guic men qui rnee me, ziaadquidie me miech!

Zlagaa zho rnee, nend cho zhiwseed sti Dios ne rliadz miech stib dan zienie Pabl, gane sca rnee Pabl;

¹⁹ dzigo rëb zho lo Pabl:

—Bzhiguiel mazd, sē luu guio ne lozh sodiidz luu lo no dien zha nac wseed ne ziaadnie luu,

²⁰ sac waltaa gard dzion no grē ncuaañe rnee luu i.

²¹ No zho liaadz gacñan zho pe rnee Pabl, sac sca nac grē zha Aten, niclegaa grē zha ne quiazñin ga, rdziladz zho rded-dze zho rzodiidz zho dien zha nac grē diidz cub ne griin ron zho.

²² Bdzin zho ti guic gui win ne rnee zho Areópago, bzo Pabl glowtaa zaatne rcaalsa zho ga, bnee me lo zho rēb me:

—Grēse to ne nac to men Aten, ran naa ne nligaa rioxco to rleynie to grē men ne rzac to nac Dios;

²³ sac len dze rii biateed naa zaatne zob grē xdios to, haxta no zaatne niaa ti lo pcoog quia chop lan diidz ne znu rnee: “MIÑ RII NIAA PAR DIOS NE RDZIUUNBEYD NE.” Golgacñan sca ganle, Dios ne runbeyde to ga, runbey naa me ni lēē zhiwseed me none naa lo miech len dze rii.

²⁴ Dios co bzaa guidzliu, me bzaa grētaa ncuaañe no lo guidzliu; gacñ ne guiab miech zha gzaa ti zaatne cuēz me, sac men nroob men rnabey nac me, me rnabey gbaa, me rnabey guidzliu.

²⁵ Niicle rquiindgaa me dien zha yquianap zho me, sac grēse ne ne nac ne miech, me rneedz guielmban lo ne, me rneedz grētaa ncuaañe rquin ne.

²⁶ Lo tib nēzaque miech ne bzaa me ga, bnabey me brieequia grēse dii miech ne ndxie lo guidzliu niina, bdeedse me zaatne biaan tib tib dii co ni dien palal dze ne gban zho zaatne biaan zho.

²⁷ Laa me psan zho parne yguib zho me, tsoxco zho guien zho ganle zha nac me haxta gdziel me lo zho. Ni led zite ga zo me lo ne grē ne,

²⁸ sac gon, niapse por xpoder me laa xcuerp ne niaa zigne naca, laa ne mban, laa ne rriel. Lēēw ga bnee bla menladz to, zha rac ne znu rēb: “Xtii Dios nac ne.”

²⁹ Gase na ganle gotsaa gwi ne, conque xtii Dios name nac ne, pe nac dzigo gliladz ne lēē Dios ga nac grē cho mdio or, cho mdio plat, cho mdio quie ne riab guic miech rzaa zho;

³⁰ ni ib sca riladz miech. Laa Dios gop zho paciens hor co sac runbeyd zho me; sangue niina laa me quiabedz zho, laa me rnab lo zho csaan zho grē ncuaañe bliladz zho ga gbig zho lo me, mese gleyne zho;

³¹ sac laa me bzole tib dze ne gacredz grēse miech lo me yгаа zho mine tsieguial zho tib tib zho, tel zha wban zho. Ni laa me blule ganle cho nac men ne gun guielwxtis co, lēē men co ga gon bleeban me.

³² Zeene bin zho bzeet Pabl no ti men ne brieeban, nzian zho rzhidnie Pabl, zla zho rēb:

—Na dien pa sti dze lozh yquiaadiag no mine rnee luu i.

³³ Gataa pcuēēz zho lo xcodiidz Pabl, laa Pabl wbi lo zho ga.

³⁴ Brieequia blalaa zha Aten bliladz Jesús, lēē tib zho ga nac mgui ne lē Nich (men ne nacgrē zha ne nac wxtis) ni ti wnaa lē Dámaris.

18

Güey Pabl guiedz Corint

¹ Brie Pabl Aten bdzin me guiedz Corint.

² Ga beenbey me ti men Pont lē Aquil, ti zha xtii zha Israel nac Aquil. Roma no me glo, wriin bdzin me Corint ga grop tsieel me; sac bnabey rey Claud brie grēse zha Israel ne no Roma.

³ Dzigo güey Pabl blēz Pabl lo zho ga, sac ye zho rzhixcuaa grē lar nroob ne rquia ncal, tipse pquia zho dziin ga gza zho.

⁴ Gzobse dze ne rdziiladz miech lo dziin rie Pabl xyadoo grë zha Israel ne no ga, riezodiidznie me grë zha ne rcaalsa ga; zigtaa zha Israela, zigtagaa zha guiedz cow rnee me lo zho tso guic zho gliladz zho Jesús.

⁵ Zeene laa Silas grop Timotë bdziñ Corint, dzigo laa Pabl psilo gzobse dze güey me güeynee me Xtiiðz Dios lo grë zha Israel ne no ga, rnee me lo zho cho nac Jesús.

⁶ Laa zeene gontaa me rond zho diidz, leñ ntseeb rac zho lo me haxta rneenë zho Jesús, dzigo bdzib me xab me lo zho, rëb me:

—jLaa naa bial bialne naa lo to per pquiaadiagde to mine rne naa; xtolle to nasca tel laa to nitlo! Gbiiredraa naa gne naa Xtiiðz Dios lo to, na laa naa csilo ganew lo grë zha ne nacd zha Israel.

⁷ Dzigo laa Pabl psilo güey lidz ti men ne no gaxaque zaatne zob yadoo co lë me Just, dib zdoo me riladz me Dios.

⁸ Len dze co ndal zha Corint bliladz Jesús zeene bin zho mine rnee Pabl, haxta ti men ne rnabey xyadoo zha Israel lë Crisp, grë menlidz me bliladz Jesús, dzigo grëse zho laa zho brobnis.

⁹ Ti wdze blulo Dios lo Pabl, rëb me lo Pabl:

—jGdziebd luu! jib ycuëëzd luu lo dziin ne noyũ luu i, bnee xtiaz naa lo grë miech qui! Ndal grë miech rii no sëëb xnëz naa.

¹⁰ Peet tsienied guic luu, choot grielod lega pe guñ luu sac naa quianaap luu.

¹¹ Nacne blëz Pabl ga stib iz grol, pseed me grë miech co Xtiiðz Dios.

¹² Laa zeene bzob men ne lë Galión zobnabey me xtan Acay, grë zha Israel ne no Corint ga bnediizd zho grë zho bnaaz zho Pabl güeyzo zho me lo Galión

¹³ rëb zho:

—Laa no ziaadnie mgui rii lo luu, sac laa me quiaguuits xley no, quiago me guic miech tsiegan zho Dios sti mod mine ni nacdraa ley.

¹⁴ Laa Pabl zie gnee, zeene pquiab Galión rëb me lo grë zha co:

—Telne niaca mine no pe ti falt, pe ti guieñtseeb ne quiayũ me, dzigosi naa raguial guñ guieñwxtis.

¹⁵ Per telne laa to ziaadnie me nu porne rdziladzde to mine quiseed me miech, rdziladzde to tel cho rzeet me, sac led scad nac xley to, trow golgan dien pe guñ to. Nodaque xtil to guic naa.

¹⁶ Bleega Galión zho nëz ley.

¹⁷ Dzigo bnaaz zha guiedz co ti men lë Sóstenes, men ne rnabey xyadoo zha Israel ga; gonlo Galión bdiñ zho me, per peet rëbd Galión.

Biiere bdziñ Pabl guiedz Antioqui

¹⁸ Goc spalal dze no Pabl Corint ga, dzigo bnee me lo grë zha ne riladz Jesús ga laa me gbi; ye Aquil ni Priscil wnaa ne nac tsiel Aquil nole guic tsienal zhits me.

Nacne zeene laa me brieë, ye zho bzëëbgza me barcw, laa zho zie nëz Cencré. Lëëtaaque len dze co noxco Pabl guñ me tel pe nac ncuaañe rëb me lo Dios guñ me, dzigo zeene bdziñ zho Cencré bnabey me liu liu ptsiib guic me.

¹⁹ Cencré bzëëb zho barcw stib, zie zho nëz Efés. Bdziñ zho Efés, güey Pabl xyadoo grë zha Israel ne no ga güeynee me Xtiiðz Dios lo zho.

²⁰ Dzigo bnaab zho mbëz me lo zho ga ti blalaa dze, per brieelod mbëz me

²¹ sac laa guic me no gdziñniob me Jerusalén yga me lni ne ziaadyob len dze co, rëb me:

—Na telne zneedz Dios diidz, bii zialteadaque naa dien yo to.

Gataa biaan Aquil grop Priscil, laa me bzëëb barcw stib zie me nëz Cesarea.

²² Cesarea brie me barcw, laa me zie nêz Jerusalén. Bdzin me güeyquiaabdiuzh me grê zha ne riladz Jesús ga; biireraa me ga bdzin me Antioquí.

²³ Goc palal dze no me Antioquí, laa me brieque ga güeyted me grê guiedz ne ndxie dib xtan zha Frij, dib xtan zha Galás, güeynee me lo grê zha ne riladz Jesús ga dib zdoo zho gleynie zho Dios.

²⁴ Leñ dze co bdzin ti men xtií zha Israel guiedz Efés, ti men Alejandríw lë me Apol. Ti zha rac nac me, rien me zha gnee me Xtiidz Dios lo miech.

²⁵⁻²⁶ Güey me xyadoo zha Israel ne no ga, nguieel rac me, peet dzeb guiend lo me psilo me nonee me lo zho grêse minë bnee Juan Bautist zeene bzeet Juan Jesús; sac loxaque min co bin me zeene gocnan me cho nac Jesús.

Lad co co no Aquil ni Priscil, zeene gon zho zha rnee me, dzigo blozhse ga, bredz zho me blozh bnee zho lo me zharaa nac zhiwseed Jesús.

²⁷ Grê zha ne riladz Jesús ga, zeene gocnan zho laa guic me no tsie me nêz Gres, dzigo ye zho rëb wen tsie me, pquiaa zho ti cart pxeel zho lo zha ne no nêz co zaacse ycaania zho me. Zeene bdzin me nêz co, pseed me grê zha co. Rley zho blozh gocnan zho cho nac Jesús;

²⁸ sac squi ndxie miech rsioog me ro grê zha Israel, rnee me lo zho lële men ne quiambêz zho cxeel Dios ga nac Jesús, ni rlu me lo zho pa lo zho bneew lo Xtiidz Dios.

19

Biire güey Pabl Efés

¹ Leñ dze ne no Apol Corint, laa Pabl bdzin Efés. Blozhse güeyted Pabl grê guiedz ne ndxie nêz xtan zha Galás, laa me bdzin ga. Ga bdziel me blalaa zha ne riladz Jesús,

² dzigo bnabdiidz me lo zho, rëb me:

—¿Pe bgaa to guieibiini ne rneedz Espíritu Sant, zeene biladz to Jesús?

Pquiab zho rëb zho:

—¿Guieibiini ye? Gard gon dzion no rdeed Espíritu Sant guieibiini.

Dzigo rëbchaa Pabl:

³—¿Pezhe waa pseed to zeene brobnis to?

—Zhiwseedse Juan Bautist gocndion no —rëb zho.

⁴ Dzigo bnee Pabl lo zho zha nac wrobnis ne biaadnie Juan. Rëb me lo zho nace wrobnis co par glu miech ne laa zho csaan guieintseeb, laa zho sëeb xnêz Dios; per grêse zha ne bgaa wrobnis co ib none gliladz zho Jesús, men ne bzeet Juan ga zeene rëb Juan ile ziaad me.

⁵ Min co bin zho nace brobnis zho stib zigne psan Jesús diidz.

⁶ Zeene laa Pabl pxobnia guic zho bnab me gdeed Espíritu Sant guieibiini lo zho, hor co psilo zho nzian lo diidz ne rnee zho; ni bnee zho tel pe nac minë racladz Dios gacnan miech.

⁷ Lo gza zho rgaa zho tsiipchop, niapse zha bguiw.

⁸ Tson mëë blêz Pabl ga, tibaque rie me xyadoo grê zha Israel ne no ga, ible rdziebd me rnee me lo zho zha nac Xtiidz Dios, ni rguib me rgo me guic zho gliladz zho cho nac Jesús.

⁹ Per zeene gon me no palal zho ib rond diidz, lel psilo zho squi ndxie miech rneenê zho Jesús, nace bleextsoque me grê zha ne riladzle Jesús, güeynie me zho zaatne nac xyuscuel ti men lë Tiran; ga rcaalsa zho gzobse dze rieseed me zho.

¹⁰ Dipse len chop iz blöz me ga pseed me grë zha co; nacne grëse miech ne no dib nëz Asia ga, zigtaa zha Israela zigtagaa grëraa miech cow, bin zho zha nac Xtiidz Dios.

¹¹ Bdeed Dios diidz been me grë milagr nroob ne rzee zdoos miech;

¹² sac haxta lar ne rzëse nia me, lar ne rbixse me rzhoob lad meñ ne rzacnë laa zho riac, niicle grëgaa mendox ne noguitnie miecha, rzhoon ma.

¹³⁻¹⁴ Ga quianzë gadz xpëed ti zhipxoz zha Israel lë Escev, stib guiedz stib guiedz rie zho rieguncxoon zho mendox ne noguitnie miech. Ti vuelt, nan zho na ye zho cuedz lë Jesús gacniën me zho guncxoon zho mendox; bdziñ zho zaatne guncxoon zho ma, rëb zho:

—¡Zig zobwi Jesús ne rzeet Pabl, laa no rnabey to golrieegazh i niina!

¹⁵ Pquiabaque ma rëb ma lo zho:

—Wen wen runbey naa Jesús ni nangaa naa cho nac Pabl, sangue to gon ni lalnu runbeyd naa to.

¹⁶ Znuse bias meñ ne noguitnie mendox co, bnaaz me gza zha co bdiñ me zho. Ib blëbd zho lo me, masaque dib brëë rna zho, ni xab zho nacwdraa, laa zho bzhoon.

¹⁷ Grë miech ne no Efés, zigtaa zha Israela, zigtagaa grë zha guiedz cow, zeene bin zhow per nli bdzieb zho; grëse zho biën zho ne nli meñ non, meñ rnabey nac Jesús.

¹⁸ Haxta ye grë zha ne riladzle Jesús, hor co laa zho bleero pe nac grë ncuane ndzinlid ne bliladz zho glo.

¹⁹ Nzian zha ne biil diidz dox güeyxi zho grë xquits zho, squi ndxie miech laa zho bzëëga grësew. Zeene biobey palal goncon grëtaa guits co, biirew zig choopstii mil pes plat.

²⁰ Ga blu poder ne nacie Xtiidz Dios, sac grë zha ne bina bdzëë lo xquielmban zho.

²¹ Bded ga, biab guic Pabl tsieted me nëz xtan zha Macedon, xtan zha Gres, gbiire me ga laa me tsie Jerusalén stib; haxta rnee me Jerusalén grieë me tsie me Roma.

²² Nacne ptedner me Timoté grop Rast (zha ne noyun xyudar me len dze co) zie zho nëz Macedon, laa me bii biaan nëz Asia ga.

Gocntseeb zha Efés

²³ Len dze co brieequia palal zha Efés ptsidiñ zho zha ne riladz Xtiidz Dios.

²⁴ Guiedz co no ti meñ ne rundziin guilib plat lë Demetr, rzaa me grë yadoo yeen zig niaada xyadoo xnaxnazh zho Dian; nroob dimi ne rial me grë me zha ne runnie me dziin co;

²⁵ bnabey me pcaalsa grë zha ne quia dziin lo me, ni grëragaa zha ne runaque dziin co, rëb me lo zho:

²⁶ —Rien naa ziyonle to, ziyangaa to ganle laa mgui ne rnee zho Pabl quianzë lad guiedz nu, rnee me nlid Dios ga nac grë mdio ne rzaa miech. Pe zhidaale miech quialiladz zhiwseed me nu; ni led loxaque nudsegaa, dible Asia quialiladz miecha. ¿Pe gnë to zha dziuun ne?

²⁷ Golguiën ganle noxtseeb guiabdraa xtsiin ne, ni nanwen to ganle lëë xtimi ne nu. Ni tebaa mincosegaaw, mine mazdraa noxtseeb nend grëse miech csaanladz xyadoo nazhnazh Dian, nend grëse miech ne rleynie me dib Asia, diibgaa lo guidzliuw con guiaanladz zho me.

²⁸ Zeene gon grë zha co sca rëb Demetr, rlëë zho, roptsie zho rgo zho xviv Dian.

²⁹ Wdzeepaaw grëse men̄guiedz laa zho pcaalsa, güey zho bnaaz zho Gay ni Aristarco chop zha Macedon ne rzënie Pabl, bdoobniu zho zho bdziñnie zho zho ro yulow.

³⁰ Nacne gocladz Pabl nie me nienee me lo grë miech co, per psaaand grë zha ne riladz Jesús ga.

³¹ Haxta bla zha wxtis ne ndzieeldiidz Pabl, pxeel zho diidz lo me tsied me.

³² Zhaase zhaase rnee grë miech co ndxie zho ro yulow ga, no zho haxta ni riend pe nacne zie zho ga.

³³ Blalaa zha Israel, zeene gon zho scataa rac grë miech co, bdoob zho zhiw ti men̄ lë Lejandr gocladz zho nee me chop lan xtiidz zho. Laa men̄ co blis nia me parne cuedze zho gnee me;

³⁴ Zeene gon zho zha Israel nac me, psilo zho stib grëse zho nguiedz roptsie zho, rgõ zho xviv Dian rnee zho:

—jMen̄ ndzondoo nac Dian! jMen̄ ndzon nac xnaxnazh ne!

Zig chop hor bre zho ga sca roptsie zho.

³⁵ Dzigo brieen men̄ ne zobnabey ga, blunia me lo zho cuedze zho; zeene laa zho bredze, psilo me bnee me lo zho rëb me:

—Gol̄gona ganle, grëse miech lo guidzliu nan̄ zho guiedz rii zob nazhnazh Dian, nan̄ wen zho gbaa biet me zob me nu;

³⁶ tsod zha ne guiab led scada. ¿Pe nac nadien̄ ne squitaa rac to? Gol̄guien̄ ganle nonguielda i squi lëëlëd dienen̄ pe rzhixcuaa to.

³⁷ Gol̄wi ganle, laa to ziaad-zo grop zha rii nu, ¿pe nadien̄ been̄ zho? Nacd zho cho zha ne quiaguitnie yadoo, cho zha ne nozhidzniegaa xnaxnazh ne.

³⁸ Nana, tel̄ne racladz Demetr pe glisqui me grë me zha ne rquianie me dziin, gacxe na no yulow waa. Niac niaad zho niaadnab zho guiel̄wxtis, ni zogaa zha ne yquiaadiaga. jGa glisqui zho pe run̄ tib, pe run̄gaa stib!

³⁹ Laa tel̄ne noragaa pe racladz zho glisqui zho, dzigo niac niacredz grëse zha ne nac wxtis, zha ngobey dien̄ zha niaca.

⁴⁰ Sac gon ne squi been̄ to nadze, noxtseeb glisqui zha Romaw lo ne; ni pe nadien̄ dzieets ne tel̄ne laa zho glisquiw.

⁴¹ Blozhse sca bnee me laa me wbi lo zho ga, niicle zhagaaw laa zho zey.

20

Güey Pabl nëz Macedon ni nëz Gres

¹ Zeene laa ruid co blëz, dzigo bredz Pabl grëse zha ne riladz Jesús, bnee me lo zho zaacse gac zho. Blozhse bnee me lo zho, laa me brieen̄ ga zie me nëz xtan zha Macedon;

² güeynee me lo grë zha ne riladz Jesús nëz co, pso me diidz lo zho zaacse gac zho. Nëz co brieen̄ me bdziñ me nëz Gres. Ga blëz me tson̄ mëë.

³ Laa zeene laa me gbi ga tsie me nëz Siria, laa me ziele sëëb me barcw zeene gocnan̄ me laa zha Israel ne no ga bnediidz pa tsetin̄ zho me, nacne güeydaque me barcw, mazd bio me nëz güeyted me nëz Macedon.

⁴ Blalaa zha ne bzënal biogza no me, bzë ti men̄ Beré lë Sópater xingan ti men̄ lë Pirr; bzë chop zha Tesalónica, Aristarco ni Segund; ti zha Derb lë Gay, Timoté, ni schop zha nëz Asia, Tíquico ni Trófimo.

⁵ Gol̄ no Filip laa zho bner, per biaan̄ no diidz Troas cuëz zho no;

⁶ laa no bliiaz ga, ga bdieed no lni Pascw. Zeene bded lni co laa no bziaab barcw, laa no brieen̄ ga. Goc gaay ngbidz no no lo nis laa no bdziñ lo zho Troas, dzigo bliiaz no Troas ga gadz ngbidz.

⁷ Zeene gol̄ dze dmingw, bio no yu ne rcaalsa zha ne riladz Jesús ga. Ti yu tson̄ xcuaaw, laa no pcaalsa par dziuun̄ no xtsee ne psan̄ Jesús diidz ga

gun grë zha ne riladz me. Laa no ndxie grë no, dzigo psilo Pabl pseed me no; nzian ncuuaṅe nonee me lo zho sac guini liu co laa me grieeg ga; goḷ grol guieela rsiaalḍaque me.

⁸⁻⁹ Nzian nac biini ne noquia len yu co; zaatne nac ro ventan ga zob ti niib lë Tic. Wdzeelaaw rsiaalḍaque Pabl, tibaque bzhen mcaal niib co, wbix niib ga biab niib nëz ley; ni glaaw, len yu ne rianṅ glaaraa ga ndxie no. Zeṅe güeylis zho niib laa niib gutle.

¹⁰ Biet Pabl, bdziṅ me lo niib bdeedz me niib.

—jGdziebde to! —rëb me—. jZrieeban niib!

jNi nligaaw brieeban niib!

¹¹⁻¹² Grëse zho per nli rley zho. Blozh ga bdzieep no glaa stib bdziṅ no len yu co, dzigora a bdiiz Pabl quietxtil pquim no. Blozhse bdziunṅ no xtsee co, laa Pabl psilo bnee lo zho stib, quianeeque Pabl laa liu biini.

Bdziṅ Pabl Milet

¹³ Lban co psiaal Pabl, laa me wbi ga laa me zie nëz Ason nzeni me; laa no bziaab barcw bdiiednier no lo me. Bdziṅ no Ason ga bliiaz no me zigne biaan no diidz.

¹⁴ Zeṅe blanso me lo no, laa no bziaab barcw gza no me bdziṅ no guiedz Mitilen.

¹⁵ Biini liu briece no Mitilen, bdiied no gax Quío, bietraa stib dze co bdziṅ no Samos, ga bliiaz no; bzia no lo nis co zig sti dze dzigora a bdziṅ no Milet.

¹⁶ Biotieete no Efés, sac laa guic Pabl no gdziṅniob me Jerusalén, zeṅa yгаа me lni Pentecostés.

¹⁷ Nacne zigne bdziṅ no Milet pxeel me diidz Efés bredz me grë zha ne zo lo zha ne riladz Jesús ga.

¹⁸ Zeṅe blanso zho, bnee me lo zho rëb me:

—Wen wen runbey to naa, nanle to ganle zha noxco naa noyunṅ naa xtsiin Jesús men ne rnabey ne. Wlal ne psilo ziyalṅ naa nëz Asia nu,

¹⁹ blactaa biin naa lo grë mine bdeed naa, blactaa lo guielxtseeb ne ziyo naa, tibaque quianaḷ grë zha Israel quim zho naa.

²⁰ Per gon to ganle, tibaque bioxco naa bialseed naa to mine nac diidzli, zigtaa pseed naa to zaatne rcaalsa tow, zigtagaa pseed naa to stib yu stib yu.

²¹ Grëse miecha, tibaque mine pseed naa zho, mine bne naa lo zha Israel mincoque bne naa lo miech stib guiedz; grëse zho bnee naa lo zho none csaan zho xquielntseeb zho dib zdoos zho gnalo zho Jesús, zeṅa gbīg zho lo Dios.

²² Scaque niina ne laa Espiritu Sant rnabey ga naa Jerusalén, nand naa dien peraa nac ncuuaṅe gdzieelo naa ga;

²³ per nanpaa naa ible zgo zho naa ladzguiib, ible sacsi zho naa, sac guiedz ne gdziintaa naa min co rnee Espiritu Sant teed naa.

²⁴ Lo guielxtseeb co no naa per rquiad zdoos naa xquielmban naa; mine nziuuraa lo naa laga gdeeda diidz ib laa naa no gne lo miech pa lotaa rleynie Dios zho, zeṅa ine gley naa csiaalṅ naa dziin ne bzo Jesús naa nu quiaayunṅ naa.

²⁵ Rien naa lo grë to ne nac to zha ne bialseed naa gocnanṅ to zha nac xnëz Dios, gandraa to lo naa lo guidzliu rii.

²⁶⁻²⁷ Laa naa pseedle to grëse mine nac Xtiiidz Dios, ib peet pqueetsd naa lo to; gacxe waa, tel cho tib to nitlo, led xtolḍraa naa ga.

²⁸ Golguienṅ sca, jgolquianap to, ni scagaa golquianap grë zha ne zo to lo! jGolwi ganle xnëz Dios no zho, haxta lo cruz gut Xpëed me bdiizh me xtolḍ zho! Ni stiba, jib Espiritu Sant bzo to yquianap to zho zigne rquianap baxtor xpëcwxiil zho!

²⁹ 'Nsin gołso! Sac rienle naa zeene laa naa gbiche lo to, ib zrieequia grē zha ne guiaad guiaadquidie to, zguib zho zha gnitlo zho to zigne ruñ grē coyot mēcwxil.

³⁰ Haxta lad to, zrieequia bla zha ntseeb ne ctsēē Xtiidz Dios, squil zho to tsienal to zhiwseed zho.

³¹ Gacxe waa laa naa rne lo to, įnsin gołso! Gołsoladz ganle tsonraa iz, dze guieel pseed naa to, blactaa biin naa pso naa diidz lo to tib tib to zaacse gac to.

³² Dios nac meñ ne gacnien to, laa naa rsan to ladznia me grēse to; Xtiidz Ndzon me miñe rnee ganle zha nquialadztaa me to, lēēw lozh quix biini to dib zdo to gnalo to me, zeēna ygaa to zaatne gneedz me cuēz to grē to zha ne noraa xnēz me.

³³ 'Wlaltaa ib rzobladz naa dimi, ib rzobladz naa lar, guiep naa tebaa zha yquianie naa grē ncuaañ co.

³⁴ Leñ dze ne blēz naa lo to, goñ to ganle niapse nia naa bdziniaa naa ncuaañe pquiin naa, ncuaañe pquingaa grē zha ne bzēnie naa.

³⁵ Ga blu naa lo to ganle, ib none dziuun ne dziin zeēna grielo dziuun ne xyudar zha ne guieñd pe yquiin. Ib riaanladz naa xtiidz Jesús meñ ne rñabey ne, zeēne znu bnee me: "Mazdraa nroob guiebley ne rgaa zha ne rgad, lēdle zha ne rad."

³⁶ Zeēne blozh bnee Pabl lo zho, laa me pquitsgzhīb ga grē me zho bzodiidznie zho Dios.

³⁷ Blozhse ga, tibga tibga zho wbig bnee zho lo me, bnaaz zho nia me, bdeedz zho me.

³⁸ Mban rac zho psilo zho roon zho, rsoladz zho rēb me gandraa zho lo me. Blozh ga, güey zho güeyzonēz zho me zaatne sēēb me barcw.

21

Biire güey Pabl Jerusalén

¹ Blozhse bzhieen no nia grē zha Efés co, laa no bziaab barcw, laa no zio bdzin no ti lo guidzliu win ne no lo nisdoo co lē Cos. Biini liu brie no ga bdzin no lo sti guidzliu win co lē Rodas. Rodas brie no bdzin no guiedz Pátara.

² Guiedz Pátara, ga bziaab no ti barcw ne zie nēz xtan zha Fenicia.

³ Zeēne zieded barcw co ngali zaatne riaan guidzliu win ne lē Chipr, bui no nēz revés rlupaa guidzliu co. Laa no zio haxta bdzin no guiedz Tir, xtan zha Siria, ga blēz barcw co biet grē yo ne neya.

⁴ Zigne bdzin no ga bdzieet no barcw bziaab no lad guiedz co, biodziel no grē zha ne rliladz Jesús ga; bliazaque no lo zho ga ti zmal. Dzigo psiaab Espíritu Sant guic zho rnee zho lo Pabl, tebaa siguiel me mazd tsied me Jerusalén.

⁵ Zeēne laa no brie ga, grēse zha ne rliladz Jesús grē tsiel zho grē xpēēd zho biaad-zonēz zho no ro nis co; dzigo lo yuzh co ga pquitsgzhīb no grē no, bzodiidznie no Dios.

⁶ Blozhse bzhieen no nia zho, laa zho wbi ga.

⁷ Brie no Tir bdzin no guiedz Tolemaid, ga bio no bioquiaabdiuzh no grē zha ne rliladz Jesús ga, bliaz no lo zho tib dze.

⁸ Biini liu brie no ga bdzin no guiedz Cesarea, ga biobiaaz no lidz ti meñ ne noneeque Xtiidz Dios lo miech, lē Lip. Lēē Lip co ga gogcza snoop zha ne bzo beēñ xyudar zha poxtl.

⁹ Quianie me tap ndzoop ne gard ctsieelnia, gzase zho bdeed Dios guielbiini lo zho rnee zho tel pe nac miñe racladz Dios gacnañ miech.

¹⁰ Nzianle dze goc no no lidz Lip, zeene blanso ti men ne ziaad nēz Judé lē Agab, biadquiaabdiuzh me no. (Ye me rnee tel pe nac mine racladz Dios gacnan miech.)

¹¹ Zigne blanso me lo no ga, bzhen me lar ne rbe len Pabl, pxidoo mew nia me ni pxidoo mew ni me, nē me:

—Znu gon rnee Espiritu Sant gzobdoo zha Israel bizhuan lar rii, co zho me ladznia zha Roma zeene laa me gdziñ Jerusalén.

¹² Grē zha ne rililadz Jesús ga, zeene bin zho sca rēb men co, rnab zho lo Pabl tsied me Jerusalén, yeque no sca rnee lo me. Mban rac no rdzioon no.

¹³ Pquiaabaque me nē me lo no:

—¿Pe nac dzigo roon to? Tel naa laa naa bleeladzle naa maase gzobdoo zho naa Jerusalén, niicxe haxta gut zho naa waa porne rleynie naa Jesús. ¡Loxaque rsiaab guielnē to naa i gon squi rac to!

¹⁴ Bdzianse no nlid yquiaadiag me xtiidz no, dzigo mazd psaan no, rdzieets no:

—Golgotsaa csaan ne, Diostaa nan dien zha gaca.

¹⁵ Bdedse ga bzhixcuaa no laa no brieeg ga, laa no zio nēz Jerusalén;

¹⁶ blalaa zha ne rililadz Jesús Cesarea ga bzēnal zhits no, bzēnie zho ti men Chīr lē Mnasón. Izle rililadz me Jesús, lidz me biobiaaz no zeene bdziñ no Jerusalén.

¹⁷ Grē zha ne rililadz Jesús Jerusalén, rley zho zeene gon zho laa no bdziñ, blēzlo zho no.

¹⁸ Biini liu co güeynie Pabl no lidz Jacob bioquiaabdiuzh no me, lēetaque laa grē zha rnabey ne zo lo grē zha ne rililadz Jesús Jerusalén ga, ndxie ga.

¹⁹ Blozhse pquiaabdiuzh Pabl grē zha co, dzigo psilo me bzodiidz me lo zho grēse zha gocniñ Dios me güeyseed me grē miech stib guiedz.

²⁰ Zeene bin zhow per nli rley zho, rdeed zho xquizh lo Dios; dzigo rēbchaa zho lo me:

—Bets, ye zha Israel gon ndaldoo zho zililadz Jesús; per racladz zho tibaque tsienal zho mine rnabey Xley Moisés.

²¹ Grē zha ne no nu bin zho laa luu güeyseed grē men wladz ne no guiedz zit, nac diidz blu luu lo zho tsienaldraa zho Xley Moisés, codraa zho xpēed zho bey, niicle tsienaldraa zho grē zhiwseed xmenḡol ne.

²² ¿Zha ganle dziuun ne? Sac zeene gon zho laa luu blanso, ible ziaadguib zho luu.

²³ No tap bets ne nu ziaadyoble gun zho mine bnee zho lo Dios; mine gaca güey

²⁴ güeynie zho yadoo, golgun grē mine rnabey ley, bdiizh ctsiib guic to gza to; zeena ga gan grē zha rii ganle nlid grē mine rnee miech luu ga.

²⁵ Sangue grē miech stib guiedz zha ne rililadz Jesús, laa no pxeelle diidz lo zho zigne bzodiidz ne nu: grē ma ne rut miech rgogon zho lo zhimdio zho, gowd zho bēel co; grē ma ne rxieed ren zeene ret ma, gowd zho ma; ni niicle grēgaa ma ne gut zho, ib gowd zho xchen ma; grē zha bḡui, nodne tsonie zho wnaa ne nacd tsieel zho; niicle wnaagaaw, nodne tsonie zho mḡui ne nacd tsieel zho.

Bnaaz zho Pabl

²⁶ Laa Pabl zienie gza zha co. Biini liu güey me gza me zho güeygun zho mine rnabey ley; blozh ga güey zho yadoo güeynie zho diidz pa dze gza mine quiaayun zho ga, zeena gal dze co laa zho tsienie gon ne gdeed zho tib tib zho.

²⁷ Laa zeene merle gza gadz ngbidz ne quiayun me mine rnabey ley ga gza me zha co, lega naclew gon bla zha Israel ne ziaad nez Asia laa me no len yadoo. Nacne wbig zho

²⁸ bzhen zho zhicw me, roptsie zho rnee zho:

—iGrèse to menguedz! iGolgun xyudar no gnaaz ne men rii! Sac lëe me ga quianzë quiaseed me zha wladz glëenie zho ladz zho, rnee me lo zho gundraa zho grë mine rnabey ley, gapdraa zho respet yadoo rii; haxta grë zha zit zizëebnie me nu. iNoguitniele me lugar nda rii!

²⁹ Sca rnee zho, sac gon zho Pabl len guiedz Jerusalén ga ziegrop me ti zha Efés lë Tróximo, dzigo rzac zho güeynie me zha co len yadoo.

³⁰ Pe ga bin grë menguedz, grëse zho bdzin wbigbe zho lo Pabl bdoobniu zho me blee zho me len yadoo, zigne blee zho me ga lëelëd psioog zho ro yadoo; psilo zho noguin zho me, nan zho gut zho me.

³¹ Zeene gochan men ne rnabey lo menguiib ne ndxie ga laa ruid co noyac,

³² lëelëd brieenie me grë xmenguiib me ni grëraa zha ne rnabey lo zho. Zeene gon grë zha ne noguin Pabl ga, laa grë menguiib co bdzin, dzigora la blëz bdin zho me.

³³ Dzigo wbig men rnabey co, bnabey me grë zhaguiib co bzoob zho Pabl chop caden. Bnabdiidz me lo grë miech co dien cho nac Pabl, pe quiayun me ne scataa rlëenie zho me.

³⁴ Psilo zho nguiedz roptsie zho, zhaase zhaase ncuane rcaadzol zho me. Gonse men rnabey co rlud dien pepaa rlisqui zho, nacne bnabey me grë menguiib co ziesan zho Pabl yu ne rbëzpa zho.

³⁵ Laa grë menguiib co csilo soquanie Pabl lo scaler ne rdzin ro yu co, gataa mazd bzoobyan zho me, sac ntseeb rac grë miech co;

³⁶ nalbe zho, roptsie zho rnee zho:

—iGolnitlogazh men qui! iNiinagazh golgut me!

³⁷ Laa grë menguiib co csëeble me len yu co, zeene bnee me lo men rnabey co, rëb me:

—iPe zrieelo gne naa ti xtiaz naa lo luu?

Dzigo rëb men rnabey co:

—iMod rac luu rnee luu xtiidz zha Gres?

³⁸ iLed luud ga dzigo nac ti zha Egipt ne psilo racntseeb lo gobiern len dze rii? Nac diidz, tap ml zha ntseeb nacie zho, laa zho ziese nez dan.

³⁹ —Led naada —rëb Pabl— men Israel nac naa. Guiedz Tars gol naa, lëe guiedz co nac mine nroobraa lo grë guiedz ne ngab Cilis. Na laa naa rnab lo luu, been guieInaac bneedz diidz gne naa chop lan xtiaz naa lo grë miech qui.

⁴⁰ —Zaca —rëb men co.

Lo scaler co zo Pabl blunia me lo grë miech co cuedze zho. Zeene laa zho biaczde, dzigo psilo me bnee me xtiitsë me grë me zho, rëb me:

22

¹ —Grèse to men wladz, laa naa rzaac to zig ti bets naa zig pxozgaa naa, golquiaadiag mine gne naa nu ganle zeena gacnan to quiayund naa mine rquiaqui to naa.

² Zeene gon zho xtiidz zho rnee me, grëse zho dzese bre zho; dzigo rëb me:

³ —Men Israel nac naa, guiedz Tars xtan Cilis ga gol naa, per Jerusalén nu broob naa, nu bio naa wseed, maistr Gamaliel goc men ne pseed naa. Pseed me naa grëse zigne nac xley xmengol ne, grëse zigne nac zhiwseed zho; pseed me naa tibaque noxco naa runnon naa lë Dios zigne noxcoque tow.

4 Miñe been to nu nadze, ye naa blactaa squi ben naa ptsidiḷ naa grē zha ne rliladz Jesús, pquianaḷ naa ygaa zho guet zho; mgui wnaasaque razobdoo naa zho lidz zho rasan naa zho ladzguiib.

5 Men ne nac pxoz nroob ni grē menḡol ne goc wxtis guiedz rii len iz co, zha co nanpaa ganle nli sca ben naa; sac zha bneedz ti xtiidz zho bi naa ndzinne naa lo zha ne rnabey xyadoo grē men wladz ne no Damasc, zeena niacnie zho naa nianaz naa grēraa zha ne no ga rliladz Jesús, nialnie naa zho Jerusalén nu nded zho caxtigw.

6 Miñ copaa nagon brie naa nu za naa nēz co. Zhile gdziñ naa Damasc, zig rwe ngbidza tibaque zeene ziaad ti biinidoo nēz zhan gbaa biab lo naa.

7 Biabgazh naa liu, ga nix naa bin naa ti tsi men co rnee me lo naa: “Saul, Saul, ¿pe nacne quianaḷ luu naa?”

8 “¡Beenḡ guieḷnzaac bnē dien cho luu!”, rep naa. Dzigo nē men co lo naa: “Naa nac Jesús men Nazaret ne squi quiatsidiḷ luu.”

9 Grē zha ne zanie naa ga, bdzieb zho gon zho biini co, per biend zho pe rnee men co lo naa.

10 Dzigo rep naa lo me: “Bzhiguieḷ bnē dien, ¿pe racladz luu guñ naa niina?” Nēchaa me: “Guche i, güey Damasc ga gnē zho ganle pe nac miñe no guñ luu.”

11 Dzigo bzhen zha ne zanie naa ga nia naa, bdzinne zho naa Damasc; sac lo biinidoo co pcow lo naa.

12 Ga no ti mgui lē Ananí, zēēb diidz rioxco me grē miñe rnabey ley, grēse men wladz ne no ga nanpaa zho ti men wen nac me;

13 dzigo biaad me zaatne blēz naa ga, nē me lo naa: “Saul, niinagazh gon bets laa luu gbiire gwi stib.” Zigne sca bnee me laa lo naa biac, gonḡazh naa me.

14 Dzigo nēchaa me lo naa: “Dios men ne bliladz grē pxozgol ne, ib men co bzooblo luu gacnañ luu pe nac miñe racladz me gac, me bzooblo luu guñbey luu men ne nacle diidz ga cxeel me lo guidzliu, ni gon luu tsi men co.

15 Ib laa me bzo luu tsienee luu lo miech miñe bzhaac luu ga, miñe bin luu ga.

16 Guso i sca, zeena chobnigazh luu. Dib zdoo luu bredz Jesús, bnaab lo me csaḡmbe me luu lo xtol luu.”

17 Zeene laa naa blanso Jerusalén nu, tib dze lēētaque no naa yadoo nozodiidznie naa Dios,

18 tibaque blulo me lo naa nē me: “Na zeena biobladz brie Jerusalem nu, sac ib gliladz grē miech rii miñe gnee luu zeene gnee luu xtidz naa lo zho.”

19 “Per runḡey zho naa waa”, rep naa lo me, “nanpaa zho scataa ra naa grē yadoo raxizhoo naa grē miech ne rliladz luu, rnabey naa rguin zho zho ni rio zho ladzguiib,

20 niicle zeene beet zho Xteb men ne bnee xtiidz luu ga, ye naa bded diidz beet zho me, haxta pquianaap naa xab grē zha ne bdeedquie me.”

21 Dzigo nē me lo naa: “Na zeena pcaaniob nēz brie nu, sac gon laa naa cxeḷ luu stib dan tsienee luu xtidz naa lo grē menzit.”

22 Zeene bin zho sca rēb me bdeetraa zho diidz nee me, psilo zho nguiedz roptsie rnee zho:

—¡ib rieguiaḷdraa gban men qui! ¡Goḷnitlogazh me!

23 Nguiedz zēēb tsi zho, ib rioogd ro zho, masaque rdzib zho xab zho ni rchoon zho yudie laglaa.

24 Dzigo psēēb men rnabey co Pabl len yu co, ni bnabey me grē menḡuib co quin zho Pabl, zeena cueero Pabl dien pe nac ncuaane been Pabl, zha nac ne scataa rac grē miech co lo Pabl.

²⁵ Laa zho blozhle pxidoo me, laa zho csilo quin me, zeene rëb me lo sti zha ne rnabey lo grë zhaguiib co:

—¿Pe nonguiela dzigo ne lega quin to ti zha Roma, ni gardle gac guielwxtis dien pe nlipaa no xfalt zho?

²⁶ Zeene bin zha co sca rëb Pabl, lëëlëd güeynie zho diidz lo men ne rnabey zho ga, rëb zho:

—¿Zha gon gun luu? Sac zha Roma me nac mgui co.

²⁷ Dzigo güey men rnabey co rëb me lo Pabl:

—Bneeli lo naa, ¿dien pe nli na men Roma nac luu?

—Nliw —rëb Pabl—, zha Roma nac naa.

²⁸ Rzedz yan men rnabey co rëb me:

—¡Naasi zha Roma nac naa, ni nroob dimi bdizh naa bgab naa lo zha Roma!

Dzigo rëbchaa Pabl:

—Sanque naa, desde gol naa bgab naa lo zha Roma.

²⁹ Grë zhaguiib ne bzo nguün Pabl ga parne cueero me, lëëlëd whiche zho lo me, niicle men rnabey cow bdzieb me zeene gon me nli zha Roma nac Pabl, sac nrooble nac falt ne niun me ga lega nabey me nguün zho ti zha Roma.

Bnee Pabl lo wxtis Israel

³⁰ Zeene biini liu, bnabey men rnabey co pcaalsa grë zhipxoz non zha Israel ni grë men ne nac zhiwxtis zho, sac racladz me gacnan me dien pepaa nac ncuaane rquiaqui rlëenie grë miech co Pabl. Dzigo pxadz me Pabl, blee me Pabl bzo me Pabl lo zho.

23

¹ Dze bui Pabl lo grë zha wxtis co, dzigo psilo Pabl bnee me rëb me lo zho:

—Laa naa rneli lo to nu ganle, mbe zdoo naa, Dios zobwi ganle zanaid naa ncuaane rdziguiend me.

² Zeene gon Ananí (men ne nac pxoz nroob) sca rëb Pabl, bnabey me zha ne zo gax lo Pabl, rëb me:

—¡Golcap ro zha qui!

³ Dzigo rëbchaa Pabl lo me:

—¡Tebaa squique cap Dios ro luu! ¡Nac luu gon zig ti lidz nguts loxaque nëz zhtssew stib rna! ¿Pa rquün ne laa luu zob i? Led luu zo par cobey luu tel no pa ti ley ne zaguis naa, na lej luule noguiitsa bnabey luu bdiñ zho naa.

⁴⁻⁵ Pquiabbe zha ne ndxie ga rëb zho:

—¡Bien ganle lo pxoz nroob i, lo men ne quiayun xtsiin Dios i noquiabro luu!

—Golgun dispensar —rëb Pabl—. Nand naa lëe pxoz nroob i, tel niaca mine nan naaw ne scad naa; sac zhobnee lo Xtiidz Dios: “Gneenëd luu zha ne rnabey ladz luu.”

⁶ Zeene bien Pabl grol zha wxtis co zienal zhiwseed zha saducé, zgroj zho zienal zhiwseed zha farisé, dzigo psilo me nguiedz bnee me rëb me lo zho:

—¡Grëse to bets, gologona ganle, zha farisé nac naa, niiclegaa pxoz naaw farisé goc me! ¡Ni porne riladzpaa naa gon zrieeban zha ne ret, min co gane znu zo naa lo to nu!

⁷ Zeene sca rëb Pabl, psilo zho bdiidz zho. Goc zho chop dii,

⁸ rriee zha saducé rnee nliid grieeban zha ne ret, nliid no anjl, nliid no espíritu; laa zha farisé naa rnee zrieeban miech, no anjl ni no espíritu.

⁹ Nguiedz zëeb tsi zho noneelsa zho, dzigo gusoque bla maistr ley ne nacgrë zha farisé, rëb zho:

—Laa ne bdzianle ganle, ¡ni ti falt rapd mgui qui! ¿Pe nadien dziuun ne? Nend ti espíritu ga, ti xanjlgaa Dios ga sca bnee lo me.

¹⁰ Zeene gon men ne rnabey lo menguiib ga, laa lo tɪl̩ zho noyac nroobraa, bdzieb me rēb me nend znuse gzhiih zho Pabl; bnabeyaque me gocredz menguiib güeyxi zho Pabl biire güeyɣan zho me len̩ yu ne rbēz zho ga.

¹¹ Goł guieel co, blulo Dios lo Pabl rēb me:

—Gdziebd luu, zigne bnee luu xtizd naa lo miech Jerusalén nu, scaque none tsienee luuw lo grē zha ne no Roma.

Gocladz zho niut zho Pabl

¹²⁻¹³ Zeene biini liu, ndziibsrāa choo zha Israel bnediidz rēb zho gowd zho, ni tib ro peet guied zho haxta gut zho Pabl; tel̩ne gund zho miñe rnee zho maase csaabzi Dios zho.

¹⁴ Dzigo güey zho lo pxoz ne rnabey, lo grē zha ne nac zha non lo menguedz, bzodiidz zho miñe no guic zho ga, ni rēb zho:

¹⁵ —Nana gon, golnab lo men ne rnabey lo menguiib cxeel me Pabl lo to gzhe, golquiaalo noraa pe lozh yquiep to Pabl; laa no nsinle ziobmbiaaz. Zeene laa zho tednie Pabl, ga dziuut no Pabl.

¹⁶ Dieen zha bin ti xingan bzian Pabla, nacne lēl̩l̩d güey win yu ne rbēz menguiib ga güeynie win diidz lo Pabl.

¹⁷ Dzigo bredz Pabl ti zha ne rnabey lo menguiib co, rēb Pabl lo zho:

—Bzhiguiel̩ güeynie mēēd rii lo men ne rnabey to, sac laa win no tsienie ti diidz lo me.

¹⁸ Bzhen̩ men̩ rnabey co nia mēēd co, güeynie me win lo men̩ nroob ne rnabey zho, rēb me:

—Laa naa zial̩nie mēēd rii nu me, dien̩ pe nac diidz ne ziaadnie win lo luu; Pabl ne no ladzguiib ga bnab lo naa gual̩nie naa win.

¹⁹ Dzigo bzhen̩ men̩ rnabey co nia win, güeynie me win stib nēz, bnabdiidz me lo win dien̩ pe nac diidz ne zienie win lo me.

²⁰ Dzigo rēbchaa win:

—Laa zha Israel gon bnediidz gnab zho cxeel̩ luu pxey naa Pabl lo zhiwxtis zho gzhe, yquiaalo zho gnē zho noraa pe yquiep zho me.

²¹ Bzhiguiel̩ gliladz luu xtiiidz zho, sac ndziibsrāa choo zha ne nacgrē zho rēb zho laa zho tsiesoblan nēz gutgazh zho me zeene laa me ted. Biaan̩ zho diidz grē zho, gowd zho, ni tib ro peet guied zho haxta gut zho me; haxta rēb zho tel̩ laa zho gund̩ min̩ co maase gdzibdee Dios zho. Ible zun̩ zhow, loxaque quiambēzse zho dien̩ pe guiab luu.

²² Blozhse ga dzigo bzonēz me win, ni pso me diidz lo win choot lo gneed win ne laa win güeynie diidz lo me.

Güey Pabl lo gobernador Wech

²³ Lēl̩l̩d bredz men̩ rnabey co chop zha ne zo lo menguiib, rēb me:

—Laa zhaguiib gon̩ none griece naguiieel̩ tsie zho Cesarea, na zeen̩ gołzo zha ne tsie; none tsie chop gayoo zha ne sēni, tsongal̩ tsii zha ne sob guay, schop gayoo zha ne güey lanz. Naguiieelgazh, zig rlozh xtsee none griece zho nu;

²⁴ sac laa zho none tsiesan̩ Pabl Cesarea. Ni gołcoxab ti guay ne sob Pabl, sac none ndip ndaan me gdziñnie to me lo gobernador Wech Cesarea.

²⁵⁻²⁶ Dzigo pquiaa me ti guits ne güey zho gdziñnie zho lo gobernador, rneew:

“iDiuzh Gobernador Wech!

’Naa nac Claud Lisias, laa naa rxel̩ guits rii lo luu gzodiidz naa ganle zha nacne bnabey naa ziaadsan̩ zho men̩ qui zaatne zob luu i.

²⁷ ’Zha Israel bnaaz me gocladz zho niut zho me, laa zeene gocnan̩ naa zha Roma nac me nacne pxeelaque naa zhaguiib güeyla me lo zho.

²⁸ Gocladz naa niacnan naa dien zha nacne rlëënie zho me, dzigo bianie naa me lo zhiwxtis zho.

²⁹ Ga gon naa led ncuaane rnad rlëënie zho me; tel zha nac xley zho ncuaan co rlisqui zho; nacda ncuaane guiab ne rieguial guet me, tsogyugaa me ladzguuib.

³⁰ Zeene gocnan naa laa palal zho bnediidz gut zho me, nacne bnabeyaque naa ziaadsan grë menguiib qui me lo luu i. Niiclegaa zha ne rlëënie mew, laa naa rep lo zho guiaad zho lo luu i, zeena i gnë zho dien zha nacne rlëënie zho me.

“Lëed bii gdzieel ne sca dien.”

³¹ Zeene laa liu pcow, zig rlozh xtseew laa grë menguiib co pcaanie Pabl nëz; dib guieel bio zho nëz bdzinne zho me guiedz Antipatris.

³² Biini liu, loxaque zha ne zob guay ga pcaa nëz zienie zho me Cesarea, laa grëraa menguiib co wbiere bdzin Jerusalén stib.

³³ Zeene bdzin zho Cesarea, bdeed zho guits ne zienie zho ga lo men ne nac gobernador, dzigo laa zho psan Pabl ga.

³⁴ Blozhse blab me lo guits co, dzigo bnabdiidz me lo Pabl dien pa guiedz gol Pabl. Dzigo rëbchaa Pabl lo me, zha Cilis nac Pabl.

³⁵ —Nasca —rëb me—, zeene laa zha ne rlëënie luu glanso nu, dzigo yquiaadiag naa dien zhapaa nac xtil to.

Dzigo bnabey me, pquianap menguiib Pabl zaatne nac len xyulow Herod.

24

Gocredz Pabl lo gobernador Wech

¹ Zeene goc gaay ngbidza, laa Ananí men ne rnabey lo pxoz bdzin ga, gza me blalaa zha ne nac zha non lo menguedz Israel, zienie zho ti licenciad lë Tértulo; grë zho laa zho zie zienie zho diidz lo gobernador pe nacne rdilnie zho Pabl.

² Dzigo bnabey gobernador gocredz Pabl. Zeene laa Pabl bdzin, psilo licenciad co bzeet me grë ncuaane rquiaqui zho Pabl, rëb me:

—Xquizhdoo luu gon gobernador, ne squitaa ndzielguic luu rien luu zha gnabey luu, gane zaacse mban menladz no niina, blactaa ncuaane yquuin lo no noyun luu.

³ Rzac zdoo now, tel pa lotaa zo no rsoladz no luu nac luu men ne rnabey no.

⁴ Nli nonguielda dziunneed no luu, per been ti guielnaaac pquiaadiag ganle pe nac ncuaane rlisqui no quiayun mgui ne zo lo ne nu.

⁵ Masaque nac me lo no zig nac ti guielguidz dox ne rded, grëse guiedz quianzë me noyungüet me menladz no gacndaan zho lo men ne rnabey no. Lëe me ga zo lo grë zha ne rnee zho nazaren.

⁶ Zeene bgaa me, lëëtaque laa me no len yadoo ro ne zob Jerusalén quiayunguzee me xyadoo no. Nacne gocladz no gagazh nguizh me falt co zigne rnabey xley no;

⁷ per biaad Lisias grë xmenguiib me ntseeb rac zho biaadla zho me lo no.

⁸ Na nagon zac luuzhal yquiep me, zeena gan luu ganle nli quiayun me grë mine rnee no nu.

⁹ Grë zha Israel ne zianał ga, pquiabbe zho rëb zho nli quiayun me grë min co.

¹⁰ Dzigo blunia men ne nac gobernador ga lo Pabl gnee Pabl; nacne psilo Pabl bnee me rëb me:

—Nanle naa ziele iz zob luu nu rquiaadiag luu grë ncuane rac xtan no nu, gane rley naa zial naa lo luu par yquiaadiaggaa luu ganle zha nac xtidz naa.

11 'Na rac tsiipchop ngbidz ga bdziñ naa Jerusalén, biagan naa Dios len yadoo nroob ne zob ga (niicle tel niaca mine grieë diidz ganle).

12 Laa naa bia Jerusalén biagan naa Dios, choot biatilnied naa ga; niicle len grëragaa yadoo wina, ro nëzgaaw, wlaltaa noquild naa miech cho lo gacntseeb zho.

13 Grëse mine rquiaqui grë zha qui naa grielod glu zho nliw, sac led ncuane godca.

14 'Mine nac diidzli, niina wriiñ psañ Dios ti Wseed Cub dien zha guiaanwen miech lo me, zha qui rzac led zhiwseete Diosa, sangue naa dib zdo naa zanañ naaw, dib zdo naa quiaayun naa dziin lo Dios men ne bliladz pxozgol no; ni scaquegaa, noxco naa grëse mine nac ley. Rliladz naa grëse mine bnee grë zha ne biadteed xtiidz me.

15 Rliladz naa zdziñ dze ne cueban Dios grëse miech, zigtaa zha wena zigtagaa zha ntseeba, ni haxta zha ye zho rliladz min co.

16 Ni min copaa nagon gane tibaque noxco naa guiaanme zdo naa, guntaldras naa xtoñ naa zigtaa lo Diosa zigtagaa lo samiech naaw.

17 'Nod naa Jerusalén tibaque, blale iz goc no naa ladz menziti; dze ne bdziñ naa Jerusalén ga, laa naa bia porne zasañ ti gon lo menladz naa ni zanie naa ti gon ne gded naa lo Dios.

18 Min co nagon nacne no naa len yadoo zeene gon grë zha qui naa. Blozhle ben naa grë mine rnabey xley no rdziuun no zeene sca riosañ no gon, zeene laa bla zha Israel ne no nëz Asia blanso lo naa ga; per choot miech taf ndxienied naa ga, niicle choot noquildgaa naa.

19 Zha co nagon riegual naad nu, nlisqui zho tel pe ncuane rzac zho nonguield noyun naa ga.

20 Zha ne ndxieggaa nu niina, zac gnë zho telne brieequia falt ne rquiaqui zho naa zeene gocredz naa lo wxtis Jerusalén.

21 Te gon falt ga naye ben naa, lëë gdib nguietz bne naa lo zho rep naa: "Laa naa racredz lo to, zig nac zeene falt ga rap naa loxaque ne rliladz naa zdziñ dze ne grieeban miech." Scase nagon naca.

22 Nanle gobernador co led ncuane gund zha ne rliladz Jesús ga rquiaqui zho Pabl, dzigo bnee me lo zho cuëz zho nieeda gdziñ Lisias, dzigo dien zhapaa guiaan xtil zho.

23 Bnabey me zha ne zo lo menguiib yquianap zho Pabl, ni pso me diidz zaacse gac zho lo Pabl, gdeed zho diidz ted grë zha ne ndzieeldiiz Pabl tseegan zho Pabl.

24 Goc blalaa ngbidza, bnabey gobernador co gocredz Pabl lo me gprop tsiel me Drusil, ti wnaa Israel. Laa me bredz Pabl, sac racladz me yquiaadiag me dien zha nac zhiwseed Jesús.

25 Zeene bzeettaa Pabl, zha nac guielwxtis, zha none tsoxco miech gund zho mine riaabtaa guic zho, ni zha gdziñ dze ne gun Dios guielwxtis, dzigotaa laa me bzieb, rëbchaa me lo Pabl:

—¡Lëëlewga na nadien! Na zeene guioba, dzigo naazhal cuedz luu guiaad luu ziodiiz ne stib.

26 Zhiga zhiga rbedz me Pabl, sac quiambëz me dien pe gdziibd Pabl dimi csilaa me Pabl.

27 Zeene goc chop iz sca no Pabl ladzguiib ga, laa Wech brieë guielgobnador, bzëëb ti men lë Pons Fest. Niicle brieë Wech per psilaad me Pabl, sac racladz me dien zha guianzniuraa me lo grë zha Israel.

25

Güeyzo zho Pabl lo gobernador Fest

¹ Zeene goc tson ngbidz bdzin Fest Cesarea pcaania me guielgobrador, laa me brieë güey me Jerusalén.

² Grë zha pxoz non ni grë zha ne rnabey lo menquiedz Israel, zeene bin zho laa Fest bdzin Jerusalén lëälëd güey zho lo me güeyxob zho xdemand Pabl; ni

³ bnaab zho lo me cxeel me Pabl Jerusalén. Laa zho rnab min co sac laa zho bnediizle, nëz tsiesoblan zho, yquiambëz zho ted Pabl gut zho Pabl.

⁴⁻⁵ Per bdeete Fest diidz, rëb me laa Pabl nole ladzguuib ga, tel zha ne zrieelo tsie, ga glisqui zho tel pe nac falt ne rquiaqui zho Pabl; benque zlase dze laa me gbiire güey nëz co dzigo zac tsienal zho zhits me.

⁶ Ndziibsräa ti zhmal blëz me Jerusalén ga, dzigo laa me biire zey Cesarea. Zna dze bdzin me biinigazh liu co güey me yulow, rnabey me gocredz Pabl.

⁷ Laa grë zha Israel ndxiele ga, wbig zho lo Pabl ndal grë falt nroob ne rcaadzol zho me, per loxaque diidzsew, guien d zha glu zho ne nliäa goca.

⁸ Dzigo pquiab Pabl rëb Pabl:

—Grëtaa mine rquiaqui zho naa i, ni tiba nliid. Wlaltäa gard quits naa xley no, gard quitnie naa xyadoo no, niicle gardgaa gacntseeb naa lo zhiwxtis zha Roma.

⁹ —¿Pe racladzäga luu tsie luu Jerusalén? —rëb Fest—. Ga gbiire yquiaadiag naa xtil to i zeena glu dien chopaa rap dol.

Sca rëb me, sac racladz me dien zha guianzniu me lo grë zha Israel.

¹⁰ Dzigo rëbchaa Pabl:

—¡Gad naa! ¡Nod pe nac ga naa ga, to rieguial gun guielwxtis rii! Benque nan wen luu ganle peet falt nzëëbd naa lo zha Israel.

¹¹ Tel niaca mine nli ziyun naa pe guielntseeb ne raguial naa guet naa, maase guet naa. Per na nanpaa naa ni ti ncuääne rquiaqui zho naa i nliid, ¿pe nac dzigo cho co naa ladznia zho gut zho naa? Laa naa racladz, mazd golneedz diidz tibaque ga naa lo zhiwxtis nroob ne, men ne zob Roma.

¹² Dzigo bzodiidz Fest grë me men rac ne nacie me dziin; blohse ga rëbchaa me lo Pabl:

—Guiend rson sca. ¡Tel lo César racladz luu tsie luu, na maase tsie luu!

Gocredz Pabl lo Agrip

¹³ Zeene goc bla zhmalä, laa rey Agrip grop wnaa ne lë Berenis bdzin Cesarea ga güeyquiaabdiuzh me Fest.

¹⁴ Nzianlaa ngbidz blëz me ga, dzigo bzodiidz Fest lo me laa Pabl sca no ladzguuib ga, rëb Fest:

—Len dze ne bii nac Wech dziin biab ti mgui ladzguuib nu,

¹⁵ laa len dze ne bia naa Jerusalén biaad grë zhipxoz non zha Israel, grë zha non ne rnabey lo zho, biaad-xob zho xdemand me lo naa ga, rnab zho lo naa gnabey naa guet me.

¹⁶ Dzigo rep naa lo zho led scad run zha Roma guielwxtis, ib none gacredz me gnee me chop lan xtiidz me lo grë zha ne rzoob xdemand me, ga glu telne nli mine rquiaqui zho me togo nliidgaaw;

¹⁷ nacne biaad zho nu. Zna dze blanso zho, biinigazh liu co rnabey naa gocredz me.

¹⁸ Tibaque ni naa bod no pe ti falt nroob ne rquiaqui zho me, per zeene biaad zho yulow gon naa

¹⁹ lëë gdib tel zha nac grë ncuääne riladz zho min co rllisqui zho, ni rllisqui zho pe nacne zienal me zhiwseed ti mgui lë Jesús, gutle men co ni laa me rnee mban me.

²⁰ 'Zeene gon naa grē ncuaan co rquiaqui zho me nli riend naa zha guṇ naa, dzigo rep naa lo me, telne racladzga me zac tsie me Jerusalén ga dien zha guiaan lo xtl zho.

²¹ Per bnéd me, lel bnab me tsie me lo César; gane niina laa me bii no i, nieeda gne naa lo César dien pa hor grieelo cxel naa me nēz co.

²² Dzigo rēb rey Agrip:

—Racladz naa gon tēbaa zha yquiaadiag naa dien zha nac xtiidz mgui co.

—Na zho ganle —rēb Fest—, gzhegagh gnabey naa garedz me.

²³ Biini liu, ti lni nroob ne rac laa Agrip ni Berenis bdziṇ len yu ne rac guielwxtis ga, grē zha non ne rnabey lo menguiib, grē zha non lo menguedz, nal zho zhits me. Dzigo bnabey Fest gocredz Pabl, zeene laa Pabl bdziṇ

²⁴ laa Fest psilo bnee, rēb me:

—Niina ne laa luu ziaad nu rey Agrip, scagaa to ne nac to men ne ndxiegrē ne nu nadze, golwi ganle lēē men rii nagon rlēēniedox zha Israel, racladz zho guet me; zigtaa Jerusaléna zigtagaa nuw ziyaadnab zho lo naa gnabey naa guet me.

²⁵ Sangue naa gonle naa rapd me falt, par guiab ne rieguial guet me; per laa me bnab tsie me lo César, na laa naa no cxel me nēz co.

²⁶ Nli riend naa dien pe nac diidz ne cxel naa lo César, ne squi lega ncuane nlid rquiaqui zho me. Miṇ co nagon bnabey naa gocredz me lo to nu, ni laga laa luu ziaadgaa nu rey Agrip, bzhiguiel pquiaadiag ganle zha rzē xtiidz me; zeena togo zdzied naa pe nac diidz ne cxel naa gal dze ne laa me tsie nēz co.

²⁷ ¡Sac nonguield ga guṇ naa telne sobdoo me cxel naa me, ni tel cxeld naa diidz dien pe nac xfalt me!

26

Bnee Pabl lo Agrip

¹ Dzigo rēb rey Agrip lo Pabl, mezhal gnee dien zha naca. Nacne blis nia Pabl psilo Pabl bnee Pabl rēb Pabl:

² —Rley naa gon rey Agrip ne laa naa zial lo luu nadze, zeena gzodiidz naa lo luu gacnan luu ganle nlid grē ncuane rquiaqui grē menladz naa naa.

³ Rley naa sac nan naa nanopaa luu zha nac grē xcostumbr no, grē ncuane rliladz no. ¡Rnab naa lo luu sca, guieete luu yquiaadiag luu grē mine gne naa!

⁴ Grēse zha Israel nan wen zho ganle zha mban naa, sac meēdas naa bdziṇ naa Jerusalén, ga broob naa.

⁵ Nanpaa zho zha farisé goc naa, ni zha farisé nac zha ne rioxcoraa run grēse mine rliladz zha Israel.

⁶ Per mazd gon, laa zho rlēē lo naa porne dib zdo naa rliladz naa laa Dios beenle mine psan me diidz lo grē pxozgol no.

⁷ Grēse zha Israel, zigne ziaad zho lo gza tsiipchop dii ne psan xmenṅol no, grēse zho dze guieel bii quiambéz zho gac miṇ co. ¡Masaque rzac zho dol ga quiaayun naa rliladz naa laaw gogle!

⁸ Haxta to, zeene rzet naa zrieaban miech, rzhidz to ron tow, ¿pe rzac to naa grieelod Dios guṇ me miṇ co?

⁹ Glo nli ptsidil naa grē zha ne rliladz Jesús men Nazaret, masaque rzaac naa lēew ga quiaayun naa.

¹⁰ Pe zhidaa zha ne blo naa ladzguiib Jerusalén, haxta grē pxoz non bneedz diidz ben naa grē miṇ co; ni zeene rnabey zho ret grē zha co, ye naa rded diidz ret zho.

¹¹ Nzian grē yadoo win bia naa, biasacsi naa zho haxta gneenē zho Jesús. Blēēniedox naa zho, haxta grē guiedz zit bia naa biaguiib naa zho.

12 'Min copaa nagon brie naa za naa guiedz Damasc, masaque grë pxoz rnabey bneedz ti xtiidz zho bi naa laa naa za.

13 Tel gan luu ganle rey Agrip zha bzhaac naa: Zig rwe ngbidza, tibaque zeene ziaad ti biinidoo nëz zhan gbaa biab lo naa, ni lo grë zha ne zanie naa ga, nroobraa nac biini co lo xbiini ngbidz.

14 Grëse no biab liu, dzigo bin naa ti tsi men co rnee me xtiidz no, bredz me naa në me: "Saul, Saul, ¿pe nacne quiana luu naa? Lëëque luu gon nosacsi luu i, rzac luu zigne rzac ngon ne rcaanni, ni lëëque lo guuib lots ne rtseb zho ma riecaanni ma."

15 Dzigo rep naa: "Been guieInzaac bnë dien cho luu." Nëchaa men co: "Naa nac Jesús, men ne squi quiatsidil luu.

16 ¡Na zeena guche i, bzoli! Laa naa bredz luu zeena gun luu xtsin naa, tsiezodiidz luu lo miech mine blozh bzhaac luu nu, ni grëragaa mine naraa gan luu.

17 Peet tsienied guic luu, naa yquianaap luu, niicle zhaladz luuw niiclegaa zha zita peet grielod gun zho luu. Sac laa naa cxel luu grë guiedz zit

18 tsienee luu lo miech gacnan zho mine nacpaa diidzli, zeena griee zho lo ncow gbig zho nëz lo biini, griee zho ladznia mendox ygab zho lo Dios. Dib zdoo zho gliladz zho naa zeena gun Dios zho perdon, ni ygaa zho zaatne gdzin grëse zha ne mbe zdoo."

19 'Min co nagon rey Agrip nacne bioxco naa ben naa mine në men co lo naa ga.

20 Glose Damasc psilo naa bne naa lo miech, ga brie naa bdzin naa Jerusalén, bia naa dib Judé ni grë guiedz zit, bne naa lo miech csaan zho grë xquieIntseeb zho gbig zho lo Dios.

21 'Min co nagon nacne rlëënie zha Israel naa, biadnaaz zho naa len yadoo ro ne zob Jerusalén, gocladz zho niutgazh zho naa.

22 Gocnien Dios naa, gane laa naa bii zo nu quiane naa Xtiidz me zigtaa lo grë zha wina zigtagaa lo grë zha nona. Noseete naa miech stib wseed, sinque laa naa rne mine bzeetaque Moisés ni grëragaa zha ne biadteed xtiidz Dios padzeela.

23 Tel zha, bzeetle zho ib sacsi miech men ne cxeel Dios ga, ni me gac men ne gloopaa grieeban, me gac zig ti biini ne gziini lo grëse miech, zigtaa zha Israela zigtagaa grë menzita.

24 Tibaque nguiedz bnee Fest rëb me lo Pabl:

—¡Bod rzhinle guic luu gon Pabl! ¡Ne tibaque nagon rio luu wseed gane squi riots xtiidz luu!

25 —Coo, gobernador Fest —rëb Pabl—, led rzhind guic naa. Niapse mine nac diidzli min co none naa,

26 laa rey Agrip zob i, me nan ganle nli grë mine rne naa nu. Tibliladz naa none naaw lo me, sac nanpaa naa nan me nli mine rnee naa, nacda ncuaane goc ngeets zhliaan.

27 ¿Led nli lëë rey Agrip rililadz luu mine bzeete grë zha ne biadteed xtiidz Dios padzeela? Nanpaa naa rililadz luuw.

28 Pquiab rey Agrip, rëb me lo Pabl:

—¡Zlaque nu gon laa luu cole guic naa ye naa sëëb xnëz Jesús!

29 Dzigo rëbchaa Pabl:

—¡Nend zhilew o nroobragaaw, per rnab naa lo Dios led loxaque luudse sëëb xnëz me, sinque ye grëraa zha ne noquiaadiog mine none naa nu niina; zeena ygaa to mine bgaa naa nu, per led znud sob caden rii nia to!

30 Gataa laa Agrip guso, gusoque Fest, gusoque Berenis ni grëraa zha ne zobnie zho, laa zho brie ga.

³¹ Grëse zho rnee peet xtold Pabl, rapd me falt ne guiab ne rieguial guet me, rieguialgaa tso me ladzguiib.

³² —Niacpaa nsilaa ne me —rnee Agrip lo Fest—, telne nabd me tsiepaa me lo César.

27

Pxeel zho Pabl nëz Roma

¹ Bdziñ dzew, laa Fest bnabey tsie Pabl nëz Roma, dzigo laa zho psan Pabl ladznia ti men ne rnabey lo mennguiib lë Jul, gza Pabl zlalaa zha ne no ladzguiib ga. Lëë Jul co rnabey lo tib dii mennguiib ne rnee zho “Augusto César”.

² Ye no zional zhits Pabl grop no Aristarco, laa no bziaab ti xbarcw zha Adramit zie grë guiedz ne ndxie ro nis nëz Asia, laa no pcaa nëz laa no zio.

³ Biini liu co laa no bdziñ guiedz Sidón. Zeene bdziñ no ga, wen goc Jul lo Pabl bdeed me diidz güey Pabl güeyquiaabdiuzh Pabl grë zha ne runbey Pabl ga, grëse zho rleyne zho me blëzo zho me.

⁴ Ga brieë no bdieed no tib ro guidzliu win ne lë Chipr, psaac guidzliu co palal, sac psilo rrieë me rtsire me barcw ne zio no ga.

⁵ Laa no zio, bdieed no gax ro guidzliu ne nac xtan zha Cilis ni xtan zha Panfil, bdziñ no ti guiedz ne ndxie xtan Licia lë Mira;

⁶ ga bdzieet no barcw ne zio no ga. Lëëtaaque noguib Jul sti barcw ne guio no, laa ti xbarcw zha Alejandrí no grieë ga tsie nëz Italia, dzigo bziaab no barcw co laa no zio stib.

⁷ Tsow ga zie barcw co, nzian dze goca, nen dzigoraa bdziñ no gax guiedz Gnid; ib rbëzdaque me, nacne bguib zho dieñ pa nëz zhi rcaan me, dzigo güeynie zho barcw co nëz Cret. Tib ro guidzliu win co zio no bdieed no Salmon;

⁸ nen bdziñ no zaatne rnee zho Buenos Puertos, gaxle ga riaan ti guiedz lë Lasé.

⁹ Nrooble dze goc no no lo nis, len dze co laa mëë nal psilole ni zëëb diidz gacd së barcw len mëë co, nacne bnee Pabl lo grë zha ne zienie no ga,

¹⁰ rëb me lo zho:

—Golgona ganle, telne laa ne grieë nu len dze rii, rgobey naa ib znitlonie ne barcw rii lo nis.

¹¹ Laa ne niacnie Jul Pabl niac miñe rëb Pabl ga, lel mazdraa bliladz me xtiidz zha ne rsëë barcw ni men ne nac bizhuana.

¹² Stiba, zaatne nac Buenos Puertos ga rapda zaatne zaacse cuëz miech len mëë nal, nacne nzian zho rëb mazd gdziñ guiedz Fenice, ga zac gbiaaz no gdipse len mëë nal. Ro guidzliu win co riaan Fenice, nligaa zhi rcaan me ga.

¹³ Zeene laa ti me win ne znu ziaadquia psilo brieë lo nis co, zootle na nli grieedraa me. Nacne lëëled bnabey zho bziaab no barcw, blisglaa zho lar nroob ne rcaan me rzëw, laa no zio, gax gax ro guidzliu co zienie zhow.

¹⁴ Zhisaque goca zeene laa ti me dox ne rnee zho Nordest psilo brieë, laa me co psilo rtsire barcw.

¹⁵ Niicle racladz zho tsienie zhow nëz ne no guio no ga, per rsaand me; gonse zho led ncuaañe gacda, mazd psaan zho zienie mew nëz ne racladztaa me.

¹⁶ Scale zienie me barcw ne no no ga, biotieed no gax ro guidzliu win ne lë Clauda, ga në në brieelo blis zho grë canó win ne nal zhits barcw ga bzëëba nëz len barcw;

17 dzigo blibdoo zho barcw co zeena gbilda, ni blit zho lar nroob ne rcaan me rzew, sac rdzieb zho reb zho telne scaquia lar co nend tsieniezho me mew nez ro nis, pa tsiesobnagwa lo yuzh.

18 Zeene biini sti liu co mazdraa rriee me, ni guioxoo ne ziaadnie me, nacne blee zho gre yo ne no len barcw blaaj zhow lo nis.

19 Goc bion ngbidz scataa zo guie dox co, bnabeyaue zho blee no grese ncuane runxtsiin zho len barcw blaaj now lo nis.

20 Goc bla ngbidza rbězdaue guie dox co, rludraa lo mel per ni lo ngbidz rludraa, dzigotaa rdzieeb no nldraa griequiaa no.

21 Niicle wagw choot rsoladzdraa, dzigo bnee Pabl lo gre zha ne ziogre no ga, reb me:

—Tebaa nion to xtide naa nagon nzhiguiel no nrieed ne Cret, zeena ndzieelod ne gre ncuane nodzian ne nu, niicle nlaaldga ne gre yo co lo nis.

22 Per laa ne znule bzhiaac zha dziunraa ne. ¡Dziebde to! ¡Peet gacd ne! Niicle nitlo barcw rii, per choot peet gacd.

23 Led nanle to ganle, xnéz Dios no naa ni xtsiin me noyun naa, nieewdze pxeel me ti xanjl me

24 ne lo naa: “Gdziebd luu gon Pabl, peet gacd luu, sac ib none laa luu gdzin lo rey ne zob Roma. Niicle gre zha ne ziadgreé luu len barcw i peet gacd zho, sac bin me mine rnab luu.”

25 Gane me naa lo to peet tsienied guic to, nanle naa csaand Dios ne, ible zac mine ne anjl co lo naa.

26 Ib tedsod, no pa ti lo guidzliu win ne no lo nis rii tsiezo me rii ne.

27 Zeene goc tsiida ngbidz sca nezrii nezrec zienie me no, laa no no lo Nisdoo Adriático. Wdze co, zig grol guieela, bien gre zha ne rsée barcw ga gaxle ti ro guidzliu ga nonie barcw no;

28 dzigo ptiix zho dien palal quiet nis ga, gon zho loxaque gal yas guieta. Bzè zho spalal biire ptiix zhow stib, gale guieta loxaque tsiiptib yas.

29 Gataa laa zho bdzieb reb zho nend pa tsiecaan barcw lo quie, dzigo psilèè zho lo doo ne zob gza tap guuib cruz nroob ne quia nez zhits barcw, bron zho gza guuib co lo nis, zeena tsowga se barcw; rzac zho tebaa laa liu biinile.

30 Gre zha ne run dziin len barcw, gocladz zho nzhoon zho, psilo zho noxadz zho gre canó win ne ney barcw, rquiaalo zho zig nac zeene guuib cruz nroob ne ney barcw nez quiaaw qualit zho csèeb zho len nis.

31 Zeene gon Pabla, rebchaa me lo Jul ni lo gre xmenguuib Jul:

—¡Laa gre zha rii gon racladz xoon! Csaande to, sac telne laa zho xoon nldraa griequia to lo nis rii.

32 Dzigo pchug gre menguib co doo ne zob gre canó win co, bron zhow lo nis.

33-34 Silgaw, bii ncow rnaw laa Pabl bnee lo zho gow zho, reb Pabl:

—¡None gow to! Golwi ganle nale gac tsiin ngbidz ga ni ti le peet gard gow to, ni squique raguiesde to zaacse. Peet tsienied guic to, ni tib to peet gacd.

35 Blozhse sca bnee Pabl lo zho, bzhen Pabl ti quietxtil, squi ndxie zho gre zho bdeed me xquizh lo Dios, dzigo beengrol me quietxtil co laa me psilo wagw.

36 Dzigoraa peet guenyiedraa guic zho, ye zho laa zho psilo dow.

37 Lo gre no zig zio no len barcw co rgaa no chop gayoo tsongaltsiimtib.

38 Blozhse bdioow no, dzigo laa zho blee gre zhobxtil ne zie len barcw ga blaaj zhow lo nis, zeena gnitné barcw spalal.

39 Zeene laa liu blozh biini, gon gre zha ne rsée barcw ga laa ti le ro guidzliu rlu gax ga, per riend zho dien paw. Natlaa nac ro guidzliu co, rlu zac gdzin barcwa, nacne reb zho dien pe grieelod gdziinne zho barcw ga.

⁴⁰ Dzigo pchug zho doo ne zob guuib cruz nroob ne no len nis ga, biaanse guuib co ga. Psilëë zho doo ne naaz yag nlag ne rchug nis rzë barcw, ni blisglaa zho lar nroob ne rcaan me rzëw; zeena csëë mew gdziņa gax ro guidzliu co.

⁴¹ Per ziese zho, lëetse lo yuzh ne zobli len nis co güeytsiba, loxaque güesyëëbguica ga laa nëz zhitsa psilo nobilaque, sac grëse nis ne rias riecaan choo co.

⁴² Dzigotaa laa grë menguiib co gocladz niut grë zha ne zie ga guey ladzguiib, rëb zho nend znuse xoobnis zho xoon zho.

⁴³ Per bdeete men ne rnabey lo zho diidz, sac racladzd me gut zho Pabl. Mazd bnabey me zha ne rac rzhooobnis, zac ner zho xoobnis zho grieequia zho ro nis co;

⁴⁴ laa grë zha ne gacd xoobnis, zac maase grë yag biats ne nobil barcw xoobnisnie zho. Sca bdeeda diidz brieequia no ro nis grëse no.

28

Blëz zho Malt

¹ Zeene bdziņ no ga, dzigoraa gocndion no lëë guidzliu win ne lë Malt ga.

² Grë miech ne no ga pquiadox zdoos zho no, bzëëg zho gui bredz zho no bdzëë no, sac lala rac naļ ni scataque bgaa no guie.

³ Ye Pabl güey güeytop chop lë yag ne cuib lo gui. Lëëtaaque laa me nodziiba lo gui, tibaque bias ti meel ne zizhoon lo zhindzëë gui co, pquiaalay ma nia me, quiataque ma ga.

⁴ Grë miech ne no ga, zeene gon zhow rneechaa zho:

—İse nagon rlu, nzëëb men qui ngutoo! Niicle blaa me lo nisdoo, per no guielwxtis ne quianab guet me.

⁵ Znuse bdzib Pabl nia me bron me meel co lo gui.

⁶ Grëse zho rwi quiambëz zho dien pa hor sigui me, te tibaque tsobe me liu ye guet me. Wdzeelaaw peet racd me. Laa zeene gon zho peet racd me, dzigo psilo zho rnee zho no cho ti dios nac me.

⁷ Gaxaque ga quia tib lë liuņ men ne rnabey lo guidzliu win co lë Publ, dzigo bneedz me zaatne bliaaz no ga tson ngbidz ni bneedz me ncuaaņe bdioow no.

⁸ Lëëtaaque len dze co laa pxoz me nix rlan xlëë ni yoobchen. Dzigo güeynee Pabl lo me, bnab Pabl lo Dios guiac me; blozhse bnab Pabl lo Dios, pxobnia Pabl guic me, laa me biac.

⁹ Zeene bin grë miech cow, zha ne rzacnëtaa riaadnie zho zho lo Pabl, runguiac Pabl zho.

¹⁰ Dzigo rleynie zho no, nroob grë ncuaaņe bgad zho lo no. Zeene goļ dze ne laa no wbiļ ga, scasaque nroob ncuaaņe yquin no nëz bneedz zho.

¹¹ Tson mëë bliaaz no lo guidzliu co, dzigo laa no brieë ga bziaab no ti len xbarcw zha Alejandrí, ti barcw ne blëz ga dipse len mëë naļ co. Guic barcw co quia chop mdio, mdio ne rnee zho Cástor ni mdio ne rnee zho Pólux.

¹² Bdziņ no guiedz Siracús, ga bliaaz no tson ngbidz.

¹³ Siracús brieë no, gax gax ro guidzliu zio no bdziņ no guiedz Regio; biini liu ine zhoob ti me ne ziaadquia lo nis co, dzigo laa no brieë Regio laa no zio. Biiniraa sti liu bdziņ no guiedz Puteoli,

¹⁴ ga bdziņ no lo blalaa zha ne riladz Jesús. Bnab zho lo no gbiaaz no, nacne bliaazaque no lo zho ga ti zmal. Garaa brieë no bdziņ no Roma.

¹⁵ Grë zha ne riladzle Jesús Roma, zeene bin zho laa no gdziņ ga, brieë zho biaad-xinëz zho no. Zhis zho biaddzieel no zaatne lë Foro de Apio, szhis zho

biaad zaatne lë Tres Tabernas. Zeene gon Pabl scataa biaad-xinèz zho no, rley me rdeed me xquizh lo Dios.

Bdzin Pabl Roma

¹⁶ Zeene bdzin no lad guiedz Roma, bdeed zho diidz Pablzhal bguib ti yu ne blèz me grop me menguub ne quianap me, blood zho me ladzguub.

¹⁷ Goc tson ngbidz bdzin no ga, dzigo bredz Pabl grè zha ne nac zha non lo zha Israel ne no ga. Blozhse pcaalsa zho, rëbchaa me lo zho:

—Laa naa bredz to nu gon bets, gacnan to ganle laa grè zha ladz ne bnaaz naa Jerusalén, güeyzo zho naa lo zhiwxtis zha Roma rnab zho guet naa, per gneli naa lo to ganle, peet bend naa lo zho, ni ti zhiwseed xmengol ne bditst naa.

¹⁸ Niicle wxtisgaaw, blozhse pquiep zho naa gon zho raapd naa falt, nacd naa zha ne rieguial guet; dzigo gocladz zho nsilaa zho naa.

¹⁹ Per zeene gon naa néd menladz ne csilaa zho naa, nacne bnabaque naa ziaadnie zho naa lo César nu. Min co nagon nacne zial naa nu, ziald naa cto naa menladz ne o cteedquiegaa naa zho.

²⁰ Wen ne laa naa beenbey to nagon, ni beenbeygaa to naa; gacnan to sca ganle laa caden rii zob nia naa, per nacda por pe falt ne rap naa, sinque laaw zob nia naa porne riladz naa laa Dios pxeelle men ne quiambèz menladz ne ga.

²¹ Dzigo pquiab zho rëb zho lo Pabl:

—iWaltaa, ni ti guits ib gard cxeel menladz ne lo no zaatne gzeet zho luu! Niiclegaa grè zha wladz ne zilanso nuw, nreed zho laa luu noyun pe guieintseeb.

²² Per na laga laa luu ziaad nu, siguiel luu sodiidz luu lo no dien zhapaa nac wseed ne riladz luu i, sac blactaa zidzion no, zaatne notaa zha ne riladza rlëenie miech zho.

²³ Dzigo pso zho ti dze ne tsie zho.

Zeene gol dze co, nzian zho pcaalsa zaatne rbèz Pabl ga. Dzigo psilo Pabl bzodiidz me lo zho zhapaa racladz Dios gban miech, ni rnee me lo zho gliladz zho lëele men ne nac diidz cxeel Dios ga nac Jesús; blu me lo zho grèse zaatne zhozneew, zigtaa lo grè mine pquiaa Moisésa, zigtagaa lo grè mine pquiaa grëraa zha ne biadteed xtiidz Dios. Dipse dze sca bzodiidznie me zho grè min co.

²⁴ Brieequia bla zha ne bliladz grè mine bnee me ga, ni scaquegaa briequia zha ne bliladzda.

²⁵ Grè zha ne riod zdoo mine rnee me ga, laa zho psilo noriee, nacne rëb me:

—Ib lëepaa mine nac to i ga nagon bzeet Espíritu Sant, zeene psiaab me guic profet Isá znu rëb Isá

²⁶ lo grè xmengol to:

Niicle peraa gon to, niicle peraa gan to,
per peet guieude to;

²⁷ sac gocntseeb zdoo to.

Zob diag to, ni peet ronde to;

zob lo to, ni peet rande to.

Ncow nac guic to,

gane peet ronde to, peet rande to;

niicle rioxcdgaa to gbig to lo naa zeena csilaa naa to lo xtol to.

²⁸ Golgacnan sca ganle, min co gane laa Xtiidz Dios quiagaaz lo grè miech stib guiedz, ni zhasi gon noliladz zhow.

²⁹ [Zeene gon zho sca rëb Pabl mazdraa blëë zho, nodiidiidzlsa zho laa zho zey.]

³⁰ Dipse len chop iz blëz Pabl ga, ga bree me ti len yu ne bio me. Ga rdzin grë miech ne zienëe lo me,

³¹ zha ne zietaa, rnee me lo zho zhapaa racladz Dios gban miech, ni rnee me lo zho gliladz zho cho nac Jesús. Dipse len dze co, ib biod zha ne ntsidi pe nacne sca noseed me miech.

GUTS NE PXEEL PABL LO ZHA ROMA

¡Diuzh to grëse to!

¹ Naa nac Pabl, naa nac tib ngundziin win quiayun naa xtsiin Jesús. Dios bredz naa pxeel me naa none naa Xtiidz Ndzon me lo miech.

² Padzeelale bnee Dios ne laa me cxeel Diidz Ndzon rii lo ne, lëew ga bzeet grë zha ne biaad padzeela biadteed xtiidz me lo miech, lëew ga raquiet lo guits ne zhobnee Xtiidz me.

³ Lëew ga rnee ganle cho nac Jesús (men ne brieequia lo xti rei David ne laa me goc miech lo guidzliu;

⁴ sangue Espiritu Sant, pxobnen me ganle Xpëed Dios nac me; min co gane brieaban me).

⁵ Zeene biaad Jesús, ga pxobnen me ganle tibaque noxco Dios ne; ni niina Diosaque bzooblo naa rxeel me naa none naa Xtiidz me lo grëse miech, zeena gliladz zho me, gon zho diidz gban zho zigne rnabey me.

⁶ Zig nac to, glo lo guielcow ga ngab to; sangue niina laa me bredz to laa to ngab xnëz Jesús.

⁷ Laa naa rxel guits rii lo to, grëse to ne no to guiedz Roma i. Golgacnan ganle rleynie Dios to, gane laa me bredz to ygab to lo me, gban to zigne no gban zha ne ngab lo me. Me ne nac me Pxoze ne, ni Jesús men ne rnabey, tibaque noxco me to, me nac men ne gacnen to zeena peet zhgab ctsebde to.

⁸⁻⁹ Nanle to nasca ganle xtsiin Dios quiayun naa, dib zdo naa quiaseed naa miech Diidz Ndzon ne nac zhiwseed Xpëed me.

Nu ne laa naa rsilo rne lo to, gloque rded naa xquizh lo Dios ni lo Jesús por mine quiayun to grëse to, sac gon tel pa lotaa zëeb diidz ne nliipaa dib zdo to riladz to me. Me zobwi, me nan ganle zeene rnabtaa naa lo me, ib rianladz naa to, tibaque rnab naa lo me gacnen me to;

¹⁰ ni tibaque rnab naa telne zneedz me diidz gdziñ tib dze ne grieelo guial naa i guialgan naa to.

¹¹ Ne nliipaa rquiabladz naa ganlo naa to, guialzhaal naa gnedz naa rson lo to guien to zha ycaaniaraa to guielbiini ne rneedz Espiritu Sant; zeena tiblrique gac guic to dziitsraa so to.

¹² Ni scagaa tipse gac ne ziodiidz ne zha nac Xtiidz Ndzon Dios, mine riladz ne; zeena tipse gac ne sodziits ne low.

¹³ Bets, bzian, tel gan to ganle blactaa vuelt ziyacladz naa guial naa i guialgan naa to, per haxta lo nadze gon rrieelodaque guial naa. Ib laa guic naa no guial naa lo to i, zeena gacndalraa miech ne sëeb gliladz Xtiidz Dios, zigne ziyacndal zho grëraa zaatne ziyateed naa.

¹⁴ Sac ible naa raguial cseed miech Xtiidz Dios, grëse zho niicle zha nona, niicle zha mbana; niicle zha raca, ni niicle grëga zha ne peet rienda.

¹⁵ Mincoxe waa, tibaque laa naa racladz ye nëz qui guial naa guialne naa Xtiidz Ndzon Dios lo to, ne nac to zha ne no guiedz Roma i.

Poder ne rap Xtiidz Ndzon Dios

¹⁶ Tel naa, ib rtoladz naa gne naa Diidz Ndzon rii lo miech, sac ncuaan ro ne run Dios zeene rquiaadiag miecha. ¡Grëse miech ne gliladza, ib zlaa zho lo xtoi zho! Laa guielnaac co no niina par grëse miech. Glose lo zha Israel bdzina, laa niina laaw quiadziñ lo grëraa miech, zeena grëse zho gbig sëeb xnëz Dios.

17 Sac gon, lëe Diidz Ndzon rii rlu zha rbiire rcaania Dios miech, rsanmbe me zho lo dol rbiire riaanwen zho lo me: totsaque nli dib zdoo zho gliladz zho mine nac Xtiidz me. Sca zhobnee lo Xtiidz me, zaatne rnee: "Zha ne biaanwenle lo Dios, ib zrieelo gbannie zho me, sacne dib zdoo zho rililadz zho mine nac Xtiidz me."

Xtol miech

18 Ndionle ne ganle no guielnë ro ne csiaab Dios yгаа grëse miech ntseeb, miech ne nëd gac-wen, ni desde gbaa cxeel me guielnë ne yгаа zho; sac por xquielntseeb zho rsaannd zho gacnan grëraa miech mine nac diidzli.

19 Grë zha ntseeb, nanle zho zha nac Dios, sac mezhallu lo miech zha grieelel gunbey zho me.

20 Niicle ne grieelel ganlo ne Dios, per de lo grëtaa ncuaaane bzaa me, grëtaa ncuaaane run me, gase rlu ganle cho nac me. ¡Gase rlu ne nli me nac Dios, ni gdzind dze ne lozh xpoder me!

Gacxe waa grë zha ntseeb, ib tedlaad zho lo guielnë ne csiaab me ga;

21 sac gon niicle nanpaa zho me nac Dios, ni ib rond zho xtiidz me. Nëd zho gunbey zho me zigne rieguiala, niicle xquizh nannd zho gdeed zho lo me. Laa ne rzac zho na rien zho pe run zho, lel pcow xquielrien zho; rzac zho na lëew ga, gun zho ncuaaane guiaabtaa guic zho.

22 Niicle ne rzac zho zharieñ zharac nac zho, per zha nac miech ne quialoozhraa lo xquieln xen;

23 sac gon laa ne gunbey zho guielndzon ne rap men ne nacpaa Dios nguiamban, lel rsilo zho rzaa zho grë mdio ne niaa zigne rlu samiech guidzliu zho, grë mdio ne niaa zigne rlu grë ma ne rsiibe, grë ma ne rzë tap ni, grë ma ne rzëlen lo liu; lel grë ncuaaan co ziegan zho laa ne gleynie zho men ne nacpaa Dios.

24 Mincoxe nagon waa, rsaanladz Dios zho laa zho zienal grë ncuaaane ndzinlid ne rzoobladztaa zho. Grë ncuaaane ntoladzdox ne run zho, lëëque zha runnguzee zho rguitnie zho xcuerp zho.

25 Sac laa ne gleynie zho diidzli mine rnabey Dios, lel mine rnee zha ne rquidie rleynie zho; lel grë ncuaaane bzaale Dios, ncuaaane psanle me, ncuaaan co ziegan zho, lo grë ncuaaan co ziequitsgzhìb zho; laa ne yquitsgzhìb zho, gleynie zho men ne nac Dios mban, men ndzon ne psan grëtaa ncuaaane no. ¡Diosse rieguial gunnon miech, men co rieguial tibaque goolnie zho! Sca rieguiala.

26 Ne sca nagon nac zho, gane psaan Dios zho laa zho run grë guielyozh, ncuaaane ngubeeguelto ne rieguialdraa gun miech. Grë wnaa laa ne gdeed zho diidz gnee tsiel zho lo zho, lel lëëque sawnaa zho rquiangob zho, laa zho zienal grëraa guielyozh;

27 grëgaa mgui, laa ne gnee zho lo wnaa ne nac tsiel zho zigne biaan no gaca, lel lëëque sabgui zho rzoobladz zho. Ncuaaane mbixladz run zho, rquiangob zho lëëque sabgui zho; ni ne sca run zho grë ncuaaan co, lëë mine rdziniaa zho nac grë guielguidz yozh ne riaan lad zho; ndzinlidraa rac zho.

28 Scataale nac zho, ni bii rzoliaadz zho gbig zho lo Dios, gane niicle megaa rlozh rsaanladz me zho, laa zho biaan lo grë zhgab yozh ne no guic zho, no zdoo zho, min co ne scataa nac zho.

29 Nroobdoo nac xtol zho, sac:
rsacsixuu zho samiech zho,
rzoobladz zho ncuaaane quianied zho,
racntseeb zho lo samiech zho,
në rac zdoo zho ran zho stib noded samiech zho,
rut zho samiech zho,

rtsidil zho samiech zho,
 rquidie zho samiech zho,
 rquiadiidzguizh zho samiech zho,
 miech yozh nac zho,
³⁰ rneenë zho samiech zho,
 rquiabro zho lo samiech zho,
 racniats zho lo samiech zho,
 rlu zho ncuaañe rapd zho, ncuaañe nacd zho;
 rlëenie zho Dios,
 rio zho rbeebey zho grë guielntseeb,
 rond zho xtiidz pxoz zho,
 rond zho xtiidz xniaa zho,
³¹ racladzd zho gon zho diidz,
 rund zho miñe rnee zho,
 rleynied zho samiech zho,
 rund zho samiech zho perdon,
 rquiad zdoo zho samiech zho.
³² Niicle ne nanpaa zho zha rnabey Dios none gban miech, niicle ne nanpaa zho grëse zha ne run guielntseeb, ib tedsod znitlo zho; ni laa zho bii quiayuna, ni haxta rley zho ran zho cho grëraa zha ne run grë miñe run zho.

2

Xquielwxtis Dios

¹ Ib tedsod no to gnë: “iZha ntseebtaa miech ne sca run!” iPer gni naa lo to ganle, zigtaa zhaw, zigtaa tow, lalga ntseeb to grë to! Sac ye to gon run grë guielntseeb co, gacxe waa, zha ne rzac riegual zha co ygaa zho guielne ne csiaab Dios, ye zho riegual min co.

² Ndion ne ganle Diossi zeene laa me gun guielwxtis, grëse zha ne sca ziana guielntseeb, ib tedsod zunquizh me zhow.

³ Zha ne sca rlozh gzee zdoo pe quiayun stib zho, haxta rlisqui zho miñe quiayun zha co, ni yeque zho quiayuna; masaque nan zho nagon zdedlaa zho zeene laa Dios guidaadgun xquielwxtis me, masaque nan zho zha cose nitlo, laa zho tedlaa.

⁴ None guien zho ganle pa lotaa nquialadz Dios zho, pa lotaa noyap me zho paciens noxecw me grëtaa ncuaañe run zho; sac laa me quiambëz csaan zho xquielntseeb zho, yguudz zdoo zho gban zho zigne rnabey me.

⁵ Telne tibaque squi ndip gac zdoo zho, gond zho miñe rnabey me; gacnan zho ganle, quiayunlora zho grë guielnedox ne ygaa zho gal dze ne laa me gun guielwxtis. Ni xquielwxtissi me, zigne riegual gaca sca gun mew.

⁶ Gal dze co, laa me gdeed miñe riegual ygaa tib tib miech tel zha wban zho.

⁷ Grëse zha ne güeynal beennon zho lë me, pxobnen zho xquielndzon me, güeynal d zho grë ncuaañe rnitlo, lo zha co gdeed me tib guielmban ne gdzind dze lozh.

⁸ Sangue grë zha ne güeynal loxaque grë zhixco zho, güeynal zho grë guielntseeb, laa ne nienal zho miñe nac diidzli; zha co ygaa grëse zhian ne csiaab me.

⁹ Ga nagon, grëse zha ne run guielntseeb, zigtaa zha Israela, zigtagaa zha stib guiedza, ible zgaa zho tib guielnedox;

¹⁰ sangue grë zha ne rban zaacse, zigtaa zha Israela, zigtagaa zha stib guiedza, ible zgaa zho lo xquielndzon me, zunnon me zho. Ni led yedraa ga pe zhgab ctseb zho.

11-15 Grëse zha ne gunc̄tal xtol̄, tel̄ chotaa nac zho zun̄quizh Dios zhow; sac tel̄ me, led yed me cue. Zig nac grë zha ne been̄beyd xley me, zun̄quizh me zho grë xtol̄ zho; sac niicle ne gocnand̄paa zho zha naca, per len̄ zdoo zho, guic̄ zho, nan̄paa zho pa min̄ nac guiēlntseeb, pa mingaa nac guiēlwen. Rrieequiacxe waa run̄beyle zho xley Dios ga. Scauegaa zha Israela, ne nac zho zha ne run̄beypaa xley Dios, zun̄quizhaque me zho grë xtol̄ zho; sac niicle ne run̄beypaa zho xley me, per tel̄ lozh ga mband̄ zhow. Nan̄paa zho pa min̄ wen, ni tel̄ lozh ga rond zho diidz gun̄ zhow; sac gon̄, led-xe por ne gacnand̄se ne ley waa laa Dios ycaaniale ne, sinque none gban new.

16 Zdzin̄ tib dze, zeene laa Dios cxeel̄ Jesús, gun̄quizh me miech grëse dol̄ ne been̄ zho tib tib zho, niicle min̄e mazdraa rzac zho ngeets zhlian̄ been̄ zho; sac sca rnabey Dios gaca, ni min̄ co noseed naa miech.

Zha Israel ni xley Moisés

17 To ne nac to zha Israel, rzac to zienal̄paa to xley Moisés, niats rac to, rzac to tose non lo Dios.

18 Nan̄wen to zha racladz Dios gban to, nan̄paa to pa min̄ wen sac pseed to xley me.

19 Min̄ co masaque rzac to to cseed zha ne no lo ncow, grë zha ngoopdol̄.

20 Masaque rzac to to rien̄raa zha cseed to grë zha ne peet gacd, to rien̄raa zha quixbīni to grë zha ne peet rien̄d; sac rzac to ne nan̄ to ley, tose nac zha ne ndziibraa nixbīni, tose nan̄ min̄e nacpaa diidzli.

21 Nana, tel̄ scataa rien̄ to zha cseed to stib miech, ¿pe nac dzigo rwide to min̄e run̄ to?

Conque to name rnee lo miech cuand̄ zho, ni rlozh ga toque quiaban.

22 Rseed to miech rnee to, tib zha ne nole tsieel̄, nodne yquiangob zho stib zha ne led tsieeld̄ zho; ni rlozh ga toque noyun̄ min̄ co. Rnee to, rdziguiende to grë mdio, ni rio to riebãn to yadoo ne zob grë mdio co.

23 Rlozhd gacniats to rzac to quiayun̄non to lë Dios ne nan̄ to ley, ni nan̄de to gon̄, lel̄ quiaguitnie to lë me ga, sac mbande to zigne nac ley.

24 Min̄e noyun̄paa to i ga gon̄ raquiet lo Xtiidz Dios, zaatne rnee: “Por xtol̄ to, grë zha zit laa zho rneenë Dios.”

25 Tel̄ to, rzac to porne nacse to zha Israel non to lo Dios, per ne squi mbande to zigne nac xley me, nacaque to zigne nac grë zha zit ne run̄beyda.

26 Nana, zha zit ne rioxco rban zigne nac xley me, ¿niacxe rieguiald̄ dzigo guian̄nziuu zho lo Dios? San̄nziuu me zho gon̄.

27 Gol̄gacnañ sca gan̄le, glole zha zit co gon̄ guian̄nziuu lo Dios, lëdle to ne nan̄paa to zha racladz Dios gban to, nan̄paa to min̄e psañ̄ Dios diidz yгаа to, ni rbande to zigne rnabey me.

28 Gol̄gacnañ sca gan̄le, led porne nacdse to zhin zha Israel, porne bio to xbey zho, laa to nziuu le lo Dios.

29 Led scada gon̄, sinque zha ne nli dib zdoo rioxco min̄e rnabey Dios, zha co nziuu lo me. Sac tel̄ Dios, rwidaxe me waa dien̄ cho pe bey ne no, sinque laa me rcaania zha ne nlipaa dib zdoo, dib guic̄, rban zigne racladz me. Grëse zha ne znu nac, nziuu zho lo Dios, niicle tel̄ne rzac to peet nond̄ zho.

3

1 Nana, ¿pa lugar nadien̄ ne riaannon zha Israel lo grëraa zha stib guiedz? ¿Pa rquin̄ ne scataa rio zho bey? Zootle lëë lalaquew tel̄ niaca min̄e niacd̄ zho zha Israel.

2 Per led scada, no pe nacne non zho. Sac gon̄, ible lo zho psañ̄ Dios xtiidz me mazd pãdzeela.

³ Nli ndal zho rond xtiidz me, per led miñcod ctsëë me xtiidz me, miñe bneele me lo zho.

⁴ Niicxe tel zharaa quiayunctal miech xtol zho, sangue Dios ctsëëd me xtiidz me. Zigne zhubneeqe lo Xtiidz me, zaatne rnee: “Miñe rnee Dios, diidzli naca; niicle zha ne gacladz, guiend pe ncuaañe glisqui zho lo me.”

⁵ Sca nac Dios, gacxe waa rnee me grëse zha ne runctal xtol, rieguial ygaa zho guielñe ne cxeel me. Ga nagon, rlu ne miñe nac diidzli, miñ co run me. Nana, ÷pe ziab ne nonguield miñe run me ga?

⁶ Miñe nonguiel ga gon run me, sac tel gdziguien me grë zha ne runctal xtol, ÷zha naczhe guielwxtis ne dzigo gun me?

⁷ Nana, nogaa zho gnë, ÷per pe nacne glisqui Dios dol ne rdziuun ne, ni tel por lëew rlu ne diidzli nac miñe run me?

⁸ Per telne sca naca, rriequia dzigo ib none gunctal ne xtol ne parne yquiaraa zdoo me ne. Ni nzian zha ne nobee xquieto naa, rnee zho ib miñ co noseed naa miech. Ni zha ne sca rnee, ib tedlaad zho lo guielñedox ne rieguial zho.

Grëse miech, ngoopdol nac zho

⁹ Nana, ÷pe zdzieets ne dzigo ne nac ne zha Israel, nziuuraa ne lo grëraa miech stib guiedz? ÷Led scada gon! Niina blozh bzeet naa lo to, grëse ne ngoopdol nac ne, zigtaa zha Israela, zigtagaa zha stib guiedza.

¹⁰ Zigne zhubneeqe lo Xtiidz Dios, zaatne rnee:

÷Guiend miech ne ziana paa miñe racladz Dios!

÷Ni tib zho guiend!

¹¹ Guiend zha ne niini guic;

guiend zha ne tsoxco yguib xnëz Dios.

¹² Grëse zho laa zho zie nëz ne nitlo zho; niapse guielntseeb ziana zho.

÷Guiend zha ne ziana miñe racladz Dios!

÷Ni tib zho guiend!

¹³ Ro zhow,

masaque been cuent naca zig nac len grë baa ne noyodz ngutoo;

niapse diidz ne rquidie zho zhoob lo ludz zho.

Grë diidz ne rnee zho,

masaque naca zig nac xvenen grë meel dox;

¹⁴ niapse grë diidz dox, niapse grë diidznë rrieche ro zho.

¹⁵ Ni zhow,

masaque zombëzlew dien pa tsiegut zho samiech zho;

¹⁶ loxaque guielñe, loxaque guielzi rsañ zho zaatne rded zho.

¹⁷ Ib nañd zho ne zaacse gbannie zho samiech zho;

¹⁸ per ni Dios rdziebdraa zho.

¹⁹ Gacxe waa nroob nac guielñedox ne ygaa grë zha ne runbey ley ni mband zho zigne naca, lel run zho grëtaa guielntseeb zig nac grë miñe goquiet nu. Ni niicle grëraa miech ne runbeyd ley, scaque ngoopdol nac zho, ni ro zho guiend pe guiab zho lo Dios.

²⁰ Golgan sca ganle, grieelod guiaanmbe ne lo Dios, niicle paraa yquia ne gun ne miñe rnee ley; sinque par guien ne ganle ne ngoopdol nac ne, gane biaan ley.

Silaa Dios miech zeene gnalo zho me

²¹ Sangue niina, tib ladle biaan ley, laa Dios bneedz stib mod ne guiaanwen ne lo me. Ni lo grëque guits ne ziaad ley, lo grë guits ne pquiaa zha ne biadteed Xtiidz Dios padzeela, ga raquieta.

²² Grëse miech tel chotaa nac zho, tel petaa been zho, ib ziaanwen zho lo Dios totsaque dib zdoo zho gnalo zho Jesús, dib zdoo zho gliladz zho me. Zha ne gliladztaa me, sac led yed Dios rbe.

²³ Zigne rne naa ga, grëse ne miech ngoopdol nac ne lo Dios, ni palal rdzieeld gdziñ ne lo xquielndzon me.

²⁴ Per niina laa me blu ganle pa lotaa noxco me ne, gola zdoo me pxeel me Jesús bdiizh grëse xtol ne, laa ne biaanwen lo me.

²⁵ Laa me been min co parne glu run me guielwxtis, sac niicle bdizhd ne xtol ne, per pxeel me tib men ne bzhiee xchen bdiizha xcuent ne, lëe men co nac Jesús; gane niina grëse zha ne gnalo men co, zun me zho perdon grëtaa dol ne pxcw me been zho.

²⁶ Ni tib dol rapd me, ni scaque grë zha ne dib zdoo gnalo Jesús, sanmbe me zho lo xtol zho.

²⁷ Sca nagon psilaa Dios ne lo dol. ¿Cho nadien gacniats ga? Ni tib choot gacd gacniats, sac led por miñe bdziuund new, sinque por grëtaa miñe bded Jesúsaa.

²⁸ Gocndion ne sca ganle: Niapse por dib zdoo miech gliladz zho Jesús, laa Dios ycaania zho; nacda por tso zho gun zho miñe rnabey ley.

²⁹ Nana, ¿pe zha Israelse sca ycaania me? ¡Lëda gon! Grëse miech, sca ycaania me zho.

³⁰ Sac gon tibeyse ran Dios ne grëse ne; zigtaa zha Israela, zigtagaa zha stib guiedza, sanmbe me ne lo grë xtol ne, totsaque dib zdoo ne gnalo ne Jesús.

³¹ Nana, ne znu rcaania Dios ne, no zho sac rquiindraa ley. ¿Zha yquiindzhew? Niinale ne znu dib zdoo ne rliladz ne Jesús, rienraa ne pa rquiina.

4

Dib zdoo Abraham bnalo me Dios

¹ Zig nac pxozgoldoo ne Abraham, ¿pe been me ne laa Dios pcaania me?

² ¿Pe por guielwen ne been mew? ¡Lëda! Telne scaw, nrieelo niacniats me (niicle ne nêz lo Dios ni palal rieguiald niacniats me).

³ Sac gon rnee lo Xtiidz Dios, ne dib zdoo me bliladz me Dios gane pcaania Dios me zig tib zha ne peet xtol.

⁴ Zig nac tib zha ne run dziin, dimi ne razh zho ible rieguial zhow, rate zhow ga.

⁵ Sangue Dios zdoo me ral rcaania me miech, zha ne dib zdoo rnalo me, nacda por pe guielwen ne gun zho par guiab ne laa zho rieguiala.

⁶ Ye rey David bzeet guielbley ro ne rgaa zha ne sca rcaania Dios,

⁷ rëb David:

¡Wen zie zha ne run Dios perdon!

Niicle nroob guielntseeb ne been zho;

tel pe nactaa xtol zho, glisquidraa mew.

⁸ ¡Wen zie zho sac gunquizhdraa me zho grë xtol zho!

⁹ Nana, ¿pe loxaque grë zha ne nose bey zrieelo yгаа guielbley co, te ye grë zha ne noda ye? Nacda por bey, laa ne blozh bzeet ganle niapse ne dib zdoo Abraham bnalo me Dios, min co ne pcaania Dios me zig tib zha ne peet xtol;

¹⁰ sac gon gard pe bey ne tso me zeene pcaania Dios me.

¹¹ Pcaaniale Dios me dzigoraa bio me bey. Lega laa me biose bey co, zeena glu ne laa Dios pcaaniale me porne dib zdoo me bnalo me Dios. Mincocxe waa, Abraham nac dad lo grëse zha ne nod bey, ni dib zdoo zho rnalo zho Dios; ni scagaa Dios, rcaania me zho zig tib zha ne peet xtol.

¹² Ni meque nac dad lo grë zha ne no bey ni dib zdoo zho rnalo zho Dios, zigne bnalo me Dios zeene gard tso me bey co.

Zha goc miñe bnee Dios lo Abraham

¹³ Psañle Dios diidz lo Abraham ne me guiaannie guidzliu, grë me zha ne grieequiaraa lo xtii me; guiabd ne togo porne been me miñe nac xley zha Israela, sinque ne dib zdoo me bnalo me Dios.

¹⁴ Nana, tel niaca zha ne gunse miñe nac ley, zha cose ygaa min co, rrieequia dzigo zhlëse ga bnalo Abraham Dios, niicle diidz ne psañ Dios lo me ga, nondaqew.

¹⁵ Sac nac ley gon, zha ne gunda zigne naca, laa Dios csiaabzi zho; laa zaatne guiendgaa ley, gacd guiab zho cho noguiitsa.

¹⁶ Ne scacxe waa nac ley, gane niina lëese miñe no gun ne nac dib zdoo ne gnalo ne Dios par ygaa ne miñe psañle me diidz ga. Grëse ne ygaa min co, per nacdraaw dien cho zienañ ley, cho zienañdgaaw, sac miñe nonraa, dib zdoo ne gnalo ne Dios zigne bnalo Abraham me. Miñcocxe waa, rrieequia Abraham nac pxoz ne grëse ne,

¹⁷ zigne rëb Dios lo Abraham: “Laa naa bzo luu, luu gac dad lo nzian dii miech.” ¡Lëe Dios co nagon bliladz Abraham, me rbeeban grë mengut, ni niicle haxta grë ncuaañe guiend, saa mew!

¹⁸ Ndaldox rëb Dios gac lo xtii Abraham, ni bliladz Abraham miñe rëb Dios ga. Niicle ne zootle led ncuaañe gacda, per me dib zdoo me bliladz me ne zaca, ni scagaa bdziñ dze ne laaw goc.

¹⁹ Tibaque bnalo me Dios, niicle ne lala ziele xtse me (zig tib gayoole iz me), ni lala tsiel me Sar, nacd me wnaa ne gap mëed.

²⁰ Ib goc chopd guic me niab me bod nlid niac miñe bnee Dios ga, sinque dzigole dib zdooraa me bnalo me Dios; haxta rdeed me xquizh lo Dios,

²¹ sac nanpaa me men nroob nac Dios zun me miñe psañ me diidz ga.

²² Ne sca nagon dib zdoo me rnalo me Dios, gane pcaania Dios me zig tib zha ne peet xtold.

²³ Zhobnee lo Xtii dz Dios sca pcaania me Abraham, ni laaw zhobnee zeena gacndion ne

²⁴ ye ne scaania me ne zig tib zha ne peet xtold, totsaque dib zdoo ne gnalo ne Jesús, men ndzon ne rnabey ne;

²⁵ men ne gut ga bdiizh me xtold ne, men ne brieaban ga, par glu me nli psanmbe me ne nëz lo Dios.

5

Jesús rsanmbe miech lo dol

¹ Nasi laa ne nacle zig zha ne peet xtold, laa ne biaanwenle lo Dios porne dib zdoo ne rnalo ne Jesús, men ndzon ne rnabey ne.

² Sac por grëtaa miñe bded Jesús, laa ne bgaa guieñzaac rii nacie me ne, ni ib csaand ne me. Tib guieñbley nrooba lo ne, sac ndionpaa ne ib zgaa ne lo guieñndzon ne no me.

³ Ni scaquegaa nagon none gley ne zeene pe guieñe ne nodzian ne; sac ndion ne ganle, ga cseed ne lëb ne dziits so ne lo miñe rliladz ne.

⁴ Ni zeene sca dziits so ne, zlliladzraa ne dib zdoo ne; ni zeene dib zdoo ne rliladz ne, zacnanpaa ne ib zgaa ne miñe rliladz ne.

⁵ Ni ndionpaa ne zgaa new, sac blu Dios rleynie me ne, pxeel me Espíritu Sant nacie ne.

⁶ Lëëtaaque zeene rdzieldraa miech zha guñ zho par guiaanmbe zho lo dol, hor co laa Dios pxeel Jesús, baaad me gut me bdiizh me xtol ne nac ne miech ngoopdol.

⁷ Ndion ne ganle, niicle tib miech ne peet xtolda, tib miech ne mazdraa wena, led lega grieequiad tib zha ne cueeladz xquielmban guet por zha.

⁸ Sañgue Dios gon, niicle ne miech ngoopdol nac ne, blu me ganle pa lotaa nqialadz me ne, pxeel me Xpëed me Jesús, men co bleeladz xquielmban gut me xcuent ne.

⁹⁻¹⁰ Gotsaa gwi ne ganle, zha nactaa guielnë ne bded Jesús psanmbe me ne lo xtol ne, psanwen me ne lo Dios; ni scaque nagon, ible me csilaa ne lo grëtaa guielnëdox ne csiaab Dios ygaa grë miech ntseeb. Ne nligaa, csaand me dzian ne guielnë co; sac gon, tel scataa mine been me por ne zeene nac ne tib miech ngoopdol, zeene scataa ntseeb goc ne blëenie ne Dios, çpe lel na dzigo ne laa ne biaanwenle lo Dios, laa ne biaanle zig tib zha ne peet xtold?

¹¹ Gacxe waa, niina ne psanwen Jesús ne lo Dios, none ine gley ne ne laa ne ngable lo Dios.

Zha nacne biaan dol

¹² Znu gon nacne laa dol biaan: por mine been Adán bind me xtiidz Dios, min co nac ne biana. Ni por lëew pquiaqui laa guielgut biaanaque, blodz ga grëse miech laa zho ret, sac grëse zho, tsod zha ne guntald xtol.

¹³ Desde hor co biaan runctal miech xtol zho. Grëse miech ne bre lo guidzliu, desde Adán haxta len dze ne laa Moisés pcaania ley, beenctal zho xtol zho, niicle ne guienpaa tib ley hor co nlu ne dola.

¹⁴ Gacxe waa ye zho, grëse zho gut; niicle ne bdiitsd zho merpaa xtiidz Dios zigne been Adán.

¹⁵ Nli tib guielnë ga psan Adán, per niinagaa mazdraa nroob guielnzaac ne rneedz Dios lo ne. Por falt ne been Adán, biaan grëse ne ne nac ne miech laa ne no guet; per niina ne baaad stib men ne beend ni tib falt, por min co laa Dios rquia zdoo ne grëse ne, laa me rneedz tib guielmban ndzon lo ne; lëe men co nac Jesús.

¹⁶ Tibaque nac dol co been Adán, per grëse miech biabzi; sañgue Jesús zeene laa me baaad, grëse ne ne nac ne miech psilaa me ne lo grëtaa xtol ne, psanwen me ne lo Dios.

¹⁷ Dol ne beense Adán ga, min co pquiaqui grëse ne ne nac ne miech, laa ne biaan ladznia guielgut; sañgue niina ne baaad Jesús, zrielo ygaa ne tib guielmban ndzon. Guielmban ne ral zdoo Dios gdeed me lo grëse zha ne gbig lo me guñ me zho perdon.

¹⁸ Sca nagon naca: por falt ne been Adán ga, grëse ne ne nac ne miech laa ne biabzi, per zeene laa Jesús baaad, pquia zdoo me ne masaque me bdiizh grëse caxtigw ne riogual ne ga, laa me psanwen ne lo Dios parne grieeo ygaa ne tib guielmban ndzon.

¹⁹ Golgan ganle, porne bdiits Adán xtiidz Dios, grëse ne ne nac miech laa ne goc zha ngoopdol; per scagaa, por bzoob Jesús grëse xtiidz Dios, zha ne gacladzttaa, zrielo guiaanwen zho lo me.

²⁰ Ible laa ley biaan, par glu ganle pa lotaa nac grë falt ne noyun miech lo Dios. Per niicle scataa nac grë dol co, per blu Dios ganle mazdraa rquia zdoo me miech.

²¹ Masaque bnabey dol miech, pxeela zho nëz ne nitlo zho; sañgue zeene laa Jesús baaad, psanwen me ne lo Dios, gane niina zha ne gnalotaa Jesús zgaa zho tib guielmban ndzon.

6

Zha ne mbanniele Jesús

¹ Laa ne bdzianle ganle zha noxcotaa Dios ne. Nana, ¿pe zdieets ne dzuunctalraa ne xtol ne zeena tsoxcoraa me ne?

² ¡Lëdraaw ga gon! Nodraa ne dzuuun ne dol, sac gon, laa ne nacle niina zig tib zha ne gutle nëz lo dol.

³ Golgan ganle, zeene laa ne bziaab xnëz Jesús ni brobnis ne, rrieequia gut ne ga zigne gut me.

⁴ Zeene brobnis ne rrieequia bioliu ne ga, zigne bioliu Jesús. Ni zigne brieegan Jesús (por poder ndzon ne rap Dios), scaque ne rrieequia brieegan ne, stible guielmban ne rdziaap ne.

⁵ Ni zigne sca rrieequia gut ne zeene gut Jesús, scaquegaa ndionpaa ne zbeegan me ne zigne brieegan me.

⁶ Ndion ne ganle, miech ne goc ne glo zeene scataa bional ne guielntseeb, rrieequia ye miech co pquianie me lo cruz. Ga bnitlo mine goc ne ga, zeena ygadoodraa ne lo dol;

⁷ sac gon, deque bnitlo grë mine goc ne glo, grieelodraa gnabey dol ne.

⁸ Nana, telne scale gutnie ne Jesús, ndionpaa ne ib zbannie ne me.

⁹ Ndion ne ganle brieegan Jesús, ni gdziandraa dze guet me. Grieelodraa pe gun guielgut me.

¹⁰ Tibaque vuelte gut me bdiizh me xtol grëse miech, sangue niina mban me ni Dios mbannie me.

¹¹ Scagaa to nasca, golguien ganle laa to gutle lo dol, nodraa gnabey dol to stib, sinque laa to mbanle niina par gun to mine rnabey Dios. Golguien ganle, Jesúsle nacie to.

¹² Nana sca, gdeetraa to diidz gnabey dol xcuerp ben to i, tso to gun to grë ncuane ndzinlid ne racladz xcuerp to.

¹³ Ib gdeete to diidz guiab to lo dol stib, gun to grë guielntseeb; sinque golsan to ladznia Dios, ine golgun grë mine racladz me. Golguien ganle, laa to gutle lo grë dol, Diosle mbannie to niina;

¹⁴ zeena scagaa gnabeydraa dol lo to, zigne beena to zeene scataa bioxco to mine rnabey ley. Sac gon rnabeydraa ley to niina, laa Dios blule ganle pa lotaa nquialadz me to biaadsilaa me to.

Nli nquialadz Dios ne, rnabeydraa ley ne.

¹⁵ Per nana, ¿pe ne rnabeydraa ley ne, pe ne nquialadz Dios ne zdieets ne dzuuun ne grëtaa ncuane guncetal xtol ne? ¡Lëda ga gon!

¹⁶ Nanle to ganle, tib zha ne nanle cho lo yquia zho dziin, lo zha co ngadoo zho ni mine rnee zha co none gun zho. Zig nac zha ne ngadoo lo dol, niapse dol run zho ni mine tsieguial zho laa zho nitlo; sangue zha ne run mine rnabey Dios, scaania Dios zho zig tib zha ne peet xtol.

¹⁷ Nli glo lo dol ngadoo to, per xquizh Dios zeene laa zho biadseed to Xtiidz me gocnan to zha laa to lo dol, laa to bliladza ni noxco to mban tow niina.

¹⁸ Ni zeene laa to brie ladznia dol, laa to bgab lo Dios; zeena mine rnabeyle me mincole gun to.

¹⁹ Znu bzet naa grë min rii lo to, zeena guien to zha naca.

Nana sca, zigne scataa bio to ladznia dol been to grëtaa guielyozh, grëtaa guielntseeb, scagaa niina golsan to ladznia Dios, golban zigne rnabey me, zeena lozh guiaanme to zigne racladz me.

²⁰ Zeene scataa ngadoo to lo dol, ib wbande to zigne rnabey me.

²¹ ¿Pe nadien needz dol lo to? Lëë gdib mine ngaa to laa to nitlo. Zig nac niina, haxta rtoladz to zeene rsoladz to grë ncuane been to hor co.

22 Sangue niina, ne laa to brielee ladznia dol laa to ngab lo Dios, ible ziaanmbe to zigne racladz me ni zгаа to tib guielmban ne gdziind dze lozh.

23 Sac gon, zha ne runctal xtol, lëë gdib mine tsieguial zho laa zho nitlo; sangue zha ne gbig lo Jesús, mine ral zdoos Dios ygad me lo zho nac tib guielmban ne gdziindraa dze lozh.

7

1 Bets, bzian, to ne nac to zha ne runbey Xley Dios, nanwen to ganle, zeene zombanse miech dzigo rrieelo rnabey ley co zho.

2 Zig nac tib mgui ne rtsieelnia, rnabey ley ne mguise gbannie wnaa ne nac tsiel mgui. Per tel zgoob ne glo mgui guet, dzigo gacdraa gnabey ley ne mguipaa gbannie wnaa co; telne gacladz zho ctsieelnia zho stib mgui, zaca.

3 Nli nonguielda ga gun wnaa ctsieelnia zho stib mgui laga bii zomban tsiel zho; laa zeene gutle tsiel zho, led doldraaw yguib zho stib zha ne ctsieelnia zho.

4 Bets, bzian, scadaa nagon bzhaac to. Zeene sca gut Jesús, rrieequia ye to gut ga gane niina ngadoodraa to lo ley, niicle lëëgaaw grielod gnabeya to. Jesús, men ne brieegan ga, mele nac tsiel cub to niina. Niinasi, zrieelole gban to zigne racladz Dios;

5 sac glo (zeene scataa bdziuunctal ne xtol ne, bdziuun ne grëtaa ncuaañe nonguieldraa niicle ne ndionpaa ne pe nac mine zhobnee lo ley no dziuun ne), niapse grë ncuaañe nxeel ne zaatne nitlo ne, ncuaañ co bdziuun ne.

6 Blactaa bgadoo ne lo ley, sangue niina rrieequia gutle ne nëz lo ley, laa ne mbanle zigne rnabey Espiritu Sant.

Rca dol gac mine rnabey ley

7 Nana, ¿pe dzdieets ne dzigo por leypaa rdziuunctal ne xtol ne? ¡Coo, led scada! Tel naa gon, ib niacnand naa pe nac dol telne guiend ley. Niacnand naa ne dol ga zgoobladz ne chen ben, telne niacnand naa ne rnee lo ley: "Gzoobladz luu chen ben."

8 Zeene gocnan naa zha nac ley, dzigora a bien naa niapse dol nac mine noyun naa; sac zeene guiend ley, rlud pe nac dol.

9 Glo zeene riend naa zhapaa nac ley, tibaque rzaac naa ib peet dol rapd naa; per zeene gocnan naa zha nac ley, bien naa ne ib raguial naa nitlo naa, sac dol quiayun naa.

10 Nli laa ley biaan zeena guien ne zha grielo yгаа ne guielmban, per lel blu ne raguial naa nitlo naa sac ngoopdol nac naa.

11 Ne nligaa bdziitnie dol naa, mine rsopaa ley diidz nod gun miech mincopaa ben naa; ni blozh ga, lëëque ley blu ne ib raguial naa nitlo naa.

12 Niicle ne scaw, per Dios psana ni rquiin grë mine zhobnee low.

13 Nana dzieets ne: conque telne wen nac ley, ¿zha nac dzigo ne lëëpaaw rlu ne riogual ne guet ne? ¡Coo, led scada! Sinque znu naca: dol pteedquie ne ladznia guielgut. Ga rlu ganle zha nactaa dol, sac gon lëëque ley pquiin dol pteedquiew ne lo guielgut. Ga blu ley ganle zha ntseebtaa nac dol.

14 Gotsaa gwi ne ganle wen ley, led leyd rxin sinque ne rxin; sacne rrieequia ngadoo xcuerp ne lo dol.

15 Tel naa, riend naa pe nacne znu rac naa, niicle ne racladzpa a naa gun naa ncuaañe nonguiel per nëda, lel ncuaañe rzoobladz naa min co run naa.

16 Grë ncuaañe run naa, now rienpaa naa nonguielda; haxta guic naa, zdoos naa, rien naa wen ley sinque naa quiaguits mine rnabeya.

17 Nana, niicle ne rien naa scaw per gacd pe gun naa, sac ngadoo xcuerp naa lo dol, masaque dol rcheep naa run naa ncuaañe ndzinlid.

¹⁸ Rien naa miech ngoopdoḷ nac naa, ni palal ncuaaṅe ndzinli gacḷ gun naa; niicle ne racladz naa gac-wen naa, per rrieeḷoda.

¹⁹ Zeene racladz naa gun naa ncuaaṅe rquuin, per rrieeḷod gun naaw; laa zeene ni naa gundraa naa ncuaaṅe ndzinliḷ, leḷ miṅcḷe ruṅ naa.

²⁰ Ni ne znu leḷ grē ncuaaṅe racladz naa, miṅ co ruṅ naa, gase rlu ne led naadse quiayun grē ncuaaṅ co; sinque doḷ quianabey xcuerp naa ruṅ naaw.

²¹ Rien naa niicle ne racladzpaa naa gun naa ncuaaṅe wen, per leḷ guieḷntseeḷ ruṅ naa.

²² Zdoḷ naa, guic naa, rleynie naa Xley Dios, racladz naa gban naa zigne rnabey me;

²³ per dzigo rtse doḷ lo naa, rrieeḷod gun naa ncuaaṅe nonguiel. Masaque doḷ rnabey xcuerp naa, racladzda gun naa ncuaaṅe rnabey Dios; sac ngadoo xcuerp naa lo doḷ.

²⁴ ;Probsaxe naa, znutaa nac xcuerp ngoopdoḷ naa nu! ¿Cho samiech ne dien grieeḷo csilaa naa low; sac ncuaaṅe gnitlo naa miṅ co mazdraa rdziladza?

²⁵ ;Xquizh Dios pxeel me Jesús baaḷsilaa me ne lo doḷ!

jJesús nac meṅ ne psilaa naa!

(Znu nagon rzac naa: rien naa nonguiel gun naa miṅe nac Xley Dios, per xcuerp naa leḷ laaw zianaḷ miṅe rnabey doḷ.)

8

None gban miech zigne racladz Espíritu Sant

¹ Laa ne gocndion nasca ganle, zha ne ngab lo Jesús ndziibdoḷdraa zho,

² sac zha ne ngab xnēz me, laa Espíritu Sant psilaale zho lo doḷ, laa me psilaale zho ladzniā guieḷgut, laa me bdeedle tib guieḷmban cub lo zho.

³ Wlaltāa ib brieelod ley nsilaaw ne lo doḷ, gane mazd laa Dios pxeel Xpēēd me baaḷsilaa ne. Brieelod ley, sac grēse miech laa ne tsianaḷ zho miṅe rnabey ley, mazdraa zianaḷ zho ncuaaṅe runctal xtoḷ zho. Gane zeene pxeel Dios Xpēēd me, goc me miech (lēēraasi ni tib doḷ beend me), meṅ co gut bdiizh grēse xtoḷ ne, dzigo ga laa me psilaa ne ladzniā doḷ.

⁴ Gacxe waa, niinasi zrieelo dziuun ne grē miṅe rnabey ley, per none gdeed ne diidz guionaḷ ne miṅe rnabey Espíritu Sant, ni lalnu gdeete ne diidz gac miṅe racladz xcuerp ne nu.

⁵ Grēse zha ne mban zigne racladz xcuerp ngoopdoḷ zho, loxaque grē miṅ co rioxco zho; laa zha ne mban zigne racladz Espíritu Sant, miṅe rnabey Espíritu Sant rioxco zho.

⁶ Zha ne sca rioxco loxaque miṅe racladz xcuerp ngoopdoḷ zho, nēz ne nitlo zho ga zie zho; sangue zha ne rioxco miṅe racladz Espíritu Sant, laa zho zie nēz ne yгаа zho tib guieḷmban; peet dzeb, peet zhgab ctsebdraa zho.

⁷ Ni stiba, zha ne rioxco loxaque miṅe racladz xcuerp ngoopdoḷ zho, rlēēnie zho Dios ga, sac nēd zho gban zho zigne rnabey xley me; ni niicle gacladzгаа zho, grieeḷod zho.

⁸ Miṅcocxe waa, ib rzacd zdoḷ Dios grē ncuaaṅe ruṅ zho.

⁹ Sangue to, mbandraa to zigne racladz xcuerp to, sinque laa to mban zigne racladz Espíritu Sant. Sca mban to, sac Espíritu Sant nacieṅ to. Nanle to ganle zha ne nacieṅ Espíritu Sant, nliḷ xnēz Jesús no zho.

¹⁰ Ni to ne nac to zha ne nole xnēz Jesús, ible zгаа to tib guieḷmban ndzon, sac laa Dios psilaale to lo doḷ. Nli zig nac xcuerp to, ncuaaṅe nitlo naca, sac por doḷ baaṅ sca no gaca; sangue zhiespírituw, nitloda.

11 Dios bleeban Jesús, ni scagaa telne nli nacie to zhiEspíritu me, meque cueeban to.

12 Bets, bzian, nodne dziuun ne ncuane racladz xcuerp ngoopdol ne, zig nac zeene pe nzëeb ne low.

13 Sac telne grë ncuane co tsienal to, ible znitlo to; sangue telne gnab to gacnien Espiritu Sant to csaan tow, dzigo ible zгаа to tib guielmban.

14 Sac grëse zha ne zienal zigne racladz zhiEspiritu Dios, ga rlu ne nlipaa xpëed Dios nac zho.

15 Golguien ganle, laa Dios bneedz zhiEspiritu me lo to, sac xpëedle me nac to niina. Tsode to sca gdiebd to me, zig nac zeene cho tib ngundziin win nac to lo me. Xpëed me nac ne, gacxe waa zac tibliladz gnee ne lo me guiab ne: "iPapá yeen!"

16 Ni Espiritu coque runquien ne ne nli xpëed me nac ne.

17 Nana ne laa ne nacle xpëed Dios, scagaa dzigo ye ne ible zгаа ne grëtaa ncuane bdeed me lo Jesús.

Nli zгаа ne lo grë guielndzon ne no Jesús ga, per scagaa none dzian ne grë guielné niina ne laa ne ngab lo me.

GuieIndzon ne naraa guiaad

18 GuieInë ne dzian ne lo guidzliu rii, loxaque ne ngab ne lo Jesús, led ncuane rnad ga; mazdraa nroobdoe nac lo guieIndzon ne naraa dzian ne.

19 Zig nac grëtaa ncuane bzaa Dios, masaque quiambëznëw gdziñ dze zeene laa grë zha ne nac xpëed Dios yгаа lo guieIndzon co;

20-21 sac gon, gal dze co laa guidzliu guiaanmbe lo grëtaa ncuane paat rquiind, lo grëtaa guieIntseeb ne no low niina. Dios bdeed diidz biaan grë ncuane co low, per zeene gal dze co, zeene laa grë zha ne nac xpëed Dios laa lo grëtaa guieIntseeb, yew laaw laa.

22 Laga quiambëz grë ncuane co gdziñ dze co, masaque mban raza, rzaca zig rzac tib men wnaa ne quiyal xpëed.

23 Ni ndion ne ganle, haxta ne, ne nac ne zha ne nacie Espiritu Sant (zeena glu ne ible zгаа ne grëtaa ncuane gneedz me), mban rac ne quiambiaaz ne gdziñ dze co, zeene laa Dios ctsëë xcuerp rii ne ni ycaania me ne zig xpëedpaa me.

24 Ndion ne ible zbee Dios ne lo grëtaa ncuane rac lo guidzliu rii, per nana laa ne quiambiaaz dzianpaa ne gaca. Tib ncuane lëë ranle ne noyac, nod pe nacie yquiambëzraa new,

25 per zeene quiambëz ne tib ncuane naraa gac, dzigo nodne guieed ne, sinque ine tiblique gac ne yquiambëz new.

26 Ni scagaa zeene lëbdraa ne, rienndraa ne zha gun ne, Espiritu Sant nac men ne gacnien ne. Zig nac zeene gzodiidznie ne Dios, tel nesew nannd ne zhapaa nonguiel gnee ne lo Dios, dzigo Espiritu Sant runcee ne grë diidz ne riend ne zha nac.

27 Ni Dios ne nac me men ne nanpaa pe rza zdoo miech, rien me pe rnee Espiritu Sant, sac mine racladz Dios gac min co rnab me.

Tsod ncuane yquiaaqui csaanladz Jesús ne

28 Ndion ne ganle, zha ne nli dib zdoo rleynie Dios, zha ne rioxco gac grë mine racladz me, grëse ncuane rded zho, led lega rdete zhow, sinque no zaatne rquiina lo zho.

29 Ni ndion ne ganle, zha ne nanle me ygab xnëz me, desde mazd glow, pso me zho gac zho zig nac Xpëed me Jesús. Lo grë zha ne nac xpëed me, Jesús nac men nroob.

³⁰ Ni grë zha co, laa me quiabedz zho, quiasilaa me zho lo dol, laa zho noyaanwen lo me; zeena yгаа zho lo guielndzon ne no me.

³¹ ¡Zha nactaa ncuaañe lëë run Dios! Nana, tel scataa racnie Dios ne, ¿cho nadien grielo lega pe gun ne?

³² Golgotsaa gwi ne ganle, haxta xpëed me bdeed me gut xcuent ne, grëse ne ne nac ne miech. Nana, ¿pe lel grë pe stib cos dzigo yquia zdoo me gneedz me lo ne?

³³ Ible Dios bzooblo ne, gacxe waa, ¡choot rieguiald glisqui gnë lëda nodzi-uun ne! Sac gon, Dioszhal psanmbe ne lo dol.

³⁴ ¡Choot rieguiald ycaadz dol ne! Sac gon laa Jesús gutle bdiizh me xtol ne; per brieaban me, ni na laa me zob cue Dios zaatne rieguial me nac me men non. Ga no me quianab me lo Dios por ne.

³⁵ ¡Tibaque rleyñie Jesús ne! Zeene nodzian ne guielnë, zeene mban rac ne, zeene rtsidil miech ne, ib guiabd ne togo bod rleyñied me ne. Niicle zeene guiendгаа pe gow ne, guiend pe gacwxab ne, o noxtseebгаа ne guet ne, ib guiabd ne togo psaanladz me ne. ¡Tibaque rleyñie me ne!

³⁶ Ni zig nac xcuent guielgut, laaw raquetaque lo Xtiidz Dios, zaatne rnee: Grëse no ne nac no zha ne ngab lo luu, tibaque noxtseeb no lo guielgut;

masaque rzac miech no zig rzac zho grë mëcwxiil ne golle guet.

³⁷ Niicxe peraa waa dieed ne, zdziuuñ ne gan low ni palal csañwinda ne, sac Jesús nacnie ne; ni rleyñiedox Jesús ne.

³⁸ Nanween naa tsod ncuaañe yquiaaqui csaanladz Dios ne:

per ni guielgut,

per ni guielmban,

per ni anjl,

per ni menodox,

per ni grë ncuaañe noyac niina, grëгаа ncuaañe naraa gaca.

³⁹ Niicle grë ncuaañe no glaa zhan gbaaw, niicle grë ncuaañe no guietraa zhan guidzliuw, niicle grëragaa ncuaañe bzaa Diosa.

¡Ni tiba ycada, sac tibaque rleyñie Dios ne! Ni laaw blule me ganle, zeene pxeel me Jesús (men ne rnabey ne), men ne gut bdiizh grëse xtol ne.

9

Ible Dios bzooblo zha Israel

¹⁻³ Bets, bzian, ¡blactaa racladz naa guien grëraa zha Israel cho nac Jesús! Rquianë zdoo naa zho nac zho menladz naa, tibaque mban rac zdoo naa rsoladz naa zho. Haxta Jesús, haxta Espíritu Sant nan ganle rquiad zdoo naa naa niicle maase gdzibdee miech naa, maase nitlo naa guia naa zaatne gandraa naa Dios, telne niaca por min co laa zho guien zha gbig zho lo Dios.

⁴ Blactaa quiayacñien Dios zho, ni rond zho xtiidz me. Bzooblo me zho gac zho zha ne ygab lo me, haxta bzënie me zho, gon zho ganle men ndzon nac me; biaan zho diidz grë zho me zha mod gunlay me zho. Psan me ley lo zho zeena guien zho zha gban zho, ni psan me diidz lo zho zha gleynie zho me. Nzián grë ncuaañe bnee me gdeed me lo zho.

⁵ Lëë pxozgoldoo zho ga goc Abraham, goc Isaac, goc Jacob, ni lo dii co ga brieequia zha ne bded zig menlidz Jesús. Me nac Dios, me rnabey grëtaa ncuaañe no, ni me rieguial gacnon gzataa dze. Ible sca rieguiala.

⁶ Nana, no zho guiab goxdaque grë minë bnee Dios ga yгаа zha Israel. Per led scada. Sinque lëë min co rgaa zha ne nlipaa rnalo Dios, sac zha co nac zha ne nlipaa nac zha Israel.

⁷ Nacda ne loxaque ziaad zho lo xtii Abraham, laa zho nacle merpaa zha Israel; sac gon, niicle ne nzian mëëd pquianie Abraham, per rëb Dios loxaque Isaac gac cuent zig xpëëd Abraham.

⁸ Gase naganle rlu, zig nac niina, grë zha ne ziaad lo xtii Abraham, led grëd zho ngab lo Dios; sinque zha ne bzooblolë me zigne bzooblo me Isaac, zha co ngab lo me.

⁹ Sac zig nac Isaac, ible Dios bnee lo Abraham grop Sar, ne laa Isaac gac mëëd lo zho.

¹⁰⁻¹¹ Ni scasaque xpëëd Isaac. Bdziñ dze, zeene laa Isaac ptsieelnia wnaa ne lë Rebec, dzigo gop Rebec tibnëz mëëdbgui.

¹² Bii zoney Rebec grop mëdyeen co, laa Dios bzooblolë win ne brieelë Jacob rëb me, ne ible Jacob gac zha non lo Esaú, win ne glo gal.

¹³⁻¹⁵ Laaw zhobneeque lo Xtiidz Dios, zaatne znu rëb me: “Ible Jacob bzooblo naa beenlay naa, bzoblod naa Esaú.” Gard gal grop mëëd co, per ni gard gacnañ win zha nac guieIntseeb, zha nacгаа guieIwen, laa me bzooblolë tib win. Ga nagon, blu Dios ne mese nac men ne rieguial rzooblo tel cho zha ne ygab lo me, nacda por pe ncuaaane noyuñ zho.

Nana, çpe zdzieets ne guieIntseeb ga sca run Dios? ¡Led guieIntseebda! Tib vuelt rëb me lo Moisés: “Zha ne gacladz naa yquia zdoo naa, squia zdoo naa zho.”

¹⁶ Ga nagon, zha ne runlay me, nacda porne zha rquiaguiba, o rioxcogaa zho yгаа zhow; sinque laa zho rgaaw, porne me rquia zdoo zho.

¹⁷ Gotsaa gwi ne ganle zha beendip me zdoo rey Egipt. Lo Xtiidz me zhobnee zeene rëb me lo rey co: “Ible laa naa bzo luu nac luu rey, luu yguib glu naa poder ne rap naa, zeena dib lo guidzliu guien miech ganle naa nac Dios.”

¹⁸ Ga nagon rlu, zha ne gacladz me yquia zdoo me, rquia zdoo me zho; ni scagaa, zha ne gacladz me gunndip me zdoo, runndip me zdoo zho.

¹⁹ Nana, no zho gnë: “Telne scaw, çpe nac dzigo rlisqui Dios minë run miech, tel mezhall rnabey zha nac zho tib tib zho?”

²⁰ Per nana, çcho nac ne par glisqui ne minë run Dios? Zig nac tib guies ben, niacxe zlisquiwi lo men ne bzaaw, guiaba: “çPe nacne znu bzaa luu naa?”

²¹ Led zha ne run dziin co, zrieelo gzaa zho tib guies zigne gacladzttaa zho; tib lë ben ne xen zho, zac gzaa zhow tib guies niow, o gzaagaa zhow tib guies beelze.

²² Scaquegaa nagon rzac Dios miech. Grë zha ne psanle me nitlo, ible rap me derech csiaabzhian me zho, glu me poder ne rap me; per laa me bii quiaayap zho paciens nieeda gdziñ dze co.

²³⁻²⁴ Grëgaa zha ne bzooblo me yгаа lo guieIndzon ne no me, zigtaa new ne nac ne zha Israel, zigtagaa zha stib guiedza; ible rap me derech bzooblo me ne, sac rquia zdoo me ne.

²⁵ Golsoladz ganle zha bzeet Osé, men ne biadteed xtiidz Dios padzeela. Bzeet me ible zbedz Dios grë zha ne nacd zha Israel ygab zho lo me, zeena gleynie me zho niicle ne rleynied me zho glo.

²⁶ Laa stib lugar bzeet Osé, zha bnee Dios lo zho, rëb me: “Ngabde to lo naa, per dzziñ dze ne laa to gac xpëëd naa, ne nac naa Dios nguiamban.”

²⁷ Laa Isá stib men ne biadteed xtiidz Dios padzeela, zeene bzeet me zha Israel rëb me: “Niicle ne ndaldoo nac zha Israel pale yuzh ne ndxie ro nisdoo, per zhis zho gac zha ne ycaania Dios;

²⁸ sac ziaadyoble gun̄ Dios xquielwxtis me lo guidzliu, zigne bneele me.”

²⁹ Min̄ co ga bzeet Isá mazd glo, rëb me: “Tel̄ne niaca miñe yquiad zdoo Dios zha Israel, znitlo me zho grëse zho zigne bnitlo me zha Sodom ni zha Gomorr.”

Zha ne nacd zha Israel laa zho wbig lo Dios

³⁰ Nana guiab ne: ¿Zha nac dzigo ne rcaania Dios zha zit? Laa me rcaania zho niina sac dib zdoo zho rnalo zho me, niicle ne wlaltaa ib bioxcod zho dien̄ zha nsilaa me zho lo dol̄.

³¹ Laa zha Israel, niicle ne rioxcó zho run̄ zho grë miñe rnabey ley parne csilaa me zho, per ib laad zho lo dol̄ sca.

³² Laad zho, sac zienied guic zho gnalo zho Dios, rzac zho por grë ncuaañe gunse zho laa zho laa lo dol̄. Min̄cocxe waa, zeene laa Jesús bíaad, bzhaac zho me zig tib quie ne rriel̄ ni ne riab ne liu.

³³ Lëë min̄ co ga zhobnee lo Xtiidz Dios, zaatne rnee:

Sxel̄ naa tib men̄ lo zha Israel,
me gac zig tib quie ne griel̄ ni zho;
sangue zha ne dib zdoo gnalo me,

tsod dze ne tso zho guiel̄në, guiab zho pe nacne bnalo zho me.

10

¹ Bets, bzian, ne nlipaa rzaac naa tebaa zha laa grëse zha Israel lo dol̄, tibaque rnab naa lo Díos guien̄ zho gbig zho lo me, zeena laa zho lo grë xtol̄ zho.

² Parga nli ran̄ naa noxco zho gbig zho lo me; per rund zho miñe no gun̄ zho.

³ Ib rien̄d zho zdoo Dios ral rsilaa me miech lo dol̄, laa zho rzac por miñe gun̄ zho laa me csilaa zho. Ib nëd zho gun̄ zho miñe racladz Dios.

⁴ Sac gon̄, laa Dios racladz Jesús gnalo zho zeena guiaanmbe zho lo grëse xtol̄ zho; sac Jesússe nac men̄ ne brieelo been̄ grëse miñe rnabey ley.

⁵ Bzeet Moisés rëb me, zha ne gnalo ley ne lëëw csilaa zho, none gun̄ zho grëse miñe rnabeya;

⁶ sangue zha ne gnalo Jesús ne me csilaa zho, nacda dien̄ peraa gun̄ zho. Nacda ncuaañe tso zho guiab zho, tebaa zha tsie zho lo me gbaa, gnab zho csilaa me zho (ncuaañe gacda ga, dzigo rrieequia racladz zho guiet me ga stib);

⁷ o guiaabgaa zho tsie zho zaatne noliu grë ngutoo, tsienab zho lo me csilaa me zho (ncuaañe gacdaque ga, ni stiba led gad no me, laa me brieebanle).

⁸ Rquiind paraa tsieguib zho csilaa me zho, zig rzac zho zdoo zho, zig rzac zho ró zho, sca gax lo zho zo me quiambëz me csilaa me zho. Min̄ co nac miñe noseed no miech, rnee no lo zho:

⁹ Zha ne cueero guiab zho Jesús nac men̄ ne rnabey lo xquielmban zho, ni dib zdoo zho gliladz zho nli bleeban Dios me, dzigo silaa me zho lo grë xtol̄ zho.

¹⁰ Sac none dib zdoo ne gliladz ne, dzigo san̄mbe Dios ne lo dol̄; ni none cueero ne pe nac miñe riladz ne, dzigo scaania me ne.

¹¹ Rnee lo Xtiidz me: “Zha ne dib zdoo gliladz Jesús, quitnied me zho.”

¹² Grëse miech, niicle zha Israela, niiclegaa zha stib guiedza ible sca ycaania me zho, sac led yed me rbe; me rnabey zho grëse zho, ni grëtaa ncuaañe rap me, zded mew lo zha ne gnaba lo me.

¹³ Rnee lo Xtiidz me: “Grëse zha ne gnab lo Dios csilaa me zho lo dol̄, ible silaa me zho.”

14-15 Nana, no zho gnè: ¿Per zha gnab zho lo me, ni runbeyd zho me? Nli gunbeyd zho me, tel niaca mine gard cho cxeel zha ne tsienee Xtiidz me lo zho, parne gon zho cho nac me. Ni min co rzeet Isá, zeene rëb me: “¿Zha wentaa ziaad zha ne ziaadne Xtiidz Ndzon Dios!”

16 Rgaaz Xtiidz Dios, per led grëd zho rzoobdiaga, zig rbiireque Isá, rnee me: “Dios, bui ganle choot néd gliladz Xtiidz luu, mine rne naa.”

17 Sac gon, parne dib zdoo ne gnalo ne Dios, ib none yquiaadiag ne Xtiidz me ganle cho nac Jesús.

18 Zig nac zha Israel, ¿niacxe gard gon zho Xtiidz Dios? ¿Binle zhow! Blactaa zha ne ziyadnee Xtiidz me, haxta zaatne mazdraa zita, laa miech quiaayacnan Xtiidz me.

19 No hor rne naa: ¿Pe ib rienð zha Israel, telne gbigd zho lo me csilaa me zho, laa me csilaa miech stib guiedz? ¿Per rienle zhow! Sac bzeetle Moisésa padzeela, zeene rëb Dios laa me ycaania miech stib guiedz, zha ne ib peet rienð; zeena tednë zdoo zha Israel, togo ziaa zho biini.

20 Mincoque ga pquiaa Isá, zeene rëb Dios:
Grë miech ne ni zienied guic yguib zho naa, laa zho beenbey naa.

21 Laa zha Israel, blactaa bzëëb nia naa lo zho ni naa niacnie naa zho, per pa nion zho xtidz naa, lel gocontseeb zho lo naa.

11

Zha Israel ne wbig lo Dios

1 Per guiabd ne togo psaanladzle Dios zha Israel. Golgan ganle, zha Israelacxe waa nac naa, zha xtii Benjamín, zha xtii Abraham nac naa;

2 dzigo led psaanladz Dios zho (nac zho zha ne padzeelale bzooblo me ygab lo me).

Golsoladz ganle, zha rëb Dios lo Lí, men ne biadteed xtiidz Dios padzeela, zeene bzodiidznie Lí Dios

3 grëtaa ncuane noyun zha Israel, ptsil zho zaatne riegan grë miech me, beet zho grë zha ne pxeel me noteed xtiidz me, ni laa zho quianañaque gut zho Lí. Rzac Lí guienðraa zha ne ron xtiidz me,

4 dzigo hor co rëb me lo Lí: “Led tibd luu riaan, no zgadz mil zha ne gard yquittsgzhib lo Baal, naa bzooblo zho ygab zho lo naa.”

5 Scaquegaa niina nagon led grëd zha Israel psaanladz Dios, no palal zha ne pquia zdoo me ble me zho ygab zho lo me.

6 Rne naa pquia zdoo me zho, sac guiabd ne togo por demas wen zho gane ble me zho; sac gon, tel por wen zhow, nlid dzigo në rquia zdoo me zho.

7 Znu nagon naca: Zha Israel ne bzooblote me, zha cose guiaanwen lo me. Laa los demas zho, lel lozh gacndip zdoo zho,

8 zigne zhoneeque lo Xtiidz me, zaatne rnee: “Beenndip Dios zdoo zho, rienð zho zha gbig zho lo me; niicle ne zob lo zho, per rac zho zig rac zha ne ranð; niicle zob diag zho, per rac zho zig rac zha ne peet rond. Ni scataque nac zho haxta lo nadze.”

9 Mincoque bzeet rey David, zeene rëb me:

Lëëque grë zhilni zho, lëëque grë ncuane row zho, gac zig len doo ne, len guix ne tsietsoe zho;

zeena ygaa zho guielné ne rieguial zho.

10 Guiaan zho zig tib zha ne rold lo, guiaan zho zig tib zha ne blozh blengw zhits.

Psilaa Dios zha ne nacd zha Israel

11 Grë zha Israel ne sca gocndip zdo, guiabde to togo laa zho bnitlole ga. jLëda! Sinqe laa me bdeed diidz sca goc zho, zeena gbig grë zha stib guiedz lo me csilaa me zho lo xtol zho; ni tednëgaa zdo zho gan zho laa me rcaania zha stib guiedz.

12 Nana, telne scataa guie|nzaac ne bgaa miech stib guiedz ne znu racndip zdo zha Israel, çpe lëlque dzigo zeene laa zho gbiire guiaanwen lo Dios stib? jZha naczhe grëraa guie|nzaac ne yгаа miech!

13 To ne nac to miech stib guiedz, led nanle to ganle, ible Dios bzo naa none naa Xtüidz me lo to. Scagaa naa, dib zdo naa rioxco naa run naaw,

14 zeena togo soobladz palal zha ladz naa ye zho squi gbig lo Dios csilaa me zho lo xtol zho.

15 jQue talzhe ndzona zeene laa zho gbiire gbig lo Dios stib! Nli laa Dios psaan zho, laa grëgaa miech stib guiedz laa zho biaanwen lo me. Gacxe waa, jtib guie|bley nrooba zeene laa me ycaania zha Israel stib! Sac gon, rrieequia grieeban zho ga.

16 Zigne pcaania Dios xmengol zha Israel bgab zho lo me, scaquegaa scaania me xpëed zho; sac gon, zig nac tib zhan yag, zeene ndaan low mine naaza len liu, ndaanaque zhicwa. Scaque nagon, zeene bzooblo Dios xmengol zha Israel, ye le zho ga bzooblo me.

Nana, gzoob ne nac zha Israel zig tib zhan yag oliv: low nac xmengol zho, laa zho nac zhicwa.

17 Bdzin dze brug palal zhicwa, dzigo ga bguid zhicw yag oliv dan; lëe yag oliv dan co nac to ne nac to miech stib guiedz. Sca nac ne laa Dios pcaania to zigne pcaania me xmengol zha Israel; ye to laa to nogaa guie|nzaac co.

18 Lëëraasi, guiabde to togo nonraa to lo zha ne nac zhicwa mine brug ga. Golguien ganle, por lo yag ndaan zhicwa.

19 Nana, nend guiab to: “Per riogua| now, gacxe waa no biaan xlugar zhicwa, mine brug ga.”

20 jGolgap cuidad gon! Nli lëe biche zho, laa to biaan xlugar zho, porne bnëd zho nalo zho Dios zigne bien to rnalo to me; per golguien gacniatsde to.

21 Golgan ganle, niicxe zha name zhicwpaa yag co nac zho ni ptiche me zho, jpele| to dzigo!

22 Golwi ganle zha wentaa Dios, per scagaa rdziladzd me gats xtiidz me. Mincoxe waa gondzed me grë zha co, laa to gon wen goc me lo to. Lëëraasi none gon to mine rnabey me, sac gon telne gonde tow, scaque gandzed me to.

23 Nana, zig nac zha Israel ga, telne gbiire gbig zho lo me, ible squiid me zho lo yag co stib. jGolgan ganle men nroob nac Dios!

24 Niicxe to na, nac to zig yag oliv dan, pquia zdo me to pquid me to zhicw yag oliv wen co, jpele| zha Israel dzigo yquiad zdo me, gbiire yquid me zho lo yag ne nacpaa zho!

Scaania Dios zha Israel ne bzozit lo me ga

25 Bets, bzian, laa naa gni lo to ganle zha nac mine no guic Dios gun me. Niicle ne riend miecha niina, per racladz naa gacnan tow, zeena gacniatsde to ne squi bzooblo me to: Nli ndal zha Israel racndip zdo zozit zho lo me niina, per zeene laa grë miech stib guiedz blozh wbig lo me,

26 hor co grëse zho, laa zho gbiire gbig lo me stib ycaania me zho. Zigne bzeetle zha ne biadteed xtiidz me, zeene rëb zho:

Guiedz Siön, ga griece men ne cuee zha Israel lo xquie|ntseeb zho.

27 Dzigo laa Dios csilaa zho lo grëtaa xtol zho, zigne psanle me diidz lo zho.

²⁸ Len dze rii rlëë zha Israel ron zho none gnalo zho Jesús, par laa zho lo dol. Znu rac zho zeena gdeeda diidz gbig to lo Dios, nac to zha stib guiedz; sangue Dios rleynie me zho, sac scale rëb me lo grë pxozgol zho.

²⁹ Me bzooblo zho, dzigo ible scaania me zho; sac gon, led yed me ctsëë xtiidz.

³⁰⁻³¹ Glo to nac zha ne ib bind xtiidz Dios, laa niinagaa na zha Israel nëd gon xtiidz me. Per zigne rquia zdoo me to niina, scaquegaa zdziñ dze ne yquia zdoo me zho.

³² Grëse miech, zigtaa zha Israela, zigtagaa tow ne nac to miech stib guiedza, laa Dios bneedz diidz sca gocontseeb to lo me, zeena grieelo glu me ganle ne lalga rquia zdoo me ne.

³³ ¡Gotsaa gwi ganle zha men nroobtaa nac Dios! ¡Pa lotaa rac me, pa lotaa rien me! ¡Pa lotaa rioxco me miech! ¿Cho grieelo guien pe nac mine no guic me gun me, pe nacgaa gun mew?

³⁴ Zigne zhobneeque lo Xtiidz me, zaatne rnee: “¡Choot nand pe no guic Dios gun me! ¡Choot grieelod guiab lo me, znu znu been!

³⁵ Wlaltaa choot gard pe gdeed lo Dios, par guiab ne laa Dios zëëb.”

³⁶ ¡Peet gon nzëëbd Dios lo miech! Sac grëtaa ncuaane no, me psana, me naaza, ni me rnabeya.

¡Mese nac men ndzon, tibaque gotsaa dziuuñnon ne me! Sca rieguiala.

12

Golban zigne rdziladz Dios

¹ Bets, bzian, laa to gocnanle ganle pa lotaa nqualadz Dios to. Nana sca, dib nase to golsa to ladznia me, gac to zig tib gon mbe, tib gon ne gley me ycaania me. Sca glu to ne nli rleynie to me.

² Ib tsienal draa to grë ncuaane ndzinlid ne noyac lo guidzliu rii, grëse zhgab ne paat rquiind, golcueew guic to; zeena gban to zigne racladz me, ni guien to ganle zha wentaaw zeene zienal ne mine rnabey me.

³ Ne znu nac naa zha ne pquia zdoo Dios noyün naa dziin rii, nligaa laa naa rso diidz lo to, ndzinli golgac, ib glude to ncuaane ni nacde to, sinque golguien cho nac to, zha rnalo to Dios.

⁴⁻⁵ Golgan ganle zha niaa xcuerp ne: nzian lë niaaw, ni tib tiba nose zaatne rquiina; scaque nagon nac grë zha ne ngab lo Jesús, nzian nac ne, per tib tib ne nose zaatne rquiin ne, tsod zha ne yquiind. Grëse ne none gnalolsa ne grë zha ne nacgrë ne.

⁶ Tib tib ne bneedzse Dios guielbiini lo ne, par grieelo dziuuñ ne dziin ne pso me ne dziuuñ ne lo me. Gacxe waa,

zha ne pso me cteed xtiidz me, none gnee zhow zigne csiaab mew guic zho;

⁷ zha ne pso me gun ncuaane yquiin lo grëraa miech, none gun zhow.

Zha ne pso me cseed miech, none min co gun zho;

⁸ zha ne pso me gdeedlban miech, none lban gdeed zho.

Zha ne pso me ygad, none dib zdoo zho ygad zho;

zha ne pso me so gnabey, none ndzinlise gnabey zho;

zha ne pso me cchoobladz zdoo zha ne mban noded, none nley gac zho tsienee zho lo miech.

⁹ Dib zdoo to golleynie samiech to. Gandzede to grë ncuaane ntseeb, niapse ncuaane rquiin goltsienal.

¹⁰ Ine niowse golleynie grë zha ne nacgrë to, gacnguizhde to, quitniede to zho.

¹¹ Nguieel golgac, gacmbechde to, dib zdoo to goltsoxco golgun mine nac xtsiin Dios.

¹² Nley golgac lo guielmban rii, golsoladz ganle zha nactaa grë ncuaañe no gneedz Dios lo to; golxecw lo grë guielnë ne gan to; tibaque golzodiidznie Dios.

¹³ Goltsoxco xliaadz grë zha ne nacgrë to ngab to lo Dios; zaacse golcuëzlo zha ne ziaadted lidz to.

¹⁴ Grë zha ne rtsidil to, laa ne gdzibdee to zho, golnab gunlay Dios zho.

¹⁵ Zha ne no guielbley, golgacnie zho lo xquielbley zho; zha ne nogaa guielnë, golgacnie zho lo xquielnë zho.

¹⁶ Gacniatsde to. Grë zha ne rzac miech peet nond, goltsiëlsa zho; guiabde to to nac zha ne racraa. Niowse golbannie zha ne nacgrë to.

¹⁷ Zha ne csacsi to, gunde to ne yeque to csacsi zho. Goltsoxco wen golgac lo grëse miech.

¹⁸ Tilniede to samiech to, goltsoxco tibaque wen golbannie zho.

¹⁹ Golguien, zha ne csacsi to, ib guiabde to ne tozhal ctsire guielnë co, sinque golsana ladznia Dios, metaa nan zha gun me xquielwxtis me; zigne ziaad lo Xtiidz me zeene rëb me: "Naa raguial gun guielwxtis, naa gunquizh miech tel pe nac dol ne zëëb zho.

²⁰ Gacxe waa, zha ne rlëë lo luu, zeene gan luu mban rac zho rcaabedz zho, mazd bdeed ncuaañe gow zho; gangaa luu mban rac zho rnab zhis zho, bdeed ncuaañe guie zho. Sac zeene sca gun luu, stoladz zho csoladz zho mine been zho luu; rriequia gui ga cuib guic zho."

²¹ Golguien sca, niapse guielwen goltsienal, zeena sca ycuëez to lo guielntseeb. Gdeete to diidz ne ye to gun guielntseeb.

13

Golgon mine rnabey wxtis

¹ Grëse to none gon to xtiidz zha ne nacpaa wxtis. Sac grëse zha ne nac wxtis, ible Dios rdeed diidz ne laa zho rac dziin co.

² Gacxe waa, zha ne racndaan lo wxtis, rriequia ye lo Dios ga racndaan zho; ni zha ne racndaan, lëëque zha rguib ted zho caxtigw ga.

³ Golgan ganle, ible laa wxtis zo, par zha cobey caxtigw ne tsieguial zha ntseeb. Telne racladzde to sca tsoxtseeb to lo wxtis, zaacse golgac; scagaa zha, tsod pe nacne ygaal zho to.

⁴ Dios psan rzo zho ni zha rtedlo to, ni scagaa, telne pe guielntseeb ne gun to, zhaque gnabey pe caxtigw ne yga to; sac gon, ible laa Dios bzo zho gun zho guielwxtis.

⁵ Gacxe waa, ib none gon to mine rnabey zho, zeena tsoxtseebde to lo zho, ni scagaa niicle nëz lo Diosa ine tiblise no guic to.

⁶ Scaque dimi ne no gdeed to lo zho, goldeeda; sac rquiin dimi co parne grieelo gun zho tel pe nac dziin ne no gun zho.

⁷ Golguien sca, dimi ne no gdeed to lo zho, goldeeda; mine rnabey zho to gun to, golguna. Golleynie zho, quitniede to zho, golguien zha non nac zho.

Golleynie samiech to

⁸ Grë ncuaañe rieguial to gun to, golgungazha zeena bdedgaw; sangue samiech to, none tibaque gleynie to zho. Zha ne rleynie samiech, grële mine zhoobnee lo Xley Dios ga quiaayun zho.

⁹ Sac telne rleynie to samiech to zigne rleynie to to, nod pe nacne csacsi to zho; guiab to:

laa to yquidie zho,

laa to gut zho,

laa to cuan zho,

laa to tsonie tsieel zho,

gzoobladzga a to grë ncuaañe quianie zho.

Gacxe waa, zha ne rleynie samiech zigne rleynie zho zho, grële miñe zho bnee lo Xley Dios ga quiaayun zho.

¹⁰ Zha ne rleynie samiech, rsacsidraa zho zho; ni miñ co rnabey Dios. Gacxe waa, grëse ne none gleynie ne samiech ne.

¹¹ Ib none gban ne zigne racladz Dios, golle na tsa a ne biini; sac gon, laa dze ne ycaania Dios ne bii ziaadgaxraa, lëdle zeene psilo rnalo ne me.

¹² Dziuun ne cuent laa guieel lozhle ted, laa biini ne guini liu dze ndzon co ziaadle; gacxe waa, ni lalnu guionald ne miñe racladz mendox, sinque miñe racladz Dios, miñ co golgotsaa dziuun ne.

¹³ None ndzinli gban ne:

dziuun ne guielgonziu,

dziuun ne grë lni yozh,

yquiangobd ne zha ne led tsieeld ne,

dziuun ne grë guielyozh ne racladz xcuerp ne,

dilnied ne samiech,

glëñied ne zho zeene stib noded zho.

¹⁴ Golgotsaa gnab ne lo Jesús sca, zig zie dze lozh csañmbe me xquielrien ne, csañmbe me zdoo ne, gac ne zigne racladz me. Dziuundraa ne grë ncuaañe ndzinlid ne racladz xcuerp ne.

14

Gzeed zdoo to miñe run zha ne nacgrë to

¹ Golcaania zha ne gard tsoguicpaa zha nac Xtiidz Dios. Telne no palal miñe rililadz to zhaa rzac zho, glisquide tow lo zho.

² Gzoob ne, no to rzac peet nacda gow to grë lose guielwagw, laa zha ne na gard tsoguicpaa Xtiidz Dios, rzacgaa wena telne scuaan guizhyese gow zho;

³ ga nagon, ni stib ni stib nod pe nacne glisqui dien cho pe row, dien cho pe rowdga; sac gon grëse to, Dios bzooblo to ngab to lo me.

⁴ Nana zig nac zho, lo Dios ngab zho, led lode tow; ¿cho nac to dzigo tso to glisqui to dien pe run zho? Dios nac men ne nan telne lëew o lëdgaaw ga quiaayun zho; men nroob nac Dios, me gdeed guielbiini lo zho guien zho gban zho zigne racladz me.

⁵ Scaque, no zho zienal dien pa dzepaa none gleynie zho Dios, nogaa zho rnee zac tel pa dzetaa gleynie zho me. Per peet nacd ga, zac tib tib zho gunse zho miñe rzac zho rdziladz me.

⁶ Tel pa dzetaa wena, totsaque run zhow par gunnon zho me. Scaquegaa guielwagw, wena zha ne gow grëlosew; niicle zha ne ncuueegaa ncuaañe gow, wenaquew, totsaque run zhow par glu zho ne rleynie zho me, ni rdeed zho xquizh lo me.

⁷⁻⁸ Sca nagon naca, per led miñ cod dzieets ne dziuun ne miñe gacladztaa ne. Grëse ne ne nac ne zha ne ngab lo Dios, laa ne mban par dziuun ne miñe rnabey Jesús, ni zeene guetgaa ne, lo me none gdzin ne. Gacxe waa, niicle niina ne zomban new, niicle zeene gutlegaa new, ladznia me no ne.

⁹ Sac gon, tel Jesús gut me ni brieegan me; gacxe waa, me rnabey ne grëse ne, zigtaa zha mbana zigtagaa zha guta.

¹⁰ Jesús rnabey ne tib tib ne. Gacxe waa, nonguiel da glisqui to lo zha ne rund miñe run to; nonguiel da por miñcose sac to zho zig zha ne peet nond, tso to gneedraa to lo zho. Ni stiba, gal dze ne laa Dios gun guielwxtis, grëse ne laa ne none gacredz lo me.

11 Zigne raquietaque lo Xtiidz me, zaatne rnee me:

Naa nac Dios mban, gneli naa lo to ganle:
grëse miech, ible squiitsgzhìb zho lo naa,
cueero zho ne nli naa nac Dios.

12 Sca nagon gaca, tib tib ne ib laa ne no cueero lo me tel zha wban ne.

Csande to zdoo zha ne nacgrë to

13 Nana sca, zha ne sca rund grë mine run to, ible glisquidraa tow lo zho. Golguien, gunde to ncuaañe rgobey to yquiaaqui gunctal zho xtol zho, o csaangaa zho Xtiidz Dios.

14 Tel naa, nanpaa naa led dolda gow ne grë lose guielwagw; sac niicle Jesúsa scaque nac xtiidz me. Sangue zha ne rzac dola, mazd gowd zhow; sac tel laa zho gowa, xtol zho ga gunctal zho.

15 Zig rne naa ga led dolda, per telne xtsiinpaa row to tib ncuaañe rquiaqui rsan to zdoo stib zho, ga rlu to ne rleyniede to zho. ¡Golguien sca, gowde to ncuaañe yquiaaqui sozit zho lo Dios! Sac gon, blactaa guielnë ne bded Jesús psilaa me zho.

16 Ib gunde to grë ncuaañe yquiaaqui gneenë miech to, niicle ne nanpaa to led dolda.

17 Zha ne ngab lo Dios, mine none tsienie guic zho nac ne ndzinli gban zho, tilnied zho samiech zho, ine nley gac zho (min co nac mine rdeed Espiritu Sant); led tsod zho dien pe zac gow zho, pe zac guie zho, pegaa gacda.

18 Sca rdziladz Jesús, ni zha ne sca gban, zleynie Dios zho, niiclegaa grë miecha zleynie zho zho.

19 Goltsoxco sca, gunde to ncuaañe codil to grë zha ne nacgrë to; zeena tipse gac to lozh tsoguc to zha racladz Dios gban to.

20 Ib gunde to, ne por tib guielwagw codil to grë zha ne ngable lo Dios. Zig rnele naa ga, grëlose guielwagw mbew, peet nacda gow new; sinque mine nonguielda, nacne gow ne mine nanpaa ne yquiaaqui csan ne zdoo stib zho.

21 Mincoxe waa, mazd gowde to pe scuaan beël, guiede to nziu, telne min co yquiaaqui gunctal to xtol zho; ni tel pe grëraa ncuaañe nan to tsod zdoo zho, gunde tow.

22 Niicle ncuaañe nanpaa to dolda gun tow, niiclegaa nëz lo Diosa led dolda; per mazd gunde tow zeene zo zha ne rzac dola. ¡Wen zie zha ne sca niicle nanpaa zho dold nac mine gun zho, per rund zhow, parne gunctald zho xtol zho!

23 Sangue zha ne racchop guic riend zho dien pe zow zho tib guielwagw, ni lozh ga row zhow, runcal zho xtol zho ga; sac beend zho mine rzac zho rdziladz Dios. Grëse ncuaañe rzactaa zho wend ni gun zhow, xtol zho ga gunctal zho.

15

Golgacnie zha ne nacgrë to

1-2 Golguien sca, to ne nac to zha ne dziitsle zo lo Xtiidz Dios, golgacnie grë zha ne gard sodziits lo Xtiidz me. Golgun ncuaañe tso zdoo zho, ncuaañe yquuin lo zho, zeena lozh guien zho zha gnalo zho Dios; led tsode to gun to ncuaañe yquiuñe lo to.

3 Golgan ganle, niicle Jesúsa bguibd me niac ncuaañe nquuin lo me. Zigne raquietaque lo Xtiidz Dios, zaatne rnee: “Grëtaa diidznë ne rnee zha ne rlëe lo Dios, grësew pcon zho me.”

⁴ Grëse minë raquiet lo Xtiidz Dios, padzeela pquiaw; ni ib laaw pquia zeena gacndion ne zha no gban ne. Lëew rnee none nley gac ne, lëew rnee guieete ne yquiambiaaz ne yгаа ne grë minë bzeete Dios.

⁵ Dios men ne rneedz guiebley co, men ne racnien ne guieete ne, me gacnien to niowse gbannie to grë zha ne nacgrë to. Golleynie zho zigne rleynie Jesús to,

⁶ zeena grëse ne tipse gac ne dzioolnie ne Dios, Pxoз Jesús, men ndzon ne rnabey ne.

Grëse miech noyon Xtiidz Ndzon Jesús

⁷ Golguien sca, grëse zha ne nacgrë to, golcaania zho zigne pcaania Jesús to. Sca golgun, zeena xoobnenraa lë Dios.

⁸ Golsoladz ganle, zeene biaad Jesús nroob ncuane been me lo zha Israel, me biaadgun grëtaa minë bzeete Dios padzeela. Ga blu Jesús grëse minë rnee Dios, ib run mew.

⁹ Ni golsoladz ganle, ye grë miech stib guiedz biaadsilaa me, gane niina grëse zho roolnie Dios, ne scataa pquia zdoо me zho. Min co raquiet lo Xtiidz me, zaatne rnee:

Zoolnie naa luu,

ni zlu naa lo grë zha stib guiedz ne men non nac luu.

¹⁰ Stib lugar rnee:

To ne nac to miech stib guiedz,
jine nley golgac grë to zha Israel!

¹¹ Ni no stib zaatne rnee:

Grëse to ne nac to miech stib guiedz,
jgolleynie Dios! jGolsanziuu lë me!

¹² Mincoque ga bzeet Isá, zeene znu pquiaa me:

Zrieequia tib men lo xtií Isá;
men co gnabey lo grëse miech stib guiedz,
ni me gnalo zho grëse zho.

¹³ Mincoxe waa, to ne nac to miech stib guiedz, rnab naa lo Dios (men ne psanle diidz pe nac grë ncuane yгаа ne ga) gneedz me guiebley lo to, gacnie me to peet zhgab ctsebde to niina ne laa to rliladzle me. Rnab naa lo me, gacnien Espiritu Sant to ine gley to yquiambëz to gac grë minë psanle me diidz ga.

¹⁴ Bets, bzian, nanle naa zha wen nac to, nacde to zha ne csan zdoо stib zho; rienle to zha racladz Dios gban to, rienle to zha cso to diidz lo grë zha ne nacgrë to;

¹⁵ per lo guits rii gon nzian ncuane rso naa diidz lo to. Guiabde to togo ndox naa lo to, sinque laaw ben naa zeena guiaanladzde tow.

¹⁶ Ne nqualadz Dios naa, laa me bzooblo naa noyun naa xtsiin Jesús, none naa Xtiidz Ndzon me lo grë miech stib guiedz, zeena csanmbe Espiritu Sant zho; lozh ga gded naa zho lo Dios zig tib gon ne gley me ycaania me.

¹⁷ Gacxe waa, tel niina rley naa sac noyacnien Jesús naa noyun naa dziin ne pso Dios naa.

¹⁸ Me noyacnien naa none naa Xtiidz me lo grë zha stib guiedz, zeena gban zho zigne racladz me. Ni laa zho nobig lo me, sac ran zho grëse minë rne naa mban naaw zigne naca,

¹⁹ ni ran zho zha racnien Espiritu Sant naa run naa grë milagr, grë ncuane rzee zdoо zho. Sca nagon none naa Xtiidz Jesús lo zho, brie naa Jerusalén briequia naa haxta néz xtan zha llir. Guiabde to togo rtix naa diidz.

²⁰ Ni laa naa noxco za naa zaatne wlaltaa gard gon zho cho nac Jesús, zeena gasëëbd naa zaatne ziyele zha ne güeynee Xtiidz me.

²¹ Laa naa zanaļ zigne zhubnee lo Xtiidz Dios, zaatne rnee: “Grë zha ne wlaltaa gard gon cho nac me, zeene gan zho grëtaa ncuaaņe ruņ me, laa zho gunbey me.”

Racladz Pabl tsie Pabl Roma

²² Nzian vuelt gocladz naa nialgaņ naa to, per ib bdeetew diidz, sac laa naa bia grë dan co biaseed naa miech.

²³ Izle ga na tibaque sca no guic naa, laa niina ne laa naa psiaaļ lo xtsiņ naa, nataa nagon ible ziaļ naa.

²⁴ Laa naa no ga Spaņ, dzigo lëë nëzle ga teed naa Roma i guialgaņ naa to. Tib guieļbleya lo naa guialquiabdiuuzh naa to, dzigo lozh ga siguiel to gun to xyudar naa grielo ga naa nëz Spaņ.

²⁵ Laa niina, laa naa no ga Jerusalén gasaņ naa tib gon lo grë zha bets, zha bzian ne no ga;

²⁶ sac grë zha bets, zha bzian, ne no nëz Macedon, ni nëz Acay, laa zho bnedidz beenlo zho palal dimi cxeel zho yquii grë zha prob ne no nëz co.

²⁷ Niapse zdoo zho gol ptop zho gon co, sac rzac zdoo zho grëtaa miņe been zha Jerusalén lo zho; sac gon, zha co güeynee Xtiidz Ndzon Jesús lo zho. Laa niina, laa zho rxeel palal ncuaaņe rgaa lo zho yquii zha Jerusalén.

²⁸ Zigne lozh nagon gasaņ naa gon co Jerusalén, dzigo laa naa teed guialgaņ naa to i zigne nile naa ga.

²⁹ Riņ naa nroob guieļnzaac ne gneedz Dios lo to zeene laa naa guial.

³⁰ Bets, bzian, golguiņ ganle Jesús rnabey ne grë ne; ni rleynie ne zha ne nacrë ne, sac Espiritu Sant nacie ne. Gane niina, laa naa rnab lo to, golgotsaa gnab ne lo Dios gacniņ me naa;

³¹ golnab lo me, csilaa me naa ladzniia grë zha Israel ne gard guieņ cho nac Jesús. Golnab lo me, iņe gley grë zha bets ne, zha bzian ne, ycaania zho gon ne gasaņ naa lo zho nu;

³² zeena iņe nley no zdoo naa glanso naa lo to, iņe gdziiladz naa leņ dze ne cuëz naa lo to i. Sca nagon no guic naa, totsaque gneedz Dios diidz gaca.

³³ Ni me ne nac me meņ ne rbee miech lo grëse zhgab, lo grëse guieļxtseeb, me gacniņ to. Sca gaca.

16

Bdiuzh

¹ Bets, bzian, leņ dze rii laa Feb, tib wnaa ne ruņ xtsiņ Dios guiedz Cencre, laa me guiaad nëz lo to i.

² Laa naa rso diidz lo to, zeene glanso me i niowse golcaania me, golcaania me zigne rieguial ycaania ne zha ne ngab lo Dios. Golsiguiel goldeed grë ncuaaņe yquii me; sac gon, tel me ndal grë zha ne ziyacie me lo xliaadz zho, haxta naa blactaa ziyacie me naa.

³ Ni rnab naa lo to, golsiguiel goldeed zhibdiuzh naa lo grë zha qui.

Goldeed tib zhibdiuzh naa lo Aquil i, grop tsieel me Priscil. Blactaa ziyacie zho naa zidziuuņ no xtsiņ Jesús,

⁴ haxta bdedlaa zho niet zho psilaa zho naa lo guieļgut. Rzadox zdoo naa miņe been zho ga, niicle grëragaa zha zit ne nacgrë new, rzac zdoo zhow.

⁵ Ni scagaa, grë zha ne rcaalsa lidz zho riegoolnie Dios, goldeed zhibdiuzh naa lo zho. Goldeed zhibdiuzh naa lo Epenet, rley naa rsoladz naa me; lëë me nac zha Asia ne gloopaa bzëëb xnëz Jesús.

6 Goldeed zhibdiuzh naa lo Marí, blactaa noyũ me xtsiĩn Jesús lo to.

7 Goldeed zhibdiuzh naa lo Andrónic, lo Junias, grop menladz naa zha ne no i; gzapaa no zho bdzio ladzguiib. Glo zho bliladz Jesús lo naa, zha nziuu nac zho lo grë zha ne pxeel Dios nonee Xtiidz me.

8 Goldeed zhibdiuzh naa lo Ampliat, lëë stib zha ne rdzieel xtidz naa ga;

9 lo Urban, rsoladz naa me, tipse bdziun no xtsiĩn Jesús grop no; lo Staquis, stib zha ne nziuu lo naa, goldeed zhibdiuzh naa lo zho;

10 lo Apel, ye me blactaa ncuane bded me blu me ganle ne nli dib zdoo me rnalo me Jesús; lo grë zha ne no lidz Ristob ne.

11 Goldeed zhibdiuzh naa lo Herodion, ye me menladz naa nac me; lo grë zha ne no lidz Narcis, zha ne rliladzle Jesús;

12 lo Trifen, lo Trifós, ni lo Pérsida, gza men wnaa rii blactaa noyũ zho xtsiĩn Jesús.

13 Goldeed zhibdiuzh naa lo Ruf, zëëb xtiidz me lo grë zha ne nacgrë ne; goldeed zhibdiuzh naa lo xniaa me ne, run naa cuent lëë stib xnia naa ga, blactaa pteedlo me naa.

14 Goldeed zhibdiuzh naa lo Asíntric, lo Flegon, lo Hermes, lo Patrob, lo Hermas ni lo grëragaa zha bets ne nacgrë zho.

15 Goldeed zhibdiuzh naa lo Filólogo, lo Jul, lo Nerew grop bzian me, lo Olimp ni lo grëraa zha bets ne nacgrë zho.

16 Grëse to bets, grëse to bzian, golcaania zhibdiuzh naa. Grëse zha ne rliladz Jesús nëz rii, laa zho rxeel bdiuzh lo to.

17 Nu ne laa naa csaalle lo guits rii, laa naa rso diidz lo to, nsin golso lo grë zha ne ziaad loxaque dien zha codil zho to, dien zha gungüet zho to, rlu zho minë ni nacdraa Xtiidz Jesús; yquiaadiagde to zhiwseed zho.

18 Grë zha co, led xtsiĩndraa Jesús ga run zho, sinque laa zho noxco ncuane gdeed guxt xcuerp zho. Diidz nex, diidz ndooladz rnee zho; grë miech ne beelze pe rliladz, znuse rquidie zho zho.

19 Sangue to, zëëb diidz ne ibrsaande to minë nac Xtiidz Dios, ziena to minë rnabey me.

Rley naa ron naa squitaa nguzobdiidz to. Racladz naa tibaque squi niini gac to, zeena guien to niapse ncuane yquiin gun to, ni lalnu tsode to lo guientseeb.

20 Scagaa Dios men ne rtiche grëse zhgab, grëse dzeb, merle quixdze me Satanás, zeena peet grielodraa gun ma. Jesús, men ndzon ne rnabey ne, me gacniën to.

21 Golcaania zhibdiuzh Timoté, men ne quianie naa xtsiĩn Jesús, laa me rxeel bdiuzh lo to; scaque zha ladz naa Lus, Jasón ni Sosípater, laa zho rxeel bdiuzh lo to.

22 (Naa nac Ters, naa noquia guits rii, ye naa laa naa rxeel zhibdiuzh naa lo to i. Rleyne naa to, sac ye to ngab lo Jesús.

23 Golcaania zhibdiuzh Gay, men ne rbëz naa lidz, laa me rxeel bdiuzh lo to. Lidz me nu rcaalsa grë zha ne rliladz Jesús nëz rii. Ye Rast, men ne nac wxtis quianap xtimi guiedz rii, ni bets ne Cuart, laa zho rxeel bdiuzh lo to.

24 Jesús men ne rnabey ne, me gacniën to grëse to. Sca gaca.)

25 Laa naa rsan to ladznia Dios, me gacniën to lozh sodziits to lo Xtiidz me, minë none naa lo miech. Haxta zeene gard tsaa guidzliu, znu no guic Dios csilaa me grë miech lo xtol zho, per choot gocnanda, naraa laaw bzhoobnen.

26 Laa niina, nzian zaatne nogaaz Xtiidz me, zeena grëse zho guien Jesús none gnalo zho, ni minë rnabey me min co no gun zho. Grë zha ne biadteed

xtiidz Dios padzeela, bzeetle zho ne znu gaca, ni ible Dios rnabey ne znu gaca.

²⁷ ¡Mese nac Dios, mese nac men ne nlipaa rien! ¡Tibaque sca golgotsaa dziuunnon ne me, grëse ne ne nac ne zha ne ngab lo Jesús! Sca rieguiala.
Pabl

GUILTS NE GLO PXEEL PABL LO ZHA CORINT

¡Diuzh to grëse to! ¹ Naa nac Pabl, ible Dios bzooblo naa znu quiaayun naa tsiin Jesús. Grop no bets ne Sóstenes rquiaa guits rii rxeel no lo to.

² Laaw ziaad lo to i, grëse to ne nac to zha ne ngable xnëz Dios no to guiedz Corinth, nac to zha ne bredz Dios ngab lo me, psanmbe me to zeene laa to bliladz Jesús; zigne psanmbeque me grëse miech ne no dib lo guidzliu, zha ne bliladz Jesús, men ne rnabey ne grëse ne.

³ Dios men ne nac Pxoze ne, ni Jesús men ne rnabey ne, me gacniën to, me glu lo to ganle pa lotaa noxco me to; zeena peet tsienied guic to.

⁴ Gzataa zeene rzodiidznie naa Dios, rded naa xquizh lo me por grëtaa ncuane zineedz me lo to, niina ne laa to rliladz Jesús.

⁵ Sac gon porne rliladz to Jesús, blactaa ziyunlay me lo xquielmban to, noyacniën me to quiaayogicraa to zha nac zhiwseed me, rien to zha gnee tow lo miech.

⁶ Rlu ziana to mine nac Xtiidz Jesús, zigne binse tow,

⁷ gacxe waa bneedz Dios grëtaa guielbiini lo to, zeena guien to zha gban to, laga quiambëz to gdziñ dze ne guiaad Jesús men ne rnabey ne.

⁸ Ni Dios nac men ne gacniën to tiblrique gac to lo Xtiidz Jesús, zeena ni tib falt rapde to gal dze co.

⁹ Sca nac xtiidz me, ni mesi gon ctsëed me mine rnee me, ible laa me bredz to gacnie to Xpëed me Jesús, men ndzon ne rnabey ne.

¹⁰ Gacxe waa bets, bzian, laa naa rso diidz lo to niowse golgac, tsodildraa to. Ine tipe golgac grë to, tel pe nac dziin ne gun to, tel pe rzac to, tipe golnee. Ne nligaa golgona, zig nac zeene Jesús zhal noso diidz rii lo to.

¹¹ Sac gon në tib zhalidz Cloé lo naa nodilisa to i;

¹² no to dien cho xnëz ngab to. No to rnee: “Xnëz Pabl no naa”; riasaque zha ne rnee xnëz Apol no zho, rrieequiagaa zha ne rnee xnëz Pedr no zho; haxta no zho rzac zhase nac zha ne nlipaa no xnëz Jesús.

¹³ Ne squi rac to, ¿pe rzac to dzigo squi nzian lë nac Jesús? Zha ne rnee xnëz Pabl no zho, ¿pe niacxe naa pquia lo cruz gozh xtol zho?, ¿te brobnis zho ye par ygab zho lo naa?

¹⁴ ¡Xquizh Dios led naad pchoobnis to grë to, lëese chop zha ne pchoobnis naa nac Crisp ni Gay!

¹⁵ Zeena tsod pe nacne guiab to xnëz naa ngab to, sac naa pchoobnis to.

¹⁶ Ah, ni naaque gon pchoobnis grë menlidz Stef. Bod lëese zha ne pchoobnis naa ga,

¹⁷ sac gon pxeeldaxe Jesús naa waa cchoobnis naa miech, sinque laa me pxeel naa cseed naa zho gacnan zho zha grielo laa zho lo dol. Haxta bod ligase bzhaac to mine bialne naa lo to, sac ib zanald naa pe guielrac, pe diidz ngan ne gne naa; sac nacda gleynie miech zha rnee naa, sinque gliladz zho cho nac Jesús, pe nacne gut me lo cruz.

Diosse nac men ne rien

¹⁸ Min co nagon noxco naa, maase niicle no grë zha ne rzac ncuane paat rquiind ga been Jesús gut me lo cruz, per lëe zha co nole nëz ne nitlo zho; sangue ne ne nac ne zha ne psilaale me lo dol, ndion ne ganle ga blu pa lotaa nac poder ne rap Dios.

19 Noyaca zigne zhobneeque lo Xtiidz Dios, zeene rëb me:
Znitlo naa grë guielrac ne rzac zho csilaa zho,
niicle rzac zho mazdraa zhooba guic zho,
ni lalnu yquiinda.

20 Ni nligaaw, grë zha rac, grë zha rien, grë zha ne rzob dien cho nroobraa rac, ib blud grë zhiwseed zho ga lo zho zha csilaa Dios zho, chogaa nac Dios. Ga blu Dios ganle lega nacse grë guielrac ne no lo guidzliu rii.

21 ¡Diosse nac men ne rien! Bien me grieelod gunbey miech me por xquielrac zho, nacne bnabey me zha ne dib zdoo gliladz xtiidz me, zha co csilaa me; niicle ne rzhidznie miecha, rzac zho ncuaañe paat rquiinda.

22 Zig nac grë zha Israel, grë zha Gres ncuaañe paat rquiinda rzac zho. Grë zha Israel, racladz zho ganlo zho grë milagr nroob par glu ne diidzliw; laa zha Gres na zienalгаа gaca zigne nac zhiwseed zho, sac laa zho zienal guielrac ne no lo guidzliu rii.

23 Gacxe waa zeene rnee no lo zho Jesús men ne pquia lo cruz, men cose csilaa miech, riëë zha Israel ron zhow; laa zha Gres, rzhidznie.

24 Sangue ne, ne nac ne zha ne bredzle Dios bzëëb xnëz me, zigtaa zha Israela, zigtagaa grëraa miecha, ndion ne ganle Jesús nac men ne biaadlu pa lotaa nac poder ne rap Dios, me biaadlu pa lotaa nac xquielrac Dios.

25 Miñe rzac miech paat rquiind ga been Dios, ni nand zho ndziibguicraa nac miñ co lo grë xquielrac zho; zha ne rzacгаа cholze cho men nsis ga sca gut lo cruz, ni nand zho lëë men co mazdraa ndip lo grëse miech guidzliu.

26 Bets, bzian, golgan ganle lo grë to ne nac to zha ne ngab xnëz Dios, led grëde to nac zha rien nëz lo miech, led grëde to nac zha non, zha ne ziaadгаа lo grë dii ne nziuu lo zho.

27 Per ib laa Dios nobedz grë zha ne rzac miech peet riend, grë zha ne rzac zho nac zha nsis, parne gunctoladz me grë zha ne rzac zho nac zha rac, zha non.

28 Laa me nobedz grë zha ne sca rzac miech paat rquiin, zha ne rzac zho peet nond, parne guioog ro grë zha ne rzac zho nac zha non, zha nziuu.

29 Ga rlu me ganle ni tib choot grieelod gacniats lo me.

30 Golwi ganle, niapse por me laa ne nacie Jesús, grë guielrac, grë guielrien ne rdziaap ne, Jesús bneedza, ni Jesús nac men ne psilaa ne lo grëtaa xtol ne, men ne psanmbe ne laa ne bziaab xnëz Dios. Dios bnabey sca goca.

31 Gacxe waa choot grieelod gacniats, zigne ziaadaque lo Xtiidz me zaatne rnee: "Zha ne racladz gacniats, mazd gunnon zho Dios por grëtaa ncuaañe run me."

2

Xtiidz Jesús bnee Pabl

1 Gacxe waa tel naa, golsoladz ganle bets, bzian, len dze ne bialseed naa to Xtiidz Dios, bned naa dien ne pe diidz nroob, dien pe diidz ndzielguic lo to.

2 Bend naa dien peraa nseed naa to, sinque miñe nac zhiwseed Jesús miñ co bialne naa, zeena gacnan to cho nac me ni pe nac ne pquia me lo cruz.

3 Lega gzhe gzhe rac naa, haxta rzhidz naa, rdzieeb naa no naa lo to.

4 Zeene laa naa psilo bne Xtiidz Dios lo to i, gon to ganle ib bned naa zigne rnee grë zha ne nac zha rac lo guidzliu rii; per blu Espíritu Sant ganle nacda beelze pe wseed, ni blu ganle pa lotaa poder ne rap Dios.

5 Sca bne naa lo to, sac laa naa racladz zha ne gbig sëëb xnëz Dios, me gnalo zho, gnalod zho grë miñe nac xquielrac miech.

⁶ Parga nli no zaatne rnee no grë diidz nroob, diidz ndzielguic, per laa min co rnee no lo grë zha ne rienraa zha nac Xtiidz Dios, ni nacdgaaw zigne nac grë xtiidz ndzielguic grëraa miech, grë diidz ne rleynie grë zha rnabey ne no lo guidzliu rii; sac zigtaa zhaw, zigtagaa zhiwseed zhow, ncuaañe tibrded naca.

⁷ Grë diidz ne rnee no, ndzielguic naca, sac zhiwseed Diosa, lëë xquielrac me ga. Ndzielguica, sac ga rlu me zha no guic me csilaa me miech gdziñ zho lo guielndzon ne no me; gocnand miecha padzeela, per nolew zeene bzaa me guidzliu.

⁸ Grë miech ne no len dze rii, rioguicd zho zha nac xquielrac Dios; sac telne nioguic zhow nabeyd zho nquia men ndzon ne nac Jesús ga lo cruz.

⁹ Zigne zhobneeque lo Xtiidz Dios, zaatne rnee:

Ncuaañe waltaa gard guien miech,
nac grë minë quianiele Dios gdeed me lo grë zha ne nlipaa gbig lo me gleynie zho me.

Ncuaañe choot gard gana, ncuaañe choot gard gona.

¹⁰ Sangue no laa no ndionlew, sac pxeel me zhiEspíritu me blu lo no zha naca, men co nan grëse minë no guic me.

¹¹ Zig nacse tib miech, grielod gacnanpaa ne dien pe nac minë no guic zho, pe nacga minë rza zdoo zho, loxaque zhiespirituse zho nana; scaque Dios, loxaque zhiEspíritu me nan grëse minë no guic me gun me.

¹² Ni tel no, Espiritu co nacie no (nacnied no espíritu ne quianzë lo guidzliu rii), ni ible laa Dios pxeel me lo no zeena gacndion no zha nactaa grë ncuaañe nole guic Dios gneedz me lo ne.

¹³ Zeene rzeet no grë guielnzaac co, laa no rneew zigne rneedz zhiEspiritu me guielbiini lo no, rneed now zigne riab guic grë zha rac ne no lo guidzliu rii. Laa no rnee grë min co zigne rlu zhiEspiritu mew, ni ible laaw nac par grë zha ne rioguicle zha racladz Espiritu co.

¹⁴ Grë zha ne nacnied zhiEspiritu Dios, cholze miech nac zho, grielod tsoguic zho zha nac grë minë rlu Espiritu co lo no. Rzac zho ncuaañe paat rquiind naca, sac grieelod guien zhow ne zhase.

¹⁵ Sangue zha ne rioguicle zha racladz Espiritu co, rien zho pe nac minë rlu me.

¹⁶ Ni nligaa zha guien zhow, zigne zhobneeque lo Xtiidz Dios, zaatne rnee: "Choot grieelod gacnan pe nac minë no guic Dios gun me, choot grieelod glu lo me pe nac minë no gun me." Per no, ndion now, sac grë ncuaañe nan Jesús, bneedz me diidz lo no ye no gocndiona.

3

Gnalod zho samiech zho

¹ Bets, bzian, ne nligaa gard grielo gne naa lo to zigne rne naa lo grë zha ne rioguicle zha nac minë racladz zhiEspiritu Dios, sinque tibaque laa naa rne lo to zigne rne naa lo grëraa miech guidzliu, sac rrieequia bii mëdyeen nac to lo zhiwseed Jesús.

² Niapse ncuaañe ligase ziseed naa to, laa ne cseed naa to ncuaañe ndzielguic. Rrieequia nidzse nonedz naa quiaye to, laa ne gow to grë ncuaañe row zha gol. Haxta niinagaa gard tsoguic to zha nac grë minë ndzielguic,

³ sacne laa to bii zienal minë run miech guidzliu, laa ne gun to minë racladz Dios. Golguien ganle zha rac to, no to rlozhd glëëlsa to, rlozhd tillsa to. ¡Led squid gon no gac zha ne nole xnëz Dios!

4 Pe i na rriee bla to rnee: “Teḷ no xnēz Pabl no no”, rrieequegaa zla zha ne rnee: “Teḷ no xnēz Apol no no.” Gase rlu ganḷe zienalḷe to miṇe racladz Dios, sinque laa to zienalḷ miṇe no guic to.

5 Nana, ¿cho nac Pabl, chogaa nac Apol parne no yquiaaqui tsodil to? Nli no biadseed to Xtiiḷz Dios, per tib ngunḷziin winse nac no lo me, bdziuuṇ no miṇe rnabey me no.

6 Nac cuent rii zig nac tib guielḡon, naa blo bni liu, laa Apol bgaala; per Dios nac meṇ ne bnabey blana ni me pchooba.

7 Goḷwi sca ganḷe Diosse nac meṇ non, sac me pchoob bni co, teḷ no peet ncuaaṇe nroob bdziuuṇd no, lēē gḷib tib bloo bni liu, stib bgaala.

8 Zigtaa zha ne bloo bni liuw, zigtagaa zha ne bgaala, lal nac zho grop zho; ni Diosse nac meṇ ne gdeed miṇe rieguialḷ zho tib tib zho por dziin ne beēn zho.

9 Tib ngunḷziin winse nac no lo Dios grop no Apol; laa to nac zig tib lē liu ne quiayan Dios, zig tib yu ne quiazaagaa me.

10 Pa lotaa wen Dios, sac bzooblo me naa naa psilo yu co, ni blu me lo naa zhapaa none tsaaw. Nli naa bgaa blee xcimienta, per niina zhaale zha ne nosoquiaw. Tib tib zha ne nosoquia yu co, none guieṇ zho zaacse gzhixcuua zhow, tsienalḷ zho zigne nacse xcimienta ga,

11 sac goṇ nod pe nacne csēēb zho stib cimient, tibaque cimient no, lēē cimient co nac Jesús.

12 |Laa cimient co nole! Nana no zho gzaa yu co niapse guiib or, niapse guiib plat, no zho gzaaw grē quie niazh, no zho gzaaw yag, nogaa zho gzaaw grē pe guizh, pe yag xiidgaa.

13 Zeene gḷzin dze ne laa Jesús gun guielḷwxtis, ga glu dien zha nac xtsiin zho; sac galḷ dze co grēsew laaw none ted lo gui, ga glu dienḷ pa miṇ lēbraa.

14 Zha ne pquiin ncuaaṇe rlēb lo gui, ib tedsod zgaa zho miṇe rieguialḷ zho gdeed Dios lo zho;

15 laa zha ne pquingaa grē ncuaaṇe znuse rec, mbe scase nitlo xtsiin zho. Peet ycaaniad zho, haxta zha pense teḷ zha laa zho lo gui co, zigne rzac zha ne rec lidz.

16 Goḷgacnaṇ ganḷe xyadoo Dios goṇ nac to, sacne zdoo to rbēz zhiEspíritu me.

17 Teḷ xyadoo Dios, tib yadoo mbe, tib yadoo nda naca; gacxe waa, zha ne gnitlow ib tedsod znitlo Dios zho.

18 Goḷguieṇ sca zaacse goḷgac, teḷ no zha ne rzac nroob rac zho wseed lo guidzliu rii, gnalod zho miṇ co; nend leḷ lo co no zho, ygaad zho miṇe nacpaa guielḷrac, guielḷrac ne rneedz Dios.

19 Sac goṇ grē guielḷrac ne no lo guidzliu rii, ncuaaṇe beelze naca nēz lo Dios. Zigne raquietague lo Xtiiḷz me zaatne rnee: “Grē zha rac ne no lo guidzliu rii, lēēque lo grē guielḷrac ne zienalḷ zho, ga rlu Dios ganḷe paat rquiinda.”

20 No stib zaatne rnee: “Naṇḷe Dios grē zhgab ne nonie guic grē zha rac, ncuaaṇe paat rquiinda.”

21 Tsode to sca lozhd gacniats to dienḷ cho xnēz mieḷḷ guidzliu rii no to, goḷguieṇ ganḷe grētaa ncuaaṇe no, laa Dios psana par yquiina lo to.

22 Zig nac guidzliu, guielḷmban, guielḷgut, ladznia to now, niicle ncuaaṇe no niinaw, ncuaaṇe naragaa ziaada, cheṇ tow; haxta Pabl, Apol, Pedr, ib laa no zo nu par dziuuṇ no xyudar to.

23 Grēse to tibaque xnēz meṇ ne no to, lēē meṇ co nac Jesús, meṇ ne pxeel Dios.

4

Zha rzac zha ne rienee xtiidz Dios

¹ Golguien sca tib moz winse nac no lo Jesús, laa me bzoo no noseed no miech xtiidz me mine gocnand miech padzeela.

² Ni zha ne gon znu run tib dziin, ible none nguzobdiidz gac zho lo men ne rnabey zho.

³ Gacxe waa tel zha rzac to naa, tel zha rzacгаа grëraa miech naa, peet ziened guic naa. Haxta ni mine rzaac naa nac naa, peet nonda, rieguiald guiep naa znutaa znutaa nac mine noyun naa.

⁴ Nli peet dzeb nonied guic naa guiep naa nend cho pe glisqui lo naa, per led mincod gni naa ni tib dol rapdraa naa; loxaque Dios nan zha nac naa, me gneedz mine gagual naa.

⁵ Gacxe waa, gunde to ne glote to guiab dien cho nac zha ne wenraa; sac min co gun men ne rnabey ne gal dze ne laa me guiaad. Gal dze co, me cxobnen ganle zhapaa nac ne tib tib ne, haxta grë mine rza guic ne, mine no zdoo ne, laaw glu me; grë no ne nodziuu no xtsiin me, dze co laa me gneedz mine riogualpaa no tib tib no.

⁶ Bets, bzian, niina ne nozet naa no lo to nu grop no Apol, quiayunnond naa naa, niicle nosanwindгаа naa me. Ga sca ganle golwi, zeena cseed to gban to zigne nac Xtiidz Dios, tsode to lozhd dien cho non, chogaa nond.

⁷ Stiba, ¿cho nadien në lo to ne gunnon to to? Grë ncuaañe rap to, grë ncuaañe rac to, ¿niacxe led Diosd bneedza lo to? Dios name bneedza lo to, ¿pe nac dzigo no to rlozhd gacniats to zig nac zeene por xquielliger to bgaa tow?

⁸ Niats rac to, masaque rzac to grële zhiwseed Dios nan to, gaxle zo to lo me, haxta rzac to tole nac zha rnabey, paat rquiindraa no. Wenzhe tebaa nligaa zha rnabeyle nac to, zeena haxta ye no zley no.

⁹ No hor rzaac naa, diunavez win psan Dios no ne nac no zha ne nonee xtiidz me, loxaque lo no rwi miech, rwi grë anjl dien zha rac no; zig run miech rieso zho lo zha ne rnabey zho ret.

¹⁰ Ne znu quiazziuu no xtsiin Jesús, masaque zha yozh nac no lo miech, laa to gon xquizh me zha rien nac to lo zho. Zha nsis, zha zozhidzle rzoob zho no, laa to zha ndaan, zha ndip nac to. Masaque zha nziuu nac to lo zho, laa no rzac zho ni gand zho lo no.

¹¹ Haxta lo nadze blactaa zaatne retgbin no, zaatne retnis no, per ni lidz no, per ni lar ne dziaacw no guiend, rdib rdzaag no rdziuu no dziin rdziniaa no ncuaañe rquiin no.

¹² Ni rlozh ga rreeque miech rsacsi zho no. Rreequia zha ne rdzibdee no, per rdziuund no gdzibdeequ no zho, sinque mazd rnab no lo Dios gunlay me zho; zha ne rtsidil no, rdziuuncasd no zho.

¹³ Rreequia zha ne në rnee lo no, per no, diidz wen rtsire no lo zho. Masaque rzac miech no, zig rzac zho grë ncuaañe paat rquiindraa, zig rzac zho grë ncuaañe nole lo guizh.

¹⁴ Laa naa rzet grë min rii lo to, per nacda par gunctoladz naa to, sinque laa naa rzeta zeena guien to zaacse gac to, golguien ganle rleynie naa to, rzaac naa to zig tib xpëed naa.

¹⁵ Niicle niaca mine ndal zha ne guidseed to i, niicxe guiaad nzian mil zho waa, per led grëd zho tsoxcopaa to zig rioxco tib dad xpëed zho. Zigne rne naa ga, xpëed naa nac to, rreequia pxoz to nac naa, sac gon naa glo bialne xtiidz Dios lo to, laa to bzëeb xnëz Jesús.

¹⁶ Goltsocxo sca, golban zigne mban naa.

¹⁷ Ni ible mincopaa gon laa naa rxel Timoté ziaad lo to i, lëë stib xpëed naa i, ne nligaa rleynie naa me, tib zha nguzobdiidz nac me lo men ne rnabey me. Laa me ziaad i, me gzodiidz lo to ganle zigne rseed naa miech grëse zaatne ziyateed naa, scagaa noxco naa mban naaw.

¹⁸ Rien naa no bla niats ne nac to i, rzac nlidraa guaial naa lo to i stib.

¹⁹ Gacnan zho ganle, gneedzse Dios diidz, ible laa naa none guaialniob, dzigo bii zdzian ne dien pe nli na nacnie zho xpoder Dios, te loxaque rnee zho ye.

²⁰ Sac gon zha ne ngab xnëz Dios, grë mine rnee zho none glu nacnie zho xpoder me, nacda loxaque diidzse.

²¹ ¿To nadien zha racladz to? ¿Pe rdziladz to guaial naa guaialgactox naa lo to i, te mazd wen ye niapse diidz ndooladz, diidz nex guaialne naa lo to?

5

Zha ne runctal xtol

¹ Zëeb diidz gon, lad to i no tib zha bgui ne quiaayun tib dol nroob; per ni grëraa miech ne gard gliladz Xtiidz Dios rund min co. Bin naa lëëque xniaa pchoob zho quiangob zho.

² ¡Yo na ne rzac to grële zhiwseed Dios nan to, gaxle zo to lo me! ¡Laa ne ctoladz to, laa ne tso to guielnë, cuee to zha qui lad to, le! no to rlozhd gacniats to!

³ Niicle ne zozhaald naa lo to i, per zeene bin naaw tibaque nonie guic naa zha gaca. Nu laa naa gni lo to ganle zha rieguaial gac zha co:

⁴ Grë to ne nac to zha ne ngab lo Jesús, rnab naa lo to ycaalsa to zigne rnabey me. Ndionle ne ganle zeene laa to ycaalsa, ga zo Jesús lo to, scagaa naa, golgun cuent lo to i zo naa.

⁵ Squi ndxie to grë to, golzonëz zha co, golcueegazh zho lo to i, tsie zho tsietobe zho ladznia mendox, ga tednë xcuerp zho guien zho ganle pe noyun zho; nan new togo zzhixcuaa zho stib, zeena ycaania Jesús zho gal dze ne laa me gbiire guaiaad.

⁶ ¡Xlëse gon squitaa racniats to rzac to zha mbe nac to, ni ranzde to zha ne quiaayun doldox qui! ¡Pe riende to telne glisquide to mine quiaayun zho, ib tedsd zrieequiaraa zha ne squi gunctal xtol!

⁷ Zha ne squi nac, masaque nac zho zig nac grë guielguidzdox ne znuse rded; golcueegazh zho sca, zeena ine mbe gac to nëz lo Dios, tete to guielguidz qui. Golguien ganle laa Jesús psanmbele ne, mincopaa gut me, goc me gon nëz lo Dios zig carner yeen ne rgogon zho lo me lni Pascw.

⁸ Golgotsaa gban ne zigne racladz Dios, grëse tel zha wban ne glo, grëse guielyozh, grëse guielntseeb ne bdziuun ne, none csaan new grësew. Ndzinli sca golgac, goltsienal mine nac diidzli; none mbe gac to nëz lo Dios, zig quietxtil ne notsd ncobi.

⁹ Lo stib guits ne pxel naa lo to ga, laa naa psole diidz lo to ganle ctsieelsade to grë miech yozh ne ndzinlid mban.

¹⁰ Zeene sca pso naa diidz lo to, guiabde to togo naca parne ctsieelsadraa to grë zha ne gard gliladz Xtiidz Dios, zha ne rquiangob zha ne led tsieeld, grë zha ne zienal loxaque gunlo dimi, grë zha ne run guielgbaan, grëga zha ne rnalo grë mdio. Led zha coda, sac laga mban ne lo guidzliu rii, ible zanlsa ne grë ne zho.

¹¹ Sinque zha ne bzet naa ga ctsieelsade to, nac zha ne nacle diidz xnëz Dios no zho, ni noque zho quiaayunctal zho xtol zho, no zho rquiangob zha ne led tsieeld zho, no zho zienal loxaque gunlo dimi, zhiga zhiga laa ne gleynie zho Dios le! zhaa ncuane rleynieraa zho, no zho rquiadiidzguizh samiech,

no zho rzudz, nogaa zho ruṅ guielgbaan. Ne nligaa zha ne sca nac, per ni tib guielwagw gowniede to zho.

¹² Tel grëraa zha ne gard gliladz Xtiidz Diosa, led ned riogual glisqui miṅe quiayun zho, Dios nac men ne guṅquizh zhow.

¹³ Sangue zha ne nacgrë ne, zeene noyun zho tib ncuaaṅe ndzinlid, ib rieguial glisqui new lo zho. Gacxe nana sca, zha ne squi quiayunctal xtol i, golcueegazh zho lad to, ni spalal gandzedraa to zho.

6

Zha none gac guielwxtis

¹ Laa to gocnanle ganle, to rieguial glisqui tel pe nac ncuaaṅe nonguield ruṅ zha ne nacgrë to. Lëda i gon ruṅ to, zeene pe tib diḷ rap to, lëëled zie to lo wxtis laa ne bgig to lo zha ne nacgrë to, zha csiooglo lo xtiḷ to.

² ¿Niacxe nande to zha ne ngab xnëz Dios, zha co cobey zha nac xtol grëraa miech zeene gal dze ne laa Dios gnabeya? ¿Pe nac dzigo grieelod tose csiooglo lo tel pe diḷ win ne rap to?

³ Haxta grë anjl name, ne gon cobey pe nac grë miṅe quiayun zho. Gacxe waa, grë diḷ ne rac lo guielmban rii, ne riogual cobey zha guiooglo low.

⁴ Sca gon guṅ to, led node to, rradse pew laa to ziele lo wxtis.

⁵ ¿Pe ni tib lë guielto guiend lo to? Lo grë to, ¿niacxe goon guiend zha ne grieelo gnee lo to, cuëz lo xtiḷ to?

⁶ Nazdpaa rdziladz to diḷ, ¿pe i na lëëque zha ne nacgrë to quiadiḷnie to, ni rlozh ga zieque to zienie to xtiḷ to lo zha ne riladzd Dios?

⁷ Pe riende to tib guieltodoxle i squi no to lëëque to quiadiḷsa. Mazd golxecw tel cho pe ruṅ to.

⁸ Mazdraa gon mbana squi no to rsacsi to miech, ni haxta zha ne nacgrë to rsacsi to.

⁹ Nanle to ganle zha ne squi ruṅ guielntseeb, grieelod gdziṅ zho zaatne rnabey Dios. T sieniewguite guic to sca. Goḷsoladz ganle grëse zha ne ruṅ guielyozh:

zig nac zha ne rquiangob zha ne led tsieeld zho,

zig nac zha ne rquiangob zha ne nole tsieel,

zig nac zha ne nac mrazh,

zig nac zha ne rnalo grë mdio laa ne gnalo zho Dios,

ni tib zho grieelod gdziṅ zaatne rnabey Dios.

¹⁰ Scaque:

zha ne nac ngbaan,

zha ne zienie guic loxaque dieṅ zha guṅlo dimi,

zha ne nac ngonziu,

zha ne rzhixcuaa diidzguizh,

zha ne ruṅgüet miech par cuan zho zho;

ni tib zho ygaad guielnzaac co.

¹¹ Blalaa to bio lo grë dol co glo, sangue niina miech mbele nac to nëz lo Dios, laa Jesús ni Espiritu Sant psanle to zig tib zha ne peet xtol d, laa me psanwenle to nëz lo Dios.

Guṅctald zho xtol zho

¹² Nli ndal ncuaaṅe zac guṅ ne, guṅctalda xtol ne, niicle choot rradgaaw, per led grëda rquiin. Tel naa, niicle no ncuaaṅe zrieelo guṅ naa, per ruṅd naaw; sac racladzd naa guien naaw, lozh ga lëëw gnabey naa.

¹³ Zëëb diidz rnee zho: “Laa guielwagw biaan par gow miecha, scagaa zdoos zho laaw biaan par tsodzëw guielwagw.” Nli scaw, per guiabd ne togo por miṅ

co lega gowcho ne. Pa rquiin ne lega tedso gow ne, sac gon zigtaa zdoo new, zigtagaa guielwagwa, zdziin dze ne gnitlo Dios. Guielwagw ga na, sangue grē guielyozh nerun miech rquiangob zho zha ne led tseeled zho, biaan ne par dziuun ne min co, sinque laa ne biaan par gban ne zigne rdziladz Dios, sac me rnabey ne.

¹⁴ Tel new nitlod ne, sac gon zigne bleeban Dios Jesús con poder ne rap me, scaque zbeeban me ne zeene laa dze co gdziin.

¹⁵ Golgacnan ganle, rrieequia lēē tiblē xcuerp Jesús nu gon nac ne tib tib ne. Nana, ¿pe nonguēla ga dzigo gdzieel tib lē xcuerp me ga xcuerp tib wnaa ro nēz? ¡Nonguēlda gon!

¹⁶ Sac gon zha ne raanie tib wnaa ro nēz, rrieequia tibaque rac zho ga grop zho wnaa co. Rnee lo Xtiidz Dios, par me: “Zeene laa mgui racgrop tib wnaa, tibaque miech rac zho ga grop zho.”

¹⁷ Scagaa zha ne rzēēb xnēz Jesús, tibaque rac zho grop zho me, zhiEspíritu me racnie zho.

¹⁸ Gacxe waa, gunde to guielyozh yquiangob to zha ne led tseeelde to. Lo grē dol ne no, min riise nac mine xcuerppaa miech rguitnie zho. Sac gon zha ne run guielyozh co, masaque rsanbeed zho zho ga.

¹⁹ Golguien ganle, zha ne nole xnēz Dios, masaque zha nac zig tib yadoo zaatne rbēz Espíritu Sant, Espíritu ne rdeed Dios rbannie zho. Led nedraa rnabey xcuerp ne,

²⁰ Diosle rnabeya, sac gon bzhiile me ne ni nroob gocnon ne lo me. Gacxe waa, zigtaa xcuerp new, zigtaa xpensar new, gotsaa yquiin new par cxobnen ne ganle pa lotaa men nroob nac me.

7

Rtsire Pabl lo zhiwnabdiidz zho

¹ Lo guits ne pxeel to lo naa, nzian ncuane rnabdiidz to, nu ganle laa naa ctsire lo wnabdiidz co: nli wena, telne niaca mine grielow ctsieelniaid ne.

² Per parne tsod pe yquiaaqui cho gon guielyozh, tsonie zho zha ne led tseeled zho, mazd wena zigtaa mguiw, zigtaa wnaaw ctsieelnia zho, tib tib zho gbanniese zho tseeel zho zigne rieguiāla.

³ Zha ne ptsieelniale, zig nac mgui none gnee zho lo tseeel zho zeene racladz me, scaquegaa wnaa zeene racladz tseeel zho gnee lo zho none siguiel zho.

⁴ Sac gon wnaa ne rtsieelnia, led zhadraa rnabey xcuerp zho, sinque tseeel-le zho rnabeya; scaquegaa mgui zeene laa zho rtsieelnia, tseeel-le zho rnabey xcuerp zho.

⁵ Golguien sca, niicle mguiw niicle wnaaw nodne yca zho xcuerp zho lo tseeel zho. Laa telne rzacgaa zho none yquiind zho tseeel zho tib blalaa dze, sac rquiabladz zho gzodiidznie zho Dios, wena totsaque guiaan zhow diidz grop zho. Per zigne ted ga, gbiireque gnee zho lo tseeel zho, sac gon zha ne grielod cxecw, nend ccheep mendox zho gon zho guielyozh.

⁶ Ne znu rne naa lo to, guiabde to nagon togo rne naa nopaa ctsieelnia to.

⁷ Tel naa, rzac naa wena tebaa grēse to znu ctsieelniaid, zigne nac naa; per na ncuane gacd ga, sacne zhaase zhaase nac ne tib tib ne. No zho pso Dios ctsieelnia, nogaa zho pso me ctsieelniaid, per rley zho mban zho zigne nac zho.

⁸ Zig nac grē zha ne bii tib, grēgaa zha ne gutle tseeel, wena tebaa grielo scase guiaan zho,

⁹ per telne rien zho lēbd xcuerp zho, dzigo mazd ctsieelnia zho. Mazd wena ctsieelnia zho, lēdle so zho tib zho ni tel rec rdzu zho.

10 Sangue zha ne ptsieelniale, laa naa rso diidz lo zho csaand zho tsieel zho, ni nacda xtidz naa, sinque ible sca rnabey Dios.

11 Laa tel zha ne guiaabгаа csaan zho tsieel zho, zaca, per lëëraasi grieelodraa gbiire ctsieelnia zho, mazd mine naca telne zrieelow ycatsieel zho stib, o guiaangaa zho tipse zho.

12 Nu na ganle laa naa ngegaa chop lan xtidz naa lo zha ne led yed tsieel riladz Xtiidz Dios; tib diidzse naca gni naaw, nacda mine rnabeyppaa Dios. Zha bgui ne mbannie tib wnaa ne riladz Xtiidz Dios, per telne rio guic wnaa gbannie wnaa zho, nodne csaan zho wnaa.

13 Scaqueгаа wnaa ne mbannie tib mgui ne riladz Xtiidz Dios, nod csaan zho mgui co telne riopaa guic mgui gbannie mgui zho.

14 Zigtaa mguiw, zigtagaa wnaaw, zha ne sca mbannie tib zha ne riladzle xtiidz Dios, ye zho runlay Dios ga, nenda haxta zio dze ne ye zho gliladz xtiidz me. Sac telne ctso zho, laa ne bgigraa xpëed zho lo Dios, lel znu sozit mëed.

15 Nana, telne zhalгаа zha ne riladz Xtiidz Dios ga, rnab csaanla zho, peet nacda maase ctso zho, nod pe nacne gzoobguicpaa tsieel zho lo zho cuëz zho. Sac gon zha ne riladzle Xtiidz Dios, laa me bredz zho parne zaacse gban zho, bredzd me zho par tsodil zho;

16 stiba, nand zho dien pe zdziñ dze ne gliladz tsieel zho Xtiidz Dios.

17 Mine naca tib tib to goltsoxco gun to mine rdziladz Dios. Zigtaa zha ne pso me ctsieelnia, zigtagaa zha ne pso me scase guiaan, sca none gac to; scaгаа zha ne ncaatsieel-le zeene riladz zho xtiidz me, none sca guiaan zho niicle telne riladz tsieel zho xtiidz me. Grëse zha ne ngab lo me, diidz rii rso naa lo zho.

18 Zig nac grë zha ne nole bey xcuerp zeene laa zho rzëeb xnëz me, sca no zho bey co gund zho ne yqueets zhow. Zha ne na nodгаа bey co zeene rzëeb zho xnëz me, scaque nod pe nacne tsopaa zho bey co.

19 Mine mazdraa non lo me, gban zho zigne rdziladz me, guiendraa ne dien cho no bey, chogaa nada.

20 Zigne nreque naa ga, grëse zha ne rzëeb xnëz Dios, tel zha nac zho zeene laa me bredz zho, scase none guiaan zho.

21 Zig nac zha ne nac ngundziin lo ben, peet tsienied guic zho guiab zho dien zha gree zho ladznia zha ne rnabey zho; per telne gdeeda diidz, zac tsoxco zho dien zha gree zho lo zha co.

22 Zha ne sca nac ngundziin lo ben zeene bzëeb zho xnëz Dios, guien zho ganle rrieequia zonlaale zho, sac gon laa Jesús psilaale zho lo grëtaa dol ne bio zho. Zha ne nacdгаа ngundziin lo ben zeene bzëeb zho xnëz Dios, guien zho ganle tib ngundziinle nac zho lo Jesús niina, me rnabey zho.

23 Golguien ganle, grëse to laa Dios bzhiile to ni nroob goconon to, gacxe waa mele rnabey to; ni toгаа, lo me none gun to dziin, gdeete to diidz lega gnabey mieh to.

24 Sca nasca gon bets gaca, tib tib to zigne nacse to zeene bzëeb to xnëz Dios scase no gban to, ine gleynie to me.

25 Stib wnabdiidz ne run to ga dien zha gac zha ne gard ctsieelnia, gneli naa lo to ganle, guien tib xley Dios mine gnabeyppaa dien zha gac zho. Per golquiaadiag mine gne naa nu ganle zha rzaac naa, nanle to ganle, zha ne znu rquia zdoos Dios rbedz me, mine rquiin min co rnee zho.

26 Grë ne ne nac ne zha ne riladz Xtiidz Dios len dze rii, nligaa ngan nac lo xquielmban ne, gane zoot naa wena zha ne sca gard ctsieelnia, maase guiaantib zho.

27 Zha bgui ne na ptsieelnialeгаа, grielod gni naa guiaantib zho; sca mbannie zho tsieel zho; per tel zha ne gard ctsieelniaw, mazd sobd guic zho ctsieelnia zho.

28 Zha ne racladzpagaa ctsieelnia, zigtaa mguiw zigtaa wnaaw, led doid ga gun zho telne laa zho ctsieelnia; per gacnañ zho ganle, zeene laa zho pcatsieel-le, ib tedsod nroob guielñe ne gan zho por gre mine noyac len dze rii.

29 Mine none guien to: zhisle nac dze ne so ne lo guidzliu rii, led nroob nac ngbidz ne grielo dziuun ne xtsiin Dios; gacxe waa, zha ne nole tsieel, mazd sac zho zho zig tib zha ne guienñd tsieel.

30 Zha ne quianie dimiw, zha ne no guielbleya, zha ne nogaa guielñew, gdeete zho diidz yca gre ncuaan co lo zho par gun zho xtsiin me.

31 Zha ne bienle runfalte grëtaa ncuane rquin zho, gdeete zho diidz ctse gre ncuaan co lo zho, sac zigtaa guidzliuw, zigtaa gre ncuane no low, zdzin dze ne nitlow.

32 Mine racladz naa peet zhgab ctсед lo to. Golwi ganle, zha bgui ne tib, tiblique zienie guic zho run zho mine rdziladz Dios, mine nac xtsiin me.

33 Laa zha ne no tsieel, grielodraa sca gac zho, sac laa guic zho zienie zha gbannie zho tsieel zho, zha grielo gun zho mine rdziladz me, min co rionieraa guic zho.

34 Scaque gre men wnaa, zha ne tib, rioxcoraa zho run zho mine rdziladz Dios, dib nacse zho rbeeladz zho zho lo xtsiin me. Laa zha ne ptsieelniale, xco ne dien zha gbannie zho tsieel zho, dien zha grielo gun zho mine rdziladz tsieel zho, xco co rioraa zho.

35 Laa naa rne min rii lo to, per guiabde to togo rca naa ctsieelnia to, sinque laaw rne naa parne guien to zha gun to, zeena grielo zaacse gac to gun to mine rnabey Dios.

36 Zha ne quianie wnaa nguieg, telne rzac zho nonguiel da ga scase ted lo xquielnguieg xpëed zho, sinque none ctsieelnia zho, peet nacda, led doid ga ctsieelnia zho.

37 Laa telne rzacгаа zho, wenraaw ctsieelniañd xpëdwnaa zho, ible scale pquiabladz zho guiaan mëed, wenaque ga telne sca rzac zho.

38 Wen ga gun zha ne sca gdeed diidz ctsieelnia xpëdwnaa, per mazdraa wen ga gun zha ne rzac mazd ctsieelniañd xpëed.

39 Nana, wnaa ne retгаа tsieel, nli zeene mban tsieel zho rnabey ley ne tsieelse zho gbannie zho; per zeene laa tsieel zho ret, zac ctsieelnia zho tel cho stib mgui ne racladz zho, totsaque zha ne noque xnëz Diosa.

40 Per tel naa, rzac naa mazdraa wen gban zho telne tsodraa guic zho ctsieelnia zho stib; sca nagon rzaac naa wena, ni led xtiidzde naaw sac rien naa led tibd naa, Espiritu Sant nacie naa.

8

Bëel ne rgogon zho lo mdio

1 Stib wnabdiidz ne run to ga, dien zha nac guielwagw ne rgogon zho lo gre mdio, pe zrieelo gdioowa, te grieloda ye. Zootle na grele to nan min co; per no hor zeene squi rzac ne grelew nan ne, lel racniats ne, laa ne gacndooladz ne gnee ne lo gre zha ne nacgre ne dien zha gun zho parne tsoguicraa zho Xtiidz Dios.

2 Zha ne rzac grelew rac zho, ga rlu zho ganle peet rienñd zho.

3 Tel Dios runbey me tib tib miech, nanpaa me cho nac zha ne rleynie me.

⁴ Zhapaa dzigo gaca, ¿pe wena dioow ne xpëel grë ma ne rgogon zho lo mdio ga, te wenda ye? Ndionle ne ganle grë mdio ne riegan miech led Diosd ga, tibaque men ne nac Dios no.

⁵ No zho rzac nziandox Dios, nziandox men rnabey no, no me no gbaa, nogaa me no lo guidzliu,

⁶ sangue ne ndion ne ganle tibaque Dios no, lëe men co nac Pxoze ne, me psan grëtaa ncuane no, me psan ne parne dziuunbey ne me. Ni scaquegaa, tibaque men ne rnabey ne, lëe me ga nac Jesús, me bzaa grëtaa ncuane no, me nac men ne rneedz xquielmban ne.

⁷ Per no zha ne riladzle Xtiidz Dios, bii gardaque guien zho ne tibaque Dios no. Tibaque rzac zho mban mdio, gane zeene rquiin zho bëel ne rgogon zho lo mdio racchop guic zho, lëeque zha runctal xtol zho ga sca run zho.

⁸ Golguien sca, tel Dios rwid me dien cho pe row. Guiabd ne togo por gow ne o gowdgaa ne bëel co laa ne guianznziuu lo me.

⁹ Laa to nanle nasca, peet nacda yquiin to guielwagw co, per scagaa golcobey adel min co yquiaaqui gunctal to xtol tib zha ne squi bii racchop guic.

¹⁰ Sac gon, nenda tibliladz to zob to zaatne riegan grë miech mdio noquiin to bëel co, ni gan tib zha ne bii racchop guica. Zeene gan zho to, nend yeque zho gbig gow zhow, per zeene lozh ga tibaque laa guic zho tsienie lëda ga been zho.

¹¹ Zha ne sca gun, niicle ne nli rien zho peet nacd ncuane noyun zho ga, per por zha laa zha co gunctal xtol. Gunscade to, golguien ganle ye zho ga psilaa Jesús zeene gut me lo cruz;

¹² gacxe waa, telne sca gun to por to yquiaaqui gun zho tib ncuane rzac zho nonguield, lole Jesús ga quiaayun to falt.

¹³ Min co nagon, tel naa mazd maase gowd naa bëel co, telne por min co yquiaaqui gunctal naa xtol tib zha ne nole xnëz Dios; sac lëda ga gun naa gac naa zig tib quie ne griei ni zho.

9

Min rieguial zha ne run xtsiin Dios

¹ Zigne nagon zac gun to grë ncuane wen ne racladz to, scaquegaa naa, zac gnab naa ncuane wen ne racladz naa. Tel naa gonlo naa Jesús men ne rnabey ne, Dioszhal bzo naa pxeel me naa none naa Xtiidz me. Ne squi ptsëe Dios lo xquielmban to zeene bialseed naa to, i rlu ganle me nacie naa.

² No zha ne rzac nliid Dios pxeel naa, sangue to nanwen to ganle me pxeel naa, sac gonlo to mine ben naa, mine blu naa; ni scagaa niina, lo xquielmban to i rlu ganle ne nli xtsiin me quiaayun naa.

³ Grë zha ne sca rzac nliid Dios pxeel naa, rzac zho peet raguiald naa, gacnan zho ganle:

⁴ iRaguial naaw gon! Ni grëragaa zha ne rdziuungza no xtsiin Dios, rioguial no gneedz to ncuane yquiin no, gneedz to zaatne gbiaaz no.

⁵ Tel naa, haxta raguial yquianie naa tib men wnaa ne gac tsiel naa, ine sënie naa me zigne run grëraa zha ne rdziuungza no dziin ri, zig nac Pedr, zig nacgaa grë zha bets men ne rnabey ne.

⁶ ¿Te loxaque grop no Bernabé naye znu zhaaque no dziuun no stib dziin, par gdzinaa no ncuane dioow no?

⁷ Golgan ganle, zig nac zha ne rzëeb lo xtsiin menguiib, ¿niacxe zhaa lo dziin ne rdzinaa zho ncuane row zho rio zho lo xtsiin menguiib? ¿Zha ne rangaa, niacxe rieguiald zho yquiin zho ncuane rac zaatne ran zho? ¿Zha ne na rangaa ma, niacxe rieguiald zho yquiin zho ma zigne racladz zho?

⁸ Guiabde to togo bod guicse naa riab miñe rne naa nu, golgañ ganle haxta lo ley ne psan Moisés

⁹ no tib zaatne rnee: “Zeene guncañ to xcon to dziin gzëeni ma mzion zohobxtil gacmbew, code to guiex ro ma, golsaan gow ma miñe ygaa ro ma.” Golwi ganle zha rnee Dios, nana pe nan to ngonse rquia zdoo me.

¹⁰ Lëda gon, grëse ne rquia zdoo me ne. Ga rlu me ganle, zha ne run xtsiin me, ible rieguial zho ycaa zho miñe non xtsiin zho. Zig nacaque guielgon, zigtaa zha ne rana, zigtagaa zha ne runmbe grë guielnzaac co, ible rieguial zho yquiin zhow.

¹¹ Tel no, rrieequia nazho tib gon i bdziuuñ no biadseed no to Xtiidz Dios, çniacxe rioguiald no dzigo gneedz to ncuaañe yquiin no?

¹² Blalaa zha ne nale griin riaadted lo to i, rnabey zho to rdeed to ncuaañe rquiin zho, çpe lel no dzigo rioguiald gnaba lo to? Mazdraa gon rioguial no gnab now, per haxta lo nadze gard dziuuñ no min co, notaa nan zha rdziniaa no ncuaañe rdioow no; zeena guiaand zdoo to, lozh ga laa to csaan miñe nac Xtiidz Dios.

¹³ Led nanle to ganle, grë zha ne run dziin len xyadoo Dios, psan me diidz grë ncuaañe nac gon, ga xen zho pe yquiin zho, zig nac zha ne run dziin zaatne nac lo pcoog, lo ncuaañe rielogon miech ga, ga rdioob ncuaañe row zho.

¹⁴ Ni scaquegaa psan Jesús diidz, zha ne cseed miech Xtiidz me, ib none lo dziin co gdziniaa zho pe yquiin zho.

¹⁵ Per tel naa gon, waltaa peet gard gnab naa lo miech.

Laa naa rzet min rii lo to, per guiabde to togo run naaw parne csilo to pe gneedz to lo naa. Ib zanañd naa min co, sac rley naa znu quiayazhd naa quiayun naa xtsiin Jesús, mazd maase guetgbin naa, lëdle ctiche zho guielbley rii lo naa.

¹⁶ Niicle ne znu quiayazhd naa quiayun naa dziin rii, per ni lalnu racniatsd naa, sacne ible laa Dios bzo naa par gne naa Xtiidz me lo miech; ni, jprobsaxe naa telne gned naaw!

¹⁷ Noyund naaw par dien pe premio ygaa naa, sac zig rne naa ga Dios bzo naa, me rnabey naa quiayun naaw, masaque nacse naa zig tib ngundziin.

¹⁸ Par naa, lëele premio nu nac guielbley rii ne znu liga quiaseed naa miech Xtiidz Dios, rnabd naa gneedzpaazho ncuaañe yquiin naa niicle ne raguial naa gnab naaw.

Tsoxco zho ygaa zho premio

¹⁹ Siba mazdragaa wena, znu choot noneedzd ncuaañe yquiin naa, sac sca grieelod cho gnabey naa; per niicle ne nagon choot rnabeyd naa, zhaal naa rac naa zig tib ngundziin lo grëse miech, parne gdeeda diidz tso guic zho sëeb zho xnëz Jesús.

²⁰ Gacxe waa zeene no naa lo grë zha Israel, rac naa zigne rac zho, zeena tso guic zho gliladz zho cho nac Jesús. Zeene nogaa naa lo grë zha ne zienal xley zha Israel, niicle ne rnalodraa naa ley, per run naa grë ley ne zienal zho, zeena sca grielo yquiabladz zho sëeb zho xnëz Jesús.

²¹ Scaquegaa zeene no naa lo grë zha ne runbeyd ley co, rioxco naa rac naa zig tib zha ne runbeyda; per guiabd ne togo haxta grë ncuaañe rleyniedraa Dios run naa. Laa naa run min co, zeena ye zho sëeb xnëz Jesús.

²² Grë zha ne pense quiayacnañ zha nac Xtiidz Dios, zeene no naa lo zho, rund naa gne naa grë ncuaañe gard guien zho zha nac, rund naa csanwin naa zho, sac miñe rioxco naa lozh gliladz zho cho nac Dios. Tib tib miech, rguib

naa rac naa zigne rac zho, parne grielo gzodiidz naa lo zho cho nac Jesús, zeena gacnañ zho zha seëb zho xnéz Dios.

²³ Laa naa run min co, parne gdeeda diidz gnee naa Xtiidz Dios grëse lo miech, ni scagaa, gley naa gan naa ye zho yгаа lo guieIndzon ne zhobnee lo Xtiidz Dios.

²⁴ Nanle to ganle zha rzac zha ne rie tib lo corr, nzian zho nac zha ne rie per tibaque zha ne run gan, zha co rcaa tib premio. Golgun cuent nasca tib lo corr i no to, grëse to goltsoxco xoon to zeena grëse to yгаа tib premio.

²⁵ Grë zha ne sca rio tib lo wguit, par grielo gun zho gan rioxco zho ran zho xcuerp zho, rund zho ncuaañe csiaab xfuers zho. Nroob cuidad ne rap zho zho par gun zho gan tib coron guizh nguia ne znuse rgool. Scase nac premio ne rgaa zho, sangue ne gon, laa ne noxco yгаа ne tib premio ne gdzind dze nitlo.

²⁶ Gacxe waa, tel naa tibaque noxco naa dien zha xoonraa naa. Nanpaa naa pa gdzin naa, nacd naa zig zha ne riend dien pa gdzin, zha ne lega rquiaagaa puñet, rdeete zhow zaatne no ygaaw.

²⁷ Ni lalnu rdete naa diidz gac mine racladztaa xcuerp naa, tibaque rnabey naaw parne guiena ncuaañe nonguiel min co none guna, led gunda ncuaañe racladztaaw. Laa naa run min co zeena gun naa gan, sac gon, guieItoadox ga grieequia naa znu no naa none naa lo miech zha gun zho, ni tel lozh ga naapaze biaan bend naa gan.

10

Nodne gleynie miech mdio

¹ Bets, bzian, golsoladz ganle zha bzhaac grë pxozgol ne zha ne sca bzënie Moisés ga. Pxeel Dios tib xcow been ncal zaatne zieetaa zho, ni pteed me zho lo Nisdoo Nizhnie.

² Zigtaa lo xcow cow, zigtaa lo nisdoo cow, masaque rriequia lo co brobnis zho, parne tibaque niac zho niacnie zho Moisés.

³ Grëse zho gon milagr nroob ne been Dios, bnabey me bliaal guietxtil zhan gbaa bdeed me dow zho,

⁴ beencta me nis tib cho quie bdeed me go zho no zho dan bidz co. Lëele Jesús ga bdeed nis co go zho. Lo zho ga zo me, rriequia me ga nac quie ne bda nis go zho, sac mese rzhixcuua lo grëtaa xliaadz miech.

⁵ Niicle scataa gon Dios zho, per led grëd zho bioxco nion xtiidz me, nacne ndal zho bnitlo bioliuse zho dan co.

⁶ Gase na ganle gotsaa gwi ne zha bzhaac zho, zeena gzoobladd ne dziuun ne grë ncuaañe ndzinlid ne been zho.

⁷ Golguien gleyniede to mdio, zigne been zho. Rnee lo Xtiidz Dios: “Blozhse dow zho, go zho, laa zho psilo biee lo zhimdio zho.”

⁸ Gotsaa gwi ne ganle, pe guieInë ne bgaa zho zeene briequia bla zho lega bionie wnaa, tib dzeque bnabey Dios gut galptson mil zho. iNi lalnu tsod guic to gun to min co!

⁹ Ib gunglëede to Dios, sac zha, zeene benngulëe zho me, bnabey me briequia grë meel pquiaa maw zho, ndal zho gut.

¹⁰ Niicle glisquidgaa to tel pe nac mine quiayun me, sac tel zha, sca been palal zho; nacne pxeelaque me anjl ne rnitlo, ndal zho bnitlo anjl co.

¹¹ Sca nagon bzhaac grë pxoz gol ne ga, gotsaa guien ne sca dziuund ne mine been zho, mine been zho ga laaw zhobnee lo Xtiidz Dios parne gacdion new, guien ne zaacse gban ne, ne nac ne miech ne mban len dze rii ne znu ziaadyoble nitlo guidzliu.

¹² Gacxe waa, zha ne rzac mbanpaa zho zigne racladz Dios, none nsin so zho zeena gund zho ncuuane guntal xtol zho.

¹³ Nli no ncuuane rcheep ne guntal ne xtol ne, per nacda ncuuane griin rien. Pe zhidaa miech ne zieded lo min co. Tsod mine guiab ne ib lebd ne griee ne lo. Mine naca none gnalo ne Dios, sac tel me ib csaand me guiab ne tib lo ncuuane glëbd ne griee ne; sca nac xtiidz me, ni mesi gon ctsëed me mine rnee me. Me nac men ne gacniën ne griee lo griee ne low.

¹⁴ Bets, bzian, golguien sca ib none csaan to grë mdio, gnalodraa tow.

¹⁵ Miech nixbiini nac to, grë mine rne naa lo to nu, nan to ganle ncuuane rquiina.

¹⁶ Golwi ganle, zeene rdioow ne guietxtil, rdio ne vin, rdziuun ne xtsee ne been Jesús ga, ga rlu tipse nac ne grë ne nacie ne me.

¹⁷ Niicle ne ndal nac ne, per ne tibaque guietxtil ne rdioow ne, min co gane tibaque cuerp nac ne grë ne, ni lëe xcuerp Jesús ga.

¹⁸ Scaque zha Israel, zeene row zho xpëel ma ne riogon lo Dios, ga rlu zho ne nacie zho me.

¹⁹ Zha ne rnalogaa mdio, zeene row zho grë ncuuane riogon lo mdio, scaque tibaque rac zho grë zho mdio. Per guiabde to tego mban mdio, tego mazdragaa nac bëel ne rgogon zho lo mdio.

²⁰ Mine racladz naa guiën to, zeene sca run grë miech pe rgogon zho lo grë mdio, lo mendox ga rgogon zhow, led lo Diosda. Golguien sca, ib tsiesëbde to lo grë zha ne quaiyownie mdio, zeena gacniede to mendox.

²¹ Lëdraaw ga gon gun to, tel rlozhse rquiin to xtsee ne psan Jesús diidz ga dziuun ne, ni tsieque to tsieguie to, tsietow to zaatne rownie zho mendox.

²² ¡Gunscaade to, gunglëede to Dios! ¡Golguien ganle, lebd ne dzian ne xquieblëe me!

Zha gun zha ne riladze Jesús

²³ Zig rne naa ga: “Nli zac gun ne ncuuane gacladztaa ne, per led grëda nonguiel.” Tel naa, zrieelo gun naa ncuuane gacladztaa naa, per led grëda yquin par gun naa xyudar grëraa zha bets ne, lozh tsoguic zho Xtiidz Dios;

²⁴ sac gon, ib none dzioxco ne grëraa zha ne nacgrë ne.

²⁵ Zig nac grë bëel ne rdo lo lgui, zac gow tow, ib gunde to gnabdiidz to dien zha naca, sac gon nend bëel ne biogon lo mdiow, dzigo laa dzeb co tsonie guic to.

²⁶ Golguien ganle, Dios psan guidzliu, scagaa grëtaa ncuuane no low chen me naca.

²⁷ Zeene tel zha tsiegaa to tib wagw lidz tib zha ne gard gliladz Jesús, bëel ne gneedztaa zho golgowa, per scaque gnabdiidzde to dien zha naca; zeena peet dzeb tsonied zdo to.

²⁸ Per telne grieequia tib zha ne gnë bëel ne biogon lo mdiow, gowde tow; zeena csande to zdo zho.

²⁹ Niicle ne ndionpaa ne led dold ga gun to gow tow, per zha ne gana ga sadol zdo zho.

Nana gnë to: “¿Pe nac dzigo por stib zho griee lo gun naa mine racladz naa?”

³⁰ Tel rded naa xquizh lo Dios zeene pe tib guielwagw ne rquiin naa, ¿pe nac dzigo por mine rzacse stib zho, griee lo gow naaw?”

³¹ Golguien ganle, racda por zha cose; sac grëse ncuuane dziuun ne, haxta ncuuane dioow new, ncuuane dio new, none zeene nodziuun new cxobnen ne ganle pa lotaa men nroob nac Dios.

³² Gotsaa guien ne sca ganle dziuund ne ncuane yquiaaqui csan ne zdoos tib miech, zigtaa zha Israela, zha tib guiedza, zha ne nolegaa xnëz Diosa.

³³ Tel naa, zanaald naa ncuane gdziladz naa naase, sinque rioxco naa grëtaa ncuane run naa, run naaw par gacnie naa grëse miech, zeena grielo toso guic zho gnab zho lo Dios csilaa me zho lo xtol zho.

11

¹ Golwi sca, zigne ran to noxco naa mban naa zigne blu Jesús, scaquegaa to goltsoxco gban to zigne ran to mban naa.

² Bets, bzian, rleyne naa to gon sac tibaque rsoladz to naa, ni rioxco to zienal to grë mine pseed naa to.

³ Per golsoladz ganle: grëse men wnaa, none zha bgui gnabey lo zho, tel zha bgui Jesús rnabey lo zho, zigne rnabey Dios lo me.

⁴ Gacxe waa, tel tib zha bgui yase nozodiidznie zho Dios, quiateedgaa zho xtiidz me, ni zob xombrel zho; xquielto Jesús ga rbee zho.

⁵ Scagaa men wnaa, tel zhoobd bay guic zho ni zo zho nozodiidznie zho Dios, quiateedgaa zho xtiidz me, xquielto mgui ga rbee zho; sac ga rlu zho rond zho mine rnabey mgui.

⁶ Telne racladzdgaa zho gdze lad guic zho, mazd gnabey zho chug guitsguic zho. Laa telne rtoladz zho chuga, rtoladz zho gacruxa, dzigo mazd cxobguic zho xpay zho.

⁷ Grë zha bgui, nod pe nacne gdze lad guic zho, sac choot samiech guidzliu zho rnabeyd lo zho. Zeene bzaa Dios mgui, bzaa me zho zigne nac me, zeena glu zho ganle pa lotaa men non nac me; scagaa wnaa, laa wnaa biaan par glu zho ganle non mgui.

⁸ Gotsaa gwi ne ganle, letxe xcuxtid wnaa waa biao mgui, sinque xcuxti mgui brie biao wnaa.

⁹ Stiba, zeene psan Dios wnaa, ib laa me psan zho par gacnie zho mgui.

¹⁰ Gacxe nagon waa ib none gdze lad guic wnaa, zeena glu ganle nguzobdizd zho lo zha ne rnabey zho; haxta grë anjl ne no gbaa zley zho gan zho min co.

¹¹ Per guiabde to togo peet nond wnaa, golsoladz ganle psanle Dios diidz zigtaa mguiw, zigtaa wnaaw rquiinlsa zho; sac telne guien wnaa guien mgui, telne guien dgaa mgui guien wnaa.

¹² Gotsaa gwi ne ganle, zeene biao wnaa cho mgui brie dzit ne biao wnaa, per zeene laa wnaa biaan, haxta lo nadze wnaale rzo mgui; zigtaa mguiw, zigtaa wnaaw Dios psan zho grop zho.

¹³ ¿To nadien zha rzac to? ¿Pe nli nonguiel a gdze lad guic wnaa zeene nonab zho lo Dios, te nonguiel da ye?

¹⁴ Golwi ganle ib no gdze guic wnaa, biaanle zho rroob guits guic zho parne ctsew lad guic zho;

¹⁵ tel zha, haxta rleyne zhow zeene scataa noola, sangue ne nac ne zha bgui, guiel tow ga guiool guitsguic ne.

¹⁶ Tel nogaa zha ne rzac led scada, maase gnee zho. Per ible znu gon noseed no miech, ni grëragaa zha ne rliladzle Xtiidz Dios, rien zho ne nli scaw.

Zha none gac xtsee ne psan Jesús

¹⁷ Bets, bzian, ne nligaa rley naa tibaque rsoladz to naa, per bin naa zeene rcaalsa to row to xtsee ne psan Jesús diidz, laa ne gley to ycaalsa to, lel quiaayunctal to xtol to. Mincosi nagon ni lalnu riod zdoos naaw.

¹⁸ Ziyon naa gzobtaa zeene rcaalsa to, pe na tsiegald til diidz to, laa ne tipse gac to lel rleëlsa to. Ni rgobey naa nli scaw.

¹⁹ Rien naa masaque rzac to ible sca none gac to, parne glupaa cho nac zha ne non xtiidz, zeena guiannziiuu zho lo miech.

²⁰ Led zhixtseedraa Jesús i gon run to.

²¹ Sac ron naa zeene laa to row, masaque lëëled rac to row to ncuuaane zienie to, ib rwide to no zha ne rdziñ ga quianied zho nroob ncuuaane gow zho. Squi rzob to rowcho to, haxta rzudz to; laa zha mbanse rac zho grielod gow zho ncuuaane row to.

²² Mod guienid lidz to, ga sob to gow to, guie to haxta zaatne guieltaa to, led node to runctoladz to zha ne squi guienid pe yquuin? I gon rlu to rleyniede to grë zha ne no xnëz Dios. iNi palal gon rdziguiend naa ncuuaane noyuu to i!

²³ Golsoladz ganle zha nac ne laa xtsee rii biaan, Jesús psañ diidz gaca, sca gocnan naaw ni scagaa biallu naaw lo to. Wdze ne bnaaz zho Jesús ga, zeene blozh dowxtseenie me xpëëdscuel me, bzheñ me tib quietxtil, bdeed me xquizh lo Dios;

²⁴ blozhse bdeed me xquizh, nzian lë been me quietxtil co, bdeed mew lo zho rëb me: "Golquiina, rrieequia lëë xcuerp naa nu, sac gon znu gon zho xcuerp naa parne csilaa naa to grë to. Golgun xtsee rii, parne glu to ganle tibaque rsoladz to naa."

²⁵ Blozh ga, scaque bzheñ me tib cop no vin, rëb me lo zho: "Lëë stib trat cub nu gon riaan Dios grë me miech, rrieequia xchen naa nu nac vin rii, ren ne tso sell trat co par glu nona. Gzataa zeene znu guie to vin, golsoladz ganle zha naca."

²⁶ Golguien sca, zeene guntaa to xtsee co zaacse golguna, sac gon, ga quiaxobnen to lo miech Jesús nac men ne gut xcuent to, psilaa me to. Tibaque none gon to xtsee co, haxta gdziñ dze ne laa me guiaad stib.

²⁷ Gacxe waa, zha ne rienewguit guic rquiind zho xtsee co zigne no yquuin zhow, dol nroob ga run zho, xcuerp Jesús ga, xchen me ga noguitnie zho.

²⁸ Zeene gon to xtsee co, none wen wen sob to ganle zha naca, pe nacne laaw rac, dzigo lozh ga zac yquuin tow.

²⁹ Sac gon zha ne lega gow quietxtil co, lega guie zho vin co, sac zhow zig beelze pe xtsee; rrieequia guielnë ne yгаа zho ga gow zho, guielnë co ga guie zho.

³⁰ Mincocxe waa, blactaa zha ne nacgrë to i quiayaan nsis, nogaa zho rzacnële, haxta nzian zho gutle.

³¹ Telne niaca mine wen wen gwi ne ganle zha nac xtsee co, tsod pe nacne pe guielnë ne cxeel Dios dzian ne.

³² Ni zeene scagaa rteed me ne tib caxtigw, laaw run me parne tsaan biini gbiire gbig ne lo me, zeena led yed ne nitlo gal dze ne nitlo grëraa miech ne zienal ncuuaane lo guidzliu rii.

³³ Bets, bzian, golguien sca zeene ycaals to gon to xtsee co, golcuëz grëraa zha ne nacgrë to dzigo tipse golsilo golquiina.

³⁴ Tel zha ne riengaa lëbd zho lozh gdziñ grëraa zha ne nacgrë zho, mazd gowgazh zho lidz zho, zeena yguibd zho yгаа zho guielnë co.

No spalal mine racladz naa gacnan to, per naa zeene guial naa nëz qui dzigo gne naaw lo to.

12

Guieibiini ne rdeed Espiritu Sant

¹ Bets, bzian, nugaa na ganle laa naa gzet zha nac guieibiini ne rneedz Espiritu Sant, sac racladz naa wen wen guien to zha naca.

² Rsoladz to ganle zeene gard gliladz to Xtiidz Dios, nēzrii nēzrec bio to güeygan to stib stib grē mdio, ncuaañe ni tib lan diidz rneed; sanque Dios ne riladz to niina, led scad nac me.

³ Per nsin golso dien cho nac zha ne noteedpaa xtiidz me, sac nzian zha ne rnee xtiidz Espiritu Sant noteed zho lo miech, per tel rzo zho rdzibdee zho Jesús, ga rlu rquidie zho. Sac zha ne nli nacie Espiritu Sant, rdzibdeed zho Jesús, sinque rlu zho ne me rnabey zho, ni haxta dib zdoo zho rnee zhow.

⁴ Tib tib zha ne riladz Jesús, zhaase zhaase nac guielbiini ne rga zho, per tibaque meñ ne rdeeda, lēē meñ co nac Espiritu Sant.

⁵ Nzian mod zrieelo dziuun ne dziin lo Jesús, per grēse ne me rnabey ne.

⁶ Tib tib ne zhaase zhaase mod ne rlu Dios nacie me ne, per grēse ne me nac meñ ne rlu zha dziuun ne xtsiin me.

⁷ Guielbiini ne rneedz Espiritu Sant lo ne tib tib ne, laaw rneedz me parne dziuunlsa ne xyudar grē zha ne nacgrē ne gacndionraa ne zha racladz Dios.

⁸ No lo zho rdeed me guielbiini rien zho zha cso zho diidz lo miech, no lo zho rdeed me guielbiini rseed zho grē ncuaañe ngan ni rlu zhow lo miech.

⁹ No lo zho rdeed me guielbiini dib zdoo zho rnal zho Dios, niicle ncuaañe mazdraa ngan rnab zho lo me, raca.

No lo zho rdeed me guielbiini zeene rnab zho lo Dios, riac grē meñ rzacñē.

¹⁰ No lo zho rdeed me guielbiini rnab zho lo Dios rac grē milagr,

no lo zho rdeed me guielbiini rteed zho xtiidz Dios lo miech,

no lo zho rdeed me guielbiini rien zho cho nac zha ne nlipaa nacie me, cho zhagaa nacie men^{dox}.

No lo zho rdeed me guielbiini rnee zho stib diidz ne gard cseed zho, no lo zho rdeed me guielbiini rien zho pe rnee zha ne rnee diidz co, dzigo rnee zhow.

¹¹ Grēse guielbiini, Espiritu Sant rdeeda, ni me nan pa miñe rneedz me lo ne tib tib ne.

¹² Lo grēse ne ne nac ne zha ne no xnēz Jesús, rriequia xcuerp me nac ne. Tel cuerp, niicle ne nzian part niaaw, per tibaque naca.

¹³ Ndāl miech ne nac xcuerp me, no zho nac zha Israel, no zho nac zha zit, lo grē zho no zho ngadoo lo beñ, nogaa zho zonlaa, per grēse ne tibaque Espiritu ne nacie ne, sac tibaque Espiritu bga ne zeene brobnis ne.

¹⁴ Gotsaa gwi ne ganle, no ni ne, no nia ne, no diag ne, nzian lē niaa xcuerp ne, per tibaque naca.

¹⁵ Gacxe waa telne niaca miñe rnee ni ne, grieelod guiaba porne nacda nia ne, nacda xcuerp ne.

¹⁶ Scaque diag ne, grieelod guiaba porne nacda bziaalo ne led yedraaw nac xcuerp ne.

¹⁷ Sac telne niaca miñe gdipse xcuerp ne niaa bziaalo ne, ¿zha nadien gon ne? Telne gdipsegaa xcuerp ne niaa diag ne, ¿zha gzoobzhi ne?

¹⁸ Lēēzhe wen led scad psan Dios xcuerp ne, sinque grēse part ne niaaw bzaa mew zigne gocladz me, psañe mew zaatne rquiina tib tiba.

¹⁹ Sac telne tipse niaa grēse part ne nac xcuerp ne, ¿zhazhe rlu ncuaañ co!

²⁰ Godca sca, sinque zhaase zhaase nac tib tib part co, per grēsew tibaque cuerp naca.

²¹ Gacxe waa grieelod guiab bziaalo ne lo nia ne: "Ib rquiind naa luu"; guiaabgaa guic ne lo ni ne: "Ni lalnu rquiind naa to."

²² Grēse part ne niaa xcuerp ne nose zaatne rquiina, haxta miñe mazdraa nda lēē miñ co rquinraa.

²³ Stiba, no part ne niaa xcuerp ne rzac ne zhi nona, no part haxta rtoladznie ne, per gotsaa gwi ne ganle part co nac zaatne ranraa ne, rioxcoraa ne rdze;

²⁴ sangue part ne nziuu lo ne, zienied guic ne dien zha gdzew. Ible sca psan Dios xcuerp ne, zeena sca gacnon part ne rzac ne zhi non.

²⁵ Sca niaa xcuerp ne, grëse part ne niaaw rquiinsaw xcompañera; led yeda rtsolsa.

²⁶ Golwi ganle, zeene në tib part xcuerp ne, grëse part ne niaaraaw zienie në co; scaquegaa zeene rdioon tib part cò grësew zienie guielbley co.

²⁷ Laa naa rne min rii lo to, sac raclad naa guien to sca none tipse gac to. Golguien ganle xcuerp Jesús i nac to grë to, tib tib part ne niaa cuerp co i nac to, rquiinsla to zha ne nacgrë to.

²⁸ Ni zigne sca tib tib part ne niaa cuerp nose zaatne rquiina, scaquegaa grëse zha ne no xnëz me, bzoze Dios zho pe nac dziin ne gun zho:

no zho rienee xtiidz me lo miech,
no zho rteed xtiidz me lo miech,
no zho rseed miech xtiidz me,
no zho rnab lo me rac grë milagr nroob,
no zho rnab lo me riac men rzacnë,
no zho rioxco run xyudar grë miech,
no zho rzo rac zho zha rnabey,
nogaa zho rnee grë diidz ne gard cseed zho.

²⁹ Golgan ganle, psod me zho grëse zho tsienee xtiidz me lo miech, grëse zho cteed xtiidz me, grëse zho cseed miech xtiidz me, grësegaa zho gnab gac milagr.

³⁰ Niicle psodgaa me zho grëse zho gnab guiac men rzacnë, grëse zho gnee stib diidz, grësegaa zho gnee zha nac grë diidz co.

³¹ Zhaase zhaase nac guielbiini ne rgaa tib tib zha ne no xnëz me, per goltsoxco yгаа to guielbiini ne mazdraa rquiin.

Sca nagon naca, per golquiaadiaga ganle, nu laa naa gzet lo to stib mine mazdraa non lo grë guielbiini rii.

13

Guiewleynie

¹ Mine mazdraa rquiin gon nac ne gleyinie ne samiech ne. Tel niaca mine bgaa naa guielbiini rne naa grë lose diidz ne rnee miech, haxta grë diidz ne rnee xanj! Tel dib zdoogaa naa rnalo naa Dios, haxta diaen rquiin rac naa grëtaa diidz co? Rrieequia nac naa ga zig tib lë guieb ne loxaque rzedz.

² Tel niaca mine rteed naa xtiidz Dios lo miech, rien naa pe nac mine naraa cxobnen me, grëse wseed ne no rien naa, ni rleynied naa samiech naa, jpaat rquiinda! Tel dib zdoogaa naa rnalo naa Dios, haxta ncuanea mazdraa ngan rnab naa run mew, ni rleynied naa samiech naa, jpeet nonda!

³ Tel quiizgaa naa grë ncuanea quianie naa lo grë zha ne guien pe yquiin, haxta gded naa naa tsec naa, per tel rleynied naa samiech naa, jzhlese ga gun naa min co!

⁴ Sac gon zha ne nli mban zigne nac guiewleynie co:
riednied zho samiech zho,
wen rac zho lo samiech zho,

racnëd zdoos zho, niicle ran zho wenraa noded stib miech lo zho,
rund zho ne lëëque zha gunnon zho,

racniatsd zho lo samiech zho,

⁵ rund zho ncuanea coguieinë zho, gunglëëgaa zho samiech zho,

zianald zho ne tebaa lose zho yquiin grë pe cos,
nacd zho zha ne lega zolë,
rapguie|nëd zho samiech zho,

⁶ ni lalnu riod zdoo zho mine run zha ne rsacsi samiech,
mine rleynie zho nac diidzli.

⁷ Zha ne nli rleynie samiech, ni lalnu peet grieelod yca gleynie zho zho;
rquiaadiag zho mine rnee zha co, rzhidznied zho zho; tibaque rquiablaz
zho wen grieequia zho, rsaand zho zho, tibaque racnie zho zho.

⁸ Zdzin dze yquindraa cho cteed xtiidz Dios lo miech, yquindraa gnee zho
stib diidz, yquindraa grë guie|rac, sangue guie|wleynie gdzind dze ne nitlow.

⁹ Niicle ne nogaa ne guie|biini ne rneedz Espíritu Sant, niicle no zha ne rien
zha gnee zho Xtiidz Dios lo miech, per palalse nac ncuaae rien ne niina.

¹⁰ Sangue gal dze ne laa Dios lozh gzhixcuua ne zigne no gac ne, grëse
guie|biini ne rdziaap ne niina, paat yquindraaw.

¹¹ Masaque nac ne niina zig tib meëd|las. Tel naa, zeene goc naa meëd|las
grëse ncuaae bne naa, grëse ncuaae bien naa, grëse ncuaae pseed naa,
grëse ncuaae co ben naaw zigne run grëraa meëd|las. Per zeene laa naa broob,
laa naa b|aa biini, grëse ncuaae co laa naa bienpaa zha naca; laa guie|mëd|las
co b|ed.

¹² Scadaa nagon rziac ne niina, palalse rien ne zha nac Dios, rrieequia
rdzianse ne me niina zigne ran ne zhimlë ne lo beelze pe tib lë vidr; per
zdzin dze laa ne dzian|lo me zigne nacpaa me. Palalse ndion ne niina zha
nac me, palalse rsilo rdzian ne me, per gal dze co laa ne dziuunbeypaa me
zigne runbey me ne niina, nanpaa me zha nac zdoo ne tib tib ne.

¹³ Golgacnan sca gan|le, grë guie|biini co zdzin dze ne yquindraaw, sangue
ne znu: dib zdoo ne rnalo ne Dios, noniepaa guic ne zac mine rnee me, ni
rleynie ne samiech ne, lozhda. Per lo gza tsona nagon, guie|wleynie co nac
mine gdzind dze ne gdzëë.

14

Zha ne rnee stib diidz

¹ Laa to nan|le pa min nac mine mazdraa non, |gol|leynie samiech to sca! Per
scagaa golnab yгаа to guie|biini ne rneedz Espíritu Sant. Zig nac guie|biini ne
rgaa zha ne rteed xtiidz Dios lo miech, golnab yгаа to min co zeena sca grieelo
cseed to miech xtiidz me.

² Sac tel zha ne rgaa guie|biini rnee zho stib diidz, zeene rnee zho diidz co
choot rien|d dien pew, sac lo Dios ga rnee zho. Tel pe nac mine rnee zho ga,
Espíritu Sant rsiaba guic zho, per choot racnand dien zha naca.

³ Sangue zha ne rgaa guie|biini rteed zho xtiidz Dios lo miech, mine rnee zho
ga rquiina par tsoguicraa miech zha racladz me, par guien zho pe nonguiel
gun zho, ni rchooblada zdoo zho.

⁴ Tib zha ne sca rnee stib diidz, lose zho rquiin guie|biini co, sac zhase
rioguicraa zha racladz Dios; sangue zha ne rteed xtiidz me, diidz ne rnee zho
rquiina lo grëraa zha ne no xnëz me, grëse zho rioguicraa zha racladz me.

⁵ Wena tebaa grëse to yгаа guie|biini co gnee to stib diidz, per mazdraa
gon wena cteed to xtiidz Dios lo miech, cseed to miech xtiidz me; sac min
co mazdraa rquiin, lëdle gnee to stib diidz. Zacaquegaa gnee to stib diidz co,
totsaque lozhse gnee tow, gneegazhaque to dien zha naca; zeena sca yquiina
lo grëraa zha ne no xnëz Dios.

⁶ Bets, bzian, to gase nadien, tel niaca mine glanso naa lo to i csilo naa gne
naa stib diidz, |pa dien yquiina lo to? Per tel glanso naa, ine csilo naa clar
gne naa lo to pe nac mine zinee Dios lo naa, pe nac grë mine rien naa, pe nac

mine ziaadyob gac, zha nac grë mine zhubnee lo Xtiidz Dios, led grëse min co zien to zha naca, ni squiina lo to grëse to.

⁷ Haxta grë ncuaañe rool miech, zig nac bzie zig nacgaa vihuel, tel csilo zha ne noyoola tel zhataa gool zhow, ¿zha dien guien miech pa di noyool zho?

⁸ Zig nacgaa zha ne rcuedz cornet lo menguiib, telne tel zhataa ycuedz zhow, ¿zha dien gacñan menguiib pe nac vis ne quaiyun zho?

⁹ Scadaa nagon run to zeene rnee to stib diidz lo miech, ¿zha nadien guien zho pe nonee to? Rrieequia lo mese ga rnee to.

¹⁰ Zig nac lo guidzliu ndal lo diidz rnee miech, per tib tiba nose mod ne rnee zhow, nose zha ne riena.

¹¹ Telne guiaad tib zho lo naa csilo zho gnee zho, ni riend naa pe quianee zho, grielod guien naa pe racladz zho, guiengaa zho zha rzaac naa.

¹² Nana sca, zha ne rquiabladz ygaa guielbiini ne rneedz Espiritu Sant, gnab zho ygaa zho mine grielo yquini lo grëraa zha ne nacgrë zho, zeena grë zho tsoguic zha racladz Dios gban zho.

¹³ Gacxe nagon waa, zha ne rnee stib diidz, none gnab zho gdeed Espiritu Sant guielbiini lo zho guien zho pe nac grë diidz co, parne gnee zhow lo miech;

¹⁴ sac zha ne sca rnee stib diidz, tel so zho gnab zho lo Dios, riend zho pe nonab zho, loxaque zhiespirituse zho quianee ga.

¹⁵ Gacxe waa zeene gnab ne lo Dios, zeene goolñiegaa ne me, zac gnee ne stib diidz, per scagaa none gnee ne diidz ne rien ne, mine riengaa grëraa miech.

¹⁶ Sac gon tel stib diidz nonee ne noyoolñie ne Dios, nodeed ne xquizh lo me, ¿zha dien yquiab grëraa zha ne ndxie ni riend zho pe rnee ne?

¹⁷ Niicle ne ndzon sca nodeed ne xquizh lo Dios, per zha ne noquiaadiaga ga, paat yquiinda lo zho.

¹⁸ Xquizh Dios, tel naa ye naa rne stib diidz, ni mazdraa gon rne naaw que zha ne rneew lo to i,

¹⁹ per zeene zo naa zaatne ndxie grë zha ne noquiaadiag Xtiidz Dios rund naa ne gnee naa stib diidz, sinque rne naa mine guien zho. Rien naa wenraaw gñe naa maase gaayaque lan diidz, per mine guien zho, ledle so naa gñe naa tsii mil diidz, ncuaañe ni tib choot guienñ.

²⁰ Bets, bzian, golguien sca golsaan guielmëedlas qui. Zacgaa gac to mëedlas per nêz lo guielntseeba, sangue xpensar to golgac zig zha ne biala biinile.

²¹ Gotsaa gwi ne ganle zha nac stib diidz. Zhubnee lo Xtiidz Dios rëb me, laa me cxeel miech stib dan miech ne rnee stib diidz, par gnee zho lo zha Israel; per niicle tsienee zha co, ib guienñ zhow.

²² Gase naganle rlu rquiind stib diidz co par grë zha ne rnalole Dios, sinque laaw rquini parne grë zha ne nod xnëz me gan zho ganle nli no me. Zha ne nole xnëz me, zha co rquini gon zho pe nac mine racladz me gacñan zho, pe nac mine zhubnee lo Xtiidz me.

²³ Per niicle scaw, telne zob bla zha ne sca gard gliladz Xtiidz me, zobgaa bla zha ne pense rsilo rquiaadiaga, ni csilo to gnee to stib diidz, zeene gan zhow lëëtaa mine guiab zho rzhiñle guic to sca rac to.

²⁴ Laa telne grëse to naa nooted to xtiidz me, nonee to mine racladz me gacñan miech, zha ne sca gard gliladz Xtiidz me, zha ne sca pense rsilo rquiaadiaga, zeene gon zho grëtaa mine nonee to, haxta ziaa zho biini zien zho ne nli tib miech goopdol nac zho.

²⁵ Zigse quianee to laa dzoo zho lozh yguudz, laa zho ted yquitsgzhib zho gnab zho perdon lo Dios; ga guien zho ganle ne nli nacie me to.

²⁶ Bets, bzian, golguien sca zeene ycaalsa to cseed to Xtiidz Dios, zigtaa zha ne goola, zha ne cteed xtiidz Diosa, zha ne gnee stib diidza, zha ne gneegaa

zha nac diidz co, none tsienie guic zho mine gun zho ga laaw yquiin parne tsogucraa los demas zho zha racladz Dios gban zho.

²⁷ Zeene gnee zho stib diidz, none choptaa zho, tsontagaa zho gneew. None tibga zho gnee, ni rquiin zole zha ne gnee pe nac diidz co.

²⁸ Laa telne guiend zha ne grielo gnee dien pe naca, nodne gnee zhow; mazd len zdoose zho gnee zhow, Diosse gon pe nonee zho.

²⁹⁻³⁰ Scaque zha ne cteed xtiidz Dios, choptaa zho, tsontagaa zho gneew, laa grëraa zha ne ndxie none yquiaadiag zho mine nonee zho. Telne lëëtaque nonee tib zho, ni csaab Dios guic stib zho gnee, dzigo none cuëz zha ne quianeel ga zeena grielo gnee zha co.

³¹ Sca none gaca, none tibga tibga zho gnee, zeena grëse zha ne ndxie grielo gon zho dien pew, parne cseed zho, ni gacnguieelraa zho lo Xtiidz Dios.

³² Zha ne sca rteed xtiidz Dios, none cseed zho gnabey zho zho, cuëz zho nieeda gdzin hor ne gnee zho.

³³ Sac tel Dios, rdziladz me guiots gnaaz pe cos, rdziladz me ncuane nzhiitni. Mine rdziladz me zaacse gac tib cos, ni scagaa run grëraa zha ne no xnëz me.

³⁴ Ni stiba, zeene sca rcaalsa to, racladz naa guien grë men wnaa dzese sob zho. Nodne so zho ye zho gnee, sac gon mguï rnabey zigne zhobneeque lo Xtiidz Dios.

³⁵ Ncuane racladz zho gacnan zho, ro yu ga gnabdiidz zhow lo zha bgui, sac gon, rdzieelda lëëpaaze wnaa gnee zaatne rcaalsa to rquiaadiag to Xtiidz Dios.

³⁶ Zaacse sca golgac, golguien ganle grielod gun to mine notaa guic to, sac gon led loxaque todse nac zha ne runbey Xtiidz Dios, par guiab to zigne racladz to gac tib cos, sca none gaca.

³⁷ Mine rne naa lo to nu xtiidz Dios naca, zha ne rteed xtiidz me lo to i, zha ne rapgaa pe stib guielbiini ne rneedz Espiritu Sant, zha co gunbey ganle nli mine rnabey mew.

³⁸ Zha ne gliladzgaaw, maase gliladz zhow.

³⁹ Sca nagon naca. Goltsoxco sca yгаа to guielbiini cteed to xtiidz Dios lo miech, zeena gacnan zho zha racladz Dios gban zho; per scagaa, ib ycade to tel cho zha ne rnee stib diidz.

⁴⁰ Per zigne rne naa ga, grëse mine gun to none zaacse gun tow, tib tiba gacsew hor ne rieguiala.

15

Brieaban Jesús

¹ Bets, bzian, nu laa naa gbire gzet lo to ganle zha nac Xtiidz Dios. Zigne bialseed naa tow, scataque naca; led yeda rdzëë. Lëew ga pcaania to, ni haxta niinagaa riladz tow.

² Lëew rlu zha grielo ycaania Dios to, totsaque nli dib zdoos to bliladz tow, ni bii lëëgaaw rnalo to.

³ Zeene bial naa lo to i, pseed naa tow zigne pcaaniase naaw. Gocnan to cho nac Jesús, gocnan to por xto ne gut me lo cruz, zigne zhobneesew lo Xtiidz Dios.

⁴ Gocnan to ganle zeene goc tson ngbidz pqueets zho me laa me brieaban, zigne raquietaquew lo Xtiidz Dios.

⁵ Len dze ne brieabanle me ga, gonlo Pedr me, niicle grëragaa zha ne nacgza Pedr bzënie zho me, gonlo zho me sac güeyted me lo zho.

⁶ Güey me güeyted me zaatne ndxie ndziibsræa gaay gayoo zha ne nole xnëz me, grëse zho gon me; ndal zha co bii mban niina.

⁷ Bded ga gonaque Santiagw me, ni biire güey me lo zha ne bzënie me ga stib;

⁸ goc palal tiempa, lega naclew haxta lo naa brieequia me. Tel naa gon, rrieequia nac naa zig tib mëed ne rzamëed,

⁹ lo grëraa zha ne nac poxtl, ni lalnu peet nond naa, per ni rdzieeld gnee zho naa poxtl; sac gon pa lotaa ptsidil naa grë zha ne glopaa bzëeb xnëz Dios.

¹⁰ Per xquizh Dios tibaque noxco me naa, bzooblo me naa gane laa naa nac miñe nac naa niina. Ni led zhlëdga bzooblo me naa, sac gon nroobraa xtsiin me noyun naa lo miñe noyun grëraa poxtl; per rned naa togo naase quaiayuna, sinque me noyacnie naa rrieelo noyun naaw.

¹¹ Laa naa rzet miñ rii, per nacda par glu dien cho nroobraa noyun xtsiin me, sac miñe mazdraa non nac ne noseed no miech Xtuidz me; lëew biadseed no to, ni bliladzga tow.

¹² Nana sca, racladz naa gnë to dien zha nacne no bla to i rnee nlid grieegan mengut; led wen wen name gocnan to brieegan Jesús.

¹³ Telne rnee to nlid grieelo grieegan mengut, rrieequia gon rnee to ga nlid brieegan Jesús.

¹⁴ Nana telne brieegand me, paat rquiind miñe dzigo noseed no miech nu, zhlëse znu noteed-xtse ne rnalo ne Dios.

¹⁵⁻¹⁶ Rrieequia noquidiee no miech, sac gon tibaque rnee no lo zho bleegan Dios Jesús; ni telne nli rrieegand mengut, ye Jesús dzigo bii noliu me niina.

¹⁷ Stiba, telne nlid brieegan me, zhlëse dzigo rnalo to me ycaania me to; telne nlid brieegan me, scase bii zëeb to grë xtol to.

¹⁸ Grë zha ne bliladz me, zha ne nacle mengut niina, lëe bnitlole zho ga dzigo.

¹⁹ Nana telne loxaque lo guielmban riise nona gnalo ne Jesús, ne dzigo nac miech ne mazdraa nxen.

²⁰ Per gacnan to sca ganle, ¡brieegan Jesús! Me nac men ne glopaa brieegan lo grëraa miech guizhiu ne grieegan.

²¹ Grëse ne ne nac ne miech, ible laa ne none guet; sac laa guielgut biaan por miñe been Adán; per niina ne laa Jesús biaad, por miñe been me grëse mengut laa zho none grieegan.

²² Zigne grëse miech ret porne ziaad zho lo xti Adán, scaquegaa grëse zha ne gbig lo Jesús, zga zho tib guielmban ndzon.

²³ Ible sca none gaca, ndion ne ganle laa Jesús brieeganle, ni zeene laa me guiaad, grë zha ne no xnëz me laa zho grieegan.

²⁴ Gal dze co laa me lozh gnitlo mendox ni grëraa ma ne nacie ma, dzigo laa me csan grëse miech ne no xnëz me ladznia Dios men ne nac Pxoze me; dze cota nagon laa Dios gon guielwxtis.

²⁵⁻²⁶ Sac ible Jesús nonabey haxta gdziñ dze co, zeene laa me gnitlo grëse meyozh ne rlëe lo me; zig nac guielgut, lëew nac miñe lultm gnitlo me.

²⁷ Zigne zhobneeque lo Xtuidz Dios, ladznia me biaan grëta ncuane no; per guabd ne togo ye Dios no ladznia me, sac gon Dios nac men ne bdeeda lo me.

²⁸ Gacxe waa, zeene gal dze ne laa me sca lozh gnitlo grë zha ne rlëe lo me, Pxoze me nac men ne gnabey lo me; sac gon men co gocnie me been me gan, ni men co nac men ne rnabey.

²⁹ Nana, ne rnee to i nlid rrieegan mengut, ¿pe nac dzigo no zha ne rrobnis xcuent zha ne gutle?

30 Telne niaca mine nlid grieaban mengut, ¿pe nac nadien znu gzataa dze quiabeeladz no no lo grē guielxtseeb?

31 Bets, bzian, nligaaw tel naa gon gzataa dze noxtseeb naa lo guielgut; nanle to ganle zeene rne naa rleynie naa to, diidzli rnee naa; scaquegaa niina, mine rnee naa nu diidzliw.

32 Ne nligaa zeene glo bial naa guiedz Efés nu, ntseeb goc miech rii lo naa, pale grē ma ntseeb. Telne nlid grieaban mengut, zhlēse dzigo nodeed naa grē min co; mazd tel zhataa dzigo gban ne, zigne rēbaque diidz ne rēb: “¡Golgotsaa dioow ne, golgotsaa dio ne, benque guielgutse quiambiaaz ne!”

33 Per lēda ga gon. Zha ne zianl min co, ib yquiaadiagde to xtiidz zho, zeena gacde to zigne nac zho; zigne zēēbaque diidz: “Telne ndzinlid miech ne ctsieelsa luu, dzidz dze ne gac luu zigne nac zho.”

34 Golquix biini sca, gunctaldras to xtol to; pe rtoladzde to, golwi ganle no bla to i gard sēēb xnēz Jesús, haxta ni rienḍ zho zhapaa nac Dios.

Zha grieaban mengut

35 Nana, no to gnē: “¿Per zha grieaban mengut? ¿Zhazhe nac cuerp ne grieabannie zho?”

36 ¡Aque nxen wnaabdiidz co! ¿Pe ranḍe to zig nac grē midz ne rio liu rac bni, rlozhse rnitlo midz co dzigo laa guizh ne naca ga rlan?

37 Tel rnee to zha nac cuerp ne grieabannie zho, golwi ganle zig nac zhobxtil, zig nac grēragaa midz, ¿pe niacxe zigne nacsew riow liu, scasaque naca rлана? Led zeene laaw rlan, guizhle naca.

38 Tib midzse naca riow liu, Diosle nac men ne rdeed zhiblaga zigne racladz me. Tib tib midz, psanle me dien zha gluw zeene laaw glan.

39 Zigne zhaase zhaase nac tib tib midz, tib tib guizh, scaque nzian lo cuerp no.

Zig nac miech, zhaa nac xcuerp zho lo xcuerp ma, niicle magaaaw, zhaa nac xcuerp ma ne no lo liu, zhaa nac xcuerp ma ne no lo nis, ni zhaaque nac xcuerp ma ne rsiibe.

40 Grē anjl ne no gbaa, zhaa nac xcuerp zho lo xcuerp ne nac ne miech guidzliu; zhaa nac xquielniow cuerp co lo xquielniow cuerp ne no lo guidzliu.

41 Gotsaa gwi ne ganle, zig nac xbiini ngbidz zhaa naca lo xbiini mēē, lo xbiinigaa mel. Niicle melgaaw, zhaase zhaase nac xbiini ma tib tib ma, no ma palalse rlu, nogaa ma rol rna.

42 Scadaa nagon, zhaa rlu cuerp ne rap miech niina, ni zhaagaa glu mine ygaa zho zeene laa zho grieaban. Cuerp ne rdziaap ne niina, ncuane tib rded naca, sangue cuerp ne grieabannie ne gal dze co, led yedraa min co nitlo.

43 Mban nac cuerp rii, sac rzacnēw, reta; sangue cuerp ne grieabannie ne, tib cuerp ne gdzind dze nitlo gaca. Lega zozhidz cuerp rii, sangue cuerp co tib cuerp ndip ndaan gaca.

44 Cuerp ne rdziaap ne niina, tib cuerp ngoopdol naca, sangue cuerp ne grieabannie ne, min co gac tib cuerp ne gban zigne racladzpaaw Dios. Sac zigne znu no cuerp ne rquiin lo guielmban rii, scaquegaa no mine yquiin stib lo guielmban ne gneedz Dios.

45 Golḥoladz ganle, rnee lo Xtiidz Dios Adán goc miech ne glopaa biaan ni Dios nac men ne bdeed guielmban lo Adán; sangue Jesús, me rap guielmban, ni zrieelo gdeed me guielmban co lo miech.

46 Scaque nagon, glo rgaa ne cuerp ngoopdol ne rdziaap ne niina, dzigoraa ygaa ne cuerp ne gban zigne racladzpaaw Dios.

⁴⁷ Gotsaa gwi ne ganle, zeene biaan Adán yudiese bzaa Dios me; sangue Jesús, men gbaa nac me.

⁴⁸ Grése ne nac ne miech, cuerp ne rdziaap ne lo guielmban rii, zigne godaa xcuerp Adán naca; per zha ne gnalo Jesús, zeene laa zho grieeban laa zho gaple tib cuerp zigne nac xcuerp me.

⁴⁹ Masaque nac ne niina zigne goc Adán, ni scaquegaa zdziñ dze ne glu ne zigne rlu Jesús.

⁵⁰ Golgacnan sca ganle, cuerp ne rdziaap ne lo guidzliu rii, grieelod gdzina zaatne rnabey Dios; sac rdziñ dze ne rnitlow, grieelod gaca tib cuerp ne guete.

⁵¹ Wen wen golzoobdiag mine gne naa lo to nu ganle, waltaa choot gard gacnana: Grése ne ne nac ne zha ne rnalo Jesús, gal dze co zigtaa zha ne mbana, zha ne gutlegaaw ible stsëe Dios xcuerp ne.

⁵² Znuse gac min co zig nacse zeene riab tib belye; lëe min co gac lultm vuelt ne yuedz xanjl Dios zhitrompet zho. Zeene sedz trompet co, hor co grése zha gut, laa zho grieebannie tib cuerp ne gdzindraa dze nitlo; scagaa grë zha ne bii zomban, hor co laa xcuerp zho gdzëe. ¡Grése ne dziaap tib cuerp cub!

⁵³ Ible sca none gaca, ib none gdzëe xcuerp ne gaca tib cuerp ne xiñd, tib cuerp ne gdzindraa dze nitlo.

⁵⁴ Zeene gac min co, ga grieequia mine raquiet lo Xtiidz Dios zaatne rnee: “Nasi laa guielgut bnitlo, guielmbanle nac mine rnabey.

⁵⁵ Ah guielguta, ¿yora na zeene scataa psacsi luu? ¿Yora zeene scataa gocndip xtiidz luu?”

⁵⁶ Grieelodraa pe gun guielgut ne hor co, sac led yedraa hor co tso dol, led yedraa hor co gnabey ley; sac por dol gane rrieelo rsacsi guielgut ne niina, ni por ley rlu pe nac xtol ne.

⁵⁷ ¡Xquizh xquielnzaac Dios pxeel me Jesús, sac gon por Jesús zrieelo griee ne ladznia guielgut!

⁵⁸ Bets, bzian, ne nac to zha ne rleynie naa, golguien sca tibaque dziits golso lo Xtiidz Dios; zig zie dze goltsoxcoraa golgun xtsiin me, benque nanle to ganle, grése xtsiin me mine rdziun ne nacda ncuane zhlëse.

16

Gon ne guey Jerusalén

¹ Laa zig nac gon ne noyacro guey gac xyudar grëraa zha ne no xnëz Jesús Jerusalén, laa naa rso diidz lo to zigne psoque naa diidz lo zha Galás.

² Tel palal run to gan tib len zmal, lo co golcob mine ral zdoo to gdeed to gac gon co; gzobse dze goltsiesana lo zha ne noyunlow. Adel na ganle haxta glansoraa naa i, dzigora no to dien zha topa.

³ Ni golzobloga dien bla zha ne tsie tsiesana, na zeene glanso naa i dzigo yquia naa tib guits ne güey zho tsiesan zhow;

⁴ ni tel rquinpagaa ye naa ga, dzigo na maase ga naa ganie naa zho.

⁵ Len dze rii no guic naa gateed naa nëz Macedon, dzigo gale griee naa glanso naa lo to i.

⁶ Nend zbëz naa lo to i palal dze, togo iquegaa teed naa len mëe nal ne ziaad; ni racladz naa zeene gbi naa i, siguiel to gun to xyudar naa tel pa nëz ne no ga naa len dze co.

⁷ Telne zneedz Dios diidz cuëz naa lo to grë len dze co, zbëz naa, sac racladz naa tib guialteed naa lo to i.

8-9 Niina ne no naa Efés nu, leñ dze riipaa rlu ndal miech ne no liaadz ycaania Xtiidz Dios, gane zbëz naa nu haxta ted lni Pentecostés. Nligaa ndal zha ne no liaadz co, per scagaa ndalaque zha ne rtsidila.

10 Nacle diidz laa Timoté guiaad i; tel nand new naraa guiaad me, golsguiel zeene glanso me zaacse golcaania me, zaacse golcuëzlo me, zeena tsonley zdoo me; golgan ganle, ye me quiayun xtsiin men ne rnabey ne.

11 Golguien csanwinde to me, sinque golgap me respet; zeena zeene glanso me lo naa nëz rii ine nley gac me csoladz me zha biaadted me lo to i. Laa naa quiambëz glanso me nëz rii, gza me zha ne guiaadnalraa zhits me.

12 Sangué bets ne Apol, blactaa bnaab naa lo me niaadgza me zha ne ziaad i niaadgan me to, per rzac me grieloda niina. Rien naa zeene gdeedtaaw diidz, ible ziaad me ziaadgan me to.

13 Bets, bzian, nsin golso, tibaque golnalo Dios. Ib ctsëede to xtiidz to, tibaque goltsoxco tsienal to mine rnabey me.

14 Ncuanae guntaa to, golconie guic to gun tow porne rleynie to Dios, porne rleyniegaa to samiech to.

15-16 Laa naa rso diidz lo to, niowse gon golgac lo grë zha bets ne, zha ne run xyudar to i; zig nac Stef grë menlidz me, golgon xtiidz zho. Led nanle to ganle, Stef nac tib men ne glopaa bliladz Xtiidz Dios nëz Gres i grë menlidz me; ni desde dze co laa me pquiabladz tibaque squi quiayun me xyudar grëraa zha ne no xnëz Jesús.

17 Rley naa gon zeene gon naa laa me blanso nu gza me Fortunat ni Acaic, haxta stib goc zdoo naa gocnan naa zha no to, masaque gun naa cuent grële lo to ga gon naa.

18 Ne nligaa bloonley zho zdoo naa, ni rien naa scaquegaa to nley gac to niina zeene gon to zha no naa. Golguien gon zha non nac zho, golwi ganle pa lotaa nac dziin ne quiayun zho.

19 Grëse zha ne no xnëz Jesús nëz Asia nu, laa zho rxeel bdiuzh lo to, golcaania zhibdiuzh zho. Scaque Aquil grop me Priscil, ni grëraa zha ne rcaalsa lidz zho rieseed Xtiidz Dios, grë zho laa zho rxeel bdiuzh lo to.

20 Scagaa grë zha ne no nu, ye zho laa zho rquiaabdiuzh to. Zeene ycaalsa to i, ine golnaaznialsa, golqueedzlsa, golcaania zhibdiuzh no.

21 Nu laa naa cso schop lan xtidz naa lo to, ni golwi ganle naazhal yquiaw:

22 Grëse zha ne gon nëd gleyniepaa Jesús, miech ndziibdeele ga nac zho. ¡Ni ile gon ziaad me!

23 Mese nac men ne gacnieñ to, me nac men ne no zhixco to, sac ne nligaa rleynie me to.

24 Niicle naaw rleynie naa to, sac gon tibaque nac ne ngab ne lo me. ¡Lëed bii gdzieel ne sca!

Pabl

BROP GUILTS NE PXEEL PABL LO ZHA CORINTĪ

¡Diuzh to grēse to!

¹ Naa nac Pabl, grop no bets ne Timoté, laa no rquia stib guits rii rxeel no guiedz Corint i. Nanle to ganle Dios bzo naa, pxeel me naa none naa Xtuidz Ndzon Jesús lo miech.

Laaw ziaad lo to i, grēse to ne nac to zha ne ngab xnēz Dios; zigtaa tow, zigtaa grēragaa zha ne no dib nēz Gres iw.

² Dios men ne nac Pxoaz ne, ni Jesús men ne rnabey ne, me gunlay to, me glu ganle pa lotaa noxco me to zeena peet zhgab ctsebde to.

³ Bets, bzian, golgotsaa gwi ne ganle, ¡zha ndzontaa Dios, Pxoaz Jesús men ne rnabey ne! Sac gon, pa lotaa rquia zdoo me ne, pa lotaa rchoobladz me zdoo ne

⁴ lo grētaa guielnē ne rdieed ne. Ni laa me rchoobladz zdoo ne gon, zeena scagaa grēraa zha ne rdzian ne no guielnē, mban rac zho, guio ne guiochoobladz ne zdoo zho zigne rchoobladzaque me zdoo ne.

⁵ Zig nac niina, nroob guielnē ne nodieed no loxaque ne riladz no Jesús, per scaquegaa ib rsaand me no tibaque nochoobladz me zdoo no.

⁶⁻⁷ Laa no nodzian grē guielnē rii, sacne noxco no nonee no lo miech zha laa zho lo dol, parne scagaa grieelo cchoobladz no zdoo to. Lo grē guielnē rii, me nac men ne nochoobladz zdoo no, gane ndion no scaque squia zdoo me to, schoobladz me zdoo to zeene gdziñ dze ne laa to gan grē guielnē ne nodzian no nu niina. Ni me gon nac men ne gacniē to glēb to gan tow.

⁸ Bets, bzian, tel niaca mine nian to ganle zha nactaa grē guielnē nroob ne bdieed no zeene no nēz Asia. Ne nligaa nroob psacsi zho no, ncuanea lēbdraa no lo grē guielnē co, tibaque rdzieets no bod gataa niet no.

⁹ Masaque bzhiac no len dze co zig rzac tib zha ne nole guet, laa zho quiambēzse gal hor ne guet zho. Garaa bdzion no peet grieelod dziuun no ne nose, sinque Dios none gnalo no, mese zac csilaa no lo grētaa guielnē; sac tel me, haxta mengut rbeeban me.

¹⁰ Ni nligaa blee me no lo guielnē co, bla me no lo guielgut co; ni ndion no scaque zla me no lo grēraa guielxtseeb ne dzian no,

¹¹ totsaque gacniē to no tibaque gnab to lo me gacniē me no. Zeena, tibaque gac ne grēse ne gdeed ne xquizh lo me.

¹² Rley no sacne rien no choot noquidied miech, ndzinli mban no, zigtaa zeene zo no lo tow, zigtaa zeene zogaa no lo grēraa miecha. Per guiabd ne togo por niini now, sinque ne nquialadz Dios no gane quaiyacniē me no znu mban no.

¹³ Grē mine rnee no lo guits ne zixeel no lo to, niapse diidzliw, ni mine rgobey no grieelo guien to miñ co rquiaa no; gane racladz naa gdziñ dze ne guien tow.

¹⁴ Nli runbeydpaa to zha nac naa, per racladz naa gley to zeene ran to naa, zigne gleyaque naa gan naa to gal dze ne laa Jesús, men ne rnabey ne guiaad stib.

¹⁵⁻¹⁶ Sca nagon rzaac naa, gacxe na ni naa glo nialgan naa to, dzigo ile nrie naa nia naa nēz Macedon. Ni zeene mbire naa nēz co, nialteadaque naa lo to i stib; zeena niac chop vuelte ne nionley zdoo to. Lozh ga, ine niowse nzonēz to naa nia naa nēz Judé.

¹⁷ Ni pasëe naa nial. Per guiabde to togo bod notiblid guic naa zeene sca bne naa, o nacгаа naa zig nac grë zha ne laglaase rnee tib diidz, laa len zdo zho nanpaa zho gund zhow.

¹⁸ Dios zobwi ganle rdziunscad no. Mine rnee no, rdziun now.

¹⁹ Golgan ganle, zigtaa naaw, zigtaa Silvana, zigtagaa Timotëw, no biadseed to cho nac Jesús, men ne nac Xpëed Dios; ni zig nac Jesús, rquidied me. Grëse mine rnee me run mew,

²⁰ ni grëse mine psan Dios diidz gun me, grësew noyun mew; gane niicle nogaaw rnee no lo miech ganle ible run me mine rnee me, ga rlu ganle pa lotaa men nroob nac me.

²¹ Ni lëë Dios co gon nozhixcuua lo xquielmban ne, laa ne ngab xnëz Jesús niina; me bzooblo no nonee no Xtiidz me.

²² Haxta pxeel me Espiritu Sant zdo ne, rriequia bloobey me ne ga, par glu ganle lo me ngab ne, ni ible zgaa ne grëtaa guielnzaac ne bneele me gneedz me lo ne.

²³ Me zobwi, me nan ganle pe nacne gard guial naa. Gard gon guial naa, per por tow; sac rquia zdo naa to, racladzd naa loxaque guialquiago naa to i, lozh ga mban gac to.

²⁴ Guiabde to sca togo bod racladzd no guiaad no. Nli rquiindraa to guidnee no lo to zha gliladz to Dios, sac dib zdoole to riladz to me; per laa no racladz ine guiaadonley no zdo to i. Golguien sca, min co racladz no, racladzd no guiaadloguieinë no to.

2

¹ Min co nagon bend naa ne nial naa,

² sac nonguielda ga coguieinë naa to, ni to nac zha ne rgonley zdo naa.

³ Ne racladzaxe naa min co waa, gane pxel naa tib guits co lo to glo, zeena nzhixcuuaale lo guielto ne nobee to i, zeene laa naa nlanso. Sac tel lega nlansose naa, laa ne ndzio ne guielbley, lel guieinë ndzio ne. Ni nan to ganle, tipse nac guielbley ne rdziaap ne; çniacxe zrieelo nley gac to telne ran to mban rac naa?

⁴ Tel gan to ganle zeene pxel naa guits co, jne nlipaa mban rac naa no naa zhizhgab to! Haxta roon naa zeene noquiaa naaw. Laa naa pxel guits co lo to, per pxeld naaw par ngoguieinë naa to; sinque laaw pxel naa, zeena xixcuuaniob lo ncuuaane ndzinlid ne noyac i; ni laa naa ben min co sacne rquia zdo naa to.

⁵ Zeene bin naa zha nac dol ne noyun zha co i, zig rne naa ga: bio naa guieinë; per rien naa mazdraa nroob bio to guieinë.

⁶ Nana gon, ne squi laa to pteedle zho tib caxtigw, jlëëlew ga na!

⁷ Golguiaanladz mine been zho ga, golneewen lo zho stib, golchoobladz zdo zho zeena gacband zho. Sac telne csaanladz to zho, nend scase lozh guiuu zho lo xquieinë zho.

⁸ Rnab naa lo to, golleynie zho stib, zigne rleyneque to zho glo.

⁹ Ni stiba, laa naa pxel guits co lo to, zeena dien pe zon to diidz gun to mine rne naa lo to ga.

¹⁰ Golguiaanladz mine been zha co sca, tel naa laa naa biaanladzlew. Jesús zobwi ganle laa naa benle zho perdon, zeena gbiire zaacse gac to;

¹¹ ni scagaa gleyd mendox gunçuet ma ne. Led nanle to ganle, zombëzle ma dien zha gnitnëz ma ne.

Tibaque noxco Pabl cseed miech Xtiidz Dios

¹² Bded ga nagon dzigo bia naa guiedz Troas. Zeene bdziñ naa ga, ne nligaa bneedz Dios diidz niuñ naa xtsiñ me ga.

¹³ Nac diidz ga ndzieelo naa bets ne Tit, per zeene gon naa bdziñd me, biotiblidraa guic naa. Nacne brieque naa ga bia naa nêz xtan zha Macedon, biaguib naa me.

¹⁴ Per, ¡xquizh xquielnzaac Dios! Sac zaatne ziotaa no, Jesús ner lo no, me rlu ganle rdziuuñ no gan lo grêtaa ncuaañe rca. Tibaque rnee no lo miech gacnañ zho ganle cho nac me, sca quiaxobnen no Xtiidz me, zig rzêbñlaa tib ncuaañe nex rlaa.

¹⁵ Haxta no, masaque nac no lo Dios zig tib ncuaañe sca nex rlaa; sca nac no lo me sacne laa no ngable lo Jesús. Nêzrii nêzrec nex zêbñlaa gox co, zigtaa lo grê zha ne ngable xnêz Diosa, zigtagaa lo grê zha ne zie nêz ne nitlow.

¹⁶ Par grê zha ne nole nêz ne nitlo, masaque rzac zho no zig tib gox ne nguid rlaa, haxta rsoladz zho pe nac guielgut ne quiambêz zho; sangue grê zha ne nole xnêz Dios, rzac zho no zig tib gox nex ne ruñcsoladz zho guielmban ndzon ne no yгаа zho. ¡Ni led choñd zha ne gon grieelo guñ dziin rii!

¹⁷ Nu rquiin zha ne dib zdoo rquiabladz guñ dziin lo Dios, glu zho ne nli Dios pxeñ zho, ne nli Jesús nacnie zho. Sac no zha ne, loxaque rquiaalo zho ye zho rseed miech Xtiidz Dios, per laa zho ruña par cuee zho dimi.

3

¹ Nana ne znu rne naa, guiab to bod yeque no rdziuuñ zig ruñ zha ne sca rquidie ga, lêêque zha ruñnon zho, rio zho dieen pe diidz ne rquia rey zho par glupaa dieñ cho nac zho. Ni lalnu rdziuuñnond no no, niicle peet diidz rquiindгаа no.

² Led yed no rquiin pe diidz ne dzeey no, to rlu cho nac no. Grêse miech ne gan zha notsêê Dios lo xquielmban to, gase guñbey zho no, ga glu pe nac dziin ne rdziuuñ no.

³ Gane rrieequia nac to zig tib diidz ne quialu ganle cho nac no. Jesús zhal pquiaa diidz co, ni pquiind me pe tint ne nquiaa mew, sinque laa me pquiaaw con guielbiini chen zhiEspíritu Dios, men ne nguiamban. Ni pquiindгаа me pe lo guits ne nquiaa mew, sinque laa me pquiaaw zdoo to.

⁴ Ni ndionpaa no nli scaw, sac Dios zhal rluw, ne nac no zha ne ngab lo Jesús.

⁵ Per guiabd ne togo nose rrieelo rdziuuñ grê mine rdziuuñ no, led scada, Dios nac men ne racnien no rdziuuñ now;

⁶ Sac me bdixbiini no zha cseed no miech diidz cub ne psañ me. Gane laa no noseed miech niina, per rseete no zho tsienañ zho mine rnabey ley, sinque laa no noseed zho guien zho tsienañ zho mine rnabey Espiritu Sant. Sac tel leya, lêê gdib rnabeya guet grêse miech ngoopdol; sangue Espiritu Sant, laa me rlu zha yгаа zho tib guielmban ndzon.

⁷ Golsoladz ganle, zha bet Dios biini ne nac xquielndzon me zeene pcaania Moisés ley ne rnabey guet grê zha ngoopdol. Biinidoo ne biaan lo Moisés dze co, haxta lêbd lo zha Israel gwi zho lo me, per dzega dzega biu biini co.

⁸ Scaque nagon nolu Dios xquielndzon me, niina ne laa Espiritu Sant nolu zha yгаа miech guielmban; per, ¡mazdraa gon nroob nac guielndzon rii!

⁹ Sac gon, tel scataa blu xquielndzon Dios zeene biaan guet grê zha ngoopdol; mazdraa dzigo nroob nac guielndzon ne rlu niina.

¹⁰ Ne nligaa, palase ga nac biini ne blu lo Moisés zeene pcaania Moisés ley co, mazdraa nroob biini ne ziaadnie xtiidz cub Dios niina.

¹¹ Ni stiba, bza dze ne been ley co dziin; sangue xtiidz cub me, gdziñd dze ne gdzêew. Gacxe waa, mazdraa nac biini ne ziaadniew.

¹² Ni ne ndionaxe no waa gdzind dze ne gdzëew, gane tiblque laa no noneew lo miech;

¹³ rdziuund no zig been Moisés. Sac tel Moisés, pquia tib lë lar lo me dzigo gond zha Israel zha bnitlo biini ne biaan lo me ga.

¹⁴ Ni rrieequia ye lo grë zha Israel ga sca bdze, gacxe waa, haxta lo nadze riend zho zha zhobnee lo Xtiidz Dios, mine psan me padzeela. Ible riend zho ne bdedle dze ne pquini diidz gol co, Jesúsle none gliladz zho niina. Me nac men ne cxal lo zho.

¹⁵ Ne nligaa sca nac zho, haxta lo nadze niicle rlabraa zho lo guits ne pquiaa Moisés ga, tibaque ndip nac zdoo zho.

¹⁶ Per tel zha ne csaan grë guieIntseeb, dib zdoo zho guien zho cho nac Jesús, ible zlit me lar co lo zho;

¹⁷ sac gon, miech ne nacniele zhiEspíritu me, led yedraa zho ngadoo lo ley gol co. Ni ndion ne ganle, meque ga nac Espíritu.

¹⁸ Gacxe waa, grëse ne ne ngab ne xnëz Jesús, led yedraa lo ne ndze. Masaque nac ne niina zig tib quiewan, zeene ran miech zha mban ne, ga ran zho ganle pa lotaa nac xquieIndzon Dios. Tibaque nozhixcuaa zhiEspíritu me lo xquieImban ne, zigse zie dze noluraa me zha nactaa guieIndzon ne rap me.

4

¹ Ne nligaa noxco Dios ne, gane niicle peet nond no laa me bzo no quianee no Xtiidz Ndzon me lo miech; ni choot rsaand dziin rii.

² Zeene rseed no miech, choot rquidied zho par gliladz zhow. Choot nolud wseed ne ziaate lo Xtiidz Dios; guieItole ga, tel dzio no yquidiee no miech, cseed no zho ncuane nacdrea Xtiidz me. Me zobwi ganle niapse diidzli ree no, niicle grëgaa zha ne rdziuunbey no, nan zho rquidieed no.

³ No grë zha ne ib nëd tsoguic zha nac zhiwseed Dios mine nonee no; sac lëëque grë xtol zho notse lo zho, laa zho zie nëz ne nitlo zho.

⁴ Nëd zho gliladz zhow, sac ible mendox (ma ne nonabey lo guidzliu rii) noyun ncow xquieIrien zho; gane riend zho ycaania zho Xtiidz Ndzon Jesús, men ndzon ne baaadlu ganle zhapaa nac Dios.

⁵ Laa no quiaseed miech, per rseete no zho gacnan zho dien cho nac no, sinque laa no noseed zho gunbey zho cho nac Jesús. Gacnan zho, ne me nac men ne rnabey; laa no, tib ngundziin winse nac no lo to, sacne rleynie no me.

⁶ iNe nligaa tib ngundziin winse nac no! Golwi ganle Dioszhal, men ne brabey biaan biini ne rziini guidzliu, me bdxibiini guic no bien no xquieIndzon me ga baaadlu Jesús.

Rsaand Dios zha ne dib zdoo rnalo me

⁷ Ne nlipaa, lega nace no zig nac tib guies yu ne notsow grëtaa ncuane ndzon ne zieneedz Dios lo no. Gase na ganle rlu, Dios nacchea grësew, peet nond no loxaque nose.

⁸ Me nacnie no, niicle nroob zhgab ne rio no, per racmband no; niicle nroob nac guieIxtseeb ne rdziañ no, per choot rdziebd.

⁹ Tibaque notsidil miech no, per rsaand Dios no; niicle rsacsi zho no zootle laa no nitlole, per rbiire riochee no ga stib.

¹⁰ Zaatne ziotaa no, quianaI miech gut zho no, zigne beenaque zho Jesús; per me rsilaa no ladzniã zho. Ga rlu ganle ne men mban nac me, ni me nacnie no.

¹¹ Gzataa dze noxtseeb no gut miech no, loxaque ne rdziuun no xtsiin me; per ga rdeeda diidz rlu no ganle pa lotaa nacnie me no, niicle ne tib lëse ben nac no.

¹² Ne nligaa, tibaque noxtseeb no lo guielgut ne znu nonee no Xtiidz Jesús; per scagaa, porne biadnee now i laa to bgaa guielmban ne gneedz Dios lo to.

¹³ Niicle nagon ne znutaa noxtseeb no, per ndionpaa no me quianap no, gane rdzieebd no noseed no miech Xtiidz me; zig zhubneeque lo Xtiidz me, zaatne rnee: "Bliladz naa mine rnee me, gane rne naaw."

¹⁴ Ni ndion ne ganle, zigne bleeban me Jesús, scaque zbeeban me ne, lozh ga tipse gac ne gdziinne Jesús ne lo me.

¹⁵ Grëse guielnë ne nodzian no, laaw nodzian no sacne nligaa noxco no to; zeena grëse to sëëb xnëz me. Sac telne ndal grë zha ne sëëb xnëz me, scaquegaa ndal zha ne gdeed xquizh lo me, cxobnen zho pa lotaa men ndzon nac me.

¹⁶ Mincocxe waa, ib choot riablod. Nli zigse zie dze laa no bii noyoxraa, sangue zhiespíritu no, zigse zie dze laaw racnubraa, laaw riaanmberaa nëz lo Dios.

¹⁷ Ni stiba, niicle ne znutaa nodzian no grë guielnë rii, per ncuaañe tib rded naca, led ncuaañe rnada; sac gon, zeene laa no lozh dieed grë min rii, mazdraa nroob nac lo guielndzon ne yгаа no, ni mincosi gdziindraa dze lozha.

¹⁸ Gacxe waa, choot rdziuuncasd grë ncuaañe quiazdian no lo guidzliu rii, sinque laa guic no nonie yгаа no grëtaa guielbley ne no bgaa. Sac grë ncuaañe ran ne niina, ncuaañe tib rded naca; sangue grë ncuaañe gard dzian ne ga, led yedraa min co nitlo.

5

¹ Ni ndion ne ganle, zeene laa xcuerp rii ne nitlo, laa Dios gneedz stib mine gdziindraa dze nitlo. Masaque nacse xcuerp rii ne zig nac tib yu guizh win ne rbëz miech lo wгаа; sangue cuerp ne gneedz me lo ne, rrieequia naca zig tib yu ne gbiaazpaa ne bgaa.

² Blactaa guielnë ne rdieed ne niina ne rdziaap ne cuerp rii! Gacxe waa, quiambiaaznë ne gdziñ dze ne gneedz me stib cuerp co.

³ Sac gon, led niapdse espíritu gdziñ ga, sinque none gapa cuerp.

⁴ Ne nligaa, niina ne mbannie ne cuerp rii, zeene në nodieed ne, rziaac ne tebaa laa ne mbanniele stib cuerp co. Per par yгаа ne cuerp cub co, ible none guet ne. Per zienied guic ne sca, sinque laa ne racladz zhits cuerp riise tsie cuerp co, zig nacse ne niina yгаа ne guielmban ndzon co. Sca rziaac ne, sac choot rdziladz guet.

⁵ Dioszhal bzo ne yгаа ne min co, ni ible zaca, sac gon laa me pxeelle Espíritu Sant nacnie ne.

⁶ Tel no, min co nagon quiambiaaz no; ndionle no laga mbannie no cuerp rii, grielod yгаа no min co, grielod gdziin no zaatne no Jesús.

⁷ Nli rdziand now niina, per dib zdoo no riladz no ib laaw none gac.

⁸ Gacxe waa, haxta nley rac zdoo no quiambiaaz no gdziñ dze co; rziaac no tebaa laa no brielee len cuerp rii, zeena guiobannie no Jesús.

⁹ Min co nagon, tibaque noxco no gac no zigne rdziladz me, zigtaa niina ne no no lo guidzliu riw, zigtagaa zeene gdziin no lo mew.

¹⁰ Sac gon, grëse ne zdziñ dze ne laa ne gacredz lo me zaatne gun me guielwxtis. Grëse ne ne nac ne miech, tel zha mban ne niina ne rdziaap ne cuerp rii: zigtaa zha ne zaacse mbana, zigtagaa zha ne tel zhataa mbana, ga yгаа ne mine guiguial ne tib ne.

¹¹ Min rii nagon nonie guic no, gacxe waa noxco no nonee no lo miech zha nac Xtiidz Dios. Ni me nan ganle dib zdoo no nodziuun no dziin rii, ni racladz naa guien to ganle sca nac no.

Zaacse golgac lo Dios

¹² Grë minë blozh bne naa nu, zig bnele naa ga: nacda par dziuunnon no no. Laa no rnee grë min rii, zeena guienpaa to ganle cho nac no; ni scagaa, guien to zha ctsire to lo xtiidz grë zha ne squi riaad i rlozhd gacniats zho. Tel zha, laglaase rlu zho miech wen nac zho.

¹³ Nligaa, dib zdoo no noxco no xtsiin Dios, laa miech masaque rzac zho riotsle guic no. Nana niicle tel riotsgaaw, per xtsiin Dios nodziuun no. Sangue no, ndionpaa no riotsd guic no; laa no rdziuun grë min rii, sacne noxco no cseed to Xtiidz me.

¹⁴ Laa no nodziuun dziin rii, sacne rleynie no Jesús, maase tel zhataa rzac miecha.

Ndionpaa no Jesús bgaa guielgut ne nioguial ne; scaquegaa, ndion no niina ne laa no bziaab xnëz me, rrieequia gutle no lo grëtaa ncuane ndzinlid ne bdziuun no glo.

¹⁵ Gacxe nagon waa, grëse zha ne rzëëb xnëz me, nodraa gban zho zigne notaa guic zho, sinque laa zho none tsoxco gban zho zigne rdziladz me; guien zho ganle, me gut bdiizh me xtol zho (ni brieeban me), par yгаа zho tib guielmban ndzon ne gdziind dze lozh.

¹⁶ Gotsaa guien sca, zha ne nole xnëz Dios, ziaacd ne zho zig rzac grëraa miech zho, rzac zho peet nond zho. Tel naa glo sca bzhaac naa Jesús, masaque bzob naa cholze miech nac me; sangue niina, ndionpaa ne ganle cho nac me.

¹⁷ Sac gon, grëse zha ne ne nlipaa dib zdoo rliladz Jesús, stible miech nac zho. Grëse tel zha goc zho glo, laa min co bdedle. ¡Ncube nac lo xquielmban zho!

¹⁸ Ni loxaque Diosse gon zrieelo sca gunncub miech. Sac gon, me pxeel Xpëed me Jesús biaadtizh grëse xtol ne, laa ne biaanwen lo me. Ni scagaa niina, me bzo no znu quiaseed no miech, zeena gacnan zho zha grielo guiaanwen zho lo me.

¹⁹ Znu gon naca: Laa Dios nodeed diidz niina guiaanwen miech lo me, gunquizhd me zho tel pe nactaa xtol zho, totsaque gliladz zho cho nac Jesús. Min rii nagon bzo me no nonee no lo miech.

²⁰ Golgan sca ganle, xmandad Jesús nac no. Me zobwi ganle laa no rnab lo to niina: ¡Golguiaanwen lo Dios! Golguien ganle, rrieequia gon Dioszhal rso diidz rii lo to.

²¹ Sac gon, Dios bzo Jesús bgaadz me grëse xtol ne, niicle ne ni tib dol rapd me; zeena niina ne laa ne wbig lo me, grielo ndzinli gban ne, zigne racladz Dios. ¡Masaque Jesús bdiizh grëse xtol ne, psanwen me ne lo Dios!

6

¹ Gotsaa gwi ne ganle pa lotaa noxco Dios ne. Gacxe waa, no ne nac no zhingundziin me laa no rso diidz lo to: golguien golgon minë nonee me lo to niina.

² Lo Xtiidz me, no tib zaatne znu zhubnee:

Lëetse len dze ne nosilaa naa miech, laa to bnab gacnie naa to.

Lëetse len dze ne rdeeda diidz gac minë quiambëz to, laa grë xliaadz to blanso lo naa.

¡Ni lëe dze co nu nagon bdzin! ¡Nadzegazh quiambëz me gbig miech lo me, zeena csilaa me zho!

³ Dziin rii quidziuun no, choot quidziuunctald xtol miech, choot noguibd sozit zho lo Dios. Zaatne ziotaa no, tibaque noxco no zaacse gac no, zeena tsod pe yquiaaqui zho gneenë zho Dios.

⁴ Zigtaa ncuaa^{ne} rdziuuⁿ now, zigtaa grë^{gaa} ncuaa^{ne} nodieed now, rlu no gan^{le} ne nli xtsiⁿ me nodziuuⁿ no. Te^l pe nactaa grë guie^lnë ne nodieed no, te^l pe nactaa grë xliaadz no, niicle no zaatne rsacsi miech no, per choot rietede.

⁵ Blactaa zaatne rguⁿ zho no, zaatne rsiogyu zho no, zaatne rree zho ndal zho racntseeb zho lo no. Blactaa rdib rdzaag no rdziuuⁿ no dziin, no zaatne rree zhimcaalo no dipse guieel, no zaatne retgbin no.

⁶ Ne nligaa rdzioxco no ndzinli mban no, choot rietede, wen wen rdziuuⁿbey no zha nac Xtiidz Dios, sca ranⁿ miech gan^{le} ne nli Dios pxeel no. Dib zdoo no rleynie no samiech no, wen rac no lo zho, zilu no gan^{le} pa lotaa racnie Espiritu Sant no.

⁷ Niapse mine nac diidzli minⁿ co rnee no, ni scagaa Dios, nolu me gan^{le} ne nli scaw. Niapse guie^lwen, niapse diidz ndooladz rlu no ne nli lo Dios quiazziuuⁿ no dziin.

⁸ Choot rsaand mine pso Dios no nodziuuⁿ no, maase niicle mine run^{ta} miech no. No zaatne runⁿon zho no, nogaa zaatne rzhidznie zho no; no zaatne rreenë zho no, nogaa zaatne rleynie zho no. Niicle ne diidzli rnee no, per no zho rzac noquidiee no miech.

⁹ Runⁿbeyd miech cho nac no, san^gue Dios runⁿbey me no. Niicle ne tibaque noxtseeb no lo guie^lgut, per peet gard gac no laa no bii mban; niicle ne rsacsi zho no, per choot gard guet.

¹⁰ Niicle ne no hor mban rac zdoo no, per znusaque rneedz Dios tib guie^lbley zdoo no. Nacd no zha dimi, per nroob nac grë guie^lnzaac ne rgaa miech zeene rnee no lo zho. Rdziaapd no grë ncuaa^{ne} rap grë^{raa} miech, per ncuaa^{ne} rdziaap no, nroob nona.

¹¹ Bets, bzian, ne no to Corint i, laa no rzodiidznie to, laa no rnee lo to grëse zigne rza zdoo no. Ne nligaa rleynie no to.

¹² Te^lne rzac to gard gac^{pa} ne tipse, per led nod naca. Te^l no rleynie no to, sinque to gonⁿ rienⁿ no laglaase rleynie to no.

¹³ Ne nligaa peet rqueets naa lo to, laa naa rne lo to zig rnee tib dad lo mëed. ¡Scaquegaa to, go^lsiguie^l zaacse go^lgac!

Zhaa nac biini lo guie^lcow

¹⁴ Go^lguieⁿ, guiabde to tipse gac to grë to zha ne gard seëb xnëz Dios. Go^lgan gan^{le}, tib zha ne nole xnëz me, rdzieeld gac zho zig rac zha ne bii no lo do^l. Zig nacgaa biini, zhaa nac biini, zhaagaa nac lo guie^lcow.

¹⁵ Sac gonⁿ, te^l Jesús, ¿niacxe tipse nac me grë me mendox? Scaquegaa grë zha ne nole xnëz mew, grielod tipse gac zho grë zho zha ne no lo do^l.

¹⁶ Te^lxyadoo Dios, nacda zig nac xyadoo grë mdio. Ni rrieequia gonⁿ ne nac xyadoo me, zigne raquiet lo Xtiidz me zaatne rnee:

Na gbannie naa to, iⁿe sënie naa to.

Naa gliladz to, ni scagaa to, lo naa ygab to.

¹⁷ Gacxe waa, rbiire me rnee me:

¡Go^lrieelad grë zha qui, go^lbiche lo zho!

Gun^{de} to grë ncuaa^{ne} ndzinlid ne runⁿ zho, go^lbig lo naa, naa ycaania to.

¹⁸ Naa gac Pxo^z to grëse to, scagaa to, laa to gac xpëed naa.

Lëë xtiidz menⁿ ne rnabey to nu.

7

¹ Bets, bzian, gotsaa gwi ne ganle zha nactaa ncuuane psan Dios diidz yгаа ne. Gacxe waa, golgotsaa lozh griece ne lo grē zhgab yozh, lo grē ncuuane ndzinlid ne runctal xtol ne. None zigse zie dze dzioxcoraa ne gban ne zigne rdziladz me.

² Ne nligaa, zaacse golgac golcaania no stib. Tel pe guielnē ne noded to, tel zha rzac to, to bguiba; zig nac no, choot noquidiede to, choot nosacside to.

³ Guiabde to togo noquiago naa to nu, laa naa nile ganle dib zdoo no rleynie no to. Len ngbidz ne gbantaa no lo guidzliu rii, ib csaand no to.

⁴ Laa naa rne grē min rii lo to, sacne nanpaa naa zha nac to, nanpaa naa zac gne naa lo to zigne nose guic naa. Zeene rsoladz naa to, haxta riaanladz naa grē mine nodeed naa, ine riaad tib guielebley zdoo naa; haxta riats naa ne runbey naa to.

⁵ Wlal ne blanso na Macedon nu, ni tib lē notiblid guic no; lala noxtseeb no lo grē zha ne quianal no, lala nonieque to guic no dien yo to.

⁶ Per rsaand Dios zha ne no lo zhgab, me pchoobladz zdoo no; sac zeene blanso Tit lo no nu,

⁷ blansonie me diidz zaacse pcaania to me. Per nli rley no bdzion ndzinlile mban to, nē me bio to guielnē grē len dze ne bded ga, ni nē me nonie no guic to, quiambēz to tebaa zha ganriob to lo no stib.

⁸ Zeene pxel naa guits co lo to glo, mban goc zdoo naa sac bien naa ib zgoguelnēw to, sangue niina racmbandraa zdoo naa; sac rien naa niicle ne bio to guielnē tib bla dze, per na laa ncuuan co bdedle.

⁹ Gacxe waa rley naa niina, per guiabde to togo rley naa bio to guielnē, sinque rley naa gon naa laa to wbiire wbig lo Dios por guielnē ne bio to ga. Ni sca nagon racladz Dios gun grē zha ne ngab xnēz me zeene runctal zho xtol zho, gane rienpaa naa led psacsid no to ga.

¹⁰ Zeene Dios rdeed diidz sca rio miech guielnē, lo guielnē co laa zho rbig lo me rsanmbe me zho lo xtol zho; rsaan zho tel pe nac ncuuane ndzinlid ne noyun zho. Zha ne sca rac-wen lo Dios, nodne gacmban zho guiab zho pe nacne bded zho guielnē co. Laa grēraa guielnē ne ran miech, zig nac zha ne nod xnēz Dios, loxaque rlozh runmbana zho, laa zho bii zie nēz ne nitlo zho.

¹¹ Golgan ganle, pa lotaa bzhixcuuaa to niina ne bio to guielnē co. Haxta baa to biini, bioxco to blee to zha co lo dol ne quiaayun zho ga; bien to ganle nonguieia rlisqui naaw. Gacxe waa, zeene gon to pa lotaa nac dol co, güeyniew guic to ni wbinladz to; gonzedraa to zho. Niicle ne gocladz to tebaa i zo naa nedz naa rson dien zha niun to; per tibaque beenquizh to zho mine been zho ga. Wen ne sca been to, ga blu to ganle rdziguiende to dol ne been zho.

¹² Ne nligaa tibaque noxco no zaacse gac to. Zeene pxeel no guits co lo to, guiabd ne togo zhizhgabpaa zha ne been dol co no no, zhizhgabpagaa pxoz zho; sinque laa no pxeela sac tibaque noxco no zaacse gac to.

¹³ Gacxe waa, zeene bdzion no bin to diidz been to mine rnee no lo guits co, per nli rley no.

Ni zeene bdzion no grēse to zaacse blēzlo to Tit, mazdraa bley no; niicle megaa rley me ne squi niowse gon to me; haxta nguieel rac me niina.

¹⁴ Bzodiidzle naa lo me, ne squitaa wen miech nac to, gane rley naa psande to naa guielto. Tel naa niapse diidzli rne naa, zig nac niina, zig repse naa lo Tit scase gon me rac to.

¹⁵ Rleynie me to, rzac zdoo me zeene rsoladz me grēse to ndooladz goc to pcaania to me, ni bin to diidz been to mine bnabey me to.

¹⁶ ¡Ne nligaa, rley naa niina bin naa squi zaacse rac to! ¡Nasi, nanpaa naa racnie to naa zigne racnie naa to!

8

Dib zdoos to goldeed gon

¹ Bets, bzian, laa no gozdiidz lo to ganle pa lotaa quaiyacniēn Dios grē zha ne ngab lo Jesús nēz Macedon nu.

² Nli nroob grē guielnē ne quiaayan zho, per nguieel rac zho. Leņ dze ne bded nu beenlo zho tib gon, niicle ne zhis ncuaaņe rap zho, per nroob gon ne beenlo zho.

³ Laa naa nrew lo to, sac naazhal gona. Ne nligaa, dib zdoos zho bleeladz zho grē ncuaaņe bloogon zho; ncuaaņe rgaataa lo zho laa zho bdeeda.

⁴ Dzigo bñab zho lo no gdeed no diidz ye xgon zho guey lo grē zha ne nacgrē ne, zha ne guieņd pe yquiin.

⁵ Ni lēdsew ga, bzee zdoos no zeene bdzion no blozhse psan zho zho ladznia Dios, laa zho wbig lo no nē zho, miņe csiaabtaa Dios guic no gnabey no zho, zun zhow. Ni lalnu gon guēynied guic no gon zho grētaa min rii.

⁶ Niina ne bdzion no znutaa biabgan zho nēz rii noyunlo zho gon rii, nacne rdzieets no lo Tit siguiel me guiaad me nēz lo to i stib; zeena lozh gunlo to gon ne bnabeyle me to i quiaayunlo to.

⁷ Rdziuunbey no to: dib zdoos to rñalo to Dios, zha niini nac to, rien to zha gnee to Xtiidz Dios lo miech, nguieel rac to run to xtsiin me, ni pseed to rleynie to samiech to. Nana sca, zig nac gon rii, scaque dib zdoos to gołtsoxco golgunlow.

⁸ Laa naa bzet lo to nu zha been zha Macedon, per guiabde to bod nonabey naa to scapaa gon to. Sinqe laa naa bzeta lo to, zeena gacnan to ganle ye zha co pquiabladz bdeed gon co. Nu nagon rdeeda diidz glu to ne nli rleynie to grēraa zha ne nacgrē ne, led loxaque diidzdsew.

⁹ Gołwi ganle, zig nac Jesús pa lotaa noxco me ne. Niicle ne me nacchen grētaa ncuaaņe no, per bdeed me diidz goc me zig tib zha ne peet rapd; ga bgaa ne grētaa guielnzaac ne rap me. Laa me been min co sacne rleynie me ne.

¹⁰ Wena, tebaa tsoxco to lozh gunlo to gon qui. Gołsoladz ganle, topaa psilo bleebey gaclow wdibiz ga, iņe nguieel rac to psilo to.

¹¹ Nana sca, zigne psilo to hor co, scaquegaa niina nguieel golgac gołsiaal lo dziin co. Gołquiabladz tel palalaa ncuaaņe rgaal lo to tib tib to, dib zdoos to goldeeda;

¹² sac zeene dib zdoos miech rquiabladz zho cogon zho, tel palalaa miņe ygaa lo zho, scaania Diosa. Nanle me palal ncuaaņe rgaal lo tib tib miech, gnabd me ncuaaņe ni quianied zho.

¹³ Sac nacda ne ygad to grēse ncuaaņe rap to lo stib zho, lozh ga guiaanmban to; laa zha yquianie grēsew.

¹⁴ Led scada. Laa min rii rac, zeena grēse ne lalga ncuaaņe yquianie ne. Niina ne rgaaw lo to, goldeed palala yquiin grē zha ne rapd nrooba; zdzingaa dze na pe gunfalt lo to, dzigo laa zho gneedz tel pe nacgaa ncuaaņe quianiede to. Sca none dziuunlsa ne xyudar zha ne nacgrē ne, zeena zig rñe naa ga: lalga ncuaaņe yquianie ne.

¹⁵ Gołsoladz ganle, znu rnee lo Xtiidz Dios: “Zha ne ptop nrooba, beenda sobr lo zho; niicle beenfaltegaaw lo zha ne ptop zhisa.”

Laa Tit guiaad i stib

¹⁶ Xquizh Dios psiaab me guic Tit, zigne rzacaque naa to scaque rzac me to; tibaque nonie to guic no.

¹⁷ Zeene bñab naa lo me siguiel me guiaad me lo to i, bzhiguielga me; ni nolegaa guic me guiaad me, sac ne nligaa racladz me guiaadso me lo to stib.

18 Nêz rii, no tib bets ne, nroob yudar quiayun me nogaaz Xtiidz Dios lo miech; zaatne rcaalsataa zha ne no xnêz Dios nu, grêse zho runbey me, tib men nziuu nac me lo zho. Me gacgrop Tit, niina ne laa no cxeel Tit lo to i;

19 ni meque bzooblo zho, sênal zhits no zeene guiosan no gon rii. Nozhal guiosana, sac ne nligaa dib zdoo no noxco no zha gac xyudar grê zha ne guiend pe yquiin. Nu rlu ganle pa lotaa men nroob nac Dios, sac me quiayacnien ne ne laa dziin rii noyac.

20 Gza no bets co guio, zeena gzaadolz zdoo miech guiab zho nend zha lega zhiien no palal gon rii, sac gon nligaa nroob naca.

21 Dios zobwi ganle mbe lo no, ni racladz no ye miech gan zho ganle ne nli zha legal nac no. Min co nagon, nacne sca guio no gza no.

22 Rdziunbey no stib bets ne nu, rdzian no nli dib zdoo me rleynie me Dios. Niina ne laa grop zha co guiaad i, ye me guiaadnal zhits zho. Rley me ne laa me guiaadgan to i, sac ziyon me ye to noxco gacnie to zha ne nacgrê ne.

23 Tel nand new cho gnabdiidz lo to dien cho nac Tit, golguiab lo zho tipse nac no grop no me, xyudar naa noyun me quiaseed no to. Ni tel gnabdiidz zho cho nac schop zha ne ziaadnal zhits me i, dzigo golguiab grê zha ne no nêz rii pxeel zho, dib zdoo zho noxco zho mban zho zigne rdziladz Dios.

24 Golguien sca, gza zho zigne ziaad zho lo to i, niowse golcuêzlo zho. Gollu ganle ne nli dib zdoo to rleynie to zho, zigne rleynieque to naa; zeena gacan grêraa zha ne nacgrê ne nli mine rnee no zeene rzodiidz no lo zho zha nac to.

9

1 Nanle naa, rquiindpaa gni naa lo to zha gdeed to gon ne gaclo nu gac xyudar grêraa zha ne nacgrê ne, sac laa to noyunlolew.

2 Runbey naa to, nanle naa ible rquiabladz to gun to xyudar zho, gacxe waa rley naa rzodiidz naa lo zha ne no nêz Macedon nu, rne naa lo zho: wdibizlaa psilo to nêz Acay i quiayunlo to gon co. Mincoxe waa, zeene bin zhow, nzian zho pquiabladz laa zho bdeeda.

3 Per laa no rxeel gza bets rii ziaad i, ziaadguncsoladz zho to lozh gunlo niob tow; zeena glu ganle led lega rneed no zha nac to.

4 Sac gon guielto ga grieequia naa lo zha rii, tel gualnie naa bla zho i, ni gan zho peet gard gaclo. Nli ziaan naa guielto, per mazdraa gon nac guielto ne guiaan to.

5 Min co nagon, ni naa mazd cxel naa zha rii, ziaadnerga zho zeena gun zho xyudar to lozh ycaalsa gon ne pquiabladz to gunlo to ga.

Laa naa rnab lo to, tel pe nac ncuaane cogon to, dib zdoo to goldeeda. Golguien zha cogon to.

6 Golwi ganle zha nac guielgon: Zha ne zhis ran, zhis guielnzaac ne rcaa zho; sangue zha ne nroob ran, scagaa nroob guielnzaac ne rlis zho.

7 Tib tib to sca, golcobey palal ncuaane gdeed to. Mine gdeedtaa to, dib zdoo to goldeeda; ib gunde to ne guiab to por rac-wnabsew laa to gdeeda. Sac gon, zha ne dib zdoo rdeed ncuaane rgogon zho, rleynie Dios zho.

8 Ni me ne nac me men ne rrieelo rneedz grêse ncuaane rquiin, me nac men ne gneedz grêtaa ncuaane yquiin to; ni haxta ziaan mine gdeed to gac xyudar grêraa zha ne nacgrê ne.

9 Zigne raquietaque lo Xtiidz me, zaatne rnee:

Zha ne nguzobdiidz lo Dios,

dib zdoo zho rgad zho ncuaane rap zho lo grê zha ne guiend pe yquiin;

ni scagaa sêeb diidz ne miech wen nac zho.

¹⁰ Dios guñlay ncuaañe quianie to, ygaaw gdeed to, ni scagaa me gacniẽ to nroobraa guieñzaac ne yгаа to. Golwi ganle, zha runlay me zha ne ran: Me psañ grẽse lo bni ne ran zho, ni meque rchooba; rlozh ga, nroob guieñzaac ne rliis zho, rgaaw row zho.

¹¹ Ne nligaa, Dios nac men ne gunnroob ncuaañe quianie to, zeena scagaa nrooba cogon to. Golguiẽ ganle, zeene laa no guiošana lo grẽ zha ne yquina ga, blactaa gley zho gdeed zho xquizh lo Dios.

¹² Led lega nacdse gon ne gdeed to i. Sac gon, led loxaque xyudardse zho guña, sinque zeene laa zho ycaaniaw, haxta squiabladz zho dib zdoo zho gdeed zho xquizh lo Dios.

¹³ Zley zho gan zho grẽtaa ncuaañe cxeel to yquini zho; ni zleynie zho Dios gan zho ron to miñe rnabey Xtiiidz Jesús.

¹⁴ Haxta dib zdoo zho gnab zho gacniẽ Dios to, por grẽtaa guieñzaac ne gdeed me ga yгаа zho.

¹⁵ ¡Xquizh xquieñzaac Dios, sac gon tel me nroobraa nac guieñzaac ne bneedz me lo ne! ¡Gotsaa gwi ne ganle, haxta Xpëed me bleeladz me!

10

Rieguial gnabey Pabl lo zha Corint

¹ Ziyon naa rnee zho i, zeene zose naa zit nguieex rzẽ xtiiidz naa rxel naa; laa zeene zo naa lo to, rdziẽld naa pe gne naa. Sangue tel naa, tibaque nac naa, ndooladz rac naa lo to, niicle zeen tel pe diidz ne rsogaa naa, ndooladz rne naaw; zig guñ Jesús, tel niaca miñe mezhall gnee lo to.

² ¡Tebaa gdziind dze pe yquiaaqui glu naa xquieñdox naa lo to! Zha ne squi rzac lalaque nac no grẽ no grẽraa miech, rnee zho miñe run miech, miñcoque rdziuuñ no, ¡tebaa siguiel zho zaacse gac zho, sac racladzd naa tiñie naa zho!

³ Nli miechse nac no, per ib zionałd no gacndaan no zigne racndaan grẽraa miech guidzliu.

⁴ Sac tel no, choot rnalod grẽ guiib las ne rnalo zho, sinque laa no rnalo poder ro ne rap Dios; miñcosi zrieelo gnitlo grẽtaa guieñtseeb ne racladz menđox gac.

⁵ Con poder rii, zrieelo csioog no ro zha ne squitaa lega rnee, zha ne racndaan nẽd zho gacnañ miech cho nac Dios. Grẽ zha ne ractseeb lo Dios, con poder rii zrieelo co no guic zho gbiire gbig zho lo me, gac zho tib miech nguzobdiidz lo Jesús.

⁶ Ni poder co yquini no gnee no lo to lozh guieñ to gban to zigne racladz Jesús; lozh ga, grẽragaa zha ne ractseeb, lëeqew yquini no par gacnañ zho ganial zha rieguial gac zho.

⁷ Zha ne rnee i loxaque rzedz yan naa, laglaase ga ran zho, nañd zho zhapaac nac naa. Naasi xnẽz Jesús no naa; gacxe waa, zha ne rnee xnẽz me no zho, none guieñ zho ganle cho nac naa.

⁸ Nana no to guiab guieñniatsle nu, sac rlu naa ne naa rnabey lo to. Per nacda guieñniats, ible Dios bzo naa gnabey naa lo to, ni laa me bzo naa par glu naa zha tsienal to grẽ miñe rnabey me, bzod me naa par yquidiee naa to tsienal to nẽz ne nitlo to.

⁹ Golgacnañ sca ganle Dios bzo naa, guiabde to togo lega rnese naa par ctseeb naa to.

¹⁰ Sac nañle naa no zha ne rnee i: “Gonde to miñe rnee men qui. Loxaque lo guits ne rxeel me squitaa ndox rzẽ xtiiidz me, per loxaque diidza. ¡Zeene zo me lo ne, tib zha yozhsew, per ni riẽnd me zha gnee me!”

¹¹ Per led scada goṅ. Niina ne laa naa guial i, laa naa glu lo zho ganle zigne rzê xtidz naa zo naa zit, sca nac naa.

¹² Ib guiabde to, togo ye naa quiayun zigne run zha qui, lëëque lëë zho runniats zho. Tib guielnaxn ga, sac goṅ lëëque zha runnon zho.

¹³ ¡Tel no, choot rdziunniats no ncuane ni nacd no! Ni zeene rnee no cho nac no, per mine bzo Dios no nodziun no min co rnee no; ni mecxe waa bzo no quiaseed no to.

¹⁴ Ible riogual ne no gnabey lo to, sac goṅ no gloopaa biaad i biadseed no to zha nac Xtiidz Ndzon Jesús; choot noziaabd zaatne rioguald no.

¹⁵ Stiba, rdziladzd no gdaannie no xtsiin stib miech. Laa no bii cseed to lozh tsoquic to zha nac Xtiidz Dios, zeena haxta yele to guṅ xyudar no ygaazraa Xtiidz me.

¹⁶ Dzigosi nagon laa no guio grëraa guiedz ne ndxie dib nêz qui, guioseed no zho gacnan zho zha laa zho lo dol; per zig rneque naa ga, guiosiaabd no zaatne psilole stib zho, zeena gan miech ganle rdaannied no xtsiin stib zho.

¹⁷ Znu ziaad lo Xtiidz Dios, zaatne rnee: “Zha ne zienie guic xoobnen lë zho por dziin ne run zho, mazd tsoxco zho xoobnen lë Dios.”

¹⁸ Sac paat rquiinda ne lëëque ne guṅnon ne, mine mazdraa rquiin nacne Dioszhal glu zha non nac ne.

11

Nlid Dios pxeel zha qui

¹ Laa naa rnab lo to, ¡golxecw yquiaadiag to mine gne naa nu, niicle tel no mine rzac to rquiind!

² Golgacnan ganle, zigne rzac Dios to scaque rzaac naa to, ib racladzd naa cho guiaadquidie to. Mine racladz naa Jesússe gleynie to, zig run wnaa nguiet ne no xtiidz ctsieelnia. Sac tel wnaa nguega, mgui ne no xtiidz zho mgui cose rleynie zho, haxta rdziñ dze ne rtsieelnia zho.

³ Sca none grieequia to lo me; per rdzieeb naa goṅ nend zha yguib menodox yquuil ma to, gondraa to mine rnabey Dios, dzigo laa to gac zig rac grëraa miech ndzinlid. Sac goṅ tel Ev, sca pquuil ma Ev.

⁴ Laa naa rzet min rii lo to, sac rien naa, zha ne riaadtaa i ween rdeed to diidz rquiaadiag to zhiwseed zho. No zho rzeet Jesús, rzeetгаа zho espíritu, per rzeete zho me zigne biadseed no to; rneegaa zho zha laa miech lo dol, per nacda zigne pseedle to glo.

⁵ Haxta rnee zho, rienraa zho lo grëraa zha ne noteed Xtiidz Dios; sangue naa, nanpaa naa led scada, zrieelo glu naa lo zho ganle peet rien zho.

⁶ Nend nli gacd naa gne naa zigne rneetaa zho, per zeene rne naa rienpaa naa ne diidzli none naa; ni ziyanlegaa tow ganle.

⁷ Rzaac naa lëda ga ben naa, zeene bial naa bialseed naa to Xtiidz Dios; sac rsoladz to ganle ib peet bnabd naa lo to, scase bialseed naa to. Niicle mban bdeed naa, per bioxco naa wbig to lo Dios bgaa to guielnzaac nroob ne rap to niina.

⁸ To riogual needz ncuane nquiin naa, na lel grë zha ne nole xnêz Jesús len dze co, zha co pxeel ncuane pquiin naa, rrieequia bla naa xtimi zho ga.

⁹ Niicle bdziñ dze ne peet guindraa lo naa, per ni tib lo to ib psodziind naa; lëëtaque len dze co biaad bla zha bets ne zha ne ziaad nêz Macedon, zha co biaadnie ncuane pquiin naa. Ib peet bnabd naa lo to hor co, ni gdzindгаа dze ne pe gnab naa.

¹⁰ Ni golgacnan ganle, ib tedsod sodiidz naa grë min rii dib nêz Gres i. Ible zun naaw, led yed naa rquidie, sac goṅ runbey naa zha nac Xtiidz Jesús.

11 Per guiabde to togo rlëenie naa to, racladz naa csaṅ naa to guielto; sac Dios zobwi gaṅle rleynie naa to.

12 Gōlgacnaṅ sca led scada, sinque laa naa guṅ miṅ co, zeena csioog naa ro zha ne rlozhd gacniats i, rnee zho ye zho quaiyūṅ xtsiṅ Dios zigne quiadziūṅ now.

13 Saṅgue no, ndion no nlid Dios pxeel zho, lega noquidiese zho to i squi no zho, rquiaaalo zho zig nacne nli xtsiṅ Jesús quaiyūṅ zho.

14 Ni led ncuaane gzeed zdoo ne ga. Sac ible sca ruṅ mendox, no hor rzëeb ma rded ma zig tib xmandad Dios.

15 Gacxe waa, jzha ne squi ruṅ xtsiṅ ma, miṅcoque ruṅ zho rquiaaalo zho rac zho zig cho miech wen, rquidie zho miech! Per zdziṅ dze ne laa zho ygaa guielndox ne tsieguial zho, zaatne tsietizh zho grëtaa miṅe noyūṅ zho i.

Blactaa ncuaane zadeed naa

16 Laa naa rnab lo to nu stib, gōlquiaadiag miṅe gne naa, niicle tel rzë xtidz naa zig rzë xtiidz zha ne rzhinle guic. Nli lega niats gne naa, per gōlxcw gon tow, sac laa naa guṅnon naa zig ruṅ grë zha qui.

17 Led Jesúsḍ rnabey znu gne naa, sinque masaque laa naa guṅ miṅ rii, zig ruṅ tib zha ne riotsle racic.

18 Tel squitaa niats rac zha qui lëëque lëë zho ruṅnon zho, lozhd gool zho lo to dien pë nac ncuaane noyūṅ zho; gōlquiaadiaggaa miṅe gne naa nu na gaṅle:

19 Conque rzac to name nixbiini to, z zha nac dzigo rdeed to diidz rquiaadiag to ncuaane rnee grë zha yozh qui?

20 zPe ib riende to gaṅle quianabeyzhoole zho to i, quiasacsi zho to, quiaquidie zho to, quiala zho grë ncuaane rap to, quiasaṅwin zho to, ya zig zgap zho lo to?

21 jHaxta rtoladz naa gon, sac laa ne naa squi nabey to lel zhale squitaa no! Grë ncuaane riats zho i nac zho, ye naa zrieelo sca guṅniats naa naa (znu nagon rac zha ne rzhin guic).

22 zTelne riats zho rnee zho zha Israel nac zho? Yecxe naa waa zha Israel nac naa. zTelne rnee zho lo dii ne bzooblo Dios ga ziaad zho? Ye naa lo dii co zial naa. zTelne rnee zho Abraham nac xmengol zho? Men cocxe waa nac xmengol naa.

23 zTelne niats rac zho rnee zho xtsiṅ Jesús quaiyūṅ zho? Gacnaṅ zho gaṅle, naasi xtsiṅpaa me quaiyūṅ naa. Nroob dziin ne ziyun naa, blactaa ncuaane zadeed naa, pe zhidaa zigo miech naa ladzguib, blactaa zineedz dooguid zho naa, blactaa zaatne zadedlaa naa lo guielgut.

24 Gaayle vuelte zisacsi zhiwxtis zha Israel naa, galptsibguieega nia dooguid bneedz zho naa.

25 Tsonle vuelte zineedzyag zho naa, stib vuelte bneedzquie zho naa. Tsonle vuelte zadzieelo naa rdedquie barcw ne no naa len nisdoo; tib vuelte, tib dze tib guieel bzhoobse naa lo nisdoo.

26 Pa lotaa grë dan ne ziya naa. Nzian vuelte ne bdedlaa naa niet naa: zaatne bdedlaa naa lo nis guiubee, zaatne bdedlaa naa lo ngbaan, zaatne bdedlaa naa lo grë menzit, zaatne bdedlaa naa lo grë menladz naa. Ziyoxtseeb naa lo guielgut, zigtaa zaatne nac len guiedza, zaatne nac dana, zaatne nac lo nisdoo, zigtagaa lo grë zha ne laglaase rquiaaalo riladz Jesúsḍ.

27 Blactaa rdib rdzaag naa ruṅ naa dziin, blactaa guieel ni niip raagiesd naa, blactaa zaatne retgbin naa, zaatne retrnis naa, zaatne rcuan naa, zaatne mbanse rcuub naa ni guieṅdar ne piix naa.

28 Ni zhaaque tibaque nonie guic naa dien yo to, grëse to ne nac to zha ne nole xnëz Dios, zha no to tib tib guiedz zaatne squi blansole Xtiidz Dios.

²⁹ Zeene ron naa cho tib to racladz guiaan zdoos, mban rac naa zeene rrieelod gane naa lo zho; zeene rongaa naa cho tib to quaiyunctal xtol stib zho, ni rrieelod galisqui naaw lo zho, scaque mban rac zdoos naa.

³⁰ Grē mine bne naa nu, nacda guielniats; telne rieguialpaa gunniats naa naa, mazd gzet naa grē mine rlu ganle peet gacd gun naa naase.

³¹⁻³³ Zig bzhaac naa tib vuelt zeene bia naa Damasc, len dze co zob tib gobernador nac dziin lo rey Aret. Bnabey gobernador co xmenguiib me pqianap zho gzase puert ne rap biedz nroob ne ndze igo ro guiedz co; nan me naaz zho naa ngo zho naa ladzguiib. Per brieelod naaz zho naa, sac grē zha ne nole xnēz Jesús ga, zeene bin zhow dzigo bloo zho naa tib len chicuid pteed zho naa tib ro ventan ne quia cho biedz nroob co. Sca bdeeda diidz brie naa ga, biabd naa ladznia gobernador co.

Ni Dios gon, men ne nac Pxož Jesús, men ne rieguial dziuunnon ne gzataa dze, me zobwi ganle diidzli rne naa.

12

Racniatsd Pabl

¹ Nanle naa nonguielda lēēque ne gunniats ne, per laa naa sodiidz lo to ganle zha naa grē ncuaañe zinabey Dios zilulo lo naa, ni grēgaa mine zinee me lo naa.

²⁻³ Niina rac tsiida iz ga blis Dios naa güeynie me naa gbaa. Nand naa dien pe dib znu naa bia naa, te zhiespirituse naa ye güeynie me; loxaque mese nan dien zha güeynie me naa. Loxaque mine bien naa ne laa naa bia lugar ndzon co,

⁴ ga bin naa grē diidz ndzon ne waltaa gard gon miech, ncuaañe guieñd zho zha naca, ni nodgaa diidzbej gne naaw.

⁵ Zrieelopaa nagon gunniats naa naa ne laa naa bia ga, per ib gund naa min co. Laa ne gunniats naa naa zig rnele naa ga, mazd gzet naa grē mine rlu ganle peet gacd gun naa naase.

⁶ Ni tel gacladzga naa gunniats naa naa por mine blozh bzet naa nu, led guieñxend ga gun naa; sac mine nlipaa goca. Per rund naa min co, sac laa naa racladz tozhal guieñ cho nac naa, benque ran to ganle zha mban naa, rangaa to zha rne naa.

⁷ Ne nligaa ndzondoo nac grē ncuaañe blu Dios lo naa ga, zac nazho gunniats naa naa sac naa gona; per parne gund naa min co, laa Dios bdeed diidz biaad tib xmandad mendox psanwin naa, biaan tib yoob xcuerp naa zig nac zeene pe tib guiets nroob ne niaaz naa.

⁸ Tsonle vuelt zinab naa lo Dios ctiche me yoob rii;

⁹ biontaa vuelt nē me lo naa: “Bui ganle laa naa naciele luu, ni min co nac mine rquinraa lo luu. Peet tsienied guic luu sca, zha ne squi nsis rac, ga rdeeda diidz rlu naa ne nli naa nacie zho.” Min co nagon rley naa, sac ne znu nsis rac naa, grēse miech zeene ran zho grētaa ncuaañe rrieelo run naa, rien zho nli Jesús nacie naa.

¹⁰ Ne nligaa rley naa, sac niicle ne miech gzhe gzhele rac naa, niicle nroob guieñē ne nodeed naa, niicle rbidzgo miech lo naa, rtsidil zho naa, no hor guieñd pe yquii naa, per rley naa sac laaw nodeed naa porne no naa xnēz Jesús. Rne naa rley naa, sac zeene sca zootle greeequiadraa naa lo zhgab ne no naa, hor co laa Dios rlu ne me nacie naa.

¹¹ Nligaa lega guieñxenle nu znu rne naa, rac naa zig tib zha ne rzhinle guic! Per to gon rap dol, sac laa ne xcobnen to nli miech wen no, lel zhaa mine noyun to. Nli nacd naa cho zha non, per tsod ncuaañe csanwin grē zha qui

naa, niicle ne squitaa rzac zho zha rien nac zho, niicle ne rnee zho Dios pxeel zho.

¹² Golsoladz ganle, zeene bialseed naa to i, blu naa lo to ne nli Dios pxeel naa noteed naa Xtiidz me, blactaa grë ncuuaane bneedz Dios diidz blu naa lo to, blactaa grë milagr, blactaa grë ncuuaane bzee zdoo to gon to. Biod dze ne nieednie naa to.

¹³ Lëese mine bend naa lo to i, nacne nab naa needz to pe nquiin naa; sac grëraa zaatne ziyaseed naa miech, zha rneedz ncuuaane rquiin naa. iGolgun dispensar telne rbinladz guic to min co!

Nonie zha Corint guic Pabl

¹⁴ Laa naa nozhixcuuaale par guialgan naa to stib. Nu gac tson vuilt guial naa lo to i; ni scaquegaa niina gon ib csodziind naa lo to. Sac tel naa, noguibd naa dien pe gneedz to lo naa, sinque to guialguib naa. Golguien ganle, niicle ne racladzde to, per rrieequia gon mëed nac to lo naa; ni ndion ne ganle, led mëete riegual gdeed ncuuaane yquiin dad, sinque dad none gdeed ncuuaane yquiin mëed.

¹⁵ Ne nligaa, tib guielbleya lo naa quiateedlo naa to, laa naa noxco guien to zaacse gban to, zeena gdzin to zaatne gneedz Dios cuëz to. Xco co no naa, ib rquiad zdoo naa lozh grë ncuuaane rap naa, o lozhгаа naa lo xco co; maase niicle squi zootne laa ne rleynieraa naa to, lel nozozit to lo naa.

¹⁶ Nanle naa, no bla zha ne rnee i: "Nli peet bnabd me zeene biadseed me ne, per ne squi miech ndzielguic nac me bod no pa stib mod ne rien ne quiaban me ne."

¹⁷ Nana, zig nac zha ne zixel naa ziyaadgan to i, ipe niacxe biaadban zho to? iPe niacxe biaadquidie zho to?

¹⁸ Naa quia bnab naa favor lo Tit biaad me i, ni pxel naa stib zha bets ne biaadgrop me. iPe no pe bnab zho lo to? Golgacnan ganle nodziuund no min co, sac zigtaa naaw, zigtagaa mew, dib zdoo no nodziuun no dziin rii, choot noquidied miech.

¹⁹ Nana gza zdoo to guiab to bod parne guiaanwen no lo to, gane znu rne naa. Dios zobwi ganle led scada. Bets, bzian, grë mine none naa lo to nu, laaw rne naa sacne racladz naa lozh tsoguic to gban to zigne nac Xtiidz Dios.

²⁰ Sac gon, rdziladzd naa telne glanso naa lo to i, ni gan naa racde to zigne racladz naa; dzigo niicle togaaw, tsod zdoo to zeene gan to laa naa glisquiw. Adel gon zeene laa naa glanso i, lel dil no to; zha ne në rac zdoo dien cho stib noded, zha ne nozhixcuuaa diidzguizh, zha ne quianeenë, zha ne quiyacniats; nend haxta chop tson diile naa to.

²¹ Tel gan naa sca rac to, mbe gon stoladznie naa to ni haxta siaabguielnë to naa; sac nanle naa ni lalnu rdziladzd Dios grë min co. Zig nac grë zha ne squi padzeelale quiyayunctal xtol ni rsaand zho grëtaa guielyozh, grëtaa ncuuaane ndzinlid ne bii quiyayun zho, mbe gon sigoon zho naa.

13

Rso Pabl diidz

¹ Niina nagon ne gac tson vuilt guialgan naa to, tel pe nactaa falt ne cho quiyayun i, guiaanda scase. Zigne rnee lo Xtiidz Dios: Tel no chop zho, tsonгаа zha ne nanpaa zha nac falt co, zha ne beena ga ib none laa zho quizh xfalt zho. Nu rac bion vuilt ne rso naa diidz rii lo to.

² Laaw nile naa lo to lultm vuilt ne bialgan naa to, ni niina laaw rneque naa stib: Grëse zha ne quiyayunctal xtol i, zigtaa zha ne padzeelale squi no,

zigtagaa zha ne wriin psilow, gacnan zho ganle zeene laa naa glanso i, grëse mine quiayun zho ib tedlaad zho, laa naa gunquizh zhow zigne rieguial zho.

³ Ga gan to ganle nli Jesús rnabey naa, ni Xtiidz me none naa lo to; sac mesi gon, gdziguiend me sca gac to, sinque zigne racladz me sca none gac to.

⁴ Nli nguudz goc me bdeed me diidz pquiaa zho me lo cruz hor co, sangue niina men rnabey nac me; laa me mban niina niapse por poder ne rap Dios. Ye no, zig nac niina miech nguudz nac no, per ible zгаа no tib guielmban ndzon, sacne me nacie no; ni zrieelo gnabey no to sacne rdziaap no xpoder me.

⁵ Nana sca, tozhal golcobey dien zha mban to. Wen wen golcobey dien pe nli dib zdoo to riladz to Jesús. ¿Pe nli mban to zig none gban zha ne riladz me? ¿Pe zig zie dze rienraa to ne me nacie to, me rnabey lo to? ¿Te loxaque diidzse ye nac ne laa to riladz me?

⁶ Sangue no gon, wen wen ndion no zha mban no, ndionpaa no ne lo Jesús ngab no.

⁷ Tibaque rnab no lo Dios cxobnia me guic to zaacse gban to. Ni guiabde to togo par guianzuiu no lo miech gane noxcopaa no zaacse gac to; sinque laa no rdziuuna parne gban to zigne rieguial gban zha ne nli no xnëz Dios. Min co nagon noxco no, niicle tel rzac to lëda nu quiadzuiun no.

⁸ Sac tel no, laa no zional gac to miech wen, zha ne zienal mine nac diidzli; choot ziaate par lega gactox no lo to.

⁹ Gacxe waa, tib guielbley nroob ga lo no, telne zhal to znuse xixcuaa to, gac to zha ne nliipaa dib zdoo rleynie Dios; laa ne yquiambëz to guiaadlisqui no grëncuaane noyun to. Laa no racladz gdziñ dze ne gac to zigne rdziladz Dios, ni mincogaa quianab no lo me.

¹⁰ Laa naa rso diidz rii lo to lo guits ne rxel naa nu, sacne racladzd naa gactox naa lo to zeene laa naa glanso i. Nli Dios bzo naa rnabey naa lo to, ni mine racladzpaa naa nacie lozh tsoguic to zhiwseed me; ib racladzd naa yquiaago naa to.

¹¹ Nu ne laa naa csiaal lo guits rii, laa naa rnab lo to bets, laa naa rnab lo to bzian: Nley golgac, goltsoxco gban to zigne racladz Dios, zha ne mban rac, golchoobladz zdoo zho; ine niowse golban, tipse golgac. Scagaa Dios zleynie me to, ni haxta zacnie me to zeena peet ctsebde to.

¹²⁻¹³ Nana sca, tib tib zha ne nacgrë to golquiaabdiuzh zho, ine golxen nia zho. Grëse zha bets ne, zha bzian ne, zha ne riladz Jesús nëz rii; laa zho rxeel bdiuzh lo to. Golcaania zhibdiuzh zho.

¹⁴ ¡Dios sca guiaannie to! Ine nley golgac, golgan ganle pa lotaa rleynie me to. Peet tsienied guic to, Jesús nac men ne noxco grë zhizhgab to; ni scagaa Espiritu Sant gacniñ to tibaque tipse gac to.

Pabl

GUTS NE PXEEL PABL LO ZHA GALÁS

¡Diuzh to grëse to!

¹ Naa nac Pabl, tib zha ne pxeel Dios nonee Xtiidz Ndzon me lo miech. Led miechd bzoo naa, led miechd pxeel naa, sinque Jesús pxeel naa, me ni Dios Pxoꝛ me, meṇ ne bleeban me.

² Laa naa rxeḷ tib guits rii ziaad lo to zigne no to nēz Galás i, nac to zha ne ngab lo Jesús; rquiaabdiuzh naa to, ni scagaa grē zha rii laa zho rxeel bdiuzh lo to.

³ Dios meṇ ne nac Pxoꝛ ne, ni Jesús meṇ ndzon ne rnabey, me nac meṇ ne tsoxco grē zhizhgab to, zeena peet tsienied guic to.

⁴ Jesús bdeed xquielmban bdiizh me xtoḷ ne, psilaa me no lo grētaa guielntseeb ne no lo guidzliu rii, laaw been me zignē gocladzse Dios meṇ ne nac Pxoꝛ me.

⁵ ¡Gotsaa dziuunnon ne Dios sca, ni gdziṇd dze ne csaan ne dziuunnon ne me! Sca rieguiala.

⁶ Rzee zdoo naa goṇ ne gardle gac nroob dze ga, laa to bzozitle lo Xtiidz Ndzon Dios, meṇ ne bredz to pcaania me to, porne nquialadz Jesús to. Wseed ne rililadz to niina, masaque rzac to na miṇcogaa csilaa to lo doḷ.

⁷ Per guiendraa stib wseed ne goṇ csilaa ne lo doḷ. Miṇe naca zha ne biadseed to i, lega rquidiese zho to, racladz zho ctsēē zho miṇe nac Xtiidz Ndzon Jesús.

⁸ Grēse zha ne guiaadnie stiblo wseed miṇe pseete no to, ni gnē zho lēē miṇ co csilaa to lo doḷ; zha ne sca guṇ, miech ndziibdeele ga nac zho. Teḷ chotaa sca guṇ, niicle teḷ naazhala, tib anḷ ne guietgaa gbaaw, ible zdzibdee Dios zho.

⁹ Bnele naaw lo to, ni na laaw rneque naa stib: Teḷ cho zha ne guidseed to stiblo wseed miṇe pseete no to, ni gnē zho lēē miṇ co csilaa to lo doḷ, ible zdzibdee Dios zho.

¹⁰ Nana goṇ ne znu rne naa, no to guiab parne guianṇziuu naa lo miech gane znu rne naa; per goḷgacnaṇ gaṇle, quiguibd naa guianṇziuu naa lo miech, sinque laa naa noxco guṇ naa miṇe rnabey Dios. ¡Sac teḷne leḷ ncuaaṇe gleynie miech noxco naa, nliḷ dzigo xtsiṇ Jesús ga noyṇ naa!

Jesús pxeel Pabl gnee Pabl Xtiidz me

¹¹ Bets, bzian, goḷgacnaṇ sca gaṇle: Wseed ne nac Xtiidz Ndzon Jesús, miṇe bialseed naa to, led guicd miech biaba.

¹² Paat biad naa nseed miech naaw, sinque Jesús zhal bneedza lo naa.

¹³ Led naṇle to gaṇle, zha nactaa grē miṇe beṇ naa zeene bii no naa lo zhiwseed zha Israel; ptsidiḷ naa grē miech ne no xnēz Jesús, blēēnie naa zho, pquianaḷ naa nloozh naa zho.

¹⁴ Bzhoob diidz ne naa nac zha ne pseedraa lo grē meṇladz naa, zha ne tipse biagrēē naa scuel; naa nac zha ne neer lo zho, sac naa ruṇ grēse miṇe rnabey zhiwseed zha Israel, ni naa rioxcora ruṇ grēse miṇe been grē pxozgol no. Sca nagon goc naa lo zha Israel.

¹⁵ Ible güeynied guic naa, antes ne gal naa laa Dios bzooblole naa guṇbey naa Xpēēd me; laa me bleextsole naa, niapse porne nquialadz me naa. Zeene bdziṇ dze co

¹⁶ laa me blu me lo naa, bzo me naa ga naa zaatne ndxie grë miech ne nacdraa zha Israel, gaseed naa zho Xtii dz me mi ne glu zha laa zho lo dol. Zeene blozh gon naa Xpëed me, biad naa niaguib naa ne goon dien cho nseed naa.

¹⁷ ni niicle biadgaa naa Jerusalén, nianabdiidz naa lo grë zha ne pxeelle me nonee Xtii dz me; sinque laa naa bia nëz Arab, wbirele naa nëz co, dzigoraa bdsiin naa Damasc stib.

¹⁸ Gocle tson iza dzigoraa bia naa Jerusalén, hor coraa beenbey naa Pedr; blëz naa lo me ga tsiin ngbidz.

¹⁹ Gaque beenbey naa Jacob bets Jesús, laa grëraa zha ne pxeel Jesús noyuu tsiin me, ni tib zho gond naa.

²⁰ Dios zobwi ganle diidzli nac grë mi ne rne naa nu, led lega rned naaw.

²¹ Zeene brie naa ga, laa naa bia nëz Siria ni nëz Cilis.

²² Grë zha Judé zha ne nole xnëz Jesús, gard gunbey zho naa len dze co.

²³ Diidz ronse zho rnee zha zha ne nacgrë zho: "Men ne scataa pquianal ne, yele me noseed miech Xtii dz Dios, ni glo scataa gocladz me nitlo mew."

²⁴ Dzigo rley zho, rdeed zho xquizh lo Dios ne ye le naa rliladz Jesús.

2

Rcaania zho Pabl

¹ Zeene blozh tsiida iza, dzigo laa naa biire bia Jerusalén stib, bio no grop no Bernabé, ni bionie no Tit.

² Laa naa bia, sac ib Dios blu lo naa ne no ga naa. Dzigo ga pcaalsa no grë no zha ne zo rnabey lo grë zha ne no xnëz Jesús ga, bzodiidz naa lo zho zha noseed naa grë zha ne nacd zha Israel Diidz Ndzon ne rlu lo zho zha laa zho lo dol, ni naa zeena guien zho ganle ne nli rquiin dziin ne benle naa, ni mi ne quiaayungaa naa.

³ Ni nligaa bley zho bin zhow.

Niicle ne led zha Israeld nac Tit, per bnabeyd zho niopaa Tit bey ne rio grë zha Israel.

⁴ Per lo zha ne zioobgza no ga, lad co brieequia bla zha ne bnab nio Tit bey co, per choot pquiadiidz xtiidz zho. Nac diidz ye zho rliladz Jesús, per nli da; ib blud zho cho nac zho, ngeets bzëeb zho lad no biadleets zho dien zha mban no, niina ne Jesúsle rnabey no, rnabeydraa ley no. Gocladz zho nquiaadiag no xtiidz zho, biire ndziuu no mi ne rnabey ley.

⁵ Per ni palal bdeete no diidz niac mi ne rnee zho, laa no racladz guiaannie to Xtii dz Ndzon Jesús mi ne rlu zha laa miech lo dol, sac mi n co nac diidzli.

⁶ Grë zha non ne zo rnabey lo grë zha ne no xnëz Jesús ga (zha non guiab ne, per ndion ne ganle grëse ne tibaque nac ne nëz lo Dios)

⁷⁻⁸ ib peet blisquid zho lo naa, niicle peet pseetragaa zho naa. Sinque laa zho gocnan ganle ne ib Dios bzoo naa gun naa tsiin me, gaseed naa grë zha ne nacd zha Israel guien zho zha laa zho lo dol; zignë bzoque me Pedr noseed Pedr zha Israel. Dios men ne bzo Pedr quiaseed Pedr zha Israel, lëëque me bzo naa quiaseed naa grë zha ne nacd zha Israel.

⁹ Gacxe waa, zig nac Pedr, Jacob, Juan, zha ne zo rnabey lo grë zha ne rliladz Jesús ga, laa zho bien ne ible naa bgaa guien Inzaac rii, bneedz Dios dziin rii lo naa. Dzigo rley zho haxta bzhen zho nia no grop no Bernabé, laa no biaan diidz ne zha tsieeed zha Israel, laa no guioseed grë zha ne nacd zha Israel.

¹⁰ Lëëse mi ne pso zho diidz lo no, dzioxco no dziuu no xyudar grë zha ne guien pe yquuin; ni nligaa ib nonguiel mi n co ni laaw noyoxco naa.

Ractox Pabl lo Pedr

¹¹ Laa zeene biaad Pedr Antioquí, dzigo ga nli laa naa goctox lo Pedr, sac ncuaañe ndzinlidraa quiayun Pedr.

¹² Glo, grëse zha ne nacd zha Israel zha ne rliladzle Jesús, rzënie Pedr zho, tipse rbenie Pedr zho zeene laa zho row; ni blozh ga, zeene laa bla zha ne pxeel Jacob bdziñ ga, pasëraa Pedr sca tipse niownie zho, laa Pedr bzozit lo zho. Rdzieb Pedr zha ne bdziñ ga, sac lëë zha co racladz, grëse zha zit ne rzëeb xnëz Jesús ib none tso zho bey ne rio zha Israel.

¹³ Grë zha Israel ne nole xnëz Jesús ga, yeque zho laa zho gocnie Pedr lo xtseb Pedr ga, haxta ye Bernabé wbig lo zho.

¹⁴ Nacne zeene gon naa sca zienaldræa zho zigne nacpaa wseed ne ziaadnie Xtiidz Dios, squi ndxie grëse zha ne rcaalsa ga goctox naa lo Pedr, rep naa: "Luugase name niicle ne zha Israel luu, ni mband luu zigne nac zhiwseed zha Israel, çpe nac dzigo ne racladz luu gnabay luu grë zha ne nacd zha Israel, gban zho zigne nac zhiwseed zha Israel?"

Zha rlaa miech lo dol

¹⁵ Golquiaadiaga ganle, tel no desde gol no zha Israel nac no, nacd no zigne nac grëraa miech ngoopdol ne nac stib nacion; ible pseed no grë miñe nac xley zha Israel.

¹⁶ Sangue niina laa no ndion ganle, niicle mazdraa gun miech miñe nac ley grieelod guiaanwen zho lo Dios, sinque zha ne dib zdoo gliladz Jesús, zha co nac zha ne guiaanwen lo me. Gacxe waa, ye no laa no bliladz Jesús dib zdoo no, zeena guiaanwen no lo Dios; ni laa no guiaanwen lo me porne dib zdoo no rliladz no Jesús, nacda porne dziuun no miñe nac ley. Sac gon niicle zha ne tsoxcoraa gun zho grë miñe nac ley, grieelod guiaanwen zho lo Dios.

¹⁷ Nana ne laa no wbig lo Jesús parne guiaanwen no lo Dios, no zha ne rzac dol ga. Masaque rzac zho xtol no ga rdziuunctal no porne rliladz no Jesús, per; ìled scada gon!

¹⁸ Mazd dol ga gun naa, telne rlozhle rseed naa miech rne naa lo zho ne led leyd nac miñe csilaa ne lo dol, ni lozh ga naaque no lozhd tsoxco gun grë miñe nac ley.

¹⁹ Sac tel naa, ib brieelod niun naa grë miñe rnabay ley, ni zha ne rguiits ley gon ib none guet zho; gane niina masaque rrieequia laa naa gutle. Niina ne laa Jesús gut por grë xtol naa, rrieequia ye naa gutnie me ga, zeena grieelelo gon naa miñe rnabay Dios.

²⁰ Led naadraa nu znu mban, Jesúsle nu mbannie naa, ni guielmban ne mban naa niina, lëë miñ rii bneedz Dios lo naa porne rliladz naa Xpëed me, men ne rquia zdoo naa, men ne bleeladz xquielmban ga beet zho me bdiizh me xtol naa.

²¹ Nana, telne niaca miñe nli zrieelo guiaanwen ne lo Dios porne gun ne miñe nac ley, zhlëse ga dzigo biaadguet Jesús. Golgacnañ sca ganle, Jesússe nac men ne csañwen ne lo Dios, gacxe waa nonguielda ga csañ ne me tblad, ni pa lotaa ga pquia zdoo Dios ne.

3

Jesús none gliladz miech

¹ ¡Nadzpaan xen to nac to zha Galás! Çpe goc to, cho biaadgunüet guic to squi rac to? Pe led zeene biadseed no to, wen wen gocnañ to cho nac Jesús, ni zha nacne sca beet miech me lo cruz.

² Zhal to golcobey dien, çpe ne been to grë miñe nac xley zha Israel, laa to bgaa guielbiini chen Espiritu Sant, te ne bliladz to Xtiidz Diosa ye?

³ Pa lotaa gon rdzin lo xquieInxen to i, conque laa to gonle ganle ne niapse por guieIbiini chen Espiritu Sant laa to psilo mban tib guieImban cub, ni na nanaque to tsienal to ley.

⁴ Pe nlipaa rnee to, celega scase nazho gon to gre guieIne ne pteed miech to, zeene psilo bliladz to Xtiidz Jesus?

⁵ jGolzhixcuua guic to! Golguien ganle, laa Dios bneedz zhiEspiritu me lo to, ni laa me noyun gre milagr lo to, per nacda porne run to mine rnabey ley, sinque porne dib zdoos to rililadz to Xtiidz mew, mine biadseed no to.

⁶ Zig Abraham, porne dib zdoos me bliladz me xtiidz Dios mine reb Dios lo me, gane pcaania Dios me zig tib zha ne peet xtoId.

⁷ Golgacnan sca ganle, grese miech ne dib zdoos gliladz Xtiidz Dios, grese zha co laa Dios ycaania zho zig xpedpaa Abraham.

⁸ Ni mine nodzian ne niina, ib lo Xtiidzle Dios zhozneew, zeene bnee me ne grese miech ne nacd zha Israel, silaa me zho telne dib zdoos zho gliladz zho me. Lee min co ga bnee me zeene znu reb me lo Abraham: "Grese miech ne ndxie dibdoo lo guidzliu, zha ne dib zdoos gliladz naa zigne rililadz luu naa, zunlay naa zho."

⁹ Gane grese zha ne dib zdoos rililadz Jesus, runlay me zho zigne beenlayaque me Abraham, zeene laa Abraham bliladz me dib zdoos Abraham.

¹⁰ Sangue zha ne rnalo ley ne leew csilaa zho, laa zho noyac ndziibdeele ga, sac lo Xtiidz Dios no tib zaatne rnee: "Ndziiibdee gre zha ne grielod gun grese zigne nac ley." jNi tsod zha ne gon grielo gun grese mine rnabey ley!

¹¹ Gase naganle rlu tsod tib zha ne grielo guiaanwen lo Dios por gun zho mine nac ley; ni laaw zhozneeeque lo Xtiidz Dios zaatne rnee: "Zha ne guiaanwen lo Dios, laa zho guiaanwen porne dib zdoos zho gliladz zho me; ni zha co yгаа tib guieImban ndzon."

¹² Led yed ley rnab dien cho dib zdoos gliladz; sinque rneew: "Zha ne racladz gban, none gun zho grese mine rnabey ley."

¹³ Min co nagon, grese ne nac ne miech laa ne biabdee, sac brielod mban ne zigne nac ley. Per niina, laa Jesus biaadsilaa ne lo gretaa dee co, masaque lee gre dee ne nac ne ga bi me zeene sca pquia me lo cruz; zigne zhozneeeque lo Xtiidz Dios, zaatne rnee: "Miech ndziibdee ga nac grese zha ne ret rquianga zho tib lo yag."

¹⁴ Ni por mine sca bded Jesus ga, min co niina grese miech ne nacd zha Israel, zac yгаа zho grese guieInzaac ne bzeet Dios lo Abraham ga; ni niicle tib tibгаа zha ne ngab lo mew, scaania zho Espiritu Sant, Espiritu ne reb me cxeel me lo gre zha ne dib zdoos gliladz me.

Zha ne nlipaa nac xped Abraham

¹⁵ Bets, bzian, laa naa gzet ncuaaane rac lo guidzliu rii. Nanle to ganle, zeene laa chop miech run tib trat, rquia mine rnee zho ga lo guits ni rquia le zho lo guits co grop zho; zeene laa le zho pquiase ga, ni tib zho gacdraa ctsée trat co.

¹⁶ Nana gotsaa gwi ne ganle zha been Dios: Psan me xtiidz me lo Abraham, ni tib lo men ne grieequia lo xti Abraham. Raquiete nzian zho, reb me: "gre zha xti Abraham", sinque tibaque men ne bzeet me, ni lee men co ga nac Jesus.

¹⁷ Znu nagon nac mine quiane naa lo to nu: Tib trat ga been Dios grop me Abraham, zeene reb me scaania me grese zha ne dib zdoos gliladz me; ni ible laa xtiidz co me biaan zig tib trat ne quia le me lo. Min co nagon, grielod ctsée ley trat co; zig nac ley, blozhle tap gayoo galptsii iz biaan xtiidz co me zeene laa ley biaad.

¹⁸ Nana, telne por gun ne mine rnabey ley, laa ne yгаа grē guielnzaac ne bzeet Dios lo zhifrat me gdeed me por tib men ne grieequia lo xti Abraham; ¿pazhe dzigo rquiin trat co? Sac lo trat co gon raquiet ne por tib men ne grieequia lo xti Abraham, laa me gneedz guielnzaac co lo ne.

¹⁹ Nana gnē to: “¿Pa dzigo rquiin ley ne laa ley biaan, ni tel nole trat co glo?” Laaw biaan gon zeena glu ganle zha nac miech, ib rond zho mine rnabey Dios zho, laaw been dziin laga bdziñ dze ne laa men ne brieequia lo xti Abraham ga bиаad, men ne bzeet Dios ga zeene psan me xtiidz me lo Abraham. Ni tel ley, dze ne pcaania zha Israela tib xanjl Dios pxeel me bdeeda lo Moisés, dzigo Moisésle psana lo menquiedz Israel.

²⁰ Sangue dze ne been Dios trat co grop me Abraham ne laa me csilaa miech lo dol, pxeeld me cho tib miech, cho tib anjlgaa niaadnie xtiidz me; sinque mezhal biadneew lo Abraham.

¿Pa rquiin ley?

²¹⁻²² Nana gnē to: “¿Zig gocladz dzigo lēē nsiooglo xley Moisés lo trat ne been Dios ga?” ¡Led scada! Sac grieelod yгаа ne guielmban ndzon ne gdziñ dze lozh ga, telne gnalo ne ley; ib grieelod ley csanwena ne nēz lo Dios. Telne niaca mine nrieelo ley nsilaaw miech lo dol, nod pe nacne dzigo nxeel Dios Xpēed me, bиаad me biadbee me miech ladznia dol (sac rnee lo Xtiidz Dios masaque ngadoo miech lo dol). Jesússe gon zrieelo csilaa miech lo dol, totsaque dib zdoo zho gnalo zho me, mese zrieelo gdeed guielmban ndzon co lo zho.

²³ Zeene gard guiaad Jesús ga, laa ley co pquiin pquianapa ne zigne rquianap wxtis zha ne niogyu, laga bdziñ dze ne laa me bиаad.

²⁴ Zig tib ngudziaan ne riaannie mēēdwin, sca pquiin ley co lo ne, pseeda ne zha gban ne, ni gacnan ne cho nac Jesús, men ne csilaa ne lo dol zeene dib zdoo ne gliladz ne me.

²⁵ Sangue niina ne laa Jesús bиаadle, led ley codraa gnabey ne, ni niicle rquiindragaa pe cseeda ne.

²⁶ Gacxe waa, tel to xpēēde Dios nac to porne dib zdoo to rliladz to Jesús,

²⁷ ni grēse zha ne brobnisle porne no zho xnēz Jesús, laa zho rlu ganle ne Jesúsle nacie zho, ni laa zho zienał gban zho zig racladz me.

²⁸ Mincoxe nagon waa, grēse ne tibaque nac ne niina, guiendraa ne goon cho nac zha Israel, cho nacгаа zha zit; dien cho nac ngundziin, cho nacгаа zha ne rnabey; goon dien cho nonraa pe mguiw te wnaaw ye; sac grēse zha ne naciele Jesús, tibaque nac zho grē zho.

²⁹ Ga nagon, telne ngable to lo Jesús, dzigosi nli zha xti Abraham nac to, ni zgaa to grē guielnzaac ne bzeet Dios zeene psan me xtiidz me lo Abraham.

4

Zha ne nac xpēēd Dios

¹ Golgona ganle, nligaa tib mēēdwin lēē, niicle guiaannie win ncuaañe rap pxoz win, per lega nacse win zig tib ngundziin win ne run xtsiin pxoz win. Niicle chen win grē ncuaañe co, per grieelod win gnabey wina.

² Laa win riaan ladznia zha ne ran win, zha ne rseed win dien pe nac ncuaañe gun win, laga gdziñ dze ne laa win zacle ycaania ncuaañe psan pxoz win.

³ Scadaa nagon bzhiac ne glo zeene gard guiaad Jesús, rrieequia masaque ngadoo ne lo grē ley co, ni lo grēraa ncuaañe rac lo guidzliu rii.

⁴ Laa zeene bdzin dze ne laa Dios pxeel Xpëed me Jesús lo guidzliu (tib wnaa bded por xníaa me, bzoob me diidz been me grëse zigne rnabey xley zha Israel),

⁵ laa me bíaadsilaa ne, biadbee me ne ladznia ley co, bdiizh me grë xtoꞓ ne, zeena ycaania Dios ne gac ne mëed lo Dios.

⁶ Ni parne glu ganle ne nli xpëedle Dios nac ne, pxeel Dios zhiEspíritu Xpëed me blëz zdoo ne; gacxe waa niina laa ne rien rnee ne lo me: “¡Papá yeen!” Espiritu co rnee ne Pxoꞓ ne nac me.

⁷ Ga nagon, led yedraa niina nac ne zig cholze cho ngundziin, sinque xpëedle Dios nac ne, ible ye ne yгаа grë guieꞓnzaac ne rap Dios.

Rnee Pabl rnabeydraa ley

⁸ Bets, bzian, goꞓsoladz ganle, zeene bii gard gunbey to men ne nacpaa Dios, masaque rrieeguía ngadoo to lo ncuaane nac zhimdio to hor co, rdib rdzag to run to grë miñe rzac to rdziladz grë mdio co.

⁹ Nana, laa to runbeyle Dios, mazd gni naa ganle ledaa Dios runbeyle to, ¿pe nac dzigo racladz to gbiire tsiegan to, tsiequitsgzhib to lo grë mdio co, gbiire guiab to ladznia grë ncuaane paat rquiind co, gnabeya to?

¹⁰ Rquia to gon run to grë lni, dien pa mëe ndzonna, dien pa dze nac dze ndaraa, pa iz nac iz ne ndaraa, dien pa dze zac pe gow to, pa dzeegaa gacda.

¹¹ ¡Rdziebnie naa to gon! ¡Pe nlipaa zhlëse bialseed naa to, ne squi laa to racladz csaan miñe bialne naa lo to!

¹² Bets, bzian, laa naa rnab lo to goꞓban zigne mban naa, tel naa niicle ne zha Israel nac naa per zanaldraa naa miñe nac xley zha Israel. Ngadoodraa naa lo ley, gane rne naa: Goꞓban zigne mban naa. Ni guiabde to togo bod nend no pe falt ne been to lo naa.

¹³ Led rsoladz to ganle, rzacne naa len dze ne psilo pseed naa to zha laa to lo dol; min co nacne nzianlaa dze blëz naa lo to i.

¹⁴ Niicle ne sca rzacne naa, gondze to naa; laa ne mbix zdoo to nian to xquieꞓguidz naa, znu pquia zdoo to naa, rley to blëzlo to naa pale cho xanjꞓ Dios o Jesúsгаа, tel niaca miñe mezhai niaadseed to.

¹⁵ ¡Ne nlipagaa rleydoh to len dze co! Tel niaca miñe niac mbee to bziaalo to, zootle zig mbee tow ngad tow lo naa. ¿Yo grë guieꞓbley co na? ¿Yo ne scataa rleynie to naa len dze co?

¹⁶ Nana, pe rëb to rlëe naa lo to ne znu rne naa miñe nacpaa diidzli. ¡Lëda gon!

¹⁷ Goꞓquiaadiaga ganle, grë zha ne gon squi ziadseed to i niina, nli laa zho noxco to per zhaa ncuaane no guic zho. Laa zho racladz tebaa zha guiaanladz to naa, csaan to grë miñe bialseed naa to, zeena gbig to lo zho.

¹⁸ Rtsidild naa pe nacne cho gacnie to, totsaque zha ne nli nquialadz tow. Zig nac naa tibaque noxco naa to, led loxaque zeene zodse naa lo to i.

¹⁹ ¡Xin, ne nlipagaa gon rdedne naa ran naa squi rac to! Masaque nac guieꞓne rii lo naa niina, zig tib yoob ne rquia grë men wnaa ne gap mëed. Ni léë nole naa guieꞓne rii nu nagon, haxta gdziñ dze ne gan naa laa to wbiire wbig lo Jesús stib.

²⁰ Tebaa niaca miñe grieelo guialzhaal naa lo to i niina, zeena gan naa zha no to, dzigo dien zha gnegaa naa lo to; per na ne znu zit zo naa, nand naa dien pe nacraa ncuaane noyun to.

²¹ Zha ne racladz gnabey xley zha Israel zho, racladz naa gnë zho dien, ¿pe ib rienð zho zha zhobnee lo guits ne ziaad Xtiidz Dios

²² zaatne raquiet xingan Abraham? Rneew: Chop xingan Abraham, tib mēed co gop wnaa ne nac ngundziin lidz me, laa stib mēed gop wnaa ne nacpaa tsiel me.

²³ Xpēed wnaa ne nac ngundziin ga, laa win goc mēed zig grēraa xpēed miech; sangue mēed ne gop tsiel me ga, laa win gol porne ib Dios rēb ne laa me yquianie win.

²⁴ Lo grop wnaa co, tibga me rlu ganle zha nac grop trat ne been Dios: Mine bzhaac Agar, ga rlu ganle zha nac trat ne been Dios guic gui Sinaí. Grēse zha ne zienal trat co, nac zho zig goc xpēed Agar, ladznia trat co no zho.

²⁵ Gzoob ne Agar nac Gui Sinaí, gui ne riaan nēz Arab; me nac guiedz Jerusalén ne ndxie len dze rii, sac tel grē menquiedz Jerusalén, masaque ngundziin nac zho lo ley.

²⁶ Sangue wnaa ne gocpaa tsiel Abraham ga, rriequia me nac Jerusalén ne no gbaa, zaatne ngab grē zha ne no xnēz Jesús, sac led yedraa grē zha co ngadoo lo ley; ye ne ngab ga, ni gzoob ne lēē xniaa ne ga nac wnaa co.

²⁷ Lēē Jerusalén co ga raquiet lo Xtiidz Dios, zaatne znu rnee:

Luu, ne nac luu wnaa ne brieelod niap mēed, bley niina;

nguieel goc, nguiedz broptsie lo guielbley qui,

luu ne bdziind dze niacnañ luu zha nac yoob mēed.

Sac gon ndalraa xpēed wnaa ne brieelod niap mēed,

lède grē xpēed wnaa ne gop mēed.

²⁸ Bets, bzian, golgacnañ sca ganle, laa ne nacle niina zig Isaac, xpēed tsielpaa Abraham, wnaa ne gacd yquianie mēed ga; sac tel Isaac, ib Dios psan diidz ne laa Isaac gac mēed lo Abraham.

²⁹ Ni zigne sca blēenie xpēed xpēed wnaa ngundziin co Isaac, mēed ne Dioszhal psan diidz gal ga; scasaque niina, no zha ne rlēē ran zho zionald ne mine rnabey ley, sinque laa ne zional dib zdoo ne riladz ne Jesús.

³⁰ Ni nana, led lo Xtiidzaque Dios zhobnee ganle zha rēb Dios lo Abraham, rēb me: “Wnaa ne nac ngundziin lo luu i, bzonéz me grop xpēed me, nonguield ne ye mēed qui guiaan ne ncuaañe csañ luu lo xpēed tsiel luu.”

³¹ Gacxe nagon waa, tel ne nacd ne zig xpēed wnaa ngundziin co, sinque laa ne nac zig xpēed tsielpaa Abraham.

5

Dziits gols

¹ Peet lo ngadoodraa ne niina, sac gon laa Jesús biaadsilaale ne, sinque to none dziits so zeena ygadoode to lo xley zha Israel.

² Naa nac Pabl, ni naazhal rne lo to nu. Gologna sca ganle, tel ne laa to gdeed diidz tso to xbey zha Israel, nacdiedraa to Jesús ga dzigo.

³ Ni laaw gneque naa lo to nu stib, grēse zha bgui ne rio bey co, ib none gun zho grēse zigne rnabey ley co.

⁴ Zha ne rzac por gun zho grē mine rnabey xley zha Israel, min co laa Dios csilaa zho lo dol, gacnañ zho ganle, lel nozozit zho lo Jesús ga; ygaad zho guielnzaac ne yгаа zha ne gnalo Jesús.

⁵ Sangue tel no, ndionpaa no silaa Dios no lo dol, sacne dib zdoo no riladz no Jesús ni nacnie Espiritu Sant no.

⁶ Sac zha ne nli nole xnēz Jesús, peet liaadz nodraa zho bey ne rio zha Israel. Mine noxcoraa zho nac ne dib zdoo zho gliladz zho Jesús, ni scagaa grieelo gleynie zho samiech zho.

⁷ ǀEse tow nli! ǀPex goc to waa? Zaacse name rac to zeene psilo to bliladz to miñe nac diidzli. ǀCho pquuil to ne nēdraa to tsienal tow?

⁸ Miñe squi nonie guic to i niina, led zhiwseete Dios i, men ne bredz to grieve to ladznia ley.

⁹ Golguien sca, adel ye to sac zig rēb diidz ne rnee: “Niipaxe ncobi waa runcsibe ncob quietxtil.”

¹⁰ Per nanpaa naa, ible men ndzon ne rnabey ne men co gacnie to, zeena csaande to miñe nac diidzli; ni zha ne squi racladz gunguet to, tel chotaa nac zho ib tedsod siaabzi Dios zho.

¹¹ Bets, sangue naa tel niaca miñe nli ye naa quianabey tso grē zha ne riladz Jesús xbey zha Israel zig quianee zha qui, bod goonzhe ni ctsidilndraa zha Israel naa dzigo, glēēdraa zho zig rlēētaa zho niina zeene ron zho rne naa zha nacne biaadguet Jesús lo cruz.

¹² Zha ne squi ziaadnabey tsojaa to bey ne rio zha bgui nēz Israel, ǀtebaa mazd ladaque zho yga zho, niicxe gdib nacse zho waa cueniaal zho, led tsod zho noyunneed zho to!

¹³ Bets, golguien ganle ne ygadoodraaxe to lo ley waa, miñ co nacne biaadsilaa Jesús to. Per guiabde to togo ne laa me psilaale to, laa to gun ncuaañe guiaabtaa guic to. Gunscade to, sinque tib tib to golleynie samiech to, ine golgun ncuaañe rquiiñ grē zha ne nacgrē to;

¹⁴ sac niina totsaque gban to zigne rnabey Dios nu: “Bleynie samiech luu zigne rleynieque luu luu”; lēēle grē miñe nac ley ga gun to.

¹⁵ Per tel laa ne gleynie to zha ne nacgrē to, lel dil no to, zig run grē ma ne lēēque ma noquiaalaylsa, lēēque ma noyowlsa; dzigo lēēque to gnitlo to ga. ǀGunscade to!

Zha ne lega mbanse

¹⁶ Gacxe, laa naa rnab lo to: Goltsoxco golban zigne racladz Espiritu Sant, ni me gacnieñ to; led tsode to dien zha gun to grē ncuaañe ndzinlid ne racladz xcuerp to.

¹⁷ Sac gon grēse ncuaañ co, rleynieñ Espiritu Santa. Laa xcuerp ne run ncuaañe racladz Espiritu Sant, ni ncuaañe racladz gaa Espiritu Sant nēd xcuerp ne gac miñ co. Gunde to miñe racladz xcuerp to sca.

¹⁸ Telne gban to zigne rnabey Espiritu Sant, dzigosi nodraa pe nacne ygadoo to lo xley zha Israel.

¹⁹ Ni miech ne sca run grē ncuaañe ndzinlid, ib paat ngeetsd zho: rionie zho zha ne led tsieeld zho, run zho grē ncuaañe ndzinlid ne racladztaa xcuerp zho,

²⁰ riegān zho grē mdio,
rnab zho pe sac samiech zho,
rlēēnie zho samiech zho,
rdilñie zho samiech zho,
rzac zho adel cho glale tsieel zho,
rnadse pew laa zho rlēēle,

runctil zho miech,
rguib zho rtso miech,
rbeextso zho dien cho zha ne gacnie zho,

²¹ nē rac zdoo zho ran zho ncuaañe quianie stib miech,
rzudz zho,

rcaalsa zho zaatne loxaque rowcho zho, ni run zho grē guilyozh.

Grë ncuuañ co ruñ zho ni grëragaa ncuuañe ndzinlid ne sca nac. Laa naa rbire rso diidz lo to, gunde to grë ncuuañ co; sac goñ grëse miech ngoopdoł ne sca rban, grieelod gdziñ zho zaatne rnabey Dios.

²² Sañgue zha ne zienał miñe racladz Espíritu Sant, znu nac zha co:

rleynie zho samiech zho,
tibaque nguieel rac zho,
peet dzeb nonied guic zho,
rxecw zho, riedniobd zho,
niowse rnee zho lo samiech zho,
niapse ncuuañ wen ruñ zho lo samiech zho,
ruñ zho miñe rnee zho guñ zho,

²³ miech ndooladz nac zho,
zha rnabey xcuerp zho.

Ni telne gban ne zigne nac grëse miñ rii, ni tib ley noguitsd ne ga.

²⁴ Grëse miech ne nli xnëzle Jesús no, zieniedraa guic zho guñ zho grë ncuuañe ndzinlid ne bzoobladz zho padzeela, grë ncuuañe ndzinlid ne racladznë xcuerp zho, sac rien zho paat rquiind ncuuañ co lo zho.

²⁵ Gacxe nagon waa, telne nli mbannie ne guielmban ne rneedz Espíritu Sant, golgotsaa dzion ne miñe rnabey me.

²⁶ Dzigosi gacniatsdraa ne lo samiech ne, tsienaldraa ne dien cho glaaraa guiañ, tso ne në gac zdoo ne gañ ne grë ncuuañe rap zho, ncuuañe racгаа zho.

6

None gacnie ne samiech ne

¹ Bets, bzian, telne gañ to laa cho tib zha ne nacgrë to noyũ pe tib doł, dzigo to ne nac to zha ne nlipaa zienał miñe rnabey Espíritu Sant, to gołnee lo zho. Diidz wen, diidz ndooladz gołco zdoo zho gbiire xixcuua guic zho; ni scagaa tib tib to none nsin so to, sac goñ adel nenda yeque to sca sac.

² Zeene ran to zha ne mban noded, golguñ xyudar zho, gołchoobladz zdoo zho, sac goñ sca rnabey Jesús gban miech.

³ Tel zha ne rzac zha non nac zho, ni laa zho peet nond zho; lëëque zha noguitnie zho ga.

⁴ Tib tib to, wen wen golguieñ dien pe quiayũ to, telne ncuuañe ndzinliw ine golley, per tsoe to glëë zdoo to gañ to miñe ruñ stib zho.

⁵ Sac tib tib ne, psose Dios ne pe nac xtsiĩñ me miñe guñ ne.

⁶ Grë zha ne noseed Xtiiđ Dios, ib none ncuuañe rgaataa lo zho gdeed zhow yquiiñ zha ne noluw lo zho.

⁷ Tsienie wguite guic to sca, sac goñ led yed Dios guiab ne quitnie ne. Tib tib ne, tel pe nac miñe ruñ ne mincoque ctsire me lo ne.

⁸ Zha ne ruñ grë ncuuañe ndzinlid, lëë miñe cueequia zho ga laa zho nitlo. Laa zha ne guñ grë miñe rnabey Espíritu Sant, lëë miñe yгаа zho ga nac tib guielmban ndzon ne gdziñd dze lozh.

⁹ Gacxe nagon waa, tibaque gotsaa dzioxco ne dziuũñ ne ncuuañe ndzinli, ncuuañe rquiñ, guieete ne; sac telne sca tibaque dzioxco new, zeene gał dze co laa ne yгаа miñe guigouał ne.

¹⁰ Zeene gdeedtaaw diidz sca, golgotsaa dzioxco ne dziuũñ ne xyudar grëse samiech ne, ni nana zeene zha ne noque xnëz Dios nac zho, mazdraa rieguiał dziuũñ ne xyudar zho.

Rso Pabl diidz

¹¹ ¡Golwi ganle, naazhal pquia nu! ¡Golwi ganle mbee mbee nac letr rii pquia naa rso naa diidz lo to!

¹² Grē zha ne gon squi racladz tsopaa to bey ne rio zha Israel, laa zho ruṇa zeeṇa glēēnied miech zho, zigne rlēēnie zho grē zha ne rseed miech ne ib laa Jesús gut lo cruz, psilaa me grēse miech lo dol.

¹³ Nana, niicxe grē zha ne nole bey co, rundaque zho grē miṇe rnabey ley; sinque laa zha qui nagon quiaguib tebaa gdeed to diidz tso to bey, zeeṇa sca lozhd guiats zho ne zha bnabey to bio to bey.

¹⁴ Saṅgue tel naa, ib quiaguibd naa ne dien zha gacniats naa, sinque laa naa quiaguib gacnan miech ganle zha nac ne laa Jesús gut lo cruz. Sac tel naa, por grē miṇe bded Jesús ga, grētaa ncuaane no lo guidzliu laaw psan naa tib lad; ni niicle naagaa, sca rzac grē miech guidzliu naa.

¹⁵ Grēse zha ne ygab xnēz Jesús, nacda ne dien cho no bey ne rio zha Israel, chogaa nodā; sinque miṇe non nacne ctsēē Dios lo xquielmban zho.

¹⁶ Grēse to ne nac to zha ne zianaḷ diidz ne rso naa nu, Dios yquia zdoo to, ni me gacniēn to ctsebd grē zhgab to; niicle tow ni niicle grēragaa zha ne ngable lo mew.

¹⁷ Bets, bzian, golgacnan sca ganle, ib racladzdraa naa gon pe yquiaaqui gbiire gaquiet miṇe bnele naa lo to nu; sac tel naa, grētaa mdel ne no xcuerp naa nu, lēēlew nac bey ne rlu ganle ne nli lo Jesús ngab naa, ni xtsiin me noyun naa.

¹⁸ Jesús men ndzon ne rnabey ne, me tsoxco grē zhizhgab to. Sca gaca.
Pabl

GUTS NE PXEEL PABL LO ZHA EFÈS

¡Diuzh to grëse to!

¹ Naa nac Pabl, tib zha ne pxeel Jesús nonee Xtíidz me lo miech, sac ible Dios bnabey ne sca gaca.

Laa naa rxel guits rii lo to grëse to bets, grëse to bzian, zigne nose to guiedz Efés i, ne nac to zha ne ngable lo Dios niina ne tibleque laa to rliiladz Jesús.

² Dios men ne nac Pxoze, ni Jesús men ndzon ne rnabey, me glu lo to guien to ganle pa lotaa noxco me to, ni me gacnieñ to ctsebd grë pe zhgab to.

³ ¡Gotsaa dzioolnie ne Dios, Pxoze Jesús, men ndzon ne rnabey ne! Sac gon, zha nactaa grë guielnzaac nroob ne bneedz Espíritu Sant lo ne niina ne laa ne ngab xnëz Jesús.

⁴ Haxta zeene gard cue guidzliu, bzooblo Dios ne gac ne zha ne gdziñ lo me zeene laa ne gliladz Jesús, gac ne tib miech peet xtołd, zha ne gban zigne racladz me.

⁵ Nquialadz me ne, gane bzooblo me ne gac ne xpëed me zeene laa ne gliladz Jesús, ib me sca bnabey gaca sac ib sca gola zdoo me.

⁶ Miñcöxe waa tibaque none dzioolnie ne Dios, sac gon zha wentaa me lo ne, pxeel me Xpëed me men ne nquialadz me ga, biaadgunlay me ne.

⁷ Ne nligaa nquialadzdox Dios ne, gane pxeel me Xpëed me bzhiee xchen psilaa me ne lo grë dol ne ngadoo ne, been me ne perdon grë dol co.

⁸ Ni led loxaque miñcöse, sinque haxta bneedz me guielriñ lo ne, bdixbiini me ne,

⁹ ni bneedz me diidz gocndion ne pe nac miñe no zdoo me, miñe mese nan, miñe nole me gun me.

¹⁰ Sac niina laa ne ndionle: Grëse ncuaane no gbaa, ncuaane no guidzliu, tibaque gaca grëw ni Jesús gnabeya grësew; sca gaca zeene laa dze co gdziñ.

¹¹ Grëse ncuaane bnabeyle Dios no gac, run mew zigne racladz me. Gotsaa gwi ne ganle, glöle bzooblo me ne yгаа ne grë guielnzaac ne nacle diidz gdeed me lo grë zha ne no xnëz me, guielnzaac ne bgaa ne zeene laa ne bziaab xnëz Jesús.

¹² Ni laa me bzooblo ne, zeena ne ne nac ne zha ne gloopaa psilo bnalo Jesús, xcboneñ ne lo miech ganle pa lotaa men nroob nac me.

¹³ Xquizh Jesús, ye to zeene laa to psilo pquiaadiag diidzli, Diidz Ndzon ne nee ganle zha laa to lo dol, ni bliladz to cho nac Jesús, laa Dios pxeel Espíritu Sant lo to zig tib bey, bey ne rlu löle me ngab to; zigne bneele me glo.

¹⁴ Ne znu pxeel me Espíritu Sant nacie ne, ga rlu ganle ib nli zгаа ne grë miñe bneele me gdeed me lo grë zha ne ngab lo me, ni lëe min co yгаа ne zeene gal dze ne laa me blozh psilaa grë zha ne ygab lo me; zeena grë ne zelynie ne me por squitaa men nroob nac me.

Rnab Pabl guielbiini lo Dios

¹⁵ Zeene gocnan naa ne nliipaa dib zdoo to rliiladz to Jesús, ni ne nli nquialadz to grëraa miech ne no xnëz Dios,

¹⁶⁻¹⁷ rded naa xquizh lo me. Zeene rzodiidznetaa naa me, rsoladz naa to, rnab naa lo me gneedz Espíritu Sant guielbiini lo to guien to cho nac me, zeena lozh gunbey to me. Lëe me nac xDios Jesús, lëe me nac Pxoze ndzon ne.

¹⁸ Rnab naa lo me quixbiini me guic to, guien to ganle zha nactaa grē ncuuañe ygaa to ne laa me bredz to, guien to ganle zha ndzontaa, zha nontaa ncuuañe gdeed me lo grēse miech ne ngab lo me,

¹⁹ ni guien to zha nroobtaa guiełrnabey ne rap Dios, pa lotaa naca; lëë guiełrnabey co nacie ne ne nac ne zha ne no xnëz me. Lëë guiełrnabey co ga blu me

²⁰ zeene bleeban me Jesús bzoob me me cue me gbaa, zaatne rieguial sob me ne nac me men rnabey,

²¹ bzo me me, me rnabey lo grēse zha ne rnabey, lo grēse zha ne non, ni lo grēragaa ncuuañe no; niicle niinaw, niicle len dze ne naragaa guiaada.

²² Grēse ncuuañe notaa, laa Dios psaña ladznia me, ni bzo Dios me me rnabey lo grēse zha ne no xnëz me.

²³ Sac grēse zha ne no xnëz me rrieequia xcuerp me ga nac zho, gacxe waa grēse zha ne nac cuerp co, zha none cxobnen ganle pa lotaa men nroob nac me. Tel pe lotaaw me nacie zho, sac grētaa ncuuañe no ladznia me now.

2

Ne noxco Dios miech gane psilaa me zho

¹ ¡Laa Dios bneedzle tib guiełmban cub lo to niina, niicle ne ntseeb goc to glo! Gołsoladz ganle, zeene scataa beenctal to xtol to, masaque nac to lo Dios hor co zig tib zha ne gutle,

² laa to güeynal niapse grē ncuuañe ndzinlid ne rac lo guidzliu rii, been to grē miñe rnabey ma ne rnabey lo mendox, ma ne rcheep grē zha ne ib nëd gon xtiidz Dios.

³ Grēse ne sca wban ne glo, bional ne ncuuañe ndzinlid ne bzoobladztaa ne, bdziuuñe ne ncuuañe bdeedtaa guxt xcuerp ngoopdol ne, ncuuañe biaabtaa guic ne. Ni ne scataa nac ne, ib bioguial ngaa ne lo guiełnëdox ne cxeel Dios, lo guiełnë ne noxtseeb grēraa miech niina.

⁴ Per ne nquialadz Dios ne nac ne miech, gane pquia zdoo me ne,

⁵ ni niicle ne rrieequia mengutle nac ne ne scataa quiadziiuñe ne grē dol co, per bleeban me ne; lëë min co ga been me zeene bleeban me Jesús. ¡Laa me psilaa ne lo guiełgut co, niapse por mezhäl noxco ne!

⁶ Laa me bleeban ne, zeena ygaa ne guiosiobnie ne Jesús zaatne gnabey Jesús.

⁷ Zigtaa len dze riw, zigtagaa len dze ne ziaadraaw, ga gan miech ganle pa lotaa nquialadz me ne, pa lotaa wen me lo ne, sac pxeel me Jesús biaadsilaa ne.

⁸ Golgan ganle, ne wen me mezhäl noxco guiaanwen miech lo me, gane rsilaa me ne lo dol zeene laa ne riladz Jesús dib zdoo ne; guiabd ne togo por pe guiełwen ne gun ne laa me csilaa ne. Ible zdoo me ral rsilaa me miech,

⁹ racda ne por pe guiełwen ne gun zho; zeena gdaannied zho guiełwen ne run zho.

¹⁰ Dios nac men ne psan ne, ni niina ne laa ne bziaab xnëz Jesús, laa me bredz ne dziuuñe ne grē guiełwen ne racladz me, miñe bzooblöle me ne dziuuñe ne.

Grēse zha ne ngab lo Jesús, tipse nac zho

¹¹ Gołsoladz ganle miech ngoopdol, miech ne ngabd lo Dios, miech beed, sca lë to lo grē zha Israel glo (sac zha, ne rio zho bey zigne rnabey xley zho, rzac zho miech wen, miech mbe nac zho, zha nac zha ne ngabpaa lo Dios).

¹² Len dze co gard ygab to lo Jesús, gard gac to tipse grē to zha Israel, led yede to no lo trat ne biaan Dios grē me zha Israel, nande to grē diidz ne psan

me lo zho. Lega laa to mbanse, runbeyde to Dios, ni tib guie|Inzaac quiambëzde to ygaa to.

¹³ Sanguë niina ne laa to bzëëb xnëz Jesús porne bzhiee xchen me psanmbe me to, laa to ngable lo Dios.

¹⁴ Jesús nac men ne psanwen ne grë ne, ptiche me grëtaa ncuaañe pca zaacse ndzian|sa ne; zigtaa zha Israela, zigtagaa zha zita, tibaque beën me ne lo me niina.

¹⁵⁻¹⁶ Zeene pquia me lo cruz, gataa ptiche me grë ley ne zienal zha Israel, ne scataa rsanglaa zho zho; gane niina zigtaa zha Israela, zigtagaa zha zita, laa me beën zho tipse, beën me zho tib guiedz cub ne ngab lo me. Sca nac ne laa me psanwen zho grë zho, ni psanwen me zho nëz lo Dios.

¹⁷ Jesús nac men ne biaadnie Xtiidz Ndzon me lo ne grëse ne, gocndion ne zha guiaanwen ne nëz lo Dios, zigtaa tow ne nac to zha ne zit zo lo Dios glo, zigtagaa zha Israela ne nac zho zha ne gax zo lo me.

¹⁸ Gane niina, niicle zha Israela, niicle zha zita, zrieelo ygab zho lo Dios men ne nac Pxoz ne, zeene laa Espiritu Sant gunquien zho none gbig zho lo me.

¹⁹ Gacxe waa, tel to nacdreaa to menzit niina, lole Dios ngab to, lal non to, lal nac to grë to grëraa zha ne ngab lo me.

²⁰ Golguien ganle, grëse ne niina gzoob ne nac ne zig tib yu ne noyaa, yu ne psilo grë zha ne pxeel Dios nonee xtiidz me lo miech niina, grë zha ne pxeelgaa me pteed xtiidz me lo miech padzeela, ni Jesús nac quie ne naaz yu co.

²¹ Grëse zha ne zienal miñe rnabey me, rrieequia nosoquiaraa zho yu co ga, haxta guirew gaca tib yadoo ne nlpaa mbe nëz lo Dios.

²² Zig nac to gon, tib tib to ne nac to zha ne ngab lo Jesús, ye to nac yadoo co, zaatne rbëz Espiritu chen Dios.

3

Pabl nac zha ne güeyseed zha zit

¹ Ni ne bialnecxe naa Xtiidz Jesús lo to waa, gocnan to ne niicle men zit nac to zrieelo ygab to lo Dios, miñ co gane znu nioogyu naa nu.

² Nanlaxe to ganle ne wen Dios, laa me bzo naa gun naa dziin rii cseed naa grë menzit.

³ Laa me blu lo naa zha nac grë ncuaañe no guic me gun me, mese naña per laa me blu lo naa zha naca, ni laa palala psilo bzetle naa lo to lo guits rii.

⁴ Zeene glab tow i, dzigo guien to ganle ne nli nan naa zha nac grë miñe gun Jesús, miñe mese nan.

⁵ Waltaa choot miech gocnanda, laa niina laa Dios pxeel zhiEspiritu me bneedz guie|biini lo no gocndion now, zigtaa no ne nac no zha ne pxeel me nonee xtiidz me, zigtagaa grë zha ne pxeel me noteed xtiidz me.

⁶ Ni znu naca: grëse zha zit, zgaa zho guie|Inzaac ne rëb Dios gdeed me lo grë zha ne ngab lo me, tibaque nac guie|Inzaac ne ygaa zho grë zho zha Israel. Niicle zha Israela, niicle zha zita, laa Dios quiambëz gdeed me guie|Inzaac co lo zho, totsaque gliladz zho Xtiidz Ndzon Jesús.

⁷ Niicle ne tib miech peet nond nac naa, per laa Dios bzooblo naa gne naa lo miech gacnan zho miñe blozh bzet naa nu, me nacie naa, me rneedz grëtaa poder ne rap me parne grieelo gun naa dziin rii.

⁸ ¡Ncuaañe gzee zdoo new! Golwi ganle, naa nac tib zha ne mazdraa peet nond lo grë zha ne ngab lo Dios; per laa me bzooblo naa, naa bgaa dze ndzon

rii gne naa Xtiidz Ndzon me nu lo grë zha zit, zeena gacnan zho ganle pe zhistaa grë guieInzaac ne gdeed Jesús lo zho.

⁹ Gne naa lo zho gacnan zho ganle zha nactaa grë mine no guic Dios gun me, mine wлтаа choot gard gacnan; Dios, men ne bzaa grëse ncuane no.

¹⁰ Nana gnë to: “¿Pe nacne sca been me?” Laa me beena zeena grëse zha non, zha rnabey ne no gbaa, zeene gan zho tipse nac zha Israel grë zho zha zit ngab zho lo me, ga guien grë zha gbaa co ganle zha ndzielguictaa Dios.

¹¹ Sca nac mine no guic me padzeela, ni zeene laa me pxeel Jesús laaw goc.

¹² Gacxe waa, niina ne laa ne ngable lo Jesús, peet lo ngadoodraa ne, niinasi zrieelo gbig ne lo Dios, sac ndion ne zha ne rnalo Jesús ible scaania Dios zho.

¹³ Laa naa rso diidz lo to sca, niicle ne znutaa quiadeed naa loxaque ne bialseed naa to, gunde to ne minriise laa zdoo to guiaan, sinque golley golwi ganle nu rlu zha nziuu, zha non nac to lo naa.

Nquialadz Jesús miech

¹⁴⁻¹⁵ Zeene rsoladz naa grëtaa mine no guic Dios gun me, ni mine beenlegaa me (me ne nac me Dad lo grëse zha ne ngab lo me, niicle lo guidzliu nuw, niicle gbaagaaw); rded naa xquizh lo me.

¹⁶ Ni ne squitaa ndzon, ne squitaa ncuane lozhd nac grëtaa guieInzaac ne rap me, laa naa rnab lo me cxeel me zhiEspíritu me gneedz xfuers to dziits so to.

¹⁷ Ni rnab naa lo me tibaque dib zdoo to gliladz to Jesús, zeena scagaa tibaque gbannie to me, parne guien to ganle pa lotaa nquialadz me to.

¹⁸ Ga guien to ganle grë to grëraa zha ne ngab lo me, ne nligaa pa lotaa nquialadz me to, nacda ncuane grieelo ctiix ne, guiab ne lalnuw.

¹⁹ Niicle ne znu nacda ncuane grieelo guiab ne znu znu naca, per laa naa rnab lo me zig zie dze guienraa to pa lotaa rleynie Jesús to; zeena glu ganle ne nli nacie Dios to.

²⁰ Ni Diossi gon ne nac me men ne ndzon, mazdraa ncuane grieelo gneedz me lo ne, lëdle mine riab guic ne rnab ne lo me; ni ncuane gaca gon, sac me nacie ne.

²¹ Grëse ne ne nac ne zha ne no xnëz Jesús, itibaque golgotsaa gleynie ne me sca, ne squitaa ndzon me! Sca rieguiala.

4

None tipse gac zha ne rliladz Jesús

¹ Zigne rne naa ga, laa naa niogyu nu loxaque ne run naa xtsiin men ndzon ne rnabey, per laa naa rnab lo to zaacse golgac, golban zigne rieguial gban grë zha ne bredzle Dios ngab lo me, sac gon laa me bredzle to.

² Gologac tib miech ndooladz, tib miech wen, tib miech nlëëguicd, tib miech ne guieednied samiech sinque ine gleynie to zho.

³ Wenle na ndxie to niina, ni Espiritu Sant nac men ne gacnien to; zeena tibaque squi tipse gac to.

⁴ Sac gon tibaque cuerp nac ne grë ne, tibaque Espiritu nacie ne, ni tibaque nac mine ndion ne gneedz Dios lo ne, ne laa me bredz ne.

⁵ Tibaque men ndzon ne rnabey ne, tibaque men ne rliladz ne, tibaque wrobnis ne no par grë ne ne dib zdoo ne rliladz ne me;

⁶ tibaque Dios no, me nac Pxoz ne grëse ne, me nac men nroob ne zo lo ne, me racnien ne grëse ne, ni me nacie ne.

⁷ Tipse nac ne, per tib tib ne psose Jesús ne pe nac dziin ne grieelo dziuun ne lo me, zigne gola zdoo me.

⁸ Min rii ga raquiet zaatne znu zhobnee lo guits ne ziaad Xtiidz Dios: Blozhse psanwin me grëse zha ne rlëë ran me, laa me biire zey gbaa stib; ni psose me tib tib miech pe nac dziin ne griielo guñ zho lo me.

⁹ Golgotsaa gwi ne ganle, Jesús raquiet nu, rneew “biire zey me gbaa stib”, ga rlu ganle tib men ne biet gbaaw baaad me lo guidzliu.

¹⁰ Sac me biet gbaa, ni biire zey me gbaa stib, zeena glu ganle tel pa lotaa zrieelo gdziñ me.

¹¹ Ni mezhäl rzo ne tib tib ne pe nac dziin ne dziuun ne; me rzo: zha ne rxeeł me gnee xtiidz me, zha ne rxeeł me cteed xtiidz me, zha ne rienee Xtiidz Ndzon me tib tib lo miech zha laa zho lo dol, zha ne rtedlo grë zha ne ngab lo me, ni zha ne rseed zho zha nac Xtiidz Ndzon me.

¹² Laa me run min co, sac laa me racladz grëse zha ne ngab lo me lozh xixcuaa lo xquielmban zho, zeena guien zho zha guñ zho xtsiin me;

¹³ haxta gdziñ dze ne tibaque mine gliladz ne grë ne, grëse ne dziuunbeypaa ne men ne nac Xpëed Dios. Laa ne lozh sodziits, haxta gac ne zig me.

¹⁴ Gacdraa ne zig choł cho mëedlas ne beelze pe riladz; niicxe guiaad grë zha ne guiaadnie stib wseed, zha ndzinlid ne zombëz loxaque dien zha gdeeda diidz yquidie zho miech; yquidied zho ne.

¹⁵ Sinque guional ne mine nac diidzli, ine gleynie ne samiech ne, tibaque laa ne guional zigne nac Jesús, men ne rnabey lo ne grë ne ne ngab ne lo me (rrieequia xcuerp me nac ne, me nac guic cuerp co).

¹⁶ Ni ne me nac men ne rnabey lo ne, me rnabey zha gac tib tib dziin ne pso me ne dziuun ne; niicle ne nzian ne, per tipse nac ne laa ne nodziuun dziin ne pso me ne, zeena xixcuaaraa lo xquielmban ne, ni lozh guien ne zha gleynieraa ne samiech ne.

Guielmban cub ne rneedz Jesús

¹⁷ Laa naa rso diidz lo to nu, ni golquiaadiaga zig nac zeene men ndzon ne rnabey ne rneew lo to: gbandraa to zigne mban grëraa miech ne zozit lo Dios, grë zha ne mban zigne notaa guic;

¹⁸ sac tel zha, ncow nac guic zho. Gard ygaa zho guielmban ndzon ne rdeed Dios, nanđ zho zha nac guielmban co sacne ndip zdoo zho.

¹⁹ Laa zho gocnadle, niapse lo grë ncuaane ndzinlid no zho, ib rgobeyd zho run zho grëtaa guielyozh ne no.

²⁰ Sañgue to gon, ne nac to zha ne no xnëz Jesús niina, led mincod noseed to;

²¹ telne nli noquiaadiag to ganle cho nac me, telne nli rien to zhiwseed me mine rlu ganle zha nac diidzli.

²² Miech yozh ne goc to glo, grëtaa ncuaane ndzinlid, grëtaa guielyozh ne gocladztaa xcuerp to been to, igolsaana!

²³ None gdzëë lo xquielmban to, zigtaa grë mine no zdoo to, zigtagaa grë mine rza guic to,

²⁴ golgac tib miech cub, zaacse golban, ndzinli golgac; zeena glu ganle ne nli beenncuble me to zigne racladz me.

²⁵ Golguien sca, yquidiedraa to samiech to, sinque niapse mine nac diidzli golnee, sac gon tel ne pe nacne yquidielsa ne ni tibaque nac ne grë ne.

²⁶ Telne glëë to, code to guielblëë co zdoo to dib dze, sac gon dol ga.

²⁷ Gunde to mine racladz menđox.

²⁸ Zha ne goc ngbaan lëë, cuandraa zho, sinque guṅ zho dziin gdziniaa zho ncuaaṅe yquiin zho, zeena scagaa grieelo guṅ zho xyudar zha ne guiend pe yquiin.

²⁹ Gneede to diidznë, sinque diidz ne ndzinli, diidz ne yquiin goṅnee, zeena zha ne gona ine cchoobladza zdoo zho, ine yquiiina lo zho.

³⁰ Goṅguien, gunde to ncuaaṅe coguielnë to Espíritu Sant. Goṅgan ganle laa Dios pxeel me, nac me zig tib bey ne glu ganle ne nli lo Dios ngab to, gaḷ dze ne laa me lozhpaa csilaa grë zha ne ngab lo me.

³¹ None csaan to:
 guielnialadz, tso to gow gzhiihz zdoo to;
 glëëdraa to,
 sobzhiandraa to,
 coredzdraa to,
 gacntseebdraa to, ni
 grëragaa guielniseeb ne no, gunde tow.

³² Sinque none:
 wen gac to lo samiech to,
 goḷquia zdoo samiech to,
 goḷguṅ samiech to perdon, zigne beënaque Dios to perdon zeene laa to
 beenbey Jesús.

5

None glu cho nac zha ne ngab lo Dios

¹ To ne laa to nacle xpëed Dios ni nquialadz me to, goḷtsoxco gac to zig me.

² Zaacse goḷban, golleynie samiech to zigne rleynie Jesús to, sac goṅ tel me, haxta bleeladz me me gut me xcuent ne, gut me biogon me lo Dios psanmbe me ne lo xtol ne, me goc tib gon ne pcaania Dios.

³ Goḷguien sca, none glu to ne nli xnëz Dios no to;
 gunde to grë guielyozh ne ruṅ grë zha ne zienald zigne nacpaa guieltsieel,
 gunde to grë ncuaaṅe yozh ne ruṅ miech ndzinlid,
 gunde to grë ncuaaṅe ruṅ grë zha ne zienal loxaque dien zha guṅlo dimi.
 Gunde to grë ncuaaṅ co, per ni gzodiidzde tow.

⁴ Gneede to grë diidzguidz,
 gneede to grë diidz ne paat rquiind,
 gneede to grë diidz ro nëz;
 sac goṅ rdzieeldraa gnee to grë ncuaaṅ co; sinque Dios goḷgoolnie, goḷdeed xquizh lo me.

⁵ Nanle to ganle, grëse:
 zha ne zienaldraa zigne nac guieltsieel,
 zha ndzinlid ne ruṅ grëraa guielyozh,
 zha ne mbidz (zha ne rleynieraa dimi, laa ne gleynie zho Dios);
 ni tib zho grieelod gdziṅ zaatne rnabey Jesús grop me Dios.

⁶ Gdeete to diidz lo zha ne gacladz yquidie to gnë zho peet nacd grë min co, sac goṅ, grëcxe min co waa ruṅ grë zha ne nëd gon xtiidz Dios, lozh ga, lëë mine tsieguial zho laa zho ygaa lo guielzi ne csiaab me.

⁷ Goḷguien sca, yquiaadiagde to xtiidz grë zha ne sca rnee, per ni ctsieelsade to zho.

⁸ Nli, çlëë?, ndzinlid wban to glo, rrieequia lo ncow ga bio to, gocnie to menḍox; sangue niina ne laa to nacie Jesús men ne nac biini, rrieequia lo biinile no to. Goḷguiena sca, zaacse goḷban,

⁹ sac niina ne laa to nole lo biini, none gac to:

tib miech wen,
 tib miech ne zienal gac miñe nac diidzli,
 tib miech ne rnee diidzli.

¹⁰ Goltsoxco guien to zha racladz Dios gban to.

¹¹ Gandzede to grë ncuaañe ndzinlid ne ruñ grë zha ne no lo ncow, sinque gollisquiw;

¹² sac grë ncuaañe ruñ zho ngueets zhliaan, haxta ncuaañe ctoladz ne gnee new.

¹³ Grëse zha ne gbig lo biini co, zien zho ganle zha nactaa grë ncuaañe yozh ne noyun zho; sac gon telne biiniw, tsod ncuaañe guianngueets low.

¹⁴ No tib zaatne znu zhobnee lo Xtiidz Dios, rneew:

Luu ne tibaque guieel no luu, blee mcaal lo luu;
 brieel lad grë zha ne squi nole lадznia guielgut,
 zeena gban luu lo biini ne nac Jesús.

¹⁵ Golguien sca:

Miech nixbiini golgac, ndzinli golban; gbande to zig choļ cho grë miech nxen ne ruñ miñe notaa guic.

¹⁶ Cteed zhlëde to xtse to lo ncuaañe paat rquiind, niicle ne niapse grë min co zienal grëraa miech len dze rii.

¹⁷ Gunde to ncuaañe paat rquiind ne rza guic to, sinque golguien dien pa minpaa racladz Dios guñ to, dzigo goltsoxco min co golgun.

¹⁸ Gzudzde to, sac gon lo guielgonziu ruñ miech ncuaañe nonguieldraa; sinque mazd golnab gneedzraa Espiritu Sant guielbiini lo to, zeena ine:

¹⁹ gool to grë salm, grë himno, grë cant ne csiaab Espiritu Sant guic to; dib zdoo to golgoolnie men ndzon ne rnabey.

²⁰ Goldeed xquizh lo Dios men ne nac Pxoz ne, por grëtaa ncuaañe ran to, ncuaañe rded to; golguien ganle lo Jesús ngab to.

Zha none gban zha ne rliladz Jesús

²¹ To ne nac to zha ne ngable lo Jesús, tib tib to golgon miñe rnee zha ne nacgrë to, zeena glu ganle me nac men non lo to.

²² To ne nac to men wnaa ne ptsieelniale, golgon xtiidz tsiel to, zigne rioxcoque to ron to miñe nac xtiidz men ndzon ne rnabey.

²³ Sac ible tsiel to nac men ne no gnabey lo to, zigne Jesús rnabey lo grë zha ne no xnëz me (ni me psilaa zho lo dol, laa zho nac zig xcuerp me).

²⁴ Ni zigne sca ron zho xtiidz me, scaque none gon to miñe rnabey tsiel to to.

²⁵ Togaa ne nac to zha bgui ne ptsieelniale, golleynie tsiel to, zigne rleynie Jesús zha ne no xnëz me. Tel me haxta bleeladz me xquielmban me,

²⁶ blee me zho lo dol, ni biaanmbe zho zeene laa zho pquiaadiag xtiidz me, wban zhow ni brobnis zho;

²⁷ zeena gal dze ne laa me ycaania zho, laa zho nacle miech ne rieguial gdziñ lo guielndzon ne no me, ni tib dol rapdraa zho, miech mbele nac zho, zig tib lë lar nquitsbie ne ni tib pxud neyd.

²⁸ Sca nagon none guñ mgui, none gantsi zho tsiel zho zigne rantsi zho xcuerp zho. Mgui ne rantsi tsiel, rrieequia xcuerp zho ga rantsi zho;

²⁹ sac gon, tsod tib zha ne lëëque zha csacsi xcuerp zho, sinque ran zhow. Ni scadaa nagon rzac Jesús grëse miech ne ngab lo me,

³⁰ sac nac zho zig xcuerp me. Ni lëë tib lë cuerp co nu nac ne.

³¹ Zha ne pcatsieel-le, ible tibaque cuerp nac zho grop zho, laaw zhobneeque lo Xtüidz Dios zaatne rnee: "Ib none grieezhaa mgui lo pxoz zho, lo xniaa zho, zeena gbannie zho tsieel zho gac zho zig tibaque miech grop zho."

³² Rgobey naa ngan tsoguic to zha nacne chop miech gac tibaque cuerp; per ga gon rlu ne niicle nzian ne per tibaque cuerp nac ne, ni lëë xcuerp Jesús ga.

³³ Mine racladzpa naa csoladz to nu: to ne nac to men bgui, none gleynie to tsieel to zigne rleyneque to xcuerp to; ni niicle togaa ne nac to men wnaa, none gon to xtiidz tsieel to, cueede to xquielto zho.

6

¹ To ne nac to mëed, golgon xtiidz pxoz to, xtiidz xniaa to, sac sca nonguiela, ni scagaa glu ne nli rleynie to Dios.

² Golgan ganle, lo grë xley Dios no tib mine znu rnee: "Bin xtiidz pxoz luu, xtiidz xniaa luu, zeena ine niowse gac lo xquielmban luu, ni nroob dze ne gban luu lo guidzliu rii." Ni lëew glopaa rnee ganle pe nac mine ygaa zha ne gun mine rnabeya,

³ sac rneew, niowse gac lo xquielmban zho, ni nroob dze ne gban zho lo guidzliu rii.

⁴ Togaa ne nac to men nguzan, gunde to ncuane yquiaaguieñe to xpëed to, sinque golcobey dien zha gun to parne gon zho diidz, ni cseed zho gban zho zigne rdziladz Dios.

⁵ To ne nac to zha ne ngadoo ladznia ben, golgon xtiidz men ne rnabey to. Golguien zha rnabey to, dib zdoo to, goltsoxco golgun xtsiin zho, zig nac zeene xtsiin Jesús ga noyun to.

⁶⁻⁷ Gunde to ne loxaque zeene zose zho lo to, dzigose yquiaalo to gun to dziin zeena guianzuiu to lo zho, sinque ine nguieel golgac golgun xtsiin zho, zig nac zeene xtsiin Jesús ga quia to, ine dib zdoo to quiayun to mine racladz Dios.

⁸ Benque nanle to, zigtaa zha ne ngadoo ladznia bena, zigtagaa zha ne rnabeya, zdeedse Dios mine tsieguial zho tib tib zho tel pe nac ncuane wen ne noyun zho.

⁹ Togaa ne nac to zha ne rnabey, niowse golgac lo zha ne quia xtsiin to, gactseebde to lo zho. Golguien ganle, zigne rzacaque zho, scaque rzac to, no tib men ne rnabey to grë to, lëë me ga zob gbaa; ni tel me gon led yed me guiab dien cho rnabey, chogaa run dziin.

None nsin so zha ne rliadz Jesús

¹⁰ Bets, bzian, nu ne laa naa csiaalle, laa naa rnab lo to gon tibaque glnalo Dios; golgan ganle, con grëtaa guieñrnabey ne rap me, me gneedz grë lose fuerz lo to.

¹¹ Zig nac grë menguiib, ible no grë ncuane rquiin zho zeene laa zho rie lo dil, scaque to niina nagon, golquiin grë lose fuerz ne bneedz Dios lo to, zeena glëbd mendox gungüet ma to.

¹² Golgan ganle, led-xe miech guidzliud waa nodilnie ne, sinque laa ne nodilnie grë me yozh ne quianzë zhan gbaa, ma ne quianabey grëtaa guieñntseeb ne rac lo guidzliu rii.

¹³ Gane nagon none yquiin to grëse lo fuerz ne zineedzle Dios lo to, zeena guiablode to zeene laa grë me ntseeb co csilo ygaal to; ni scagaa, zeene laa ma biablo, tibaque dziits so to grë to.

¹⁴ Dziits sca golso:

Dziits golso lo mine nac diidzli, zigne dziits dziits rzhidoo len menguiib zeene laa zho tsie lo dil.

Golgun miñe nonguiel zeena ctse to lo mendox, zigne rtse ncuaañe racw menguiib lo grë ncuaañe gnitlo zho.

¹⁵ Nsin golso zeene laa to tsienee Xtiidz Dios lo miech gacnañ zho zha guiaanwen zho lo me, zigne nsinle zo menguiib zeene laa zho no tsie lo dil.

¹⁶ Guiaanladzde to, golnalo Dios, zeena peet grielod gun grë me yozh co to, zigne rnalo menguiib guiblag ne rsaac zho lo zha ne nodilñie zho.

¹⁷ Golsoladz ganle laa Dios psilaale to lo guielgut, golsaca zigne rzac menguiib pchog guuib ne rzob guic zho, rsilaaw zho lo guielgut. Ni golsac Xtiidz Dios miñe rneedz Espiritu Sant lo to, zigne rzac menguiib xquuib zho.

¹⁸ Nsin sca golso, guiablode to. Tibaque golzodiidznie Dios. Golnab lo me miñe rsiaab Espiritu Sant guic to, golnab gacniñ me grëse zha ne ngab lo me; ni

¹⁹ golnab lo me gacniñ me naa, csiaab me guic naa pe nac miñe gne naa, peet dzeb tsod lo naa gne naaw lo miech; zeena gacnañ zho ganle, zha nac Diidz Ndzon ne rnee zha laa miech lo dol, miñe choot gocnañ glo.

²⁰ Ib me bzo naa cteed naa xtiidz rii me lo grë zha zit, ni mincocxe waa rquiaqui znu no grë guuib rii nia naa, ngoguiu zho naa nu. Golnab lo me gacniñ me naa, gdzieebd naa gne naa ganle cho nac me. ¡Nsin sca golso!

²¹ Laa naa rxel Tic lo to, me nac tib men nziuu lo naa, dib zdoo me laa me quiayun xyudar naa lo xtsiin men ndzon ne rnabey ne. Me guiaadnie diidz lo to ganle zha rac naa, zha no naa nu.

²² Mincopaa ziaad me i, ziaadnie me diidz zha no no nëz rii, zeena ine gley to tsoxcoraa to miñe rliladz to.

²³ Rnab naa lo Dios men ne nac Pxoze ne, ni lo Jesús men ndzon ne rnabey, me gacniñ to peet zhgab ctsebde to, ine tibaque gliladz to me, ine gleynie to samiech to.

²⁴ Me gunlay to, grëse to ne nac to zha ne nlipaa dib zdoo rleynie Jesús.

Pabl

GUILTS NE PXEEL PABL LO ZHA FILIP

¡Diuzh to grëse to!

¹ Naa nac Pabl, grop no Timoté laa no rxeel guits rii guiedz Filip i. Laaw ziaad lo to ne nac to zha ne ngable lo Dios, ni nacnie to Jesús; zigtaa tow, zigtaa zha ne zo lo tow, zigtagaa zha ne run xyudar zhow. Nanle to ganle zigtaa naaw, zigtaa Timotéw, tib ngundziin nac no lo Jesús.

² Dios men ne nac Pxoz ne, ni Jesús men ndzon ne rnabey, me glu ganle pa lotaa noxco me to, zeena ni tib zhgab ctsebde to.

³ Zeene rsoladztaa naa to, rded naa xquizh lo Dios;

⁴ ni zeene rzodiidznie naa me, rley naa gon rnab naa lo me gacnieñ me to;

⁵ sac desde dze ne laa to psilo bliladz Jesús haxta lo nadze, tibaque laa to quiyacnie naa, quiyun to xyudar naa noseed naa miech Xtiidz Ndzon me.

⁶ Ni nanpaa naa, zigne squi psilo Dios nozhixcuaa me lo xquielmban to, zigse zie dze laa me gzhixcuaaraa to, zeena nsinle zo to gal dze ne laa Jesús guiaad stib.

⁷ Min co racladz naa, ni ib rieguiala sac ne nligaa rleynie naa to. Sac ib rsaande to naa, zigtaa zeene znu no naa ladzguuib, zeene zonlaagaa naaw, zaatne racpaa rne naa ni rlu naa ganle ne nli diidzli nac Xtiidz Jesús.

⁸ Dios nan ganle pa lotaa nonie to guic naa, rquiané zdoo naa to, zigne rzacaque Jesús ne.

⁹ Rnab naa lo Dios gacnieñ me to, zig zie dze gleynieraa to samiech to, tsabiiniraa to,

¹⁰ zeena guien to cue to niapse grë ncuaañe ndzinli gun to. Sca ine ndzinli nac lo xquielmban to, ni tib xtol to guien gal dze ne guiaad Jesús;

¹¹ zaacse ghan to. Ga glu to ganle lëe min co blu Jesús lo to, zeena sca csanglaa to Dios.

¹² Bets, bzian, racladz naa gacnan to ganle niicle tel pe nactaa ncuaañe nodeed naa, per led mincod gon cuéz ygaazdraa Xtiidz Ndzon Jesús, sinque lel znu mazdraa ndal miech ne noquiaadiaga.

¹³ Sac tel niina, zigtaa grë zha ne rquia dziin lo gobierna, ni grëragaa miecha, laa zho nanle ganle ne loxaque noyun naa xtsiin Jesús gane znu no naa ladzguuib.

¹⁴ Sac ndal grë bets zeene gon zho laa naa znu biab ladzguuib, laa zho bguiaalraa laa zho noseed miech Diidz Ndzon rii; peet rtoladzdraa zho, peet dzeb guien draa lo zho, masaque Dios rnalo zho.

¹⁵ Parga nli no stib dii zha ne psilo noyun dziin co, per laa zho noyuna loxaque par dien zha guianziuu zho, sac nē rac zdoo zho ran zho zha none naa Xtiidz me. Per zigne no zha ne sca nac, noque zha ne nli dib zdoo zho quiaseed zho miech.

¹⁶⁻¹⁷ Lëe zha co nagon rlu ne nli rleynie zho naa; sac nan zho ib laa Dios bzo naa gne naa ni glu naa lo miech ganle ne nli diidzli nac Xtiidz Jesús; laa zha ne sca noyun dziin co par guianziuu zho, rzac zho na tel mazdraa glaa guiaan zho lo naa, mazdraa lozh coguielné zho naa ne laa naa znule no ladzguuib.

¹⁸ Per par naa, pex gun naa zho. Tel zha ne zie dib zdoow, zha ne zeedgaa dib zdoow, totsaque ne Xtiidz Jesús quiaseed zho miech; min co nac mine mazdraa rley naa.

¹⁹ Ni zleyragaa naa, sac nan naa ib zrie naa zaatne nioogyu naa nu; sac lala quianab to lo Dios por naa, ni lala nacie zhiEspíritu Jesús naa.

²⁰ Dib zdoo naa racladz naa, tiblifique gac naa lëëb naa gan naa mine tedtaa naa, gdzind dze ne gun naa ncuane cuee xquielto naa. Racladz naa cxobnen naa ganle zha men rottaa nac Jesús; niicle tel niaca por min co yquiaaqui gut miech naa.

²¹ Sac gon, par naa laa naa mban par gun naa mine rnabey Jesús, ni zeene guetgaa naa, nanpaa naa tib guielebley nroob ne yгаа naa.

²² Per tel laga mban naa, nzianraa ncuane grielo gun naa lo me; dzigo nagon riendaque naa dien pa min wenraa. iPe wena gbanraa naa, te wena ye prontga ghi naa lo guidzliu rii!

²³ No hor rzaac naa gbanraa naa, nogaa hor rzaac naa tebaa laa naa wbile lo guidzliu rii; zeena ziagaa naa lo Jesús, sac nligaa zoot naa laa naa bdzinle lo me. iMin co mazdraa wen, ledle cuëz naa lo guidzliu rii!

²⁴ Per rien naa ible none cuëz naa, sac rquinpaa to naa.

²⁵ Mincoxe nagon waa, rgobey naa zbanraa naa, zeena lozh cseed naa to choobraa to lo Xtuidz Jesús, ine nley gac to laa to rliladza;

²⁶ ni zeene laa naa gbire guial lo to i, rien naa nroob gley to, zdeed to xquizh lo Jesús porne racnie me naa.

²⁷ Per mine rsopaa naa diidz lo to gon: Goltsoxco golban zigne no gban zha ne ngab xnëz Jesús, zeena niicle telne grielod guial naa, racladz naa gon naa tipse nac to grë to, tiblifique dziits zo to lo Xtuidz Dios; ni noxco to dien zha gliladz grëraa miech Jesús,

²⁸ ni lalnu rdziebde to grë zha ne rlëë ran to. Ga guien zho ganle nëz ne nitlo zho zie zho, sangue to ga rlu ne laa Dios psilaale to lo xtol to, ni nacie me to.

²⁹ Sac gon, ible none gan to guielne porne no to xnëz me, bzooblod Jesús to loxaque par yгаа to guielnzaac qui gnalo to me.

³⁰ Niicle tow, niicle naagaaw none dzian ne min co. Gonle to ganle zha nactaa grë ncuane bdeed naa, ni ziyongaa to grë mine nodeed naa niina.

2

Goc Jesús tib men ndooladz

¹ Nanle to ganle Jesús rchoobladz zdoo to, me rlu zha gleyne to samiech to, tipse nac to ni Espíritu Sant nacie to; nanle to ganle none yquia zdoo to samiech to.

² Gacxe nana sca, golconley zdoo naa, ine tipse golgac, golleyne grë zha ne nacgrë to, tipse golnee, ni tipse golgac tel pa lo dziin ne gnediidz to gun to.

³ Ncuane gun to, guiabde to ne laa to guna par dien zha csanwin to stib miech, zeen dien zha guianzuiu to; sinque ine ndooladz golgac, masaque golt sienie guic ne nonraa stib miech lo to.

⁴ Ib yguibde to ne lose to yquiin ncuane gun to, sinque golguib dien zha gun to xyudar grëraa miech.

⁵ Golsoladz ganle pa lotaa ndooladz goc Jesús len dze ne biaadted me lo guidzliu, scaquegaa nasca ndooladz golgac.

⁶ Sac tel me:

Niicle ne Dios nac me,

per led mincod niab me nrieded me lo guielndzon ne no me,

⁷ sinque grëse zigne nac me, laa me psana tib lad,

laa me goc zig tib ngundziin win,

biaad me gol me lo guidzliu rii goc me miech.

Nacle me miech,

⁸ ni bii psanwin me me lo miech,
haxta bdeed me diidz pquiaa zho me lo cruz,
zig run zho cho grë zha yozh.

⁹ Min cocxe waa, psanglaaraa Dios me,
biaan me men ne mazdraa non, men ne mazdraa nroob;

¹⁰ zeena zeene laa me gaquiet,
grëse zha ne no gbaa, grëse zha ne no lo guidzliu,
ni grëse zha ne no nëz len guidzliu, laa zho yquitsgzhib,

¹¹ ni grëse zho laa zho cueero, guiab zho ganle ne nli me nac men ne rnabey.
Ga laa zho cxobnen ganle, zha men nroobtaa nac Dios, men ne nac PxoZ me.

Zha ne nac biini lo guidzliu rii

¹² Bets, bzian, ne nligaa rleynie naa to. Laa naa rnab lo to (zigne bioxco to bin to xtudz naa zeene blëz naa lo to i, scaquegaa niina niicle ne zit zo naa, golgon mine rne naa nu), ib gdeete to diidz guiab to ladznia dol stib, niina ne laa Dios psilaale to; golguien tsieniewguite guic to.

¹³ Benque Dioszhal rsiaab guic to rquiabladz to gun to mine racladz me, ni scagaa me racnien to rrieelo run tow.

¹⁴ Ni ncuane rieguial to gun to, ine nguieel golgac golguna, peet glisquide to, ni niicle til diidzdgaa to;

¹⁵ zeena tsod pe nacle cho glisqui guiab zho laa to pe falt, pe dol ne quiayun. Gollu ganle nli xpëedle Dios nac to; zaacse golban, niicle ne ladaque grë miech ntseeb, miech ncow ne ndxie lo guidzliu rii no to. Golgac zig tib biini lo zho, zigne rziini mel gbaa lo ncow ne nac guieel.

¹⁶ Ib csaande to Xtudz Ndzon Jesús, diidz ne rdeed guielmban, lëew golconie guic to. Sca golgac, zeena gal dze ne laa Jesús guiaad stib, per nli gley naa gan naa led zhlëd brie naa bial naa, bialseed naa to.

¹⁷ Zig nac niina, tel niaca mine no gded naa xquielmban naa gaca zig tib gon, parne dib zdooraa to gliladz to Dios, haxta zley naa gded naa xquielmban naa; sac racladz naa ye to yгаа guielbley.

¹⁸ ;Golley sca! Zigne no guielbley rii zdoonaa, scaquegaa to golco nley zdoonaa, zeena grë ne gley.

Timoté ni Epafrodit

¹⁹ Telne gneedz men ndzon ne rnabey ne diidz, racladz naa cxeelnioB naa Timoté guiaadwi dien zha no to, zeena haxta stibgac zdoonaa zeene laa Timoté glansonie diidz lo naa.

²⁰ Me cxel naa, sac guien d stib zha ne zienie guic zig zienie guic naa, tel led med; sac tel me nonie to guic me.

²¹ Grëraa zho, ncuane yquuin lo zho rioxco zho, laa ne tsoxco zho mine nac xtsiin Jesús.

²² Laa Timoté, led nanle to ganle zha ndzinli nac me, tel niina ine tib mëed nac me lo naa, nroob yudar ne quiayun me noseed no miech Xtudz Ndzon Jesús.

²³ Ible laa guic naa no cxel naa me lo to i, loxaque gacnanse naa dien zha csañ wxtis rii xcuent naa nu.

²⁴ Ni ye naa nend pronaque guialso naa i dien yo to, sac rien naa ible zneedz Dios diidz guial naa.

²⁵⁻²⁶ Ni rgobey naa nonguieelaquew cxel naa bets ne Epafrodit guiaad me nëz qui, sac laa me rbanle to, ni no me zhgab bin me laa to gonañ ne laa me

bzhaacnë. Nli laa to pxeel me lo naa nu, ni blactagaa noyūn me xyudar naa ne znu mban nodeed naa, blactaa noyacnie me naa lo dziin ne nodziuun no.

²⁷ Ni nligaa bzhaacnë me, nzhoō goc me zootle laa me nietle; per pquia zdoo Dios me ni pquiaagaa zdoo Dios naa peet gocd me, sac gon nole naa guielnë, ni tel pe niacaque me mazdraa niac nroob xquielnë naa.

²⁸ Min co nagon laa naa cxelgazh me, zeena gley to gan to lo me stib, ni scagaa niicle naaw zley naa.

²⁹ Golley sca gon golcaania me, golguien ganle bets to nac me, bets new grë ne ne nac ne zha ne ngab lo Dios; ni grëragaa zha ne nac zig nac me, golleynie zho.

³⁰ Golgan ganle, tel me haxta bdedlaa me niet me nu niina ne biaadgun me xtsiin Jesús; per ib pquiad zdoo me me, bleeladz me xquielmban me biaadgun me xyudar naa, porne brieelod niaad-zhal to.

3

Ncuaane mazdraa non

¹ Bets, bzian, golley ne laa to ngab lo Jesús men ndzon ne rnabey. Mine ziesole naa diidz lo to, guieete naa zneque naaw stib, sac ncuaane yquingaa lo tow:

² jib cxende to lo grë mëcw dox qui! Grë miech ndzinlid ne squi guianzë, racladz zho tsopaa zha bgui bey, sac rzac zho zha ne sca tso bey, ga rlu xnëzle Dios no zho.

³ Sanguē ne, ndionle ne zha nac diidzli, zha ne rleynie Dios zigne rsiab Espiritu Sant guic zho, ni dib zdoo zho run zhow, zha co nac zha ne nlipaa no xnëz me. Ne ne nac ne zha ne no xnëz me, Jesús nac men ne rdziunnon ne, sac ndion ne por me laa Dios ycaania ne; rnalod ne grë ncuaane laglaase,

⁴ sac telne scaw; zig nac naa pe zhistaa ncuaane dzigo zrieelo gnalo naa. Tel no zha ne rzac por ncuaane been zho min co laa Dios csilaa zho; tel scaw, nroobraa ncuaane ziyun naa lo zho:

⁵ Xon ngbidz raap naa laa naa biole bey co, zha Israel nac naa, lo xti Benjamín zial naa, merpaa zha Israel nac naa; sac niicle pxoz naaw, niicle xniaa naaw zha Israel nac me. Niicle xleygaa zha Israela, nroob pseed naaw, zha farisé goc naa;

⁶ bleyniedox naa grë mine zienal zha Israel, gacxe waa pquiana naa grë miech ne no xnëz Jesús; zig nac mine raquiet lo ley, grësew ben naaw zigne naca, ib biod dze ne cho zha pe nlisqui lo naa.

⁷ Lëe grë ncuuan co rnalo naa len dze co, sanguē niina Jesús rnalo naa, grëse ncuuan co laaw psanle naa tib lad.

⁸ Ni led loxaque psandë naaw tiblād, sinque grësew peet nondraaw lo naa, mine non lo naa niina nacne beenbey naa cho nac Jesús, men ndzon ne rnabey naa. Niina ne laa naa runbey me, grëse ncuuan co rzaac naaw zig rzac ne grë pe guizh beed, sac laa naa racladz gbigrāa naa lo me, ni gacniera naa me.

⁹ Zanałdraa naa gun naa mine rnabey ley par guiaanmbe naa lo dol, sinque laa naa zanał dib zdoo naa gliladz naa cho nac Jesús; sac zha ne dib zdoo rnalo me, sanmbe Dios zho lo dol.

¹⁰ Racladz naa guienraa naa zha nac Jesús, ni gaap naa poder ne pquian Dios zeene blische me me len baa, ye naa teed grë mine bded me, ni cueeladz naa xquielmban naa zigne bleeladz me xquielmban me;

¹¹ ni scagaa, nanpaa naa ye naa grieeban gal dze ne guiadbeeban me grë zha ne no xnëz me.

Stsëë Jesús xcuerp zha ne ngab lo me

¹² Gnid naa togo laa naa benle gan, nasi laa naa nacle zigne racladz Jesús gac naa; led scada, laa naa bii noxcow, sac nanpaa naa zac naa zigne no guic me gac naa zeene psilaa me naa.

¹³ Bets, bzian, gard gon naa gan; per xco co no naa; grëse ncuaañe bded laaw biaanladzle naa, laa guic naa zienie ncuaañe naraa ziaad.

¹⁴ Masaque rzaac naa niina zig rzac zha ne rie prueb lo corr, rded naa fuerz gdziñ naa zaatne gneedz Dios zhipremio naa, guielnzaac ne rbedz Dios ne ygaa ne zeene laa ne riladz Jesús.

¹⁵ Ni ib znu none tsonie guic grë zha ne nlipaa dziits zo lo Xtiidz Dios; telne nogaa bla zha ne rzac led scada, per Dios gdeed guielbiini lo zho guien zho ganle zha naca.

¹⁶ Ni negaa, grë miñe rienle ne zha nac, none gban new.

¹⁷ Bets, bzian, golwi ganle zha mban naa, ni zha mbangaa grë zha ne zienal miñe blu no lo to grë to; dzigo sca golban.

¹⁸ Sac gon nzian zha ne nacgrë to i (blactaale zizet naa zho lo to, ni niina haxta roon naa rzet naa zho stib), laa zho mban zigne racladztaa zho, rlëe zho ron zho pe nac gut Jesús lo cruz;

¹⁹ ni nëz ne nitlo zho ga zie zho. Laa ne tsienal zho miñe rnabey Dios, laa zho zienal grë ncuaañe gdeed guxt zdoo zho, ncuaañe gdeed guxt xcuerp zho. Loxaque grë ncuaañe mbee guielto zienal zho, per zha rlozhd gleyne zhow; niapse grë ncuaañ lo guidzliu rii nonie guic zho.

²⁰ Sangue ne, laa ne zional ncuaañe ygaa ne gbaa, sac gbaa nac zaatne ngab ne, ni laa ne quiambiaaz quiet Jesús gbaa guiaad me stib (me nac men ne psilaa miech lo dol, me nac men ndzon ne rnabey);

²¹ zeena ctsëë me xcuerp ben wiich ne nu, gaca zig nac xcuerp ndzon me. Ni ib zun mew, sac nroob poder ne rap me rnabey me grëtaa ncuaañe no.

4

Rnab Pabl nley gac zha Filip

¹ Bets, bzian, ne nlipaa gon rleyne naa to, haxta rzaac naa tebaa laa naa ranle lo to; to nac xquielbley naa, to nac zig tib premio lo naa por grëtaa xtsiin Jesús miñe ben naa lo to. Laa naa rso diidz lo to, tibaque squi dziits golso, ib csaande to zhiwseed Jesús.

² Rnab naa lo bzian ne Evodia, ni lo bzian ne Síntique glëëlsadraa zho, none tipse gnee zho; sac gon bel zho, xnëz Dios no zho grop zho.

³ Ni luu gon bets, ne nac luu zha ne tibaque quiyacnie naa lo dziin ne quiadziuun ne, laa naa rnab lo luu bnee lo grop wnaa qui gneewen zho stib, sac gon ye zho blactaa miñe bded zho zeene bzënal zho zhits naa biotiiz no Xtiidz Jesús, ni zeene güeynalгаа zho zhits Clement, ni zla zha ne rdziuungza no dziin. Laa lë zho zhooble len libr ne quia lë grëse miech ne bgaale guielmban ne gdziñdraa dze lozh.

⁴ ¡Golley sca, tibaque golley! ¡Golgan ganle lo Jesús ngab to! Ni rneque naaw stib: ¡Golley!

⁵ Golguien zaacse golbannie grëse samiech to, zeena haxta gzëeb diidz ganle ne nli miech ndzinli, miech ndooladz nac to. ¡Golguien ganle, ile ziaad men ndzon ne rnabey ne!

⁶ Tel pe nac grë ncuaañe quiadet to, tsode to zhgab, gdziebde to, sinque golzodiidznie Dios, golšan grësew ladznia me; per led loxaque gnabdse to, sinque golzoladz goldeed xquizh lo me.

⁷ Ni zeene sca csan to grë xliaadz to ladznia me, haxta tibliladz guiaan zdoo to, peet dzeb tsoniedraa zdoo to, peet zhgab tsoniedraa guic to, masaque Jesús nac men ne nacie to; grëraa miech ib guiend zho zha nac ne scataa tibliladz rac to.

⁸ Bets, bzian, nu ne laa naa csiaalle guits rii laa naa rnab lo to, min rii golconie guic to:

niapse mine nac diidzli,
niapse grë ncuane nonguiel gac,
niapse grë ncuane rac zigne nac diidzli,
niapse grë ncuane mbe,
niapse grë ncuane gleynie miech,
niapse grë ncuane gley miech gon zho,
niapse grë ncuane yquuin,
niapse grë ncuane gzee zdoo miech ni gleynie zho.
Grë min rii golconie guic to, ni lëew goltsoxco gun to.

⁹ Ni golguien gon, grë mine pseed naa to, mine psan naa diidz lo to gun to, grë mine bin to bne naa lo to, mine gon to ben naa, grë min co goltsenal; zeena scagaa zacnie Dios to ib peet zhgab ctsebdraa to.

Gon ne bdeed zha Filip

¹⁰ Ne nlijaa rded naa xquizh lo men ndzon ne rnabey ne, ni rley naa ne laa to pxeel grë ncuane yquuin naa stib. Nan naa ne led biaanladzde to naa, sac tibaque noxco to dien zha gun to xyudar naa; sinque bdeedniobda diidz.

¹¹ Rley naa ne laa to psoladz naa, maase niicle nodpaa naa zhgab co dien pa griee pe yquuin naa, sac pseedle naa peet zienied guic naa niicle tel zhataa nodeed naa.

¹² Nan naa zha nac guielprob, ni nanquegaa naa zha nac zeene quianie ne nroob ncuane yquuin ne. Pseedle naa rzac zdoo naa mine nodeedtaa naa, niicle zeene biodzë zdoo naaw, zeene rcaabedzga naaw; niicle zeene nroob ncuane yquuin naa no, zeene peet guiendgaa.

¹³ Grësew rrieelo naa, sacne nacie Jesús naa, me rneedz xfuers naa!

¹⁴ Per wen ga been to, pxeel to ncuane pquuin naa lëëtaque len dze ne peet guiend lo naa.

¹⁵ Zeene brie naa nëz xtan zha Macedon i, len dze ne wriin psilo noseed naa miech Xtiidz Ndzon Jesús ga, tosaque nac zha ne been xyudar naa, been lo to gon pxeel to lo naa, porne rleynie to dziin rii.

¹⁶ Scasaque len dze ne no naa Tesalónica, blalaa vuelte pxeel to pe pquuin naa.

¹⁷ Guiabde to togo bod ne dien zha ygadraa miech lo naa gane rzetpaa naaw; lëda, sinque rley naa ne squi rala zdoo to rgad to, sac squi nroobraa guielnzaac ne yгаа to.

¹⁸ Tel na gon, grële ncuane yquuin naa no, haxta nrooblew nu. Ni ne pxeelaque to Epafrodit biaadsan stib nëza, haxta bdedsole goclow lo naa nu. Grëta ncuane bgad to lo naa, rrieequia naca zig tib gon ne bdeed to lo Dios, zig tib gox ndzon ne sac zdoo me ycaania me.

¹⁹ Scagaa niina nagon, grëse ncuane yquuintaa to, Dios men ndzon ne rliladz ne, me gneedza lo to, porne nligaa dib zdoo to rliladz to Jesús; sac gon, nroobdoo grë guielndzon, grë guielnzaac ne rap Dios.

²⁰ Jëë xDios ne ga, me nac Pxoze ne grëse ne! JGotsaa dziuunnon ne me sca, mesi gdziind dze ne nitlo xquielndzon me! Sca rieguiala.

²¹ Goldeed tib zhibdiuzh naa lo grëse zha ne no xnëz Jesús i, grë zha ne squi noxco mban zigne racladz Dios. Scagaa golcaania zhibdiuzh grë zha bets ne, zha ne no lo naa nu.

²² Gołcaania zhibdiuzh grëse zha ne no nu, zha ne riladz Jesús; haxta ye grë zha ne rquia dziin lo rey Roma nu, laa zho rxeel zhibdiuzh zho lo to.

²³ Jesús, meñ ndzon ne rnabey ne; me noxco to, me nonie grë zhizhgab to. ¡Me gunlay to grëse to!

Pabl

GUTS NE PXEEL PABL LO ZHA COLÓS

¡Diuzh to grëse to!

¹ Naa nac Pabl, tib zha ne pxeel Jesús nonee Xtiidz me lo miech, sac ible Dios bnabey ne sca gaca.

² Grop no Timoté laa no rxeel guts rii Colós i, laaw ziaad lo to grëse to ne nac to zha ne noxco mban zigne racladz Dios, ni dib zdoo to rleynie to Jesús.

Dios men ne nac Pxoze ne, me glu ganle pa lotaa noxco me to, zeena peet dzeb tsonied guic to.

³ Gzobtaa zeene rzodiidznie no Dios, Pxoze Jesús men ndzon ne rnabey ne, rnab no gacnie me to, ni rdeed no xquizh lo me ne squitaa rneedz me guielbiini lo to;

⁴ sac zidzion no ne nlipaa dib zdoo to riladz to cho nac Jesús, ni rleynie to grëse zha ne no xnëz Dios.

⁵ Min co nonie guic to, sac desde dze ne psilo pquiaadiag to Xtiidz Ndzon Jesús mine nac diidzli, laa to gocnan ganle no tib guielnzaac noob ne ygaa to gbaa.

⁶ Golgacnan sca ganle, Xtiidz Ndzon Jesús, wseed ne riladz to, nzianraa zaatne quiagaaza, ni lëew notsëe lo xquielmban miech, zigne bdzëëque lo xquielmban to zeene pquiaadiag tow, laa to bien ganle ne nligaa pa lotaa noxco Dios to.

⁷ Lëe min co ga biadseed Epafra to; tib men ne nziuu lo no, ye me rquiagza no dziin; ranaxe to ganle zha rioxcotaa me xtsiin Jesús.

⁸ Me bzodiidz lo no ne squitaa rneedz Espiritu Sant guielbiini lo to, rleynie to samiech to.

⁹ Gane zeene bdzion no squitaa ndzinli mban to, tibaque laa no quianab lo Dios quixbiiniraa Espiritu Sant guic to, guien to zhapaa nac grë mine racladz Dios gun to;

¹⁰ zeena grielo gban to zigne no gban zha ne no xnëz Jesús, tibaque gun to ncuaañe conley to zdoo me; dzigosi grëse ncuaañe ndzinli ne gun to, zlupaa ncuaañe rquiina, ni zioguicraa to zha nac Dios.

¹¹ Ni rnab no lo me, niapse por poder ne rap me gunndip me zdoo to, gunndip me guic to; zeena niicle tel pe nactaa guielnë ne gan to, ib peet tsienied guic to, ib sacxuude to,

¹² ine gley to gdeed to xquizh lo me nac me Pxoze ne, ne squi laa me bzooblo to, psanme me to; zeena gdziñ to lo biini zaatne ygaa to mine no gdeed me lo grëse miech ne no xnëz me.

¹³ Sac me nac men ne blee ne lадznia menox, ma ne rnabey lo guielcow, psan me ne lадznia Xpëed me Jesús, men ne rleynie me ga.

¹⁴ Jesús nac men ne bdiizh grëse xtol ne zeene sca gut me lo cruz, me nac men ne psanme me ne nëz lo Dios.

Grë ncuaañe been Xpëed Dios

¹⁵ Niicle ne gard dzian ne Dios, per laa Xpëed me biaad biaadlu lo ne ganle zha nac me, sac zigne nacse me scaque nac Xpëed me; ni lадznia Xpëed me no grëtaa ncuaañe no.

¹⁶ Zeene bnabey me tsaa grëtaa ncuaañe no gbaa, grëtaa ncuaañe no lo guidzliu; Xpëed me bzaaw grësew, zigtaa grë ncuaañe rdzian new, zigtagaa

grë ncuaañe grieelod dzian new, zig nac grë “me mban” ne rap guielrnabey, rap poder. Jesús bzaaw grësew, ni ible par me biaaw.

¹⁷ Nole Jesús zeene bīaa grë ncuaañ co, me naaza, gane tib tība nosew zaatne rieguiala.

¹⁸ Ni grëse zha ne no xnëz me, me nac men nroob ne rnabey lo zho; grëse zho laa zho nac zig tib cuerp, dzigo me nac guic cuerp co. Me nac men ne nole glo, ni me nac men ne glopaa brieeban; zeena glu ganle me nac men ne mazdraa nroob, me nac men ne mazdraa non;

¹⁹ sac ib Dios bnabey zigne nacse Dios scaque nac me.

²⁰ Niapse por Jesús grëse ncuaañe no zigtaa lo guidzliuw, zigtagaa gbaaw, laaw bīaañwen lo Dios, ni lëë min co goc zeene sca bzhīee xchen Jesús lo cruz.

²¹ Zig nac to, glo zit zo to lo Dios, rrieequia rlëënie to me, sac niapse grë ncuaañe ndzinlid güeynie guic to been to;

²² sangue niina laa Jesús psañwenle to lo me, zeene sca goc me miech pqūiaa zho me lo cruz. Ni laa me psañwen to, zeena inë mbele to, ni tib dol rapdraa to gdzin to zaatne no me.

²³ Per parne grieeelo gdzin to ga, none tīblique golgun guic to, goltsienal Xtiidz Ndzon me mine riladzt to, ib guīaanladzde to guielnzaac ne no yгаа to, zigne raquiet lo Diidz Ndzon ne pqūiaadiag to ga. Lëë Diidz Ndzon co quīagaaz dipse lo guidzliu niina, ni ye naa nac tib zha ne quīa quīaneew lo miech.

Dios bzo Pabl tsoxco me zha ne ngab lo Dios

²⁴ Grë guielnë ne noyan naa porne rleyne naa to, rley naa noyan naaw. Laa Jesús gonle grë guielnë co zeene psīlaa me grë zha ne ngab lo me niina, laa niina ye naa noyan spalala, loxaque ne noseed naa zho Xtiidz Ndzon me, ne nac zho zig xcuerp me.

²⁵ Ni ible Diosгаа bzo naa noyūn naa dziin lo grë miech ne no xnëz me, zig nac to, gocniē me to bzo me naa bne naa grëse zigne nac Xtiidz Ndzon me lo to.

²⁶ Diidz ndzon ne gocnañd grëtaa zha gol ne ziyaadmban wlal ne bre guidzliu, laaw gocnañ grë zha ne no xnëz me niina.

²⁷ Ible zha gocladz me gacnañ grëtaa guielnzaac ne yгаа zho zeene laa zho gacnañ diidz co; haxta to ne nac to zha zit. Ni lëë diidz ndzon co nu: Zha ne nacie Jesús, me gdziñnie zho zaatne nac lo guielndzon ne no me.

²⁸ Gacxe waa, zaatne zīotaa no, Jesús nac men ne rzeet no lo miech, ni megaa rneedz guielbiini lo no rseed no zho, rso no diidz lo zho; zeena gac zho tib miech ndzinli, zigne no gac zha ne ngab lo me.

²⁹ Min co nac dziin ne noxco naa, per led dziin ligada, gane dib nacse guielndaan, dib nacse fuerz ne rneedz me lo naa, noxco naa noyūn naaw.

2

¹ Racladz naa gacnañ to ganle ne nlipaa tībaque no to guic naa, zigtaa tow, zigtagaa zha Laodicëw, ni grëragaa zha ne gard ganlo naaw.

² Rnab naa lo Dios ib guīaanđ zdoō to, tīpse gac to inë gleynie to grë zha ne nacgrë to, lozhraa tsaa biini xquielrien to guien to ganle zhāpaa nac Jesús, sac gon naraa bdeed Dios diidz gunbey miech me.

³ Me nac men ne rap grëse guielrac, grëse guielbiini nroob chen Dios.

⁴ Laa naa rne min rii lo to, zeena choot yquīidiede to, niicle paraa ndzielguic rzë xtiidz zho.

⁵ Niicle ne nli zozhaald naa lo to i, per zhiespíritu naa nacnie naa to, ni rley naa ran naa squi zaacse mban to, tiblique nac guic to dib zdoo to riladz to Jesús.

Tib guielmban cub

⁶ Nana sca, zigne bzëëb to xnëz Jesús gnabey me to, scagaa gołtsienal mīne rnabey me,

⁷ masaque ladznia me gołsan xquielmban to, me gołnalo, gollu ganle ne nli dib zdoo to riladz to me, zigne pseed no to, ni tibaque goldeed xquizh lo Dios.

⁸ Nsin gołso: ib gac-wete to lo grë zha ne guiaadnie wseed lo guidzliu rii, grë godiidz ne paat rquiind, sac laa zho gacladz yquidie zho to. Tel zha, ib rzeete zho lo miech dien cho nac Jesús, sinque lel grë ncuaañe run grë xmengol zho, grë wseed ne rleynie grë miech lo guidzliu, min co rseed zho miech.

⁹ Sangue ne, ndion ne ganle zigne nac Dios scapañ nac Jesús.

¹⁰ Gacxe waa, to ne nacnie to Jesús, peet rquiindraa to. Me nac men ne rnabey lo grëse zha ne rap poder, lo grëse zha ne rnabey.

¹¹ Zeene bnalo to Jesús rrieequia hor co bio to tib bey, per nacda zig nac bey ne rio xcuerp zha bgui, sinque tib bey ne rlu ne laa to psaanle grë dol ne been to glo; ni Jesús nac men ne bloo to bey co.

¹² Ni zeene brobnis to, rrieequia bgueetsnie to me ga ni brieebannie to me, sacne bliladz to poder ro ne rap Dios men ne blische me len baa.

¹³ Glo zha gutle nac to nëz lo Dios, lala por grëtaa xtol to ni porne gard co Jesús to bey co; laa zeene bleeban Dios Jesús, men ne pxeel me biaadsilaa ne lo dol, laa to wbiire bgaa guielmban stib.

¹⁴ Ptiche Dios grëse mīne riogual ne, sac bdiits ne mīne nac xley me; grëse dol co pcaadz me Jesús zeene laa Jesús pquia lo cruz.

¹⁵ Ni zeene sca bded Jesús, ga psiaablo me menox; grë me yozh ne rap poder, me ne rap guielrnabey, psan me ma guielto; sac gasi laa me blu lo miech ganle ne nli ladzniale me no ma.

Grë wseed ne paat rquiind

¹⁶ Gacxe waa, ib guncasde to zha ne rlisqui dien pe nacne pe row to, pe nacne pe rie to, pe nacne runde to grë zhiłni zha Israel, runndade to dze ne rquia mëë yeen, runndade to dze ne rdziiladz zha Israel lo dziin.

¹⁷ Grë min co bioxco miech zeene gard guiaad Jesús, per lega gocse ncuaañ co zig tib zhimlë guielbiini ne biaadnie Jesús.

¹⁸ Ib gliladzde to xtiidz grë zha ne squi racladz csozit to lo Dios, niicle squitaa rquiaalo zho ndooladz rac zho, squitaa rleynie zho grë anj, rnee zho goon dieen pe ncuaañe gbaa ne zielulo lo zho, lëëque lëë zho rlozhd gunniats zho por grë zhiwseed zho.

¹⁹ Led yed zho ngab lo Jesús, men ne rnabey lo ne grëse ne ne nac ne zha ne ngab lo me. Tel ne, me racnien ne, tipse noyun me ne, laa ne noyabiiniraa zigne racladz Dios.

²⁰ Zeene sca gut Jesús, gataa bnitlo me grëtaa mīne nac to glo, gane niina ngadoodraa to lo grë ncuaañe zienal grëraa miech guidzliu. ¿Pe nac dzigo ne bli zienal to grë min co?

²¹ Zig nac grë mine rnabey zho to, rnee zho: “Nod gon yquiin to ncuaañ rii, nod gow to min rii, gacd ygaal to ncuaañ rii.”

²² Ncuaañe tib rded nac grë ncuaañe qui, zig nac guielwagw led ncuaañe gdiid ga, grëse wseed qui miechse bleebeya.

²³ Parga nli na zootle nixbiini nac grë wseed co, sac rioxco zho dien zha tsiegan zho grë anj, rac ndooladz zho lo miech, ni rsacsi zho xcuerp zho;

per rrieelod grē ncuaan co ctsēw xpensar zho, zdoos zho, parne gnabey zho xcuerp zho.

3

¹ Golguien ganle, stible guielmban rap to niina, lēē guielmban co bгаа to zeene brieaban Jesús; gacxe waa, goltsoxco yгаа to grē guielnzaac ne no bгаа, zaatne zob Jesús cue Dios nēz derech.

² Grē guielnzaac ne no bгаа min co golconie guic to, led grēd ncuane no lo guidzliu rii;

³ sac gon, rrieequia gutle to lo grē ncuane no lo guidzliu rii, laa to mbanniele Jesús, zigne racladz Dios.

⁴ Laa ne rdziaap tib guielmban cub niina, sacne nacie ne Jesús; gal dze ne laa me guiaad stib, laa ne no gdziñ lo me gban ne zaatne nac lo xquielndzon me.

Zha gban zha ne riladz Jesús

⁵ Gacxe nana sca, golsaan grētaa guielntseeb ne run miech lo guidzliu rii:

tsoniede to zha ne led tsieelde to,
gunde to grē ncuane mbeeguelt,
gdeete to diidz gnabey xcuerp to to,
gunde to ncuane ndzinlid ne racladz to,
ni gacblēde to lo dimi (sac tel scaw, dzigo dimi rsan to xlugar Dios).

⁶ Grē dol rii run grē zha ne nēd gon xtiidz Dios, lozh ga lēē mine tsieguial zho laa zho yгаа lo guielzi ne csiaab Dios.

⁷ Zig nac to, grē min co been to glo;

⁸ sangue niina, none csaan tow, ni lalnu:

glēēniedraa to samiech to,
sobzhiandraa to,
gundraa to guielntseeb,
gneenēdraa to samiech to,
gneedraa to diidzguidz,

⁹ yquidiedraa to samiech to.

Sac gon, nacdraa to zigne nac to glo, laa to brieete lo grētaa mine been to.

¹⁰ Stible nac lo xquielmban to niina: tib miech cuble nac to, ni laa to bii nodzēē haxta que ne gac to zigne racladz Dios men ne psan miech, zeena scagaa lozh gunbey to zha nac me.

¹¹ Zha ne bgaale guielmban cub rii, led yedraa zho cue dien cho zha nac zha Israel, dien cho zhagaa nac zha zit; dien cho no bey, dien cho nodgaaw; dien cho ziaad guiedz nroob, dien cho ziaadgaa guiedz win; dien cho rac, cho gacdgaa; dien cho run xtsiin ben, dien chogaa nac zha rnabey. Mine rquiinraa niina, nacne grēse zho guien ganle Jesús nac men ne mazdraa non, me none gnalo zho.

¹² Golgan ganle, zha nquialadztaa Dios to, ib laa me ble to gac to miech ne ygab xnēz me. Zaacse sca golban, ne nlipaa dib zdoos to:

golquia zdoos samiech to,
niowse golgac lo samiech to,
ndooladz golgac lo samiech to,
nguudzladz golgac lo samiech to,
guieedniede to samiech to.

¹³ Guieedniede to samiech to, ni zeene cho zha run pe tib falt lo to, golgun zho perdon. Golguien ganle zha been Dios to perdon; scaque to, none gun to samiech to perdon.

¹⁴ Ni mine mazdraa none tsoxco to, golleynie zha ne nacgrë to zigne racladz Dios, zeena tipse gac to; ni scagaa gleynie to grëraa samiech to.

¹⁵ Jesús nac men ne ctiche grëtaa ncuane ndzinlid ne no zdoo to, zeena niowse gbannie to samiech to. Lëë tib guieInzaac co no yгаа to ne laa Dios bredz to, ni scagaa none gban to, zeena tipse gac to grë to. Golşoladz goldeed xquizh lo me.

¹⁶ Niapse mine nac Xtiidz Jesús golconie guic to, golco zdoo to. Golquini grë guieIbiini ne rneedz me lo to, golseed grë zha ne nacgrë to, ni zha ne rxin, golnee lo zho zaacse gac zho. Dib zdoo to goldeed xquizh lo Dios por grëtaa mine ruņ me, ine golgoolnie me grë salm, golgoolnie me grë cant ne rdziolnie ne me.

¹⁷ Ncuane guntaa to, niicle zeene gnee tow, zeene gunгаа to tib dziina, golguņa zigne rdziladz Jesús, men ne rnabey ne; ni tibaque goldeed xquizh lo Dios men ne nac Pxoз to, niina ne laa to ngable lo Jesús.

¹⁸ To ne nac to men wnaa ne ptsieelniale, golgon xtiidz tsieel to, sac ible sca nonguiel gban miech ne no xnëz Jesús.

¹⁹ To ne nac to men bgui ne ptsieelniale, golleynie tsieel to; gacnchogde to lo me.

²⁰ To ne nac to mëed, golgon mine rnee pxoz to, mine rnee xnıaa to, sac sca rdziladz Dios.

²¹ Togaa ne nac to men nguzan, gunde to ncuane gunglëë to xpëed to, zeena csande to zdoo zho.

²² To ne nac to zha ne lega ruņ xtsiin ben lo guidzliu rii, golgun grëse mine rnabey zho to; gunde to zeene zose zho lo to dzigose yquiaalo to gun to dziin, zeena guianzıuu to lo zho; sinque dib zdoo to golgun xtsiin zho, golguien ganle Dios zobwi ran me pe ruņ to.

²³ Grëse dziin ne gun to, ine nguieel golgac golguņa, zig nac zeene xtsiinzhall Dios noyun to.

²⁴ Benque nanle to, zгаа to mine gdeed Dios lo grë zha ne ngab lo me, telne gon to diidz; sac gon Jesús nac men ne nlipaa rnabey to, ni lo me quia to dziin.

²⁵ Golgon diidz sca, sac zha ne gonda, ib tedsod zdeed Jesús mine tsieguial zho; sac gon, tel me led yed lo me ncuee miech.

4

¹ Togaa ne nac to zha ne quia miech xtsiin, zaacse golgac lo zho, csacside to zho. Golşoladz ganle, ye to tib ngundziin nac to lo men rnabey ne zob gbaa, ni me zobwi ganle pe ruņ to.

Gnab zho gacnien Dios Pabl

² Bets, bzian, tel petaa rzac to tibaque golzodiidznie Dios, nsin golşo, goldeed xquizh lo me.

³ Golnab lo me gacnien me no, grieelo ziaab no zaatne guioseed no miech Xtiidz Ndzon Jesús, gnee no lo zho ganle cho nac Jesús men ne beenbeyd miech padzeela; sac zig nac niina por min co znu nioogyu naa nu.

⁴ Golnab lo me gneedzraa me guieIbiini lo naa, zeene cseed naa miech xtiidz me, guien zho mine rne naa; gun naa dziin co zigne no gun naaw.

⁵ Golquini guieIbiini ne rneedz Dios lo to, zeena guien to zha gnee to, zha gac to lo zha ne gard gıladz Xtiidz Jesús; ni zeene sca rdeeda diidz sodiidznie to zho, golnee lo zho ganle zha nac Xtiidz me.

⁶ Golguien tib godiidz ndzinli, tib godiidz niowse, min co golzodiidznie zho, ni none guien to zha ctsire to lo xtiidz zho tib tib zho.

⁷ Laa bets ne Tic guiaad i, me guiaadnie diidz lo to ganle zha no naa nu. Rleynie no me, tibaque laa me noxco quiadziuungza no me xtsiin men ndzon ne rnabey ne.

⁸ Ga nagon laa naa rxel me, me gnë lo to ganle zha no no nëz rii, ni gnee me lo to zeena choobladz me zdo to.

⁹ Ye menladz to Onésimo guiaadgrop me. Rleynie no Onésimo, ye me tibaque noxco me xtsiin men ndzon ne rnabey ne. Grop zho guiaadnie diidz i ganle zha nac grë ncuane quaiyac nëz rii.

¹⁰ Golcaania zhibdiuzh Ristarc, men ne nioogyunie naa nu, zhibdiuzh Marcw betsyen Bernabé (laa naa nile lo to ganle, telne laa Marcw guiaadgan to i, niowse golcuézlo me);

¹¹ ni zhibdiuzh Jesús, tib men ne rneeque zho Just. Lo grë zha Israel ne rliladz Jesús, lëese gza zha rii nac zha ne quaiyun xyudar naa quiaseed no miech zha sëeb zho xnëz Dios, ni blactaa zichoobladz zho zdo naa.

¹² Golcaania zhibdiuzh menladz to Epafz, ye me quaiyun xtsiin Jesús nëz rii; tibaque rzodiidznie me Dios rnab me dziits so to lo Xtiidz Jesús, ni tiblique gac guic to tsoxco to gban to zigne rnabey Dios.

¹³ Nanpaa naa ganle pa lotaa nonie to guic me, grë to zha Laodicé ni zha Hierápolis.

¹⁴ Golcaania zhibdiuzh Demas ne, ni zhibdiuzh Luc men ne run rmed, lëe stib men ne nziuu lo no nu.

¹⁵ Goldeed tib zhibdiuzh no lo grë zha ne no guiedz Laodicé, zha ne nacgrë ne. Goldeed zhibdiuzh no lo zhuz Ninf, ni lo grëraa zha ne rcaalsa lidz me i, riegoolnie zho Dios.

¹⁶ Zeene gon lozh glab to lo guits rii, dzigo golxeeļa lo zha Laodicé, zeena ye zho glaba; ni scagaa to, gollab mine cxel naa lo zho.

¹⁷ Ni golguiab lo Arquip, tsoxco me zaacse gun me dziin ne bdeed Dios lo me i.

¹⁸ Naa nac Pabl, golgan ganle naazhal pquia tib bdiuzh rii nu rxel naa lo to. Golsoladz ganle ladzguiib no naa. Dios nac men ne gunlay to, me glu lo to ganle pa lotaa noxco me to.

Pabl

GUTS NE GLO PXEEL PABL LO ZHA TESALÓNICA

¡Diuzh to grëse to!

¹ Naa nac Pabl, gza no Silas ni Timoté, laa no rxeel guits rii Tesalónica i; laaw ziaad lo to grëse to ne nac to zha ne ngable lo Jesús, meñ ndzon ne rnabey, ni lo Dios meñ ne nac Pxoz ne.

Dios ni Jesús, me glu ganle pa lotaa noxco me to, zeena peet zhgab ctsebde to.

² Tibaque rdeed no xquizh lo Dios meñ ne nac Pxoz ne, squitaa rneedz me guielbiini lo to; gzobtaa zeene rzodiidznie no me rzeet no to lo me.

³ Ni zeene rzeet no to lo me, rsoladz no grëtaa dziin ne run to niina ne dib zdoo to rleynie to me, ni zha quialëb to lo grëtaa guielnë ne noyan to, tibaque nonie guic to ne ible zdziñ dze ne laa Jesús guiaad stib.

⁴ Bets, bzian, rleyniedox Dios to, ni ndion ne ganle me bzooblo to ygab to lo me.

⁵ Zeene biaad no biadseed no to Xtiidz Ndzon Jesús, znuse ptsëew lo xquielmban to, sac gocnie Espiritu Sant to bien to ganle niapse diidzli nac grë diidz ne nonee no lo to; scagaa no, gon to ganle zha mban no, ga blu ne nli diidzli nac grë mine noseed no miech. Ni golsoladz ganle zha biaadbannie no to i, bdzioxco no bdziun no xyudar to, sac ne nligaa rleynie no to.

⁶ Scagaa to, pseed to wban to zigne mban no, ni zigne wban meñ ndzon ne rnabey ne. Laa to pcaania xtiidz me, blozh ga, niicle nroob guielnë ne bded to, per bneedz Espiritu Sant guielbley lo to, ib peet güeynied guic to.

⁷ Grëse zha ne riladz Jesús nëz Macedon, nëz Acay, zeene bin zho zha mban to, yeque zho laa zho pseed mban zho zigne mban to.

⁸ Ni ne squi ndzinli mban to, nzianraa zaatne rzeet miech Xtiidz Ndzon Jesús, led loxaque gropdse lugar rii. Zaatne ziotaa no, zhoob diidz ne squitaa dib zdoo to riladz to Dios, rquiindraa ne no gzodiidza lo zho.

⁹ Zhale rzodiidz grëse zha biaad no lo to i, zha scataa niow blëzlo to no len dze co, ni zha psaan to grë zhiwseed xmengol to, grë ncuaa ne nac mdio lo to, laa to biladz meñ ne nacpaa Dios ne nguiamban, ni laa to ziana miñe rnabey me.

¹⁰ Ni rzodiidz zho zha zienie guic to ne ible zdziñ dze quiet Jesús gbaa guiaad me stib, ni quiambëz to gdziñ dze co. Xpëed Dios nac Jesús, Dios bleeban me lo guielgut, ni me psilaa ne lo guielnëdnox ne ziaadyob guiaad.

2

Zha güeyseed Pabl zho

¹ Bets, bzian, nanle to ganle zeene biaad no lo to i biaad-zhlëd no, brieelo pseed no to.

² Niicle ne wriin psacsi zho no guiedz Filip hor co, per laa no bii biaad ladz to i, ni niicle igaaw bioxtseebaque no, per ibbdziebd no laa no pseed to Xtiidz Ndzon Jesús; sac ndion no Dios nacie no.

³ Ni diidzli nac miñe pseed no to, choot biate par nquidiee no to, niicle biategaa no par dieñ pe niaadla no lo to.

⁴ Xtiidz Dios bnee no, me bzo no gnee no lo miech zha laa zho lo dol, ni miñ co nac dziin ne quiadziun no. Nli nzian zha ne rlëeniew, per laa no

bii rdziuuñ dziin co; sac zionałd no gac miñe rdziladz miech, sinque laa no zionał gac miñe rdziladz Dios, meñ ne nan ganle pe rza zdoe ne.

⁵ Gon to ganle, bneed no pe diidz niow lo to par nquidiee no to, niicle bguibdgaa no dien zha ndeeda diidz needz to dimi lo no. Dios zobwi rdziuuñd no min co.

⁶ Wlaltaa ib bguibd no dien zha niacnon no lo miech, niicle lo tow, niicle lo stibgaa miecha.

⁷ Laa ne nlu no ganle zha rnabey nac no, sac gon Jesús pxeel no, lel ndooladz goc no lo to. Masaque zigne rleynie meñ wnaa xpêdyeen me, nda nda ran me win; scadaa bleynie no to,

⁸ bio no bdzioxco no pseed no to Xtiidz Dios. Ne nlipaa bleynie no to, telne niaca miñe niedziña haxta mbeeladz no no niet no por to.

⁹ Bets, bzian, rsoladzaxe to ganle ni lalnu ib psodziind no to; blactaa, dze guieel bdziuuñ no dziin, nozhal bdziniaa ncuaañe pquiin no len dze ne biadseed no to.

¹⁰ Dios zobwi ran me ganle zha nac lo xquielmban no, ni niicle togaaw (ne nac to zha ne ngab lo me) gon to ganle ndzinli wban no zeene biaad no i, bdziuuñd no ncuaañe mbee no diidz ro miech, sinque laa no bdziuuñ miñe rdziladz Dios.

¹¹ Masaque rziaac no to zig rzac tib dad xpêed zho, blactaa pchoobladz no zdoe to, bloonley no zdoe to tib tib to;

¹² pso no diidz lo to zaacse gac to, gban to zigne no gban zha ne no xnêz Dios, meñ ne bredz to gdziñ to lo xquielndzon me, zaatne rnabey me.

¹³ Ne nligaa rdeed no xquizh lo Dios, sac zigne biadnee no Xtiidz me lo to, laa to pcaaniaw, bien to Xtiidz me naca, nacda ncuaañe bleehey miech. Ni nligaa Xtiidz Diosa, gacxe waa zha ne riladza zigne rzac tow niina, rzhixcuaa lo xquielmban zho.

¹⁴ Per zeene laa to bliladza, laa menladz to psacsi to; bded to zigne bdedaque grê zha Israel ne riladz Jesús, sac tel zhaw psacsi menladz zho zho.

¹⁵ Ni léeque zha ne psacsi zho ga, zha co bnaab psacsi zho Jesús men ndzon ne rnabey, zigne beetaque zho grê zha ne pxeel Dios biadteed Xtiidz me; ni léeque zho benxcoñ no. Ncuaañe rbinladz Dios run zho, rlêenie zho grêse miech,

¹⁶ rtsidil zho pe nacne nonee no lo grê zhazit zha laa zho lo dol. Loxaque quiyunctalraa zho xtol zho, per, iprobsaxe zho, sac guieelndox ne ziaadyob cxeel Dios ygaa zho!

Racladz Pabl tsiegan Pabl zho stib

¹⁷ Bets, bzian, nli gard dzianlolsa ne wlal ne wbii no i, per tibaque rsoladz no to; blactaa rnee no telpaa zha guiaaddziñ no to.

¹⁸ Tel naa blactaa gocladz naa nial naa, nialgan naa to. Laa no niaadle, per pte mendox lo no gon, pca ma xnêz no pasêe no niaad.

¹⁹ Guiabde to togo quiyaañladz no to, sac gon to rnalo no conley zdoe no gal dze ne laa Jesús guiaad stib. To glu nli bdziuuñ no xtsiñ me, to glu ne nli riogual no ygaa no premio ne gneedz me.

²⁰ Ne nligaa rley no rdziñ no zha mban to, haxta riats no zeene raquiet to; sac to rlu ganle ne nli xtsiñ Dios nodziuuñ no.

3

¹⁻² Ni ne scataa tibaque nonie to guic no, dzigo mazd pxeelaque no bets ne Timoté biaad lo to i, laa no biaañ guiedz Aten. (Nanaxe to ganle ye Timoté nacgza no quiadziuuñ no xtsiñ Dios, quiaseed no miech Xtiidz Ndzon Jesús.)

Laa no pxeel me biaadgan me to, biadchoobladz me zdoo to, biadnee me lo to lozh sodziits to lo Xtiidz Dios;

³ zeena niicle tel pe guielnē ne noyanta to, ib guiaand zdoo to. Nanle to ganle grēse ne ne riladz ne Jesús, ib laa ne no dzian guielnē.

⁴ Led rsoladz to zeene biaad no i, bneegazh no ne ib laa ne no dzian guielnē; ni gon to ganle scase goca.

⁵ Ne nligaa tibaque bionie to guic naa, nacne mazd pxeelaque no Timoté, biaadso me dien pe bii zienal to mine nac Xtiidz Dios; sac ni naa nend pquuil mendox to biire zienal to ncuaa ne rnabey ma, dzigo zhlēse biadseed no to.

⁶ Laa niina ne laa Timoté blanso nu stib, blansonie me diidz, nē me niowse mban to, rleynie to grē zha ne nacgrē to, dib zdoo to riladz to Dios. Ni nē me rleynie to no, ye to racladz tebaa zha gan to lo no, zigne rziaaqaque no.

⁷ Min co nagon, bets, bzian, niicle ne nroob zhgab, nroob guielnē ne nodieed no nu, haxta biaanladz no grē ncuaañ co zeene gocndion no dziits zo to lo Xtiidz Dios, mine riladz ne.

⁸ Haxta stib goc zdoo no bdzion no squi tiblrique laa to rleynie men ndzon ne rnabey ne;

⁹ ni rdzieldraa no diidz ne gnee no gdeed no xquizh lo Dios por to. Ni ne znutaa bloomley to zdoo no, haxta Dios ran ganle pa lotaa rley no.

¹⁰ Dze, guieel, quianab no lo me gneedz me diidzbey gbiire dzian no lo to stib; zeena lozh cseed no to grēraa mine no gacnañ to lo Xtiidz me.

¹¹ Dios men ne nac Pxoze ne, ni Jesús men ndzon ne rnabey ne, me gacnien no grielo guiaaddzian no to.

¹² Jesús gacnien to tsaraa to biini, zeena gleynieraa to grē zha ne nacgrē to ni grēraa samiech to, zigne rleynie no to.

¹³ Ni rnab no lo me, gacnien me to tiblrique gac to lo Xtiidz me, zeena ine mbe zdoo to, ni tib dol rapde to zeene laa me gzo to lo Dios men ne nac Pxoze ne, gal dze ne laa me guiaad stib con grē zha ne nacie me.

4

Guielmban ne rdziladz Dios

¹ Zig zobwi Jesús men ndzon ne rnabey, laa no rso diidz lo to: zigse zie dze goltsoxcoraa gban to zigne rdziladz Dios,

² benque nanle to zhaw, sac lēē min co bnabey Jesús no biadseed no to gun to.

³ Sac gon, laa Dios racladz mbe guiaan to lo me, gunde to guielyozh yquiangob to zha ne led tsieelde to.

⁴ Grē zha bgui, zeene laa zho gnee lo tsieel zho, none niowse ndzinli gac zho;

⁵ gund zho zigne run grēraa miech ne nand zha nac Xtiidz Dios; sac tel zha co, rzac zho loxaque par gdeedse guxt xcuerp zho, mincose rquiiñ wnaa.

⁶ Niicle yquiangobde to tsieel sabgui to; sac zha ne sca run, sabgui zho ga rguitnie zho; ni dol co ible tedsod zunquizh Dios zhow. Golsoladz ganle psole no diidz rii lo to glo, ni na laa no rneeqew stib.

⁷ Golguien ganle, bredzdaxe Dios ne waa parne dziuun ne grē guielyozh, sinque laa me bredz ne gban ne zigne racladz me.

⁸ Gacxe waa, zha ne zienald wseed rii, gacnañ zho ganle xtiidz Dios ga (men ne rdeed Espiritu Sant lo zha ne ngab lo me) noguiits zho, led xtiidzd cholze samiech zhow.

⁹ Laa zig nac guielwleynie, nanle to zha no gleynie to grē zha ne nacgrē to. Rquiiñd cso no diidz lo to dien zha gun to, sac Dioszhal pseed to zha gleynie to zigtaa zha ne nacgrē tow, zigtagaa grē samiech tow.

¹⁰ Zig nac grë zha bets ne, zha bzian ne, zha ne no xtan zha Macedon, zëeb diidz rleynie to grë zha co. Goltsoxco sca, golleynieraa samiech to.

¹¹ Ni stib mine rso no diidz lo to: niowse golbannie samiech to. Mine nac xtsiin to tib tib to, min co goltsoxco, tozhal goldziniaa ncuane yquiin to;

¹² zeena peet gunfalte lo to, ni scagaa grë zha ne gard gliladz Xtiidz Dios, haxta gzee zdoo zho gan zho zha mban to. Golsoladz ganle psole no diidz rii lo to glo.

Ib ziaad Jesús stib

¹³ Bets, bzian, nu na ganle laa naa gzodiidz lo to zha gac grë zha ne ret, zha ne ngable lo Dios; zeena tsode to guieinë zig rzac grë miech ne gard guien gnalo Jesús.

¹⁴ Ne, ne dib zdoo ne rililadz ne nli gut Jesús ni bleeban Dios me; scaquegaa none gliladz ne ible zbeeban Dios grëse zha ne dib zdoo rililadz Jesús, zeene laa Dios cxeel me guiaad me stib.

¹⁵ Golgacnan sca ganle, znu gon nac xtiidz me: Grëse zha ne ngab lo me, zha ne bii zomban gal dze co (gal dze ne guiaad Jesús) tednerd zho lo grë zha ne gutle.

¹⁶ Zeene laa me quiet gbaa, redz ro ne yquia, zlu zëeb tsi tib zha ne quianabey, tsi tib anjl ne nonraa, ni tsi zhitrompet Dios; hor co laa me quiet gbaa, laa grë zha ne ngab lo me, zha ne gutle, laa zho grieegan.

¹⁷ Dzigo tipse gac zho grë zho zha ne bii zomban ga, laa zho soquia laglaa lo xcow tsiedzieelo zho me; dzigosi gdzindraa dze ne gbiche zho lo me.

¹⁸ Nana sca mine rne naa nu, golsodiidza lo grëse zha ne nacgrë to; zeena conley to zdoo zho.

5

¹ Bets, bzian, nana par gni naa lo to dien pe guidze te guieel guiaad me, choot ndionda.

² Golgacnan ganle, lega nacle zeene gan miech laa me ziaadle, zig nac zeene rzëeb ngbaan yu guieel, cho dien nanpaa pa hor sëeb ngbaan?

³ Zeene laa grë miech guiab: "Nasi wen ndxie ne, peet guieeltseeb nodraa", tibaque zeene guien zho laa dze ne nitlo zho bdzinle, ni gasi grieelodraa cho csilaa zho. Sac zig znuse rnaaz yoob men wnaa ne bdzinle dze gap xpëed; scadaa gdzin dze co.

⁴ Sangue to, bets, bzian, nacdreaa to zha ne nonziaab lo ncow, tel pa hortaa guiaad me nsinle zo to; sacdraa to dze co zig rzac miech ngbaan, lega nacle zeene ran zho laa ngbaan rdzin.

⁵ Miech ne nole lo xbiini Dios nac to, niini zo to; nacdreaa to zha ne no glowtaa guieel, zha ne no lo ncow;

⁶ gacxe nagon waa, niini golso, tsienalde to mine run zha ne zienal guieeltseeb; sac nac grë zha co zig nac zha ne nixguies, tibaque guieel no zho.

⁷ Sac tel guieela, guieel raaguies miech, niicle zha ne rzuudzgaaw guieel rzudz zho.

⁸ Sangue ne ne nac ne zha ne niini zo, none guien ne pe nac ncuane noyac. Tibaque dib zdoo ne gliladz ne Dios, gleynie ne samiech ne, zeena csaaca ne zig rsaac ncuane racw menguiib lo grë ncuane gnitlo zho; ni csoladz ne ganle laa Dios psilaale ne lo guieelgut, gotsaa ziaac new zig rzac menguiib pchog ne rzob guic zho rsilaaw zho lo guieelgut.

⁹ Sac gon bredzdaxe Dios ne waa yga ne guieelnëdox ne no guiaad, sinque laa me bredz ne csilaa me ne lo guieinë co. Ni lëe min co rac zeene laa ne rililadz Jesús.

¹⁰ Zeene gut Jesús, ga bdiizh me xtoł ne; zeena yase mban ne o gutlegaa ne gal dze ne guiaad me, per me gbannie ne.

¹¹ Nana sca, tib tib to goldeed xfuers zha ne nacgrè to, niapse diidz ne gun xyudar zho choobraa zho lo Xtiidz Dios, min co golnee lo zho; zigne quaiyunaque to niina.

Rso Pabl diidz

¹² Bets, bzian, laa no rso diidz lo to: Niowse golgac, niowse golnee lo grè zha ne pso Dios noyun xtsiin me lo to, zig nac zha ne zo lo to, zha ne rnee lo to zha no gban to.

¹³ Golguien ganle cho nac zho, golleynie zho, sac gon led lega nacd dziin ne quaiyun zho lo to. Golsoladz sca: ¡Zaacse golban, tilniede to samiech to!

¹⁴ Tel cho zha ne nacgrè to i, rsilo quaiyacgbech, golgactox lo zho, zeena guien zho gun zho dziin. Grè zha ne quiasaan Xtiidz Dios, golnee lo zho zeena gleynie zhow stib; grègaa zha ne gard tsoguicpaa zha naca, golgun xyudar zho tsoguic zhow; niicle grèragaa zha ne nacgrè tow, ib guieedniede to zho.

¹⁵ Golguien tel pe guieIntseeb ne run miech lo to, guiabde to ne scaque gun to zho; sinque mazd goltsoxco tibaque niowse golgac lo grèse miech, niicle lo zha ne nacgrè tow, niicle lo grèragaa miecha.

¹⁶ Tibaque nley golco zdo to.

¹⁷ Tibaque golzodiidznie Dios.

¹⁸ Goldeed xquizh lo Dios, niicle zeene noyan to guieInew, zeena nogaa to guiebleya, sac sca racladz me gun grèse zha ne no xnèz Jesús.

¹⁹ Golquiaadiag mine rnee Espiritu Sant lo to, ni golguna.

²⁰ Golquiaadiag mine rnee grè zha ne rnee grè diidz ne rsiab Dios guic zho;

²¹ wen wen golwi dien pe nac mine rnee zho, dzigo mine rzac to rquinraa lo to, min co golseed.

²² Golbiche lo grèse guieIntseeb ne no.

²³ Dios, men ne rtiche grèse dzeb, grèse zhgab, mezhah csanmbe to lo grètaa guieIntseeb; dib nacle to (zhiespirtu tow, xalm tow, xcuerp tow) zeena ni tib dol rapde to gal dze ne laa Jesús men ndzon ne rnabey ne gbiire guiaad stib.

²⁴ Me bredz to, ni mesi run me mine rnee me, gane ndion no ne ib zun me min rii.

²⁵ Grèse to bets, grèse to bzian, laa naa rnab lo to golsiguieł golnab lo Dios gacnieñ me no.

²⁶ Golcaania zhibdiuzh no i, ine golxen nia grè zha ne nacgrè to, gollu ne nli rleynie to zho.

²⁷ Men ndzon ne rnabey, me rnabey naa laa naa rso diidz lo to, glab to guits rii lo grèse zha ne nacgrè to i.

²⁸ Jesús, men ndzon ne rnabey ne, me glu lo to ganle pa lotaa noxco me to.

Pabl

BROP GUITTS NE PXEEL PABL LO ZHA TESALÓNICA

¡Diuzh to grëse to!

¹ Naa nac Pabl, gza no Silas ni Timoté; laa no rxeel stib guits rii guiedz Tesalónica i, laaw ziaad lo to grëse to ne nac to zha ne nole xnëz Dios, men ne nac Pxoze ne, ni Jesús men ndzon ne rnabey.

² Dios men ne nac Pxoze ne, ni Jesús men ne rnabey, me glu ganle pa lotaa noxco me to, zeena peet zhgab ctsebde to.

³ Bets, bzian, ible rieguiala gdeed no xquizh lo Dios ne squitaa noneedz me guielbiini lo to; sac gon zigse zie dze dib zdooraa to rililadz to Xtuidz me, ni rleynieraa to samiech to.

⁴ Zaatne rdzintaa no lo grë zha ne nole xnëz me, ne nligaa rley no rzodiidz no lo zho zha squitaa dziits zo to, tibaque dib zdoo to rililadz to me niicle maase rtsidil miech to, niicle maase nroob guielnë ne quiaded to.

⁵⁻⁶ Nli nroob guielnë noyan to, per scagaa laaw noyan to zeena tsieguial to gdziñ to zaatne rnabey me. Nu rlu ganle, Diossi zeene run me guielwxtis, zigne no gaca sca run mew. Zig nac niina, grë zha ne squi nosacsi to i, ib zгаа zho guielnëdox ne csiaab me.

⁷ To ne nac to zha ne quiaded grë guielnë qui, golgona ganle, gal dze ne quiet Jesús gbaa guiaad me stib, ible zгаа ne descans ne nneedz me. Gal dze co, laa me guietnie grë xanj me, zha ne rapraa poder;

⁸ masaque tib beldox ne guietnie me, sac dzigosi laa me guiaad csiaabzi me grëse zha ne nëd niunbey Dios, grëse zha ne nëd nquiaadiag Xtuidz Ndzon me.

⁹ Grëse zho laa me gnabey guey zho lo guielnëdox, zaatne gdziñdraa dze griece zho. Lëë bichelë zho lo me ga, ib gdziñ dze gan zho lo xquielndzon me, gangaa zho grëtaa poder ne rap me.

¹⁰ Dze co, grëse zha ne no xnëz me laa zho goolnie me, gunnon zho me. Grëse zho see zdoo zho gan zho me; ye to gacgrë zho, sacne bliladz to Xtuidz me mine biadseed no to.

¹¹ Gacxe waa, tibaque laa no quianab lo Dios gacniën me to grieelo gban to zigne racladz me; zeena glu ganle led zhlëd bzooblo me to. Ni rnab no lo me gneedz me xporer me lo to, zeena grieelo gun to grëse ncuaane rquiabladz to, zeena grieequia grëse dziin ne quiaayn to porne rililadz to me.

¹² Zeena sca cxobnen ganle pa lotaa men nroob nac Jesús, men ndzon ne rnabey ne; ni niicle megaaw, zunnon me to. Sac zigtaa mew, zigtagaa Diosa, noxco me to.

2

Ziaad Jesús stib

¹ Bets, bzian, ib laa Jesús men ndzon ne rnabey ne no guiaad, ni laa ne gbannie me.

² Zeene gon to laa miech gnë laa dze co bdziñle, niicle gnë zho Espíritu Sant bneew lo zho, gangaa to palo nonee zhow zaatne ndxie nzian miech, o cxeelgaa zho pe tib guits lo to zig nac zeene no pxeela; gliladzde tow. Laa no rso diidz lo to, peet tsienied guic to, gdziebde to.

³ Ib gdeete to diidz yquidie zho to. Sac gon ansraa ne gdzin dze co, ib none grieequia grē miech ne gactseeb lo Dios; lozh ga, laa tib mgui ne nacie mendox grieequiaque, zactseeb me lo Dios, per gabil ga nitlo me.

⁴ Lēē zha co ctsidil grēse zhiwseed Dios, grēse ncuaañe naclay lo miech; ni haxta zie zho ziesob zho zaatne nac len xyadoo Dios, guiab zho zha nac Dios.

⁵⁻⁶ Per no tib men ne notse lo zho niina, laga gdzin dze ne laa zho guiaad. Golsoladz ganle, blactaa bzeet naa min rii lo to len dze ne blēz naa i.

⁷ Grēse ncuaañe no guic zha ntseeb co gun zho, laaw rsilole; loxaque runfalt gdeed men ne notse lo zho ga diidz guiaad zho.

⁸ Zeēne laa zho guiaad, hor co laa Jesús guiaadaque con grē xquieIndzon me, dzigo me ne griese ro me gloozh me zho, gnitlo me zho.

⁹ Masaque mendox gnabey zha ntseeb co, niapse xpoder ma gap zho, nzian ncuaañe glu zho; zun zho grē ncuaañe gzee zdoo miech, per led ncuaañe nlida.

¹⁰ Zun zho grē ncuaañe lozh yquidie zho grē zha ne nole nēz ne nitlo, zha ne ib bzhiguield niladz mine nac diidzli. Tel niaca mine niladz zhow, nleynie zhow, nsilaa Dios zho.

¹¹ Saan Dios tsienal zho grē ncuaañ co, ni ziladz zhow zig nac zeēne diidzliw;

¹² per ib siaabzi Dios zho, sac laa ne gliladz zho mine nac diidzli, lel mazdraa gleynie zho grē guieIntseeb.

Zha ne bdedlaale lo dol

¹³ Bets, bzian, golguien sca tibaque golgotsaa gdeed ne xquizh lo Dios; sac gon tel to padzeelale bzooblo me to csilaa me to lo dol. Nacle diidz zeēne laa to gliladz Xtiidz me, mine nac diidzli, laa Espiritu Sant csanmbe to lo me.

¹⁴ Min co nagon nacne pxeel me no biadseed no to xtiidz me, guien to zha laa to lo dol; zeēna gdzin to zaatne nac lo xquieIndzon Jesús, men ndzon ne rnabey ne. Gacxe waa, zha nziuu nac to lo me.

¹⁵ Golguien sca, dziits golso, ib csaande to grē mine pseed no to len dze ne biaad no i, niicle mine rneegaa no lo to lo guits ne rxeej no.

¹⁶⁻¹⁷ Ni Jesúsaque, men ndzon ne rnabey ne, ni Dios men ne nac Pxoz ne, me gneedz xfuers to dziits so to; zeēna grēse mine gnee tow, mine gun tow, wen grieequiaw. Me blu ganle pa lotaa rleynie me ne, laa me bneedz tib guiebley ne gdzind dze lozh lo ne, ni psan me diidz pe nac mine naraa no ygaa ne. Ga rlu ganle pa lotaa noxco me ne, niicle ne rioguiald new.

3

¹ Bets, bzian, nu ne laa no csiaalle, laa naa rnab lo to golnab lo Dios gacnien me no, zeēna znuse znuse diiz no Xtiidz Ndzon men ne rnabey ne; ni zha ne gontaaw, guien zho ycaania zhow zigne pcaania tow.

² Ni golnab lo me csilaa me no ladznia grē zha ntseeb, zha ne run mine notaa guic; sac gon led grēd miech riladz Xtiidz Dios.

³ Dios men ndzon ne rnabey, mine rnee me run mew; gacxe waa, ible zacnien me to dziits so to lo Xtiidz me, ni squianap me to tsobede to ladznia mendox.

⁴ Ndion no ne me noyacnien to noyun to grē mine pso no diidz lo to, ni scagaa me gacnien to bii gun tow.

⁵ Me gacnien to grielo gleynie to samiech to zigne rleynie Dios ne, ni guiuude to lo guieInē, sinque golgac zigne been Jesús.

None gun zho dziin

⁶ Bets zig zobwi Jesús, laa no rso diidz lo to: Tel cho zha ne nacgrë to i, nëdraa yquia dziin gdziniaa zho ncuaaṅe gow zho, ib ctsieelsade to zho; sac gon pseete no to miṅ co.

⁷ Tel no, gon to ganle zha wban no zeṅe bliaaz no lo to i; ni sca gon none gban to. Ib bdeddzed no,

⁸ biod dze ne lega ndioow zhlë no xcuṅ miech, blactaa haxta guieel bdziuuṅ no dziin bdziniaa no pe pquiin no; ib psodziind no lo to.

⁹ Niicle ne ib rieguial nab no lo to needz to ncuaaṅe nquiin no, per choot peet bnabd. Mine bdziuuṅ no pquiaa no dziin bdziniaa no pe pquiin no, par gan to ganle zha nonguiel gban to.

¹⁰ Led rsoladz to len dze ne bliaaz no i, pso no diidz rii lo to: Zha ne nëd guṅ dziin, scagaa nodne gow zho.

¹¹ Laa niina laaw rzetaque naa stib, sac zidzion no no bla zha ne nacgrë to i, mbe rundraa zho dziin scase quiaded dze zho; loxaque nëzrii nëzrec no zho rzëeb zho lo grë ncuaaṅe rieguiald zho.

¹² Zig zobwi Jesús men ne rnabey ne, laa no rso diidz lo zha ne sca run: none guṅ zho dziin gdziniaa zho ncuaaṅe yquiin zho.

¹³ Bets, bzian, ib guieete to, tibaque goṭsoxco golguṅ niapse grë ncuaaṅe yquiin lo samiech to.

¹⁴ Tel cho zha ne nacgrë to i nëd gon diidz gban zho zigne rso no diidz nu, golwi dien chow, dzigo ctsieelsadraa to zho; zeṅa sca ctoladz zho.

¹⁵ Per gunde to zho zig run zha ne rlëenie samiech, sinque golnee lo zho gac-wen zho; golguien ganle bets to grë to.

¹⁶ Jesús nac men ne rtiche grëse zhgab, grëse guielxtseeb, me cuee to lo grëse zhizhgab to, lo grëse guielxtseeb gzataa dze. Me gacniṅ to grëse to.

¹⁷ Naa gon nac Pabl, naazhal pquia bdiuzh rii rxel naa lo to; naazhal pquia lë naa nu. Golgan ganle lëe xletr naa nu.

¹⁸ Jesús men ndzon ne rnabey ne, me gacniṅ to, me glu lo to ganle pa lotaa noxco me to.

Pabl

GUTS NE GLO PXEEL PABL LO TIMOTÉ

¡Diuzh Timoté!

¹ Naa nac Pabl, tib zha ne pxeel Jesús nonee Xtiidz Ndzon me lo miech. Ible Dios men ne psilaa ne lo dol, ni Jesús men ne rnalo ne, me bnabey quiayun naa dziin rii.

² Laa naa rxel guts rii lo luu, rzaac naa luu zig tib xpëed naa ne squi dib zdo luu riladz luu Jesús. Dios men ne nac Pxoze ne, ni Jesús men ndzon ne rnabey ne, me yquia zdo luu, me tsoxco grè zhizhgab luu zeena peet tsienied guic luu. Min co racladz naa, ni min co rnab naa lo Dios.

³ Zigne psoque naa diidz lo luu len dze ne laa naa za nêz xtan zha Macedon ga, laa luu biaan Efes i; scagaa niina laaw rneque naa lo luu stib: Sca no luu i, bnee lo bla zha ne squi no i, cseetraade zho miech grè zhiwseed zho, sac ncuane paat rquiinda.

⁴ Bnee lo zho, csaan zho grè cuent gox qui, zhale noyun nroobraa goon dien zharaa, peraa been grè xmengol ne. Ncuane paat rquiind ga, loxaque runctidiidza miech; mazd lo lal ne nodiidiidz zho, tsoxco zho cseed zho miech ganle pe nactaa grè guie nzaac ne rgaa grè zha ne rquiabladz dib zdo riladz Jesús.

⁵ Laa naa rso diidz rii lo luu, sac racladz naa guiaan mbe zdo grèse miech qui, guiaan mbe xquie rien zho ni dib zdo zho giladz zho Dios; zeena scagaa grieelo gleynie zho samiech zho.

⁶ Sac gon, no bla zha ne quisaanle Xtiidz Ndzon Jesús mine nac diidzli, lel lo grè cuent ncuane paat rquiind co no zho.

⁷ Racladz zho zha cseed miech zha nac xley Dios, ni niicle zha riend zha naca; zeene rseed zho miech ni zha riendaque dien pe rnee zho.

⁸ Ndionle ne ganle nli wen ley ne psan Dios, per tel niaca mine yquiin miecha zigne psan me yquina.

⁹⁻¹⁰ Golguien ganle, biaan ley par gnabeya grè miech ne nole xnêz Dios, sinque laaw biaan par gnabeya grè:

zha ne racndaan lo Dios,

zha ne rond xtiidz Dios,

zha ntseeb,

zha ngoopdol,

zha ne rzacdraa ne men nroob nac Dios,

zha ne rguitnie lè Dios,

zha ne rut pxoz,

zha ne rut xniaa,

zha ne rut samiech,

zha ne rionie zha ne led tsieeld,

zha ne nac mrzazh,

zha ne rban samiech rieta zho zho stib nêz,

zha ne rquidie,

zha ne rzeet lè Dios par giladz miech xtiidz zho, ni nanpaa zho led diidzlid rnee zho.

Par grè zha rii nagon biaan ley; grè zha ne mband zigne nac Xtiidz Ndzon Dios;

¹¹ wseed ne rlu ganle zha laa miech lo dol. Ni lèe wseed co gon pso Dios naa none naa lo miech.

Pquia zdoos Dios Pabl

¹² Rded naa xquizh lo Jesús men ndzon ne rnabey ne, porne bzooblo me naa gun naa xtsiin me, ni noyacnien me naa ne laaw quiayun naa.

¹³ Ne nligaa rded naa xquizh lo me, sac glo ntseeb goc naa, bneenē naa me, ptsidil naa grē zha ne no xnēz me, ntseeb goc naa lo zho. Ni niicle ne scataa nac grē ncuaañe ben naa, per pquia zdoos me naa; sac len dze co gard gliladz naa cho nac Jesús, lega lo xquieln xen naa ga sca ben naa.

¹⁴ ¡Pa lotaa pquia zdoos Dios naa! Ga blu me ganle zha noxcotaa me naa, pxobnia me guic naa bliladz naa cho nac Jesús, ni zig nac niina dib zdoos naa leynie naa me.

¹⁵ Mine rne naa nu niina, diidzliw, ni racladz naa grēse miech gliladz zho ganle, ible laa Jesús biaad lo guidzliu, biaadsilaa me grēse miech lo xtol zho; ni naapaa gon goc tib zha ne mazdraa ngoopdol.

¹⁶ Gacxe waa pquia zdoos Dios naa, niicle ne scataa miech ngoopdol naa per psilaa Jesús naa. Ga blu ganle pa lotaa paciens ne rap me; ni ga gwi grēraa miech ganle, zha ne gliladz me, zgaa zho tib guielmban ne gdziñd dze lozh.

¹⁷ ¡Tibaque sca golgotsaa dziuunnon ne me, golgotsaa gnee ne grē diidz ndzon lo me, zigtaa niinaw zigtagaa len grēraa izdoos ne ziaada! Sac gon, me nac men nroob ne rnabey, men ne gdziñd dze ne nitlo. Sca rieguiala.

¹⁸ Timoté, xin, laa naa rso diidz lo luu gon: Tibaque dziits bzo, ib guiaand zdoos luu; psoladz ganle scaque nac diidz ne bnee grē zha bets ne zeene psiaab Dios guic zho bzeet zho pe nac grē mine pso Dios luu gun luu.

¹⁹ Bien tibaque dib zdoos luu bliladz Jesús, ib gund luu ncuaañe nan luu ndzinlid, zeena ine mbe xquielrien luu; sac gon no zha ne niicle rienpaa zho pa min nac ncuaañe ndzinlid, ni laa zho runa. ¡Mincoxe waa, grē zha ne sca nac, rsaanga zho mine bliladz zho!

²⁰ Zig nac Himené grop Lejandr, sca been zho; per laa zho bzonēzle naa sca tsie zho xnēz mendox telne sca racladz zho; zeena guien zho ganle nodne gneenē zho Dios.

2

Gac-wnab lo Dios por grē miech

¹ Laa naa rso diidz lo to: Golguien none gnab to lo Dios por grēse miech ne ndxie lo guidzliu, golnab lo me gunlay me zho, gacniēn me zho; ni goldeed xquizh lo me por grētaa ncuaañe run me.

² None gnab to lo me gacniēn me grēse zha ne nac wxtis, grēse zha ne rnabey, gdeed me guielbiini lo zho zaacse gun zho guielwxtis, zaacse gnabey zho; zeena tibliladz cue miech, ine gban ne zigne racladz me, sin choot peet glisquid lo ne.

³ Sca nagon nonguiel dziuun ne, ni scagaa rdziladz Dios, men ne pxeel Jesús biaadsilaa grēse miech lo dol;

⁴ men ne racladz grēse miech sēeb xnēz Jesús, gacnan zho mine nac diidzli.

⁵ Guien zho ganle ne tibaque Dios no, ni tibaque men ne zac gdziñnie grēse miech lo me: lēē men co nac Jesús, men ne goc miech biaad lo guidzliu;

⁶ sac gon Jesús nac men ne bdeed xquielmban, beet zho me, bdiizh me xtol miech. Min rii nagon racladz Dios gacnan miech len dze rii.

⁷ Ni laa me pxeel naa none naaw lo grēse zha ne nacd zha Israel, noseed naa zho grēse mine nac diidzli, zeena guien zho dib zdoos zho gliladz zho Dios. (Mine rne naa nu diidzliw, rquidieed naa.)

⁸ Laa naa racladz sca, zaatne notaa zha ne dib zdoon riladz Dios, grëse zha bguì none gzodiidznìe zho Dios. Ni zeene gzodiidznìe zho me, none ine mbe zdoon zho, choot lo zha rlëed zho, choot zha nodilnied zho.

⁹ Laa grë men wnaa, racladz naa tsoxco zho zaacse gacwxab zho, niowse, tibliladzse gac zho. Sac grë men wnaa ne riladz Dios, par gluniow zho rquind ne goon dien paraa xixcuuaa guitsguic zho, dien pe quie rbebni, pe or gac xnìl zho, gac zhibguiaa zho, pe lar niazh ne gacwgaagaa zho.

¹⁰ Par gluniow zho, rquind zaacse gbannie zho samiech zho, zig none gban zha ne nole xnëz Dios.

¹¹ Zig nac len yadoo, none tibliladzse gac zho, dzese sob zho yquiaadiag zho tel pe nac wseed ne noyac;

¹² gnedzd naa diidz ne zha so cseed miech, o zhagaa gnabey lo mguì. None dzese sob zho,

¹³ sac gon zeene psan Dios miech lo guidzliu, glose bzaa me Adán, dzigoraagaa bzaa me Ev.

¹⁴ Ni stiba, pquidied mendox Adán, sinque laa ma güeyquidie Ev; ni porne bliladz Ev xtiidz ma, ga bdiits Ev xtiidz Dios.

¹⁵ Per silaa Dios wnaa lo xtol zho, telne dib zdoon zho gliladz zho me, tsoxco zho gban zho zigne racladz me, guien zho gun zho mine rieguaal wnaa, gap zho xpëed zho ni cchoob zho win.

3

Zha ne so lo grë zha ne ngab xnëz Dios

¹ Zha ne racladz so gnabey zho lo grë zha ne no xnëz Dios, tib dziin wen ga rquiaabladz zho gun zho. Sca zëeb diidz rnee miech; ni nligaaw.

²⁻⁴ Per ga nagon rquind:

tib zha ne zaacse mban,

zha ne mbannie loxaque wnaa ne nacse tsiel zho,

zha ne tibliladz,

zha ne nixbiini, rien pe run,

zha ne mbe lo, choot lega gzhidznied zho,

zha ne ine nley rac, rbëzlo zho miech lidz zho;

zha ne rien zha rseed miech,

zha ne rquid lo nziu,

zha ne rleynied dil,

zha ne wen zdoon,

zha ne zaacse mbannie samiech,

zha ne rzonald dimi,

zha ne zaacse mban lidz,

zha ne rrieelo rnabey lidz, rnabey xpëed,

zha ne nguzobdiidz nac xpëed, rbeed mëed xquielto zho.

⁵ Sac tel zha ne rrieelod gnabey lidz, gnabey xpëed; ¿pe lel ne so zho gnabey zho lo grë zha ne no xnëz Dios dzigo grieelo zho?

⁶ Niicle tib zha ne griinpaap psilo bliladz Xtiidz Dios grieelod gac zho dziin co; sac nend lëëque lëë zho gunnon zho, lozh ga lëëque zha yguib guiabdee zho. Golsoladz ganle zha bzhaac mendox.

⁷ Ni ye rquind tib zha ne zëeb xtiidz ne miech ndzinli nac zho, haxta lo zha ne nod xnëz Dios; zeena tsod lega pe glisqui miech lo zho, sca gleyd mendox gac mine racladz ma.

Zha ne gun yudar len yadoo

⁸⁻¹² Scaquegaa zha ne so gun xyudar zha ne gnabey ga, ga rquind: tib zha ne zaacse mban,

zha ne rnee niapse diidzli,
 zha ne rleynied guie_lgonziu,
 zha ne ziena_ld dimi,
 zha ne dib zdoo r_liladz grëse mi_ne zhobnee lo Xtiidz Dios (mi_ne r_liladz ne,
 mi_ne nac diidzli),
 zha ne mbe lo,
 zha ne mbannie wnaa ne nacse tsieel zho,
 zha ne rrieelo rnabey lidz,
 zha ne rrieelo rnabey xpëed.

Ni stiba, antes ne so zho none glugazh zho dien pe nli zrieelo gu_n zho dziin co. Zig nac tsieel zhow, none gac me:

tib wnaa ne zaacse mban,
 wnaa ne rleynied diidzguizh,
 wnaa ne rleynied nziu,
 wnaa ne rquidied.

¹³ Sac zha ne zaacse gu_n dziin co, zia_nnziuraa zho lo grë zha ne ngab lo Dios, ni scagaa i_ne mbe lo zho haxta no ro zho gnee zho lo miech zha nac ne laa zho r_liladz Jesús.

Mi_ne r_liladz zha ne ngab lo Dios

¹⁴ Ib laa guic naa no guia_lniob naa i, guia_lgan naa luu; per laa naa rxel_l diidz rii lo luu,

¹⁵ ze_na tel_ne grieelod guia_lniob naa, per laa luu nan_le nagan_le cho gzo luu yquiaanap grëraa zha ne ngab xnëz Dios nguiamban; zha ne ru_nbey mi_ne nac diidzli, ni rlu zho gan_le ne nli diidzliw.

¹⁶ Ne nligaa nroobdo nac wseed ne ziaad lo Xtiidz Dios, mi_ne r_liladz ne, ngan_l guie_n miech zha naca. Nu raquiet mi_ne be_ne me:

Goc Jesús miech biaad me lo guidzliu,
 ni blu Espíritu Sant gan_le ne nli Xpëed_paa Dios nac me;
 ni gon_l grë anj_l me.

Brieets bliaa_l Xtiidz me grë guiedz,
 ndaldoo miech ne bliladz gan_le cho nac me,
 blozh ga biire zey me lo guie_lndzon ne no me gbaa.

4

Zha ne rsaan Xtiidz Dios

¹ Ib laa Espíritu Sant rneele ne le_n dze ne ziaadyob guiaad Jesús stib, ndal grë zha ne r_liladzle Xtiidz me, laa zho csaana laa zho tsien_l grë mi_ne rnee zha ne rquidie, grë mi_ne nac zhiwseed me_ndox.

² Grë zha ne guiaadnie wseed co, ni lalnu yquiad zdoo zho ze_ne laa zho yquidie miech.

³ Haxta stsidil_l zho ctsieel_nia miech, znabey zho ycuee ncuaa_ne gow miech; zig nac ze_ne led Diosd psan_l ctsieel_nia miech, zig nac ze_ne led med psan_l grë ncuaa_ne gow zho. Me psan_la grësew, ze_na grëse zha ne ngab xnëz me (zha ne beenbey diidzli), ze_ne laa zho yquiina gdeed zho xquizh lo me.

⁴ Sac grëse ncuaa_ne psan_l Dios, wena; zig nac grë ncuaa_ne rac wagw, peet nacda yquiin new, totsaque gdeed ne xquizh lo me ze_ne laa ne yquiina,

⁵ ni gnab ne gun_lay mew; sac ze_ne rdeed ne xquizh lo me ni rnab ne gun_lay mew, rsa_nmbe mew.

None gu_n Timoté xtsiin Jesús

⁶ Zeene cseed luu grē zha bets ne, zha bzian ne i, pseed zho grē miñe rne naa lo luu nu, tibaque miñe nac zhiwseed Dios güeyna; sac sca no guñ zha ne squi zo quianap grē zha ne ngab lo Dios.

⁷ Ib yquiaadiagd luu grē cuent gox, grē cuent nxen ne paat rquiind; sinque Xtiidz Dios bioxco, miñ co blonnie guic luu.

⁸ Gzoob ne zha ne rguit, wguit ne run zho, nli rquiina lo zho par gac macis xcuerp zho; per zig nac Xtiidz Dios, mazdraa rquiin dzioxcoco new; sac miñcosi squiina lo ne zigtaa lo guielmban riw, zigtagaa lo guielmban ne naraa dzian new.

⁹ Ne nligaa sca rieguial guñ miech, ni grēse zho none tsoxco zhow!

¹⁰ Ni gacxe waa, laa ne quia dien zha gliladz zhow, niicle ne nroob grē guielnē ne quiazian ne; sac ible Dios nac men ne rnalo ne, men nguiamban ne rsilaa grēse miech lo dol; sac grēse zha ne dib zdoo riladz me, rsilaa me zho.

¹¹ Bioxco sca pseed zho grē miñe rne naa lo luu nu, ni bnee lo zho guñ zhow.

¹² Nli lēē tib zha nguiegse nac luu, per blu lo zho ganle zha none gban zho; Zeene gnee luu, niowse bguib diidz ne gnee luu, zaacse goc, ine bleynie samiech luu, tibaque dib zdoo luu bliladz Xtiidz Dios, ine ndzinli wban; zeena gan zho ganle niicle ne zha nguieg luu, per nixbiini luu.

¹³ Laga gal dze ne glanso naa i, bioxco blab Xtiidz Dios lo grēse zha bets ne, zha bzian ne i, bnee lo zho zha naca, bnee diidz ne conley zdoo zho; zeena ine nguieel gac zho.

¹⁴ Ib csaand luu grē guielbiini ne bneedz Dios lo luu i (guielbiini ne bгаа luu zeene psiaab me guic grē zha ne rnabey lo grē zha ne no xnēz me, pxobnia zho guic luu).

¹⁵ Grēse miñe rne naa lo luu nu, bioxcow; zeena gan grēraa miech ganle zigse zie dze laa luu quiyabiiniraa lo Xtiidz Dios.

¹⁶ Bien zaacse goc, bien miñe nac Xtiidz Dios, miñ co pseed miech, ib csaand luuw; zeena tedlaa luu lo grētaa guielnē ne no guiaad, ni scagaa haxta grē zha ne rquiaadiag wseed ne rlu luu ni rban zhow, ye zho zlaa zho lo guielnē co.

5

Men wnaa ne gutle tsiel

¹ Grē zha bguí gol ne nac bets ne i, zeene zha rxin zho, bien gactoxd luu lo zho, sinque zaacse bnee lo zho zig nac zeene lo pxoz luu nonee luu; niiclegaa zha nguiega, zaacse goc lo zho, been zho cuent zig tib bets luu.

² Scaque grē men wnaa ne nac zhagol, ndooladz bnee lo me, been cuent lo xniaa luu ga zo luu; lo grē wnaa nguiega, ndzinli goc, niowse bnee lo zho, bien ganle rrieequia tib bzian luu ga.

³⁻⁶ Grē men wnaa ne gutle tsiel, men ne nlipaa choot rapd, to none cteedlo me; totsaque nli Diosse rnalo me, dze guieel tibaque nozodiidznie me Dios. Sac no zhō mban zigne notaa guic zho, laa zho zienal loxaque grē ncuaañe gdeed guxt xcuerp zho; zha ne sca run, rrieequia gutle zho ga. Laa tel men wnaa ne scaque cteel tsiel, ni no xpēēd me, no xiag me, dzigo zha none cteedlo me; none cseed zho gan zho menlidz zho, gan zho pxoz zho, gan zho xniaa zho, sac gon pe pchoob zho. Sca nonguiela, ni scagaa rdziladz Dios.

⁷ Pso diidz rii lo grē zha ne nacgrē to i, zeena cseed zho sca gban zho, ni scagaa tsod pe nacne gneenē miech zho.

⁸ Sac zha ne tsoxcod gan zha ne nacgrē zho, ni miñe mazdraa telne niicle menlidz zho tsoxcod zho gan zho, rdzieeld dzigo guiab zho laa zho riladz Dios, haxta mazdraa nac xtol zho que tib zha ne gard gliladz me.

9-10 Ni stiba, grë men wnaa viud qui zha ne rquiabladz gun pe xtsiin Dios, bien zha ne psale tsongal iz zha co psëeb lo list. Ni wen wen gocnan telne: bionied me stib mgui zeene bii zomban tsiel me, zaacse mban me, zaacse pchoob me xpëed me, dib zdoos me rbëzlo me miech lidz me, ndooladz rac me lo grë zha ne no xnëz Jesús, run me xyudar grë zha ne no lo tib guielnë; ni run me niapse ncuane wen ne rquii lo samiech me.

11-12 Laa grë zha ne bii nguieg, ib yquiaad luu lë zho lo list co; sac nac wnaa nguieg, zeene sob guic zho ctsieelnia zho, laa zho ctsieelnia stib. Loxaque guntal zho xtol zho ga, telne glo rquiabladz zho gun zho xtsiin Dios ni lozh ga laa zho csaanaquew.

13 Ni ye nac wnaa nguieg, rdziladz zho rquianzë zho; ni telne peet dziin gund zho, racgbech zho; ni stiba, zeene sca guieud pe gun zho dzigo laa zho rzhixcuaa diidzguizh, laa zho rzëeb lo grë cuent ne rieguialdraa zho.

14 Gacxe waa, racladz naa grëse wnaa nguieg ne sca ret tsiel, mazd ctsieelnia zho stib; zeena yquiaanap zho xpëed zho, yquiaanap zho ro lidz zho. Sca yguibd zho tso grë zha ne rlëeniele Xtiidz Jesús, gneenëraa zho zha ne rliladza.

15 Sac gon, blale wnaa ne sca gut tsiel zieriee xnëz Dios, lel laa zho zienal grë mine rnabey mendox.

16 Psoładza ganle, tel cho tib zha bets ne, tib zha bzian ne i raclidz tib men wnaa ne gutle tsiel, none zha gan me, laa ne gnalo zho ne to yguib dien zha gdioon me; zeena grë ncuane runlo to i, zgaaw yquii grë men ne nlipaa guieud cho gan.

Mine rieguial zha ne zo lo zho

17 Grë zha ne zo rnabey lo grë zha ne ngab xnëz Dios, zha ne zaacse noyun dziin co, zig nac zha ne tibaque rnee Xtiidz Dios lo miech, zha ne rseedgaa miech zha naca, tel palal ncuane rcaa zho, ible rieguial ycaa zho chop lalgaw.

18 Gotsaa gwi ne ganle zha quia lo Xtiidz Dios, rneew: “Code to guie ro xma to, zeene no ma ye noguiits ma zhobxtil; jgolsaan gow ma!” Laa stib lugar rnee: “Zha ne run dziin, ib none ycaa zho mine non xtsiin zho.”

19 Bien gon Timoté, zeene guiaad zho lo luu, guiaad-zo zho tib men ne rnabey lo to, ib yquiaadiagd luu mine rnee zho, telne gzod zho chop tson zha ne gon ne nli been me mine rquiaqui zho me.

20 Telne bind me diidz, bii noyun me dol co, dzigo squi ndxie grë zha ne nacgrë to, goctox lo me; zeena sca gdzieb grëraa zho gunscad zho.

21 Zig zobwi Dios, zig zobwi Jesús grë xanj me, laa naa rso diidz lo luu, been mine rne naa lo luu nu. Gdzieebd luu, yquiad zdoos luu, bnee lo zho tel chotaa nac zho.

22 Zeene gzo luu zha ne gun xtsiin Dios, gund luu ne lega tel chotaa gzo luu; sac gon, nend lëetse zha ne rap pe tib falt gzooblo luu, dzigo laa miech guiab nanpaa luu zha nac zho ni rlisquid luuw lo zho. Ible gdeete luu diidz gun luu ncuane guntal xtol luu.

23 (Gnid naa togo ible grieelodraa guie luu vin, zac guie luu niipyeeña maase poc poc, laa ne guie luu niab nis; zeena glunëdraa zdoos luu.)

24 Sac grë zha ne no lo dol, no dol co znuse rzhobnen; nogaaw, haxta gal dze ne laa zho gacredz lo Dios, dzigora xobneña.

25 Scaquegaa zha ne run guielwen, no ncuane co znuse glu; nogaaw, niicle ne rluda niina per ible zdziin dze ne laaw glu.

6

Zha ne quiazhoo xtsiin ben

1 Grê zha bets ne, zha bzian ne, zha ne lega run xtsiin ben, none gon zho xtiidz men ne quia zho xtsiin; zeena yguibd zho gneenë miech Dios, gneenë zho Xtiidz me mine noseed ne miech.

2 Scaquegaa grê zha ne run xtsiin men ne rliladzle Xtiidz Dios, none gon zho mine rnabey me zho; led guiabd zho por bets zhow, gun zho mine racladztāa zho. Ni gale none tsienie guic zho wenraa grieequia grê dziin ne noyun zho; sac gon lo tib men ne no xnêz Dios ga, lo tib men ne rleynie zho ga yquiuin xtsiin zho.

Grêse mine none naa lo luu nu, pseed grê miech quiw, ni pso diidz lo zho gun zhow.

3 Zrieequia zha ne guiaadnie stib wseed, mine ni nacdrea Xtiidz Jesús; sac zhiwseed Jesús rlu zha gban grê zha ne no xnêz Dios.

4-5 Zha ne sca rlu stib wseed, lega:

tib miech niats ga nac zho,

ible peet riend zho,

runbeyd zho mine nac diidzli,

rdziladz zho rdidiidznie zho miech; ga rlan,

laa miech rdillsa,

laa miech rlëëlsa,

laa miech rbidzgolga; rlozh ga,

rliladzdraa zho pe rnee samiech zho.

Masaque nan zho telne sêeb zho xnêz Dios, nroob dimi ne gunlo zho.

¡Bien ib ctsieelsad luu zha co!

6 Parga nli zha ne rzëeb xnêz Dios, zeene rzac zdoo zho mine rzoladztāa Dios lo zho, tib guielnaac nroob ga rgaa zho.

7 Ni sca nonguiela, sac gon zeene rlanso ne lo guidzliu, peet rlansonied ne; ni scaquegaa zeene laa ne gbi, peet grieelod güey ne.

8 Gacxe waa, none sac zdoo ne ni gley ne totsaque gneedz Dios ncuaañe gow ne, ni ncuaañe gacwxab ne.

9 Sac grê zha ne rzoobladz xen nroob dimi, no zho rquuil mendox zho run zho ncuaañe ndzinlidraa par gdziniaa zho dimi co; rlozh ga rzhin lo xquielmban zho, haxta rnitlo zho.

10 Sac nac dimi, zeene rzoobladzdox miecha, ga rzobni ne laa zho run grê guielntseeb. Ndal zha ne ziesaan Xtiidz Dios, sac laa zho zienal dien zha xen zho nroob dimi; per rlozh ga, stib stib guielnë ne ziedzin lo zho.

Dib zdoo Timoté gliladz Timoté Dios

11 Sangue luu gon, bien ganle xnêz Dios no luu, gund luu grê ncuaañ co. Bioxco zaacse wban, tibaque bioxco gban luu zigne racladz Dios, dib zdoo luu bliladz me, bleynie me ni bleynie samiech luu, ndooladz goc lo zho, ni lalnu ib guiaand zdoo luu.

12 Bleeladz luu been grê dziin ne run zha ne dib zdoo rliladz Dios, zigne run zha ne rie lo dil, rbeeladz zho zho. Gon ganle, laa luu nole nêz ne yгаа luu guielmban ne gdzind dze lozh, ib csaand luu nêz co; sac niicle Dios ible min co bzooblo me luu. Psoladz ganle, squi ndxie miech bleero luu ne dib zdoo luu rliladz luu Xtiidz Jesús.

13 Dios (men ne rdeed xquielmban grëtaa ncuaañe no), ni Jesús (men ne ni lalnu bdziebd zeene güeyzo zho me lo Pons Pilat, bnee me cho nac me); me zobwi ganle

¹⁴ laa naa rso grë diidz rii lo luu, bioxco beena zigne no gaca. Tibaque bioxcow haxta gal dze ne gbiire guiaad Jesús, men ndzon ne rnabey ne.

¹⁵ ¡ib laa me no guiaad! Ni Dios cxeel me zeene laa dze co gdzin. Dios men nroob ne rnabey, men ne rnabey lo grëtaa zha ne nac rey, lo grëtaa zha ne rnabey.

¹⁶ Mesi ib gdzind dze guet me, lo biini ne no mew, tsod zha ne glëb gdzin ga; ni tib miech lo guidzliu rii gard gan me, ni grieelodgaa gan zho me. ¡Gacxe waa, ible me none dziuunnon ne, sac gon men non, men rnabey nac me! Min co nagon no dziuun ne.

¹⁷ Grë zha ne rapchen, bnee lo zho cseed zho gdaannied zho grë ncuane rap zho, ib gnalod zho grë ncuane co; sac gon ncuane tib rded ga. Dios none gnalo zho, ni mesi rneedz me grëtaa ncuane wen ne rquiin ne.

¹⁸ Gudz lo zho gacmbidzd zho, none gon zho grë ncuane yquiin lo samiech zho, ycad zho ncuane quianie zho, ine gon zho xyudar zha ne peet quianied.

¹⁹ Zha ne sca gon, tib guielnzaac nroob ne yгаа zho; lëë guielnzaac co gan zho len dze ne ziaadraa. ¡Ni haxta zгаа zho tib guielmban ne gdzind dze lozh!

²⁰ Timoté, laa naa rbire rso diidz lo luu nu gon: ib csaand luu dziin ne bneedz Dios lo luu i. Yquiaadiagd luu grë wseed yozh ne ziaadnie stib miech, wseed ne rneenë Xtiidz Dios, niicle ne rnee zha ne ziaadniew zha rac nac zho, per nlid ne diidzli rnee zho.

²¹ Sac gon, blale zha ne ziesaan mine nac diidzli, laa zho ziena wseed co; per riend zho lel znu rziaabnéz zho ga.

Dios men ndzon ne rnabey, me noxc luu, me gzhixcuaa lo grë zhizhgab luu. Me gacnien luu peet tsienied guic luu.

Pabl

BROP GUITS NE PXEEL PABL LO TIMOTÉ

¡Diuzh Timoté!

¹ Naa nac Pabl, tib zha ne pxeel Jesús nonee Xtiidz Ndzon me lo miech. Ible Dios bzo naa quiaseed naa miech diidz ne rdeed guielmban lo zha ne rzëeb xnëz Jesús.

² Laa naa rxeļ stib guits rii lo luu i gon xin; xin rne naa lo luu sac rzaac naa luu zig tib xpëed naa. Miņe racladz naa ni rnab naa lo Dios men ne nac Pxoze, ni lo Jesús men ndzon ne rnabey ne, yquia zdoo me luu, ni me tsoxco grë zhizhgab luu; zeena peet tsienied guic luu.

³ ¡Gzataa zeene rzodiidznie naa Dios rzet naa luu lo me, niicle guidzew, niicle guieela, tibaque rded naa xquizh lo me ni rnab naa lo me gacniņ me luu! Dib zdoo naa noxco naa zanaļ naa miņe rnabey me, zigne bioxcoque grë xmengoldoo naa güeynaļ zhow.

⁴ Zeene rsoladz naa blactaa roon luu zeene wbi naa i, zoot naa tebaa zha ganniob naa luu stib; zeena tsonley zdoo naa.

⁵ Ni rsoladz naa scataa dib zdoo luu rliladz luu Dios; lëēdaaque xnanit luu Loid, ni xnīaa luu Eunīs, ni nanpaa naa scataque dib zdoo luu rliladz luu me.

⁶ Gacxe waa, laa naa rso diidz lo luu pquīn grëse guielbiini ne bneedz Dios lo luu zeene pxobnia naa guic luu, ni bnab naa beenlay me luu. ¡Ib csaand luuw!

⁷ Sac gon, laa Dios rneedz zhiEspīritu me lo ne, parne sodziebdraa ne, parne dziaapraa ne xfuers me, gleynieraa ne samiech ne, ni tsabiinīraa ne.

⁸ Gacxe nod pe nacne gdzieeb luu, bnee lo miech ganle zha nac Xtiidz Ndzon Jesús; ni niicle gdzieebdgaa luu ne znu niogyu naa nu, loxaque ne rliladz naa me. Singue bloo zdoo luu ne ib laa luu no gan grë guielnë rii, loxaque ne quiaseed ne miech Xtiidz me, diidz ne rlu ganle zha laa zho lo dol. Ga nagon rquīn fuerz ne rneedz Dios lo ne.

⁹ Gotsaa gwi ne ganle laa me psilaa ne lo grētaa xtol ne, ni bredz me ne gban ne zigne racladz me. Ni nacda por pe guielwen ne bdziuuņ ne, sac haxta zeene gard cue guidzliu, laa me psan diidz ne laa me glu ganle pa lotaa rleynie me ne.

¹⁰ Ni niina ne laa me pxeel Jesús (men ne rsilaa miech lo dol), laa me blu ganle ne nli nquialadz me ne. Jesús nac men ne biaadtiche poder ne rap guielgut, ni biaadlu me ganle parne yгаа miech tib guielmban ne gdziind dze lozh, none gliladz zho Xtiidz Ndzon me.

¹¹ Ible miņ co nagon nacne bzo Dios naa gne naa Diidz Ndzon rii lo miech, pxeel me naa ga naa grë guiedz zaatne nodraa zha Israel, gaseed naa zho zha naca;

¹² miņcocxe waa znutaa grë ncuaane nodeed naa. Per ni lalnu ib rtoladz naa, sac wen wen nan naa cho nac men ne rliladz naa, ni nan naa mesi zrieelo yquiaanap me naa nitnëzd naa haxta gal dze ne laa me guīaad.

¹³ Biņ, güeynaļ grë miņe pseed naa luu, sac gon miņ co nac miņe rquīn. Tiblique bliladz Dios, iņe bleynie samiech luu zigne no dziuuņ ne ne nac ne zha ne no xnëz Jesús.

¹⁴ Espīritu Sant men ne nacnie ne, me yquiaanap luu, me gacniņ luu ib csaand luu zhiwseed Dios, ib csaand luu dziin ne bzo Dios luu guņ luu.

¹⁵ Nanlaxe luu ganle zha been zha Asia, grëse zho bzozit lo naa; zig nac Figel, zig nac Hermoj, mbe psaan zho naa.

¹⁶ Sangue Onesifr, rnab naa lo Dios yquia zdoo Dios me grë menlidz me, sac blactaa biadchoobladz me zdoo naa. Niicle ne znu nioogyu naa nu, per ib beend me ne ntoladz me niaadgan me naa;

¹⁷ sinque zigne blanso me lad guiedz Roma nu, pquiaguib me naa haxta bdziel naa lo me.

¹⁸ Ni zoladzaxe luu ganle, pe zhistaa been me xyudar ne zeene no ne guiedz Efés i; rnab naa lo Dios yquia zdoo Dios me gal dze ne laa grëse miech gacredz lo Dios.

2

Dziits so Timoté lo Xtiidz Dios

¹ Xin, sangue luu gon tibaque squi dziits bzo lo Xtiidz Dios, gon ganle Jesús noxco grëse zhizgab luu.

² Grëse mine gon luu pseed naa miech, scagaa niina bioxco bneew lo zha ne rgobey luu grieelo tsie tsieneew lo stib miech.

³ Ib gacmband luu zeene noyan luu grë pe guielnë, sinque bioxco been xtsiin Jesús zigne no gun luuw, masaque been cuent xmenguiib me nac luu.

⁴ Sac gon, tib zha ne nac menguiib, grieelod sëeb zho pe stib lo cuent ne nacd xtsiin menguiib, sac none nsin so zho gun zho tel pe nac mine rnee men ne rnabey zho.

⁵ Bioxco been mine rnee men ne rnabey ne, zig run zha ne rie tib lo wguit; sac zha co telne tsoxcod zho quit zho zigne nacpaa lo wguit, ycaaniad zho premio.

⁶ Been xtsiin me zigne no gaca, zig run zha ne ran; gon ganle zha ne rioxco ran, zha glopaa rquiin guielnzaac ne rac zaatne ran zho.

⁷ Mine blozh bzet naa nu, bloomiew guic luu, ni Jesús nac men ne gneedz guielbiini lo luu guien luu zha naca.

⁸ Tibaque psoladz ganle cho nac Jesús, zha brieequia me lo xtii rey David, ni zha brieeban me; zig nac naa min co rzet naa lo miech zeene rseed naa zho Xtiidz Ndzon me, par laa zho lo xtol zho.

⁹ Ni ne nonecxe naa Diidz Ndzon rii waa, gane nroob guielnë ne noyan naa; zig nac niina, laa naa ngadoo zaatne nioogyu naa nu zootne cho zha dox. Ni niicle ne znu nioogyu naa nu, sangue Xtiidz Dios led yeda nioogyu.

¹⁰ Laa naa quiaxecw mine quideedtaa naa, zeena grëse zha ne bzooblote Dios gliladz Jesús, grielo yquiaadiag zho zha laa zho lo dol, ni zha yгаа zho tib guielmban ndzon ne gdziind dze lozh.

¹¹ Ni znu gon naca:

Telne xnëzle me no ne zeene laa ne guet,
ib zgaa ne guiobannie ne me.

¹² Niicle nroob guielnë dzian ne porne riladz ne me,
scagaa ible zdziin ne zaatne gnabeynie me ne;
telne guiab ne runbeyd ne me,
scaquegaa me ziab me runbeyd me ne.

¹³ Niicle telne riaanladz ne me,
sangué me riaanladz me ne;
mine rnee me run mew, sac mesi rtsëed me xtiidz me.

Tsoxco Timoté grieequia xtsiin Timoté

¹⁴ Bien, beencsoladz grë zha bets ne i, zha bzian ne i grë min rii. Zig zobwi Dios ganle laa naa rso diidz lo luu, gudz lo zho tildiidzniedraa zho miech grë

godiidz ne paat rquiind; led ncuaaṅe ndzinlida, loxaque runḡieta guic zha ne rquiaadiaga.

¹⁵ Tibaque bioxco zaacse grieequia xtsiin Dios, miṅe noyun luu, zeena wen grieequia luu zeene laa luu gdziṅ lo me. Zigne nacse Xtiidz me, sca pseed miecha.

¹⁶ Yquiaadiagd luu grē wseed yozh, ncuaaṅe ni lalnu paat rquiind; zha ne zienal wseed co, zig zie dze laa zho rzozitraa lo Dios.

¹⁷ Lega nac zhiwseed zho zig nac grē guielguidzdox; sac tel guielguidzdoxa, znuse rded miecha ni zha ne glana ible zet zho. Zig nac Himené grop Filet, wseed co rleynie zho,

¹⁸ sac tel zha zienaldrāa zho miṅe nac diidzli; rnee zho bleebanle Dios grē menḡut. No palal zha ne riladzle Xtiidz Dios, zeene ron zho miṅ co, riendraa zho diēṅ pa miṅe gliladz zho.

¹⁹ Sangue zha ne nlipaa no xnēz Dios, tsod pe nacne griee zho xnēz me sac lole me ngab zho; zigne zhubneeque lo Xtiidz me zaatne rnee: “Runbey Dios cho nac zha ne nlipaa no xnēz me”; ni rneequew: “Grē zha ne nlipaa ngab xnēz Jesús, none csaan zho grēse guielntseeb.”

²⁰ Zaatne nac lidz tib zha ricw lēē, no grē xtsiin rotie zho miṅe niaa or, miṅe niaa plat, ni noquegaa miṅe niaa yag, miṅe niaa beṅ. Miṅe mazdraa niazḡ, miṅ co rquiin zho rio ncuaaṅe row miech; laa miṅe beelze niaa, ga rgo zho ncuaaṅe row ma.

²¹ Scaquegaa miech, zeene csaan zho grēse ncuaaṅe paat rquiind, ible squin zho lo Dios guṅ zho xtsiin me miṅe mazdraa nroob, zigne rquiin grē trast niazḡ co.

²² Nac lo guielnguieg, ndal grē ncuaaṅe ndzinlid rio guic miech ruṅ zho, sangue luu goṅ tsienied grē ncuaaṅ co guic luu, bioxco zaacse wban, dib zdoo luu bnalo Dios, iṅe bleynie grēse samiech luu, tilnied luu zho; grē zha ne squi ni mbe zdoo, rbedz zho Dios, zaacse wbannie zho.

²³ Ib yquiaadiagd luu grē godiidz ne paat rquiind, sac goṅ loxaque runctila miech.

²⁴ Zha ne squi ruṅ xtsiin Dios, nodne tso zho diēṅ pe tildiidz zho; sinque none wen gac zho lo grēse miech. None guieṅ zho zha cseed zho miech; ib guieednied zho miech,

²⁵ ndooladz gac zho gnee zho lo zha ne rlēēnie Xtiidz Dios. Ni scagaa Dios cxobnia guic grē zha co, yguudz zdoo zho csaan zho grē xquielntseeb zho, gacnaṅ zho miṅe nac diidzli;

²⁶ zeena tsaa zho biini griee zho ladznia menḡox, zaatne ngadoo zho.

3

Leṅ dze ne ziaadyob nitlo guidzliu

¹ Ni none gacnaṅ luu ganle, zeene laa dze ziaadyobpaa nitlo guidzliu, nroob nac guielnē ne gaṅ grē zha ne no xnēz Dios.

² Zrieequia grē zha ne:
gacladz tebaa lose zho yquuin grētaa ncuaaṅe no,
loxaque dimi gleynie zho,

niats gac zho,
zdaannie zho ncuaaṅe ni rapd zho,
zseenē zho Dios,
gond zho xtiidz pxoz zho, xtiidz xnīaa zho;

sacd zdoo zho miṅe guṅ miech lo zho,
laa zho gban zigne notaa guic zho, ib yquiaadiagd zho Xtiidz Dios.

³ Gacnaṅdraa zho pe nac guielwleynie, ib yquiad zdoo zho,

loxaque diidz gzhixcuaa zho,
 lëbd zho gnabey zho xcuerp zho,
 sacsı zho samiech zho,
 stsidıl zho grëse ncuaañe rquiin,

⁴ zgo zho zha ne ndzieeldiidz zho nia zha ne quın zho,

ni lalnu guiełto tsod lo zho,

loxaque dien zha gdeed guxt xcuerp zho tso zho, laa ne yguib zho xnëz Dios.

⁵ Squiaalo zho ye zho rliladz Dios, per lo grë ncuaañe guñ zho, ga glu ne rliladzd zho me.

Bien, ib ctsieelsad luu grë miech ne sca nac.

⁶ Sac lëe zha ne nacgrë zho ga, rzëeb yu rietsitnie grë wnaa yozh ne zianał ncuaañe gdeedtaa guxt xcuerp.

⁷ Tibaque no zho dieen peraa rseed zho, per ib rioguidc zho miñe nac diidzli.

⁸ Zigne been chop zha ne biıl diidz dox padzeela, Janes grop Jambres, gocndaan zho lo Moisés; scaque run zha co niina, rlëenedox zho miñe nac diidzli. Miech yozha, ndzinlidraa nac guic zho, nacd zho zha ne gliladz Xtiidz Dios;

⁹ per gadaquew xtse, zeene laa diidz guien ganle pe clas miech nac zho, dzigo lëeque grë ncuaañe yozh ne run zho cuee xquiełto zho; zigne bzhaacaque zha ne sca blëenie Moisés.

Csaand Timoté miñe pseed me

¹⁰ Sangue luu, nanle luu ganle zha nac grë miñe pseed naa luu. Wen wen nan luu ganle zha mban naa, pe no guic naa guñ naa, zha dib zdoo naa rliladz naa Dios, zha dib zdoo naa rleynie naa samiech naa, riednied naa zho.

¹¹ Nanle luu ganle zha rneedz Dios xfuers naa, rlëeb naa grëtaa miñe rted miech naa, zig been zho naa guiedz Antioquí, guiedz Icon ni Listr, blactaa pquianał zho naa; per tibaque gocnie Dios naa, psilaa me naa lo grëtaa guiełxtseeb co.

¹² Ni scagaa naca, grë zha ne rquiabladz gban zigne rnabey Jesús, ible squianał miech zho.

¹³ Per probsaxe grë zha ne sca quiayunctal xtoł, zha ne sca noquidie miech, zig zie dze laa zho noteedquie zho néz ne nitlo zho. Quiaguitnie zho miech, ni quiaguitniegaa menđox zho.

¹⁴ Sangue luu gon, csaand luu grë miñe pseed luu. Nanween luu ganle diidzliw, ni runbeygaa luu cho nac grë zha ne bneew lo luu.

¹⁵ Ni stiba, zigne ziadroob luu psilo quiaseed luu Xtiidz Dios, ni lëew bdixbiini guic luu gocnan luu ne Jesús none gliladz miech parne laa zho lo dol.

¹⁶ Dib nacse Xtiidz Dios, Espiritu Sant psiaaba guic zha ne pquiaaw, laaw biaan:

rseeda ne miñe nac diidzli,
 rsow diidz lo ne guien ne pa lo quiaxin ne,
 rseeda ne zaacse gban ne.

¹⁷ Zeena sca grëse zha ne no xnëz Dios, grielo wen wen cseed zho, ni guien zho zha guñ zho grëse dziin ne rquiin, dziin ne rieguiał zho guñ zho.

4

None gnee Timoté Xtiidz Dios

¹⁻² Zig zobwi Dios, zig zobwi Jesús men ndzon ne rnabey ne, laa naa rso diidz lo luu, bnee Xtiidz Dios lo grëse miech. (Jesús nac men guñquizh miech

grëtaa ncuuañe been zho, zigtaa zha ne mbana zigtagaa zha ne gutlew, zeene gdziñ dze ne laa me guiaad gnabey me.) Bioxco tel pa hortaa bneew lo zho, niicle zeene rzac luu riobda. Bloo guic zho gliladz zhow, bnee lo zho zeene gan luu pe falt ne noyñ zho, ni scagaa bloonley zdoo zho. Bioxco tibaque pseed zho, ib guieedniē luu zho.

³ Sac gon, zdziñ dze ne siguiēdraa miech yquiaadiag zho miñe nac diidzli; sinque laa zho yquiaguib zhaase zhaase dieñ cho cseed zho tel pe nac ncuuañe rdziladzse zho yquiaadiag zho.

⁴ Gleyniēd zho Xtiidz Dios, laa ne yquiaadiag zho miñe nac xtiidz me, lel laa zho tsoxco yquiaadiag zho grē miñe nac zhiwseed miech guidzliu.

⁵ Sangue luu gon, nsin bzo gdeete luu diidz gungüet zho luu. Zaacse been grē miñe pso Dios luu gun luu, bnee lo miech zha laa zho lo dol; niicle tel pe nactaa guieñē ne noded luu, gacmband luu.

⁶ Rien naa ziaadyoble ne laa naa gbi lo guidzliu rii, zhile gdziñ dze ne laa zho gut naa.

⁷ Len ngbidz ne wban naa, tibaque dib zdoo naa bliladz naa Dios; xtsiin mew, laaw ben naa zigne bnabey me naa, ni laaw psiaalgaa naa niina. Zigne runda grē menguib ne rie lo di, sca bleeladz naa naa ben naa xtsiin me;

⁸ laa na nagon, miñe quiambēzse naa nac premio ne no gneedz me lo naa. Lēē premio co gneedz me gal dze ne guiaad me guiaadgun me guieñwxtis; ni led loxaque naadse ygaaw, sinque grēse zha ne rleynie me, grē zha ne dib zdoo quiambēz gdziñ dze ne guiaad me stib, grēse zha co yгаа premio co.

Tsienob Timoté

⁹ Bzhiguiēl guiaadniob luu guiaadgan luu naa nu;

¹⁰ sac zig nac Demas, laa me bichele lo naa. Psañaque me naa nu laa me zie nēz Tesalónica; sac mazdraa nonie grē ncuuañe lo guidzliu rii guic me. Bay zig nac Crescent, laa me brieē zie me nēz Galás; Tit na, zieegaa nēz Dalmás; laa zho zie zaatne nacle diidz tsie zho.

¹¹⁻¹² Niicle Tic guieñd nu, sac laa me pxeñ naa zie me Efés. Loxaque Lucse biaan lo naa nu.

¹³ Psoladz gon tsieguib luu Marcw, zeene laa luu guiaad nēz rii bzhiguiēl guiaadnie luu me; sac rquiin me nu gun me xyudar naa lo xtsiin Dios.

¹⁴ Ni psoladz paa guiaadnie luu lar ne rbiix naa, miñe psan naa guiedz Troas lidz Carp; ni guiaadnie luu grē xquits naa. Ib guiaanladzd luu miñe nac grē guits nroob ga.

¹⁵ Tel gan luu ganle nzian ncuuañe nonguiēdraa been Lejandr naa, men ne nac wncadzguuib ga; per Diostaa nan zha gunquizh me Lejandr grē miñe been Lejandr ga.

¹⁶ Ni niicle luugaa gon, nsinaque bzo lo me; sac ne nlipaa rlēenie me wseed ne nolu ne lo miech nu.

¹⁷ Zeene gloopaa gocredz naa lo wxtis, choot bzēd nrieē xfavor naa, grēse zho biche lo naa; rnab naa lo Dios gunquizhd me zho miñe been zho, sca psaan zho naa.

¹⁸ Sangue men ndzon ne rnabey ne psand me naa, me pchoobladz zdoo naa, haxta bdeeda diidz bnee naa Xtiidz me lo grē zha zit rii. Sca gocniēn me naa, gun naa cuent role meedz psilaa me naa;

¹⁹ ni niicle niinagaa, nanle naa ne ib silaa me naa lo grëtaa ncuuañe racladz miech cteed zho naa, ni me yquiaanap naa haxta gal dze ne laa me gdziñnie naa zaatne rnabey me gbaa. ¡Me rieguiäl guiaanñon gzataa dze, niicle nadzew, gzheew, ni grëragaa len izdoo ne ziaada!

²⁰ Bzhiguiēl bdeed tib zhibdiuzh naa lo Aquil i grop Priscil, ni lo grē zha ne no lidz Onesifr.

²⁰ Gacnan to ganle, laa bets ne Rast biaan Corint, laa Trófimo biaan guiedz Milet, sac rzacné me.

²¹ Bioxco gon guiaadniob luu, zeena blansole luu nész rii zeene laa mée nal séeb. Pcaania zhibdiuzh Eubul, zhibdiuzh Pudent, zhibdiuzh Lin, zhibdiuzh Claud; ni gréragea zha bets ne, zha bzian ne, zha ne no nész rii, laa zho rxeel bdiuzh lo luu.

²² Jesús men ndzon ne rnabey, me gacnie luu. Dios glu lo to ganle pa lotaa noxco me to. ¡Me gunlay to grése to!

Pabl

GUILTS NE PHEEL PABL LO TIT

iDiuzh Tit!

¹ Naa nac Pabl, tib ngundziin win nac naa lo Dios, tib zha ne pheel Jesús nonee Xtiidz Ndzon me lo miech. Laa naa none xtiidz me, zeena grése miech ne bzooblote Dios, gliladz zho me, gacnañ zho zhapaa nac wseed ne zional ne (wseed ne rnee zha none gbannie miech Dios),

² wseed ne rlu ganle ible laa ne quiambiaaz ygaa ne tib guielmban ne gdzindraa dze lozh. Ansraa ne tsaa guidzliu, laa Dios bzeetle ne laa me gneedz guielmban co, ni mesi gon led yed me rquidie.

³ Ni niina ne laa dze co bdziñ, laa me blu lo ne ganle zha nac xtiidz me, mincopaa nagon bzo me naa none naa lo miech. Lée me ga nac Dios ne psilaa ne lo dol.

⁴ Laa naa rxel guits rii lo luu gon Tit. Rzaac naa luu zig tib xpëed naa, sac naa naa nli dib zdoe luu rliladz luu Dios zigne rliladz naa me.

Rnab naa lo Dios men ne nac Pxoze, ni lo Jesús men ne psilaa ne lo dol, glu me ganle pa lotaa noxco me luu, zeena peet zhgab ctseebd luu.

⁵ Rsoladzaxe luu ganle, zeene psañ naa luu lo guidzliu win ne lë Cret i, laa naa psañ luu zeena lozh gun luu grëraa dziin ne no gac i, ni psañ naa diidz lo luu zha gzo luu zha ne so gnabey lo grë zha ne rliladz Jesús, tib tib guiedz qui.

⁶ Bien sca, zeene gzo luu zha co, ga rquiin: tib zha ne zaacse mban, zeena peet glisquid miech lo zho; tibaque wnaa ne mbannie zho, men ne nacse tsieel zho, zaacse quiachooz zho xpëed zho, rliladz mëed Dios (zëëbd diidz pe guielntseeb ne noyūn mëed, o rondgaa mëed diidz).

⁷ Sac zha ne sca so lo grë zha ne no xnëz Dios, ib none gac zho tib zha ne ndzinli mban, sac gon xtsiin Dios ga gun zho. Nodne gac zho: zha nlëëguic, zha ngonziu, zha nad ron diidz, zha nguibdil, zha ne rzonal dimi.

⁸ Sinque none gac zho tib zha ne: ndzinli nac guic, ine niowse rdeed zho zaatne rbëz miech ne rdzintaa lidz zho, rioxco zho run zho niapse ncuane rquin lo samiech zho, zional zho gac niapse mine nac diidzli, rioxco zho run zho niapse mine rnabey Dios, rrieelo zho rnabey zho guic zho, rnabey zho xcuerp zho.

⁹ Ni none tibaque tsienal zho mine nac Xtiidz Jesús, mine pseed zho; zeena guien zho zha gnee zhow lo grë zha ne gard tsoguic zha naca, ni grieelo zho glu zho lo grë zha ne rlëënie Xtiidz Jesús, guien zha co nonguielda ga glëënie zhow.

¹⁰ Sac no ndal grë zha ne nëd gon Xtiidz Jesús niina, ncuane paat rquiind rseed zho miech, rquidie zho; ni lëëpaa zha ne sca run nac zha Israel.

¹¹ Gacxe waa, ib none guioog ro zho; sac gon par cueexlëse zho dimi no zho noseed zho miech grë ncuane paat rquiind; zaatne no tib yu miech, grëse zho rquidie zho.

Bien sca gon nsin bzo lo grë zha Cret i. Sac gon,

¹² tib menladz aque zho, tib men rac lo zho bzeet ganle zha nac zho zeene znu bnee me: "Nandraaque zha Cret, loxaque noquidielsa zho samiech zho. Masaque mban zho zigne mban grè ma ntseeb ne no guix; loxaque gowse zho zienie guic zho, rbech zho guñ zho dziin."

¹³ Ni nligaa sca nac zho. Gacxe waa, bien gdziguiend luu grè miñe ruñ zho, goctox lo zho zeena sodziits zho lo Xtiidz Ndzon Jesús miñe no gliladz zho.

¹⁴ Bnee lo zho yquiaadiagdraa zho beelze pe grè godiidz ne rbeebey zha Israel, ni niicle yquiaadiagdga zho grè miñe rnabey zha ne rlèenie Xtiidz Ndzon Jesús.

¹⁵ Golgan ganle, grè miech ne ndzinli nac guic, zha ne mbe xquielrien, ncuaane notaa, mbe naca lo zho; sangue zha ne riladzd Xtiidz Dios, zha ne ndzinlid nac guic, tsod tib ncuaane mbe glulo lo zho; sac desde zdoo zho, desde xquielrien zho mbed.

¹⁶ Rnee zho runbey zho Dios, per rlu nlida sac ndzinlid mban zho. Zha yozha, xquielndaan yozh zho zienie zho, led zha ne guiabd ne guñ ncuaane yquiina.

2

Znu nac Xtiidz Ndzon Jesús

¹ Sangue luu guñ, none gnee luu lo grè miech qui zigne nace Xtiidz Jesús.

² Grè men bgui ne nac zha gol lo to i, bnee lo zho:

tibiladz gac zho,

gund zho ncuaane cuee xquielto zho,

quix zho biini, ncuaane ndzinli tsienal zho guñ zho;

tiblique gac zho lo Xtiidz Jesús,

gleynie zho samiech zho, ni

dziits so zho tel pe nactaa grè guielnè ne noyan zho.

³ Scaquegaa grè men wnaa ne nac zhagol, bnee lo zho:

gban zho zigne no gban zha ne nole xnèz Dios,

gzhixcuaad zho diidzguizh,

gzuzd zho.

None zaacse gac zho,

⁴ zeena zha glu lo grè wnaa nguieg zha gban zho. Cseed zho grè wnaa nguieg:

gan zho tsieel zho,

gan zho xpèed zho,

⁵ gac zho tib wnaa nix biini,

quitnied zho tsieel zho;

zaacse guñ zho xtsiin zho,

niowse gac zho, niowse gnee zho,

gon zho xtiidz tsieel zho; zeena tsod pe nacte gneenè miech Xtiidz Dios.

⁶ Ni scaquegaa bnee lo grè zha bgui nguieg, gac zha nix biini.

⁷ Luuzhal zaacse been grèse ncuaane no guñ luu, zeena ga gwi zho ganle zha none gban zho. Zeene cseed luu zho, ine tibiladz goc, guñ luu ne quitnie luu zho.

⁸ Bguib diidz ne gnee luu, zeena choot peet glisquid lo luu; ni scagaa, grè zha ne rlèenie Xtiidz Jesús, stoladz zho zeene gan zho guieñd pe glisqui zho lo ne.

⁹ Grè zha ne lega ruñ xtsiin ben, pso diidz lo zho gon zho xtiidz men ne quia zho xtsiin, niowse gac zho, niowse gnee zho, yquiabrod zho lo me.

¹⁰ Ib cuand zho, sinque ine ti miech mbe lo gac zho; zeena ga gan miech ganle zha niowtaa nac lo xquielmban zha ne zienal Xtiidz Dios, men ne psilaa ne lo dol.

¹¹ Grè diidz rii nagon pso lo zho. Gotsaa gwi ne ganle zha noxcotaa Dios miech, gacxe psilaa me ne lo dol waa;

¹² sac laa me racladz csaan ne grèse guielntseeb, csaan ne grëtaa ncuuaane rleynie zha ne nod xnëz me, guien ne ndzinli gban ne, tibaque gwi ne dien pa min wen, pa mingaa wend, ine dzioxcu ne gban ne zigne racladz me.

¹³ Sca none gban ne, haxta dzianlo ne gdziñ dze ne laa Jesús guiaad stib, zigne psanle Dios diidz; gal dze co, laa me guiaad con grè xquielndzon me. Me nac Dios ro ne rliladz ne, me psilaa ne lo dol.

¹⁴ Sac gon, me bgaadz guielgut ne niogual ne, me bdiizh grëtaa guielntseeb ne bdziuun ne, psanmbe me ne lo grëtaa ncuuaane bdziuun ne; gane niina, lo me ngab ne, ni none dzioxcu ne gban ne zigne rnabey me.

¹⁵ Grè min rii nagon pseed grè miech qui, bnee lo zho gban zhow. Zeene riegala gdzieebd luu goctox lo zho, sac gon luu rieguial gnee lo zho. ¡Sca been, zeena choot quitnied luu!

3

Znu rieguial gban zha ne no xnëz Dios

¹ Beencsoladz zho ganle none gon zho mine rnee grè zha ne nac wxtis, gac zho tib zha nguzobdiidz, ni ib soliaadzd zho gun zho grè tel pe ncuuaane rquiin lo samiech zho.

² Guien zho gneenëd zho samiech zho, ine zaacse gbannie zho samiech zho, niowse gac zho, niowse gnee zho, ni zeene cho lo gnee zho none ndooladz gac zho, ndooladz gnee zho.

³ Sac gon haxta ne, ib peet riend ne glo, ntseeb goc ne, bdiits ne grè mine rnabey Dios; laa ne ziole nëz ne nitlo ne hor co, masaque bgadoo ne lo grëtaa ncuuaane racladz xcuerp ne, lo grëtaa ncuuaane ndzinlid ne bley ne bdziuun ne. Niapse guielntseeb bional ne, në rac zdoon rdzian ne ncuuaane quianie, ncuuaane run stib miech; zigtaa row rzhiih zdoon zho gon zho ne, scaque ne, zha ne rdziantaa ne, row rzhiih zdoon bdzian ne zho.

⁴ Per bdziñ dze, zeene laa Dios (men ne psilaa ne lo dol) blu ganle pa lotaa nac xquielwen me, pa lotaa nquialadz me miech,

⁵ laa me psilaa ne; per guiabd ne togo por pe ncuuaane wen ne bdziuun new, sinque porne pquia zdoon me new. Psanmbe me ne lo grëtaa xtol ne, rrieequia gol ne ga stib, ni bzhixcuua Espiritu Sant lo xquielmban ne.

⁶ Niapse por Jesús men ne psilaa ne ga, laa Dios pxeel Espiritu Sant rneedz me grèse guielbiini ne rquiin lo ne.

⁷ Por mine been Jesús ni mine been Espiritu Sant laa ne biaanwen lo Dios; ni porne noxcu me ne gane bnabey me sca goca. Gane niina, ndion ne ib zgaa ne tib guielmban ne gdziñd dze lozh, sac ib sca nac xtiidz me.

⁸ Mine rne naa lo luu nu, diidzliw. Racladz naa tibaque gnee luuw lo grè zha qui, zeena grèse zho ne nac zho zha ne rliladz Dios, tsoxcu zho gun zho niapse grè ncuuaane ndzinli; sac gon, min co nac mine nonguiel, ni mincogaa rquiin lo grèse miech.

⁹ Biche lo zha ne racladz tilidiidznie luu grè ncuuaan paat rquiind, zig nac grè godiidz dien pe been grè mengol padzeela, dien pe nonguiel tsienal ne ley, te nonguielda ye. Ncuuaane paat rquiind ga, loxaque runctila miech; ni lalnu rieguiald gaquieta.

¹⁰ Tel cho zha ne rsilo rgodil grè zha ne rliladz Dios, blisquiw lo zho. Bnee lo zho tib, tel gan luu rond zhow, bnee lo zho stib; telne rondaque zhow, dzigo bzonëz zho gan zho dien pa nëz tsie zho.

¹¹ Zha ne sca run, gase rlu ne zieniedraa guic zho gon zho mine rnabey Dios; sac nanpaa zho dol ga, ni laa zho ruña.

¹² Laa naa no cxel tib zha ne guiaad i, yase cxel naa Artem o cxeelgaa naa Tic. Zeene glanso zho i, sigiueel luu guiaad luu Nicópolis ga gdzieel ne; sac ib ga ni naa cuéz naa len mée nal ne ziaad nu.

¹³ Laga no luu i, bioxco zaatne grielotaaw been xyudar Apol grop me licenciad Zenas. Bdeed grē tel pe ncuane yquiin zho nēz; zeena peet gunfalte lo zho, grielo gdziñ zho zaatne no tsie zho.

¹⁴ Grēse zha ne nacgrē ne ne riladz ne Jesús, none cseed zho gun zho xyudar zha ne no liaadz; glu zho ganle rquiin zho, led zhléd mban zho.

¹⁵ Grēse zha ne no lo naa nu, laa zho rxeel bdiuzh lo luu i. Bzhiguiel bdeed tib zhibdiuzh no lo grēse zha ne rlynie no i; sac ye zho riladz Jesús.

Guiaanne Dios to sca dien. Peet tsienied guic to, me gacnieñ to; sac gon me noxco grēse zhizgab to.

Pabl

GUILTS NE PXEEL PABL LO FILEMÓN

¡Diuzh Filemón!

¹ Naa nac Pabl, laa naa no ladzguiib nu loxaque ne quiayun naa xtsiin Jesús; grop no Timoté laa no rquia guits rii.

Laa no rxeela lo luu gon Filemón, ne nligaa rleynie no luu squi ye luu noyun xtsiin Jesús.

² Laaw ziaad lo to i gza to bzian ne Apia, bets ne Arquip tib zha ne noyunaque dziin rii, ni gréaa zha bets, zha bzian ne rcaalsa lidz luu i.

³ Dios, men ne nac Pxoze, ni Jesús men ndzon ne rnabey, me glu ganle pa lotaa noxco me to, zeena peet zhgab ctsebdé to.

⁴ Ib riaanladz naa luu, zeene rzodiidznie naa Dios, tibaque rded naa xquizh lo me squitaa noneedz me guielbiini lo luu.

⁵ Sac ziyonle naa squitaa dib zdoo luu rliadz luu Jesús, rleynie luu me, ni scaque rleynie luu gré zha ne ngab lo me.

⁶ Rnab naa lo Dios, grése mine noseed luu gré zha ne no i, tsoguc zhow, zeena yгаа zho grése guelzaac ne rded Jesús lo gré zha ne ngab lo me.

⁷ Rley naa gon bets, sac zigtaa naa zigtagaa gréaa zha ne ngab lo Diosa, blactaa ziechoobladz luu, zigonley luu zdoo no, rlu luu ganle nli rleynie luu no.

⁸ Niicle ne rieguiala gnabey naa luu mine racladz naa gon luu, sac gon Jesús bzo naa none naa Xtiidz me,

⁹ per gnabeyd naa luu, sinque laa naa rnab lo luu yquiaadiag luu ganle zha racladz naa; sac gon ndion ne zigne rleynie naa luu, scaque luu rleynie luu naa. (Gon ganle, mengol ne nac Pabl nu nonee lo luu, laa naa nioogyu nu loxaque ne quiayun naa xtsiin Jesús.)

¹⁰ Niina gon ne laa Onésimo glanso lidz luu i stib, bzhiguiel zaacse pcaania me, gon ganle rriequia méed nac me lo naa niina, sac nu len ladzguiib nu bne naa Xtiidz Dios lo me, xquizhгаа Dios biladz mew.

¹¹ Nli glo tib zha peet xtsiind nac me lo luu, sangue niina gon, zigtaa lo luuw zigtagaa lo naaw nroob yudar ne gon me.

¹² Laa me biire ziaad lo luu i, niowse pcaania me; masaque been cuent naa i zial i.

¹³ Gocladz naa mbéz me lo naa néz rii, zeena me niun dziin lo naa nu xcuent luu, ne znu nioogyu naa nu loxaque ne noseed naa miech Xtiidz Ndzon Jesús.

¹⁴ Per gocladzd naa niunga naa mine no guic naa, ni nand naa dien pe gné luu; gane ni naa mazd telne zrieelow, per zdoo luu gala.

¹⁵ Nli laa Onésimo biche lo luu palal dze; per niina ne laa me glanso lo luu stib, léé guiaanle me lo luu i.

¹⁶ Per bien gon, sacdraa luu me niina zig tib zha ne runse xtsiin luu, gon ganle rriequia tib bets luu i, tib zha ne nziuu lo luu i nac me. Tel naa, sca rzaac naa me, gacxe waa none gleynie luu me; sac gon tel niina, led loxaque tib ngundziindse nac me lo luu, sinque ye tib bets luu nac me, sac gon ye le me ngab lo Dios.

¹⁷ Telne nlipaa rzac luu naa zig tib bets luu, porne tibaque men ne rliadz ne, nana sca been cuent naa i zial i, pcaania me zig nac zeene naa glanso lidz luu.

¹⁸ Ni tel no pe guielqui ne been me lidz luu, tel pe zëëbgaa me lo luu, lo naa bnaba.

¹⁹ Wi ganle, naazhal pquia diidz rii nu: Naa quizha. jZig nac luu, gon ganle zëëble luu lo naa, ni haxta nroobraa zëëb luu! Sac gon, naa bnee Xtiidz Dios lo luu laa luu bgaa guielmban ndzon ne gdzind dze lozh.

²⁰ Sca gon bets gaca, bzhiguiel been guielnzaac co; bloonley zdoon naa, bien ganle tibaque lo men ne ngab ne.

²¹ Laa naa pxel guits rii lo luu, sac rien naa ible zon luu mine rne naa lo luu nu, rgobey naa haxta nroobraa mine gun luu lo mine rnab naa.

²² Lëë nëzle nu rnabaque naa lo luu, siguiel luu gneedz luu lidz luu cuëz naa zeene laa naa guial i; sac rien naa ib zun Dios mine quianab to lo me, zneedz me diidz guial naa guialgan naa to.

²³ jDios guiaanne luu sca! Pcaania zhibdiuzh Epaf, men ne nioogyunie naa len ladzguiib nu loxaque ne rdziuun no xtsiin Jesús.

²⁴ Scaquegaa zla zha ne quiadziuungza no dziin, zig nac Marcw, Ristarc, Demas ni Luc, gza zho laa zho rxeej bdiuzh lo luu.

²⁵ Jesús men ne rnabey ne, me glu ganle pa lotaa noxco me luu. jMe gunlay luu!

Pabl

GUTS NE BEY LO GRË ZHA ISRAEL

¹ Padzeela, ndal vuelte bnee Dios lo grë pxozgoldoo ne, pxeel me grë zha ne biadteed xtiidz me lo zho, bnabey me grë zha co zhaase zhaase mod ne bnee zho.

² Sangue niina, Xpëedpaa me Jesús pxeel me biadnee xtiidz me lo ne. Jesús men ne bzaagrop me grëtaa ncuaane no, ni men ne bzo me gnabeya grësew.

³ Zeene baaad Jesús lo guidzliu, me blu ganle zha ndzontaa Dios, zhapaa nac Dios, sac Dios nac me; me naaz grëtaa ncuaane no, ni por xtiidz me laaw quiaayun dziin. Ni zeene blozh bdiizh me xto| ne, dzigo laa me biire zey gbaa bzob me cue Dios, zaatne rieguial me ne nac me men ne rnabey.

⁴ Ga rlu ganle men nroob nac Jesús, led lega lëd me Xpëed Dios; men nroob nac me lo grë anjl.

⁵ Ni tib lo anjl bneed Dios zigne bnee me lo Jesús, zeene rëb me: “Xpëed naa nac luu. Desde nadze laa zho gunbey ne Xpëed naa nac luu.” Stib vuelte zeene bzeet me Jesús, rëb me: “Xpëed naa nac me, naa nac Pxoze me.”

⁶ Ni zeene baaad Jesús lo guidzliu; men ne nac Xpëedpaa me ga, rëb me: “Grëse xanj| naa, none yquitsgzhib zho lo me.”

⁷ Zaatne raquiet anjl, rneew:
Tib mandadse nac zho lo Dios,
pale zigne rzhoon me sca rzhoon zho rie zho zaatne rnabey me zho;
me rnabey rlu zho zigne rlu bel.

⁸ Sangue zaatne raquiet Xpëed me, rneew:
Dios, luu nac men ne zobnabey,
ni gdziñd dze ne griece luu;
zeene run luu guielwxtis, zigne rieguiala sca run luuw.

⁹ Ni palal rdziguiend luu grë guielntseeb,
niapse ncuaane ndzinli, ncuaane nonguiel, min co rleynie luu;
min co gane bzooblo Dios luu, nac luu men ne rnabey,
luu nac men ne mazdraa nroob guielbley bgaa.

¹⁰ Laa stib lugar rnee:
Men rnabey nac luu, luu bzaa guidzliu, luu bzaa gbaa dib nacsew.
¹¹ Nli dzin dze nitlo grë ncuaan co, grësew zlozha zigne riozh grë lar,
¹² dzigo laa luu ctibëda, zig rdibëd grë lar, laa luu cuee stib min cub; zigne run zha ne rtsëëxab.

Sangue luu, tibaque nac luu,
nacd luu men ne nitlo, nacd luu men ne lozh xquielmban.

¹³ Haxta rëb Dios lo me:
Cue naa nëz derech, nu bzob,
nieeda lozh gnaz naa zha ne riëe lo luu, csan naa zho ladznia luu.
Nligaa men nroob nac me lo grë anjl, sac ni tib lo anjl bneescad Dios.
¹⁴ Lo me ga sca bnee Dios, sac gon grë anjl, mese nac zho run zho dziin lo Dios, rxeel me zho rquianap zho zha ne nacle diidz laa lo grëtaa guielnë ne csiaab me.

2

¹ Gacxe nagon waa, gotsaa guien ne ganle ib none dzioxco ne wen wen gwi ne zha nac Xtiidz Ndzon Jesús mine zidzion ne; zeena gnitnëzd ne.

² Sac gon, niicle zeene xanjlse Dios biadteed xtiidz me lo miech padzeela, ni gocnona; grëse zha ne güeynalda, pteed Dios zho caxtigw ne rieguial zho.

³ ¿Pe lelgue niina dzigo ne Jesús zhal biadnee zha laa ne lo dol? ¿Zha dien tedlaa ne lo caxtigw, telne dzioxcd ne mine rnee me? Nli zha ne binlew zha co biadnew lo ne, per me nac men ne psilo bneew;

⁴ niicle Diosgaa, blactaa grë ncuaañe quialu me, blactaa grë milagr ne run me, rlu me ganle ne nli diidzli biadseed zho ne; ni zhaagaa grë guielbiini ne ral zdoo me rdeed Espiritu Sant lo grë zha ne dib zdoo rnalo Jesús.

Jesús nac men ne grieelo gdziñnie miech lo Dios

⁵ Zig nac lo guidzliu cub ne ndion ne naraa gneedz Dios, psañd me ne anjl gnabay low.

⁶ Lo Xtiidz me zhobnee ganle zeene znu rëb David lo me:

¿Cho nac miech ne squitaa noxco luu zho?

Zig nac tib men qui, ¿pe nacne squitaa runnon luu me?

⁷ Tib blase dze psañwin luu me palal lo grë anjl; na laa luu psanglaa me stib, beennon luu me, bzo luu me mele gnabay.

⁸ Grëtaa ncuaañe no, laa luu psaña lадznia me.

Nli gard gac grë mine bnee David ga,

⁹ per ndionle ne ganle zha psañwin Dios Jesús lo grë anjl tib bla dze, ni blozh ga zeene laa me gut xcuent ne grëse ne, hor co laa Dios biire psanglaa me, laa Dios biire beennon me. Ni nligaa noxco Dios miech, nquialadz me ne, gane bdeed me diidz gut Jesús psilaa me ne lo grëse xtol ne.

¹⁰ Ible sca gocladz Dios, men nroob ne bzaa grëtaa ncuaañe no, ible me bdeed diidz scataa grë guielñe ne gon Jesús; gane niina, Jesússe nac men ne grieelo ner lo grëtaa miech guizhiu ne no ygab lo me, gdziñnie Jesús zho lo guielndzon ne no me.

¹¹ Grëse ne ne nac ne zha ne psañmbe Jesús ngab ne lo Dios, yele ne nac meëd lo Dios. Gacxe waa, rley Jesús rnee me bets me nac ne;

¹² no tib lugar lo Xtiidz Dios zaatne raquiet zeene znu rëb me:

Zne naa lo grë bets naa, gacnañ zho ganle cho nac luu;

ni zeene ycaalsa zho grë zho, tipse dzioolnie no luu.

¹³ Stib vult rëb me:

Dios nac men ne rnalo naa.

Ni rëb me:

Laa naa nu, quiayacnie naa grë zha ne nac xpëed Dios.

¹⁴ Min co gane, zigne znu nac ne miech, scaque Jesús goc me miech zigne nac ne. Sca bdeeda diidz gut me, ni zeene gut me, ga psañwin me mendox, sac glo masaque lадznia ma no miech par gnitlo ma zho.

¹⁵ Sca psilaa me grë miech ne ngadoo lo guielgut; rrieequia ngadoo zho, sac tibaque nonie xtseb guielgut guic zho.

¹⁶ Ni wen wen ndion ne ganle, zeene baaad Jesús, baaate me par gacnie me grë anjl, sinque laa me baaad par gacnie me grë zha ne no ygab lo Dios.

¹⁷ Gacxe waa, goc me zig nac miech, zigne nac ne ne nac ne bets me; ni parne scagaa grieelo gac me pxoz nroob ne gnab lo Dios por ne. Pquia zdoo me ne, bloogon me me bdiizh me grëtaa xtol ne;

¹⁸ nroob nac grë guielñe ne bded me, pquianal mendox nquuil ma me niab me lo dol. Ni ne mezhal bded grë min co, nampaa me zha rzac zha ne nodeda, gane ible zacnieñ me zho.

3

Gunndipde to zdo to

¹ Bets, bzian, to ne nac to zha ne bredz Dios ngab to lo me; golguien cho nac Jesús, men ne pxeel me biadteed xtiidz me lo miech, men ne bzo me nac pxoz nroob ne rnalo ne niina.

² Tib men nguzobdiidz brieequia Jesús lo Dios, zigne nguzobdiidzaque brieequia Moisés zeene pquianap me grè zha Israel.

³ Per Jesús nac men ne non, sac gon lo me ngab grè miech co, laa Moisés loxaque pquianap me zho.

⁴ Zig nac zha ne rzhixcuaa tib yu, nli non zho, per mazdraa non men ne bzaa grètaa ncuaane no; ni lèe men co nac Dios.

⁵ Nli bin Moisés diidz been me xtsiin Dios, per laa me gocse zig tib ngundziin pquianap me grè zha Israel co, ni pteed me xtiidz Dios lo zho.

⁶ Sangue Jesús, Xpèed Dios nac me, ni me rnabey grèse zha ne ngab lo Dios. Ni grèse ne, ne nac ne zha ne no xnèz me, lo Dios ngab ne; totsaque ine nley gac ne dib zdo ne yquiambiaaz ne gac grè mine nacle diidz gneedz me lo ne.

⁷ Ndionle ne sca ganle, men ro nac Jesús, gacxe waa gotsaa gwi ne ganle zha raquiet lo Xtiidz Dios rnee Espiritu Sant lo ne, rnee me:

Te_lne gon to gnee me lo to nadze,

⁸ gunndipde to zdo to,

gunde to zigne been grè pxozgol to, gocntseeb zho lo Dios, zeene sca mban noded zho, no zho grè dan ngan co.

⁹ Ga raquiet ganle zeene znu rëb Dios:

Ncuaane lëbdraa guic naa been zho,

per dipse len choo iz, blactaa ncuaane gon zho ben naa.

¹⁰ Zeene gon naa scataa nac zho,

laa ne gon zho diidz tsie zho nèz ne rlu naa lo zho, le_l zhaa ncuaane run zho; nacne nli benngulëe zho guic naa.

¹¹ Lo guie_lblëe co, bdetè naa diidz ndzi_n zho zaatne nded naa ndziiladz zho.

¹² Bets, bzian, golguien sca ganle ib gunndipde to zdo to, zeena sozite to lo me ne nac me Dios nguiamban.

¹³ Gzataa dze, gol_lnee lo grè zha ne nacgrè to (nasraa laga rdeeda diidz), zeena ni tib tsien_ld grè ncuaane runctal xto_l miech, lozh ga lëew yquiaaqui gacntseeb to lo Dios.

¹⁴ Sac gon, par gdzi_n ne zaatne no Jesús, ib none tibl_lique gac ne, tibaque gnalo ne Dios zigne bnalo ne me zeene psilo bdziunbey ne me.

¹⁵ Ni nadzegazh none dzioxco ne min co. Gol_lsoladz ganle zha rnee lo Xtiidz me:

Te_lne gon to gnee me lo to nadze,

gunndipde to zdo to,

gunde to zigne been grè zha ne sca gocntseeb lo me ga.

¹⁶ Ni lèe min co gon bzhaac zha ne güeybee Moisés Egípt. Bin zho bnee Dios lo zho ni blozh ga gocntseeb zho lo me,

¹⁷ beenctal zho xto_l zho. Dipse len choo iz ne sca bio zho dan co, bieednie me zho.

¹⁸ Zeene gon me rond zho xtiidz me, nacne bnee me lo zho rëb me gdzi_nd dze ne gdzi_n zho zaatne ndeed me ndziiladz zho.

¹⁹ Ni nligaaw bdzi_nd zho, grèse zho gut dan co; sac sca beenndip zho zdo zho, ib bliladz zho min rnee me.

4

¹ Sca nagon bzaac grë miech co. Gacxe nagon waa, zig nac niina ne laa me rnee ganle laa me gneedz lugar ne gdziiladzga ne, none ndzinli gac ne, zeena ni tib choot sacd zig bzaac grë zha co.

² Sac zigne nagon nonee Dios lo ne niina dien zha gdzin ne zaatne gneedz me ga, znuque bnee me lo zho; per zhlëse bin zhow, ib bliladz zhow dib zdoo zho.

³ Sac loxaque zha ne dib zdoose riladz xtiidz Dios, zha cose zrieelo gdzin zaatne nacle diidz ga gdeed me gdziiladz zho. Mincoxe waa, zeene gon me bliladz zha co xtiidz me, bdeete me diidz ndzin zho ga.

Niaale zaatne gdziiladz zho ga, nolew zeene blozh bzaa Dios grëtaa ncuaa ne no.

⁴ Sac gon rnee lo Xtiidz me: “Xoop ngbidz bzaa me grëtaa ncuaa ne no, laa zeene gol ngbidz gadz laa me bdziiladz.”

⁵ Niaalew nagon, sinque ne gocntseeb zho lo me gane bdeete me diidz ndzin zho.

⁶ Grë zha ne glo gocnan xtiidz me ga, brielod ndzin zho; per zig nac niina, laa me bii quiambëz sëeb grëraa zha ne no sëeb.

⁷ Gacxe waa, laa me biire pso stib dze ne ygaa zho guieInzaac co. Lëë min co ga znu bzeet David, zeene rëb me: “Telne gon to gnee me lo to nadze, gunndipde to zdoo to.” Ndaldoole iz sca bzhaac grë zhagol co, dzigora znu bzeet David;

⁸ ga nagon rlu no stib lugar ne gdziiladz miech. Nacdraaw zaatne bdziinnie Josué grë zha ne biaan zeene blozh gut grë zha ne gocntseeb ga; sac telne lëele lugar co ga, nsodraa Dios stib dze ne ygaa miech guieInzaac co.

⁹ Min co nagon, ndion ne ible no stib lugar co, ni ga gdzin grëse zha ne ngab lo Dios.

¹⁰ Grëse zha ne gdzin ga, gasi laa zho gdziiladz lo grëtaa xtsiin zho, zigne bdziiladzaque Dios zeene blozh bzaa me grëtaa ncuaa ne no.

¹¹ Gacxe nana sca, golgotsaa dzioxco ne dziuun ne mine rnabey Dios, zeena gdzin ne ga; dziuun ne zigne been grë zha wladz ne sca bind xtiidz me.

¹² Sac Diosi gon, diidz ne rnee me, nona. Zeene rnee me, rien ne grëse mine nac ne. Nan me pe no guic ne, pe rza zdoo ne; niicle ncuaa ne rzac ne mazdraa ngueetsa, nan mew.

¹³ Tsod ncuaa ne tsongueets lo me. Grëse ncuaa ne rac, me rana; ni tib tib ne, lo me cuero ne grëse tel zha mban ne.

Lëë pxoz nroob ga nac Jesús

¹⁴ Per zig rne naa ga, rdziaap ne tib pxoz nroob niina, ni pxoz cosi men ne bozoquia gbaaw. Lëë me ga nac Jesús, men ne nac Xpëed Dios, me none gnalo ne; none tiblque gac ne.

¹⁵ Sac gon mesi rquia zdoo me ne, csaand me ne zeene zootle laa ne guiable lo dol, sac tel me gonle me zha nac lo guidzliu rii, gonle me grëtaa mod ne rquiil mendox ne par guncal ne xtol ne. Bzhaac me zigne rziaa caque ne niina, lëëraasi biabd me lo dol.

¹⁶ Gacxe nagon waa, ine tibliladz golgotsaa gbig ne lo Dios, ndion ne ganle ible squia zdoo me ne, ni ible zacniën me ne zeene rquinpaa ne gun me xyudar ne, sac ne nligaa noxco me ne.

5

¹ Ible Jesús nac zhipxoz nroob ne niina. Gotsaa gwi ne ganle, men ne rga rac pxoz nroob, ladaque miech rcuee me run me dziin co, ni laa me rzo rteed me xtiidz miech lo Dios. Zig nac grë gon ne rgogon miech lo Dios, xchen ma

ne rut zho par guiooglo lo xtol zho, me riesana lo pcoog; ni scaquegaa riesan me mine guiooglo lo xtol me; sac gon, miech guidzliuque nac me. Ye me rzac zigne rzac grëraa miech, gane rien me rquia zdo me grë zha ne peet riend, grë zha ne mazdraa ngoopdol.

⁴ Ni zha ne sca rac pxoz nroob, led zhald zho rzëeb zho rac zho dziin co, sinque Dioszhal rzooblo zho zigne bzooblo Dios Aarón, men ne glopaa goc pxoz nroob.

⁵ Zig nac Jesús, Dioszhal bzooblo me ne laa me nac zhipxoz nroob ne; men ne znu rëb lo me: “Xpëed naa nac luu. Desde nadze laa zho gunbey ne Xpëed naa nac luu.”

⁶ Ni rëb me:

Luu nac pxoz nroob, gdziñd dze ne gdzëe luu,
luu gac zig pxoz Melquisedec.

⁷ Zeene bii zo Jesús lo guidzliu rii, tib vuelt mban rac me zig zet me lo guielnë, haxta roon me, nguedz bnee me bnab me lo Dios csilaa Dios me lo guielgut co; scagaa Dios psilaa Dios me, sac tib men nguzobdiidz nac me.

⁸ Niicle ne Xpëed Dios nac me, per tib men nguzobdiidz goc me, maase mincopaa pquiaqui nroob guielnë ne bded me.

⁹ Ni ne sca bin me diidz been me grëse mine bnabey Dios me, gacxe waa grëse miech ne gban zigne nac xtiidz me, me gdeed tib guielmban ne gdziñdraa dze lozh lo zho;

¹⁰ ni bzo Dios me nac me pxoz nroob niina, zigne gocaque Melquisedec pxoz nroob.

Gacde to zig cho mëdyeen

¹¹ Racladz naa gneraa naa lo to nu pe run zhipxoz nroob ne, zha nac me, per ne squi rac to peet nëde to yquiaadiag to, ngañ gne naa lo to zha naca.

¹² Lo lal dze ne psilo rnalo to Jesús, haxta none tole cseed miech niina, per na gon lej rquiin to dien cho gbiire csilo cseed to stib. Rac mëdyeen to i gon, laa ne gow to ncuaañe row zha brooble lej racladz to tibaque nidz guie to.

¹³ Sac gon, mëdyeen rie nidz, ni riend win dien pe nac ncuaañe ntseeb, pegaa nac ncuaañe wen.

¹⁴ Sañgue grëloraa guielwagw, min co rquin grë zha gol, ni zha co niinile zho, rien zho pe nac ncuaañe wen, pegaa nac ncuaañe ntseeb.

6

¹ Gacxe waa, none tsoxco to gac to tib zha gol. Gunde to ne mine pseedse to glo zeene psilo bnalo to Jesús, lo min co ib grieede to. Laa to pseedle ganle: zha none csaan to guielntseeb gbig to lo Dios, zha none gnalo to Dios,

² zha cxobnia to guic stib zho, gnab to lo Dios por zha, zha nac wrobnis, zha cueeban Dios grë mengut, zha gun Dios guielwxtis ne gloozh grëtaa guielntseeb.

³ Grële min rii nan to. Laa niina telne zneedz Dios diidz, laa to cseed mine noraa gacnañ to.

⁴ Sac gon, no ncuaañe griielod gac telne gneedzd Dios diidz gaca. Zig nac zha ne squi bienle zha nac Xtiidz Ndzon Dios, bley zho gon zho gol zdo Dios psilaa me zho, bdeed Espiritu Sant guielbiini lo zho,

⁵ bien zho zha wentaa nac xtiidz me, zha grieele sëeb zho zaatne ziaadyob gdziñ zho (zeene glu Dios grë poder ne rap me),

⁶ ni lozh ga csaan zhow, tsienal zho guielntseeb stib; grieelod nose co guic zho gbiire seëb zho xnëz Dios. Ni zha ne gon sca run, rriequia noquiaa zho Jesús lo cruz ga stib, gbiire gzhidznie miech me.

⁷ Zig nac tib lë liu ne rgaa grëse nisguie ne riab, zeene rriequia grë ncuaaane ran zho low, runlay Diosa;

⁸ laa telne niapse yag guiets, niapse grë guizh guiets rroob low, paat rquiinda; ib tedsod dzidzee Diosa, ni lozh ga znabey me tseca. Scaque nagon nac miech ne runbey Xtiidz me.

⁹ Bets, bzian, laa naa rne min rii lo to, per guiabde to togo mine run to rzet naa. Tel to, rien naa brieete lo to grë guielntseeb, lole Dios ngab to niina.

¹⁰ Nanle to ganle, Diossi ncuaaane rieguial tib tib miech, min co rdeed me lo zho. Grëtaa ncuaaane noyun to niina ne rleynie to me, grë tel zha rquia zdo to been to xyudar grëraa zha ne no xnëz me, ni noyungaa tow niina; grësew ible guiaanladz mew.

¹¹ Mine rzooblaz naa, tibaque squi nguieel gac to, zeena scagaa zгаа to grë ncuaaane nacle diidz gneedz Dios lo to.

¹² Sac dzigosi guieete to, ib gbechde to; masaque laa guic to tsienie ycaania to grëtaa mine bneete me gneedz me lo ne; zigne been grë zha ne nlipaa bnalo me.

Mine rnee Dios run mew

¹³⁻¹⁴ Golsoladz ganle, zeene psan Dios xtiidz me lo Abraham been mew zigne bneese mew. Lëe hor co rëb me laa me gunlay Abraham, ni ndal gun me lo xti Abraham. Ni lëëque lë me bzeet me, par glu ne ible zun me mine bnee me.

¹⁵ Scagaa Abraham, tiblrique bliladz me ne laaw gac; lëe gdib pquiambëz me bdziñ dze co.

¹⁶ Zig nac miech, par glu ne zun zho mine rnee zho, dzigo rzeet zho lë tib men ne mazdraa non lo zho; ni deque sca run zho ga rlu ne gdzëedraa xtiidz zho.

¹⁷ Scagaa Dios, laa me bzeet lë me sac guienndraa stib men ne mazdraa non lo me. Ga blu me ne ible zun me mine bnee me ga.

¹⁸ Zeene sca rsaan Dios diidz, ni rzeet me lë me, choot grieelodraa ctsëe mine rnee me, ni niicle megaaw nacd me men ne rquidie. Gacxe waa, grëse ne ne nac ne zha ne wbig lo me, none ine nley gac ne, sac ndionpaa ne ne ible zneedz me mine psan me diidz ygaa ne.

¹⁹ Min co nagon, none tiblrique gac ne zig tib barcw ne dziits zob lo nis, sac no ncuaaane naaza len nis; ndion ne ganle, ible zdziñ ne len yadoo nroob ne zob Jesús.

²⁰ Laa me bner bdziñ me ga nonab me lo Dios por ne. Me nac pxoz nroob niina, ni gdziñdraa dze ne gdzëe me; laa me nac zig goc pxoz Melquisedec.

7

Pxoz nroob ne lë Melquisedec

¹ Nanle to ganle Melquisedec goc rey guiedz Salem, ni meque goc pxoz lo Dios ro ne zob gbaa. Golsoladz ganle, zeene znu wbirele Abraham güeygunxoon me zha ne no grë guiedz ne rleë lo me, Melquisedec goc pxoz ne güeydzieelo me, beenlay Melquisedec me.

² Dzigo lo grëse ncuaaane bla me lo grë zha co, been mew tsii lal, bdeed me tib lalgaw lo Melquisedec.

Melquisedec nac zig nacdne rnee ne “guielwxtis”, min co nac ne rnee zho me “rey ne run guielwxtis”; ni rneequo zho me “rey ne rcuëez lo dil”, sac Salem (guiedz ne goc me rey ga) nac diidz co zig nac ne rnee ne “zaatne guien dil”.

³ Ib raquiete dien cho goc pxoz me, dien cho goc xniaa me, dien cho gocgaa xmengol me; niicle raquietegaa dien zha blanso me lo guidzliu, dien pe gutgaa me. Ziaad gac me zig Xpëed Dios, men ne nac zhipxoz nroob ne, men ne gdziñd dze gdzëe.

⁴ Rlu men non goc Melquisedec; sac gon:

a) Golwi ganle, haxta pxozgol ne Abraham bdeed palal ncuaañe bla me ga, lo Melquisedec.

⁵ Nana, telne niac Melquisedec zha xtií Leví guiab ne por min co pcaa mew, sac zeene laa ley baaad rnabeya ne grëse zha Israel, tel pe nactaa ncuaañe quianie zho run zhow tsii lal rdeed zho tib lala lo zha xtií Leví, sac zha co nac pxoz; ni tibaque dii ne nac zho.

⁶ Laa Melquisedec, niicle ne led zha xtiid Leví nac me, per bnab me bdeed Abraham tib lal grë ncuaañ co lo me.

b) Me beenlay Abraham; ni laa Abraham biaanñiele diidz pe nac miñe gdeed Dios lo Abraham.

⁷ Ni ndion ne ganle men nroob nac zha ne runlay.

⁸ c) Grë pxoz ne sca rcaania gon co, rdziñ dze ne laa zho ret; sangue Melquisedec, zigne raquiet me lo Xtiidz Dios rlu ne mban me.

⁹ d) Rrieequia ye grë pxoz ne briequia lo zha xtií Leví ye zho ga bdeed gon lo Melquisedec, zeene sca bdeed Abraham gon co lo me.

¹⁰ Sac niicle ne gard gal Leví hor co, per racle Leví cuent ga, sac xpëedaque Abraham goc Leví.

¹¹ e) Grë pxoz ne briequia lo xtií Leví ga, zig nac Aarón; zha co nac zha ne blu ley lo menguedz Israel; per brieelod zho mbee zho miech lo dol, gane laa ne nxeel Dios stib pxoz ne ziaad lo xtií Aarón, mazd pxeel me tib pxoz zig pxoz Melquisedec.

¹² Zeene sca ptsëe Dios lo dii ne ziaad pxoz, hor co nacne bdzëeque grë xley pxoz.

¹³⁻¹⁴ Ndion ne ganle, Jesús men ne nac pxoz cub niina, lo xtií Judá briequia me, ni ni tib zha dii co gard gac pxoz, sac ib bzod Moisés zha dii co ne laa zho niac pxoz.

¹⁵ Ga nagon rlu ne nli grëw bdzëe. Sac gon, Jesús men ne nac pxoz niina, men ne nac zig pxoz Melquisedec,

¹⁶ nacd mew porne ziaad me lo xtií Leví, sinque porne nac me tib men ne gdziñd dze lozh xquielmban.

¹⁷ Zigne raquetaque me, zaatne rnee:

Luu nac pxoz nroob, gdziñd dze ne gdzëe luu, luu gac zig pxoz Melquisedec.

¹⁸ Gataa laa grë xley pxoz biaan tib lad, sac grëse miñe bnabey pxoz hor co run miech, paat pquiinda.

¹⁹ Ni lalnu brieelod nsañwena miech lo Dios; sangue niina, mazdraa wen zio ne, sac ndionpaa ne Jesús nac men ne csañwen ne lo Dios, sac me nac men nroob ne rnalo ne.

²⁰ Dioszhal rëb Jesús gac tib pxoz ne gdziñd dze gdzëe, ni haxta bzeet me lë me parne glu ne ctsëed me xtiidz me;

²¹ laa grëraa pxoz ne ziezo, ib beend me ne sca nzeet me lë me. Sac gon, lose Jesús znu rëb me:

Luu nac pxoz nroob, gdziñd dze ne gdzëe luu, luu gac pxoz nroob zig Melquisedec.

Naa nrew, ni naasi ctsëed naa xtidz naa.

²² Min cocxe waa ndion ne, diidz ne biaan^{ne} Dios miech ga gdzind dze ne gdzëëw; sac gon, por Jesús laaw noyac.

²³ Glo, ndaldoo zha ne goc pxoz, sac grëse zho miech nac zho, rdzind dze ne laa zho ret, zeene laa tib zho ret laa stib zho rzo.

²⁴ Sangue Jesús, led yed me griece par diend cho stib so, sac mesi gdzind dze ne guet me.

²⁵ Gacxe waa, grëse ne ne nac ne miech, zha ne gbigtaa lo me parne ycaania Dios zho, ible silaa me zho lo dol, ni lëë blaale zho ga. Tibaque laa me gnab lo Dios por zha, sac gdzind dze ne guet me.

²⁶ Jesús nac tib men ne nlipaa mbe, ni tib dol rapd me, ib rdziguiend me guie^{nt}seeb; gacxe waa, beennon Dios me, ni lëëpaa pxoz nroob co nagon rquind ne.

²⁷ Led yed me nac zigne goc grëraa pxoz nroob ne bio glo. Grë pxoz co, gzobse dze rut zho ma ne rgogon zho lo Dios, parne csan^mbe me zho lo xtol zho; ni rutaque zho ma ne riogon lo Dios parne guiaa^mbe grëraa men^guidz; sangue Jesús, tibaque vuel^t bdeed me gon co, ni mezhal goc gon co.

²⁸ Stiba, glo, zha ne rgaa rac pxoz nroob zigne rnabey ley, ye zho runctal zho xtol zho; sangue niina ne laa Dios psan stib xtiidz me, laa me bzo Jesús nac me zhipxoz nroob ne, mesi tib men mbe nac me, ni gdzind dze ne gdzëë me.

8

Jesúsle nac men ne rteed xtiidz ne

¹ Lo grë mi^{ne} quiane naa nu, mi^{ne} racladz^paa naa gacnand to nac mind rii: Jesús nac zhipxoz nroob ne, ni zaatne zob Dios, men nroob ne rnabey, ga zob me.

² Gbaa no me, ga quiayun me dziin zaatne nacpaa yadoo, Dios bzaa yadoo co, led yedraa mind co bzaa miech.

³ Ndion ne ganle, zha ne rac pxoz nroob, laa zho rzo, zeena grë ma, grëгаа ncuaa^{ne} rgogon miech, zha rdeeda lo Dios; scaqueгаа Jesús, ye me bdeed me gon lo Dios.

⁴ Tel niaca mi^{ne} bii no me lo guidzliu niina, grieelod gac me pxoz nroob, sacne nole pxoz nroob ne rdeed grë gon co lo Dios, zigne rnabey ley.

⁵ Grë dziin ne run grë zha ne rac pxoz nroob lo guidzliu rii, lega nacsew zig zhimlë grë mi^{ne} rac gbaa; yadoo ne rio zho lo guidzliu riiw, lega nacsew zig zhimlë yadoo ro ne zob gbaa. Golsoladz ganle, zeene laa Moisés gzaa yadoo, rëb Dios lo me: “Zigne gon bluse naa lo luu guic gui ga, sca none gzaa luuw.”

⁶ Gacxe waa, tel Jesús men ne nac zhipxoz nroob ne niina, mazdraa non dziin ne quiayun me; sac gon, zeene pso Dios me gac me pxoz nroob, psan Dios diidz stib zha grielo yгаа ne grë guie^{ln}zaac nroob ne gneedz Dios lo ne, ni me gunctsind ne lo Dios.

⁷ Wenraa nac diidz ne psan Dios ga, sac tel^{ne} niaca nlëb diidz ne biaan glo ga zeene rëb me zha guiaaⁿwen miech lo me, dzigo nod pe nacne mbiire nsan me stib xtiidz me.

⁸ Ni bzeetlegaa me ne laa me csan stib xtiidz me, sac grë zha ne biaan^{ne} xtiidz me glo, loxaque beenctal zho xtol zho. Mind co ga raquiet lo Xtiidz me, zaatne znu rnee:

Rnee men ndzon ne rnabey: Zdzind dze ne gbiire guiaaⁿ no diidz grë no zha Israel, ni zha Judá.

⁹ Per gacdraaw zig diidz ne biaan no grë no xmengol zho, zeene rrieequia bzheen naa nia grë zha gol co, blee naa zho lo caxtigw ne noded zho Egipt;

sac ni lalnu güeynałd zho diidz ne biaan no ga, nacne niicle naagaaw, psaanladz naa zho.

¹⁰ Zeene gdziñ dze co,

znu nac diidz ne guiaan no grë no zha Israel:

Grëse xley naa, nis nis gacnañ zhow,

zig nac zeene haxta leñ zdoo zho, leñ guic zho zho bneew.

Dzigosi laa zho gunbey naa ne naa nac xDios zho,

ni niicle naagaaw, laa naa gunbey zho ne lo naa ngab zho.

¹¹ Dzigosi yquindraa tso zho gnee zho lo menlidz zho, lo menladz zho: “None gunbey luu Dios gon.”

Sac leñ dze co, grëse zho runbeyle zho naa,

niicle zha ne mazdraa wina, niicle zha ne mazdragaa nona.

¹² Tel pe nactaa xquiełntseeb zho, zun naa zhow perdon;

gdziñdraa dze csoladz naa grë falt ne been zho lo naa.

¹³ Zeene sca bzeet me ne laa me csan stib xtiidz me, ga rlu ne rquindraa miñe biaan glo ga; sac nac grë ncuuan gox rquindraaw, laaw nole par nitlow.

9

Yadoo ne no gbaa

¹ Zeene glo biaan Dios diidz ga grë me zha Israel, hor co biaan diidz lo zho zha tsiegan zho me, ni zha tsaa yadoo ne gac zaatne tsiegan zho me.

² Dzigo bzaa zho tib yu mantiad ne goc yadoo co, groltaa leñ yu co pguiaancaan zho tib lar nroob, goc leñ yu co chop leñ. Tib leña, miñe riaan nêz ro yadoo, ga nac zaatne Nda, ga rzo tib candeler ne niaa niapse or, ni rzo tib mezh ne rbib guietxtil ne naclayle.

³ Laa stib leña, miñe riaan nêz zhits lar co, ga nac zaatne Ndadoo;

⁴ ga rzo tib yag ndiaab niapse or lada, dzigo lo co rec yaal; leen coque zhoob tib guñ scaque niapse or ndiaab lada. Leñ guñ co no grop lë quie lag ne pquia ley ne pcaania Moisés, ga no bar ne bzhen Aarón, bar ne bdzib ben ga; leen coque no tib guies win niaa niapse or, leñ guies co no palal maná, guietxtil ne bguiaan Dios grë mengol co. Lëe guñ co biaan par csoladz zho zha nac diidz ne biaan Dios zho.

⁵ Zhits guñ co zoli chop anjl ne bzaa zho, masaque rbebel grop anjl co rtsiig me xiil me rtse me zhits guñ co, zaatne rliaal xchen grë ma ne riogon lo Dios, par guiooglo lo xtol menguedz. Par gne naa zha nacraa grë ncuuan co, rneedzraaw diidz nu niina.

⁶ Sca nagon biaa yadoo co, dzigo grë zha ne rac pxoz tibaque rzëeb zho zaatne Nda ga; ga riegun zho dziin ne rnabey ley zho gun zho.

⁷ Laa stib leña, zaatne Ndadoo ga, loxaque men ne nace pxoz nroob rrieelo rzëeb ga, ni tibaque vuelt tib leñ iz rzëeb zho. Zeene rzëeb zho, rienie zho xchen ma ne rgogon zho par guiooglo lo xtol zho, ni guiooglooga lo grë xtol menguedz, dol ne biend zho been zho.

⁸ Gase na ganle rlu Espíritu Sant lo ne, gacd sëeb grëraa miech zaatne Ndadoo ga, laga bii sca chop leñ nac yadoo.

⁹ Golgotsaa gwi ne niina na ganle zha naca: Glo, niicle ne scataa riesan zho gon, scataa rut zho ma ne rgogon zho, per brielod grë ncuuan co nsanmbew zdoo zho;

¹⁰ sac hor co, laa zho güeynal grë ncuane laglaase, rio zho dien pe zac gow zho, dien pe zac guie zho, dien zha gaz zho, dien zha tsar nia zho par guiaanmbe zho. Laa zho been miñ co, sac hor co gard gacncub diidz ne biaan Dios zho ga.

¹¹ Sangue niina ne laa Jesús biaad, niina ne mele nac pxoz nroob, por me laa miech yгаа grē guielnzaac ne bneee Dios ga. Bdzin dze laa me bzēeb yadoo ro ne zob gbaa (yadoo ne mazdraa non, yadoo ne mazdraa nzhixcuaa, yadoo cosi led yeda bzaa miech),

¹² zeene bzēeb me, bzēebnied me pe xchen chiv yeen, pe xchen ngon yeen, zigne been grēraa pxoz nroob; sinque xchenpaa me bzēebnie me zaatne Ndadoo ga; tibaque vuelt bzēeb me, ni lēē psanmbele me ne lo grētaa xtol ne ga.

¹³ Nana, telne scataa pquiin zho xchen ngon yeen, xchen chiv yeen, rio zho rzēeg zho tib vac yeen rliaal xquidie co lad zha ne rap falt, par gbiche dol co guiaanmbe zho lo Dios.

¹⁴ ¿Pe lel xchen Jesús dzigo? Mazdraa gon nac xchen me, ible sanmbew ne lo grētaa ncuane paat rquiind ne bdziuun ne glo, niinasi zrieelo dziuun ne mine rnabey Dios nguimban. Sac gon, tel Jesús ni tib dol rapd me, ni Espiritu Sant bloo zdo me bdeed me me goc me tib gon mbe.

¹⁵ Gacxe waa, Jesúsle nac men ne gdzinnie ne lo Dios, niina ne laa Dios psan stib xtiidz me. Zeene gut me, ga bdiizh me grētaa xtol miech, zigtaa zha ne biaan nie diidz glo cow, zigtagaa zha ne nobedz me len dze riw; niinasi grēse zho zrieelo yгаа zho guielmban ne gdzind dze lozh ga, zigne nacle xtiidz me.

¹⁶ Gotsaa gwi ne ganle, xtiidz miech, mine rсан zho par dien zha gac grē ncuane rap zho zeene laa zho guet, laga bi mban zho grielod gacnon diidz co;

¹⁷ sinque haxta ret zho, dzigo laa diidz co racnon.

¹⁸ Scaque nagon, zeene psan Dios xtiidz me glo, gutgazh ma ne brie ren bzhiee dzigora laa diidz co psilo gocnon.

¹⁹ Golgotsaa csoladz ganle, zeene blozh bnee Moisés lo menguedz zha nac diidz ne psan Dios ga, laa xchen ngon yeen, xchen chiv yeen ndxiembēzle notsa nis; dzigo bzoob me tib lē guits mēcwxiil rna nizhnie tib guic bar, blozh ga, psēeb mew lo ren co blaal me ren co lo guits ne quia grē diidz co, ni blaal mew lad grēse miech co,

²⁰ ni rēb me lo zho: “Laa ren rii bzhiee, zeena gacnan to desde nadzetaa laa diidz ne psan Dios lo to nu csilo gacnon, none gun to mine rnabeya.”

²¹ Blozh ga, blaalque me ren co gdipse len yadoo, ni blaal mew grēse lad ncuane racdziin len yadoo.

²² Sca nagon nac ley co, grēse ncuane no guiaanmbe, ib ren rсанmbew; scaque miech, haxta rzhiee xchen ma ne riogon dzigora riooglo lo xtol zho.

²³ Mincoxe waa, sca pxiee Moisés xchen ma biaanmbe yadoo co ni grē ncuane racdziin lena (nacse yadoo co zig zhimlē yadoo gbaa); sangue yadoo gbaa, ga pquiin ren ne mazdraa non lo xchen ma, ni lēē ren co goc xchen Jesús.

²⁴ Zeene bzēeb Jesús zaatne Ndadoo güeynee me lo Dios por ne, güeyd me len yadoo ne bzaa miech, sinque len yadoo gbaa güey me; sac gon, nacse mine no lo guidzliu rii zig zhimlē mine no gbaa.

²⁵ Grē pxoz nroob, gzob iz rie zho zaatne Ndadoo rienie zho xchen ma; sangue Jesús, xchenpaa me güeynie me, ni tibaque vuelt güeylogon me me.

²⁶ Telne ye me niun zig run grēraa pxoz co, pe zhistaale vuelt na ziyet me wlal ne bre guidzliu, iper na, led yed me! Zeene laa dze bdzin, laa me biaad, xchenpaa me bzhiee, ni tibaque vuelt bzhieew psanmbew ne lo dol grēse ne ne nac ne miech.

²⁷ Zigne biaan tibaque vuelt ret miech, lozh ga zeene laa Dios gun guielwxtis, laa zho none gacredz lo me;

²⁸ scaquegaa tibaque vuilt gut Jesús bdiizh me xtoꝫ grëse miech; ni dzin ne guiaad me stib, per guiaatraa me par biire quizh me xtoꝫ miech, sinque laa me guiaadsilaa grë zha ne quiambëzlo me, zeena gand zho grëtaa guieꝫne ne csiaab Dios.

10

Tibaque vuilt goc Jesús gon

¹ Grë miñe rnabey ley ruñ pxoz, lega nacsew zig tib zhimlë grëtaa miñe been Jesús por ne. Horco niicle gzobse iz rienie grë miech co gon zigne rnabey ley, per brieloda nsanmbew zho lo dol.

² Tel niaca miñe gon cose nsanmbe zho, dzigo tibtaa vuilt ne niasan zhow lëë niaanmbele zho ga; niicle zhagaaw, nienpaa zho ne laa zho mbele.

³ Per na, gzobse iz zeene laa zho riesan gon co rsoladz zho ne bii no zho lo dol,

⁴ sac gon, grielod ne xchense ngon yeen, xchense chiv yeen guiaanmbe miech lo dol.

⁵ Mincoxe waa, zeene laa Jesús biaad lo guidzliu, pe led znu rëb me lo Dios: Grë xchen ma, grë ncuaane riaadlogon zho lo luu, racladzdraa luuw; gane bnabey luu goc naa miech, ziaꝫ naa lo guidzliu.

⁶ Grë ncuaane rzëëg zho, grë ren ne rxiee zho, par guiaanmbe zho lo dol; racladzdraa luu gan luuw.

⁷ Gane niina, laa naa ziaꝫ nu Dios, zeena gun naa miñe gnabeytaa luu; zigne zhobneelee lo Xtiiidz luu gac naa.

⁸ Gotsaa gwi ne ganle, blozhse rëb me racladzdraa Dios tso zho pe ncuaane tsielogon zho lo me, tso zho cxiee zho xchen ma, gzëëg zho ma par guiaanmbe zho (niicle ne lo ley sca rnabey gun zho);

⁹ dzigo rëb me: “Dios, laa naa ziaꝫ nu zeena gun naa miñe gnabeytaa luu.” Gase nagon rlu ptiche me diidz ne psan Dios ga glo, laa stib diidz cub ne biaanñie Dios miech ga psilo noquinn.

¹⁰ Ni nligaa been me miñe bnabey Dios, bdeed me me gut me lo cruz; ne sca nagon been me miñe bnabey Dios, ga psanmbe me ne lo dol. Tibaque vuilt sca goc me gon co, ni lëë psanmbele me ne ga.

¹¹ Grë pxoz, gzobse dze rio zho len yadoo rdziib zho grë gon ne riesan miech; blactaa iz tibaque sca nodziib zho grë gon co, per brieloda nsanmbew miech lo dol;

¹² sangue Jesús gon, tibaque vuilt bzhiee xchen me goc me gon psanmbe me miech lo dol. Laa niina, cue Dios nëz derech ga zob me,

¹³ quiambëz me gdziñ dze zeene grëse zha ne rlëë ran me, laa zho guiaanwin lo me.

¹⁴ Tibaque gon ne bdeed me ga, psanmbegazh me grëse zha ne nodzinnie me lo Dios.

¹⁵⁻¹⁶ Ni nligaa scaw, haxta Espiritu Sant, zeene blozh bzeet me zha rëb Dios guiaanñie me zha Israel diidz stib, zha nis nis gacnan zho xley Dios, zig nac zeene haxta len zdoz zho, haxta len guic zho zhobneew;

¹⁷ dzigo bzeet me zeene znu rëb Dios: “Tel pe nactaa xquieꝫntseeb zho, tel pe nactaa xtoꝫ zho, gdziñdraa dze ne csoladz naaw.”

¹⁸ Golgotsaa gwi ne sca ganle, rsoladzdraa Dios xtoꝫ ne sac laa Jesús bdiizhlew; gacxe waa, nodraa dzio ne dieñ pe gon ne gdeed ne par csanmbe me ne.

None gbig ne lo Dios

¹⁹ Bets, bzian, glo loxaque men ne nacle pxoz nroob rzëëb len yadoo zaatne Ndadoo ga; sangue niina, haxta zaatne Ndadoo len yadoo gbaa zrieelo gdziñ ne, sac xquizh xquielnzaac Jesús, bdeed me me bzhiee xchen me psanmbe me ne.

²⁰ Zeene sca gut Jesús, rrieequia tib nëz cub ga pxal me par gdziñ ne zaatne ygaa ne guielmban; lëë nëz co ga bzhial zeene sca briez lar ne quia len yadoo ga.

²¹ Ni ne me nac zhipxoz nroob ne no me yadoo gbaa,

²² niinasi zacle gdziñ ne haxta lo Dios. Nana sca, dib zdoo ne golgotsaa gbig ne lo Dios, dib zdoo ne golgotsaa gnalo ne me, benque laa me psanmbele ne lo grëtaa ncuane yozh ne rza zdoo ne, rza guic ne; rrieequia bgaz me ne tib nis mbe.

²³ Tiblique sca golgotsaa gac ne, benque ndion ne ganle ible zdziñ dze ne gac mine riladz ne; sac Dios psan diidz co, ni ndion ne rquidied me.

²⁴ Golgotsaa dzioxco ne cseedlsa ne gleynie ne zha ne nacgrë ne, ni dziuun ne ncuane yquiu lo ne grë ne.

²⁵ Dze ne nacle diidz ycaalsa ne dzioolnie ne Dios, ible none ycaalsa ne grëse ne, guionald ne mine run grë zha ne rzozit. None cso ne diidz lo grë zha ne nacgrë ne, conley ne zdoo zho dziits so zho lo mine riladz ne; xco co none dzio ne niina ne laa dze ne guiaad Jesús ziaadgaxle.

²⁶ Zha ne beenbeyle zha nac diidzli, ni lozh ga xtsiinpaagunctal zho xtol zho, zsodraa gon ne csanmbe zho lo dol co;

²⁷ lëëtaa mine tsiegual zho nac guielnëdodox ne ygaa zho zeene laa Dios gun guielwxtis; dze co laa me cxeel zho lo guidox, zaatne nitlo grëraa zha ntseeb ne gocndaan lo me.

²⁸ Gotsaa gwi ne ganle, niicxe ley ne na pcaania Moisés padzeela ga, zha ne rguiits mine rnabeya, ni tel no chop tson zha ne gon ne nliw, niicle mazdraa mban rac zho ib rdedlaad zho rut zho zho.

²⁹ Nana, ¿pe lelgue zha ne dzigo quiits mine rnabey Jesús? Mazdraa gon nac guielnë ne ygaa zho, sac noguitnie zho xchen Jesús ga, rzhidznie zho Espiritu Sant ga sca gun zho. Noguitnie zho ren co, ni lëëw bzhiee biaanmbe zho lo dol, lëëw bzhiee zeene psan Dios stib xtiidz me zha gbig miech lo me; rzhidznie zho Espiritu Sant, ni men co no zhixco zho.

³⁰ Zha ne sca gun, ible nroob guielnë ne ygaa zho; sac ndion ne ganle zha nac xDios ne, me znu rnee: “Naa raguial gun guielwxtis; naa gded mine rieguial tib tib miech.” Ni zhoabeeque lo xtiidz me: “Grëse miech, lo me cuero zho grë ncuane been zho.”

³¹ ¡Ne nligaa ncuane gdzieb ne ted grë zha ntseeb ne sca guiab ladznia Dios, men nguiamban!

³² Sangue to, golsoladz ganle zha bded to zeene griinpaap silo bnalo to Jesús, niicle ne scataa nroob guielnë ne gon to, per beenctalde to xtol to.

³³ Blactaa bdziitnie miech to, squi ndxie zha ne nowi laa zho nosacsi to; ni blactagaa gon to nosacsi zho zha ne nacgrë to.

³⁴ Grë zha ne biab ladzguuib, mbanse rac zdoo to ran to zha rac zho; niicle zeene biaad zha ne biaadla grë ncuane nacchen to, psaan to ptiche zhow, peef güeyniedaque guic to; sac nanle to mazdraa nac guielnzaac ne ygaa to gbaa, ni mincosi gdziñd dze ne nitlow.

³⁵ Nana sca, scaque dziits golso; sac telne tibaque gnalo to Dios, ible zgaa to guielnzaac ne gneedz me.

³⁶ Ible guiaand zdoo to, tibaque dziits golso golgun mine rnabey me; zeena ygaa to grë ncuane bneele me gneedz me lo to.

³⁷ Golsoladz ganle, znu zhobnee lo Xtiidz me:

Ible ile ziaad men ne nacle diidz guiaad ga, led nroobdraaw, laa me glansole.

³⁸ Grë zha ne zienal mine nac diidzli, ible zban zho sac rnalo zho naa; laa telne guiaan zdoo zho sozit zho lo naa, ni lalnu gleynied naa zho.

³⁹ Sangue ne gon, nozozite ne lo Dios, sinque dib zdoo ne rnalo ne me. Grë zha ne sca rzozit lo me, nëz ne nitlo zho ga zie zho; laa ne gon, ible zgaa ne tib guielmban ne gdziñd dze lozh, sacne znu dib zdoo ne rnalo ne me.

11

Zhapaac nac ne dib zdoo ne gnalo ne Dios

¹ Znu nac ne dib zdoo ne gnalo ne Dios. Zha ne dib zdoo rnalo Dios, tiblique zienie guic zho ne ible zgaa zho mine quiambëz zho gdeed me lo zho; niicle ncuaañe gard gan zhow, per rzac zho zig nac zeene ranle zhow.

² Zig nac grë xmengol ne, ne scacxe waa bnalo zho Dios gane bleynie me zho.

³ Scagaa niina, ne dib zdoo ne rnalo ne Dios, gane riladz ne me bzaa guidzliu ni grëragaa ncuaañe no, zeene bnabey me biaaw, niicle ne peet guiend hor co.

⁴ Gotsaa gwi ne ganle lëe bla zhagol ne dib zdoo bnalo Dios nu:

Zig nac Abel, ne dib zdoo me bnalo me Dios, gane bleynie Dios gon ne bdeed me, lëdle gon ne bdeed bets me Cain. Ne sca bnalo me Dios, gane pcaania Dios me zig tib zha ne peet xtold, ni pcaania Dios gon ne bdeed me ga; gacxe waa, haxta lo nadze, niicle ne gutle me, bii raquiet ganle pa lotaa dib zdoo me bnalo me Dios.

⁵ Scaque Enoc, ne dib zdoo me bnalo me Dios, gane gute me, zomban me zeynie Dios me gbaa, choot gondraa me. Zeene bii zomban me lo guidzliu, blu Dios ne rdziladz Dios zha mban me.

⁶ Sac zha ne rnalod Dios dib zdoo, grieelod gban zho zigne rdziladz Dios. Zha ne racladz gbig zho lo Dios, none dib zdoo zho gliladz zho ne nli no me, ni gliladz zho ne nli rcaania me zha ne nlipaa rio liaadz rbig lo me.

⁷ Zig nac Noé, ne dib zdoo me bnalo me Dios, gane bliladz me xtiidz Dios zeene rëb Dios lo me pe nac ncuaañe ziaadyob gac; bin me diidz bzaa me tib barcw nroob, ni len barcw co bio me gza xpëed me ni tsiel me, blaa zho lo guielnë co. Ni ne sca bnalo me Dios, gane ible zgaa me grë mine gdeed Dios lo grë zha ne biaanmbele lo Dios; laa grë zha ntseeb co, ib bnalod zho Dios, gane sca bnitlo zho.

⁸ Zig nac Abraham, ne dib zdoo me bnalo me Dios, gane zeene bredz Dios me ycaania me zaatne gdeed Dios lo me, binga me diidz brieec me zie me, niicle ne nañd me zha nac dan co.

⁹ Ni ne sca rnalo me Dios, gane niicle bdziñ me lo liu co, laa me wbanse ga zig tib menzit. Lega nacse len grë yu mantiad bio me grop me Isaac, scaquegaa Jacob; sac ye grop zha co biaan diidz nacchen liu co.

¹⁰ Scase bio Abraham ga, sac nanpaa me no tib guiedz ndzon ne bzaa Dios, ni ga nac zaatne gdeed Dios gdziñ me.

¹¹ Scaque Sar, wnaa ne goc tsiel Abraham, ne dib zdoo me bnalo me Dios gane gop me mëed, niicle ne nacd me wnaa ne gap mëed, ni lala gol-le me; laa me gop win, sac zeene rëb Dios lo me laa me yquianie win, dib zdoo me bliladz me ible zun Dios mine bnee me ga.

¹² Ye Abraham, mengol-le me, men ne yquianiedraa mëed nac me, ni zeene laa Sar gop mëed co, miech guizhiu ne briequia lo dii co; pale mel ne ndziib gbaa, yuzh ne ndxiega ro nisdoo.

¹³ Gza zha ne blozh goquiet nu, gardaque ygaa zho grë mine bnee Dios gdeed me lo zho, laa zho gut; zeene bii zomban zho lo guidzliu rii, dib zdo zho bnalo zho me gane bliladz zho ne ible zgaa zhow, rzac zho zig nac zeene ranle zhow. Bien zho ne tib ziaadtedse zho lo guidzliu rii, nacse zho zig tib menzit.

¹⁴ Ni ne sca bien zho tib ziaadtedse zho lo guidzliu rii, ga rlu ne dzigora zho dzin zho zaatne gacpaa ladz zho.

¹⁵ Sac telne niend zho ne scaw, znuse mbire zho ney zho zaatne brie zho ga.

¹⁶ Tibaque laa guic zho güeynie ne ib zdin zho zaatne gacpaa ladz zho gbaa; gacxe waa, rtoladz Dios ne nac me Dios ne riladz zho, laa me bzhixcuaale guiedz ne gac ladz zho ga.

¹⁷ Zeene been Dios Abraham prueb dien pe nli rnal Abraham me, rëb me cogan Abraham xpëed Abraham Isaac; ne dib zdo Abraham rnal me Dios gane niicle tibaque mëed ga lo me, per bleeladz me mëed co, laa me niutle win niac win gon.

¹⁸ Ni laa xtudz Dios nac ne win gunctal lo xti me!

¹⁹ Laa me niut win, sac nanpaa ne nroob poder ne rap Dios, telne niet win nrieelo mbeeban Dios win; ni nligaa rrieequia gut win ga ni biire brie zho win stib.

²⁰ Niiclegaa Isaac, ne dib zdo me bnalo me Dios, gane zeene bnab me gunlay Dios grop xpëed me, Jacob ni Esaú, bzeet me zha gac lo xquielmban zho.

²¹ Scaque Jacob, ne dib zdo me bnalo me Dios, gane niicle laa me nole guet me bnab me gunlay Dios grop xpëedbgui José, bzeet me zha gunlay Dios zho; mengol-le nac me, yagale zhoob me per tibaque rleynie me Dios.

²² Scaque José, ne dib zdo me bnalo me Dios, gane zeene laa me merle guet bzeet me ne ib zdin dze grie zha Israel Egipt; haxta psan me diidz güey zho xstis me zeene laa zho grie ga.

²³ Zig nac pxoz Moisés, xniaa Moisés, ne dib zdo me bnalo me Dios, gane bloolan me mëed niow yeen co lidz me tson më; ib bdziebd me mine bnabey rey Egipt.

²⁴ Niiclegaa Moisés, ne dib zdo me bnalo me Dios, gane zeene laa me broob bdeetraa me diidz niunbey zho me zig xpëedmiag rey;

²⁵ laa ne niaan me lidz rey nleynie me grë ncuaaane niunctal xtol me, mazd bleeladz me me psacsi zho me grë menladz me.

²⁶ Bien me ne nonguielraaw ted me guielnë zig pteed zho Jesús, lëdle niaanme me grë ncuaaane non ne no Egipt; sacne mine mazdraa nonie guic me nac guielnzaac ne gdeed Dios lo me.

²⁷ Ne sca rnal me Dios, gane bdziebd me xquieldox rey, tiblique been me guic me brie me Egipt; sac nanpaa me niicle rand me Dios, per Dios nacie me.

²⁸ Ne scaque rnal me Dios, gane bnabey me been zha Israel lni Pascw, ni bnabey me bdiab xchen carner yeen grëse ro lidz zho, zeena guete xpëed glo zho wdze co.

²⁹ Grë zha Israel co, ne dib zdo zho bnalo zho Dios gane wbiig lo Nisdo Nizhnie, bzhial tib nëz mbidz bded zho; laa zeene gocladz grë xmenguiib rey Egipt nded zho, znuse bdzieel lo nisdo co stib, grëse zho gut.

³⁰ Ne scaque dib zdo zho bnalo zho Dios, gane bliaal biedz nroob ne ndze igo guiedz Jericó, zeene bza gadz ngbidz noyew zho igo biedz co.

³¹ Zig nac Rahab, wnaa ro nëz ne bio guiedz Jericó, ne dib zdo me bnalo me Dios, gane peet gocd me dze ne bnitlo grëse menladz me, sacne bnalod

zho Dios; me ga bdeed zaatne blëz zha ne glole pxeel zha Israel güey wleets ga.

³² Ni noragaa zha ne sca dib zdoo bnalo Dios, haxta tiemple ygaad gzet naa zho. Zig nac Gedeón, zig nac Barac, Sansón, Jefté, zig nac David, zig nac Samuel, ni grëragaa zha ne biadteed xtiidz Dios lo miech.

³³ Ne sca dib zdoo zho bnalo zho Dios, no zho beenchen grë guiedz nroob, no zho bnabey grë guiedz zigne nonguiela, no zho gonlo grë mine bzeet Dios gdeed me lo zho, no zho role meedz bdedlaa zho;

³⁴ no zho lo beldox bio zho ni peet gocd zho, no zho lo spadle bdedlaa zho, no zho gzhe gzhele rac zho per bdaan zho; no zho biablote lo dil ni biire pcaa zho fuerz stib, haxta beñcxoon zho zha zit ne nodilnie zho.

³⁵ Grë men wnaa, no zho gonlo brieegan menlidz zho.

Nzian grë zha ne sca bnalo Dios, no zho psacsixuu miech zho, per ib bdeete zho diidz niun zho mine racladz miech, mazd bleeladz zho zho beet miech zho; sac nanle zho mazdraa ndzon guielmban ne yгаа zho zeene laa zho grieegan.

³⁶ Nogaa zho bgaa beennguzee miech zho, bdiñ zho zho, bzoob zho zho lo caden, ni bloo zho zho ladzguuib;

³⁷ no zho bdeedquie miech zho haxta gut zho, no zho bgaa bloosier miech zho, no zho bgaa gut zho lo spad. Nogaa zho mbanse rac, pquianguzhoon zho lo miech, nëzrii nëzrec zie zho, mbanse rac zho guieñd pe gow zho, guieñd xab zho, tib lëse guid mëcxwiil, tib lëse guid chiv nriel zho.

³⁸ Miech wen nac zho, ni rieguiald grë miech guidzliu rii guiaadban zha co lo zho, per scataa bded zho. Niapse grë dan bidz, grë dan gui, bio zho; zaatne blëz zho grë leñ blë, zaatne blëz zho grë leñ bliee.

³⁹ Ni golgacnan ganle, niicle nli bianñziuu zho lo Dios ne sca dib zdoo zho bnalo zho me, per gardaque yгаа zho guieñzaac ne psan me diidz ga yгаа zho;

⁴⁰ sacne laa Dios racladz tipse ygaanie ne zho guieñzaac ne psanle me diidz gneedz me lo ne niina, sac min co nac mine mazdraa nroob.

12

Choot gbiched lo Jesús

¹ Nziandox grë zha ne sca dib zdoo bnalo Dios. Ni niina, grëse zha co laa zho ndxiewi lo ne; sac rrieequia tib lo prueb no ne noquiaa ne corr. Gacxe waa, golgotsaa csaan grë ncuaañe runctal xtol ne, zeena ycadraaw parne grielo tiblifique dzio ne nëz gdziñ ne zaatne no gdziñ ne.

² Tibaque golgotsaa guionie guic ne laa ne gdziñ lo Jesús ga, men ne zo lo ne grëse ne ne rnalo ne Dios, ni me lozh gzodziits ne. Tel me gon, niicle ne nroob psacsi miech me, haxta lo cruz pquiaa zho me, per tibaque güeynie guic me nroobraa nac guieñbley ne gan me zeene lozh ga. Ncuaañe mbeeguieñto ga zeene sca quia me lo cruz, per ptoladzd me.

Ni nligaa, zig nac niina cue Dios nëz derech ga zob me bgaa.

³ Golguieñ sca, zeene racmban zdoo to, zeene racladz guiaan zdoo to, ib gdeete to diidz; golgsoladz ganle, zha pxcw Jesús bded me grëtaa mine pteed grë miech ngoopdol co me.

⁴ Parga nli, në noded to noxco to gunctalde to xtol to, per gard guiab ne yгаа to ne gut miech to.

⁵ Golgsoladz ganle zha rnee Dios lo grë zha ne nac xpëed me. Znu raquiet lo Xtiidz me, zaatne rnee:

Xin, zeene rso Dios diidz lo luu guṅdraa luu grē ncuaaṅe nonguield, none sac zdoṅ luuw;

niicle zeene gactoxgaa me lo luu, gacmband luu.

⁶ Sac goṅ zha ne sca rso me diidz lo, ga rlu ne rleynie me zho; zha ne ractoxgaa me lo, ga rlu ne nli xpēed me nac zho.

⁷ Golguien sca, gacbande to tel pe caxtigw ne cteed Dios to. Golgan ganle, niicxe miech na, ractox zho lo xpēed zho zeene rond win diidz.

⁸ Nana, tel ib peet glisquidgaa me lo to, gase dzigo rlu ne led xpēete me nac to; sac goṅ, zha ne nac xpēed me, rlisqui me zeene rond zho xtiidz me.

⁹ Golsoladz ganle, zeene rac ne mēedlas rlisqui pxoz ne zeene rdziuuṅ ne ncuaaṅe nonguield; scagaa ne, rien ne ne me rnabay lo ne. Nana, ¿pe lel Pxoz ne dzigo men ne zob gbaa gnabeyd me ne? Ni none goṅ dzion ne xtiidz me, zeena ygaa ne guielmban.

¹⁰ Gotsaa gwi ne ganle, zig nac pxoz ne, rquia me rlisqui me zeene rdziuuṅ ne ncuaaṅe nonguield, sac racladz me zaacse gban ne, ni chop tsonaque dze nac lo guielmban rii; sangue Dios goṅ, laa me noseed ne par gac ne tib miech mbe zdoṅ, zig me; ni lēē min co nonraa.

¹¹ Parga nli, tsod zha ne gley zeene noded zho caxtigw, sinque nē rzac zhow; per zeene rded ga, zha ne rienpaa rquiina haxta wen riaan zdoṅ zho, sac rseed zho zaacse rban zho.

Nodne gbiche miech lo Dios

¹² Nana sca, telne bdzagle to, golguṅ ndip nia to, golguṅ ndip ni to stib,

¹³ zaacse golsē, tib nēz gołtso zeena gziaabnēzde to; dzigo scagaa zrieelo gacnie to zha ne lega noyobe.

¹⁴ Gołtsoxco niowse golbannie samiech to, ib guṅctalde to xtol to; sac zha ne mbed zdoṅ, grieelod gdziṅ zho lo Dios.

¹⁵ Tibaque golteedlolsa zha ne nacgrē to, golguien ganle racladz Dios gacnie me to, napaa na lel nozozit to lo me. Sac zha ne rrozit lo Dios, zeene laa mine nac zho rzhooṅneṅ, nzian zdoṅ zha ne rsaṅ zho, rlozh ga grēse zha co rṅctal xtol.

¹⁶ Ib gunde to grē ncuaaṅe tsod zdoṅ Dios, ib quitniede to guielnzaac ne bneedz Dios lo to; gunde to zigne been Esau, tel Esau, por tib plat nis scuaan psaan me guielnzaac ne bgaa me ne nac me mēēdglo;

¹⁷ ni nanwen to ganle, zeene laa me gocladz nab pxoz me niunlay Dios me zig mēēdglo, brieelodraaw. Dzigoraa rquia zdoṅ me, haxta roon me r nab me ygaa me guielnzaac co stib, per pe xtsiṅraaw.

¹⁸ Golguien sca ganle, nroob nac guielnzaac ne bneedz Dios lo to niina! Led yede to ndziṅ pa tib cho gui, zig bdziṅ xmengol to cho Gui Sinai padzeela. Grē xmengol to, zeene ndxie zho zhan Gui Sinai, beldox ne goṅ zho rso guic gui co, ni goc tib ncow, lala rio bi ratsie nguzi ni rree me;

¹⁹ ni lala nguiedz rcedz trompet, ni nguiedz zēēb tsi Dios rnee me lo zho. Zeene goṅ zho scataa nguiedz rnee me, bdzieb zho; dzigo bnab zho lo me gneedraa me.

²⁰ Bdzieb zho bin zho rēb me, zha ne tsep cho gui co none gdeedquie zho zho, gliz lanzgaa zho zho haxta guet zho; scaque grē ma.

²¹ Ncuaaṅe gdziebdoṅ ne goṅ zho ga; haxta Moisés rzhidz lo dzeb co.

²² Sangue to, rrieequia haxta Jerusalén, zaatne no Dios nguiamban gbaa bdziṅ to, zaatne ndxie grē anj guizhiu ne roolnie Dios;

²³ zaatne ndxie grē zha ne glopaa bzēēb xnēz me, grē zha ne zhooble lē gbaa ga. Laa to bdziṅ lo Dios, men ne ruṅ guielwxtis; zaatne ndxie grē zha ne psanmbe Dios biaan zho zig tib zha ne peet xtol.

²⁴ Laa to bdzinle lo Jesús, men ne rdzinne miech lo Dios niina ne laa Dios psan stib xtiidz me; laa to bdzinle zaatne rrieequia bliaal xchen Jesús len yadoo gbaa, lêe ren co mazdraa non lêdle xchen Abel.

²⁵ Min co nagon, golguien golgun mine rnabey Dios to. Golsoladz ganle, zha bnitlo grë zhagol ne sca ib bind xtiidz me, ni tib miechse pteed xtiidz me lo zho. ¿Pe le lë dzigo ne mezhai quianee lo ne? Ib diedlaad ne gon telne dziond ne mine rnabey me.

²⁶ Zeene bnee me lo grë zhagol co, haxta beencxidz me guidzliu, ni rnee me: “Zbire naa guncxidz naa guidzliu stib, haxta ye gbaa guncxidz naa.”

²⁷ Gase na ganle rlu, lo grëse ncuane bzaa me zdzin ne laa me csiniw, dzigo laaw nitlo; lozh ga, guiaan mine gdzindraa dze nitlo;

²⁸ ni ga nagon gneedz me gbiaaz ne. Gacxe waa, golgotsaa dziuun ne mine rnabey me, golgotsaa gdeed ne xquizh lo me, guien ne men nroob nac me; ni scagaa me zley me.

²⁹ Golguien ganle, tel me ne nac me Dios ne riladz ne, nac me zig nac tib beldox ne peet rdedlaad lo.

13

Golban zigne racladz Dios

¹ Bets, bzian, golleynie grë zha ne nacgrë to, golguien ganle tibaque men ne nac PxoZ to.

² Goldeed zaatne cuëz grë menzit ne zo nëz. Blac zha ne sca bdeed lidz blëz zha ne zo nëz, no hor biënd zho haxta xanjl Dios blëz lidz zho.

³ Goltsiegan grë zha ne nioogyu ladzguiib, goltso xliaadz zho zig nac zeene ye to nogrë zho ga. Golgacnie grë zha ne nosacsi miech, nanle to ganle zha rzac ne zeene no ne tib lo guienë.

⁴ To ne nac to zha ne ptsieelniale, sacde to guieltsieel zig beelze pe wguil, ib yquidiede to tsieel to; sac zha ne yquiangob tib zha ne nonguield tsonie zho o yquiangobgaa zho tib zha ne nole tsieel, ib tedsod zunquizh Dios zho dol co.

⁵ Tsienalde to loxaque dien zha gunlo to dimi; sinque golley totsaque no mine yquiin to. Golsoladz ganle, led znu rnee Dios lo ne: “Tibaque gacnie naa to, ib csaand naa to.”

⁶ Gacxe waa, nod pe nacne ctseb zhgab ne, none tibaque dzionie guic ne dzieets ne:

Dios nac men ne nacie naa, ¿pe nac nadien gdzieeb naa?

¡Peet grielod gun miech naa!

⁷ Golsoladz zha goc men ne bzo lo to pseed to Xtiidz Dios, ni dib zdoo to glnalo Dios zigne bnalo me Dios.

⁸ Golguien ganle, gdzind dze ne gdzëe Jesús, zigne goc me padzeela, scaque nac me niina, ni scaquegaa gac me grëta len iz ne guiaadraa.

⁹ Ib gliladzde to grë wseed ne ziaadnie stib miech sca, wseed ne ni nacdraa Xtiidz Jesús. Diosse nac men ne lozh gzodziits ne lo mine riladz ne; nacda por tsienal to dien pe gow to, pegaa gowde to; sac zha ne zienal min co, paat yquinda lo zho.

¹⁰ Grëse zha ne guiab tsienal mine rnabey ley parne ycaania Dios zho, tib ladle rsan zho mine been Jesús ga. Rrieequia no tib lo pcoog, ni nese zrieelo yquiin gon ne ndziib lo co; laa grë pxoz ne zienal mine rnabey ley, grielod yquiin zho gon co.

¹¹ Glo, zeene ret ma ne riogon lo Dios, rlozhse rielaal pxoz nroob xchen ma zaatne Ndadoo parne guiooglo lo xtol menguedz, dzigo rienie zho xcuerp ma ro guiedz, ga rzëëg zhow.

¹² Scaque Jesús, zeene bzhiee xchen me psanmbe me miech lo dol; ro guiedz ga güeysacsi zho me gut me.

¹³ Scagaa ne niina, golgotsaa griece ne lo grë ncuane lo guidzliu rii, golgotsaa cueeladz ne ne guiona ne zhits Jesús dzian ne grë guieinë, telne no dzian new.

¹⁴ Benque ndion ne ganle, nacd lo guidzliu rii zaatne gbiaazpaa ne, sinque laa ne zional yгаа ne zaatne naraa gneedz Dios gbiaaz ne.

¹⁵ Laa ne ndionle ganle, Jesús nac men ne gunctsin ne lo Dios; gacxe waa, golgotsaa gleynie ne Dios, golgotsaa gdeed ne xquizh lo me. Lëë min co gac zig tib gon ne gdeed ne lo me.

¹⁶ Goltsoxco golgun grë ncuane yquiin lo samiech to, ncuane rgaa lo to, goldeed palala lo grë zha ne guiend pe yquiin; sac rriequia lëë stib gon ga gdeed to lo Dios, ni mincogaa rleynie me.

¹⁷ Golgon xtiidz zha ne zo lo to noseed to Xtiidz Dios, golguien zha rnabey lo to, sac gon zha quianap to ni zha gdeed cuent lo Dios zha pquianap zho to. None gon to xtiidz zho, zeena ine gley zho yquiaanap zho to; sac gon, telne lel nogogieinë to zho, lëda ga gun to.

¹⁸ Golnab lo Dios gacnien me no tibaque znu dzioxco no dziuun no mine racladz me, me nan ganle mbe zdo no, mbe xquieren no.

¹⁹ Ni mine rsopaa naa diidz lo to, golsoladz golnab lo Dios gneedz me diidz gbiire guialniob naa i, guialgan naa to.

²⁰ Jesús nac men ne quianappaa ne, zig rquianap baxtor xpëcwxiil zho; me gut bzhiee xchen me zeene psan Dios diidz stib zha gdzin miech lo me; ni diidz cosi gdzindraa dze ne gdzëëw.

Dios men ne bleeban Jesús, men ne racnien miech peet zhgab rtsebd zho,

²¹ me gneedz guieibiini lo to grieelo to gun to mine rnabey me. Jesús sca golnalo, zeena grieelo gban to zigne rdziladz Dios. Dios nac men ne rieguial dziuunnon ne, zigtaa niinaw, zigtagaa grëraa len izdo no ne guiaada. Scaw nagon.

²² Bets, bzian, laa naa rnab lo to ib glëed guic to, golcaania palalse diidz ne pso naa lo to nu.

²³ Racladz naa gacnan to ganle, laa bets ne Timoté briele ladzguuib; telne zlansoniob me lo naa nu, grop no me guiaad lo to i.

²⁴ Golsiguieil goldeed tib zhibdiuzh naa lo grë zha ne zo lo to i, ni lo grëragaa zha ne nacgrë to ngab to lo Dios. Ye grë zha ne no nëz Italia nu, laa zho rxeel zhibdiuzh zho lo to.

²⁵ Guiaannie Dios to sca. Me glu ganle pa lotaa noxco me to.

GUILTS NE PQUIAA SANTIAGW

¡Diuzh to grëse to!

¹ Naa nac Santiagw, tib zha ne quiayun xtsiin Dios, tib zha ne quiayun xtsiin Jesús, men ndzon ne rnabey. Laa naa rquiaabduzh to grëse to ne nac to zha ne ziaad lo xtií Israel, tel pa lotaa nac guidzliu ne no to.

² Bets, bzian, ndal ncuaañe rded ne parne glu dien pe nli dib zdoo ne rnalo ne Dios. Tel pe nactaa ncuaañe noded to i, ib gacmbande to, sinque golley.

³ Sac gon, zeene squi ran ne grë pe guielñe, ga rseed ne tibliladz rac ne tel petaa noded ne.

⁴ Golseed sca tibliladz golgac. ¡ib guiaan d zdoo to tel petaa nac guielñe ne gan to! Sac zeene sca cseed to gan to guielñe, zac to tib zha ne dziits so lo Xtiidz Dios, tib zha ndzinli, tib zha ne ib peet gdziebd.

⁵ Zha ne racladz yгаа guielñi co, zac gnab zhow lo Dios, ni mesi gon zdeed mew; sac guielñi ne gnabtaa ne lo me zneedz mew. Led yed me yca, led yed me glisqui pe nacne pe gnab ne lo me.

⁶⁻⁸ Lëëraasi dib zdoo ne none gnab new, nodne gacchop guic ne; sac zha ne racchop guic, gdzind dze yгаа zho mine rnab zho. Nac zho, tib dze dib zdoo zho rliiladz zho zгаа zho mine rnab zho, stibгаа dze na rliiladzdraa zhow, ib ractiblid guic zho; masaque nac zho zig nac grë mtsiin ne rbib lo nisdoo, sac tel mtsiin co loxaque nëzrii nëzrec zienie mew.

⁹ No zha bets ne, zha bzian ne, quianied zho ncuaañe yquini zho, par miech peet nond zho; per none gon ine gley zho sac nroob non zho lo Dios.

¹⁰⁻¹¹ Scagaa zha ne rapchen, none ine gley zho niina ne biaanwin zho, sac nëz lo Dios grë ncuaañe rap zho nonda. None guien zho niicle ne nroob rapchen zho, zeene laa zho gbi lo guidzliu rii nuque guiaan grë ncuaañe rap zho. Masaque nacse zho zig nac guieen grë guizh ye, tel guiee cow, zhixtsëese ngbidz rcuuidz guizh ne zoba lo, rlozh ga rliaalgaw, gataa rnitlo xquielniowa.

¹² Dichos zha ne ib rzozite lo Dios niicle no nzian ncuaañe rcheep zho gunctal zho xtol zho, per rund zhow; sac zha cosi zгаа zho tib guielmban ne gdzind dze lozh, guielmban ne bneele Dios gdeed me lo grëse zha ne rleynie me.

¹³ Zeene sca no ncuaañe rcheep ne gunctal ne xtol ne, guiabd ne togo Dios noquuil ne gun new; sac gon led yed Dios rzoobladz ncuaañe ndzinlid, ni niicle rquuidgaa me miech gun zhow.

¹⁴⁻¹⁵ Grë ncuaañe ndzinlid ne rzoobladz ne, grë ncuaañe yozh ne rionie guic ne, min co nac mine rquuil ne. Lëëw nac mine rcheep ne runctal ne xtol ne, ni ndionle ne ganle, lëë gdib mine gdeed dol lo miech nac guielñedox ne yгаа zho.

¹⁶ Bets, bzian, gac-wete to sca.

¹⁷ Golguien ganle, ncuaañe rquini, ncuaañe ndzinli, min co nac mine rneedz Dios. Tibaque nac me, led yed me rdzëë par guiab ne meque rnabey rac guielntseeb. Me nac tib biini ne gdzind dze guuu, ni tib lë guielcow guien d zaatne no me.

¹⁸ Zdoo me gola bneedz me tib guielmban ndzon lo ne niina ne laa bliladz Xtiidz me, masaque rrieequia ne nac mëëdgo lo me.

Nacda yquiaadiagse miech Xtiidz Dios

¹⁹ Bets, bzian, ne nac to zha ne rleynie naa: Golgacnan ganle, ne ne nac ne zha ne no xnëz Dios, none dzioxcoraa ne yquiaadiag ne, zeene gnee ne none guien ne pa lotaa gnee ne, ni gund ne ne rnadse pew laa ne glëele.

²⁰ Sac gon, zeene rlëe ne, grielod gun ne ncuane rdziladz Dios.

²¹ Golguien sca, golsaan grëtaa ncuane ndzinlid ne ziyun to, golbiche lo grë guientseeb ne znutaa quiyac niina. Ine ndooladz golgac, golleynie Xtiidz Dios, diidz ndzon ne pseedle to; sac gon lëew rlu zha laa to lo dol.

²² Per guiabde to togo loxaque yquiaadiagse to Xtiidz Dios lëew ga; sinque ib none gban to mine rquiaadiag to, sac tel ib gbande tow lëew que to noquidie to ga.

²³ Sac zha ne rquiaadiag Xtiidz Dios, ni rband zhow, rzac zho zig rzac ne zeene rwi ne lo ne lo quiewan:

²⁴ Sac zeene nowi ne lo quiewan, hor cose ran ne zha rac ne; zeene laa ne rbiche low rsoladzdraa ne zha rac lo ne.

²⁵ Sangue zha ne rquiaadiag Diidz Ndzon ne rlu zha laa miech ga, ni zigne rquiaadiagse zhow scasaque rioxco zho rban zhow, zha cosi ib zunlay Dios zho lo grëtaa ncuane gun zho.

²⁶ Gacxe waa, zha ne rnee xnëz Dios no zho ni rgobeyd zho pe rnee zho, lëew que zha noquidie zho ga, ga rlu nlid zienal zho mine rnabey Dios.

²⁷ Sac gon, par Dios men ne nac Pxoze ne, zha ne no xnëz me none tsie zho tsiegun zho xyudar grë mëëdbziab, tsiegun zho xyudar grë wnaa ne ret tsiel, ni tsoxco zho zaacse gban zho, ib tsienald zho ncuane ndzinlid ne run grëraa miech.

2

Lëda ga run zha ne rbe

¹ Bets, bzian, gunde to ne ncuese lo miech ne gnee to, sac zha ne sca run, zha dien guiab zho xnëz Jesús no zho.

²⁻³ Ron naa, zeene rlanso tib zha ricw zaatne rcaalsa to i, nacw zho xab niazh zho, no grë xnil or zho nia zho, lëelëd rio to dien pa lo wenraa sob zho; laa zeene rlanso tib zha mban beelze nac xab yeen, rnee to lo zho: "Ise bzo, telne racladzga luu sob luu, lo liuse i bzob."

⁴ ¿Pe sca na rac zha ne no xnëz Jesús? Zha ne gon sca run, ga rlu zho niapse guientseeb no guic zho.

⁵ Lëda ga gon bets, lëda ga gon bzian. Golgacnan ganle, ible Dios ble miech ne peet rapd lo guidzliu rii, zeena dib zdoz zho gnalo zho me, zeena yгаа zho zaatne bneelee me gdeed me cuëz zha ne noxco rleynie me. Gotsaa gwi ne sca ganle, zha ricw nac zho nëz lo Dios;

⁶ laa to gon, no to rlozhd gzhidznie to zho. ¿Pe ib riende to, grë zha ricw co nac zha ne rsacsi to? Rgobniu zho to, riezozho to lo wxtis;

⁷ haxta rdzibdee zho Jesús, men ndzon ne nacie to niina.

⁸ Ib none gban ne zigne rnabey Xley Dios, lo xley me zhobnee: "Bleynie samiech luu, zigne rleynie luu luu."

⁹ Golguien gon, dol i noyun to squi rbe to dien cho nac zha ricw, chogaa nac zha mban; sac Xley Dios i quiguuits to.

¹⁰ Golgacnan ganle, zha ne rguiits tibaque xley Dios, niicle maase zienal zho grëraaw, laa zho beenctal-le xtol zho ga, rzacaque zho zig zha ne noguuits grëw.

¹¹ Sac tibaque men ne psana grësew. Gacxe waa, tel zha ne zienal mine rnee: "Gute luu samiech luu", per rguuits zho mine rnee: "Yquiangobd luu zha ne led tsielld luu", laa zho beenctal-le xtol zho ga.

¹² Niowse sca golgac, niicle zeene gneegaa tow, niowse golnee; sac gon, zdziñ dze cxobdoñ ne dien pe wban ne zigne rnabey Jesús, te wband new ye.

¹³ Grè zha ne ni lalnu rquiad zdoo samiech, gal dze co scaque ni lalnu yquiad zdoo Dios zho; sangue zha ne rquia zdoo samiech, ible zdedlaa zho lo guieñdòx ne cxeel me.

Zha ne rnalo Dios none glu zhow

¹⁴ Bets, bzian, ¿pa dien rquiin guiab ne dib zdoo ne rnalo ne Dios, xnèz me no ne, ni tel rund ne xyudar samiech ne? ¿Niacxe scase laa Dios csilaale ne?

¹⁵ Gzoob ne no zha ne nacgrè to i, yase tib bets tow, tib bziangaa tow, ranlo to guieñd xab zho, niicle quianied zho ncuaane gow zho;

¹⁶ ni guiab to lo zho: “Csacsid luu luu, got xabnal luu, dow ncuaane racladz luu”, per loxaque diidz sca guiab to, ni gdeete to ncuaane run falt lo zho. ¿Pa dien yquiin diidz co?

¹⁷ Scadaa nagon paat rquiinda guiab ne rnalo ne Dios, ni tel rund ne mine rieguial ne gun ne.

¹⁸ Gacxe waa, zha ne rnalo Dios ni run zho mine rieguial zho, no zho gnè lèda i run zha ne rnee lèlew ga tosaque gnalo ne Dios. Ni rap zho rson, sac grielod glu ne rnalo ne me, telne rund ne mine rieguial ne.

¹⁹ Nli wena run zha ne rliladz tibaque Dios no, per grielod guiab zho lèlew ga, sac gon zig nac mendox ye ma rliladz tibaque Dios no, per led por mincod laa ma lo guieñdè ne cxeel me, sinque haxta rdzieb ma me.

²⁰ Nadzpaa nxen zha ne sca rzac, pe ni lalnu riend zho paat rquiinda guiab zho rliladz zho Dios ni telne rund zho mine rieguial zho.

²¹ Golgan ganle, zig nac pxozgol ne Abraham, porne been me mine rieguial me gane pcaania Dios me zig tib zha ne peet xtol. Led rsoladz to ganle, zeene rëb Dios lo me tsielogon me xpèed me, güey me zaatne pxeel Dios me.

²² Gotsaa gwi ne ganle, zeene been Abraham mine bnabey Dios me ga, ga blu ne nli rnalo me Dios, ni hor co mazdraa dib zdoo me bnalo me Dios.

²³ Lo Xtiiidz Dios zhobnee ne scataa dib zdoo Abraham bnalo me Dios, gane pcaania Dios me zig tib zha ne peet xtol; zèeb diidz, tib zha ndzieeldiidz Dios goc me.

²⁴ Golgacnan sca ganle, led loxaque gliladzse miech Dios, laa me ycaaniale zho; sinque none glu zho nli rliladz zho me, gun zho mine rnabey me zho.

²⁵ Golsoladz ganle, scaque wnaa ro nèz ne brieelè Rahab, por been me xyudar samiech me, gane pcaania Dios me zig tib zha ne peet xtol; sac zeene gon me noxtseeb zha ne pxeel Josué zie wleets ga, bdeed me zaatne biolan zho, ni blu me stib nèz ne wbire zho, bgaad zho.

²⁶ Gase na ganle rlu, paat rquiinda guiab ne rliladz ne Dios ni tel rund ne mine rieguial ne, nacse ne dzigo zig tib xcuerp ngutoo, tel cuerp cow, ¿pa dien yquiina?

3

Ncuaane run ludz miech

¹ Bets, bzian, guiabde to lega tso to glisqui to ncuaane run stib miech, sac tsod zha ne demaste wen lo guidzliu rii. Zha ne sca run, rzac zho zha so cseed zho miech, per gacnan zho ganle zha ne rseed miech, mazdraa nroob ncuaane tsasqui lo zho gal dze ne laa zho gacredz lo Dios.

² Grèse ne nzian mod ne rxin ne lo samiech ne. Tel niaca mine no tib zha ne grieeo ycuèez ludz pa lotaa gnee zho, zha cosi cxind zho, haxta xcuerp zho zrieelo zho gnabey zhow.

³ Gotsaa gwi ne ganle zig nac guay, con tib lè win guuib ne rgo miech ro ma rrieelo rnabey zho ma, rienie zho ma nêz ne racladztaa zho.

⁴ Scaque barcw, niicle ne nrooba, no hor rriee medox lo nis rcheepa, per con tib lè yag lag win ne rsëe miecha, rrieelo rienie zhow nêz ne racladztaa zho.

⁵ Scapaa nagon nac ludz ne; niicle ne winsew, per nroob guielqui ne runa. jRan to ganle tib bzhil yeense name rzobgui dan!

⁶ Ni tel ludz ne gon, rrieequia tib bel ga naca. Tib lè win xcuerp ne naca, per guielqui nroob ne runa, runctala xtol miech. Gun ne cuent tib lè gui ne briece gabil naca; ni dipse lo xquielmban miech noxtseeb zho low.

⁷ Golwi ganle, rrieelo miech runndoo zho grè ma ne rsiibe, grè ma ne rzèlen liu, haxta grè ma ntseeb, haxta grè ma ne no nisdoo, rnabey zho ma.

⁸ Per guien d zha ne gon grieeelo gnabey ludz; ncuaa ne ntseeb naca, choot grieelod gnabeya; masaque laaw no par gnitlow miech, zigne run grè guizh ncuaa n.

⁹ Lëew name rquiin ne roolnie ne Dios men ne nac Pxo z ne, ni rlozh ga lëeqwe w rdzibdee ne samiech ne, ni lalnu rien d ne me bzaa zho, biaan zho zigne rlu me.

¹⁰ ¿Pe ga nadien, ro ne roolnie ne Dios, ni roque ne rgodee ne samiech ne?

¹¹ Bets, bzian, led scada gon. Zig nacse tib zhlian, ¿niacxe zaatne rlanaque nis nex gaque rlan nis yuzed?

¹² Tib yag nexgaaw, ¿niacxe rquia xnex yag oliv lo yag guigw, yquiaagaa guigw lo lbè uv? Nanle to ganle racd min co.

Zha ne nixbiini

¹³ Lo grè zha ne nacgrè to i, tel no zha ne rzac zha nixbiini nac zho, none glu zhow ine zaacse gbannie zho samiech zho, gac zho tib miech ndooladz zig none gac tib zha nixbiini.

¹⁴ Per tel tibaque nè rac zdoo zho ran zho zha ne stib noded, tibaque noguib zho csanwin zho samiech zho; gacnan zho ganle, led scad rac zha nixbiini. Ni lalnu rieguiald tso zho csanzziuu zho zho.

¹⁵ Led scad nac guielbiini ne rdeed Dios, sinque lëe zhiwseed mendox ga, lëe min co zienal grèraa miech guidzliu.

¹⁶ Zeene sca nè rac zdoo miech ran zho cho stib noded, zeene sca tibaque no zho dien zha guianglaa zho lo samiech zho, loxaque dil, loxaque grè guielntseeb rzobni zho ga.

¹⁷ Zha ne nli rap guielbiini ne rdeed Dios, rund zho min co, laa zho zienal: ndzinlise gban zho, rleynied zho dil,

rguib zho zaacse rnee zho lo miech,

wen rac zho lo grèse miech,

rquia zdoo zho samiech zho,

rund zho cue zho zha ne mazdraa gacnie zho,

ncuaa ne run zho dib zdoo zho run zhow,

niapse ncuaa ne ndzinli rioxco zho.

¹⁸ Zha ne sca rleynied dil, rioxco zho rnee zho lo miech tipse gac zho, tipse gnee zho; scagaa rdzin dze ne ran zho zeene laa grè miech co rac tib miech wen.

4

Zha ne rleynie guielntseeb

¹ Ne squi tibaque rlëëlsa to, tibaque quiadil to, lëe min qui gon riegat por grè guielntseeb ne rio guic to.

² Rio to riogui to ncuaaṅe grieelod yquianie to, rlozh ga, haxta rut to samiech to parne yquianie tow. Nē rac zdoo to ran to cho zha quianie ncuaaṅe quianiede to, zeene ran to rriyelod yquianie tow laa to rlēēnie zho, haxta rdilnie to zho. Rriyelod yquianie to ncuaaṅe racladz to, sacne rnabde tow lo Dios.

³ Niicle tel r nabgaa tow lo me, rneedzd mew, sacne laa guic to zienie yquianie tow loxaque par gdeedguxt zdoo to, gdeedguxt xcuerp to.

⁴ ¡Que tal ntseeb to! ¿Pe ib riende to, Dios goṅ rlēēnie to zeene squi rio to rleynie to grē guielntseeb? Sac miech ne squitaa rleynie guielntseeb, lo Dios ga racntseeb zho.

⁵ Golgaṅ gaṅle, zha rnee lo Xtiiḏ Dios: “Espíritu Sant, meṅ ne pxeel Dios nacie ne, rleynie me ne, ni racladz me zhaa ncuaaṅe gleynie ne laa ne gleynie ne me.”

⁶ Ni tel Dios goṅ, noxco me ne, ib zacie me ne griee ne lo guielntseeb; sca rnee lo Xtiiḏ me, zaatne rnee: “Zacnieṅ Dios grē zha ndooladz, saṅgue grē zha niats, rdziguiend me zho.”

⁷ Golguien sca, ine ndooladz golgac, golgon miṅe rnabey Dios. Gdeetraa to diidz yquuil mendox to, sca golgun zeena zhal ma gbiche ma lo to.

⁸ Dib zdoo to goḷsēeb xnēz Dios, zeena scagaa me zacie me to. Goḷtsoxco guiaanmbe to lo grētaa xtoḷ to, goḷnab lo me csaṅmbe me zdoo to, mese gnalo to, gacchopdraa guic to.

⁹ ¡Golguien gaṅle, ndzinlid i squi mban to! ¡Mban golgac, goḷtso guielnē, golgoon, laa ne tso to gzhidz to, laa ne tso to gley to!

¹⁰ ¡Ndooladz golgac lo Dios, zeena cuee me to lo grē ncuaaṅe nac to, csaṅglaa me to!

¹¹ Bets, bzian, ib gneenēde to zha ne nacgrē to. Zha ne rneenē bets zho, bzian zho, beḷ zho, ni rdziibdoḷ zho zho, Xley Dios ga rguiits zho. Laa ne so zho gacladz zho zha guṅ guielwxtis, mazd tsoxco zho gban zho zigne rnabey ley.

¹² Golguien gaṅle, Dios psan ley, ni mese rieguaḷ guṅ guielwxtis, me nan zho cuibdoḷ, chogaa csilaa me; per to nadien, ¿cho nac to par gdziibdoḷ to samiech to?

¹³ Togaa ne nac to zha ne rnee: “Na gzhe widz dien pa tib guiedz ne guioo ne, guiobiaaz ne ga tib iz, ga dziuun ne wzi dziuun ne wto, dziuunlo ne dimi”, goḷquiaadiag miṅe gne naa lo to gaṅle.

¹⁴ Ne sca rnee to, ¡pe wen wen nan to dien yo to gzhe widz co! ¿Pe ranḏe to lega nacse xquielmban ne zigne nac xcow las ne rbe raḷ sil? Zhisaque rbew, zeene rlozh ga rludraa dien yow.

¹⁵ Mazd golguiab: “Telne zneedz Dios diidz gbanraa ne, miṅ rii, miṅ rii dziuun ne.”

¹⁶ Led tsoḏe tibaque guielniats qui zienie guic to, golguien guielntseeb ga run zha ne rac niats.

¹⁷ Ni goḷsoladza gaṅle: Grēse zha ne nanpaa pe nac ncuaaṅe ndzinli ne no guṅ zho ni rund zhow, xtoḷ zho ga runctal zho.

5

Zha ricw ne zianaḷ guielntseeb

¹ ¡Grē zha ne rapchen, zha ne zianaḷ loxaque guielntseeb, goḷquiaadiaga gaṅle! Golgoon, goḷquiaadan redz niina, sac goṅ nroob nac guielnē ne gaṅ to.

² Grē ncuaaṅe beenlo to i, peet nonda, lega naca zig nac grē ncuaaṅe biodzle; grē xab to i, rrieequia ncuaaṅe dowle mxila.

³ Grē guiib or, grē guiib plat ne squitaa quanie to, rrieequia noloozhle bioochena; ni scadaa gon nitlo to, masaque gac to zig tib ncuaaane riab lo gui.

Laa to beenlo grētaa dimi qui, rzac to lēew yquiin to len dze ne ziaad, ni nande to gon laa dze ne nitlo to ziaadyoble.

⁴ Lēē grē dimi qui gon zēēb to lo grē zha ne quia xtsiin to, noquidie to zho rguizhde to xtse zho. Per golgacnaa ganle, grēse redz ne rquiaa zho zeene mban rac zho squi rsacsi to zho, laa Dios binlew.

⁵ Lo grētaa iz ne mban to lo guidzliu rii, loxaque grē ncuaaane gdeed guxt zdoo to, grē ncuaaane gdeed guxt xcuerp to noxco to, ncuaaane yozh ne riaabtaa guic to laa to ruṇa, ib riende to laa dze ne nitlo to ziaadgaxle. jLēē to noyūn xcuent ma ne noro par guet ma!

⁶ Pe zhistaa guieIntseeb ne quiaayūn to, haxta zha ne peet xtold, zha ne nand glis nia lo miech, rquiaqui to zho ncuaaane rund zho, rnabey to ret zho.

Nodne guieed zha ne rnalo Dios

⁷ Bets, bzian, saṅue to gon tiblīque golgac haxta gan to gdziṇ dze ne laa Jesús guiaad stib, tel petaa ruṇ miech to peet tsienied guic to. Golgac zig zha ne ran, tel zha cow, zeene rlozh rlaal zho bni liu, tiblīque rac zho gdipse len mēē guie, rquiambēz zho haxta rdziṇ dze ne rlaap zho.

⁸ Tiblīque sca golgac. jib guiaand zdoo to, sac gon zhile gdziṇ dze ne laa menṇ ndzon ne rnabey ne guiaad stib!

⁹ Ib tsode to guieednie to grē zha ne nacgrē to, zeena gūncalde to xtol to; sac zhile gdziṇ dze ne laa menṇ ne no gūn guielwxtis guiaad.

¹⁰ Golṣoladz ganle, grē zha ne biadteed xtiidz Dios padzeela, niicle nroob guielnē gon zho, per tiblīque goc zho.

¹¹ Zig nac Job, naṇaxe to ganle zha nactaa guielnē ne gon Job, per ib bieete me, ni blozhse gon me guielnē co nroobraa guielnzaac ne bdeed Dios lo me. Ga rlu ganle, zha ne sca rdeed me diidz ran guielnē, led lega rand zhow; sac nqialadz me miech, rquia zdoo me zho. Dichos grē zha ne sca nac.

¹² Bets, bzian, zeene tsiegala glu to diidzli rnee to, tsode to gzeet to gbaa, gzeetga to guidzliu par gliiladz miech xtiidz to; guiab to: “Lēpaa gbaa qui”, “lēpaa guidzliu rii”, dien peragaa gzeet to. Tib diidz ne nliw, golguiab: “Nliw”, tib diidz ne nliidgaaw, golguiab: “Nlida”, zeena gūncalde to xtol to; sac gon zha ne ruṇctal xtol, ible zгаа zho guielnē ne csiaab Dios.

¹³ Lo grē to, zha ne no pe tib lo guielnēw, gnab zho lo Dios gacniēn me zho. Zha ne no pe tib guielbleya, goolnie zho me.

¹⁴ Zha ne rzacnēgaaw, gnabey zho gacredz bla zha ne zo lo to, zha co quēēb nceit guic zho gnab zho lo Dios guiac zho.

¹⁵ Telne dib zdoo zha co gnab zhow lo Dios, zūnguiac Dios zha rzacnē co. Zlische me zho lo xquielguidz zho, ni tel por pe falt ne beengaa zho lo me sca rzacnē zho, zūn me zhow perdon.

¹⁶ Gacxe waa, tib tib to zeene ruṇ to pe tib falt, yqueetsde tow, golzodiidza lo zha ne nacgrē to, lozhse ga gōlnab lo Dios guṇ me to perdon, zeena guiaanmbe to lo me. Sac tib zha ne biaanwenle nēz lo Dios, zeene sca pe rnab zho lo me ruṇ mew, niicle ncuaaane mazdraa ngāa.

¹⁷ Golṣoladz Lí ganle, menṇ ne biadteed xtiidz Dios lo miech padzeela, samiechaque new, per dib zdoo me bnalo me Dios. Tib dze bnab me lo Dios csiaabd Dios nisguie, ni scase goca, dipse len tsoṇ iz groṇ ni tib lab nis guie biabd;

¹⁸ haxta bnabraa me lo Dios guiaba stib, dzigoraa biaba, laa guidzliu biire bdeed guielnzaac.

¹⁹ Bets, bzian, te_l cho tib zha ne nacgrë to i sozit lo Xtiidz Dios, ni grieelo cho tib to ctsire zhò nêz yozh ne zie zho ga;

²⁰ golgacna_n gan_{le}, ladzniale guiel_{gut} ga rsilaa zho zho, grëse xtol_{zha} co zun Dios zhow perdon.
Santiagw

GUITS NE GLO PQUIAA PEDR

Bets, bzian, jdiuzh to grëse to!

¹ Naa nac Pedr, tib zha ne rxeeł Jesús nonee Xtiidz Ndzon me lo miech. Laa naa rxel tib guits rii ziaad lo to grëse to ne nac to zha Israel, no to stib ladz ben: zig nac nëz Pont, nëz Galás, nëz Capadóś, nëz Asia ni nëz Bitin.

² Dios meņ ne nac Pxoż ne, ible me bzooblo to mazd padzeela, sac nanle me laa to gac xpëed me. Bdziņ dze, zeene laa me pxeel Espiritu Sant bleextso to laa to ngab xnëz me, zeena gban to zigne rnabey me, ni lozh csaņbe Jesús to; sac ible miņ co nacne bzhiee xchen me. Dios glu ganle pa lotaa noxco me to, zeena peet zhgab ctsebde to.

³ Xquizh xquielnzaac Dios, Pxoż Jesús meņ ndzon ne rnabey ne, sac goņ pquia zdoo me ne ptsëe me lo xquielmban ne, rrieepquia gol ne stib. Xquizh me bleeban me Jesús, sac goņ ga rlu ib yгаа ne guielnzaac nroob ne no diidz gneedz me lo ne,

⁴ guielnzaac cosi ncuaaņe mbe naca, nacda ncuaaņe nitlo, nacda ncuaaņe gdzëelo, ni gbaa ga quianie mew.

⁵ Ne squi dib zdoo to rnalo to me niina, gane quianap me to con grëtaa poder ne rap me, parne yгаа to guielnzaac co. Zeene laa dze co gdziņ, zanlo to ganle zeene laa me ycaania to.

⁶ Gacxe waa iņe nley golgac. Nli zan to grë pe guielnë, per ncuaaņe tib rded ga.

⁷ Ib none gan to grë guielnë, parne ga glu dien pe nli dib zdoo to rnalo to Dios. Zig nac guuib or, parne glu dien pe nli ora, none teda lo gui; scaquegaa to, none gan to guielnë parne glu to nli dib zdoo to rnalo to Dios; ni zig nac or, ncuaaņe rnitlo ga. Grëse zha ne tibaque gnalo me, niicle mazdraa guielnë ne gan zho, gal dze ne guiaad Jesús stib, iņe zunnon Jesús zho, sanglaa me zho, zley me gan me zho, sac blu zho nli dib zdoo zho rnalo zho me.

⁸ Me i squitaa rleynie to, me i squitaa rnalo to, niicle ne gonde to me, niicle ne rande to me. Tib guielbley nrooba lo to, tib guielbley ndzona, nacda ncuaaņe grieelo gnee to zha naca;

⁹ sac goņ, ne squi dib zdoo to rnalo to me, ib scaania me to.

¹⁰ Grë zha ne biadteed Xtiidz Dios lo miech padzeela, bzeet zho laa Dios glu ganle pa lotaa noxco me ne, laa me csilaa ne lo dol; per ib biend zho dien zhapaa guņ me.

¹¹ Zeene bdeed zhiEspiritu Jesús guielbiini lo zho bzeet zho ne ib laa Dios cxeel me, pe nac guielnë ne ted me, ni pe nac guielndzon ne guiaadnie me; gocladz zho niacnaņ zho dien cho nac meņ co, pa hor gac miņ co.

¹² Nacne blu Dios lo zho gocnaņ zho nacda ncuaaņe gac len dze co, sinque haxta nele yгаа dziaņa. Sangue niina, nanwen to ganle laa grë miņ co goçle, lëe diidz cub co i gocnaņ to niina, gbaa biet Espiritu Sant bdeed me guielbiini lo zha ne biadneew lo to. iNcuaaņe ndzona, haxta grë anjl racladz tebaa zha gacnaņraa zho dien zha naca!

None gban ne zigne racladz Dios

¹³ Gołquix biini xquielrien to sca. Tiblique golgun guic to ne laa to yгаа grëtaa miņe ral zdoo Dios gneedz me lo to, zeene laa Jesús guiaad stib.

¹⁴ Zig grë mëed ne ron xtiidz pxoż, sca nguzobdiidz golgac lo Dios; guņdraa to grë ncuaaņ ndzinlid ne been to zeene gard guņbey to me ga.

¹⁵ Goltsoxco golban zigne racladz me, zeena ine mbe guiaan to lo dol; sac gon tel me, men mbe nac me, nacd me men ne rdziguien dol.

¹⁶ Zigne zhobneeque lo Xtiidz me, zaatne rnee: "None guiaanmbe to lo dol, sac gon men mbe nac naa."

¹⁷ Pxoz to nac me, me rnalo to, nanle to zeene laa me gun guielwxtis, led yed me cue; mine been tib tib miech, zunquish me zhow. Golguien sca, golgon xtiidz me gzataa dze ne gbanse to lo guidzliu rii.

¹⁸ Golsoladz me blee to lo gre wseed ndzinlid ne psan gre xmengol to; nanwen to gozh briece to ga; per pquiind me ncuaane rnitlo zig nac pe dimi or, pe dimi plat;

¹⁹ sinque laa me pquiin xchen ndzon Jesus. Ren ne bzhiee goc zig tib gon, zigne rgogon miech carner yeen ne mazdraa niow, carner yeen ne mazdraa ndaan parne guiaanwen zho lo Dios.

²⁰ Padzeelale, haxta zeene gard cue guidzliu bzo Dios me gac me gon co, ni nligaa zeene laa dze co bdzin laa me biaad, biaadsanwen me to lo Dios; laa Dios been min co sacne rleynie me to.

²¹ Gacxe waa, zrieelo dib zdoo to gnalo to Dios, mese none gliladz to. Me nac men ne bleeban Jesus, blu me ne men non nac Jesus.

²² Ni niina ne laa to mban zigne nac Xtiidz Dios, mine nac diidzli, laa zdoo to biaanmbele lo dol; nasi zrieelo gleynie to zha ne nacgre to. Dib zdoo to sca golleynie zho,

²³ golguien ganle, tib guielmban cuble rap to niina, rrieequia gol to stib; per nacdraaw zigne gol to glo, sinque lee guielmban qui bgaa to zeene bliladz to Xtiidz Dios, diidz ne rneedz guielmban, diidz ne gdzind dze nitlo.

²⁴ Zigne zhobneeque low, zaatne rnee: Grese ne nac ne miech, dzin dze ne lozh ne, lega nase ne zig nac gre guizhye, gre xquielndaan ne, lega nacsaw zig nac guieen guizh co. Sac tel guizhyew, zeene laaw rbidz, laa guieena rliaalaque;

²⁵ sangue Xtiidz Dios, gdzind dze ne nitlow.

Ni lee diidz co ga gon biadseed zho to, leew rlu zha laa miech lo gre xtol zho.

2

¹ Nana sca:

gundraa to gre guielntseeb,
yquidiedraa to samiech to,
gundraa to ne laglaase glu to guielwen,
gacned zdoo to gan to cho zha stib noded,
gzhixcuaadraa to diidzguizh.

² Sinque Xtiidz Dios goltsoxco, zeena lozh tsotibli guic to dziits so to low. Zig rzac medyeen ne wriin ral, nidzpaar dziladz win guie win; scadaa golsac Xtiidz me, zeena ygaade to gre guielnedox ne csiaab me.

³ Laa to gonle ganle zha wentaa zdoo me, Xtiidz me sca goltsoxco.

Jesus nac zig tib quie mban

⁴ Golbig lo Jesus, golgan ganle lee me nac zig tib quie ne rio squin yu, per tib quie mban. Ib bleynied miech me, sangue Dios, men non, men nziuu nac me lo me.

⁵ Golbig lo me sca, zeena ye to gac quie mban ne tsaa xyadoo me. To gac gre pxoz ne nliipaa mbe zdoo, gun to dziin len yadoo co; golban zigne rdziladz

Dios, zeena guielmban co gac zig tib gon ne gdeed to lo me, ne nac to zha ne ngab lo Jesús.

⁶ Zigne zhobneeque lo Xtiidz Dios, zaatne znu rnee:

Men ne bzo naa cxel naa Jerusalén,
me gac zig tib quie nroob ne gnaaz dziits xyadoo naa,
ni léë yadoo co nac grè zha ne ngab lo naa.

Men non nac me, ni grèse zha ne gnalo me, ible csaand naa zho.

⁷ Ne nligaa tib men non nac me lo ne, sangue grè zha ne riladzd me cholze miech rzoob zho me; zigne zhobneeque lo Xtiidz Dios, zaatne rnee:

Quie ne sca bron zho tib lad zeene quiazaa zho yu,

laaw bron zho sac rzac zho paat rquiinda,

ni niina léëpaaw nac quie ne nlibdziits xcox yu.

⁸ Ni ziaad stib zaatne znu rnee:

Quie co griel ni miech, quie co gron zho.

Grèse zha ne néd gliladz Xtiidz me zaatne rnee cho nac me, scapaa sac zho me, ni ib zhobneele ne min co yгаа zho.

⁹ Sangue to, lo Diosle ngab to, me ble to, zigne rnee lo Xtiidz me: tole nac zhipxoz me, tole nac zha non ne quiayun xtsiin me; miech ne mbele lo dol nac to lo me, mele rnabey to sac me bredz to laa to briece lo guielcow bzëëb to lo xbiini ndzon me; zeena gnee to lo miech ganle zha nactaa grè ncuaañe run me.

¹⁰ Glo peet nonde to, sangue niina non to sac gon lo me ngab to; glo nande to pa lotaa rquia zdoo me to, sangue niina rley to ran to ganle squitaa rquia zdoo me to.

Tibaque golgun mine racladz Dios

¹¹ Bets, bzian, rleynie naa to. Ndion ne ganle, nacse xquielmban ne lo guidzliu rii zig zha ne tibrded stib ladz ben; gane rso naa diidz lo to, ib gzoobladzde to gun to grè ncuaañe ndzinlid ne racladz xcuerp to; sac min co rsacsi xalm miech.

¹² Golguien zaacse golgac lo grëraa zha ne gard gunbey Dios; niicle ne gneenë zho to niina, sac zho to zig cho grè zha ntseeb, per zeene gan zho ne ndzinli nac grè ncuaañe run to, haxta zleynie zho Dios gal dze ne laa Jesús guiaadgun guielwxtis.

¹³ Golgon xtiidz grèse men ne nac wxtis lo guidzliu rii, sac sca rdziladz Dios: zigtaa presidenta, ne nac me zha nonraa,

¹⁴ zigtagaa grè zha ne nacie me dziina, sac zha run guielwxtis, rdeed zho caxtigw ne rieguial grè zha ntseeb, ni scagaa runnon zho grè miech ne run ncuaañe rquiin.

¹⁵ Ible laa Dios racladz zaacse gac to, zeena grè zha nxen, grè zha yozh ne riend pe rnee, haxta ni ro zho tsod pe gneenë zho to.

¹⁶ Gollu ne peet lo ngadoodraa to, per guiabde to ne peet lo ngadoodraa to laa to gun grè ncuaañe ndzinlid ne gacladztaa to. Led scada gon, mine racladz Dios min co golgun, gollu mele rnabey to niina.

¹⁷ Zaacse golgac lo grè samiech to, golguien cho lo zo to. Golleynie grè zha ne nacgrè to, ndooladz golgac lo Dios, golguien ne men ro nac me; ni scagaa golgon xtiidz grè zha ne nac wxtis nroob.

¹⁸ Bets, bzian, to ne nac to zha ne quia xtsiin ben, golgon mine rnabey men ne rree to; tel zhataa nac zho, zigtaa men wena, zigtagaa men ne ntseeba.

¹⁹ ¡Nley golgac, goldeed xquizh lo Dios, tel porne noyun to mine rnabey me, laa zho rsacsi to!

²⁰ Sac gon, telne nosacsi zho to por xquielntseeb to, niicle paraa cxcw to paat yquiinda; sangue tel rxcw to nosacsi miech to porne noyun to ncuane rdziladz Dios, dzigosi zleynie me to.

²¹ Golgacnan ganle, ible none ted to min co ne nac to zha ne ngab lo Dios; sac gon, niicxe Jesús, blactaa guielnè ne bded me bdiizh me xtol ne. Glo me sca bded, nana negaa ible none sca diied ne.

²² Tel me ni tib dol beend me, ni tib miech pquidied me.

²³ Niicle zeene blooredz zho lo me, ible ptsired me lo diidz co; niicle zeene quiasacsile zho me, ib gocntseebd me lo zho; sinque grèsew psan me ladznia Dios, men co gun guielwxtis zigne no gaca.

²⁴ Masaque Jesús bgaadz grèse xtol ne, blactaa psacsi zho me pquia me lo cruz bdiizh mew; laa me been min co, zeena grieeo griee ne ladznia dol, gban ne zigne rdziladz Dios. Ne scataa psacsi zho xcuerp me, ga bi me grèse xquielnè ne.

²⁵ Glo lega nac to zig nac grè mècwxiiil ne zonziaab, sangue niina mele quianap to. Me nac tib baxtor ne rleyniepaa to.

3

Zha gban zha ne ptsieelniale

¹⁻² Bzian, to ne nac to men wnaa ne ptsieelniale, golgon xtiidz tsieel to. Niicle tel néd zho gliladz zho Xtiidz Dios, per zeene gan zho ne nligaa ndooladz nac to, ine ndzinli rac to, haxta zhal zho laa zho yquiabladz gliladz zhow. Yquiindraa ne goon chopaa yquia gneew lo zho.

³ Golguien sca, tsode to ne goon dien pa xixcuaraa to par gluniow to lo miech; dieen pa xixcuaraa guitsguic to, dieen pe bguiaa or ne yquia diag to, dieen pe grè guuib or tso yan to, tso nia to, dieen pe lar niazh ne gacwraa to. Tsienalde to grè guielniow co, sac gon ncuaan laglaase ga;

⁴ sinque none xixcuaa zdoo to, gac to tib zha tibliladz, tib zha ne ndooladz. Lèè guielniow co nac mine niowraa nèz lo Dios, ni min co gdziind dze nitlo.

⁵ Lèè guielniow co bioxco grè men wnaa ne biaadban padzeela, zha ne brieel to dol wban zho zigne racladz Dios; tel zha, dib zdoo zho bnalo zho Dios, ni bin zho xtiidz tsieel zho.

⁶ Zig nac Sar, sca goc me, bin me xtiidz tsieel me Abraham, haxta rëb me masaque Abraham nac men ne rnabey me. Ni scagaa to, telne tsoxco to xixcuaa to, zac to zig goc Sar, dzigosi laa to gac zig xpèed me; haxta ni tsoxtseebde to pe glisqui tsieel to lo to.

⁷ Scaquegaa to bets, ne nac to zha ne ptsieelniale, goltsoxco tsoguic to zha nac tsieel to. Golgan me zigne nonguiela gan to me, golguien ganle nda men wnaa; ni lala, non me lo Dios, sac gon ye me yгаа guielmban ne psan Dios diidz gneedz me lo to. Sca golban, zeena scagaa zeene gnab to lo Dios, squiaadiag me xtiidz to.

⁸ Nana sca, tipse golgac grè to. Ine niowse golleynie zha ne nacgrè to, miech wen, miech ndooladz golgac.

⁹ Zha ne gacntseeb lo to, gunde to ne yeque to gacntseeb lo zho; zha ne coredzgaa lo to, gunde to ne yeque to coredz lo zho; sinque mazd golnab lo Dios gunlay me zho, zeena scagaa to, zunlay me to; sac gon, ible min co bredz me to.

¹⁰ Zigne zhubneeque lo Xtiidz me, zaatne rnee:

Zha ne racladz ine gley zho ne laa zho mban, wen ted zho len ngbidz ne gban zho,
none tsoxco zho ycuèez zho ro zho, gneenèdraa zho, yquidiedraa zho;

¹¹ none csaan zho grëtaa guie_lntseeb, niapse ncuuan wen tsoxco zho gu_n zho, yguib zho cuewen miech, niicle zhagaa wen gac zho lo grëse miech.

¹² Sac grë zha ne sca wen rac nëz lo Dios, tibaque quianap me zho, ni rquiaadiag me xtiidz zho tel_l pe rnab zho lo me; sangue grë zha ntseeb, ni lalnu rdziguiend me ncuaa_ne ru_n zho.

Dichos zha ne mban rded lo samiech

¹³ Gol_guien sca, ncuaa_ne yquiin gol_gun; scagaa tsod pe nacne ctsidil_l miech to.

¹⁴ Laa tel_lne ncuaa_ne yquinaquegaa noy_un to, ni laa miech rtsidil_l to, jdichos to ga! Ib gdziebde to grë miech guidzliu, niicle peraa gnë zho gu_n zho to.

¹⁵ Tibliladz gol_gac, tibaque gol_gunnon Jesús men_n nroob ne rnabey ne, tibaque gol_gconie Xtiidz Dios guic to, zeena nanle to pe guiab to lo zha ne gnabdiidz dien zha nacne rnalo to Jesús; in_e niowse gol_gac, diidz ndooladz go_nee lo zho.

¹⁶ Zaacse sca gol_gban, zeena grë zha ne rneenë to porne nac to zha ne no xnëz Jesús, zdzi_n tib dze ne ctoladz zho, zeene guien zho lega bnexuu zho to.

¹⁷ Wen zie zha ne ran_n guie_lnë, tel_lne Dios rnabey gan_n zhow zeene noy_un zho ncuuan_n wen; lëdle gan_n zhow por xquie_lntseeb zho.

¹⁸ Gol_gan_n gan_le niicxe Jesús, zha nactaa grë guie_lnë ne gon_n me. Niicle ne ni tib dol_l beend_n me, per haxta beet miech me bdiizh me grëse xtol_l ne nac ne miech ntseeb, psanwen me ne lo Dios. Nli gut xcuerp me, per zhiespíritu me gutew;

¹⁹ gane güeyted me zaatne niogyu zhiespíritu grë zha ne wban padzeela, güeynee me lo zho.

²⁰ Lëe grë zha co ib bzhiguiel_d nililadz Xtiidz Dios, niicle ne dipse len_n dze ne nozaa Noé barcw nroob co pquiambëz Dios niac-wen zho. Nanlaxe to gan_le, xonaque nac zha ne bdedlaa lo nis co.

²¹ (Lega rriequia goc nis co zig nis ne rrobnis ne. Zeene rrobnis ne, ga rlu ne laa ne briele lадznia dol_l, ygaadraa ne guie_lnëd_ox ne tsieguial_l zha ngoopdol_l, sac gon_n por mincopaa gut Jesús ni brieegan me; ni guiabd ne togo nis co rsan_mbe ne lo xtol_l ne, sinque ga rxobnen_n ne ne laa ne rnab lo Dios ctsëe me lo xquie_lmban ne.)

²² Sangue niina gbaa ga no Jesús, ga zob me cue Dios nëz derech, grëse anj_l non, grëse zha non ne no gbaa, rquiitgzhib zho lo me ni ru_n zho mi_ne rnabey me zho.

4

¹ Gol_guien gan_le, zha nactaa grë guie_lnë ne bded Jesús bdiizh me xtol_l ne; nana sca, scaque to gdziebde to gol_gcueeladz to gan_n to guie_lnë. Ib rquiin guie_lnë, sac zha ne no tib lo guie_lnë, rioguid zho grë ncuaa_ne gunctal_l xtol_l zho,

² zëëb rguib zho gban zho zigne racladz Dios.

³ Grëtaa ncuaa_ne ndzinlid ne ru_n grëraa miech, gol_guiaanladza. Gol_guiaanladz zeene scataa ptsieelsa to zho, bzudz to, lega dowcho, lega gocho to nziu, haxta bionie to zha ne nacd tsieel to; bio to lo grë lni, bleynie to grë mdio.

⁴ Grë zha co, rien_n naa rlëe zho ran_n zho rtsieelsadraa to zho lo grë ncuaa_ne ndzinlid co, gane haxta rneenë zho to.

⁵ Per gol_gsaan zho, beque zha quizha zeene gacredz zho lo men_n ne guiaadgun_n guie_lwxtis, gal_l dze ne gdeed me mi_ne tsieguial_l tib tib miech, zigtaa zha mbana, zigtagaa zha ne gutlew.

⁶ Sac niicle zha ne gutlew, no zho gocnanpaa zho zha nac Xtiidz Dios zeene bzomban zho. Ible rquinpaa Xtiidz me, sac zha ne rquiaadiaga, niicle ne zetaque zho, per nêz lo Dios mban zhiespiritu zho.

Golgacnie zha ne nacgrê to

⁷ Zhile gdzin gdze ne laa grê ncuaañe rac lo guidzliu rii nitlo; golquix biini zaacse golban, tibaque golzodiidznie Dios.

⁸ Ine golleynie grê zha ne nacgrê to, sac zeene nlipaa rleynie ne samiech ne, tel pe falt ne guntaa zho zrieelo cteed new zdoon ne.

⁹ Zha ne guiaad lidz to, goldeed zaatne cuêz zho; ine golcuêzlo zho, guieed-niede to zho.

¹⁰ Tib tib to bneedzse Dios tib guielbiini lo to. ¡Golquiina sca, golgunlsa xyudar zha ne nacgrê to! Ib ga rquini guielbiini co bneedz mew lo to.

¹¹ Zha ne rseed miech Xtiidz Dios, none gnee zhow zigne racladz me. Zha ne runгаа pe stib xtsiin Dios, ib yquiad zdoon zho none gun zhow dib nase guielndaan ne rdeed Dios lo zho. Ncuaañe guntaa to, goltsienie guic to ne laaw gun to par csannon to lè Dios. Ga glu ne xtsiin Jesús quiayun to, men ndzon ne rnabey, men ne gdzind dze gdzêê. Sca rieguiala.

¹² Bets, bzian, ne nligaa rleynie naa to. Golsoladz sca, tel pe guielnêtaa gan to porne no to xnêz Jesús, peet tsienied guic to, sac ib scale no gaca.

¹³ Mazd ine golley; sac gon ye Jesús sca gon guielnê, ni scagaa nroob guielbley ne tso to gal dze ne glu ganle zha nactaa guielndzon ne rap me.

¹⁴ Zeene rgodee miech to, rquiaago zho to loxaque ne no to xnêz Jesús, nley golgac; wen zie to ga, sac gon zhiEspiritu Dios nacie to.

¹⁵ Guieltow sca csacsi miech to, telne bgaa to laa to beet, laa to wban, laa to bzêeb lo cuent ne rieguialdraa to, pe stib guielntseeb ne noyunragaa to.

¹⁶ Sangue telne rsacsi zho to loxaque ne no to xnêz Jesús, led guieltod ga. Laa ne ctoladz to, igoldeed xquizh lo Dios, sac gon tib guielnzaac nroob bgaa to ngab to lo me!

¹⁷ Golgacnan ganle, grêse ne ne nac ne zha ne ngab lo Dios, len dze rii laa ne csilo dzian guielnê. Nana, telne ye zha ne ngab lo me ted guielnê. ¿zha naczhe mine ted grêraa zha ne nêd gliladz Xtiidz me, gal dze ne laa me gun guielwxtis?

¹⁸ Zigne zhobneeque lo Xtiidz me, zaatne rnee: “Niicle zha ne wenle nêz lo Diosa, nroobaque nac guielnê ne ran zho haxta gdzin dze ne ycaania me zho, ¿pe lelque grê zha ne dzigo racntseeb lo me?”

¹⁹ Gaxe nagon waa, niicle tel pe nactaa guielnê ne gnabey Dios ted to, tibaque golban zigne rnabey me, golsan xquielmban to ladznia me; sac gon me nac men ne rneedz xquielmban to, ni mesi ib csaand me to.

5

Golgon xtiidz zha ne rnabey lo to

¹ Laa niina nagon, laa naa cso choplan diidz lo to, ne nac to zha ne rnabey lo grê zha ne no xnêz Jesús. Ye naa, dziin co nac naa, naa nac tib zha ne gonpaa zha psacsi zho Jesús, ni nanpaa naa zгаа naa lo guielndzon ne no me, zaatne rnabey me, gal dze ne laa me guiaad.

² Rso naa diidz lo to gon, zaacse golquianap grê zha ne bgaa to noquianap to. Dib zdoon to golgun dziin qui, sac sca racladz Dios, ib tsienied guic to guiab to dien zha lega cob to dimi lo zho.

³ Gundê to ne gnabey to zho zig cho xmoz to, sinque zaacse golgac lo zho, zeena lo to cseed zho zaacse gban zho.

⁴ Scagaa, zeene laa men nroob ne quianap ne guiaad, zгаа to lo guielndzon ne gneedz me, lugar co gac tib premio ne gdziind dze lozh lo to.

⁵ To ne nac to zha nguieg, golgon xtiidz grē zha ne zo rnabey lo to. Tib tib to, golgon xtiidz zha ne nacgrē to, sac gon: “Grē zha niats, rdziguiend Dios zho, sangue grē zha ndooladz, racniēn me zho.”

⁶ Telne guiaanwin to lo men ro ne nac Dios, ine ndooladz gac to lo me, scagaa me zunnon me to zeene laa dze co gdzin.

⁷ Tel pe nactaa grē zhizhgab to, grē xliaadz to, ladznia me golsana, sac gon me quianap to, noxco me to.

⁸ Nsin golso lo mendox, sac gon tibaque quiana ma gnitlo ma ne! Masaque rac ma zig rac grē meedz ne rgobeedz quiaguib ma ne gow.

⁹ Dziits golso gdeete to diidz yquiiil ma to. Tibaque dib zdoo to gonalno Dios. Nanle to ganle dipse lo guidzliu, zha ne notaa xnēz me, scaque quiateded zho.

¹⁰ Tel pe nactaa guielnē ne noyan to, ible csaand Dios to sacne rleyniedox me to, zeene laa dze co gza, hor co laa me gzhixcuaraa lo xquielmban to, gzodziits me to, guntibli me guic to. Me nac men ne bredz ne ygaa ne lo guielndzon ne no me grop me Jesús, guielndzon ne gdziind dze nitlo.

¹¹ Mese nac men ne rnabey grētaa ncuaaēne no, ni gdziind dze ne gdzēē me. Nligaa sca nac me.

¹² Laa naa rxel guits rii lo bets ne Silas, ziaadnie mew lo to, bets ne rne naa me, sac nligaa dib zdoo me rleynie me Dios. Mine rne naa lo to lo guits rii, laaw rne naa sac racladz naa guien to ganle pa lotaa noxco Dios to, pa lotaa rleynie me to; zeena tiblque gac to gbichede to lo me.

¹³ Grēse zha ne rliladz Jesús Babiloin nu, zha ne bzooblo Dios gac xpēēd me zigne bzoobloque me to, laa zho rxeel bdiuzh lo to; scaque Marcw, men ne rzaac naa nu zig tib xpēēd naa, ye me laa me rquiaabdiuzh to.

¹⁴ Laa naa rnab lo to, golquiaabdiuzh grēse zha ne nacgrē to, ine golxen nia zho.

Dios gacniēn to peet zhgab ctsebde to, nac to zha ne no xnēz Jesús.
Pedr

BROP GUITS NE PQUIAA PEDR

Bets, bzian, jdiuzh to grëse to!

¹ Naa nac Simón Pedr, tib ngundziin win ne pxeel Jesús nonee Xtiidz Ndzon me lo miech. Laa naa rquia guits rii rxel naa lo to, ne nac to zha ne squitaa ndzonse dib zdoos rnalos men nroob ne zob gbaa, zigne rnaloque no me. Xquizh Jesús men ne rsilaa miech, men ne nac Dios ne riladz ne, sac gon me gocniën to squi rnalos to me niina; sac mesi mine nonguiel gac, min co run me.

² Zigse zie dze, goltsoxco lozh gunbey to zha nac Dios, zha nac Jesús men ne rnabey ne, zeena scagaa zig zie dze zunlayraa me to, zacniënraa me to, parne peet zhgab ctsebde to.

³ Sac zeene gunbey to zha nacraa me, con grëtaa poder ne rap me, zneedz me guielbiini lo to parne tibaque gban to zigne racladz me, tibaque gleynie to me. jGotsaa gwi ne ganle zha nactaa ncuaañe ro, ncuaañe gzee zdoos ne been me parne gbig ne lo me!

⁴ Ni psan me diidz pe nac grë ncuaañe ndzon ne gneedz me lo ne. Psan me diidz, ib laa me cuee ne lo grëtaa guielyozh ne rac lo guidzliu rii, parne gac ne tib miech mbe zigne nac me.

⁵⁻⁷ Nli laa to rnalos Dios, per parne ygaa to min co, none tsoxco to:

zaacse golban,

goltsoxco guien to zha nac Dios,

golseed gnabey to xcuerp to,

guieete to,

tibaque goltsoxco golgun mine racladz Dios,

ine niowse golbannie grë zha ne nacgrë to, golsac zho zig tib menlidz to;

golleynie samiech to.

⁸ Nana, telne tsoxco to znu gban to, dzigosi mazdraa tsoguc to mine racladz Dios, dzigosi zlu run to mine rnabey Jesús men ndzon ne rnabey ne, led loxaque runbeydse to me.

⁹ Sac zha ne tsoxcoda, rriequia rchool lo zho ga, rriequia rcowle guic zho ga, sac gon rsoladz zho zha nactaa lo grë dol ne blee Dios zho.

¹⁰ Bets, bzian, golguien sca, niina ne laa Dios bzooblolo to, laa me bredzle to ngab to lo me, goltsoxco sca golban, parne guiabde to lo dol stib.

¹¹ Niicle par gdzingaa to zaatne rnabey Jesús, men ne psilaa ne lo dol, men ne rnabey ne, tsod pe yca lo to, ine nzhal nëz zaatne ted to gdzin to ga.

¹² Nli nanle to grë mine rne naa nu, nli dziitsle zo to lo Xtiidz Dios, per ib none guncsoladz naa tow.

¹³⁻¹⁴ Laa Jesús men ndzon ne rnabey ne, blule lo naa zhile gdzin dze ne laa naa gbi lo guidzliu rii, gane niina laga bii mban naa rgobey naa ible nonguiela znu cso naa diidz lo to;

¹⁵ zeena niicle wbile naa lo guidzliuw, tibaque csoladz tow.

Gonpaa Pedr Jesús

¹⁶ Grëse mine bnee no lo to zeene pseed no to zha nactaa poder ne rap Jesús, ni zha guiaad me stib, guiabde to togo bod guicse no biaba. Led scada gon, tel naa gop lo naa gon naa xquielndzon me

17-18 guic gui ne scataa pxobnen Dios ne men non, men ro nac me. Binpa naa zëeb tsi Dios gbaa hor co, në me: "Lëë Xpëed naa i gon, rleynie naa me, nziuu me lo naa."

19 Ga nagon rlu ne diidzli nac grë mine bzeet grë zha ne biadteed Xtiidz Dios lo miech padzeela; gacxe waa, zig nac to ible nonguiel guien to zha naca. Masaque lëew quiaziiini lo to niina, zig rziini tib biini guieel, haxta riini liu zeene laa Mel Ngol rlan; ni lëë Mel Ngol co nac Jesús.

20 Per scagaa, racladz naa gacnañ to ganle, grieelod ne lega tel zha guiaab-taa guic miech, guiab zho sca nac mine bzeet zha ne biadteed Xtiidz Dios,

21 sac gon tel zha co, bneed zho ncuane biaabtaa guic zho; sinque laa zho bnee mine bnabey Dios psiaab Espiritu Sant guic zho.

2

Zha ne rquidie (Judas 4-13)

1 Grë zha ne biadteed Xtiidz Dios padzeela, mine bnabey me zho min co bnee zho; per brieequiaque zha ne pquidie rëb zho Dios pxeel zho, ni nliida. Ni scaquegaa niina, grë zha ne rseed to, zrieequia zha ne yquidie lad co. Dzega dzega csilo zho glu zho grë zhiwseed yozh zho, ib gunbeydraa zho men ndzon ne rnabey ne, men ne psilaa zho lo xtol zho; per nand zho zha nactaa guienëdox ne ygaa zho, tibaque zeene guien zho laa zho nole lo caxtigw co.

2 Ndal miech ne grieequia tsienal grë ncuane yozh ne gun zho, niapse por zha laa grëraa miech csilo gneenë Xtiidz Dios.

3 Zha yozha, laa zho tsienal loxaque dien zha gunlo zho dimi, zguib zho yquidie zho to gdeed to dimi lo zho. Per ib tedsod zguzh zho min co, sac bzeetle Dios ganle zha nactaa lo guienëdox ne ygaa zho;

4 sac Diossi gon, mine run grë zha ntseeb, csañ mew scase. Golgan ganle, niicxe grë anj ne sca been falt lo me, gondzed me zho, bleegazh me zho gbaa, bnabey me bioogyu zho tib lo ncowdoo, ga niioogyu zho nieeda gal dze ne laa me gunquizh zho mine been zho.

5 Padzeela zeene wban Noé, grë miech ntseeb ne bnëd nion xtiidz me niicle ne bneepaa Noé lo zho, scaque gondzed me zho, psiaab me tib guiedox bnitlo zho grëse zho; loxaque Noé ni zgadz menlidz Noé psilaa me lo nis co; sac wban Noé zigne racladz me.

6 Scaque len dze ne wban Lot, bdziguiend me grë miech yozh ne bio guiedz Sodom ni guiedz Gomorr, blaal me gui grop guiedz co, bnitlo me zho grëse zho, xquidiese biaan. Laa me been min co, zeena ga gan grëraa zha ntseeb ganle pe nac mine tsieguial zho telne csaand zho xquienntseeb zho.

7-8 Lotse psilaa me, sac bioxco Lot mine rnabey me. Gapaa no Lot, ranpaa me zha run grë miech co; haxta mban rac zdo me, ran me gzataa dze loxaque grë guilyozh noyun zho.

9 Gase na ganle rlu ib rsaand Dios zha ne rnalopaa me, rsaand me guiab zho lo dol; ni scagaa grë zha ne rsaand guienntseeb, ib tedsod zho lo guienëdox ne cteed me zho gal dze ne laa me gun guielwxtis.

10 i Zig nac zha ne guiaadquidie to ga, mincopaa ygaa zho! Ni lalnu gandzed Dios zho; sac gon, laa zho zienal loxaque grë guilyozh ne gdeed guxt xcuerp zho. Miech nad, miech riats nac zho, rzhidznie zho mine rnabey Dios, ni lalnu dzeb guien lo zho rdzibdee zho grë men non ne no gbaa.

11 Per ni grë anj, niicle ne zha nroob nac anj, niicle ne rap anj poder, per rdzin anj lo Dios gdzibdee anj zho.

¹² Per zha, lo xquielyozh zho ga, haxta ncuaañe rienđ zho zha nac, rdzibdee zho. Lëëdaa grë ma nac zho, tel ma laa ma ralse par ygaa ma nitlo ma; guieñdraa xquielrien zho, ncuaañe racladztaa zho ruñ zho. Per zdziñ dze ne nitlo zho, zigne rnitlodaque grë ma,

¹³ por grëtaa guieñtseeb, grëtaa guielyozh ne squitaa rley zho ruñ zho haxta zobna ngbidz.

Miech mbixladza, miech ngubeeguietow, rquiaalose zho miech wen nac zho zeñe riaadsobnie zho to lo zhilni to.

¹⁴ Wnaa ne gantaa zho, pe na gzoobladd zho tsonie zho wnaa co, tibaque quaiyuntal zho xtol zho. Rio zho rquuil zho grë zha ne gard sodziits lo Xtiidz Dios; rienle zho zha gla zho ncuaañe rquiin lo zho. Miech ndziibdeele nac zho,

¹⁵ sac laa zho psaanle xnëz Dios, nëz ne nitlole zho no zho; lëë zho ruñ xcuent Balam, xpëed men ne lë Beor. Tel Balam, haxta miñe nonguieldraa been me par gun me gan dimi;

¹⁶ per bdziñ tib dze zeñe laa Dios blisqui lo me grëtaa ncuaañe quaiyun me ga. (Bnabey Dios lëëque xpurr Balam bnee, dzigoraa bien Balam psaan me xquielyozh me ga.)

¹⁷ Masaque nac zho zig nac grë bzie ne bidzle nis, zig nacгаа xcow bidz ne nëzrii nëzrec zienie me; ni lalnu paat rquiind zho. ¡Laa zho nole guey zho lo guielcowdoo ne rieguial zho, zaatne gdziñdraa dze gree zho!

¹⁸ Niats rzë xtiidz zho, per ncuaañe paat rquiind rnee zho. Miñe mazdraa mban run zho, rio zho lëëque lo grë guielyozh ne rdeed guxt xcuerp zho rquuil zho grë zha ne pense brieel doł, rlozh ga rbiire riab zha co lo grë doł co stib.

¹⁹ Rnee zho zac tel zhataa gban ne, nodne gnabey xley Dios ne. Rzac zho na choot rnabeyd zho, ni rienđ zho doł quianabey lo zho; sac grëse zha ne gacdraa csaan tel pe grë guielyozh ne ruñ zho, lëële grë ncuaañ co rnabey lo zho.

²⁰ Tib zha ne sca brieel lo grëtaa ncuaañe ndzinlid ne no lo guidzliu rii (porne biladz zho Jesús, men ndzon ne rnabey, men ne rsilaa miech lo doł), ni gbiireque zho gdeed zho diidz guiab zho low gnabeya zho, mban gon tsie zho; sac dzigole mazdraa mban guiaan zho.

²¹ Lëda ga gon, telne gocnanle zho zha racladz Dios gban zho, ni lozh ga csaan zho xtiidz me tib lad, gbiire zho tso zho lo grë ncuaañ yozh ne been zho glo. Nroobdox caxtigw ne gan zha co, mazd zhi miñe ygaa zha ne gocnand zha nac xtiidz me.

²² Zha copaa nagon ruñ miñe rnee diidz ne znu rëb: “Nandraaque mëcw, ncuaañe bdzible ma rbiire ma row maw”; ni stib miñe znu rnee: “Ngutzhe, rlozhle raz ma nis mbe, ni rlozh ga riegaaque ma lo nis ben.”

3

¿Zha nacne gard guiaad Jesús?

¹ Bets, bzian, golgan ganle lëële guits rii raca chop zixel naa. Gropse low, rso naa diidz lo to tsoxco to zaacse gban to, ine niini gag guic to.

² Golsoladz ganle, zha nac grëse miñe bnee grë zha ne biadtteed xtiidz Dios padzeela; golsoladz zha nac grë miñe rnabey Jesús, miñe biadseed no to. (Jesús, men ndzon ne rnabey ne, men ne psilaa ne lo grëtaa xtol ne.)

³ Racladz naa gacnan to ganle, len dze ne ziaadyob guiaad Jesús, zrieequia zha ne gzhidznie xtiidz me, csilo zho gun zho grëtaa guielyozh ne gzoobladd zho;

4 guiab zho: “iPe giladz ne nazho guiaad Jesús! Telne nli rëb me laa me guiaad, ¿yo me na? Grë xmengol ne, zha ne scataa pquiambëz me, laa zho gutle, ¿cho na zho guiaad? Znutaque nac lo guidzliu wlal ne brew.”

5-6 Squiaalo zho rsoladzd zho zha bnitlole guidzliu tib vuilt, ni zhagaa nitlo miñe no niina. Wen wen nan zho ganle zha bnabey Dios biala guidzliu, me bnabey brieew lo nis, ni masaque lo nis now; mincoccxe waa nis bnitlow glo.

7 Scaque, nacle xtiidz Dios, zigtaa gbaaw, zigtaa guidzliu ne no niinaw, laaw nitlo, per lo guile nitlow; ni lo gui co nagon ygaa grëse zha ne run guielntseeb ted zho caxtigw.

8-9 Zha ne rzac quiayaanladz Jesús diidz ne psan me ga, per led quiayaanladz mew; sinque laa me quiambëz tebaa grëse miech gac-wen lo me. Laa me racladz, grëse zho csaan xquielntseeb zho, zeena ni tib zho nitlod. Bets, bzian, nanle to ganle led yed me ngab xtse. Sac tel me, ncuaane gun ne tib milraa iz, tib dzeque gun mew; nroob rzac ne tib mil iz, per par me rzacse mew, lal ne rzac ne tib dze.

10 Ib laa me no guiaad, per choot nand dien pa horpaa guiaad me; laa me guiaad zig rzëëbse tib ngbaan yu, tibaque zeene gan miech laa me ziaadle. Grëse ncuaane no, hor co laaw lozh; bidox ne gdzieb ne tso zeene laa gbaa nitlo; grë mel ne ndziib gbaa, masaque gazbel ma; haxta guidzliu, dib nacesw laaw tsec.

11 Scataa nagon nitlo guidzliu rii, ni grëraa ncuaane rdzian ne niina, jgolguien sca golban zigne racladz men ndzon ne rnabey ne, gunctaldras to xtol to!

12 Tibaque golconie guic to ne ib laa me no guiaad; tibaque ndzinli golban, gollu ne quiambëz to gdzinniob dze ne sca gazbel grë ncuaane ran ne gbaa, dze ne sca tib guiaalse grë ncuaane niaaw.

13 Horco nagon laa ne dzian tib gbaa cub, laa ne dzian tib guidzliu cub ne psanle me diidz ygaa ne; zaatne tsodraa guielntseeb.

14 Bets, bzian, nligaa goltsoxco ndzinli golban, gunctalde to xtol to; niowse golbannie samiech to, zeena gal dze ne laa Jesús guiaad, ine gleynie me to gan me mban to zigne racladz me.

15 Golsoladz ganle, porne quiambëz me gbig grëraa miech lo me csilaa me zho lo dol, min co gane gard guiaad me.

Ye bets ne Pabl, men ne nziuu lo ne, lo grë guielniini ne rdeed Dios lo me rquiaa me grë guits ne zixeel me, zineelee me lo to grë miñe none naa nu.

16 Parga nli no miñe rnee me ga, ngan guien ne zha naca; grë zha ne rdziinpaal racladz ctsëe Xtiidz Dios, zeene laa zho rneew, laa zho rneelew zigne racladz zho; zigne runaque zho grëraa miñe zhobnee lo Xtiidz Dios. Zha ne sca run, lëëque zha noguib nitlo zho ga.

17 Laa naa rzet grë min rii lo to nu, zeena nsin so to, ib gdeete to diidz cho grë zha ntseeb ne sca nac guiaadquidie to, yquuil zho to csaan to miñe nac diidzli, csaan to nëz ne ziele to i.

18 Goltsoxco zig zie dze guienraa to pa lotaa rleynie Dios to, ni guienraa to cho nac Jesús, men ndzon ne rnabey ne, men ne psilaa ne lo dol.

Me nac men non, me nac men nziuu, ible me rieguial gunnon miech, zigtaa niinaw, zigtagaa grë izdoo ne ziaadraaw. Sca rieguiala.

Pedr

GUITS NE GLO PQUIAA JUAN

¡Diuzh to!

Laa naa gzodiidznie to ganle cho nac Jesús.

¹ Jesús nac Diidz Ndzon ne rdeed guielmban. Notaque me, nole me zeene bre guidzliu. Bdziñ dze biaad me lo guidzliu; grop diag no bdzion no grè mine bnee me, grop lo no bdzion no grè mine been me; sac bdzionpaa no zha rac me, zha rnee me, haxta bzhiien no nia me.

² Ni niina laa no quianee lo miech ganle cho nac me; golgacnan ganle, me rneedz tib guielmban ne gdzind dze lozh. Zaatne no Dios men ne nac Pxoze, ga no me; zeene biaad me lo guidzliu dzigo bdziunbey no me.

³ Gacxe waa, mine rnee no lo to led lega rneed now; nozhal bdziona, nozhal bdziona. Laaw rnee no lo to, zeena tipse gac ne grè ne, gacnie to no zigne nacie Dios no (men ne nac Pxoze), zigne nacie Jesús no, men ne nac Xpèed me.

⁴ Laa naa rnee grè min rii lo to lo guits ne rxel naa nu, zeena zigne nonley zdo no scaquegaa to tsonley zdo to.

⁵ Znu nac mine bdzion no pseed Jesús miech, rëb me: Nac Dios zig nac tib biini, ni tib lë guielcow guiend zaatne no me; laa grè dol, masaque naca zig nac guielcow. Ni mincoque gon rnee no lo to.

⁶ Gacxe waa, telne rnee ne naciele ne me, ni rlozh ga tibaque lo guielcow co no ne, rquidie ne ga dzigo.

⁷ Telne nliipaa mban ne lo xbiini me, zigne mban Jesús lo biini co, dzigosi haxta tipse nac ne grè ne; ni scagaa, xchen Jesús nac mine csanmbe ne lo grëtaa xtol ne.

⁸ Nana tel guiab ne: Tel naa ib peet dol rapd naa. Lëëque ne noquidie ne ga, rneelid ne ga zha nac ne.

⁹ Sangue telne cxobdol ne grëse xtol ne lo Dios, ible tedsod silaa me ne lo grëtaa dol co, sanmbe me ne lo grëtaa guielntseeb ne zidziun ne; sac ible laa Jesús gut par csanmbe me ne.

¹⁰ Telne sca guiab ne rapd ne dol, rrieequia dzigo rzoob ne Dios zig tib men ne rquidie; sac tel me, nanpaa me grëse ne miech ngoopdol nac ne.

2

¹ Xin yeena, laa naa rso diidz lo to: Guntaldraa to xtol to; telne nandgaa new cho tib to zha been pe tib dol, golsoladz ganle no tib men ne quianab lo Dios men ne nac Pxoze ne yquia zdo me ne, lëë men co nac Jesús, lo me golbig (tel me ni tib dol rapd me).

² Sac me bded grëtaa guielnë ne rioguiäl ne ndieed ne por grëtaa xtol ne, psanwen me ne lo Dios; me goc zig tib gon ne pcaania Dios gozh grëse xtol ne, ni xtol grëraa miech ne ndxie dibdoose lo guidzliu.

Golleynie samiech to

³ Golgona ganle: Telne run ne grëse mine rnabey Dios, gase rien ne ne nli xnëz me no ne.

⁴ Laa tel zha ne rnee: “Xnëz me no naa”, ni rlozh ga rund zho grë mine rnabey me, rquidie zho ga.

⁵ Sac zha ne nli rleynie Dios, rioxco zho rban zho zigne nac xtiidz me; ni tel ne, ndion ne ganle nli xnëz me no ne.

⁶ Gacxe nagon waa, zha ne rnee xnëz me no zho, ib none zaacse gban zho, zigne wban Jesús zeene biaad me lo guidzliu.

⁷ Bets, bzian, golgacnan ganle, none gleynie to samiech to. Guiabde to togo ncub miñe rne naa lo to nu gun to, laa naa rzet miñe binle to glo zeene psilo pquiaadiag to Xtíidz Dios. Niicle ne padzeelale zhozneew, niicle ne psiloaadiagle tow,

⁸ per rrieequia ncuba niina; sac gon zeene biaad Jesús, me blu ganle zha none gleynie ne samiech ne. Ni scagaa niina ne laa to zianała, laa to noriee lo guielcow ne no to glo, laa to nozëëb nëz lo xbiini Dios.

⁹ Ga nagon, tel zha ne rnee lo biini co mban zho ni rlëënie zho samiech zho, rquidie zho ga; bii lo guielcow ga mban zho.

¹⁰ Zha ne rleynie samiech, zha cosi nli lo biini co mban zho, noxtseebd lega tsobe zho, sac ranpaa zho pa lo zie zho;

¹¹ sangue zha ne rlëënie samiech, lo guielcow ga no zho. Masaque nac zho zig zha ne rold lo, niicle zha rienđ dien pa nëz tsie zho, sac guielcow co quiantse lo zho.

¹² Xin yeena, laa naa rne grë miñ rii lo to, sac gon, tel to laa Jesús bdiizhle tel pe nactaa grë xtol to.

¹³ To ne nac to dad, laa naa rxel diidz rii lo to, porne nac to zha ne riladzle Jesús, nanle to ganle ntaaque me, nole me zeene bre guidzliu. Togaa ne nac to zha nguieg, laaw rxel naa lo to, sacne nligaa dziits zo to, rrieelodraa mendox yquii ma to. To ne nac to mëëdas, xin yeena laa naa rxel diidz rii lo to, porne nac to zha ne nole xnëz Dios meñ ne nac Pxoz ne.

¹⁴ Nana sca, zigtaa tow ne nac to dad ne runbeyle Dios; zigtagaa tow ne nac to zha nguieg, ne nataa ndip ndaan to laa to pcaaniale Xtíidz Dios dib zdoos to, ne nac to zha ne lëbdraa mendox yquii,

¹⁵ golguien, gleyniede to grë ncuaañe rap to, gleyniede to grë ncuaañ ndzinlid ne rac lo guidzliu rii. Zha ne rleynie grë ncuaañ co, nliđ rleynie zho Dios meñ ne nac Pxoz ne;

¹⁶ sac grëse ncuaañe rac lo guidzliu rii (zig nac zha ne zianał ncuaañe gdeedguxt xcuerp, zha ne rzoobladz yquianie ncuaañe rdziladztaa, zha ne racniats lo samiech), grëse ncuaañ co led Diosd rnabeya, sinque lëë miñe rzonał grëraa miech lo guidzliu ga.

¹⁷ Ni na tel zig nac guidzliu, zig zie dze laaw quialozh grëw grë ncuaañe rleynie miech low; sangue zha ne mban zigne rnabey Dios, laa zho bgaale tib guielmban ne gdziñd dze lozh.

Zha ne rlëënie Jesús

¹⁸ Xin yeena, zhile gdziñ dze ne laa guidzliu nitlo. Led binle to ganle ib zrieequia tib zha ne glëënie zhiwseed Jesús, ni nligaa niina len dze rii ndal-le zaatne norieequia grë zha ne rsilo quiatidil Xtíidz me; gane ndion no ne laa dze co ziaadgaxle.

¹⁹ Nli ladaque zha ne nacgrë ne brieë grë zha co, per nliđ nacniepaa zho ne; sac tel niaca miñe nlipaa nacnie zho ne, nrieextsod zho. Ga nagon blu zho ne nliđ nacgrë zho ne.

²⁰ Sangue to, nacde to zig nac grë zha co, sac nacnie Espiritu Sant to, bneedz me guielbiini lo to runbey to miñe nac diidzli.

²¹ Guits ne rxel naa lo to nu, nacda par cseed naa to miñe nac diidzli, sac runbeyle tow ni haxta rien to pa miñ nac guielwquidie; sinque laaw ziaad lo to par gacnan to ganle zha nac zha ne noquidie i.

²² Grë zha ne rnee i nliid lëe Men ne zëëble diidz cxeel Dios lo guidzliu ga nac Jesús, noquidie zho miech ga. Ni zha ne sca run, rlëënie zho me ga; ni ne sca rliladzd zho cho nac me, yele Pxoꝛ me ga rliladzd zho.

²³ Sac zha ne rlëënie men ne nac Xpëed Dios, ga rlu ne nliid rliladz zho cho nac Dios; sangue zha ne rxobnen cho nac Xpëed me, zha cosi nli rliladz zho cho nac me.

²⁴ Laa naa rso diidz lo to sca: Goltsienal grë mine pseed to zeene gloopaa psilo bliladz to Xtiidz Dios, zeena zigtaa Dios, zigtagaa Xpëed mew, tibaque gbannie to me.

²⁵ Golsoladz ganle, laa Jesús psanle diidz ne ib zгаа ne tib guielmban ne gdzind dze lozh; lëe guielmban co yгаа grëse zha ne nacie me.

²⁶ Laa naa rzet min rii lo to, sac ne squi no grë zha ne ziaad racladz yquidie to.

²⁷ Sangue to laa Jesús pxeelle Espiritu Sant nacie to, rquind ne goon chora cseed to; sac Espiritu Santzhal rneedz guielbiini lo to rien to zha nac grëraa ncuuaane no gacnan to, ni mesi gon mine nac diidzli min co rseed me to, led yed me rquidie. Golguien sca, Jesús golbannie, golbannie me zigne noseed Espiritu Sant to.

Zha ne nac xpëed Dios

²⁸ Xin yeena, nanle to sca sozite to lo Jesús, sinque tibaque golgacnie me; zeena ine tibliladz gac to gal dze ne laa me guiaad. Sac zha ne sozit lo me gban zho zigne gacladztaa zho, zeene laa me guiaad mban gac zho; sac guielto ne guiaan zho lo me.

²⁹ Nanle to ganle, mesi zigne rieguial gac guielwxtis sca run mew; gacxe waa, grëse zha ne nac xpëed me ible zdeed me mine rieguial zho.

3

¹ Golwi ganle pa lotaa rleyne Dios ne, laa me rneedz diidz laa ne gac mëed lo me. ¡Ni nligaa tel ne, xpëedle me nac ne! Grëraa miech rliladzd zhow, sacne runbeyd zho cho nac me.

² Bets, bzian, ne nligaa xpëedle Dios nac ne. Nli ndiond ne niina dien zha glu ne gal dze ne laa Jesús guiaad, per mine ndionpaa ne, zeene gal dze co laa ne gac zigne nacpaa me; ni dzigosi laa ne dzian me grop lo ne.

³ Ni grëse zha ne zienie guic yгаа guielnzaac co, tibaque rioxco zho zig zie dze nosaan zho ncuuaane runctal xtol zho, sac tel Jesús randzed me dol.

⁴ Grë zha ne runctal xtol, xley Dios ga rguiits zho, sac grëse dol ne runtaa miech ga rlu ganle ne rond zho mine rnabey me.

⁵ Per nanle to ganle, laa Jesús biaad lo guidzliu, biaadsilaa me miech lo grëtaa xtol zho; ni mesi ni tib dol rapd me.

⁶ Gacxe waa, zha ne nlipaa nacie me, zienaldraa zho ncuuaane gunctal xtol zho; laa grë zha ne tibaque noyunctal xtol, gase rlu ne gard guien zho cho nac me, gard gunbey zho me.

⁷ Xin yeena, ib gliladzde to mine rnee zha ne racladz guiaadquidie to. Golgan ganle, zha ne mban zigne rdziladz Dios, lëe zha co nli mbe zdo, zigne men mbe nac Dios;

⁸ sangue grë zha ne tibaque quiayunctal xtol, xnëz mendox ga ngab zho; sac tel mendox, desde padzeela tibaque guielntseeb quiayun ma. Ni min co nagon nacie biaadpaa Xpëed Dios lo guidzliu, biaadnitlo me grëtaa ncuuaane run ma.

⁹ Zha ne nac xpëed Dios, rdeetraa zho diidz guñctal zho xtol zho, sacne laa guic zho zienie gban zho zigne racladz Espíritu Sant, men ne nacie zho; rienle zho nodne guñctal zho xtol zho, sac laa zho nacle xpëed Dios.

¹⁰ Nienpaa cho nac xpëed Dios, chogaa nac xpëed mendox, sac grëse zha ne run guieIntseeb, grëse zha ne rleynied samiech, led xpëete Dios nac zho;

¹¹ sac gon, desde dze ne psilo bliladz to Xtiidz Dios, bingazh to ib none gleynie ne samiech ne.

¹² Zig nac Caín, xnëz mendox ngab Caín, gane beet me bets me loxaque ne ndzinli mban bets me, laa me niapse guieIntseeb run me. Ib gunde to mine been Caín.

¹³ Gacxe waa, bets, bzian, zeene gan to laa grëraa miech rlëenie to, ib tsode to zhgab guiab to pe nacne sca run zho.

¹⁴ Sangue ne rleynie ne samiech ne, gane ndion ne noxtseebdraa ne guioo ne gabil, laa ne bgaale tib guieImban ndzon ne gdzindraa dze lozh; sac zha ne rleynied samiech, nëz ne nitlo zho ga zie zho.

¹⁵ Grë zha ne sca rlëenie samiech, rrieequia rut zho ga, ni nanle to ganle zha ne rut samiech, gard yгаа zho guieImban ndzon ne gdzindraa dze lozh ga.

¹⁶ Ndion ne zha gleynie ne samiech ne, sac Jesús zhal blu zhaw zeene sca bleeladz me me gut me bdiizh me xtol ne. Gacxe waa, zha ne nlipaa rleynie samiech, none cueeladz zho zho, cueeladz zho ncuaañ rap zho, gacnie zho samiech zho.

¹⁷ Gzoob ne, tib zha ne rnee xnëz Dios no zho, nroob rapchen zho, ranlo zho rcaalsad pe yquini tib zha ne nacgrë zho, per ib rdeete zho palal pe yquini zha co. ¿Niacxe na nli rleynie zha co samiech zho ga?

¹⁸ Xin yeena, golgacnañ sca ganle, led loxaque diidzde, led loxaque laglaadse gnee ne rleynie ne samiech ne; sinque none glu ne nli rleynie ne zho.

¹⁹ Sca nagon none dziuun ne, dzigo niicle new ndionpaa ne nli xnëz Dios no ne, ni scagaa tsod pe nacne pe dzeb tsonie zdoos ne zeene laa ne gbig lo me.

²⁰ Tel zha ne rdzieb zdoos, sac rien zho noyund zho mine rnabey Dios, ib tedsod zlisqui Diosa lo zho; sac tel me grësew nan me.

²¹ Xin yeena, laa zha ne desde zdoos zho nan zho noguiitsd zho mine rnabey me, scagaa tibliladzse gbig zho lo me;

²² hor cosi ncuaañe gnabtaa zho lo me squiaadiag mew, sacne mban zho zigne rnabey me, ni noxco zho noyund zho ncuaañe rdziladz me.

²³ Ni lëe min rii rnabey me: Grëse miech, none dib zdoos zho gliladz zho Jesús men ne nac Xpëed me, ni gleynie zho samiech zho zigne psanle me diidz ga.

²⁴ Grë zha ne ron diidz run min co, ga rlu ne nlipaa mbannie zho me, ni scagaa me mbannie me zho. Ni ndion ne ganle, ib nli mbannie me ne, sac pxeel me Espíritu Sant nacie ne.

4

¹ Bets, bzian, zha ne gnë zhiEspíritu Dios nacie zho, goon ye zho quianee Xtiidz me lo miech; ib gunde to ne lëelëd gliladz to xtiidz zho, sinque golwigazh dien pe nli zhiEspíritu Dios nacie zho. Sac ndal grë zha ne quianéz lo guidzliu, rquidie zho rnee zho Xtiidz Dios noteed zho.

² Parne guien to dien pe nli zhiEspíritu Dios nacie zho, golwi dien zha rzac zho Jesús: Tel zha ne rililadz ne nli zig tib miech goc me biaad me lo guidzliu, ga rlu ne nli zhiEspíritu Dios nacie zho.

³ Laa tel riladzd zho ne nli sca baaad me, nliid dzigo zhiEspiritu Dios nacie zho; sinque lëele espiritu ne rtsidil Jesús ga nacie zho. Laa to binle ganle ib laa espiritu co guiaad; ni lëele espiritu ntseeb co nacie grë zha ne squi quianzë lo guidzliu niina.

⁴ Xin yeena, sangue to xnëzle Dios ngab to, yquidiedraa zha co to, sac gon mazdraa nroob poder rap men ne nacie to, lëdle espiritu ne nacie grë zha ne sca ziana grë wseed yozh ne no lo guidzliu.

⁵ Grë zha co, ncuuañ rac lo guidzliu rii nonie guic zho; gacxe waa, niapse lëew rnee zho, ni gagaa grëque zha ne rleynie grë ncuuañ co, zha co riladz zhiwseed zho.

⁶ Sangue ne xnëz Dios no ne. Ni scagaa zha ne runbey Dios, zha co rquiaadiag mine rnee ne; laa grë zha ne runbeyd me, rquiaadiagd zhow. Gase na ganle rlu cho zha nacie zhiEspiritu Dios, ni cho zhagaa nacie espiritu ne ziaadquidie miech.

Rleynie Dios miech

⁷ Bets, bzian, golgotsaa gleynie ne samiech ne, sac gon, tel Dios grëse ne rleynie me ne. Gacxe waa, zha ne rlu nli rleynie zho samiech zho, gase rlu ne nli xpëed Dios nac zho, nli runbey zho me.

⁸ Laa grë zha ne rleynied samiech, runbeyd zho Dios ga gane sca run zho; sac gon ib Dios rneedz guielbiini lo ne gleynie ne samiech ne.

⁹ Gotsaa gwi ne ganle, pa lotaa rleynie me ne: Tibpaa Xpëed me, ni pxeel me me baaadtizh me xtol ne, zeena ygaa ne tib guielmban ndzon ne gdziñd dze lozh.

¹⁰ Led guiabd ne togo glo miech bleynie Dios gane rleynie me zho niina; led scada, sinque ible zdoo me gola rleynie me ne. Ne nligaa gotsaa gwi ne ganle zha pxeel me Xpëed me, goc me zig tib gon ne gozh grëse xtol ne. Ga nagon rlu pa lotaa rleynie Dios ne.

¹¹ Bets, bzian, zigne scataa rleynie Dios ne, scaquegaa ne nagon none gleynie ne samiech ne.

¹² Gard tso tib zha ne gan Dios, per zha ne rleynie samiech, me ga nacie zho; ni zigse zie dze dib zdoora zho rleynie zho samiech zho.

¹³ Me nac men ne pxeel zhiEspiritu me nacie no, parne glu nacie me no, ni scagaa no nacie no me.

¹⁴ Ni stiba, grop lo no bdziñ no baaad Xpëed me baaad silaa me miech lo dol; ni min co nonee no lo miech niina.

¹⁵ Grëse zha ne riladz Xpëed Dios nac Jesús, ni rnee zhow lo miech, ga rlu ne nacie Dios zho, ni scagaa zha nacie zho me.

¹⁶ Ndiñ ne ganle nli rleyniedox Dios ne, sac rienpaa ne rleynie me ne, ni riladz ne zeene rnee me pa lotaa rleynie me ne. Ible niaa me par gleynie me, me rdeed guielbiini lo miech gleynie zho samiech zho, zigne rleynie me zho; gacxe waa, zha ne rleynie samiech, ga rlu nacie zho Dios, ni scagaa me nacie me zho.

¹⁷ Zig nac ne, niina ne laa ne naciele Jesús, zig zie dze laa ne lozh cseed gleynie ne me, ni gleynie ne samiech ne zigne racladz me; ni scagaa tsod pe nacne ctoladz ne, pe nacne gdzieb ne gdziñ dze ne laa me gun xquielwxtis me; sinque haxta gley ne dzian ne me gal dze co.

¹⁸ Nod pe nacne gdzieb ne me, sac gon ndiñ ne pa lotaa rleynie me ne. Led yedraa niina pe dzeb ne dzio ne, sac grëse dzeb rbiche zeene rien ne rleynie me ne. Zha ne rdzieb, zienie guic zho pe nac grë guielnë ne gan zho, ga rlu zho gard guien zho ne rleynie me zho, ni gardgaa guien zho gleynie zho me.

¹⁹ Gotsaa guien sca ganle, nli laa ne rleynie Dios, laa ne rleynie samiech ne, per glo me blu ganle pa lotaa rleynie me ne.

²⁰ Tel zha ne rnee, rleynie zho Dios, ni rlozh ga rlëenie zho samiech zho, rquidie zho ga. Sac gon, tel nand zho gleynie zho samiech zho, zha ne ranlopaa zho, ÷pe lel Dios dzigo gliladz ne nli rleynie zho, ni nac me men ne rand zho?

²¹ Sac gon, znu nac xtiidz Jesús: Zha ne rleynie Dios, zigne rleynie zho me, scaque none gleynie zho samiech zho. Ni min rii rnabey me dziuun ne.

5

Zac csaan ne ncuaañe runctal xtol ne

¹⁻² Grëse zha ne dib zdoo rliladz ne ible lëe Men ne zëëble diidz cxeel Dios lo guidzliu ga nac Jesús, grëse zha co xpëed Dios nac zho.

Grëse zha co, par guien ne dien pe nli rleynie ne zho, none guien ne dien pe nli rleynie ne Dios, dien pe nli run ne mine rnabey me. Nac cuent rii, zig nac tib yu miech, zha ne rleynie pxoz mëed, scaquegaa rleynie zho mëed.

³ Sac zeene rleynie ne Dios, zun ne grëse mine rnabey me. Ni grë mine rnabey Dios, nacda ncuaañe guiab ne grielod gun ne;

⁴ sac grëse zha ne nacle xpëed Dios, totsaque rnalo zho ne Jesús gun xyudar zho, gac-wetraade zho lo grë ncuaañe gunctal xtol zho.

⁵ Golgacnan sca: zha ne dib zdoo rliladz Xpëed Dios nac Jesús, zrieelo zho csaan zho grëtaa ncuaañe runctal xtol zho.

⁶ Tel ne, ndion ne ni rliladz ne ganle nli Xpëed Dios nac Jesús, sac zeene biaad me horne norobnis me, horne nolozh me, ga blu ganle cho nac me. Ni ye Espiritu Sant nolu ganle ne scaw, ni mine rnee me diidzliw.

⁷⁻⁸ Gotsaa gwi sca ganle, tson mod rlu cho nac Jesús: Tiba por mine nolu Espiritu Sant, stiba por mine blu zeene norobnis me, ni stiba por mine blu zeene nolozh me. Zigtaa mine nolu Espiritu Santa, zigtaa zeene brobnis mew, zigtagaa zeene nolozh mew, blu ganle Xpëed Dios nac me.

⁹ Mine rnee Dios, none gliladz new. Xtiidz samiech ne name rliladz ne, ÷pe lel mine rnee Dios dzigo gliladz ne?

¹⁰ Zha ne gliladz mine rnee Dios, rrieequia rzoob zho me ga zig tib zha ne rquidie; sangue zha ne gliladz mine rnee me, zien zho ganle nli Xpëed me nac Jesús.

¹¹ Laa me bneele ganle: zha ne gnalo Xpëed me, zgaa zho tib guielmban ndzon ne gdzind dze lozh; sac Xpëedse me rdeed guielmban co.

¹² Gacxe waa, zha ne rnalo Xpëed me, laa zho bgaale guielmban ndzon co; sangue zha ne rnalod Xpëed me, gard ygaa zhow.

Bgaale to guielmban ne gdzind dze lozh

¹³ To ne nac to zha ne rnalole Xpëed Dios, laa naa rzet min rii lo to zeena gacan to ganle laa to bgaale guielmban ne gdzindraa dze lozh ga.

¹⁴ Ni scagaa, ndionpaa ne rquiaadiag Dios xtiidz ne, zeene ncuaañe rio zdoo me rnab ne lo me;

¹⁵ ni zigne ndion ne rquiaadiag me xtiidz ne, scaquegaa none gliladz ne ib zneedz me ncuaañe rnab ne.

¹⁶ Zig nac zeene gan to cho tib zha ne nacgrë to been pe tib dol, ni rlu nacda dol ne gnitlo zho, zac gnab to lo Dios gun me zho perdon; ni gacan to ganle, ible zun me zho perdon. Sac gon no dol ne rnitlo, ni zha ne gun dol co, nodne gnab to lo Dios gun me zho perdon.

¹⁷ Nli grëse guielntseeb dol naca, per no mine rnitlod miech.

¹⁸ Ni ndion ne ganle, zha ne nacle xpëed Dios rundraa zho ne lega gunctal zho xtol zho; sac Jesús men ne nac Xpëed Dios, men co quianap zho, grielodraa lega pe gun mendox zho.

¹⁹ Zig nac ne, ndionpaa ne xnëz Dios no ne. Nli ndalraa zha ne zianal ncuaane rnabey mendox,

²⁰ sangue ne, laa Xpëed Dios bиаad bdixbiini me xquielrien ne bdziuunbey ne men ne nacpaa Dios. Niinasi laa ne ngable lo men ne nacpaa Dios ga, ni lëë me ga nac Jesús. Me nac Dios nguiamban, ni me nac men ne rdeed guielmban ndzon ne gdziind dze lozh.

²¹ Xin yeena, golguien Diosse nac men ne gleynie to; gunde to ne lel grë ncuaane no lo guidzliu rii gleynie to, laa ne gleynie to Dios.

Juan

BROP GUITTS NE PQUIAA JUAN

¡Diuzh to grēse to!

¹ Laa tib zhagol rii rxeel tib guits rii ziaad lo to i, ne nac to zha ne no xnēz Jesús. Dios bzooblo to, bredz me to ne laa to ngab xnēz me.

Ne nlipaa rleynie naa to gon, ni led naadsegaa, sinque ye grēraa zha ne runbey diidzli ne nac Xtiidz Dios.

² Rleynie no to sacne tibaque nac diidzli ne riladz ne, ni tsod dze ne csaan new.

³ Dios ni Jesús men ne nac Xpēed me, me glu ganle pa lotaa noxco me to, zeena peet tsienied guic to, ni yquia zdoos me to; ni zunpaa mew, sac rleyniedox me to.

⁴ Ne nlipaa gon bleydoo naa zeene gon naa nzian zha ne nocaania Xtiidz Dios i, noxco zho mban zho zigne nacpaa diidzli; zigne rnabey Dios men ne nac Pxoz ne.

⁵ Bets, bzian, laa naa rnab lo to, golgotsaa gleynie ne samiech ne. Guiabd ne togo ncub mine rne naa lo to nu gun to; sac gon, lēequew ga bdzion ne zeene psilo bliladz ne Xtiidz Dios.

⁶ Telne nli rleynie ne Dios, dzigo none gban ne zigne rnabey me; gacxe waa, none niowse gban ne, ine gleynie ne samiech ne, sac gon min co rnabey me.

⁷ Ndal zha ne quianzē lo guidzliu niina, noquidie zho miech, rnee zho nliid goc Jesús zig tib miech zeene baaad me lo guidzliu. Nsin golso lo zho, sac gon notsidil zho mine nac diidzli ga, rlēenie zho Jesús ga sca run zho.

⁸ Golguien, ib gdeete to diidz guiaadquidie zho to, zeena dziin ne quiayun to i gacda zhlēse. Goltsoxco tiblique golgac, zeena yгаа to grētaa guielnzaac ne no gneedz Dios lo to.

⁹ Sac gon, zha ne csaan mine nacpaa zhiwseed Jesús, led xnēzdraa Dios ga no zho; ni scagaa, zha ne zienalpaaw zigne naca, zha cosi xnēz Dios ga, xnēz Xpēed me Jesús ga no zho.

¹⁰ Gacxe waa, zha ne guiaad lo to i ni tel ziaadnied zho wseed ne nacpaa Xtiidz Jesús, ycaaniade to zho. Ib gdeete to lidz to cuēz zho, ib tsode to gnee to pe diidz ne csaanziuu to zho;

¹¹ sac telne sca gun to, rrieequia yele to rleynie grē zhiwseed yozh zho ga.

¹² Ndal grē ncuane no gne naa lo to, per racladz naa gzet naaw lo guits rii. Laa guic naa no guialgan naa to i, dzigo mazd hor co naazhal gnew lo to; zeena nroob guielbley ne dzio ne grē ne.

¹³ Grē zha rii, zha ne bzooblo Dios bredz me zigne bredzaque me to bzēeb to xnēz me, laa zho rxeel bdiuzh lo to grēse to.

Juan

BION GUITS NE PQUIAA JUAN

¡Diuzh bets!

¹ Laa zha gol rii, pquiaa tib guits rii ziaad lo luu i gon Gay, ne nac luu tib zha ne nziuu lo naa.

² Bets, rnab naa lo Dios zigne squi wen mban luu nëz lo me, scaque zaacse grieequia grëtaa ncuaane gun luu, ni gneedz me guieIndaan lo luu.

³ Ne nlipaa bley naa, zeene biaad bla zha bets ne nu, bzodiidz zho lo naa squitaa ndzinli mban luu, tibaque noxco luu zienal luu miñe nac diidzli.

⁴ Ne nligaa, nodraa pe stib conley zdoo naa zigne rleytaa naa zeene ron naa ine niowse mban grë zha ne biane naa xtiidz Dios lo, zienal zho miñe nac diidzli.

⁵ Bets, ziyon naa squitaa tibaque noxco luu run luu xyudar grë zha ne nacgrë ne, ni mazdraa zeene nac zho zha ne ziaad stib guiedz. ¡Wen ga!

⁶ Squi ndxie grëraa zha ne rliladz Jesús, rzodiidz zho squitaa nquialadz luu zho. Bzhiguiel sca, bioxco tibaque squi been xyudar zho zeena griee lo gdzin zho zaatne no tsie zho. Sca rdziladz Dios.

⁷ Sac gon, niapse porne rleynie zho Dios, laa zho brie ziegun zho xtsiin Jesús, ni ib rziguiel zho ycaania zho ncuaane rdeed grë miech ne rliladz Xtiidz Dios.

⁸ Min co nagon, ib none ne yquiambiaazlo zho, ne none gdeed ncuaane yquiiñ zho, zeena dziuun ne xyudar zho ygaaz Xtiidz Dios.

⁹ Pxelle naa tib guits lo grëse zha ne no xnëz Dios i, per zig nac Diótrefes gon, men ne racladz so gnabey lo to i, rond me miñe rnee no.

¹⁰ Gacxe na, telne laa naa guial i, dzigo laa naa glisqui lo me dien pe nacne quianeene me no.

Ni tebaa mincose, na haxta run me ib rbëzlod me grë zha bets, zha bzian ne rlanso i; niicle rdeetegaa me diidz cho gdeed zaatne cuëz zho. Zha ne run minne racladz me, rbee me zho lad grë zha ne nacgrë zho.

¹¹ Bets, sangue luu gon ib tsienald luu miñe run grë zha ne sca run guieIntseeb, sinque bioxco güeynal ncuaane ndzinli. Sac gon, zha ne run niapse ncuaane ndzinli, xnëz Dios no zho; laa grë zha ne run ncuaane ntseeb, gard sëeb zho xnëz Dios.

¹² Zig nac Demetr, grëse miech rnee ganle zaacse mban Demetr. Ni rlugaa nliw, sac gon tibaque zienal me miñe nac diidzli. Niicle nogaaw, mincoque rnee no, ni nan luu ganle led yed no rquidie.

¹³ Ndalraa ncuaane no gne naa lo luu, per racladz naa gzodiidz naaw lo luu lo guits rii;

¹⁴ sac laa guic naa no guialgan niob naa luu i, dzigo hor co ziodiidz ne grop ne.

¹⁵ Guiaannie Dios luu sca; peet tsienied guic luu. Grëse xamigw luu zha ne runbey luu nu, laa zho rxëel bdiuzh lo luu. Scagaa bzhiguiel bdeed tib zhibdiuzh naa lo tib tib zha ne nac xamigw ne nëz qui.

Juan

GUILTS NE PQUIAA JUDAS

¹ Naa nac Judas, bets Santiagw; xtsiin Jesús quiaiyun naa.

Laa naa rxel guits rii lo to, grése to ne nac to zha ne bredz Dios bzëëb xnëz me. Ne nligaa nquialadz me to, ni haxta quianap Jesús to.

² Dios glu ganle pa lotaa rquia zdoe me to, pa lotaa rleynie me to, ni pa lotaa noxco me to zeena peet tsienied guic to.

³ Bets, bzian, mine gocladz naa nzet naa nu ganle zha nactaa mine been Dios psilaa me ne lo xtol ne; per na rgobey naa nonguielraaw cso naa diidz lo to, ib gandzede to grë zha ne rtsidil mine riladz ne. Dios bneedz diidz gocndion new, ne nac ne zha ne brieel doj bziaab ne xnëz me.

⁴ Sac gon, blalaa zha ne rquiaalo riladz Dios, nguets zhliian laa zho bzëëb lad to i. Miech yozha, niapse lo doj no zho, rnee zho zac gun ne ncuane guiaabtaa guic ne, sac nquialadz Dios ne; ib riladzd zho Jesús, Men ro, Men nroob ne rnabey ne. Padzeelale goquiet, ne grése miech ne sca nac, lëëque lo xtol zho nitlo zho.

⁵ Gosoladz ganle zha bzhaac grë zha ne gocntseeb lo Dios padzeela. Niicle ne nanle tow, per laaw gzet naa lo to nu, zeena csoladz tow: Zeene psilaa Dios grése menladz ne lo guielné ne noded zho Egipt ga, zha ne brieequia ib bnëd niunbey me, ib gondzed me zho, bnitlo me zho.

⁶ Scaque grë anjl ne biche lo me, psaan zho dziin ne pso me zho; bdziguiend me zho, laa me nsioogyu zho tib lo guielcowdoo, ga quiaadoo zho haxta gdzin dze ne laa me gun guielwxtis.

⁷ Rsoladz to ganle zha goc guiedz Sodom, guiedz Gomorr, ni grëraa guiedz las ne bre gax ga. Grë miech ne bio grë guiedz co, laa zho güeynal mine nacdreaa guieltsieel, tel chotaa pquiangob zho, bionie zho haxta grë mrazh; grése zho, lo gui ga bnitlo zho. Ga rlu ganle, grése zha ne csaand xquielntseeb, no tib lo guidox ne gdzind dze guiuu, ni ga nitlo zho.

⁸ Ni zha ne gon blanso lo to i, scadaa run zho; sac tel zha, niapse guielyozh zienal zho, laa zho nosanbeed xcuerp zho, ib rond zho mine rnee zha ne rnabey, haxta rdzibdee zho grë men non ne no gbaa.

⁹ Per ni anjl Miguel, anjl rnabey ne bdilnie mendox zeene güeyla me xcuerp Moisés, ib beend ne ndziibdee me mendox; lëë gdib rëb me: "¡Dios nac men ne gunquizh luu mine run luu i!"

¹⁰ Laa grë zha qui, haxta grë ncuane run Dios, ncuane ni rioguicd zho zha nac, laa zho rdzibdeew; masaque mban zho zigne mban grë ma, laa zho run ncuane rdeedtaa guxt xcuerp zho; lëëque zha nonitlo zho ga.

¹¹ ¡Probsaxe zho! Sac gon, nëz ne zey Caín ga zienal zho. Lo guielblë dimi, laa zho brieel xnëz Dios zigne brieel Balam; ni zigne gut Coré zeene gocntseeb me lo Moisés, scaque nitlo zho.

¹² Zeene riaad zho lo guielwagw ne run to, loxaque rzhidznie zho, loxaque runnguzee zho, rzob zho rlozhd gowcho zho, zieniedraa guic zho dien chora no gow; ni lalnu guielto guiend lo zho. Nëzrii nëzrec quianzë zho, masaque nac zho zig nac xcow ne ziaadnie nisguie, loxaque nëzrii nëzrec rienie mew; zig nac tib yag bgool ne guierend nex lo, len dze ne no yquia nex low. Laa zho bnitlole ga, masaque nac zho zig tib yag bidz ne bliaadzle dib lo; sac tel yag bidza, gdzindraa dze ne yguiaw.

13 Zigne nēzrii nēzrec rchoon nisdoo grē mtsiin beed ne ndziib low, scadaa nēzrii nēzrec nolu grē ncuuaņe mbeeguielto ne quiayun zho. Laa zho ziele nēz lo guielcowdoo ne rieguiāl zho, zaatne gdziņdraa dze greec zho; zig tib mel gbaa ne britnēzle, laa mā nonziaabse lo guielcow.

14 Lēēle zha qui ga bzeat Enoc (meņ ne brieequia lo dii ne rac xoop xtiī Adán), zeņe psiaab Dios guic me, rēb me: “Gołwi gaņle laa Dios ziaad, pe zhidaa grē aņl ne ziaadnie me,

15 ziaadguņ me guielwxtis. Grēse miech ntseeb, laa me guņquizh zho grētaa doļ ne beēn zho, grētaa diidz dox ne brieē ro zho bneenē zho me.”

16 Ni nligaa sca nac grē zha qui, īb nod ncuuaņe tso zho conform, tibaque wlisqui no zho; laa zho zienāl grētaa guielyozh, ncuuaņe racladztaa xcuerp zho. Rto zho guielđzin, rlozhd dieēn pa rac zho, rio zho pe diidz wen ne rnee zho lo miech, loxaque ne dien zha yquidie zho miech, guņ zho miņe racladz zho.

Laa naa rso diidz lo to

17 Sanguē to bets, bzian, gołsoladz miņe bnee grē zha ne pxeļ Jesūs bnee Xtiidz me, zeņe biadseed zho to;

18 led znu rnee zho: “Zeņe zhile gdziņ dze ne laa guidzliu rii nitlo, zrieequia grē miech ntseeb ne gzhidznie zhiwseed Jesūs, laa zho gban zigne nactaa grē zhgab yozh ne guiab guic zho.”

19 Ni nligaa ran to niina gaņle sca quiayaca, lēē grē zha co i squi nogodiļ grē zha ne no xnēz Jesūs. Nacnied zho Espiritu Sant, gane niapse grē ncuuaņe doļ ne racladz xcuerp zho, miņ co ruņ zho.

20 Bets, bzian, golguiēn sca tibaque dziits gołso lo Xtiidz Dios miņe rliladz to. Gołzodiidznie Dios, zigne csiaab Espiritu Sant zdoo to.

21 Sozite to lo Dios, golguiēn gaņle zha rleynietaa me to; golquiambēz dzian ne gaļ dze ne yгаа ne guielmban ne gdziņd dze lozh, miņe ndioņpaa ne gneedz Jesūs meņ ne rnabey ne, porne rquia zdoo me ne.

22 Teļ cho zha ne racchop guic lo Xtiidz Dios, goļnee lo zho biire sodziits zho stib.

23 Zha ne bii no lo doļ, goļnee lo zho guieņ zho csaan zhow; goļcueē zho lo gui ne noxtseeb zho yгаа zho ga; scaġaa grēraa miech, goļquia zdoo zho, per īb cxende to lo zho. Ni lalnu gdziguiende to grē doļ ne ruņ zho, goļsaca zig rzac to tib ncuuaņe rbixnē zdoo to raņ to.

24-25 Tibaque Dios no, me psilaa ne lo doļ, ni megaa csilaa grēraa miech. Meņ nroob nac me, ni zrieelo gacniēn me to guiabde to ladznia doļ stib; zeņa iņe mbe to, iņe rley to laa me gdziņnie to zaatne nac lo guielndzondoo ne no me. Niina ne laa ne rdziuunbeyle Jesūs, zrieelo dzioolnie ne me, mese nac meņ nroob, meņ ndzon, meņ ne rap guielrnabey. Tibaque nac me, niicle mazd glow, niicle niinaw, ni gdziņd dze ne gdzēē me.

Judas

MIÑE BDEED DIOS DIIDZ GON JUAN

1 Nu raquiet grē ncuaañe ziaadyoble gac. Dios bnabey Jesús glu mew lo grē zha ne no xnēz me. Nacne pxeel Jesús tib xanjl me biaad biaadluw lo ngundziin win ne nac naa nu, parne sca gacnañ zhow.

2 Grēse miñe gon naa, grēse miñe bin naa ga, laaw gne naa zigne gonse naaw, zigne binse naaw. ¡Diidzliw!

3 Dichos grē zha ne glab lo guits rii, ni dichos grē zha ne yquiaadiag grē miñe zhonee low nu, ycaania zhow ni gliladz zhow; sac gon xtiidz Diosa, ni laa dze ne gac grē miñe rzeeta nu, ziaadgaxle.

4 Naa nac Juan, laa naa rquia guits rii rxel naa ziaad lo to i, ne nac to zha ne ngab xnēz Jesús, zigne nose to gza gadz guiedz ne ndxie nēz Asia i.

Dios meñ ne no padzeela, meñ ne no niina, meñ ne nacle diidz guiaad, me gacien to lo grē zhizhgab to, me cchoobladz zdoo to peet tsienied guic to; me ni Espiritu ne zo lo me zaatne nac lo xcan ndzon ne zob me; Espiritu ne rlu zha nac gadz guielñiini ne rap me;

5 ni Jesús meñ ne rnee niapse diidzli, meñ ne glopaa brieegan lo guielgut, meñ ne rnabey lo grēse zha non ne rnabey lo guidzliu.

¡Gotsaa dziuunnon ne Jesús! Sac gon pa lotaa rleynie me ne, bleeladz me me bzhiee xchen me psañme me ne lo grētaa xtol ne,

6 tibaque been me ne, psañnon me ne; bzooblo me ne gac ne pxoz ne gun dziin lo Dios meñ ne nac Pxoz me. ¡Mese nac meñ ne rap guielndzon, mese rap grētaa guielrnabey! ¡Tsoo cho stib zig me, ni gdziñ dze ne nitlo xquielrnabey me! Sca nac me.

7 ¡Bii zanaque to ganle zeene laa Jesús ziad-zēeb lo xcow! Grēse miech zan zho me, zig nac zha ne sca bdiñ me, zha ne sca bliz lanz cue me, zanlo zho me; dibdoo guidzliu, hor co mbanse gac miech, haxta zoon zho, haxta zdieb zho. Ible sca none gaca.

8 Znu rnee Dios, meñ nroob ne rap grēse guielrnabey: “Grēse ncuaañe notaa, naa psilow ni naa csiaala; naa nac zigne nac letr “a” ni letr “z” lo grēse letr, “a” rsilow, “z” riala, zigne nac naa niina sca goc naa padzeela, ni scaque gac naa zeene laa naa guial stib.”

Gon Juan Jesús

9 Naa nac bets to Juan, tibaque nac ne niina grē ne, sac ye naa no xnēz Jesús; ye naa nodeed grē guielñe ne noded to. Zigne rneedz me paciens lo to lēb to lo grētaa guielñe ne no gan to, scaque racniñ me naa; ni ye naa gdziñ lo me, zaatne no gdziñ to.

Sodiidz naa lo to ganle zha bzhaac naa. Lēetaaque no naa lo guidzliu win ne lē Patmos, ga ngoguiñ zho naa loxaque ne noseed naa miech Xtiidz Dios, miñe biaadlu Jesús zeene biaad me lo guidzliu.

10 Tib dze, lēetaque nacie Espiritu Sant naa nozodiidznie naa Dios, tibaque zeene nguiedz zēeb tib tsi meñ co, pale tsi tib trompet;

11 nē me lo naa:

—Grētaa ncuaañe ran luu nu niina, pquiaaw tib lo guits pxeela lo grēse zha ne ngab lo naa, grē zha ne no gza gadz guiedz rii nēz Asia: Efés, Smirn, Pérgamo, Tiatur, Sardis, Filadelf, ni Laodicé.

12 Ptsire lo naa ni naa gwi naa dien cho ga sca rnee lo naa. Zeene bui naa, gon naa gadz candeler niaa niapse guiib or.

¹³ Glowtaa lo gza candeler co zo tib mgui zigne rlu miech lo guidzliu rii, nacw me tib lar nool rdzina haxta yan ni me, ni ndxie tib cinch niaa niapse guuib or ngali ro zdoos me.

¹⁴ Ine bie rna guitsguic me, zootle zhiil nquits, zootgaa luu guieg, masaque riaazbel bziaalo me.

¹⁵ Ni mew, masaque rquiabniw zigne rquiabni guuib brons zeene rlozh riaanmbew, zeene rrieenēzgaaw lo gui; tsi mew, masaque rio bi rnee me zig rio bi grē guibee nroob ne zhoob naal nis.

¹⁶ Nia me miñe nēz derech, nzhen me gadz mel gbaa; ni zob tib spad ro me, zigtaa nēz zhiits spad cow zigtaa nēz low, gropsē nēza ndox. Masaque biimidoo ne rriee lo me, zigne rlu lo ngbidz zeene lega recye lo ngbidz.

¹⁷ Zeene gon naa me, mbe biaab naa zhan ni me zig tib zha ne gutle. Dzigo blis me nia derech me pxobnia me guic naa, nē me lo naa:

—jGdzieebd luu! Naa psilo ni naa csiaal, naa psan grētaa ncuaañe no, ni naa gnitlow;

¹⁸ ni mban naa. Nli gut naa per briebaan naa, mban naa niina, ni gdzindraa dze ne guet naa; ladznia naa no guielgut. jGdzieebd luu sca!

¹⁹ Grēse ncuaañe noyan luu nu niina, pquiaaw lo guits grēsew, niicle miñe noyaclew, miñe naragaa gaca.

²⁰ Znu gon nac mine blozh gon luu ga: gadz mel gbaa ne gon luu nzheen naa ga con nia derech naa, tib tib mel co nac tib tib zha ne quianap yadoo ne no gza guiedz co; laa gza gadz candeler co, nac tib tib yadoo co.

2

Diidz ne bnee Jesús lo zha Efés

¹ Blozh ga nē me lo naa:

—Mine gni naa lo luu nu niina, pquiaaw pxeela Efés, lo zha ne quianap grē zha ne ngab xnēz naa ga, gudz lo zho: “Znu nac xtiidz men ne nzhen gza gadz mel gbaa co, men ne zodeed vuelt lo gza gadz candeler ne niaa niapse guuib or ga, rnee me:

² Nan naa zha mban to, nan naa pa lotaa noxco to run to xtsin naa, ni nade to zha ne lega znuse guiaan zdoos; stiba, ib ranzede to grē zha ntseeb. Grē zha ne ziyaad i rnee zho Dios pxeel zho ziadnee zho xtiidz me, per pquia to been to zho prueb, haxta gocnañ to rquidie zho.

³ Nan naa zha nactaa guielñe ne noded to loxaque ne riladz to naa; per niicle scaw tibaque dziits zo to, ib riaand zdoos to.

⁴ Loxaque naca no tib ncuaañe glisqui naa lo to: jRleyniedraa to naa niina, zigne rleynietaa to naa glo, zeene glopaa bliladz to xtidz naa!

⁵ Golsoladz pa lo pxin to. Golbiire golgac stib zigne nac to glo zeene psilo bliladz to xtidz naa; sac gon, telne gac-wende to, ible zial naa i zialtichee naa xcandeler to zaatne zow.

⁶ Nli rleyniedraa to naa scataa, per rley naa ran naa ib rdziguiende to grē ncuaañe ndzinlid ne run zha Nicolaít, sac tel naa, ni lalnu ib rdziguiend naa ncuaañe run zho.

⁷ Zha ne rioguicle godiidz rii, yquiaadiag zho ganle zha rnee Espiritu Sant lo grē zha ne no xnēz naa, rnee me: Grēse zha ne gdeete diidz gac-wet zho lo ncuaañe guncat xtol zho, zha co ygaa gow xnex yag ne rdeed guielmban ga, miñe zob len huert ndzon ne rap Dios ga.”

Diidz ne bnee Jesús lo zha Smirn

⁸ Blozh ga nē me lo naa:

—Pquiaa mine gni naa lo luu nu, pxeela Smirn, lo zha ne quianap grē zha ne ngab xnēz naa ga, gudz lo zho: “Znu nac xtiidz meṇ ne psilo grētaa ncuaaṇe no, meṇ ne csiaala, meṇ ne gut ga ni brieeban me, rnee me:

⁹ Raṇ naa zha nactaa grē guielnē ne noded to. Raṇ naa mban rac to guiend grē ncuaaṇe yquiin to (nligaa peet rapde to lo guidzliu, per guielnzaac ne bgaa to i ngab to lo Dios, nroob nona). Raṇ naa, grē zha ne rnee i xpēēd Dios zho sac zhasi zha Israel nac zho, no zho rneenē zho to; per nliḍ goṇ xpēēd Dios nac zho, sac zhiwseed mendox zienal zho.

¹⁰ Nroob grē guielnē ne ziaadyob gaṇ to, per gdziebde to. Squiil mendox miech, gnab zho tso to ladzguiib; ga nagon glu to dien pe nli dib zdoḍ to rililadz to naa. Nli nzianlaa to guiab ladzguiib, per tib tsaise ngbidz sca yquiaanaḷ zho to. Laga mban to lo guidzliu sca, ible csaaṇde to zhiwseed naa, zeṇa ycaania to guielmban ndzon ne gnedz naa lo to.

¹¹ Zha ne rioguicle godiidz rii, yquiaadiag zho ganle zha rnee Espiritu Sant lo zha ne no xnēz naa, rnee me: Zha ne tiblique tsoxco guṇ mine rnabey Dios, led yedraa zha co tsoxtseeb guey gabil.”

Diidz ne bnee Jesús lo zha Pérgamo

¹² Blozh ga, nēque me lo naa:

—Mine gni naa lo luu nu, pquiaaw pxeela Pérgamo, lo zha ne quianap grē zha ne ngab xnēz naa ga, gudz lo zho: “Znu nac xtiidz meṇ ne nzobro tib spad lts ne ndox gropse nēz, rnee me:

¹³ Nanpaa naa masaque mendox rnabey lad guiedz ne no to i, per raṇ naa tiblique dib zdoḍ to rnalo to naa, niicle goṇ to zha psacsi zho Antip, beet zho me i, meṇ ne scataa bioxco bnee xtidz naa lo miech.

¹⁴ Per no chup ncuaaṇe gon glisqui naa lo to: lēda i run to randze to grē zha ne squi run zigne been Balam, meṇ ne pquii Balac bloo Balac guic grē zha Israel beenctal zho xtol zho, dow zho xpēēl grē ma ne biogon lo mdio, ni pquiangob zho zha ne led tsieeld zho.

¹⁵ Lēē tiba ga, laa stiba, randze to zha ne bii zienal zhiwseed yozh zha nicolaif; tel naa, ni lalnu rdziguiend naa wseed co.

¹⁶ Laa naa rso diidz lo to: goṇ nab perdon, ni goṇ nee lo grē zha co csaan zho grē ncuaaṇe ndzinlid ne run zho; sac goṇ, telne gond zho diidz, ible zial naa zialtilnie naa zho con spad ne zob ro naa nu.

¹⁷ Zha ne rioguicle godiidz rii, yquiaadiag zho ganle zha rnee Espiritu Sant lo grē zha ne no xnēz naa, rnee me: Zha ne gdeete diidz lo grē ncuaaṇe gunctal xtol zho, zded naa guielwagw ne rap naa bgaa yquiin zho; ni zded naa tibga quie nquits lo zho, lo quie co quia lē cub zho, ni zhase gacnaṇ zha nac lē co zho.”

Diidz ne bnee Jesús lo zha Tiatir

¹⁸ Blozh miṇ co, nē me:

—Ye lo zha ne quianap zha ne no xnēz naa guiedz Tiatir, pxeel diidz rii, gudz lo zho: “Znu nac xtiidz Xpēēd Dios, meṇ ne masaque riaazbel bziaalo, meṇ ne masaque rquiabni ni zigne rquiabni guiib brōns ne tibaque riar; rnee me:

¹⁹ Nan naa grēse zha mban to; raṇ naa pa lotaa lēyṇe to naa, dib zdoḍ to rililadz to cho nac naa, noxco to quiaayṇ to xtsin naa, tiblique rac to dziits zo to lo xtidz naa; raṇ naa noxcoraa to quiaayṇ to xtsin naa niina.

²⁰ Per no tib ncuaaṇe no glisqui naa lo to: lēda i goṇ run to randze to wnaa ne lē Jezabel i, rnee me Dios rsiaab guic me grē ncuaaṇe rnee me, per nliḍ; sac goṇ, loxaque noquidie me grē zha ne no xnēz naa, noquii me zho rquiangob zho grē zha ne led tsieeld zho, ni row zho xpēēl grē ma ne riogon lo mdio.

²¹ Blactaale pquiambëz naa nab me perdon, ntsëë me lo xquielmban me; per nêd me csaan me grë guielyozh ne run me i.

²² 'Gacnan to sca ganle, laa naa gnabey glan me tib guielguidzdox, tsiechedraa me lo caxtigw co; scaque grëse zha ne zienald zhiwseed me, nroob guielnë ne gnabey naa ted zho, tel laa zho csaand grë guielyozh co.

²³ Ni haxta zut naa zho, zeena sca gan grëse miech ne no xnëz naa ganle, naasi nan naa pe rza guic miech, pe rza zdoo zho; gacxe waa, tel pe ncuaaane run zho, zdedse naa mine rieguial zho tib tib zho.

²⁴ 'Sangue to grë to zha ne zienald guielyozh ne rlu wnaa qui (wseed ne rnee zho i rdeed nroob guielbiini, per nand zho gon zhiwseed mendoxa), peet glisquidraa naa lo to.

²⁵ Per none gon tibleque golgac, zeena ine dib zdoo to rnalo to naa gal dze ne laa naa guial stib.

²⁶⁻²⁸ Sac gon, grëse zha ne gdeete diidz lo grë ncuaaane guncal xtol zho, sinque tibaque tsoxco zho gban zho zigne rnabey naa, haxta gdziñ dze ne nitlo guidzliu, zded naa tib mel gbaa lo zho, mel ne rlan ral sil, ni so naa zho gnabey zho grë guiedz. Naa gded guielrnabey co lo zho, zigne bneedz Pxoz naaw lo naa; ni lalnu yquiad zdoo zho, grëse miech ntseeb, zunquizh zho zho grëtaa guielntseeb ne been zho.

²⁹ 'Grëse zha ne rioguicle godiidz rii, yquiaadiag zho ganle zha rnee Espiritu Sant lo grë zha ne no xnëz naa!"

3

Diidz ne bnee Jesús lo zha Sardis

¹ Blozh ga, nê me:

—Mine gni naa lo luu nu, pquiaaw pxeela guiedz Sardis, lo zha ne quianap grë zha ne ngab xnëz naa, gudz lo zho: "Znu nac xtiidz men ne nzhen gadz mel gbaa, men ne nacie zhiEspiritu Dios, Espiritu ne rdeed gadz guielbiini, rnee me:

'Nan naa gon pe nac grë ncuaaane run to, niicle zëëb diidz mban to, per par naa miech gutle naa to.

² 'Golcuae zhimcaalo to sca! Golsodziits lo spalalse xtiidz naa mine rsoladz to, sac gon zhile laa to lozh guiaanladza. Nê nligaa, ran naa quiaayunde to xtsiin Dios zig none gaca.

³ Golsoladz ganle zha nac grë wseed ne gocnan to, grë wseed ne bin to; dzigo goltsienala, ni golnab lo Dios gun me to perdon. Sac gon, telne tsienalde tow, zeene laa naa guial, lega nacle zeene gan to laa naa zole lo to; zig rzac zha ne rzëëb ngbaan lidz.

⁴ 'Sca nac to, per lo to i gon no bla zha ne bii mbe zdoo, sac zienald zho grë ncuaaane run to; rriequia rdeete zho diidz guiacbeed xab nquits zho ga. Ni zha co nagon rieguial sēnal zhits naa, sac gop zho xab zho cuidad.

⁵ 'Golgona ganle, grëse zha ne gdeete diidz lo grë ncuaaane guncal xtol zho, scaania zho tib lar nquitsbie gacw zho; lë zhow, lëë quialew lo guits ne quia lë grë zha ne yгаа tib guielmban ndzon ga; haxta zanie naa zho lo Pxoz naa ni lo grë xanj me, guiep naa: Lëë zha rii gon no xnëz naa.

⁶ 'Zha ne rioguicle grë godiidz rii, yquiaadiag zho ganle zha rnee Espiritu Sant lo grë zha ne ngab xnëz naa."

Diidz ne bnee Jesús lo zha Filadelf

⁷ Blozh ga nê me:

—Mine gni naa niina, pquiaaw pxeela guiedz Filadelf, lo zha ne quianap grë zha ne ngab xnëz naa, gudz lo zho: "Men mbe ne rapd ni tib dol, men ne

rnee niapse diidzli, meñ ne rnabey zigne bnabey rey David; zaatne rxal me, tsod zha ne grieelo csiooga, zaatne csiooggaa mew, tsod zha ne grieelo cxala; znu nac xtiidz me, rnee me lo to:

⁸ Nañ naa grëse zha mban to; niicle ne squi bii nsis rac to, per rioxco to ron to xtidz naa, ni rqueetsde to ne nli rililadz to naa. Gacxe waa, rrieequia laa naa rxal tib puert ted to, ni choot grielod csioog puert co.

⁹ Bii zan to ganle, zeene laa naa cxel gza zha ne ngab lo mendox i, guiaad zho guidadhiitsgzhib zho lo to, zha ne noquidie i rnee zho xnëz naa no zho. Ga gan zho ganle nli rleyne naa to.

¹⁰ Ne squi tibleque rac to ron to xtidz naa, peet güeynied guic to niicle pquianañ miech to, ible squianaap naa to, gande to guieñnedox ne gan grë miech ne ndxie lo guidzliu.

¹¹ 'Golsoladza ganle, merle guiañ naa. Golguien csaande to xtidz naa mine nanle to, zeena tsod stib zha ne ctiche mine rieguiañ to gnedz naa lo to.

¹² Grëse zha ne gdeete diidz lo grë ncuaañe gunctal xtol zho, so naa zho gac zho zig grë pilar nroob ne zo len xyadoo ro Dios, ni gdzindraa dze ne griece zho ga; cho pilar co, ga yquia naa lë Dios, ga yquia naa tib lë cub naa. Laa zho ngable guiedz ne rnabey Dios ga; lëe guiedz co nac Jerusalén cub ne gnabey me guiet gbaa.

¹³ 'Zha ne rioguicle godiidz rii, yquiaadiag zho ganle zha rnee Espíritu Sant lo grë zha ne no xnëz naa."

Diidz ne bnee Jesús lo zha Laodicé

¹⁴ Ni në me:

—Mine gni naa niina, pquiaaw pxeela guiedz Laodicé, lo zha ne quianap grë zha ne ngab xnëz naa ga, gudz lo zho: "Meñ ne rnee niapse diidzli, meñ ne run grëse mine rnabey Dios, meñ ne bzo Dios psañ grëse ncuaañe no, znu nac xtiidz me, rnee me lo to:

¹⁵ Nañ naa grëse zha mban to. Rañ naa noxcode to grë mine rnabey naa to, ni niicle rsaandgaa tow; nac to zig nac tib ncuaañe loxaque ndzëeyopse, niicle niagda ni niicle nlëedgaaw. ¡Tebaa nac to zig tib nis yag, zig tib nis lëëgaa!

¹⁶ Per na gon ne squi nac to zig tib nis ndzëeyopse, ni lalnu rdziguiend naa ncuaañe run to. ¡Zhile gon laa to gunctasib naa!

¹⁷ 'Rnee to grëse ncuaañe rquini to laaw quianiele to, ible peet liaadz racdraa lo to, ¡ni riende to gon ni lalnu peet nonde to! To nac miech ne mazdraa mban, peet rapde to, ni lar ne ctse lad to guienñ, rrieequia haxta ni lo to roldraa.

¹⁸ Laa naa rso diidz lo to: Telne racladz to nlipaa gapchen to, goltë lo naa, naa cto guuib or ne mazdraa wen lo to; xab tow, naa cto lar ne mazdraa nquits gacw to, zeena ctoladznieadraa to to ne squi guienñ pe ctse lad to; haxta nis rmed ne tso bziaalo to, naa gnedza, zeena gbiire gan to stib.

¹⁹ 'Grë zha ne rleynie naa, rlisqui naa grë ncuaañe nonguield ne run zho, rteed naa zho tib caxtigw parne cseed zho ndzinli gban zho; gacxe waa golgac ndzinli stib, goltsoxco mine rnabey naa.

²⁰ Laa naa quiambëz to gon gbiire gbig to lo naa. Rrieequia ro lidz to zo naa, quiabedz naa to. Zha ne yquiabladz cxal ro lidz sëëb naa, zdeed naa, ni haxta sobnie naa zho diowxtsee no grop no.

²¹ Grëse zha ne gdeete diidz lo grë ncuaañe gunctal xtol zho, zded naa diidz sob zho cue naa, zaatne sob naa gnabey naa; zigne zoob naa cue Pxoz naa niina nonabey no; sac tel naa, bdetee naa diidz niun naa mine rnabey mendox.

²² 'Zha ne rioguicle godiidz rii, yquiaadiag zho ganle zha rnee Espíritu Sant lo grë zha ne no xnëz naa."

4

Roolnie zho Dios gbaa

¹ Zeene bui naa stib, gon naa laa tib puert quia zhan gbaa, nzhialse puert co. Horco biire bin naa tsi men ne bnee lo naa ga glo, men ne nac tsi ga zig tsi tib trompet, ne me:

—Biep, de nu ganle, zeena glu naa lo luu zha nac gre ncuane ziaadyob gac.

² Zigne sca ne me, hor co blu Espiritu Sant lo naa, gon naa laa tib xcan zo gbaa, tib xcan ne rzob men ne rnabeya. Lo xcan co, ga zob tib men co,

³ masaque rbebni me zigne rbebni quie ne rnee zho jasp, quie ne rneegaa zho cornalin. Igose xcan co quia tib guitye, rbebniw zigne rbebni quie ne rnee zho smerald;

⁴ ni zo zgalptap xcan igow, tibga mengol zob tib tib lo xcan co, dib nquitsbiese rna xab me, ni zob tibga coron or guic me.

⁵⁻⁶ Masaque riab belye, ratsie rnee nguzi, ni zeeb tsi miech zaatne zo xcan ne riaan glowtaa ga. Zaatne nac delant lo xcan co, masaque rluw zig rlu lo nisdoo ni rbebela zig rbebel quie zed; ni noquia gadz biini nroob ga, lee gadz biini co nac gadz guelbiini ne rap Dios.

Igo xcan co, ga zo tap bult mban, tibgaw zo tib nez; nez low, nez zhitsaquew zob bziaalow.

⁷ Tiba rlu zig rlu meedz, stiba rlu zig rlu tib ngon yeen; laa schop mine riaan ga, tiba rac lo zig rac lo miech, laa stiba rlu zig rlu tib msi nroob ne quiasiibe.

⁸ Tib tiba zob xoopga xiila, ndziib bziaalow zhits xiila, len xiila ne; tibaque nguiedz zeeb tsiw, rneew:

¡Men ndzondoo nac Dios!

¡Men rnabey nac me, nroob poder ne rap me!

Notaque me, me ga no padzeela, me no niina, ni leeque me ga no guiaad.

⁹ Gza tap bult mban co, roolniew men ne zob lo xcan co, (men ne gdzind dze guet) rsan nona me, ni rdeeda xquizh lo me. Zigse sca run gza bult co,

¹⁰ scasaque gza galptap mengol ne zob ga, rquitsgzhib me lo men ne zob lo xcan ro co, gzase me, rgob me xcoron me rguix mew nez lo men ne zob lo xcan co, ni rnee me:

¹¹ Luu nac xDios no, luu nac men ne rnabey no.

Luuse nac men ne rieguial dziuunnon no,

ni gnee no gre diidz ndzon lo luu.

Nroob poder ne rap luu, sac gretaa ncuane no, luu bzaaw;

laaw baa sac ible sca gocladz luu, ni laaw niaagaa niina, sac ible sca racladz luu.

5

Tib guits ne nzhidoo gadz le cint

¹ Zeene bui naa stib, gon paa naa men ne zob lo xcan ro co, nose tib guits nroob nia derech me. Gropse nez guits co quia, ndibedsew, nzhidoo gaw gadz le cint.

² Ni gon naa tib anjl, tib men macis rlu me, nguiedz zeeb tsi me, bnabdiidz me reb me:

—¿Cho rieguial chug cint ne nzhidoo guits qui, cxal zho low?

³ Ni tib choot pxald lo guits co, niicle gbaaw niicle lo guidzliuw, niicle zhan guidzliugaaw, brieequiad tib zha ne nchug cint co, nwi zho lo guits co.

⁴ Mban goc naa, psilo naa nguiedz roon naa, gon naa sca brieequiad tib zha ne rieguial nxl lo guits co, nlab zho low.

⁵ Dzigo bnee tib mengol ne zo galx lo xcan co, ne me lo naa:

—Goond luu. Lëz ganle, men ne brieequia lo xtií Judá, lo xtií rey David, me cchug gza gadz cint ne nzhidoo guits qui, me cxal low. Ible me rieguiala, sac gon psiaablo me grëse zha ne riëe lo me; rrieequia nac me zig tib meedz.

⁶ Horco bui naa zaatne nac lo xcan ro co, gon naa glowtaa lo gza bult mban co ni lo gza mengol co, ga zo tib Carner yeen. Rlupaa zha psacsi zho ma, zeene beet zho ma. Zob gadz zhoz ma, ni zob gadz bziaalo ma, rrieequia gza gadz bziaalo ma ga, min co nac gadz guielbiini ne rdeed zhiEspíritu Dios.

⁷ Dzigo wbig men ne nac Carner yeen co, bnaaz me guits ne no nia derech men ne zob lo xcan ro co.

⁸ Zigne bnaaz me guits co, laa gza bult mban co, ni gza galptap mengol co pquitsgzhíb lo me. Tib tib mengol co nzhense me tib arp ni tib ptsigui or, rso tib gox ndzon len ptsigui co (rrieequia gox co nac grë diidz ndzon ne rnee grë zha ne no xnëz Dios zeene rzodiidznie zho me).

⁹ Dzigo psilo gza mengol co biil me tib cant cub. Znu rnee lo cant co: ¡ible luu rieguial ycaania guits qui, luu rieguial cchug gza cint ne nzhidooow i!

Sac luu bded grëtaa guielnë co psacsi zho luu, haxta bzhiee xchen luu; sca psilaa luu grëlose dii miech, tel pa guiedztaa nac zho, tel pa diidztaa rnee zho, tel pa naciontaa ngab zho.

¹⁰ Laa luu bzhii no grë no gac no tib guiedz cub, guiedz ne gnabey Dios; no gac pxoz ne gun dziin lo me, masaque tipse gban no zeene gnabey me lo guidzliu.

¹¹ Zeene bui naa, gon naa anjl guizhiu ne ndxie zaatne zo xcan ro co, led zha ne grielod glab new.

¹² Nguiedz zëeb tsi zho grë zho gza bult mban co, ni grë mengol co, rnee zho:

¡Men non nac men ne nac Carner yeen ne squi rlu beet zho!
Me rieguial gnabey, men ro nac me, choot grielod csiaablo me.
Ladznia me no grëse guielnzaac, me rap grëtaa guielrien,
Men ndzon nac me, me none dziuunnon ne, me none dzioolnie ne.

¹³ Horco grëse miech, grëse ma, grëse ncuaaane bzaa Dios, zigtaa gbaaw, zigtagaa lo guidzliuw; zigtaa zhan guidzliuw, zigtagaa lo nisdooow; nguiedz zëeb tsi zho, rnee zho:

¡Nliw, men ne zob lo xcan ro qui, ni men ne nac Carner yeen qui,
ible rieguial dziuunnon ne grop me!
¡Me rnabey, lo me none gnee ne grëtaa diidz ndzon;
nadzew, gzhew, ni grëragaa izdoo ne ziaadraaw!

¹⁴ Pquiab gza tap bult co, rëb zho:

—¡Scaw, sca no gaca!

Dzigo gzase mengol co, laa zho pquitsgzhíb lo men ne zob lo xcan ro co; psilo zho rnee zho grë diidz ndzon lo me.

6

Gza gadz sell co

¹ Blozh ga, gonpaa naa zeene laa men ne nac Carner yeen co pchug primer cint ne nzhidoo guits co. Horco laa tib bult mban co bnee; masaque nac tsiw zig rio bi rnee nguzi, nëw lo naa:

—¡Dë ganle gwi luu!

² Dzigo wbig naa, gon naa tib guay nquits. Zhits guay co zob tib men co nzhen me tib yag arcw ne rquiaa zho flech; blozhse pcaania me tib coron ne

rzob guic zha rnabey, dzigo laa me brieë. Ine zob nzë me lad guay co, laa me zie ziegun me gan lo grë zha ne rlëë lo me.

³ Blozh ga, laa men ne nac Carner yeen co pchug stib cint ne nzhidoo guits co. Dzigo bredz stib bult co naa.

⁴ Dzigo bia naa, gon naa laa stib guay nizhnie brieë, zob stib men co lad ma. Blozhse pcaania me tib spad nroob, ni pcaa me diidzbey tsielodil me miech lo guidzliu, zeena gutlsa zho; laa me brieë ga, laa me zie.

⁵ Zeene laa men ne nac Carner yeen co pchug bion cint ne nzhidoo guits co, dzigo bredz stib bult co naa, nêw lo naa:

—jDë ganle gwi luu!

Dzigo gon naa tib guay ngas, scasaque zob stib men co lad ma, nzhen me tib zhiguiib.

⁶ Ni gorltaa zaatne zo gza bult mban co, zëëb tsi tib men co, rnee me:

—Tib kiltaa zhobxtil gon ycaa zha ne gun dziin tib dze; tel zhobgaaw, tsontaa kila ycaa zho; sangue nceit ni vin ib ygaald luuw.

⁷ Laa zeene goc cint co tap ziechug men ne nac Carner yeen co, dzigo laa stib bult mban co bredz naa.

⁸ Horco, zeene bui naa, gon naa tib guay nguets; lad guay co zob tib zha co lë Guielgut; zhiits co nal stib zho lë Gabil. Lo tap lal ne nlë miech ne ndxie lo guidzliu, pcaa grop zha co diidzbey tsiegut zho tib lal grë miech co; zha ne guet lo dil, zha ne guet lo gbin, zha ne guet lo guielguidz, zha ne guetgaa lo grë ma ntseeb.

⁹ Dzigo pchug men ne nac Carner yeen co stib cint co, goca gaay. Horco, zaatne nac zhan mezh ne nac mezh lo pcoog, ga gon naa grëse zha ne psacsi miech, beet miech zho loxaque ne bnee zho Xtüid Dios, ni dib zdoo zho bliladz zhow.

¹⁰ Nguiedz zëëb tsi zho rnee zho:

—Luu ne nac luu men nroob ne rnabey, luu ne nac luu men ne rnee niapse diidzli, ¿pa hor dzigo cuedz luu grë miech ne ndxie lo guidzliu, zha ne scataa psacsi no? ¿Pa hor gunquizh luu zho grëtaa mine been zho ga?

¹¹ Dzigo bdeed me lar nquits got zho; rëb me lo zho no cuëz zho zniip, sac grëraa zha ne nacgrë zho ngab zho lo Jesús, no spalal zha ne naraa csacsi miech zigne psacsi miech zho; haxta gza zho dzigo laa me gun guielwxtis.

¹² Blozhse ga, laa Carner yeen co pchug stib cint co, goca xoop; hor co laa tib zhodox bni. Gonpaa naa zeene laa lo ngbidz pcow, zig nac zeen tib lar ngas pquia lo ngbidz; laa mëë zig rludaa ren, sca nizhnie rlu lo mëë;

¹³ grë mel ne ndziib gbaa, masaque bliiaa ma lo guidzliu zig rliaa grë guigw yeen zeene rrieë medox.

¹⁴ Znuse bdbibëd gbaa, goca zigne racse grë guits ne rdibëd; grë gui, grë guidzliu win ne no lo nisdoo, nëzrii nëzrec biaanä.

¹⁵ Dzigo grëse zha ne nac zha rnabey lo guidzliu, grë zha ne nac zha non, grë zha ne rapchen, grë zha nroob ne rnabey lo menguiib, grë zha nroob ne non xtiidz, ni grëragaa miech, niicle grë zha ne run xtsiin beña, niicle grëgaa zha ne run xtsiin zhalä, grëse zho biolan, zha ne biolan len grë blieë, zha ne biolangaa len grëraa quie ne no dan;

¹⁶ nguiedz roptsie zho rnee zho lo grë gui co, lo grë quie co:

—jGolliaa lad no, golcolan no, zeena gandraa men ne zob lo xcan ro co no! jGolcolan no, zeena dziaand no grëtaa guielnë ne cxeel men ne nac Carner yeen co!

¹⁷ jSac nasi laa dze ro co bdzin! jLaa guielnëdox co nagon ziaadle! jNcuuaane lëëbd no low!

7

Zha ne pcuee lo grëse zha Israel

¹ Bded ga, gon naa tap anjl. Lo gza tap lad guidzliu, tibga anjl co zo tib lad nocuëez me me. Wdzeepaaw, per ni tib zhiblag yag rnidraa, niicle lo nisdooow dzese biaca; sac ni palal rriedraa me lo guidzliu.

² Tibaque zeene brieequia stib anjl nëz ne rlan ngbidz, neyse me xsell Dios; nguiedz bnee me lo gza tap anjl co (anjl ne pcaa diidzbey ga gun guielqui lo guidzliu ni lo nisdoo) rëb me:

³ —¡Golcuëz zniip! Gunde to guielqui lo guidzliu niina, niicle lo nisdooow, niiclegaa grë yaga; sac naraa lozh guioquiaa no xsell xDios ne quia grë zha ne run xtsiin me.

⁴⁻⁸ Zeene blozh quia sell co quia grë miech co, bin naa lo grë zha ne ziaad lo xtii zha Israel, rga zho tib gayoo chooptap mil:

Tsiipchop mil zha xtii Judá,
tsiipchop mil zha xtii Rubén,
tsiipchop mil zha xtii Gad,
tsiipchop mil zha xtii Aser,
tsiipchop mil zha xtii Neftalí,
tsiipchop mil zha xtii Manasés,
tsiipchop mil zha xtii Simeón,
tsiipchop mil zha xtii Leví,
tsiipchop mil zha xtii Isacar,
tsiipchop mil zha xtii José,
stsiipchop mil zha xtii Benjamín.

⁹ Zeene bui naa zaatne zo xcan ro co, zaatne zo men ne nac Carner yeen co, miech guizhiu ne gon naa ndxie ga; grë lose dii miech ne ndxie dib lo guidzliuw. Ne nligaa miech guizhiuw, led miech ne lëbd ne glab new; grëse zho niapse lar nquits nacw zho, ni no tiblëga zin guia nia zho;

¹⁰ nguiedz zëeb tsi zho, rnee zho:
Dios, men ne rdziuunbey ne, men ne zob lo xcan ro qui,
me nac men ne psilaa ne lo grëtaa xtol ne;
me ni men ne nac Carner yeen qui.

¹¹ Horco grëse anjl ne ndxie igo xcan ro co, igo zaatne zob grë mengol co, ni zo gza tap bult mban co; grëse zho laa zho pquitsgzhib nëz lo xcan co, haxta bzooblo zho lo liu, rdeed zho xquizh lo Dios

¹² rnee zho:
¡Scaw! Luu none dzioolnie no,
none tibaque gneedz no xquizh lo luu,
luu rieguial dziuunnon no; sac luu nac xDios no.
Luu nac nac men ne rienraa, men ne rap poder;
gacne waa luu none ycaania grëse diidz ndzon,
gzataa dze, niicle nadzew, gzhew, ni grëragaa izdoo ne ziaada. ¡Sca none gaca!

¹³ Dzigo bnabdiidz tib mengol co, në me lo naa:
—¿Pe nan luu sca cho nac grë zha ne nacw lar nquits qui? ¿Pe nan luu pa nëz ziaad zho?

¹⁴ Dzigo rep naa lo me:
—Nand naaw. Bzhiguiel bnëw lo naa.
Nëchaa me:

—Lëe grë zha qui gon bded grëtaa guielnëdox ne goc lo guidzliu. Laa zho nacw lar nquits qui, sac wbig zho lo Jesús psanmbe xchen me zho lo dol.

¹⁵ Gacxe waa squitaa ndzon ndxie zho gax lo zhixcan ro Dios, dze guieel quiayoolnie zho me len xyadoo ro me. Me nac men ne quianap zho grëse zho;

¹⁶ led yedraa niina guet gbin zho, guet nisgaa zho; led yedraa niina ctsuu ngbidz zho, sonëëggaa zho.

¹⁷ Men ne nac Carner yeen ne zo delant lo xcan ro qui, me gdeed ncuane gow zho, ni zigne rienie baxtor xpëcwxiiil zho ro guiuu, sca zienie me zho zaatne quiada nis ne rdeed guielmban. Led yedraa niina goon zho.

8

¹ Laa zeene laa men ne nac Carner yeen co pchug stib cint ne nzhidoo guits co, cint ne naca gadz ga, dzese biac gbaa; xtselaa sca biac dze gbaa.

² Blozh ga, gon naa zeene pcaania gadz anjl ne rzo lo Dios, tibga trompet.

³ Ni brieequia stib anjl nzhen tib ptsigui niaa niapse guiib or. Zigne bdzin me, bzo me delant lo xcan ro co, zaatne zo mezh or ne nac lo pcoog; ga pcaania me nroob yaal parne ctsieel mew grë diidz ne rnee grë miech ne no xnëz Dios zeene rzodiidznie zho Dios.

⁴ Dzigo bzëëg anjl co yaal co, tipse goc gox co grëw xtiidz grë zha ne no xnëz Dios, laaw bdzin lo Dios.

⁵ Blozh ga, ptop me grë gui ne ndziib lo pcoog co bloo mew len ptsigui ne nzhen me ga, blaal mew lo guidzliu; dzigo psilo masaque rnee nguzi, rio bi, riab belye ne, ni bni tib zhodox.

Pcuedz gadz anjl trompet

⁶ Horco laa gza gadz anjl ne pcaania gza gadz trompet co, laa zho nsinle nzheña, parne ycuedz zhow.

⁷ Zeene laa tib anjl co pcuedz zhitrompet zho, hor co psilo bliaal guiequie lo guidzliu ni bliaal guileë notsa ren. Gzoob ne telne glë guidzliu tson lal, dzigo masaque tib lala bnitlo, bnitlo grëse yag, grëse lo guizh nguia ne no low.

⁸ Blozh ga, zeene laa stib anjl co pcuedz xquiib, hor co biab tib ncuane co nisdoo, masaque rluw zig rlu tib gui nroob ne quiayazbel. Gzoob ne tel glë nisdoo tson lal, bnitlo tib lala, biallow niapse ren zeene laa ncuane co biab low.

⁹ Bnitlo grëse ma, grëse guizh ne no lo tib lalga nis co, haxta grë barcw ne no low bnitlo.

¹⁰ Loxaque blozh goc min co, laa stib anjl co pcuedzaque xquiib zho, hor co laa tib mel nroob bringaa gbaa, masaque rso ma bel zig razbel tib lë guier, biab ma lo guidzliu. Lo grë guiubee, lo grë zhlian ne no lo guidzliu, lo tson lal ne gzoob ne naca, pxin ma tib lala.

¹¹ Grëse nis co goc nlayag, ndal miech ne gut low. Nacne bleelë zho mel co Nlayag.

¹² Zeene laa stib anjl co pcuedz xquiib goc zho tap, hor co zigtaa lo ngbidza, zigtagaa lo mëew, biuu tib niaza, schop niazaquew biaan rziini; grë mel ne ndziib gbaa, gzoob ne lo tson lal ne nac ma, hor co biuu tib lal ma. Rlupaa lega net net rquiaa ngbidz; zaatne nacgaa guieel, ni palal peet rlud.

¹³ Laa naa nowi, tibaque zeene gon naa laa tib anjl bded groitaa zhan gbaa, haxta rlupaa rio bi zie me lo me, nguiedz zëëb tsi me rnee me:

—jProbsaxe grë miech ne ndxie lo guidzliu! Sac ncuane ntseebraa gac, zeene laa ston anjl qui ycuedz xquiib me.

9

¹⁻² Zeene laa anjl ne nac zho gaay ga pcuedz xquiib, hor co gon naa laa anjl ne brieë gbaa padzeela ga pcaania tib liow, pxal zho ro tib guierdoo ro. Zeene

laa ro guieer co bzhial, per nli goxdoo ne briece ga, tib psioogsew zhan gbaa, per ni palal rludraa lo ngbidz.

³ Lo gox co, ga briece tiblo metso bliaal, bioogse ma gdipse lo guidzliu, grëse ma zob xcots ma, zig zob xcots meegu.

⁴ Nacle diidz, peet gund ma grë guizh nguia, grë yag ne zëëb lo guidzliu, sinque laa ma tsie tsiesacsi ma grëse miech ne quiad xbey Dios quia.

⁵ Yoobdox ne yquia zaatne yquiaaxcots ma, zigne rquia yoob zaatne rquiaaxcots meegu; per gute ma zho, loxaque sca csacsi ma zho dipse len gaay mëë.

⁶ Len dze co, haxta zhal miech yguib zho dien zha guet zho, per grieelod guet zho; soobladznë zho, tebaa zha gdziñ guielgut lo zho, per lel sozita.

⁷ Masaque rac grë metso co zig rac grë guay ne tsienie zho lo dil. Rac lo ma zig rac lo miech, ni zob tib ncuaan co guic ma, rluw zig rlu tib coron or;

⁸ zëëb guitsguic ma zig zëëb guitsguic men wnaa, ni zëëb lay ma zig zëëb lay grë meedz.

⁹ Dipse lad ma ntse tib ncuaan co, rluw zig rlu guuib; rio bi rzedz lo xiil ma, pale bi ne rio zeene rded tib dzoon carret ne rgob guay, zie lo dil.

¹⁰ Lëëdaa meegu, sca zob xcots grë metso co lo xcol ma, miñe yquiaaxcots ma miech dipse len gaay mëë co.

¹¹ Lëë grë metso co pxeel anjl dox ne rnabey guierdoo co, anjl ne rnee zha Israel Abadón, laa xtiidz zha Gres rnee zho ma Apolión. (Nac diidz co, zig rnee ne xtiitsë ne: Zha ne rnitlo.)

¹² Lëë tib guieñë ne gan miech ga, per bii ziaad schopa.

¹³ Gon naa zeene laa anjl ne nac zho xoop ga pcuedz xquuib, hor co bin naa zëëb tsi tib men co lo mezh or ne nac lo pcoog ne zo lo Dios ga.

¹⁴ Zëëb tsi men co rnee me lo anjl ne blozh pcuedz xquuib ga:

—Güey, güeyxadz gza tap anjl dox ne quiadoo ro guiubee nroob ne nac guiubee Eufates.

¹⁵ Ible bzole gza tap anjl dox co par gun ma guielqui zeene laa dze co, laa hor co gdziñ; dzigo nac ne hor co laa ma blaa, parne tsiegut ma miech. Gzoob ne telne gac miech ne ndxie lo guidzliu tson tant, masaque tib tant zho gnitlo ma.

¹⁶ Bin naa chop gayoo millon zhaguiib ne gacnie ma, niapse guay sob grë zhaguiib co; masaque ma gnabey lo zho.

¹⁷ Gonpaa naa zha rlu grë zhaguiib co zob zho lad grë guay co. Grëse zho quiantse tib lë guuib gdipse zdoo zho; masaque tson color rbeew, rbeew color nizhnie, color nguia gbaa, ni color guts. Laa grë guay co, niaa guic ma zig niaa guic meedz, masaque rriee bel, rriee gox, rriee zufr ro ma;

¹⁸ lo gza ncuaan ne sca rriee ro ma, miñ co beet lalga miech co.

¹⁹ Lala rap grë guay co xquieñtseeb ma ga nëz ro ma, ni rapaque maw nëz lo xcol ma; masaque nac xcol ma zig nac grë meel dox, rias xcol ma rquiaa maw lad miech.

²⁰ Niicle scataa nzian miech ne gut, zha ne biaan ib bdziebd zho. Tibaque laa zho no ziegan zho mendox, ziegan zho grë zhimdio zho, mdio ne niaa guuib or, mdio ne niaa guuib plat, mdio ne niaa guuib brons, mdio ne niaa quie, mdio ne niaagaa yag; ncuaane randa, ncuaane ronda, ncuaane rzëda, per laa zho no tibaque ziegan zhow.

²¹ Laa zho no quiauyt zho samiech zho, quianab zho pe sac samiech zho, quiangob zho zha ne led tsieeld zho, tibaque quiaban zho, ni palal zienied guic zho csaan zho grë guieñtseeb co gbig zho lo Dios!

10

Anjl ne nzhen tib libr win

¹ Blozh ga, gon naa biet tib anjl gbaa, rlupaa tib anjl nona, masaque no me tib lo xcow, ni quia tib guitye glaa guic me. Biinidoo ne rree lo me, lëëdaa lo ngbidz; scasaque ni me, masaque riaazbela.

² Nzhen me tib libr win, nzhialse lo libr co.

Bdzin me lo guidzliu, bzo me ni derech me lo nisdoo, laa min revés bzo me lo guidzliu.

³ Ga zo me pquiaa me tib redz nroob, lëëdaa zeene rgobeedz tib meedz; loxaque blozh pquiaa me redz co, zeene laa gadz nguzi bnee, pquiab lo redz ne pquiaa me ga.

⁴ Laa naa zale yquia naa mine bnee gza nguzi co, tibaque bin naa tsi tib men co gbaa, në me lo naa:

—iCoo, yquiaad luu mine bnee gza nguzi qui! Sac nodne gacnan miecha.

⁵ Dzigo gon naa blis anjl co nia derech me nëz gbaa,

⁶ bzeet me Dios (men ne gdzind dze guet, men ne bzaa gbaa, bzaa guidzliu, bzaa nisdoo, ni grëtaa ncuane no low), rëb me:

—Dios zobwi ganle, nasi gon laa dze co bdzin.

⁷ Grëse mine bnee me lo zha ne biadteed xtiidz me, laaw gac niina zeene laa stib anjl qui ycuedz xquiib zho. Grëse mine no guic me gon me ni gocnand miecha, niina laa zho gana.

⁸ Dzigo wbiire bnee men ne zëëb tsi gbaa ga, në me lo naa:

—Güey, bnaaz libr win ne nzhen anjl ne squi zo i.

⁹ Nacne bia naa lo anjl co, rep naa lo me gneedz me libr win co, dzigo nëchaa me lo naa:

—Ledaaw nu, per lëëraasi none gow luuw. Zeene laa luu noyowa, nex sac luuw; per zeene gdzina zdoo luu, laaw gacnla.

¹⁰ Dzigo bnaz naa libr win co nia me, dow naaw. Nligaa nex rdioowa now ro naa, per zeene laaw bdzin zdoo naa, beennëw.

¹¹ Blozh ga, nëchaa men ne bin naa tsi glo ga:

—Naraa gon none gnee luu ganle zha nac ncuane ted grëraa miech, zigtaa zha ne no guiedz wina, zha ne no guiedz nrooba, zha ne rnabeygaaw.

11

¹ Dzigo bиаad tib men co bneedz me tib yag ne rbix lo naa, rgaaw zig tib metr, bnabey me naa ctix naa xyadoo Dios, ctix naa zaatne nac lo pcoog, ni glab naa dien palal miech ne rie yadoo co riegan zho Dios. Pso me diidz lo naa, në me:

² —Lëëraasi ctiixd luu nëz ley, sac laa lugar co nole ladznia zha zit; zha gnabeya, zha gnabey guiedz ndzon ne nacchen Dios i; dipse len tson iz grol ne ziaad nu, gon zhow zigne gacladzttaa zho.

³ Gane len dze riique laa naa cxel chop zha ne runbepaa cho nac naa, tib lar beelze gacw zho, zig racwxab zha ne no guielnë; dipse len tson iz grol co gnee zho ganle pe nac grë ncuane ziaadyob gan miech.

⁴ Lëë zha co nac grop zhan yag oliv ni grop biini ne raquietle lo Xtiidz Dios ga zo lo Dios (men ne nac bizhuan guidzliu).

⁵ Zeene laa grop zha co bdzin, choot brieelod lega nsacsi zho, sac grëse zha ne wbig gocntseeb lo zho, tib biecte zha co lo bel ne brieer ro zho.

⁶ Bdeed Dios poder lo zho ycuëz zho nisguie, zrieelo gnabey zho guiabda dipse len dze ne nonee zho lo miech ga, haxta zrieelo gnabey zho tsaalo nis gaca ren; ni horne gacladzttaa zho, zrieelo ndalraa grë guielzi ne gnabey zho gan miech.

⁷ Zeene bbase dze ne bnee zho lo miech ga, hor co laa tib madzabdoob brieen len guierdoo co; ntseeb rac ma lo zho. Mbe blëbd zho lo ma, beet ma zho.

⁸⁻⁹ Tson ngbidz grol goot xcuerp zho grol len guiedz ro co, guiedz ntseeb co. Pale Sodom, pale Egipt, sac gon guiedz coque, ga pquiaa miech men ne rnabey zho lo cruz. Ib bdeete miech diidz nguueets zho, grëse miech ne no dib lo guidzliu gon sca nix zho ga;

¹⁰ dipse lo guidzliu, masaque tib guie|bleydoo ne bio miech gza dze co, gon zho laa grop zha co gut, sac nroob benneed zho miech. Lo guie|bley co, haxta bioxco miech pe ncuaa|ne bgadlsa zho lo samiech zho.

¹¹ Zeene blozh tson ngbidz grol co, tibaque zeene laa zhiEspiritu Dios bdeed guie|mban lo grop zha co stib, laa zho guche ga; grëse miech ne ndxie lo guidzliu, zeene gon zhow, per nli bdzieb zho, rdzieldraa zho zha gon zho.

¹² Horco nguiedz zëeb tib tsi men co gbaa, bredz me grop zha co. Gonlo grë miech ne riëe ran zho ga, masaque no zho tib lo xcov, laa zho bzoquia gbaa;

¹³ loxaque laa zho bzoquia gbaa, zeene laa tib zhodox bni. Gzoob ne telne nle guiedz ro co tsii tant, tib tanta bnitlo lo zho co; gut gadz mil miech. Grëraa zha ne biaan, mazdraa bdzieb zho, lo dzeb co laa zho psilo rool|nie zho Dios.

¹⁴ Sca gan miech stib guie|në co. Lëe bropa ga, per znusaque guiaad stiba.

¹⁵ Sac loxaque blozh ga, zeene gon naa laa stib anjl ne nac zho gadz ga, pcuedzlaque xquib; hor co nzian tsi men co zëeb gbaa, nguiedz rnee me:

Nasi nagon,

laa Dios gnabey grëse guiedz ne ndxie lo guidzliu, grop me Men ne pxeel me ga.

Mele gnabeya, grëtaa len izdoo ne ziaad.

¹⁶ Psiloque gza galptap mengol ne zob lo xcan ne zo lo Dios ga, pquitsgzhib zho lo me, haxta bzooblo zho lo liu, rdeed zho xquizh lo me,

¹⁷ rnee zho:

Xquizh xquie|nzaac luu,

sac nasi laa luu glu men nroob nac luu, laa luu csilo gnabey.

Luutaque nac men ne mazdraa nroob.

¹⁸ Grëse guiedz, brieequia zha ne goctseeb lo luu;

per nasi laa dze bdzin, laa luu glugaa xquie|blëe luu lo zho.

Grëse zha ne gutle,

niina laa luu gdeed mine rieguial zho tib zho.

Grë zha ne been xtsiin luu, pteed zho xtiidz luu lo miech,

grë zha ne ngab lo luu, zha ne runnon lë luu,

zigtaa zha gola, zigtagaa zha wina, niina laa luu gdeed zhipremio zho;

zha ne na loxaquegaa guie|ntseeb been,

niinataa laa luu gnitlo zho.

¹⁹ Loxaque blozh sca bnee gza mengol co, zeene laa yadoo ne no Dios gbaa

bzhial, nieenpaa guin ne notsow quie lag ne pquia diidz ne psan me lo miech.

Horco psilo bliaal tib guiequiedox, loxaque nezrii nezrec riab belye, ni rio bi ratsie nguzi; guiequiedox co noliaal, zeene laa tib zhodox bnique.

12

¹ Horco gon naa blu tib ncuaa|ne gzee zdoo ne zhan gbaa. Ga brieequia tib wnaa, masaque igose me riab tib biini, zig riab xbiini ngbidz, ni zob tib coron guic me, quia tsii|p chop mel cho coron co; ngali ni me zob mëe.

² Rlupaa zoney me mëed, rquiaadan me redz, laa me rquiale yoob ne gap me xpëed me.

³ Tibaque brieequia tib ma ngol, dipse ma rna nizhnie, niaa ma zigne niaa ngutsiets; zob gadz guic ma, ni tsii zhoz ma, tibga coron zob tib tib guic ma.

⁴ Znuse bzieecw ma xcol ma, blaal ma palal mel gbaa lo guidzliu; gzoob ne nlē mel tson tant, masaque tib tant mel co blaal ma. Wbig ma lo wnaa co, quiambēz ma gal xpēēd me, parne gow ma win.

⁵ Per zigne gol mēēd co, znuse bdziñ win nēz lo Dios, zaatne zob me rnabey me; tib mēēdbguiw, nacle diidz tib meñ ndip xtiidz gac win, win gac meñ ne gnabey grēse guiedz ne ndxie lo guidzliu.

⁶ Horcogazhaqew bzhoon wnaa co ga, laa me zie tib dan zit, zaatne psanle Dios diidz gan zho me dipse len tson iz groļ.

⁷ Nacne bio tib diļ gbaa. Psilo anļ Miguel, grē me grēraa anļ ne nacnie me, bdilnie me ma ngol co grē ma xanļ dox ma;

⁸ per blēbd ma, beñcxoon zho ma gbaa.

⁹ Lēē ma ngol co ga nac meeļ dox ne notaque padzeela, lēē meñdox ga, lēē Satanás ga, ma ne scataa tibaque noquidie miech; hor co laa zho bzonēz ma nēz lo guidzliu, grē xanļ dox ma.

¹⁰ Dzigo bin naa, nguiedz zēēb tib tsi meñ co gbaa, rnee me:

¡Lēēw nagon!

¡Nasi laa dze ne ycaaniapaa Dios zha ne ngab lo me, laa dze co bdziñ!

Nasi laa me blu poder ne rap me,

nasi laa Meñ ne pxeel me lo guidzliu ga gnabey lo grēse zha ne ngab lo me.

¡Laa me beñcxoonle meñdox!

Ma ne scataa dze guieel nolisqui dien pe run zho,

nac zho zha ne nacgrē ne.

¹¹ Peet brieelod ma niuñ ma zho,

sac niapse meñ ne nac Carner yeen ne gut lo cruz ga bnalozho;

ni lalnu ib bdziebd zho, bnee zho lo miech cho nac me,

bleeladz zho xquielmban zho, no zho haxta beet miech zho.

¹² ¡Gacxe waa tib guielbley nroob ne rac gbaa niina!

¡Grēse to ne nac to zha ne no gbaa, golley!

¡Per probsaxe grē zha ne no lo guidzliu, sac laa meñdox co tsiesacsi zho!

Ntseeb rac ma laa ma zie nēz co,

rien ma riaandraa nroob dze ne sonlaa ma.

¹³ Zeene gon ma sca bzonēz zho ma lo guidzliu, dzigo ptsidil ma wnaa ne gop mēēdbgui co.

¹⁴ Nacne bzoob zho chop xiil me, lēēdaa xiil msidoo; par grieelo xoon me lo ma, guey me dan zit ne nole diidz gan zho me dipse len tson iz groļ co.

¹⁵ Gocladz ma nsiloow ma me, blee ma tib nis naal ro ma, pale tib guiubee ro,

¹⁶ per psaand guidzliu me, znuse bzhal low psi grēse nis naal co.

¹⁷ Horco mazdraa blēēnie ma me, psilo ma noguib ma zha csacsi ma grēraa zha ne ziaad lo xtii me. Lēē grē zha co zienal miñe rnabey Dios, ni rdziebd zho rlu zho xnēz Jesús no zho.

¹⁸ Nacne güey ma, bzo ma ro nisdoo.

13

Brieequia chop ma ntseeb

¹ Tibaque zeene gon naa laa tib ma nroob brieequia lo nisdoo co, ntseeb niaa ma. Ncuaañe gdzieb ne rlu ma, gadzraa guic ma zob ni zob tsii zhoz ma; tibga coron zob tib tib zhoz ma. Gzase guic ma quia diidznē ne rneenē ma Dios.

² Rna ma zig rna grē meedz rabon, per ni ma niaa zig niaa ni os, laa ro ma niaa zig niaa ro meedz. Dzigo bzo ma nizhnie co ma guiaan ma xlugar ma co, male gnabey.

³ No tib guic ma no tib mdel nroob, rlu mer niet ma zeene sca goc guic co ma. Min co gon miech, grëse zho psilo zho rleynie zho ma, miñe rnabeytaa ma zho, ruñ zhow.

⁴ Horco grëse zho rleynie zho ma nizhnie co, rquuitsgzhib zho lo ma, rdeed zho xquizh lo ma bzo ma ma ntseeb co; scasaque rquuitsgzhib zho lo ma ntseeb co, rnee zho:

—¡Tsodraa stib zha zig luu! ¿Cho dien grieelo tilnie luu?

⁵ Dzigo rëb ma nizhnie co lo ma gnee ma grë diidz dox, grë diidznë, gneenë ma Dios; bdeed ma co diidz gnabey ma lo guidzliu dipse len tson iz grol.

⁶ Nacne psilo ma rneenë ma Dios, rdzibdee ma me, rdzibdee ma grë zha no gbaa ne.

⁷ Grë zha ne no lo guidzliu, zha ne ngab xnëz Dios, bdeed me diidz psacsi ma zho, haxta beet ma zho; masaque ma bnabey grëse miech ne ndxie lo guidzliu.

⁸ Laa grëraa miech, güey zho güeygan zho ma, lëë grë zha co quiad lë lo xlibr men ne nac Carner yeen ne gut ga. Haxta zeene biao guidzliu no libr co, lo co quia lë grëse zha ne yгаа гуеиlmban ne gdziñd dze lozh.

⁹ Lo grë to ne nac to zha ne rnalo Dios, zha ne no liaadz miñe none naa nu, golquiaadiag miñe gne naa nu ganle:

¹⁰ Zha ne gnaaz to co zho to ladzguiib, yeque zho zio zho ladzguiib; zha ne csacsigaa to, tel zha gut zho to, scaque gut miech zho. Gacbande to sca, sac gon ga glu to nli rnalo to Dios, nli zlëb to tel pe nactaa guieinë ne gan to.

¹¹ Blozh ga, gon naa brieequia stib ma nroob lo guidzliu, scaque ntseeb niaa ma, zob chop zhoz ma zig zob zhoz carner, per ncuaane gdzieb ne zeene laa ma roptsie.

¹² Ye ma rap ma poder, squi zo ma ne no mdel nroob co guic rnabey ma tel zha racladz ma; bnabey ma yquuitsgzhib grëse miech lo ma co.

¹³ Ncuaane gzee zdoo miech ruñ ma, haxta brieelo bnabey ma biet gui gbaa bliaala lo guidzliu.

¹⁴ Ne scataa grë ncuaan ro ne rrieelo ma ruñ ma, pquidie ma miech, bnabey ma zho bzaa zho tib mdio zig niaada ma ne bdedlaa lo guielgut ga, ma ne scataa nat guic ga bga.

¹⁵ Blozh ga, bdeed ma xquielmban mdio co, parne grieelo gneew. Bnabey ma guet grëse zha ne soliaadz yquuitsgzhib low,

¹⁶ ni bnabey ma grëse miech güey zho tib bey, yase yquiaaw nia derech zho, yquiaagaaw quia zho; grëse zho zigtaa zha gola, zigtagaa zha lasa, zigtaa zha ne rapcheña, zigtagaa zha ne peet rapda, zigtaa zha ne ruñ xtsiin bena, zigtagaa zha ne choot rnabeyda.

¹⁷ Zha ne tsod bey co, grieelod gun zho wzi niicle grieelodgaa cto zho; sac bey co rlu cho nac zha ne ngab lo ma, lëë lë ma ga, lëë número co rlu zha lë ma.

¹⁸ Tib lë miech nac número co; xoop gayoo tsongal xoop naca. Zha ne ligier, zha ne niini, zien zho cho nac ma co.

14

Bil tib gayoo chooptap mil zho

¹ Tibaque zeene gon naa laa men ne nac Xcarner yeen Dios ga zo guic Gui Sión, miech guizhiu ne zonie me ga; lëë grë zha co nac tib gayoo chooptap mil zha ne quia lë me guic ga, grop me Pxoz me.

² Horco bin naa tib bi nroob gbaa, zig rio bi rrieengaa tib nis naal tib ro quie, zig ratsiegaa grë nguzidox, ni bin naa ndal tsi zha co zëëb noyool zho tib cant, rlu niapse arp noyoolnie zho cant co.

³ Tib cant cuba, laa zho noyool la lo men ne zob lo xcan ro co, zaatne zo gza tap bult mban co, zaatne zob grë mengol co. Loxaque tib gayoo chooptap mil zha ne pcuee lad grë miech guidzliu ga, zha cose brieelo pquiab lo cant co.

⁴ Sac zha co ib beenctald xtol, rrieequia nac zho zig tib wnaa ne bgaald mgui; tibaque zo zho lo Men ne nac Carner yeen co, zaatne zieetaa me. Masaque nac zho lo Dios, ni lo men ne nac Carner co, zig tib nex ne gloopaa riet riogon lo me.

⁵ Biod dze ne nquidie zho, mbe zdoz zho, mbe lo zho nëz lo me.

⁶ Horco brieequia tib anjl nosiibe zhan gbaa, ney me Diidz Ndzon ne rdeed guielmban, diidz ne gdzind dze nitlo ga; laa me ziaad par gnee mew lo grëse miech ne ndxie dipse lo guidzliu.

⁷ Nguiedz zëëb tsi me, rnee me:

—iGolguien golgon mine rnabey Dios, ine golleynie me, sac gon laa dze ne gun me guielwxtis bdzinle! Ine golquitsgzhib lo me, golgan ganle me bzaa gbaa, me bzaa guidzliu, me bzaa nisdoo, me psan grëse zaatne rlan nis.

⁸ Zhits anjl co nal stib anjl, nguiedz rnee me:

—iNasi laa guiedz Babiloin nitlo! iGuiedz nroob ne scataa pquiil grëraa guiedz, been grë menguiedz co ncuaan ndzab ne beena, pxina guic zho!

⁹ Zhiits co nalaque stib anjl, scaque nguiedz zëëb tsi me, rnee me:

—iGrëse zha ne yquitsgzhib lo ma ntseeb ne brieequia lo nisdoo ga, yquitsgzhib zho lo mdio ne niaa zig niaa ma ga, gdeedgaa zho diidz yquia xbey ma nia zho, yquiaagaaw quia zho,

¹⁰ ib tedsod ye zho ygaa lo grëtaa guielnëdox ne csiaab Dios! Squi zobwi grë xanjl me, squi zobwi Men ne nac Xcarner yeen me, laa zho guey lo guidox ne rieguial zho, zaatne tibaque quiaayabel tiblo ncuaane rtsuu lë zufr.

¹¹ Dze guieel cso laan ne tsec guidox co, ni palal gapd zho descans ga; sac sca pquitsgzhib zho lo ma ntseeb co, pquitsgzhib zho lo mdio ne niaa zig niaa ma ga, ni pquia zho xbey ma.

¹² iGa naganle gan grë zha ne ngab lo Dios, zha ne mban zigne rnabey me, zha ne tiblque zienal zhiwseed Jesús, zeena gacmband zho niicle tel pe nactaa grë guielnë ne noyan zho!

¹³ Dzigo bin naa zëëb tib tsi men co gbaa, në me:

—Pquiaa mine gni naa nu.

Nëchaa me:

—Dichos grëse zha ne rnalo Jesús, niicle niinaga guet zho.

Pquiabaque Espiritu Sant, rnee me:

—Nligaa dichos zho, sac grë guielnë ne bded zho, nataa laaw blozh; nasi laa zho ygaa guielnzaac nroob ne gdeed Dios lo zho, porne wban zho zigne rnabey me.

¹⁴ Zeene bui naa stib, dzigo laa naa gonle tib xcow nquits; lo xcow co zob tib men co, rlu me zig rlu Men ne pxeel Dios ga biaad lo guidzliu. Zob tib coron or guic me, ni nzhen me tib yaguits nroob.

¹⁵ Dzigo brieet tib anjl len yadoo ro ne zob gbaa, nguiedz bnee me rëb me lo men ne zob lo xcow co:

—iNiinaga blooyaguits grë zhob ne squitaa zëëb lo guidzliu! iSac gon gollew, laa dze ne tsaa bdzinle!

¹⁶ Dzigo pteed men co yaguits dipse lo guidzliu, ptop me grëse zhob co.

¹⁷ Blozh ga, brieet stib anjl len yadoo ro co nzhen me tib guib hoz, rlupaa per nli ndox low.

¹⁸ Loxaque brieë anjl co, laa anjl ne quianap gui ne ndziib lo pcoog brieëque; nguiedz bnee me rëb me lo anjl ne nzhen hoz ga:

—iNiinaga pchug grëse mzhiiig uv ne squitaa zëëb lo guidzliu, sac gon laaw gule!

¹⁹⁻²⁰ Horco znuse pteed anjl co hoz lo guidzliu, pchug me grëse mzhiiig uv co, güeycodzëë mew tib len pil nroob ne zob tib lad ro guiedz. Ga güeyzëëni zho grë uv co, ptaadz zhow; dzigo ren naaldox ne brieë zhan pil co, masaque lal ne rzëni miech xoop ngbidz, lal ga wbiig lo ren co igo pil co; tel niaca mine sëëb tib guay low, zdziina haxta zhan cho ro ma. Rrieëquia sca nagon gac miñe gnabey Dios ted grë zha ntseeb.

15

¹ Tibaque zeene gon naa, ncuaañe ro, ncuaañe gzee zdoo ne goc gbaa. Brieëquia gadz anjl, tib tib anjl co tibga guieñe guiaadnie me ted grë miech ne ndxie lo guidzliu; guieñe co lozh cueezhian Dios miech.

² Dzigo gax lo naa gon naa tib dzoon miech, masaque rquiabni, masaque rna gui zaatne zo zho, nëzrii nëzrec rac lo co, pale lo nisdoo. Lëë grë zha co been gan, pquitsgzhid zho lo ma ntseeb co, pquitsgzhid zho lo zhimdio ma, niice biödga zho xbey ma. Grëse zho tibga xarp Dios nzhen zho,

³ quiayoöl zho zig biil grë zha ne psilaa Moisés Egipt. Rley zho, sac niina laa Xcarner yeen Dios psilaa zho lo ma ntseeb co; rnee zho:

Dios, luu ne nac luu men ne grësew rrieelo run,
ncuaañe nroob, ncuaañe gzee zdoo miech, nac grë ncuaañe run luu.

Luu nac men ne rnabey,

lo grëse zha ne ngab lo luu, niapse diidzli rnee luu, niapse miñe nonguiel rnabey luu.

⁴ iZha rna zha ne dien gdzieebd luu?

iZha rna zha ne gleyd goolnie luu?

Sac luuse nac men mbe zdoo, men ne ni tib dol rapd.

Grëse guiedz ne ndxie lo guidzliu,

zriee miech guiaad zho yquitsgzhid zho lo luu;

sac nasi laa luu blu zha run luu guieñwxtis.

Gadz anjl ne pxeel guieñe lo guidzliu

⁵ Horco gon naa bzhiäl zaatne nac Lugar Nda len xyadoo Dios gbaa,

⁶ ga brieë gza gadz anjl ne guiaadnie guieñe ne no guiaad lo guidzliu ga. Ine nquitsbie rna xab gza anjl co, haxta rzëëg lada, ndxiega tib cinch or haxta ncaan len zhiw me.

⁷ Dzigo wbig tib bult mban co, bdeeda tibga cop nroob niaa niapse guieb or lo tib tib anjl co; len cop co ga nodzë grëse guieñe ne nac xquieñe Dios, men ne gdziñd dze guet.

⁸ Horco grëse xquieñdzon Dios, grëse poder ne rap me, biodzë len yadoo co, rluw zig rlu tib gox; choot brieelodraa nzeëb len yadoo co, haxta blozh gon miech gza gadz guieñe ne güeynie gza anjl co.

16

¹ Dzigo bin naa nguiedz zëëb tib tsi men co len yadoo ro co, bnee me lo gza gadz anjl co, rëb me:

—Goltsie, goltsixiee gza guieñe ne nac xian Dios i lo guidzliu.

² Dzigo brieë tib anjl co, güey me, güeylaat me xcop me lo guidzliu, hor co grëse zha ne noquitsgzhid lo zhimdio ma ntseeb co, zha ne quia xbey ma ga, psilo bial dipse lad zo, yoobdox ne rquia zho.

³ Güeya que stib anjl co, bdziñ me blaata me xcop me lo nisdoo, zeene laa ncuuan co bzhiee lo nisdoo, grëse nis co biaalo ren ctoo; ni stib ma ne no low biaandraa.

⁴ Laa miñ co bded, zeene laa stib anjl ne rac zho bion ga güey, güeylaata me xcop me grëse guiubee, grëse zaatne rda nis; nacne grëse nis co biaalo ren.

⁵ Dzigo bin naa tsi anjl ne rnabey nis, rëb me lo Dios:

—Dios, ible rieguial miñe been luu i; luu ne nac luu men mbe ne ni tib dol rapd, men ne tibaque nac, men ne gdziñd dze gdzëe. Lëew i been luu, squi beenquizh luu grë miech qui miñe zëeb zho,

⁶ sac gon blactaa grë zha ne ngab lo luu, blactaa grë zha ne biadteed xtiidz luu psacsi zho, pxiee zho xchen grë zha co. Miñ qui rquiin zho, guie zho grë ren qui na.

⁷ Zëeba que tsi stib men co zaatne nac lo pcoog len yadoo co, rnee me:

—iDios, luu ne nac luu men ne nroob ne grësew rrieelo run, nligaa ible rieguiala squi beenquizh luu grë zha qui miñe been zho!

⁸ Blozh ga, briece stib anjl ne rac zho tap ga, güey me güeylaata me xcop me lo ngbidz, hor co gocnlëeraa xbiini ngbidz, ptsuuw miech.

⁹ Niicle scale nodzu grë miech co, per ib biablod zho, laa ne nsaan zho xquieñtseeb zho, nleynie zho Dios, leñ psilo zho rneenë zho me, pe nacne noxeel me grë guieñe co.

¹⁰ Zeene briece stib anjl co, güey me güeylaata me xcop me zaatne zobnabey ma ntseeb ne briecequia lo nisdoo ga, dzigo znuse goc tib ncowdoo grëse guiedz ne rnabey ma. Lo yoobdox ne rquia grë miech co, haxta rowye zho ludz zho;

¹¹ per niicle scaw, ib psaand zho xquieñtseeb zho, leñ psilo zho rneenë zho Dios, pe nacne scataa rquia zho yoob, pe nacne scataa quiayaal gdib lad zho.

¹² Zeene laa anjl ne rac zho xoop ga güey, güeylaata me xcop me len guiubee Eufrates, hor cogazh wbidz nis naal ne zhoob guiubee ro co. Nacne bio nëz ted grë men ne zobnabey grë guiedz ne ndxie nëz ne rlan ngbidz.

¹³ Horco gon naa tson me yozh, niaaw zig niaa mbiich, tiba briece ro ma ngol nizhnie co, tiba briece ro ma ntseeb ne briecequia lo nisdoo ga, laa stiba briece ro zha ne noteed xtiidz ma ntseeb co.

¹⁴ Chen menodox nac gza me co, runa grë ncuaañe nroob ne rzee zdox miech; dzigo güeya güeyzodiidzniew grëse zha rnabey ne no dipse lo guidzliu, parne tipse gac zho tilnie zho men ro ne nac Dios, gal dze ro ne gdeed me miñe rieguial tib tib miech.

¹⁵ Tibaque zeene laa men ne rnabey ne ga bnee, në me:

—Zhile gon laa naa guial. Nsin sca golso, sac zigne ranand bizhuan yu pa hor sëeb ngbaan yu, scaque gacnande to pa horpaa guial naa. Dichos zha ne yquiambëz naa, ine mbe xab zho nacw zhow; sac gon mban tsie zho telne scase zo zho zeene laa naa glanso, ni lala tib guieñtodox ga griecequia zho.

¹⁶ Dzigo pcaalsa grë zha rnabey co grë xmenquiib zho, zaatne rnee zha Israel Armagedón.

¹⁷ Horco güey anjl ne nac zho gadz ga güeylaata me xcop me lo me ne rriece lo guidzliu; dzigo bnee tib men co zaatne nac lo zhixcan Dios len yadoo gbaa ga, nguietz zëeb tsi me rnee me:

—iNasi nagon ledaaw blozh bza!

¹⁸ Dzigo psilo nëzrii nëzrec riab belye, loxaque bi rio ratsie nguuzi. Lo belye co, lo bidox co, laa tib zhodox psiloque bni; wlaata ne ndxie miech lo guidzliu, gard gni tib zhodox zig miñ co.

¹⁹ Grë guiedz ne ndxie lo guidzliu, per ni rludraa zha niaaw; zig nac guiedz nroob ne nac Babiloin ga, haxta tson le goca. Horco beenquizh Dios zha

Babiloin, grētaa guielntseeb ne zēeb zho; psiaabzi me zho por grētaa zhian ne pquiaa zho me.

²⁰ Grēse guidzliu win ne no lo nisdoo, rludraa dien yow; grē gui glaa, loxaque nēzrii nēzrec bliaala.

²¹ Min co blozh, zeene psilo bliaal tib guiequiedox lad grē miech co, tib tib guiequie co nēw maase choo kil. Goñ zho scataa noyab guiequie co, laa zho noque rdzibdee zho Dios.

17

Zob tib wnaa yozh lad tib ma ntseeb

¹ Lo gza gadz anjl ne sca blaata grē guielnē co lo guidzliu, lad co brieetib me briaad, nē me lo naa:

—Dē ganle, zeena gluu naa lo luu zha nactaa caxtigw ne yгаа wnaa yozh ne ran luu squi zob lo grēse nis ne no lo guidzliu.

² Lēē wnaa qui pxin guic grēse miech ne no lo guidzliu güeynal zho grētaa guielyozh ne been me; haxta grē zha rnabey, güeynal min co.

³ Sca nolu Espiritu Sant grē ncuaan co lo naa, dzigo güeynie anjl co naa tib dan zit. Ga goñ naa laa wnaa co zoble lad tib ma nroob, ntseeb niaa ma co, zob gadzraa guic ma ni zob tsii zhoz ma; gdipse ma rna nizhnie, gdipse lad ma quia grē diidz ntseeb ne rneenē ma Dios.

⁴ Glaa glaa zhits ma ntseeb co zob wnaa co, masaque nizhnie nlaan, nizhnie ren rna xab me, loxaque grē guib or, grē quie rbebnī, grē quie perl, ngalguiee lad lar co. No tib cop nroob niaa me, niaaw niapse guib or, rrieequia leen co nodzē grētaa guielntseeb, grētaa guielyozh ne run me.

⁵ Ni quia bla lan diidz quia me, rneew: “Lēē guiedz nroob ne nac Babiloin nu, guiedz ne nac xniaa grēse wnaa yozh, guiedz ne nac xniaa grēse zha ne run ncuaañe mbixladz.” Lēē lē me ga, hor coraa bzhoobneñ zha nac lē me.

⁶ Dze rwi naa lo me, dzigo goñ naa rac me zig rac zha ne rzudz. Nziandox zha ne no xnēz Jesús beet me, rrieequia grētaa ren ne pxiee me ga sca noyun me. Bzee zdoo naa, ni bdzieeb naa goñ naa zha rac wnaa co.

⁷ Dzigo nēchaa anjl co lo naa:

—¿Pe nacne rdzieeb luu? Na ganle gni naa lo luu cho nac wnaa co, cho nac ma ne sca zob me lad ga.

⁸ Padzeela no ma ntseeb co, guieñd ma niinapaa, per zhile laa ma grieelēn guierdoo ne nioogyu ma, laa ma grieelē ga parne diunavez nitlo ma; grē zha ne quiad lē lo libr ne zhoobnee cho nac zha ne yгаа guielmban ga, seedox zdoo zho zeene gan zho laa ma grieequia stib, sac tibaque nan zho gutle ma.

⁹ Wen wen pquiaadiaga ganle: gza gadz guic ma ga, rrieequia lēew nac gza gadz gui win nē zob wnaa co zobnabey me.

¹⁰ Ni rrieequiaque lēē gadz zha ne rnabey ga: gaay zho bnabeyle, tib zho quianabey niina, laa stib zho naraa gnabey; per zeene laa zha co guiaad, zhis dze ne gnabey zho.

¹¹ Lozhse gnabey zha co, laa ma gnabeyaque, ma gac zha rnabey co xon, niicle ne yele ma ga goc zha co gadz; gataa laa ma nitlo.

¹² Zhoz ma, rrieequia lēē stsi zha ne gnabey ga, gzase zha co naraa gnabey zho, tipse ycaania zho guielrnabey gza zho ma. Zhisaque dze sca gnabey zho,

¹³ dzigo laa gza tsii zha co guiaan diidz gzo zho ma, ma gac zha nroob lo zho.

¹⁴ Zacnie zho ma, grēse zho tsie tsietilnie zho Xcarner yeen Dios, per znuse gun men ne nac Carner yeen co gan lo zho; sac me nac men ne rnabey lo grēse zha ne rnabey, lo grēse zha ne non. Grēse zha ne tsienal zhits me, tsietilnie zho

ma co, lëë grë zha co nac zha ne bzooblo Dios bredz me zho bgab zho xnëz me, ni ib psaand zho me.

¹⁵ Blozh ga, nëchaa anjl co lo naa:

—Lo grëtaa nis ne gon luu sca zob wnaa yozh co, rrieequia lëë nis co nac grëse guiedz, grëse dii miech ne ndxie lo guidzliu.

¹⁶ Per zdziņ dze lëëque ma ntseeb co, tilnie wnaa co, grë ma gza tsii zha ne rrieequia nac zhoz mā ga; zlēēniedox zho wnaa co, sanwin zho me, haxta xab me cuee zho, znitlo zho me, sēēg zho me lo gui.

¹⁷ Ib Dios csiaab guic zho gnitlo zho wnaa co, ni meque csiaab guic zho gzo zho ma co gac ma zha ne gnabey lo zho; laa me gun min co, parne grieequia grëse minë bneele me no gac.

¹⁸ Laa wnaa co, rrieequia me nac guiedz ro ne rnabey lo grëse guiedz ne ndxie lo guidzliu.

18

¹ Blozh ga, gon naa laa stib anjl ziad-zëëb gbaa, rlu tib anjl nona, dipse lo guidzliu biab biinidoo ne ziaadnie me,

² nguietz zëëb tsi me rnee me:

—jNasi laa guiedz nroob ne nac Babiloin ga nitlo! jLoxaque mendox quianzë ga, loxaque grë ma guix, loxaque grë ma mbixladz cuew!

³ Laaw nitlo, sac noquiila grëse miech ne ndxie lo guidzliu, grëse zha ne rnabey, quiayun zho grëtaa guielyozh ne ruņa. Lo grëtaa guielyozh co quiayun ricwa grëse zha ne ruņ wto; quiaxiņ grë ncuaan co zho, masaque quiayuna zho zig ruņ nziu.

⁴ Dzigo zëëb stib tsi meņ co gbaa, rnee me:

—jGrëse to ne nac to miech ne ngab xnëz naa, golgon diidz, golriee guiedz qui! Ib gunde to doļ ne quiayuna; zeena ygaade to grëtaa guielnë ne ygaaw,

⁵ sac nroobdox nac grë doļ ne quiayuna, telne niaca ncuane cue monton, rrieequia haxta gbaale rdziņ guic monton co; gane ib tedsod zunquizh Diosa grëtaa guielnëntseeb co.

⁶ Gacxe na grëse minë beena miech, mincoque saca. Grëse tel zha psacsiw miech, chop lalga minë teda.

⁷ Zigne squitaa now lo grëtaa ncuane racladza; scagaa na guielnëdoh ne gana, haxta goona lo grëtaa guielnë co. Niats raca rneew: “Naa rnabey. Nacd naa cho zha ne zotib, zig rzac grë wnaa viud; naasi gdziņd dze ne tso naa guielnë.”

⁸ Nli squitaa niats raca, per zeene guiaba ladznia guielgut, ladznia gbin, ladznia grëraa guielnë ne gana, tib dzeque lozha. Ni lozh ga, haxta zeca lo gui; miņ co gnabey Dios teda. jMe nac meņ ro ne gunquizha grëtaa minë beena!

⁹ Grë zha ne rnabey grë guiedz, zha ne scataa bley been grë guielyozh ne ruņa; zeene gan zho goxdoo ne rso noyeca, mban gac zho, zoon zho zio zho xquielnëw.

¹⁰ Zdzieb zho gan zho grëtaa guielnë ne nodeda ga, lo dzeb co, ni lalnu gbigd zho. Lëë gdib so zho goptsie zho, guiab zho: “jProbsaxe luu Babiloin, guiedz nroob, guiedz non nac luu! jPa brieë guielnë qui squi znuse nitlo luu!”

¹¹ Grë zha ne ruņ wto dipse lo guidzliu, ye zho zio zho xquielnëw, mban gac zho guindraa cho si lo zho.

¹² Sac masaque lëëw rzi:

guiib or,
guiib plat,
grë quie non,
grë perl,

grè lar niazh,
 grè lar sed,
 grè lar nizhnie nlaan,
 grè yag ne nex rlaa,
 grè ncuaane niaa marfil,
 grè ncuaane niaa grè yag wen,
 grè ncuaane niaa guuib,
 grè ncuaane niaa brons,
 grè ncuaane niaa quie mármol,
 13 grè blad canel,
 grè guizh scuaan,
 grè yaal ne ndzon rlaa,
 grè guizh, grè nceit ne nex rlaa,
 grè nziu,
 grè nceit,
 grè zhobxtil,
 grè rin niazh,
 grè ma ne rey yo,
 grè mëcwxiiil,
 grè carret,
 haxta grè miech ne runzhoo dziin lo samiech.

14 'Zriequia zha ne guiab lo guiedz co: "¡Bdzinaque dze ne blozh luu, pa sèraa scataa yquianie luu grè ncuaane rdziladz luu! ¡Grètaa ncuaan niazh, grètaa ncuaane rap luu, gdzindraa dze ne gbiire gan luuw!"

15 'Grè zha ne run wto ga, zha ne scataa gocricw lo grè wto ne been zho guiedz co, zdieb zho, zit so zho gan zho grètaa guielne ne nodeda. Zio zho xquielnèw, haxta zoon zho

16-17 guiab zho: "¡Probsaxe guiedz ro qui, squi znuse bnitlow! Biopaa dze gocnona, masaque goca zig tib wnaa ne racw grè lar niazh, grè lar nizhnie nlaan; wnaa ne rna grè guuib or, grè quie non, grè quie perl, rio yan, rio yan nia."

'Grè zha ne rnabey barcw, grè zha ne rsëew, zha ne no lena, ni grèragaa zha ne run dziin lo nisdoo, zit so zho gan zho tsec guiedz co;

18 zeene gan zho goxdoo ne rso noyeca, ziab zho: "¿Zha rnaraa dze ne dzian ne stib guiedz nroob zig guiedz qui?"

19 Mban gac zho, zio zho xquielnèw, zoon zho, squiaadan zho redz, guiab zho: "¡Probsaxe guiedz ro qui squi znuse bnitlow! Lo grètaa dimi ne pquian-iew, blactaa beenricwa ne grè ne grèraa zha ne run dziin rii."

20 'Sca nagon nitlo guiedz co. Grèse to ne nac to zha ne no gbaa, grèse to ne nac to zha ne ngab lo naa, grèse to ne nac to zha ne pxel naa güeynee xtidz naa, zha ne güeyteed xtidz naa, zeene gan to laa guiedz co nonitlo, golley, sac gon ga gunquizh Dios miech ne no ga grètaa mine been zho to.

21 Zeene blozh bnee men co, dzigo gon naa tib anjl, rlu tib anjl macisa, znuse blis me tib quie nroob, niaaw zig niaa quie molin zhobxtil dipse gan bron mew lo nisdoo; blozhse bron mew, nëchaa me:

—Squi nagon nitlo guiedz ro ne nac Babiloin ga, gdzindraa dze ne gbiire gan miecha.

22 Masaque nroobladzdoe ne raca niina, loxaque di noyac grè ro xnèza, zaatne noyool zho vihuel, zaatne noyool zho bzie, zaatne nocuedzga zho trompet, nëzrii nëzrec rac miech zie zho lo xtsiin zho, loxaque lo grè quie molin rzedz nozuo zho zhob; per gal dze co grèsew lozh.

23 Squitaa biini ne rquiaw niina, squitaa tibaque quiaayac guieltsieela, per gal dze co ncowse gnaw, pa sèraa gac lniw. Laaw nitlo, sac blactaa noyungüeta

miech ne no grëraa guiedz ne ndxie lo guidzliu lo grë zhiwseed mendox; pe zhidaa noyuncricwa grë zha ne run wto por grë wseed co;

²⁴pe zhidaa miech zëëba. Nzian zha ne ngab lo Dios, nzian zha ne riadteed xtiidz me, rnabeya ret zho.

19

¹Zeene blozh ga, bin naa zëëb ndal tsi men co nëz gbaa, rlu miech guizhiuw, nguiedz rnee zho:

¡Zha ndzontaa xDios ne! Me nac men ne rsilaa miech, parne ygaad zho lo caxtigw.

Me nac men ne rap poder,
me nac men ne rieguial dziuunnon ne;

²sac gon mesi run me guielwxtis zigne no gaca.

Gacxe waa, sca gunquizh me guiedz qui grëtaa guielyozh ne noyuna, grëtaa xchen zha ne ngab lo me, zha ne bnabeya gut;

rrieequia naca zig tib wnaa yozh,
quiyungüeta miech quiyunctal zho xtol zho.

³Blozh ga, biire bin naa tsi zho, rnee zho:

¡Zha ndzontaa Dios! ¡Min qui nagon rieguiala, gdzind dze ne lozh csow gox!

⁴Horco laa gza galptap mengol co, ni gza tap bult mban co pquitsgzhib lo Dios lo xcan ne zob me ga, haxta bzooblo zho lo liu, beennon zho me, rnee zho: “¡Nliw! ¡Luuse nac men ne ndzon!”

⁵Zëëbaque stib tsi men co zaatne nac lo xcan co, rnee me:

¡Grëse to ne nac to zha ne quiyun dziin lo me,
zha ne rien men non nac me,

zigtaa zha wina, zigtagaa zha nona, golgoolnie me!

⁶Dzigo wbiire bin naa tsi grë miech guizhiu co nëz gbaa, rio bi zëëb tsi zho, pale zeene rio bi nisdoo, zeene riogaa bi rnee grë nguzidox, rnee zho:

¡Golgotsaa dzioolnie ne me!

¡Me nac xDios ne, me nac men nroob ne rnabey!

⁷Golgotsaa gley ne, golgotsaa dziuunnon ne me,

sac gon laa dze bdzin laa Carner yeen ne nac Xpëed me ga ctsieelnia;
grë zha ne ngab lo me,

zha ne rrieequia nac ndzooop ne ctsieelnia Carner yeen co, laa zho nacw-
able.

⁸Masaque rlu zho zig tib ndzooop ne ctsieelnia,
ine nquitsbie, ine rbejni lar niazh ne nacw zho;

me bdeed diidz got zho lar co,

ga rlu ganle mban zho zigne racladz me.

⁹Dzigo rneechaa anjl ne sca bron quie co lo nis:

—Wen zie grë zha ne bredz Dios tsie lo xquieltsieel men ne nac Carner yeen
co.

Bnabey me naa pquia naa diidz co, blozhse ga, nëchaa me lo naa:

—Xtiidz Dios ga gon, me rneew.

¹⁰Horco pquitsgzhib naa lo anjl co ni naa gunnon naa me, per bzhiguiel
me.

—¡Cool! —në me lo naa—. ¡Guso i! Gocnan ganle ye naa tib ngundziinse
nac naa lo Dios, nac naa zigne nacaque luu grë luu grëraa zha ne squi
noxco zienal minë nac zhiwseed Jesús. Dios none gunnon luu, sac gon tib
ngundziinse nac naa bzet naa min co, lëë gdib bne naa ganle zha nac xtiidz
Jesús.

¹¹ Dzigo hor co gon naa bzhal zhan gbaa, ga briequia tib men co zob me lad tib guay nquits, zëëb diidz niapse diidzli rnee me, sac run me guielwxtis zigne no gaca, ni rdilnie me zha ne rieguial tilnie me.

¹² Masaque rbebel bziaalo me, nzian xcuaa coron zob guic me, ni quia stib lê me quia me, loxaque mese nan dien zha nac lê co me.

¹³ Rnadraa xab me di ren, lêë me ga rnee zho: Xtiidz Dios.

¹⁴ Ndal grë menguiib ne no gbaa nal zhits me, ye zho niapse guay nquits zob zho; niapse lar niazh nacw zho, ine nquitsbie rna grë lar co.

¹⁵ Rlu choot grielod gacndaan lo me, masaque zob tib spad lots ro me, laa me nzobro spad co parne tilnie me grë guiedz ne gacntseeb lo me. Masaque me gnabey grëse guiedz, ndip gac xtiidz me, ni tib choot quiitsd mine gnabey me; zeene laa me gunquizh miech grë xquielntseeb zho, cxeel me zhian ne csaab Dios ygaa zho, zun me zho zigne run miech uv zeene rzëeni zhow.

¹⁶ Lad lar ne nacw me ga, ni tib cho cor me, ga quia cho nac me, rnew: "LËË MËN RII NONRAA LO GRËSE ZHA NON, ME RNABEY LO GRËSE ZHA NE RNABEY."

¹⁷ Blozh ga gon naa zo tib anjl lo ngbidz, nguiedz zëëb tsi me rbedz me grëse maxiil ne row grë magut, rnee me:

—jLigier golcaals! jGoltë zeena yquiin to guielwagw ne gneedz Dios lo to niina!

¹⁸ Goltë zeena gow to grë zha ne rnabey grë guiedz, grë zha ne rnabey lo menguiib, grë zhaguiib ne zëëb diidz nac zha valor; goltë gow to grë guay, gow to grë zha ne rzob lad ma. Goltë gow to grëse miech, zigtaa zha ne runcunzho miech dziina, zigtagaa zha ne choot rnabeyda, zigtaa grë zha ne nac zha nona, zigtagaa grë zha wina.

¹⁹ Dzigo gon naa ma nroob ne briequia lo nisdoo ga, ma ne scataa ntseeb rlu ga, psilo ma ptop ma grëse zha ne rnabey grë guiedz ne ndxie lo guidzliu. Pcaalsa zho grë xmenguiib zho, zha guizhiuw, laa zho brie zietilnie zho men ne zob lad guay nquits co grë xmenguiib me.

²⁰ Lo dil co, ga bgaa ma nroob co, ni bgaa zha ne pteed xtiidz ma lo miech; zha ne scataa squi zo ma been zho grë milagr co pquidie zho miech, bio guic zho bio zho xbey ma, ni beennon zho mdio ne rlu zig rlu ma ga. Zigtaa maw, zigtaa zha ne pteed xtiidz ma ga, nguia mban zho laa zho biab tib lo guidox zaatne noyec zufr.

²¹ Laa grëraa zha ne scataa gocnie ma ga, grëse zho gut lo spad ne nzobro men ne zob lad guay nquits co, hor co bdziñbe grëse maxiil ne row magut, güeytow ma grëse ngutoo co haxta biel ma.

20

Bnabey Jesús tib mil iz

¹ Blozh ga, tibaque zeene gon naa laa tib anjl biet gbaa, nzhen me tib liow, ni nzhen me tib caden.

² Dzigo bnaaz me ma ngol ne rna nizhnie ga, meel ne notaque padzeela ga, ma ne nac mendox ga, ma ne nac Satanás ga, bzoob me ma caden co;

³ con liow ne nzhen me ga pxal me tib ro guierdoo, psëëb me ma len guierdoo co. Blozh ga dziits dziits psioog mew, zeena grielod gree ma tsiequidieraa ma miech.

Ga tsogyu ma dipse len tib mil iz, lozhse tib mil iz co ible laa ma no gree ga, sonlaa ma zniip.

⁴ Horco gon naa laa grë zha ne bzo Dios cobey pe nac xtol tib tib miech, laa zho bzob lo xcan ne rieguial sob zho. Gonaque naa xalm grë zha ne psacsi

miech, bga zho yaṅ zho, beet zho zho loxaque ne no zho xnëz Jesús ni bnee zho xtiidz me lo miech; goṅ naa grë zha ne bzhiguield nquitsgzhìb lo ma ngol ne brieequia lo nisdoo ga, bzhiguield zho niunnon zho mdio ne rlu zig rlu ma, niicle bzhiguield zho nio zho xbey ma. Goṅ naa brieëban zho grëse zho, par gbannie zho Jesús, gnabey me grë me zho dipse leṅ tib mil iz.

⁵ Lëë grë zha co nac miech ne glopaa grieëban, laa grëraa menḡut, zha co grieëban zeene laa tib mil iz co gza.

⁶ Dichos grë zha ne glo grieëban ga; lo Diosle ngab zho ga, noxtseebdräa zho guey zho gabìl, masaque lo Dios, lo Jesús guṅ zho dziin, gac zho zig tib pxoz lo me; tipse gnabey me grë me zho leṅ tib mil iz co.

⁷ Zeene blozh tib mil iz co, dzigo goṅ naa laa menḡox brieë zaatne niogyu ma ga,

⁸ güey ma güeyquidie ma zha Gog, güeyquidie ma zha Magog, grëse guiedz ne ndxie lo guidzliu güeyquidie ma miech, tipse been ma zho grëse zho parne tilnie zho Dios. Miech guizhiuw, miech ne lëb ne glab new, guṅ ne cuent yuzh ne ndxie ro nisdoo,

⁹ ntseeb rac zho, grëse zho laa zho bdziṅ zaatne ndxie guiedz ne rleynie Dios, zaatne no grë zha ne ngab lo me ga; per zeene laa zho ndxiele igo guiedz co parne gnitlo zhow, hor co bnabey Dios bliaaḷ gui lad zho, bzëëga zho grëse zho.

¹⁰ Laa menḡox, bnabey me bga ma bey ma lo guidox ne nac gabìl, zaatne nole ma ngol ne sca brieequia lo nisdoo, grop ma co zha ne pteed xtiidz ma ga. Lo guidoxa, niapse zufr noyec lugar co, ga tsu ma dze guieel, gdzindräa dze ne grieë ma ga; caxtigwdox ne ted ma.

Beenquizh Dios miech miṅ been zho

¹¹ Blozh ga, goṅ naa tib men co zob me tib lo xcan ro, dib nquitsbiese rna xcan co. Zigtaa guidzliu, zigtaa gbaaw, zeene goṅa me znuse bichew, per bdziel pa niolana lo me.

¹² Grëse zha ne brieëband glo ga, zigtaa zha nona, zigtaa zha wina, laa zho bdziṅ lo me. Laa zho ndxie ga, zeene laa lo bla libr co bzhial, ni bzhialaque lo miṅ quia lë zha ne bga guielmban cub ne rdeed Dios ga; hor co bgaase zho miṅ rieguial zho tib tib zho tel zha zhubnee lo libr co wban zho.

¹³ Grëse zha ne biaan leṅ nisdoo, bliëequia nisdoo zho, grë zha ne bioliu bliëequia baa zho; grëse zho bliëequia guielgut zho.

¹⁴⁻¹⁵ Blozh ga, zigtaa guielguta, zigtaa zha ne quiad lë leṅ libr ne no lë zha ne bga guielmban ga, laa zho biobe lo guidox ne nac gabìl; lëë guielgut brop ga.

21

¹ Dzigo goṅ naa tib gbaa cub, ni tib guidzliu cub; sac zigtaa gbaa ne rdziunbey ne, zigtaa guidzliuw, zigtagaa nisdoo grësew bnitlo.

² Grop lo naa goṅ naa laa Jerusalén, guiedz ne nacchen Dios ga, ziad-zëëb zhan gbaa brieew zaatne zob me; tib guiedz cuba. Tib guiedz nzhixcuaa naca, pale tib ndzoop nguieg dze ne rtsieelnia zho.

³ Dzigo bin naa nguiedz zëëb tib tsi men co zaatne nac lo xcan ro ne zo gbaa ga, rnee me:

—Nasi nagon laa Dios cuëz lo miech, nasi laa me gbannie zho; zaṅlo zho me, peet guṅfaltraade lo zho.

⁴ Led yedraa niina pa glunë zho, led yedraa niina tsoxtseeb zho lo guielgut, led yedraa niina mban gac zho cuedz zho dien cho guṅ xyudar zho, led

yedraa niina goon zho; grëse nis ne zo lo zho zeene biin zho, niina laa me gunmbew. Grëse ncuuaan co, gdzindraa dze gan zhow.

⁵ Zëeb tsi men ne zob lo xcan co, rnee me:

—Grëse ncuuaane no niina ncuble naca, ni naa beenncuba.

Blozh ga, nëchaa me lo naa:

—Grëse diidz ne gni naa lo luu nu niina gon, pquiaaw, ib none gacnan miecha, sac ncuuaane no gaca.

⁶ iLëew nagon, grëse mine no gac, laaw blozh ben naa! iNaa psilow, ni naa psiaala, naa nac zigne nac letr “a” ni letr “z” lo grëse letr, “a” rsilow “z” riala!

iZha ne në rnab zhis, naa gded nis ne rdeed guielmban guie zho, ygad naa nis co lo zho, peet gacnonda!

⁷ Ni golgacnan ganle, grëse zha ne gdeete diidz lo grë ncuuaane guncat xtol zho, ible zgaa zho grë guielnzaac ne noyaquiet nu, naazhal gbannie zho peet gunfalte lo zho, masaque tib mëed gac zho lo naa.

⁸ Sangue grë zha ne rdzieb gban zigne rnabey naa, grë zha ne rbiche lo naa, grë zha ne run grë ncuuaan mbixladz, grë zha ne rut samiech, grë zha ne rionie zha ne led tsieeld zho, grë zha ne rleynie guielbruj, grë zha ne rleynie grë mdio, grë zha ne tibaque noquidie samiech, grëse zha co mine yгаа zho nac lo guidox ne noyec zufr ga; lëe guielgut brop ga.

Guiedz ne gdziñ zha ne ngab lo Dios

⁹ Lo gza gadz anjl ne bzhen cop ne bio grë guielnë ne gon miech ga, biaadgax tib me lo naa në me:

—Dë ganle zeena gan luu ndzoop nguieg ne gac tsieel men ne nac Xcarner yeen Dios i.

¹⁰ Blozh ga, dzigo güeynie anjl co naa tib guic gui nroob, tib guic gui glaa, ga gon naa guiedz Jerusalén stib, guiedz ne nacchen Dios ga, gonpaa naa bieta zaatne zob Dios, laaw ziad-zëeb gbaa.

¹¹ Masaque rbebela guielndzon ne rap me, lëedaa grë quie niazh ne lë jasp, ni rol rnaw lëedaa grë vidr.

¹² Rna tib biedz nroob, tib biedz glaa ndze igow, quia tsiipchop puert cho biedz co, tibga anjl zo quianap tib tib ro puert co, tib tib puert co neysew tib lë mengoldoo ne goc xpëed Israel.

¹³ Tson puert co quia nëz ya, tsona quia nëz quiet, tsona quia ngali nëz ne rlan ngbidz, stsona quia ngali nëz ne rzëeb ngbidz.

¹⁴ Lo tsiipchop quie nroob ne zob biedz co, tibga lë xpoxtl men ne nac Xcarner yeen Dios ga quia lo co.

¹⁵⁻¹⁶ Rlupaa cuadrad niaa guiedz co; dzigo gon naa no tib bar ne rbix nia anjl co, niaaw niapse guieb or, psilo me ptiix me guiedz co, ptiix me biedz ne ndze igow ga, ni ptiix me xpuerta. Zeene blozh ptiix mew, tib tib nëza no gaay gayoo choo kilómetro, lal ne rzëni miech tsiipchop ngbidz; lal ne zioola lalga nzhen, ni lalgaue glaaw;

¹⁷ Iaa xquielnaal biedz co nzhen lal ne rgaa tsiipchop docen dzit nia ne; ptiix mew zigne rtiixaque ne nac ne miech.

¹⁸ Niapse guieb or niaa guiedz co, zigne rne naa ga, rol rnaw lëedaa vidr.

¹⁹⁻²⁰ Biedz ne ndze igow ga, niapse quie niazh ne lë jasp niaaw; scaque gza tsiipchop quie ne naaz biedz co, niapse quie niazh ngalguieew:

tiba ngalguiee quie niazh ne lë jasp,

tiba ngalguiee quie niazh ne lë zafir,

tiba ngalguiee quie niazh ne lë ágata,

tiba ngalguiee quie niazh ne lë smerald,

tiba ngalguiee quie niazh ne lë ónice,

tiba ngalguiee quie niazh ne lë cornalin,
 tiba ngalguiee quie niazh ne lë crisólito,
 tiba ngalguiee quie niazh ne lë beril,
 tiba ngalguiee quie niazh ne lë topás,
 tiba ngalguiee quie niazh ne lë crisoprás,
 tiba ngalguiee quie niazh ne lë jacint,
 tiba ngalguiee quie niazh ne lë amatist.

²¹ Gza tsiipchop puert ne quiaw ga, tibga quie perl niaa tib tib puert co; nēzyu ne rded grol guiedz co, niapse guiib or niaaw, masaque mbe rol rñaw.

²² Ni tib yadoo gond naa, sac dipse lad guiedz co rleynie zho Dios, rleynie zho men ne nac Xcarner yeen me.

²³ Led yedraa ga rquiin xbiini ngbidz, rquiin xbiini mēē, sac masaque xquielndzon me, ni xquielndzon men ne nac Xcarner yeen me ga nac biini.

²⁴ Grēse miech ne ngab lo me, ine gziini biini co lo zho sē zho lad guiedz co; zha ne bnabey grē guiedz ne bre lo guidzliu, bio dze zha goc zha non, per zeene gdziñ zho ga ye zho zunnon zho me.

²⁵ Led yedraa ga ycow liu, tibaque niini gnaw, tibaque gzhial gza xpuerta.

²⁶ Grēse ncuaañe mbe ne gocnon lo grē guiedz ne bre lo guidzliu, laaw gdziñ ga;

²⁷ sangue grē ncuaañe mbixladz gdziñda ga. Zig nac grē miech ne run grē guielntseeb, grē zha ne tibaque noquidie, gdziñ zhow; loxaque zha ne zhoob lē len xlibr men ne nac Carner yeen co (libr ne no lē zha ne ygaa guielmban cub ne gdeed Dios ga), zha cose gdziña.

22

¹ Blozh ga, blu anjl co tib guiubee lo naa, nē me zha ne guie nis co, zgaa zho guielmban; mbe rol rñaw, haxta rbebel low. Merse zhan xcan ne zob Dios ni zhan xcan ne zob men ne nac Carner yeen co, ga rriee guiubee co,

² rdeda groltaa nēzyu ne rded len guiedz co. Gropse nēz ro guiubee co zēēb yag ne rdeed guielmban, gzobse mēē rquia nex low, tsiipchop vuelt rdeeda nex tib len iz, haxta ye zhiblaga rquiin grē zha ne no ga, parne sacnēd zho.

³ Led yedraa ga no ncuaañe ndziibdee, ga zo zhixcan Dios ni zo zhixcan men ne nac Carner yeen co; grēse miech ne ngab lo me, rleynie zho me runnon zho me.

⁴ Ranlo zho me, grēse zho quia lē me quia zho.

⁵ Led yedraa ga yquiin zho pe gziini lo zho, yquingaa zho xbiini ngbidz, sac Dioszhal rziini lo zho, led yed ga ycow liu; ga gban zho gdziñdraa dze ne griee zho ga.

Ile ziaad Jesús

⁶ Dzigo nēchaa anjl co lo naa:

—Grēse ncuaañe quiayan luu nu, ible ncuaañe no gaca. Bui ganle Dios men ne rdeed guielbiini lo grē zha ne rieteed xtiidz me lo miech, rnee zho ncuaañe naraa gac, mezhal pxeel xanj me ziadnee lo luu, zeena gacnan grēse zha ne ngab lo me ziaadyoble gac grē ncuaañ rii.

⁷ Ible nacle xtiidz men ne rnabey ne, zhile laa me guiaad. ¡Dichos grē zha ne gliladz grē mine noxobneñ Dios nu!

⁸ Grop lo naa gon naa grē ncuaañ rii, naazhal bin znu bnee anjl co. Nacne pquitsgzhib naa lo me ni naa gunnon naa me;

⁹ dzigo nēchaa me lo naa:

—Guso i, rieguiald gunnon luu naa, laa naa nile lo luu ye naa tib ngundziinse nac naa lo Dios, nac naa zigne nacaque luu grē luu grē zha ne noteed xtiidz

meñ ne rnabey ne lo miech, ni grëraa zha ne gliladz miñe noxobnen me nu. Me none gunnon luu.

¹⁰ Blozh ga, nëchaa me:

—Bien, grëse miñe quiayan luu nu, yqueetsd luuw, sac zhile gdziñ dze ne gaca.

¹¹ Lo spalalse dze ne riaan niina, grë zha ne noyun guielntseeb, telne racladz zho mazdraa guielntseeb ne gun zho, maase gun zhow; zha ne runгаа guielyozh, telne mincota rleynie zho, maase gunraa zhow. Sangue grë zha ne noxco gun miñe rnabey Dios, none tsoxoraa zhow; zha ne ngableгаа lo me, none gunraa zho miñe racladz me, gbiched zho lo me.

¹² Horco bin naa tsi meñ ne nac Carner yeen co, në me:

—Psoladza sca gon, iblë zialniob naa; zeene laa naa guial, hor co gded naa miñe rieguial tib tib miech, tel zha wban zho.

¹³ Notaque naa, zig nac grë ncuuan rii naa psilow ni naa csiaala; nac naa zig nac letr “a” ni letr “z” lo grë letr, “a” rsilow, “z” riala.

¹⁴ Dichos grë zha ne noxco guiaanmbe zho nëz lo Dios, sac rrieequia xab zho ga nosanmbe zho, parne grieelo ted zho ro puert ne quia guiedz cub ne nac Jerusalén ga; gdziñ zho ga ine gow zho xnex yag ne rdeed guielmban ga.

¹⁵ Sangue grë miech ne ractseeb lo Dios, zha ne rleynie guielbruj, zha ne rionie zha ne led tsieeld, zha ne rut samiech, zha ne rleynie grë mdio, zha ne loxaque noquidie samiech, ni tib zha co grieelod ted ro puert co.

¹⁶ Naa gon nac Jesús, naa pxel xanj l naa ziaadlu grë ncuuan rii lo luu, zeena grëse zha ne no xnëz naa gacnaa. Naa ga brieequia lo xti rey David, per naa psan grëse xmengol me. Rrieequia naa nac mel ngol ne rziini ral sil.

¹⁷ Zigtaa Espiritu Sant, zigtaa grë zha ne no xnëz me, zha ne rrieequia gac tsieel me ga, laa zho quiambëz me; niicle zha ne gacnanragaa laa me no guiaad, none yquiambëz zho me. Zha ne në rnab zhis, telne gacladz zho zac gbig zho lo me, me gdeed nis ne rdeed guielmban guie zho; ygad me nis co lo zho, peet gacnonda.

¹⁸ Grëse zha ne gon grë miñe pxobnen Dios nu, laa naa rso diidz lo zho: Gneed zho ncuane nacda, sac zha ne gdziibraa diidz zeene gnee zhow, scagaa me, lo grë guielnë ne raquiet nu yгаа miech, zdziibraa me miñe yгаа zho;

¹⁹ zha ne cticheгаа palala zeene gnee zhow, scaque stiche me lë zho lo libr ne zhobnee cho nac zha ne yгаа guielmban ne gdeed me, grieelodraa gdziñ zho guiedz ne blozh goquiet nu, ygaadraa zho yquiuin zho xnex yag ne rdeed guielmban ga.

²⁰ Meñ ne blozh bnee lo naa ga, iblë ziaadniob me rnee me. Gacxe waa, dib zdo naa laa naa rne lo me nu:

—¡Scaw gon Jesús! ¡Dë, laa no quiambiaaz luu!

²¹ Me nac meñ ne gacniën to grëse to, me gunlay to.

Juan